


# Xtiidx Dios



New Testament in Zapotec, Santo Domingo Albarradas  
(MX:zas:Zapotec, Santo Domingo Albarradas)

**Xtiidx Dios**  
**New Testament in Zapotec, Santo Domingo Albarradas (MX:zas:Zapotec, Santo Domingo Albarradas)**

copyright © 2010 Wycliffe Bible Translators, Inc.

Language: Zapotec, Santo Domingo Albarradas

Translation by: Wycliffe Bible Translators, Inc.

**Copyright Information**

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Zapotec, Santo Domingo Albarradas

**© 2010, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

## Contents

San Matew . . . . .	1
San Marcw . . . . .	49
San Lujc . . . . .	80
San Juan . . . . .	130
Ni been ree apóstoles . . . . .	167
Gui'ch par ree bén Rom . . . . .	212
Gui'ch yaløj par ree bén Corinto . . . . .	232
Gui'ch barojp par ree bén Corinto . . . . .	251
Gui'ch par ree bén Galacia . . . . .	263
Gui'ch par ree bén Éfeso . . . . .	270
Gui'ch par ree bén Filipos . . . . .	276
Gui'ch par ree bén Colosas . . . . .	281
1 Ts . . . . .	285
2 Ts . . . . .	289
Gui'ch yaløj par Timoteo . . . . .	291
Gui'ch barojp par Timoteo . . . . .	297
Gui'ch par Tito . . . . .	301
Gui'ch par Filemón . . . . .	304
Gui'ch par ree bén Hebreos . . . . .	305
Gui'ch bacaa Santiaaw . . . . .	320
Gui'ch yaløj bacaa San Pedr . . . . .	325
Gui'ch barojp bacaa San Pedr . . . . .	331
Gui'ch yaløj bacaa San Juan . . . . .	335
Gui'ch barojp bacaa San Juan . . . . .	340
Gui'ch bayon bacaa San Juan . . . . .	341
Gui'ch bacaa San Judas . . . . .	342
Ni balüü Jesucrist loj San Juan . . . . .	344

## Xtiidxza'c Jesucrist ni bacaa San Matew

### *Xdiaagulal Jesucrist* (Lc. 3:23-38)

<sup>1</sup> Guie zëed laj ree bën naj xdiaagulal Jesucrist, bën zëed ree loj xdiaa rey Davi në loj xdiaa Abraham.

<sup>2</sup> Abraham brier laj xdad Isaac, abi' Isaac gojc xdad Jacob, guiáad Jacob gojc xdad Judá con ree bijchaman. <sup>3</sup> Dxel Judá cwa'man Tamar, abi' guyu xi'n reeman brier laj reeman Fares con Zara. Fares gojc xdad Esrom, Esrom gojc xdad Aram. <sup>4</sup> Aram gojc xdad Aminadab, Aminadab gojc xdad Naasón, Naasón gojc xdad Salmón. <sup>5</sup> Salmón gojc xdad Booz, guiáad xniaa Booz brier laj Rahab. Booz cwa'man Rut, abi' xi'n reeman brier laj Obed. Obed gojc xdad Isaí, <sup>6</sup> Isaí gojc xdad rey Davi. Dxel rey Davi con bën goc lacheel Urías guyu xi'n reeman brier lajman Salomón.

<sup>7</sup> Dxel Salomón gojc xdad Roboam, Roboam gojc xdad Abías, Abías gojc xdad Asa. <sup>8</sup> Asa gojc xdad Josafat, Josafat gojc xdad Joram, Joram gojc xdad Uzías. <sup>9</sup> Uzías gojc xdad Jotam, Jotam gojc xdad Acáz, Acáz gojc xdad Ezequías. <sup>10</sup> Ezequías gojc xdad Mainán, Mainán gojc xdad Amón, Amón gojc xdad Josías. <sup>11</sup> Dxel Josías gojc xdad Jeconías con ree bijchaman, tiamp ni guzu ree bën Israel Babilonia zi'c bën yu' ladxguuib.

<sup>12</sup> Chi ma barii reeman Babilonia lod guzu reeman zi'c bën yu' ladxguuib, gojl Salatiel, xdadaman gojc Jeconías. Dxel Salatiel gojc xdad Zorobabel. <sup>13</sup> Zorobabel gojc xdad Abiud, Abiud gojc xdad Eliaquim. Eliaquim gojc xdad Azor, <sup>14</sup> Azor gojc xdad Sadoc, Sadoc gojc xdad Aquim. Aquim gojc xdad Eliud, <sup>15</sup> Eliud gojc xdad Eleazar. Eleazar gojc xdad Matán, Matán gojc xdad Jacob. <sup>16</sup> Jacob gojc xdad Xiëb lacheel Li. Dxel Li gojc xniaa Jesús, bën la gajc Cristo.

<sup>17</sup> Zian gojc, diizd xtiamp Abraham xt xtiamp rey Davi, guyu chidaj generacion, dxel chidaj generacion guyu diizd xtiamp rey Davi xt tiamp ni guzu ree bën Israel Babilonia zi'c bën yu' ladxguuib, abi' zachidaj generacion guyu diizd tiamp ni barii ree bën Israel Babilonia xt chi bidxin dxej gojl Jesucrist loj guidxliuj.

### *Gojl Jesucrist* (Lc. 2:1-7)

<sup>18</sup> Ze gojc gojl Jesucrist: Li, xniaaman, ma naj tia' Xiëb laaman. Per chi gad reeman tia' lasa', guyu xi'n Li por xSprijt Dios. <sup>19</sup> Abi' Xiëb guial najman benza'c, ad guyëntaman nusa'nxtuman Li. Beenman xgab niro'nladxaman laaman ralanzi. <sup>20</sup> Per la'tgaj cayüjnman xgab zian, balüüloj tijb xianjl Dios lojman loj bacaal, rëb anjl guin lojman:

—Xiëb, xdiaa Davi, ad bal rdxebil tia'l Li, din xindo nüüm por xSprijt Dios zëedix. <sup>21</sup> Tijb xindoniguaaw gac xi'n Li, yagu'l lajx “Jesús”, din por laax gra ree xbejnx gac perdon xtol.

<sup>22</sup> Gra ree ni guie gojc persi guzobj xtiidx Dios zi'c gunee bën badëë xtiidxaman loj ree bejn, chi rëbaman:

<sup>23</sup> Tijb biinxdüb chu' xi'n,  
abi' chi galix grii lajx Emanuel,  
rën guiëban: Dios za'në dunuj ree.

<sup>24</sup> Chi baban Xiëb, dxel beenman zi'c gunabee xianjl Dios laaman, cwa'man Li, <sup>25</sup> per ad bagaalt Xiëb laaman xt chi bidxin dxej gojl xi'nman. Dxel bagu' Xiëb laj xindobëz guin JESÚS.

## 2

### *Bignaj ree bén rajc Jesús*

<sup>1</sup> Jesús gojlaman Belén tijb guiedx naaz Judea, tiamp gunabee rey Herodes. Dxel bidxin ree bén rajc, Jerusalén, laa reeman naj magos, za reeman niz oriente. <sup>2</sup> Abi' gunabdiidx reeman, rëb reeman:

—¿Con xrey ree bén Israel, bén ma gojl? Din dunujn diizd duladxan baguiaan xbjalaman xanyabaa, zeel zio'pan din yazuxiban lojman.

<sup>3</sup> Chi biguien rey Herodes zian, dád gyunawëëgaman, nëgajc gra ree bén Jerusalén gyunawëëg. <sup>4</sup> Zeel gurejdx Herodes gra ree bixhioz rniabee ree bixhioz, në ree mextr rajc ley, persi gunabdiidxaman loj reeman banguin naj gal Cristo. <sup>5</sup> Dxel rëb reeman:

—Belén naj galaman, tijb guiedx naaz Judea, din ze bacaa bén badëë xtiidx Dios loj ree bejn:

<sup>6</sup> Lÿj Belén, tijb guiedx naaz Judea, majsi guiedx dobëz najl loj gra ree guiedxro' naaz Judea. Per lasajquil din luguiedx Belén guin grii tijb bén nabee guiniaj tëëman da bén Israel reen.

<sup>7</sup> Dxel ralanzi gurejdx rey Herodes bén rajc guin ree, persi gunabdiidxaman goc balüüloj bajl xanyabaa guin loj reeman. <sup>8</sup> Abi' guxhaalaman laa reeman Belén, rëbaman loj reeman:

—Gol wej, gol bignabdiidxchaaw graczi xcwent xindobëz guin. Abi' chi yadxejlidi laax, laa gol bagojn gajc naj, din në naj chigzuxib lojx.

<sup>9</sup> Chi gulox rëb Herodes loj reeman zian, dxel zë reeman. Abi' bajl xanyabaa baguiaa reeman diizd ladx reeman, nedan loj reeman, xt lod yu' xindobëz guin guzudxen. <sup>10</sup> Chi baguiaa reeman bajl guin, dád babaa reeman. <sup>11</sup> Abi' chi guyu reeman lënü guin, baguiaa reeman xindo guin con xniaax Li. Abi' bazuxib reeman gojp reeman laax respejt. Dxel guxhal ro' xcaj reeman, abi' bazaladx reeman or, në yaal, nëtëë mirra par xindo guin. <sup>12</sup> Chi ma guidxin dxej yaza reeman, dxel bagojn Dios laa reeman loj bacaal chitëë yayejc reeman niz lod za' Herodes, zianan zeel bayejc reeman niz lood ren.

### *Zë reeman Egipto*

<sup>13</sup> Chi ma zia ree bén rajc guin ladx reeman, dxel balüüloj tijb xianjl Dios loj Xiëb loj bacaal, rëbaman:

—Bixche, cwa' xindo guin con xniaax, gol chej niz Egipto. Ni gol guzuj xt chi ganin lëjt, din zaguiil Herodes laax din gugüjtaman laax.

<sup>14</sup> Dxel bixche Xiëb, cwa'man xindobëz guin con xniaax, abi' guxhin guin brii reeman zë reeman niz Egipto. <sup>15</sup> Ni guzu reeman xt güjt rey Herodes. Zian guzobj xtiidx Dios ni gunee bén badëë xtiidxaman loj ree bejn, chi rëbaman: “Babedx da xi'n'an Egipto.”

### *Gunabee Herodes guiët ree xindobëz*

<sup>16</sup> Chi gogbee Herodes guial basquiee ree bén rajc guin laaman, dád bidxe'chaman. Dxel gunabeeman guiët gra ree xindoniguaaw diizd ree xindo qui gojlri ree xt ree xindo ma yu' ree guia' tio'p ijz, xindo yu' ree Belén në gra ree guiedx riga' niz ni, guial yu'guijcaman ni rëb ree bén rajc guin guial ma gojc tio'p ijz ni baguiaa reeman bajl guin.

<sup>17</sup> Zian gojc cumplid ni bacaa Jeremías, bén badëë xtiidx Dios loj ree bejn, chi rëbaman:

<sup>18</sup> Biguien cha' tijb bejn guiedx Ramá, yu' guialroon në guialrbixdiaj, Raquelan cayoon por ree xi'nman, abi' ad rile't chu gusquiejn laaman guial güjt ree xi'nman.

<sup>19</sup> Per chi güt Herodes, dxel balüüloj tijb xianjl Dios loj Xiëb loj bacaal lod zobj reeman, Egipto, abi' rëbaman lojman:

<sup>20</sup> —Bixche, cwa' xindobëz guin con xniaax. Gol baguiaj niz Israel, din ma güjt ree bën guyën nugüjt laax.

<sup>21</sup> Dxel bixche Xiëb cwa'man xindobëz guin con xniaax, bayejc reeman niz Israel.

<sup>22</sup> Per chi gogbee Xiëb guial Arquelao, xi'n Herodes, naj bën canabee niz Judea, bidxebaman naguiaj reeman niz ni. Dxel bagojn Dios laaman loj bacaal din che reeman niz Galilea, dxel zë reeman. <sup>23</sup> Chi bidxin reeman ni, gurej reeman guiedx Nazaret. Zian gojc persi guzobj diidx ni gunee ree bën badëë xtiidx Dios loj ree bejn, guial grii laj Jesús bën Nazaret.

### 3

#### *Diidx gunee Waj bën baroobnijs bejn ree*

*(Mr. 1:1-8; Lc. 3:1-9, 15-17; Jn.1 :19-28)*

<sup>1</sup> Lën ree dxej ni bidxin Waj, bën baroobnijs bejn ree, loj yujbidx niz Judea catie'chaman xtiidx Dios. <sup>2</sup> Rëbaman:

—Gol bayüjn xgab por xtolidi din ma zidyob xguialrniabee Dios.

<sup>3</sup> Xcwent Waj guinan bacaa Isaías, bën badëë xtiidx Dios loj ree bejn, chi rëbaman: Rguien cha' tijb bën rbidxa' niz loj yujbidx, rëbaman:

“Gol beenchaaw xnejz dux Dad ree Dios, gol guxhal tijb nejz nali.”

<sup>4</sup> Con guidxlad camell gojcnë xab Waj, abi' lënman bixii tijb guid. Gudaw tëëman bi'tsu con dxijn yu' dajn. <sup>5</sup> Dxel bën Jerusalén ree në los demazri ree bën Judea nëtëë gra ree bën zobj gadëd ro' guiiw Jordán, brii reeman bicaagdiajg reeman ni rniee Waj. <sup>6</sup> Dxel guxhoobdol reeman, abi' baroobnijs Waj laa reeman loj guiiw Jordán guin.

<sup>7</sup> Per chi baguiaa Waj zien ree bënfarisew në ree bénsaducew bidxin din tiobnijs reeman, rëbaman loj reeman:

—¡Xi'n xindxab! ¿Chu bagojn lëjt din laadi loj castiro' ni zëed? <sup>8</sup> Gol gubajn zagdxe din guiguien guial waliquidi ma bayüjndi xgab por xtolidi, <sup>9</sup> abi' ad bal rlies xvalorgajquidi, rëbidi: “Dunuyn zio'p loj xdiaa Abraham”, din naj rni lëjt xt guiaj guie ree zile' yayüjn Dios xdiaa Abraham. <sup>10</sup> Abi' ree bën ad zinalt xnejz Dios zi'c rayal, ma zidyob dxej ni güünnë Dios laa reeman zi'c rüjnnë bejn tijb yag chi ad rtiatan, rutüügaman laan din che'can. <sup>11</sup> Naj rni lojdi, curobnijsan lëjt con nijs zi'c tijb sen guial ma bayüjndi xgab por xtolidi. Per bën zidnal naj, laaman guroobnijs lëjt con xSprijt Dios con në bajl, din laaman mazri rajp guialrniabee guial lon, abi' ni'qui xgurëchaman ad rayalt gaxhiecan. <sup>12</sup> Abi' zi'c raya trigo zian güünnëman bejn. Din bën zinal ree xnejz Dios chinëman laa reeman lod rniabeeman, guiáad ree bën ad zinalt xnejz Dios guixhiaalaman laa reeman loj bajl ni ad yu't dxej yayü'.

#### *Gurobnijs Jesús*

*(Mr. 1:9-11; Lc. 3:21-22)*

<sup>13</sup> Lën ree dxej zii guza Jesús niz Galilea wejman ro' guiiw Jordán lod za' Waj, din guroobnijs Waj guin laaman. <sup>14</sup> Per ad nuyëntaman nuroobnijsaman Jesús, rëbaman lojman:

—Lüj rayal guroobnijs naj, ad najt rayal guroobnijs lüj.

<sup>15</sup> Dxel rëb Jesús lojman:

—Yo guna gac zian, din mazri zagdxe yaguieen gra zi'c rniabee Dios.

Dxel cwëjb Waj baroobnijsaman laaman. <sup>16</sup> Chi gulox guroobnijsaman, naabzi bari-iman loj nijs guin, dxejczy bixal xanyabaa, abi' baguiaaman zidguiajt xSprijt Dios zi'c tijb palom xt guijcaman. <sup>17</sup> Dxel biguien cha' tijb bejn xanyabaa, rëbaman:

—Bën guie naj da Xi'nan, bën rën da'tan bën rabaanë' tëen.

## 4

*Gojc Jesús prueb**(Mr. 1:12-13; Lc. 4:1-13)*

<sup>1</sup> Dxel binë xSprijt Dios Jesús niz loj yujbidx, din güün xindxab laaman prueb.

<sup>2</sup> Ni guzuman tiuu dxej tiuu guiaal sin gualraw, dxel gulaanman. <sup>3</sup> Abi' bidxin xindxab beenx laaman prueb, rëbix:

—Bal wali najl xi'n Dios, gunabee yayajc guiaj guie ree guiadxtil.

<sup>4</sup> Per badxi' Jesúsán rëbaman:

—Loj xtiidx Dios rëb: “Ad ganaxtizi guiadxtil guiban bejn, nëgajc gra diidx rníee Dios.”

<sup>5</sup> Dxel binë xindxab guin laaman Jerusalén, abi' gulë'pix laaman guijc yadooro' zojb luguiedxzii, <sup>6</sup> abi' rëbix lojman:

—Bal wali najl xi'n Dios, gudidya' diizd guie, din loj xtiidx Dios rëb:

Dios guixhiaal ree xianjlaman din guinia reeman lüj.

Guiniaaz reeman lüj con yaa reeman

chitëe ladx ni'czi tijb guiaj guia'l.

<sup>7</sup> Badxi' Jesúsán, rëbaman:

—Rëb gajc loj xtiidx Dios: “Ad güünl prueb xDadil Dios.”

<sup>8</sup> Dxel binë xindxab guin laaman tijb guijc guia' ya da't, lod balüüx laaman gra ree guiedx riga' loj guidxliuj në ree gualnaza'c yu' loj reen. <sup>9</sup> Abi' rebix lojman:

—Naj gune gra ree ni guie lojl, bal guzuxibil lon guiniajchi' tëel naj.

<sup>10</sup> Badxi' Jesúsán, rëbaman:

—Biquied, xindxab, din loj gajc xtiidx Dios rëb: “Gunajchi' xDadil Dios, tijbzi lojman been sirv.”

<sup>11</sup> Dxel biquied xindxab guin lojman, abi' bi't tio'p choon ree xianjl Dios persi been reeman laaman sirv.

*Rzuloj Jesús rtie'chaman xtiidx Dios niz Galilea**(Mr. 1:14-15; Lc. 4:14-15)*

<sup>12</sup> Chi gogbee Jesús guial yu' Waj ladxguiib, bayejcaman Galilea. <sup>13</sup> Per ad gurejtraman guiedx Nazaret, wejman bisobaman guiedx Capernaum, tijb guiedx riga' gajxh ro' nijs Galilea niz lod goc ree xdajn Zabulón në Neftalí. <sup>14</sup> Zian gojc persi gojc cumplid ni bacaa Isaías, bën badëe xtiidx Dios loj ree bejn, chi rëbaman:

<sup>15</sup> Bén Zabulón con ree bén Neftalí,

në ree bén zojb gajxh ro' nijsdoo, nëtëe ree bén zojb xijch guiw Jordán

con gra ree bén zojb niz Galilea,

lod zojb ree bén ad najt bén Israel,

<sup>16</sup> gra reeman gubajn loj xcay.

Yan ma brii tijb biani par laa reeman,

abi' biani guin guxhal xquiarguejn ree bén ad nabant xnejz loj Dios.

<sup>17</sup> Diizd dxejzii guzuloj gutie'ch Jesús xtiidx Dios, rëbaman:

—Gol bayüjn xgab por xtolidi din ma zëed gajxh xgualrniabee Dios.

*Rbejdx Jesús tajp ree bén gac xbejnman**(Mr. 1:16-20; Lc. 5:1-11)*

<sup>18</sup> La'tgaj caza Jesús gajxh ro' nijsdoo Galilea, baguiaaman Simón bën la gajc Bëd con bijchaman Andrejs. Cuzaal reeman guijxh loj nijs din guiniaaz reeman bëjl. Guial laan naj xchiin reeman. <sup>19</sup> Dxel rëb Jesús loj reeman:

—Gol tanal naj, din gulün lëjt xhienaag güündi din guto'pídi bejn par Dios luar guiniaazidi bëjl.

<sup>20</sup> Loj hor guin gajc basa'n xguijxh reeman abi' zinal reeman laaman.

<sup>21</sup> Guzaman zatibda'n dxel baguiaaman zatio'p ree bejn, Jacob con bijchaman Waj, xi'ngaan ree Zebedeo. Yu' reeman loj tijb barcw con xdad reeman cayüjnchaaw xguijxh reeman. Dxel gurejdx Jesús laa reeman, <sup>22</sup> abi' basa'n reeman barcw guin con xdad reeman, dxel laa zinal gajc reeman laaman.

*Rülüü Jesús zien ree bejn*  
(Lc. 6:17-19)

<sup>23</sup> Wej Jesús guidibczi niz Galilea, abi' tijbgaj ree guiedx wejman lën ree yadoo persi balüüman bejn ree. Balüüman laa reeman xtiidx Dios, rëbaman loj reeman xhienaag naj xgualrniabee Dios, abi' bayüjnman bën rdoob ree në gra ree bën rajc xhietëez guialguijdxan. <sup>24</sup> Guidibczi niz Siria bire'ch xtiidx Jesús, abi' bidnë reeman bën cusagdiaj ree gadxagayaa ni mal në graloj ree guialguijdx, bën yu' ree xindxab luxdoo, në ree bën rëjtya', nëtëe ree bën ad rilet' suli, abi' bayüjn Jesús laa reeman. <sup>25</sup> Dád zien ree bejn binal laaman, bën Galilea ree, bën zëed ree Decápolis, bën Jerusalén ree, bën zëed ree niz Judea në ree bën zëed stiblad ro' guiiw Jordán.

## 5

*Ni balüü Jesús tijb guiyc guia'*

<sup>1</sup> Chi baguiaa Jesús bën guixiuj ree, wë'paman tijb guiyc guia' abi' gurejman, dxel gubig ree xbejnman lojman. <sup>2</sup> Abi' guzuloj culüüman laa reeman, rëbaman:

*Xiquilbaa ree bejn*  
(Lc. 6:20-23)

<sup>3</sup> —Xiquilbaa ree bën ragbee guial ryaadx gagnë Dios laa reeman, din por zian yayal reeman lod rniabeeman.

<sup>4</sup> Xiquilbaa ree bën yu'naya, din Dios yagu' luxdoo reeman zagdxe.

<sup>5</sup> Xiquilbaa ree bën naj bën chaawladx, din laa reeman tia' guidxliuj ni rëb Dios gudëedaman loj reeman.

<sup>6</sup> Xiquilbaa ree bën rzajc zi'c chi rliaan bejn o chi re'caman nijs zian rën da't reeman güün reeman zi'c rniabee Dios, din Dios gagnë laa reeman din güün reeman zi'c ruladxaman.

<sup>7</sup> Xiquilbaa ree bën raya lasa', din zian yaya Dios laa reeman.

<sup>8</sup> Xiquilbaa ree bën naya loj Dios, din laa reeman guguaa laaman.

<sup>9</sup> Xiquilbaa ree bën rüjn naguiejn cwedxenë lasa', din laa reeman grii laj xi'n Dios.

<sup>10</sup> Xiquilbaa ree bën cadëd loj guialzi por graloj ni rujnnë bejn laa reeman guial cayüjn reeman zi'c rniabee Dios, din laa reeman yayal lod rniabeeman.

<sup>11</sup> Xiquilbaadi, chi rüjnnë reeman lëjt xhiernarajc në chi rnieeguijdx reeman lëjt nëtëe chi rudxiib reeman guijquidi graczi, guial najdi da bejn. <sup>12</sup> Gol badxe' luxdoodi nix, gol babaa tëe din narooob naj ni gunee Dios lojdi xanyabaa. Abi' lëjt ragbee guial ziangajc basagzi reeman bën badëe ree xtiidx Dios loj ree bejn gocli chi gadidi gui't loj guidxliuj.

*Lëjt naj zi'c zëd në zi'c bajl*  
(Mr. 9:50; Lc. 14:34-35)

<sup>13</sup> Lëjt naj zi'c zëd loj guidxliuj guie. Per bal id naxijran, ¿xhieza naag yayajcan naxij zatijb? Achetri dxiin güünan, gaz guire'chan abi' chë'p ree bejn guijcan.

<sup>14</sup> Lëjt naj zi'c tijb biani loj guidxliuj guie, naj tëedi zi'c tijb guiedx ni riga' tijb guiyc guia' abi' ad zajct guiguie'chan. <sup>15</sup> Ad ritiaguij tëet tijb guiyc par guida'cwan lën tijb yagalm, ritiaguijn persi rzojban ya din gusnin loj gra ree bën yu' lënü. <sup>16</sup> Ziangajc lëjt, gol gojc zi'c biani loj ree bejn, din chi guguaa reeman ni zagdxe cayüjndi guza't reeman xDadidi Dios zagdxe bën yu' xanyabaa.

*Rülüü Jesús xcwent ley*



<sup>17</sup> 'Ad naladxidi zialan par gūnan ley tiblād, ley ni badēē Dios loj Moisejs o ni balüü ree bēn badēē xtiidx Dios loj ree bejn, zialan par gūnanan cumplid. <sup>18</sup> Din naj rni lojdi, la'tgaj yu' xanyabaa nē guidxliuj, ad ziquiedt tijb punt o tijb lejtr loj ley xt chi gac gra ni naj gac. <sup>19</sup> Zianan zeel bēn ad ruzoobt tijb mandamient ni zēēd loj ley guin majsi nidobēz naj mandamient guin, bal rulüü tēēman bejn ree gūn reeman zian, laaman lasajc ta'nzi lod rniabee Dios. Per bēn ruzoob gra ree mandamient ni zēēd loj ley guin, rulüü tēēman bejn ree guzoob reeman laan, laaman naj mazri bēn lasajc lod rniabee Dios. <sup>20</sup> Zeel naj rni lojdi, bal id zabajndi mazri zagdxē guial loj ree mextr rajc ley nē ree bēnfarisew, ad zayaltidi lod rniabee Dios.

*Rulüü Jesús xcwent guialrdxe'ch lasa'*

*(Lc. 12:57-59)*

<sup>21</sup> 'Lējt ragbee guial rēb Dios loj ree xbēngulalidi: “Ad gugūjtil bejn, din bēn gugūjt bejn yayalaman casti.” <sup>22</sup> Per naj rni lojdi, chutēēz bēn rdxe'chnē lasa', yayalaman casti, nē bēn rniee diidxguijdx lasa' xt loj guxtis zajc cheman, guiáad bēn rēb loj lasa' achet sirv lüj, laaman yayal loj bajl yu' gabijl.

<sup>23</sup> 'Zeel bal zinēl gon lēn yadoo abi' yagaj rusaaladxil guial yu' bēn rdxe'chil, <sup>24</sup> basa'nsii xgonl yagaj, yalojxgaj babenē bēn rdxe'chil zagdxē, dxel ma zile' yayejqul din gusa'n xgonl.

<sup>25</sup> 'Bal chu bēn rudēēd lüj loj guxtis, baya'nnēman diidx zagdxē la'tgaj yu' tiamp, chitēē yayūman lüj loj guxtis, abi' guxtis guin nabee chu'l ladxguiib. <sup>26</sup> Naj rni lüj, ad zariitil ladxguiib guin xtczi quixil gra ni na guxtis guin.

*Rulüü Jesús xcwent guialrzunē lacheel ben ren*

<sup>27</sup> 'Lējt ragbee guial loj ley rēb: “Ad sunēl lacheel ben ren.” <sup>28</sup> Per naj rni lējt, chutēēz bēn rüjn xgabmal chi ruguiaaman tijb bēngunaa, con laan ma beenman dol lēn luxdooman por bēngunaa guin.

<sup>29</sup> 'Bal laagajc guiaaløj ladbeel rüjn din gūnūl dol, mazri zagdxē naj gulēēn bazaalan zijt. Din mazri zagdxē naj nit tiblād guiaaløj luar che guidibil gabijl. <sup>30</sup> Abi' bal laagajc yaa ladbeel rüjn din gūnūl dol, gutū'n bazaalan zijt. Din mazri zagdxē naj nit tiblād yaal luar che guidibil gabijl.

*Rulüü Jesús xcwent guial rala' lasa' bejn*

*(Mt. 19:9; Mr. 10:11-12; Lc. 16:18)*

<sup>31</sup> 'Ma bacaagdiajg tēēdi: “Chutēēz bēn rala' lacheel, rayal gudēēdaman gui'ch lojman guial ma bala' lasa' reeman.” <sup>32</sup> Per naj rni lējt: Xinguaaw rala' xbēngunaa, abi' ad za'nēt bēngunaa guin xin ren, laagajc laax cayūjn din sunē xbēngunaax xin ren. Abi' xin tia' bēngunaa guin dolan cayūjnx.

*Ad rayalt guza't xlia' bejn Dios*

<sup>33</sup> 'Rēb tēē Dios loj ree xbēngulalidi: “Ad guza't xlia'di Dios, rayal gūndi cumplid ni rēbidi gudēēdidi lojman.” <sup>34</sup> Per naj rni lojdi: Ad rayaltczi guza'tidi Dios, ni'qui xanyabaa par chililadx reeman lējt din ni zojb Dios, <sup>35</sup> ni'qui guidxliuj din loj guidxliuj naj lod ruzuj guia'man, ni'qui Jerusalēn din laan naj ladx rey mazri rniabee. <sup>36</sup> Ad guza't tēē guijquidi par chililadx reeman lējt, din ni'qui tijb guidxguijquidi ad zajct gūndi ni ya's o ni naquich ya. <sup>37</sup> Zagdxeli con gol gūjdx “an” o “a'n”, din los demazri ree ni guinieedi loj xindxab zan.

*Ad yadxi'di ni mal por ni mal*

*(Lc. 6:29-30)*

<sup>38</sup> 'Lējt ragbee guial loj ley rēb: “Bēn cwēē guiaaløj, gulēē gajc guiaaløjman. Guiáad bēn cwēē layil, gulēē gajc layaman.” <sup>39</sup> Per naj rni lējt: Ad yadxi'di ni mal por ni mal, bal chu chēēz xhajg ladbeedi, gol badēē stibladan chēēzaman. <sup>40</sup> Bal chu bēn tilē lüj

din cwëëxuuman xmanguil, badëë në xchamarril tia'man. <sup>41</sup> Abi' bal rüjn reeman lüj naguiejn güül tijb yuu din sanëlan tib kilometro, guzanën tio'p kilometro. <sup>42</sup> Chutëëz bën rniab xhienin lojl, badëëdan, bal chu tëë rgui'n xhienin lojl ad bal cwexuul gudëëdilan.

*Guyën bën rdxe'ch lüj*  
(Lc. 6:27-28, 32-36)

<sup>43</sup> 'Ragbee tëëdi rëb ree bejn: "Guyën bën rën lüj, bidxe'ch tëë bën rdxe'ch lüj." <sup>44</sup> Per naj rni lojdi: Gol guyën bën rdxe'ch lëjt, gol gurejdx tëë Dios por ree bën rzunal lëjt, din güün reeman lëjt ni mal. <sup>45</sup> Din zian gaquidi xi'n xDadidi Dios bën yu' xanyabaa, din laaman ruslejn xgubijdxaman par ree benza'c në par ree benmal, ruscal tëëman guia par ree bën naban zi'c rayal në par ree bën ad nabant zi'c rayal. <sup>46</sup> Din bal rëndi ganaxzi bën rën lëjt, ¿xhieza tia'di loj Dios zian? Din xt bëndol ree rüjn zian. <sup>47</sup> Abi' bal ganaxzi bën rëndi rugajpdiozidi, ¿xhieza ni zagdxe cayüjndi? Din xt bën ad nünbeet ree Dios rüjn zian. <sup>48</sup> Zeel gol gojc benza'c, zi'c naj xDadidi Dios bën yu' xanyabaa.

## 6

*Xhienaag gagnë lasa' bejn*

<sup>1</sup> 'Ad güüнди ni zagdxe niz loj ree bejn naabzi par yadxaløj reeman lëjt. Din bal güüнди zian, xDadidi Dios bën yu' xanyabaa achet guneman lojdi. <sup>2</sup> Zeel chi güünl yudar bën ryaadx xhienin, ad gütie'chil diidx par gagbee bejn xhie cayüjnl zi'c rüjn ree bën rusquiee, lën ree yadoo në ree lunejz, din guilies bejn xvalor reeman naj reeman benza'c. Per diidxliczi rnin lojdi, laazan naj ni rayal reeman. <sup>3</sup> Zeel chi güünl yudar bën ryaadx xhienin, ni'czi loj xmiwda'til ad gül diidx ni cayüjnl. <sup>4</sup> Mazri zagdxe lüjzi gagbee ni cayüjnl, abi' xDadil Dios laaman cuguiaa ni cayüjn lüjzi, laaman gunee ni rayalil.

*Xcwent xhienaag cwedx guiniab bejn Dios*  
(Lc. 11:2-4)

<sup>5</sup> 'Chi cwedx guiniabidi Dios, ad güüнди zi'c rüjn ree bën rusquiee, bën ruladx ree rzuli par cwedx guiniab reeman Dios lën ree yadoo në ree xquin nejj, din yadxaløj bejn laa reeman. Din naj rni lojdi, laazan naj ni rayal reeman. <sup>6</sup> Per lüj chi cwedx guiniabil Dios, bayu lënu lidxil, basiaaw ro' port, dxel gurejdx gunab Dios bën za'në lüj. Abi' laaman cuguiaa ni cayüjn lüjzi, laaman gunee ni rayalil.

<sup>7</sup> 'Chi rbejdx rniabidi Dios, ad radxi'di diidx guin guië'tzi guië't naabzi par gacxhie xtiidxidi, zi'c rüjn ree bën ad nünbeet Dios. Din laa reeman naladx guial zien ni rniee reeman mazri guidxga' Dios laa reeman. <sup>8</sup> Ad güüнди zi'c rüjn reeman, din xDadidi Dios ma ragbeeman xhie ryaadxidi chi gadidi guiniab laan. <sup>9</sup> Zeel chi cwedx guiniabidi Dios, gol güjdx:

Dad, lüj yu' xanyabaa,  
rayal yaya'p da'tan lajl respejt.

<sup>10</sup> Gac zi'c rniabeel.

Gac zi'c rënl loj guidxliuj zi'c rajc xanyabaa.

<sup>11</sup> Banee ni yadaawan guixie guixie.

<sup>12</sup> Been dunujn perdon gra ree ni mal ma baguieenan  
zi'c raguieenan perdon bën rüjn ree dunujn ni mal.

<sup>13</sup> Ad guslaal dunujn yaguieenan dol,  
babëë dunujn loj gra ni mal.

<sup>14</sup> 'Din bal güüнди perdon bën rüjn lëjt ni mal, ziangajc xDadidi Dios bën yu' xanyabaa züjn gajcaman perdon xtolidi. <sup>15</sup> Per bal id züjndi perdon bën rüjn ree lëjt ni mal, ziangajc xDadidi Dios ad züjntaman lëjt perdon.

*Xcwent guialrba'n*

<sup>16</sup> 'Chi rba'ndi ad güün lojdi naya, zi'c rüjn ree bén rusquiee din guguaa bejn guial naba'n reeman. Naj rni lojdi, guial laazan naj ni rayal reeman. <sup>17</sup> Per lüj, chi rba'nl, gudiib lojl gudüjn tää guijquil <sup>18</sup> chitää gagbee ree bejn guial naba'nl. Tijbzi xDadil Dios bén za'nä lüj naj bén gagbee laan, abi' laaman gunee lüj ni rayal tia'l.

### *Guialnaza'c yu' xanyabaa*

*(Lc. 12:33-34)*

<sup>19</sup> 'Ad guto'pidi guialnaza'c loj guidxliuj guie lod zajc tiabe reen o xhin reen o chu' xingubaan cwan laa reen. <sup>20</sup> Zagdxeli gol been naguiejn gol been gan guialnaza'c yu' xanyabaa lod ad zacabet reen, lod ad zaxint reen, lod ad zu tää xingubaan cwan laa reen. <sup>21</sup> Lod gapil guialnaza'c guin yagaj su luxdool.

### *Guiaaloj bejn naj zi'c biani*

*(Lc. 11:34-36)*

<sup>22</sup> 'Guiaaloj bejn naj zi'c tijb biani par xcuerpaman. Zeel bal cayüjnl ni zagdxe, guidib xcuerpil rajp biani. <sup>23</sup> Per bal cayüjnl ni mal, guidib xcuerpil naj zi'c lod nacay, zi'c naj lod nacaybuu.

### *Dios ya o milia*

*(Lc. 16:13)*

<sup>24</sup> 'Ad zile't chu güün sirv loj tio'p patron, din zadxe'chaman tijbaman abi' guiënman stijbaman, o gacaman benza'c con tijbaman abi' ad zëntaman stijbaman. Zeel ad zile't güüdi sirv loj Dios në loj milia.

### *Ahetczi rayal chu' bejn xgab*

*(Lc. 12:22-31)*

<sup>25</sup> 'Naj rni lëjt: Ad chu'di xgab por ni gawidi në por ni guië'di din guibandi, ni'qui por lajd ni gacwidi. Guialnaban mazri lasajc guial loj guialraw, abi' xcuerp bejn mazri lasajc guial loj xabaman. <sup>26</sup> Gol baguaa ree be rzuj xanyabaa, ad rxübint reeb, ad rato'p tää reeb guialnaza'c, ad naj tää lod cu'chaaw reeb guialnaza'c guin. Per xDadidi Dios bén yu' xanyabaa rudëed ni raw reeb. Abi' mazri lasajquidi guial loj reeb. <sup>27</sup> Abi' tää, ¿wen guial ru da'tidi xgab ma güün lëjt mazri ziool ya?

<sup>28</sup> ¿Chexquiza zeel dád rudi xgab por xabidi? Gol baguaa xhienaag rni's ree guiaa dajn. Achet dxiin rüjn reen ad rguib tää reen, <sup>29</sup> per ni'qui rey Salomón ad guzujchaawt zi'c za'chaaw ree guiaa majsi mast guzujchaawaman. <sup>30</sup> Abi' bal gui'xh dajn ruzujchaaw Dios yan, majsi guixiezi che'can. Diidxgui lëjt bén ad rliladxza'ct ree laaman, nid zuneeman ni gacwidi ya. <sup>31</sup> Zeel ad rudi xgab xhie gawidi, o xhie guië'di, o xhie gacwidi. <sup>32</sup> Din bén ad nünbeet ree Dios rüjn zian, laa reeman ru xgab por gra ree ni guin. Per lëjt yu' xDadidi xanyabaa, abi' laaman ragbeechaaw xhienin ryaadxidi. <sup>33</sup> Per yalojxgaj gol baguiil güüdi zi'c rniabee Dios, gol been tää zi'c rënman, dxel laaman gunee gra ree ni ryaadxidi. <sup>34</sup> Ad chu'di xgab por ni gac guixie, gol basa'nan par guixie, zagdxeli gol guyu xgab tib dxejgaj.

## 7

### *Xcwent guialrula'ch*

*(Lc. 6:37-38, 41-42)*

<sup>1</sup> 'Ad gula'chidi bejn chitää saquidi zian. <sup>2</sup> Din bal rula'chidi bejn ziangajc saquidi, zi'c rüjnnëdi bejn ziangajc güünnë reeman lëjt. <sup>3</sup> Ad gula'chidi bén ren por falt dobëz ni rajpaman, zagdxeli gol guyu xgab por falt narooob ni rajpidi. <sup>4</sup> Abi' bal mazri falt narooob rajpidi, ¿xoza guiëbidi loj stijb bejn: “Ad laat naj ni rüjnl”? <sup>5</sup> ¡Bén rusquiee! Yalojxgaj gol been zi'c rayal, chi ma rüjndi zian dxel ma zile' guiëbidi loj stijb bejn: “Ad laat naj ni rüjnl.”

<sup>6</sup> 'Ad güündi naguiejn güüncwent ree bën ad rënt güüncwent xtiidx Dios, chitëë xhie güünnë reeman lëjt. Din bal güündi zian, laan naj zi'c chi ruzaal bejn tijb ni nagle' loj bë'cw, o chi ruzaal bejn tijb ni lasajc loj cüch abi' chë'pzib guijcan.

*Ni guiniabidi zaca'dan*  
(Lc. 11:9-13; 6:31)

<sup>7</sup> 'Naj rni lëjt: Gol gunab loj Dios, abi' laaman gunee ni rniabidi. Gol baguuilaman, zadxejlidi laaman. Gol gurejdx gunabaman, züjncwentaman lëjt. <sup>8</sup> Din bën rniab, zaca'man. Abi' bën rguuil, zadxejlaman, guiáad bën rbejdx rniab laaman, züjncwentaman laaman.

<sup>9</sup> 'Lëjt najdi dad, ¿wen zudëedi tijb guiaj loj xi'ndi ya chi guiniabix guiadxtil?, <sup>10</sup> ¿o zudëedi tijb bëël ya chi guiniabix bëjl? <sup>11</sup> Nacli lëjt najdi bëndol rajc rudëedi ni rën xi'ndi. ¿Diidxgui xDadidi bën yu' xanyabaa, nid zudëedaman ni zagdxe loj ree bën rniab laan ya!

<sup>12</sup> 'Gol beennë ree bejn zi'c rëndi güünnë reeman lëjt. Din zian rniabee xley Dios në ni bacaa ree bën badëë xtiidxaman loj ree bejn.

*Port nadëë*  
(Lc. 13:24)

<sup>13</sup> 'Gol been naguiejn din chu'di niz ro' port nadëë. Din port gulajg në nejj gulajg, laa reen naj ni zinë bejn loj nejj mal, abi' zien bejn zë loj nejj guin. <sup>14</sup> Per port nadëë guin në nejj nadëë guin laa reen naj ni rnë bejn lod yu' guialnaban tiblayaa, abi' ta'nzi ree bejn zë loj nejj guin.

*Por ni rüjndi zayünbee ree bejn lëjt*  
(Lc. 6:43-44)

<sup>15</sup> 'Gol gojp cudad con ree bën rusquiee rëb rudëed reeman xtiidx Dios. Din rulüü dád bën chaawladx reen, per rüjnzi reeman par gusquiee reeman bejn. <sup>16</sup> Per zayünbeedi laa reeman por ni rüjn reeman, din ad rtiat uv loj yaquiëjch ad rtia tëët higo loj gui'xh guiëjch. <sup>17</sup> Zeel gra yag zagdxe rtia ni zagdxe lojn. Guiáad gra yag guiidx rtia ni guiidx lojn. <sup>18</sup> Ad rtiat ni guiidx loj yag zagdxe, ad rtia tëët ni zagdxe loj yag guiidx. <sup>19</sup> Gra yag ad rtiat ni zagdxe, rirugan dxel re'can. <sup>20</sup> Ziangajc lëjt zayünbeedi laa reeman por ni rüjn reeman.

*Ad grat bejn chu' lod rniabee Dios*  
(Lc. 13:25-27)

<sup>21</sup> 'Ad grat ree bën na lon: “Dad, Dad,” chu' lod rniabee Dios, ganaxzi ree bën rüjn zi'c rën da Dadan, bën yu' xanyabaa. <sup>22</sup> Dxejzii, zien ree bën na lon: “Dad, Dad, por lüj batie'chan xtiidxil, abi' guial baza'tan lajl balëen xindxab ree luxdoo ree bejn, baguieen tëen zien ree milagr guial baza'tan lajl.” <sup>23</sup> Dxel guiën loj reeman: “Ad benbeetczan lëjt, gol gubi'ca lon bëndol.”

*Tio'p loj cimiant*  
(Lc. 6:47-49; Mr. 1:22)

<sup>24</sup> 'Chutëëz bën rucaagdiajg da diidxan abi' rüjnman ni rën, laaman naj zi'c tijb bën nasin gules xcimiant lidx loj guiaj. <sup>25</sup> Abi' gol guia, dxel biguiajt nijs ro' gubi' tëë bidoxh, gulaj reen lad yu' guin, per ad gulenxantan guial naj xcimiantan loj guiaj. <sup>26</sup> Per bën riguiejn da diidxan abi' ad rüjntaman ni rën, laaman naj zi'c tijb bën ad nasint bazoob lidx loj üx. <sup>27</sup> Abi' chi gol guia biguiajt nijs narooob, gubi' tëë bidoxh. Abi' gulaj reen lad yu' guin zianz gulenxanan, ni'qui tibda'nan ad baya'nt.

<sup>28</sup> Chi gulox guneenë Jesús bën guin ree, graczi reeman badxa da't loj zi'c balüüman laa reeman, <sup>29</sup> guial rulüüman laa reeman zi'c bën rajp guialrniabee, ad zi'c rulüüt ree mextr rajc ley.

## 8

*Rayüjn Jesús tijb bén rajc guialguijdx la lepra*  
(Mr. 1:40-45; Lc. 5:12-16)

<sup>1</sup> Chi baza Jesús ruguia' guin, dád zien bejn nal laaman. <sup>2</sup> Dxel gubig tijb bejn lojman rajcaman guialguijdx la lepra, abi' bazuxibaman lojman, rëbaman:

—Dad, bal tiëbil, zile' yayüjnl naj.

<sup>3</sup> Dxel basli yaa Jesús baqui'man laaman, rëbaman:

—Rënan. Bayajc.

Chi rëb Jesús zian, loj hor ziigajc biquied guialguijdx guin abi' bayaman. <sup>4</sup> Dxel rëb Jesús lojman:

—Bacaagdiajg ni ganin lüj. Achu loj guiëbil guial ma bayajquil. Lojzi bixhioz wej din guguaaman lüj, binë gon ni rayal chinël zi'c gunabee Moisejs, din gagbee gra ree bejn guial ma bayajquil.

*Bayajc xmojs tijb bén suldad rniabee ree suldad*  
(Lc. 7:1-10)

<sup>5</sup> Chi guyu Jesús luguiedx Capernaum, tijb suldad Rom rniabee ree suldad bibig lojman, guzajcaman laaman liaadx, <sup>6</sup> rëbaman:

—Dad, laa da mojsan naga' lidxan ragxuux. Ad rile't chixchex, dád cusagzi guialguijdx guin laax.

<sup>7</sup> Dxel rëb Jesús lojman:

—Gan din yayünan laax.

<sup>8</sup> Badxi' bén rniabee ree suldad guinan, rëbaman:

—Dad, ad rayaltan chu'l lidxan, per gunee diizd guie din yayajc da mojsan. <sup>9</sup> Din zi'c naj yu' ree bén rniabee naj, ziangajc naj yu' ree da suldadan xin rniabeen. Chi rën loj tijb reex: “Wej”, rejx, chi rën loj stijbix: “Guda,” ri'tix. Abi' chi rë loj da mojsan: “Been ni guin”, rüjnxan.

<sup>10</sup> Chi biguiejn Jesús zian, dád badxalojman abi' rëbaman loj ree bén zinal laaman:

—Naj rni lojdi, ni'qui Israel ad wadxaaglojtan tijb bén rliladx Dios zi'c rliladx bén guin Dios. <sup>11</sup> Naj rni lëjt, dád zien ree bén gralad yayal gawnë Abraham, në Isaac, në Jacob lod rniabee Dios. <sup>12</sup> Guiáad ree bén rayal niu lod rniabee Dios, laa reeman yayal lod nacay da't lod goon reeman lod gaw tää lay reeman.

<sup>13</sup> Dxel rëb Jesús loj suldad rniabee guin:

—Baguiaj lidxil, gac tää zi'c ma bililadxil.

Abi' loj hor guin gajc bayajc xmojs bén guin.

*Rayüjn Jesús xnasuegr Bëd*  
(Mr. 1:29-31; Lc. 4:38-39)

<sup>14</sup> Chi we Jesús lidx Bëd, baguiaaman xnasuegr Bëd naga'man yu'man xliaa. <sup>15</sup> Dxel gunaazaman yaaman, abi' bariiman xliaa guin, dxel bixchewan guzuloj cayaanman laa reeman.

*Rayüjn Jesús zien ree bénragxuu*  
(Mr. 1:32-34; Lc. 4:40-41)

<sup>16</sup> Chi ma caxhin, binë ree bejn zien ree bén yu' xindxab luxdoo loj Jesús. Abi' con tijb diidx ni guneman babëëman xindxab guin luxdoo reeman, bayüjn tääman gra ree bénragxuu. <sup>17</sup> Zian gojc persi gojc cumplid ni rëb Isaías, bén badëë xtiidx Dios loj ree bejn, chi rëbaman: “Laaman zignë dux guialguijdx ree, laa tääman zignë dux guialzi ree.”

*Bén rën chinal Jesús*  
(Lc. 9:57-62)

<sup>18</sup> Chi baguiaa Jesús bénguixiuj nayaw laaman, gunabeeman tédaman stiblad ro' nijs naj yagaj. <sup>19</sup> Dxel gubig tijb mextr rajc ley loj Jesús, rëbaman:

—Mextr, rēnan guidnaalan lūj bantēez guin chel.

<sup>20</sup> Abi' rēb Jesús lojman:

—Bēz ree yu' xbilīaa reeb, abi' ree biguijn yu' xguixbitia's reeb. Per Bén guxhaal Dios ni'qui lod quixh guijcaman ad yu't.

<sup>21</sup> Dxel rēb stijb ree bén zinal laaman:

—Dad, baslaa naj gabenē' da dadan xt chi guiētaman.

<sup>22</sup> Per rēb Jesús lojman:

—Tanal naj, basa'nman con ree bén ad rēnt guidnal naj, laa reeman guquie'ch laaman chi guiētaman.

### *Racwēez Jesús bidoxh*

(Mr. 4:35-41; Lc. 8:22-25)

<sup>23</sup> Guyu Jesús loj barcw con ree xbejnman, <sup>24</sup> abi' la'tgaj zē reeman loj nijs guin dxejlczi gubi' tijb bidoxh, ma cazēēbczi barcw guin xan nijs. Per Jesús naga'yējsaman. <sup>25</sup> Dxel bicwēēn ree xbejnman laaman, rēb reeman:

—¡Dad, gunaj dunujn! ¡Ma cayzēēban xan nijs!

<sup>26</sup> Badxi'man laan rēbaman:

—¿Chexc zeel dád rdxebidi? ¿Chexc zeel ad rliladxza'ctidi naj?

Dxel bixchewan abi' gunabeeman bacwēēz bi guin nē nijs guin. Loj hor ziigajc babedxe reen. <sup>27</sup> Abi' ree xbejnman badxa da't loj reeman, zianz gunabdiidx loj lasa' reeman, rēb reeman:

—¿Chu bén guin, zeel xt bi nē nijs ruzoob xtiidxaman?

### *Tio'p ree bén yu' xinxab luxdoo*

(Mr. 5:1-20; Lc. 8:26-39)

<sup>28</sup> Chi bidxin Jesús stiblad ro' nijs guin, loj xguidxliuj ree bén Gadara, dxel tio'p ree xinguaaw yu' xinxab luxdoo brii reex lad ree baa abi' wej reex loj Jesús. Dád nadoxh reex, zeel ad rīle't chu tēd lunejz guin. <sup>29</sup> Chi baguiaa reex Jesús, gurixdiaj reex rēb reex:

—¿Xhie rēnl con dunujn, Jesús, Xi'n Dios? ¿Zēēdil guie ya din gusagzil dunujn chi gadli dxej guidxin?

<sup>30</sup> Per gajxh yagaj za' zien ree cūch, cayaw reeb, <sup>31</sup> abi' guzajc ree xinxab guin liaadx loj Jesús, rēb reex:

—Bal yabēēl dunujn, banee mod yadxu'n lēn ree cūch guin.

<sup>32</sup> Dxel rēb Jesús:

—Gol wej.

Dxel barii ree xinxab guin luxdoo ree bén guin bayu reex lēn ree cūch guin. Abi' gra reeb guzuloj cuxūn zianz bitidia' reeb ro' tijb bala' xt loj nijs, lod gu' reeb nijs abi' güjt reeb.

<sup>33</sup> Abi' ree bén cayajp cūch guin ree, baxūn reeman. Dxel chi badxin reeman luguiedx guin, be reeman diidx gra ni goc nē gra ni guzac ree bén yu' ree xinxab guin luxdoo.

<sup>34</sup> Dxel gra ree bén guiedx guin brii wej lod za' Jesús, abi' chi baguiaa reeman laaman, guzajc reeman laaman liaadx, din yazaman ladx reeman.

## 9

### *Bayüjn Jesús bén nējt xcuerp*

(Mr. 2:1-12; Lc. 5:17-26)

<sup>1</sup> Dxel bayu Jesús loj tijb barcw, badēdaman stiblad ro' nijs guin abi' badxin ladxaman.

<sup>2</sup> Yagaj binē ree bejn tijb xin nējt xcuerp, naga'x loj da. Chi baguiaa Jesús guial rliladx reeman laaman, rēbaman loj xin ragxuu guin:

—Bagu' luxdool zagdx, xi'n. Ma benan perdon xtolil.

<sup>3</sup> Dxel tio'p choon ree mextr rajc ley been reeman xgab: “Diosan rüjnx tiblax guial rnieex zian.” <sup>4</sup> Per guial gogbee gajc Jesús xhie xgaben cayüjn reeman, dxel rëbaman loj reeman:

—¿Chexc zeel rüjndi xgabmal? <sup>5</sup> ¿Conin mazri nawëëg gac? ¿Guial guiën ya: “Ma benan perdon xtolil” o guiën: “Bixche, guza”? <sup>6</sup> Per yan, gulün lëjt guial naj, Bén guxhaal Dios ra'pan guialrniabee loj guidxliuj guie par gūnan perdon dol ree.

Dxel rëb Jesús loj xin ragxuu guin:

—Bixche. Baca' ni go'til loj. Baguiaj lidxil.

<sup>7</sup> Laa bixchegajquix zia lidxix. <sup>8</sup> Chi baguiaa ree bén guin zian, bidxeb reeman, abi' baza't reeman Dios zagdxe por guialrniabee ni badëëman loj ree bejn.

### *Rbejdx Jesús Matew*

*(Mr. 2:13-17; Lc. 5:27-32)*

<sup>9</sup> Chi baza Jesús yagaj ziaman, baguiaaman tijb xin la Matew. Zojbix lod ruquijxix impuest, abi' rëbaman lojx:

—Tanal naj.

Dxel bisu Matew zinalix laaman.

<sup>10</sup> Tijb dxej chi cayaw Jesús lidx Matew con zien ree bén ruquijxix impuest në ree bén zëëb xtiidx ad nabant xnejz, gra reeman zojbnë Jesús xan mex con ree xbejnman. <sup>11</sup> Chi baguiaa ree bénfarisew zian, gunabdiidx reeman loj ree xbejn Jesús rëb reeman:

—¿Chexc zeel cayawnë xmextridi bén ruquijxix ree impuest në ree béndol?

<sup>12</sup> Chi biguiejn Jesús ni rëb reeman, dxel rëbaman:

—Bénnadaan ree ad ryaadxt reeman doctor, bénragxuu ree laa reeman ryaadx doctor.

<sup>13</sup> Gol chej, gol basiid xhie rën guiëb loj xtiidx Dios lod rëb: “Ni mazri rënan naj guial yaya lasa'di luar guidnëdi gon lon.” Yan, naj ad zialtan par ree benza'c, zialan par ree béndol, din yayüjn reeman xgab por xtol reeman.

### *Rniabdiidx reeman loj Jesús xcwent guialrba'n*

*(Mr. 2:18-22; Lc. 5:33-39)*

<sup>14</sup> Dxel ree xbejn Waj, bén baroobnijs bejn ree, bibig reeman loj Jesús, zianz gunabdiidx reeman lojman, rëb reeman:

—¿Chexc zeel dunujn con ree bénfarisew dád zienvolt raba'nan, guiáad ree xbejnl ad rba'nt reeman?

<sup>15</sup> Badxi' Jesús rëbaman:

—Lod yu' guialruxhliaa, ¿wen runaya ree biooz ya chi za'në xin cuxhliaa guin laa reeman? Per guidxin dxej chiquiedix, dxel guiba'n reeman.

<sup>16</sup> 'Achut rata' lajd cüb loj lajd yojx din zaxü'n lajd cüb guin, abi' mazri quixya'n lajd yojx guin. <sup>17</sup> Ad rgu' tëët reeman vin cüb lën anfr yojx din zaxya' anfr yojx guin, abi' zi'c anfr guin zi'c vin guin zaxin reen. Zeel naj guial chu' vin cüb lën anfr cüb, din ni'qui tijb reen ad zaxint.

### *Bayajc xi'n Jairo në béngunaa bagaal xab Jesús*

*(Mr. 5:21-43; Lc. 8:40-56)*

<sup>18</sup> La'tgaj canee Jesús zian, bidxin tijb bén rniabee lën xyadoo ree bén Israel, abi' bazuxibaman loj Jesús, rëbaman:

—Yangajczi güjt da xi'ndxa'pan, per bal gui'til guixhioob yaal guijquim zabanm.

<sup>19</sup> Dxel zinë Jesús laaman con ree xbejn Jesús. <sup>20</sup> Abi' tijb béngunaa ragxuu ma gojc chiptio'p ijz ad rbëzt ryajbaman rejn, gubigaman niz xijch Jesús abi' bagaalaman guia' xabaman, <sup>21</sup> guial gunaladxaman: “Bal gugaalaman majsi xabzaman, zayajcman.”

<sup>22</sup> Per badxi' loj Jesús, abi' baguiaadxijchaman béngunaa guin, dxel rëbaman lojman:

—Zagdxe bagu' luxdool, xi'n. Ma bayajquil guial bililadxil naj.

Abi' loj hor ziigajc bayajc bén guin.

<sup>23</sup> Chi bidxin Jesús lidx bén rniabee guin, baguiaaman ma riga' ree xinrucwejdx din chiquie'ch reex xi'nman, abi' ree bejn roon rbixdiaj reeman guijquim. <sup>24</sup> Dxel rëb Jesús loj reeman:

—Gol barii guie, din ad güjtt bindo guin, naga'yëjszim.

Abi' baxijdxnë reeman laaman. <sup>25</sup> Chi ma barii reeman, zianz guyuman. Gunaazaman yaa bindo guin dxel bixchem. <sup>26</sup> Abi' guidib niz yagaj bire'ch diidx ni goc.

### *Rayüjn Jesús tio'p bénlutia'p*

<sup>27</sup> Chi baza Jesús yagaj, binal tio'p bénlutia'p laaman, rbixdiaj reeman, rëb reeman:

—¡Jesús, xdiaa Davi, baya dunujn!

<sup>28</sup> Chi badxin Jesús lod zojbaman, dxel bibig ree bén guin lojman, abi' gunabdiidxaman loj reeman, rëbaman:

—¿Rliladxidi ya guial zile' yayünan lëjt?

Badxi' reeman laan rëb reeman:

—Raliduladxan, Dad.

<sup>29</sup> Dxel bagaal Jesús guiaaloj reeman, rëbaman:

—Gac zi'c rliladxidi.

<sup>30</sup> Abi' bayajc guiaaloj reeman, dxel rëb Jesús loj reeman:

—Ad bal chu loj guiëbidi guial bayajc guiaalojdi.

<sup>31</sup> Per naabzi baza reeman yagaj, guzuloj catie'ch reeman diidx guidib niz yagaj ni been Jesús.

### *Rayüjn Jesús tijb bengop*

<sup>32</sup> Chi baza ree bén bayüjn Jesús guiaaloj, dxel bidxinnë ree bejn tijb bengop, yu' xindxab luxdooan. <sup>33</sup> Abi' guloxzi babëë Jesús xindxab guin luxdoo bengop guin, laa guzuloj gajc caneeman. Abi' dád badxaloj ree bejn, rëb reeman:

—Ad goct waguiaa ree lasa' milagr guie niz Israel.

<sup>34</sup> Per ree bénfarisew rëb reeman:

—Bén guin rabëë xindxab luxdoo ree bejn por xguialrniabee gajc xindxab rniabee ree xindxab.

### *Raya Jesús bejn ree*

<sup>35</sup> Wej Jesús gra ree ciuda në ree guiedx ni riga' niz yagaj, abi' beegaj lod rejman ruman lën ree yadoo persi rulüüman bejn ree xtiidx Dios, rëbaman loj reeman xhienaag rniabee Dios, rayüjn tëëman graloj guialrdoob në graloj guialguijdx ni rajc ree bejn.

<sup>36</sup> Chi baguiaa Jesús benzien guin ree, bayaman laa reeman, guial dád naya riga' reeman, riga' reeman zi'c xiil ad rya'pt. <sup>37</sup> Dxel rëbaman loj ree xbejnman:

—Walican zien bejn rën gucaagdiajg xtiidx Dios, per ad zient bén gulüü laa reeman yu'. <sup>38</sup> Zeel gol gunab loj Dios din guixhiaalaman mazri ree bén gulüü laa reeman.

## 10

### *Gulej Jesús chiptio'p ree apóstoles*

(Mr. 3:13-19; Lc. 6:12-16)

<sup>1</sup> Gurejdx Jesús chiptio'p ree xbejnman, abi' badëëman guialrniabee loj reeman din yabëë reeman xindxab luxdoo ree bejn din yayüjn tëë reeman bejn ree graloj guialrdoob në graloj guialguijdx.

<sup>2</sup> Bén guie ree naj guidixiptio'p ree xi apóstoles Jesús: Simón bén gulëëljman Bëd, con bijchaman Andrejs, në Jacob con Waj, bén naj ree xi'n Zebedeo. <sup>3</sup> Në Felip, Tol, Tumajs con Matew bén baquijx impuest, nëtëë Jacob xi'n Alfeo con Lebeo bén la gajc Tadeo <sup>4</sup> në Simón bén bi'ch loj ree bén Cananistas con Judas Iscariote bén yayü Jesús.

### *Rxhiaal Jesús gra ree xbejnman chiglüü reeman xtiidx Dios*

(Mr. 6:7-13; Lc. 9:1-6)



<sup>5</sup> Chi guxhaal Jesús guidxiptio'p ree xbejnman, rëbaman loj reeman:

—Ad chedi niz lod zojb ree bën ad najt bën Israel, ni'qui ree guiedx riga' niz Samaria, <sup>6</sup> gol chejli niz lod zojb ree bën Israel bën ad zinalt ree xnejz Dios. <sup>7</sup> Gol güjdx loj reeman guial ma zëed gajxh xguialrniabee Dios. <sup>8</sup> Gol bayüjn bënragxuu ree, gol basban bën ma güjt ree, gol bayüjn bën rajc ree guialguijdx la lepra, gol babëë tää xindxab luxdoo ree bejn. Zi'cgajc cwa' lagajdi guialrniabee, ziangajc yayüjndi bejn lagajzi.

<sup>9</sup> 'Ad chinëdi or, ni'qui plajt, ni'qui cobr, <sup>10</sup> ni'qui guijxh. Ad bal chinë stib nejz xabidi, ni'qui stib nejz xgurëchidi, ni'qui yagrliaxdidi, din bën rüjn dxiin rayal gudëed ree bejn ni gawaman.

<sup>11</sup> 'Chi guidxindi tijb guiedx o tijb ciuda, gol gule'c ruson chu bën naj benza'c yaya'ndi lidx, yagaj gol baya'n xt chi yazadi luguiedx guin. <sup>12</sup> Abi' chi chu'di lënü guin, gol güjdx loj ree bën zojb yagaj: “Yabe'cdxe Dios luxdoodi.” <sup>13</sup> Bal rayal reeman guialnaza'c guin, zaya'nan con laa reeman guiáad bal id rayal reeman laan zayejcan con lëjt. <sup>14</sup> Guiáad bal yu' guiedx o yu ya lod ad raca't reeman lëjt o bal id rën reeman gucaagdiajg reeman ni guiëbidi, gol baza yagaj, gol gudxijp guxyuj guia'di zi'c tijb sen guial ad bazoobt reeman xtiidxidi. <sup>15</sup> Naj rni lëjt guial dxej ni yadëed ree bejn cwent loj Dios, mazri casti narooob yayal reeman guial loj ree bën Sodoma në Gomorra.

### *Guialzi ni zëed*

<sup>16</sup> Rëb tää Jesús loj ree xbejnman:

—Gol bacaagdiajg ni rnin, naj rxhial lëjt zi'c ree xiil loj ree cuyojt. Zeel gol gojc nasin zi'c bëel, gol gojc tää nadoo zi'c palom. <sup>17</sup> Gol gojp cudad din zayü ree bejn lëjt loj ree guxtis, zaguijn reeman lëjt lën ree yadoo. <sup>18</sup> Abi' xt chinë reeman lëjt loj ree gobernador në loj ree rey guial rliladxidi naj, zian güdi da diidxan loj reeman në loj ree bën ad zinalt xnejz Dios. <sup>19</sup> Per chi chinë reeman lëjt loj guxtis, ad chu'di xgab xhie guinieedi xhie tää naag guinieedan, din chi guidxin hor guinieedi, Dios yazaladx lëjt diidx ni guinieedi. <sup>20</sup> Din ad lëjtta guiniee, xSprijt xDadidi Diosan guiniee por lëjt.

<sup>21</sup> 'Zadxin dxej yayü ree bejn laagajc bijch reeman par guiët reeman. Guiáad ree dad yayü laagajc xi'n reeman, abi' ree bejn zadxe'ch xdad reeman në xniaa reeman abi' yayü reeman laa reeman par guiët reeman. <sup>22</sup> Gra bénguidxliuj guidxe'ch lëjt guial najdi da bejnan, per bën sudxi'ch loj guial rliladxaman naj xt dxej chigra guibanman, laaman yayal xanyabaa. <sup>23</sup> Chi sunal reeman lëjt tijb luguiedx par güün reeman lëjt xhienin, gol chej stijb guiedx, din naj rni lojdi, ad warat xguiedx Israel chedi chi gui't Bén guxhaal Dios.

<sup>24</sup> 'Tijb bejn ad mast lasajc loj xmextraman, ni'qui tijb mojs ad mast lasajquix loj xpatronx. <sup>25</sup> Bén cusiid rayal xhienladxaman chi ma rajcaman zi'c rajc xmextraman guiáad tijb mojs rayal xhienladxix chi ma najx zi'c xpatronx. Nacli naj rniabeen lojdi, gulëelaj ree bejn naj Beelzebú, diidxgui lëjt najdi da bejnan.

### *Chu rayal guidxeb bejn*

*(Lc. 12:2-9)*

<sup>26</sup> 'Ad guidxebidi bejn ree, din achet ni ralan yu' ni ad zaguiet, ni'qui tijb ni naguie'ch ad yu't ni ad zagbeet bejn. <sup>27</sup> Ni canin lëjt naguie'ch, gol güjdxan loj ree bejn, guiáad ni canin lëjt ralan, gol güjdxan loj gra ree bejn. <sup>28</sup> Ad rdxebidi bën rën ree gugüjt lëjt. Din zile' gugüjt reeman xcuerpidi, per xsprijtidi ad zile't gugüjt reeman laan. Gol bidxebli Dios din laaman zile' gunijt xcuerpidi abi' guixhiaalaman xsprijtidi gabijl.

<sup>29</sup> 'Lëjt ragbee guial biguijndoo ree ad lasajct reeb wayëjx, per ni'qui tijb reeb ad zëjtt sin xpermis xDadidi Dios. <sup>30</sup> Guiáad lëjt xt guidxguijquidi graczan nayab loj Dios. <sup>31</sup> Zeel ad rdxebidi din mazri lasajquidi guial loj zien da't ree biguijndoo.

### *Bën rëb loj ree bejn guial najman xbejn Jesucrist*

*(Lc. 12:8-9)*

<sup>32</sup> 'Bén guiëb niz loj ree bejn guial da bejnanan, ziangajc naj guië loj da Dadan Dios Bén yu' xanyabaa guial da bejnanan. <sup>33</sup> Per Bén guiëb niz loj ree bejn guial ad da bejntanan, ziangajc guië loj da Dadan Dios Bén yu' xanyabaa guial ad da bejntanan.

*Por Jesús rlia' lasa' ree bejn  
(Lc. 12:51-53; 14:26-27)*

<sup>34</sup> Rëb tëë Jesús:

—Ad zialtan par yabecdxen luxdoo bejn, zialan din guial chililadx reeman naj chu' wadijl. <sup>35</sup> Din guial chililadx bejn naj, zadxe'ch xinguaaw xdadix, guiáad biingunaa zadxe'ch xniaam, abi' biinwalidx zadxe'ch xnasuegrim. <sup>36</sup> Abi' laagajc Bén zojb ree lënülidixidi guidxe'ch lëjt.

<sup>37</sup> 'Bén rën xdad o xniaa mazczi guial lon, ad zajct gacaman da bejnan. Ziangajc Bén rën xi'ngaan o xi'ndxa'p mazczi guial lon, ad zajct gacaman da bejnan. <sup>38</sup> Bén rën guidnal naj, abi' ad rëntaman sagdiajman por naj, ad zile't gacaman da bejnan. <sup>39</sup> Bén rniajchi' guialnaban rajpaman loj guidxliuj guie, zadxin dxej gunijtaman laan, per Bén guiët por naj, zajpaman guialnaban tiblayaa con Dios.

*Ni tia' ree bejn  
(Mr. 9:41)*

<sup>40</sup> 'Bén ridxga' lëjt, najn ridxga'man, guiáad Bén ridxga' naj, Bén guxhaal najn ridxga'man. <sup>41</sup> Bén ridxga' tijb Bén rudëë xtiidx Dios loj ree bejn, guial zëëdaman por Dios, zaca'man lasa' ni rayal tia' Bén guin loj Dios. Ziangajc Bén ridxga' tijb Bén naban zi'c rën Dios, zaca'man lasa' ni rayal tia' Bén guin loj Dios. <sup>42</sup> Abi' chutëëz Bén gudëëd majsi tib xijgzi nijs naalyuj loj bejn guial najman da bejnan, naj rni lojdi guial yu' ni gudëëd Dios tia' reeman.

## 11

*Bigneenë ree xbejn Waj Jesús  
(Lc. 7:18-35)*

<sup>1</sup> Chi gulox rëb Jesús loj guidxiptio'p ree xbejnman con ree nin chiguieen reeman, dxel bazaman yagaj ziglüüman bejn ree xtiidx Dios loj ree guiedx riga' niz yagaj.

<sup>2</sup> Abi' Waj, la'tgaj yu'man ladxguiib, cwa'man ruson gra ree ni cayüjn Jesús. Dxel guxhaal tio'p choon ree xbejnman, <sup>3</sup> bignabdiidx reeman lojman, rëb reeman:

—¿Lüj naj Cristo ya Bén naj gui't, o yalëjzan ben ren ya?

<sup>4</sup> Dxel rëb Jesús loj reeman:

—Gol chej gol güjdx loj Waj ni cuguiaadi në ni cucaagdiajguidi. <sup>5</sup> Gol güjdx lojman guial ma ruguiaa ree bénlutia'p, ma rajc rza ree bencoj, ma bayajc tëë ree Bén rajc guialguijdx la lepra, ma rigueijn ree Bén nacwa't guiáad ree bengüt ma baban reeman, abi' ree Bénprob ma cagueijn reeman xtiidx Dios. <sup>6</sup> Xiquilbaa ree Bén ad zucwëëzt chililadx naj.

<sup>7</sup> Chi baza ree Bén guxhaal Waj, dxel guzuloj Jesús caneeman loj ree bejn xcwent Waj, rëbaman:

—¿Chu naladxidi naj Bén biquiaadi loj yujbidx? ¿Naladxidi ya najman zi'c tijb biqui ni runiib bi? <sup>8</sup> ¿O xhienaag naj Bén biquiaadi? ¿Najman tijb Bén najcw lajd zagdxe ya? Lëjt ragbee guial Bén rajcw ree lajd zagdxe lën palas zojb reeman. <sup>9</sup> ¿Chuza biquiaadi? ¿Tijb Bén rudëë xtiidx Dios loj ree bejn ya? Per naj rni lojdi guial biquiaadi tijb Bén mazri zojbloj guial loj Bén rudëëd xtiidx Dios loj ree bejn. <sup>10</sup> Wajn din laaman naj ben ruza't loj xtiidx Dios lod rëb:

Naj rxhial tijb Bén ned lojl,

ben güünchaaw xnejzil.

<sup>11</sup> Naj rni lëjt, loj graczi ree bénguidxliuj, ad wayut Bén mazri zojbloj guial loj Waj. Per majsi zian, Bén ad zojbloj loj xguialrniabee Dios, laaman mazri zojbloj guial loj Waj.

<sup>12</sup> 'Diizd chi bi't Waj xt yan, zien bejn rüjn da't naguiejn chu' lod rniabee Dios. Abi' ree bën rüjn da't naguiejn laa reeman chu' lod rniabeeman. <sup>13</sup> Diizd ley badëë Dios loj Moisejs con loj ree bën badëë xtiidx Dios loj ree bejn, xt Waj, laa reeman gunee xcwent xguialrniabee Dios. <sup>14</sup> Abi' bal chililadxidi ni ganin lëjt, naj rni guial Wajn naj Elías bën badëë xtiidx Dios loj ree bejn. <sup>15</sup> Bën rën ree gucaagdiajg, gol bacaagdiajg.

<sup>16</sup> '¿Xhienaag ganin lëjt naj ree bën riga' loj guidxliuj guie yan? Laa reeman naj zi'c ree xindoo rguijt niz galay luguiedx, abi' rbixdiaj reex rëb loj lasa' reex: <sup>17</sup> "Bacwejdxaan bidxa, per ad baya'tidi, badoolan ni naya ree per ad biintidi." <sup>18</sup> Din bi't Waj bën baroobnijs bejn ree, ad rawtaman ad rë' tëetaman vin, abi' rëbidi xindxab yu' luxdooan. <sup>19</sup> Yan, bi't Bën guxhaal Dios, rawaman rë' tëëman vin abi' rëbidi nalaman ruladx tëëman guië'man, ruchajg tëëman bëndol ree con ree bën ruquijx impuest. Per ree bën ma ca' xguialrniabee Dios, por laa reeman rguien guial gra ni rüjn Dios naj zagdx.

*Bën ad bazoobt ree xtiidx Dios  
(Lc. 10:13-15)*

<sup>20</sup> Dxel guzuloj Jesús cadilëman bën zojb ree guiedx lod beenman mazri zien ree milagr. Din bën guin ree ad bayüjnt reeman xgab por xtol reeman, abi' rëbaman loj reeman:

<sup>21</sup> —¡Probza lëjt bën Corazín! ¡Probza lëjt bën Betsaida! Din bal luguiedx Tiro në luguiedx Sidón niajc ree milagr ni goc ladxidi, diizd gocli nayüjn reeman xgab por xtol reeman, niajcw reeman lajd ya's nuroob tëë cobdëj guijc reeman zi'c tijb sen guial ma bayüjn reeman xgab por xtol reeman. <sup>22</sup> Per rnin lëjt guial dxej yadëëd ree bejn cwent loj Dios, mazri casti narooob yayalidi guial loj ree bën Tiro në ree bën Sidón. <sup>23</sup> Guiáad lëjt bën Capernaum, ad naladxidi yayalidi xanyabaa, lëjt yayal gabijl. Din bal luguiedx Sodoma niajc ree milagr goc ladxidi, xt yan sta yu' guiedx guin. <sup>24</sup> Per rnin lojdi guial dxej yadëëd ree bejn cwent loj Dios, mazri casti narooob yayalidi guial loj ree bën Sodoma.

*Gol guda lon din yaziiladxidi  
(Lc. 10:21-22)*

<sup>25</sup> Lën ree dxejzii rëb Jesús:

—Dad, ruzatan lüj zagdx, din ni baquie'chil loj ree bën rajc në loj ree bën rignia', laan ma balüül loj ree bën ad rajct. <sup>26</sup> Zian gojc Dad, din zian guyënl.

<sup>27</sup> 'Da Dadan banee gra lon. Abi' achut nünbee Jesucrist xi'n Dios, tijbzi Dios, achu tëët nünbee Dios, tijbzi Jesucrist xi'nman, con ree bën rënman güünbee Dios. <sup>28</sup> Gradi, bën ma badxag rüjn xhienin din yaya'ndi zagdx loj Dios, ma badxag tëëdi nüü xtolidi. Gol guda lon, naj gune guialraziiladx lojdi. <sup>29</sup> Gol bazoob da diidxan, gol basiid tëë gaquidi benza'c në bën chaawladx zi'c naj, din yabedxe luxdoodi loj Dios. <sup>30</sup> Din ad nawëëgt guial guzoobidi da diidxan, ad nawëëg tëët guial güündi zi'c rënan.

## 12

*Rgui'ch ree xbejn Jesús trigo dxej raziiladx ree bën Israel  
(Mr. 2:23-28; Lc. 6:1-5)*

<sup>1</sup> Tijb dxej raziiladx ree bejn, chi cadëd Jesús con ree xbejnman loj tijb guiniaa lod yu' trigo, dxel calaan ree xbejnman abi' guzuloj cagui'ch reeman trigo persi cayaw reeman laan. <sup>2</sup> Abi' chi baguiaa ree bënfarisew ni cayüjn reeman, rëb reeman loj Jesús:

—Baguiaa ree xbejnl nial cayüjn reeman ni ad rayalt güün reeman dxej raziiladx ree bejn.

<sup>3</sup> Dxel rëb Jesús loj reeman:

—¿Gadidi gool loj xtiidx Dios ya ni been Davi chi gulaanman con ree xcompniaraman?

<sup>4</sup> Guyu Davi lën xyadoo Dios abi' cwa'man guiadxtil ma nagle' ree gudawaman con ree xcompniaraman, ni ad rayalt niajw reeman, bixhiosi ree rayal gaw laa reen. <sup>5</sup> ¿O gadidi gool loj xley Moisejs ya guial achet dol rüjn ree bixhioz chi rüjn reeman dxiin lën yadoo

majsi ad raziiladxt reeman dxej raziiladx ree bejn? <sup>6</sup> Abi' naj rni lëjt guial naj, bën za'në lëjt mazri lasajcan guial loj yadoo. <sup>7</sup> Bal rignia'di xhie rën guiëb loj xtiidx Dios lod rëb: “Ni rënan naj guial yaya lasa'di, ad guial gunetidi gon lon.” Bal rignia'di diidx guin ree ad zudxiibtidi guijc ree bën ad rajpt dol. <sup>8</sup> Abi' Bén guxhaal Dios rajpaman guialrniabee dxej raziiladx ree bejn.

*Rayajc tijb bën nëjt tibladyaa*

(Mr. 3:1-6; Lc. 6:6-11)

<sup>9</sup> Chi gudëd gojc zian, dxel baza Jesús abi' guyuman lën tijb yadoo naj niz yagaj. <sup>10</sup> Lën yadoo guin za' tijb bën nëjt tibladyaa. Abi' guial ree bënfarisew raguuil reeman mod xhie gudxiib reeman guijc Jesús, dxel gunabdiidx reeman lojman, rëb reeman:

—¿Zile' yayüjn bejn tijb bënragxuu dxej raziiladx bejn ya?

<sup>11</sup> Badxi' Jesúsán rëbaman:

—Bal tijb lëjt rajp tijb xiil, abi' yabib lën bala' dxej raziiladx bejn. ¿Nid zabëëdi laab dxej guin ya? <sup>12</sup> ¿Wen id mazri lasajc tijb bejn guial loj tijb xiil ya? Zeel achet güünan zajc güün bejn ni naj zagdxe dxej raziiladx bejn.

<sup>13</sup> Dxel rëb Jesús loj bënragxuu yaa guin:

—Basli yaal.

Abi' basli yaa bën guin, loj hor ziigajc bayajc yaaman zi'c naj stibladan. <sup>14</sup> Per chi barii ree bënfarisew guin lën yadoo guin, guzuloj cayü reeman diidx xhienaag güün reeman din gugüjt reeman Jesús.

*Bën gule Dios*

<sup>15</sup> Chi gogbee Jesús zian, laa zia gajcaman, abi' zien ree bejn binal laaman. Dxel bayüjnman gra ree bënragxuu, <sup>16</sup> abi' gunabeeman laa reeman chitëë guitie'ch reeman diidx chu bayüjn laa reeman. <sup>17</sup> Zian guzobj xtiidx Isaías, bën badëë xtiidx Dios loj ree bejn, chi rëbaman:

<sup>18</sup> Gol baguiaa, bën guie naj bën gulen

din güünman naj sirv,

laaman naj bën rën da'tan,

rabaanë' tëën laaman.

Gudë da Sprijtan lojman

abi' guiëbaman loj ree bénguidxliuj

xhienaag naj da guialrniabeen.

<sup>19</sup> Achut tilnëman,

ad zabixdiaj tëëtaman

achut tëët guien cha'man niz lunejz.

<sup>20</sup> Ad zudëëdtaman casti bën ad za'dxi'cht ree loj da nejzan, në ree bën ad ridxga'za'ct naj, xt chi ma beenman gan gac guialguxtis.

<sup>21</sup> Abi' xt ree bën ad najt bën Israel

cwëz reeman yabëëman laa reeman loj dol.

*Rëb ree bejn ca' Jesús xguialrniabee Beelzebú*

(Mr. 3:19-30; Lc. 11:14-23; 12:10)

<sup>22</sup> Binë ree bejn tijb xinguaaaw lod za' Jesús, yu' xindxab luxdoox, natia'p lojx naj tëëx gop. Dxel bayüjn Jesús laax abi' guzuloj rnieex ruguiaa tëëx. <sup>23</sup> Graczi ree bejn dád badxaloj reeman, abi' rëb reeman:

—¿Id bën guinan zëëd loj xdiaa Davi ya?

<sup>24</sup> Chi biguiejn ree bënfarisew zian, dxel rëb reeman:

—Bën guin rabëë xindxab luxdoo ree bejn por xguialrniabee Beelzebú xin rniabee ree xindxab.

<sup>25</sup> Per Jesús gogbee gajcaman xgab cayüjn reeman, abi' rëbaman:

—Gra nacion o ciuda bal id nadxag riga' bejn, rlia' lasa' reeman, ziangajc tijb famil bal id nadxag riga' reeman, rlia' lasa' reeman. <sup>26</sup> Ziangajc bal xindxab su contr laagajquix, nayob nitix. <sup>27</sup> Lëjt na guial naj rabë xindxab luxdoo ree bejn por xguialrniabee Beelzebú, per bal zianan, ¿chuza rudëë guialrniabee loj xbejndi din yabëë reeman xindxab? Zeel laagajc reeman rulüü guial ad laat rnieedi. <sup>28</sup> Per naj, bal por xSprijt Dios rabën xindxab luxdoo ree bejn, rën guiëban guial ma za'në xguialrniabee Dios lëjt.

<sup>29</sup> 'Din ¿xhieza naag chu' tijb bejn lidx tijb bën gojl par cwanman ni rajpaman, bal id zaxhiixgajman laaman? Zian güünman din chile' cwanman ni rajpaman.

<sup>30</sup> 'Bën ad za't con naj, za'man contr naj. Guiáad bën ad ruto'pt bejn par naj, rtie'chaman laa reeman.

<sup>31</sup> 'Zeel rnin lëjt: Züjn Dios perdon xhietëëz dolan, në ree diidxguijdx ni rnieetzi ree bejn, per ad züjntaman perdon bën rnieeguijdx ree xSprijt Dios. <sup>32</sup> Chutëëz bën guinieeguijdx Bën guxhaal Dios, zajcaman perdon, per bën guinieeguijdx xSprijt Dios ad zajctaman perdon yan, ni'qui chi yaguialan.

*Nünbee bejn tijb yag por ni rtia lojn*  
(Lc. 6:43-45)

<sup>33</sup> 'Lëjt ragbee, bal tijb bejn ruzuj tijb yag zagdxe, rtia ni zagdxe lojn, per bal guzujman tijb yag guiidx, rtia ni guiidx lojn. Din tijb gaj yag nünbee bejnan por ni rtia lojn. <sup>34</sup> ¿Xi'n xindxab! ¿Xoza guinieedi diidx zagdxe ree awa benmal lëjt? Din ni yu' luxdoo bejn laan rnieeman. <sup>35</sup> Benza'c rnieeman diidxza'c, din laan yu' luxdoo. Guiáad benmal rnieeman diidxmal din laan yu' luxdoo. <sup>36</sup> Per naj rni lëjt guial dxej ni güün xguialguxtis Dios, gra ree bejn yadëëd cwent lojman por gra ree diidxguijdx ni rniee reeman. <sup>37</sup> Din por xtiidx gajc bejn guiguien bal rayalaman xcasti Dios o ad rayaltaman laan ya.

*Rniab ree bënfarisew tijb milagr*  
(Mr. 8:12; Lc. 11:29-32)

<sup>38</sup> Yu' ree bënfarisew con ree mextr ni rajc ley, rëb loj Jesús:

—Mextr, rayënan yaguiaa güünl tijb milagr.

<sup>39</sup> Badxi' Jesúsán rëbaman:

—Lëjt benmal, bën ad rüjnt ni rën Dios abi' rëndi günan tijb milagr. Per achetri guguaadi, tijbzi zi'c guzac Jonás bën badëë xtiidx Dios loj ree bejn. <sup>40</sup> Din zi'c guyu Jonás lën bëjl narooob choon dxej choon guiaal, ziangajc Bën guxhaal Dios, choon dxej choon guiaal chu'man lën baa. <sup>41</sup> Abi' chi yadëëd ree bejn cwent loj Dios, bën guban ree Nínive zaban reeman abi' guiëb reeman guial ree bën riga' yan, yayal reeman xcasti Dios. Din bën Nínive ree bayejc reeman loj Dios chi bacaagdiajg reeman xtiidx Dios ni gunee Jonás. Abi' yan, bën za'në lëjt mazri lasajcaman guial loj Jonás. <sup>42</sup> Ziangajc bën goc reina niz sur, zabanman chi yadëëd ree bejn cwent loj Dios, dxel guiëbaman guial ree bën riga' yan, yayal reeman xcasti Dios. Din laaman dád zijt guzaman persi bicaagdiajgaman xguialrajc rey Salomón. Abi' yan, bën za'në lëjt mazri lasajcan guial loj Salomón.

*Xindxab ni rayejc*  
(Lc. 11:24-26)

<sup>43</sup> 'Chi rarii tijb xindxab luxdoo tijb bejn, abi' rzax niz loj yujbidx rguuilix lod yaziiladxix. Abi' chi ad rdxejlt lod yaziiladxix, dxel rüjnx xgab naladxix: <sup>44</sup> “Zagdxeli yaye'can lod guzaan.” Abi' chi rayejquix ruguiaax luxdoo bën guin najn zi'c tijb lënú lod achut zobj, lod bilioob lod najcchaaw tëë. <sup>45</sup> Dxel rica'x za gajdx xindxab naj ree mazri xinmal guial lojx. Abi' ru gra reex luxdoo bën guin. Dxel mazri benmal gacaman guial loj ni gocaman yaloj. Ziangajc sac ree benmal riga' loj guidxliuj yan.

*Xniaa Jesús con ree bijchaman**(Mr. 3:31-35; Lc. 8:19-21)*

<sup>46</sup> Sta canee Jesús loj ree bejn, bidxin xniaaman con ree bijchaman, za' reeman lule', rën reeman guinieenë reeman laaman. <sup>47</sup> Abi' yu' tijb bën rëb lojman:

—Laa xniaal con ree bijchil za' lule' guin, rën reeman guinieenë reeman lüj.

<sup>48</sup> Per Jesús badxi'man xtiidx bën guin rëbaman:

—¿Chu naj da nan chu tëë ree nin naj da bichan?

<sup>49</sup> Dxel con yaaman balüü ree xbejnman rëbaman:

—Bën guie ree naj da nan në ree da bichan. <sup>50</sup> Din chutëez bën rüjn zi'c rën da Dadan bën yu' xanyabaa, laaman naj da bichan, da zanan, në da nan.

**13***Xcwent bën rtie'ch bin**(Mr. 4:1-9; Lc. 8:4-8)*

<sup>1</sup> Dxejzii brii Jesús yu lod zojbaman, bisobaman ro' nijs Galilea. <sup>2</sup> Abi' guial dád zien ree bejn bido'p yagaj, beenan naguiejn wë'p Jesús loj tijb barcw dxel gurejman lojn, guiáad ree bën guin za' reeman ro' nijs guin. <sup>3</sup> Zien ree ni guzuloj culüüman laa reeman, per con ganax zi'c cwent ree, rëbaman loj reeman:

—Tijb bejn, briiman bigtie'chaman bin loj xguiniaaman. <sup>4</sup> Chi catie'chaman bin guin, ta'n nan biajb loj nejz, abi' bi't ree biguijn gudaw reeb laan. <sup>5</sup> Sta'n nan biajb loj ree guiáj lod ad riga't zien yuj, cari gulejnan guial ad zient yuj riga'. <sup>6</sup> Per chi brii gubijdx, baze'can laan, abi' guial ad yu't liujn gubidxan. <sup>7</sup> Dxel sta'n nan biajb loj ree yaquiëjch, chi guni's ree yaquiëjch guin banidloj reen laan. <sup>8</sup> Per sta'n nan biajb loj yuj za'c, abi' dád gojcan. Yu'n cwa tibgayuu bin loj, yu'n cwa gayojn yu' tëën cwa gajlbichii. <sup>9</sup> Bën rën gucaagdiajg, gol bacaagdiajg.

*Chexc zeel rulüü Jesús con ni naj ree zi'c cwent**(Mr. 4:10-12; Lc. 8:9-10)*

<sup>10</sup> Dxel gubig ree xbejn Jesús lojman rëb reeman:

—¿Chexquiza zeel rulüül bejn ree con ganax zi'c cwent ree?

<sup>11</sup> Badxi' Jesús laan rëbaman:

—Lëjt, Dios ma basa'n lëjt din chignia'di xhienaag naj xguialrniabeeman, per bën guin ree ad basa'nt Dios laa reeman chignia' reeman laan. <sup>12</sup> Din Bën ma rignia', gusnuu chignia'man mazri, abi' zignia' da'taman. Per bën ad rignia'za'ct ad rüjn tëëtaman naguiejn chignia'man mazri, xt ta'n ni rignia'man zayanladxaman. <sup>13</sup> Zeel rnienë'n laa reeman con ganaxzi zi'c cwent ree. Din majsí rani loj reeman per rüjn reeman zi'c bën ad ruguiaat, abi' majsí riguejnt reeman per rüjn reeman zi'c bën ad riguejnt, bën ad rignia' tëët. <sup>14</sup> Zian rzojb xtiidx Isaías, bën badëë xtiidx Dios loj ree bejn, chi rëbaman: Majsí riguejnt reeman, per achetczi chignia' reeman.

Abi' majsí rani loj reeman, per ad ruguiaat reeman.

<sup>15</sup> Din ma been luxdoo reeman gojl,

nayaaw guidiajg reeman,

nayaaw tëë guiaaloj reeman.

Chitëë guguaa reeman,

guiguiejn reeman,

chignia' tëë reeman.

Din ad rënt reeman gui't reeman lon din günan laa reeman perdon.

<sup>16</sup> 'Per xiquilbaadi cuguaadi caguiejn tëëdi. <sup>17</sup> Din naj rni lojdi guial dád zien ree bën badëë xtiidx Dios loj ree bejn, në ree bën guban zi'c rayal, guyën reeman nuguaa reeman ni cuguaadi per ad baguiaat reeman laan. Guyën reeman niguiejn reeman ni caguiejni per ad biguiejnt reeman laan.

*Rusignia' Jesús xcwent bén rtie'ch bin*  
(Mr 4:13-20; Lc. 8:11-15)

<sup>18</sup> Yan gol bacaagdiajg xhie rën guiëb ni rnin lojdi xcwent bén bigtie'ch bin. <sup>19</sup> Bén rigueijn xtiidx Dios abi' ad rignia'taman laan, laaman naj zi'c bin biajb loj nejj, guial laa ri't gajc xindxab rquiedix ni bacaagdiajgaman. <sup>20</sup> Guiáad bin biajb loj ree guiaj naj zi'c bén rigueijn xtiidx Dios, abi' dád nix ru luxdooan rigueijnman laan, <sup>21</sup> per guial najman zi'c cwaan ni ad yu't xliuj, ad rzudxi'chtaman. Chi rzagdiajman o rdx'e'ch ree bejn laaman por xtiidx Dios, laa rusa'n gajcaman ni riladxaman. <sup>22</sup> Abi' bin biajb loj ree yaquiëjch naj zi'c bén rigueijn xtiidx Dios, per guial mazri ruman xgab por ni yu' loj guidxliuj guie, rusquiee guialnaza'c riga' loj guidxliuj guie laaman, abi' zianzi rucwëëz rucaagdiajgaman xtiidx Dios achet sirv been ni bacaagdiajgaman. <sup>23</sup> Per bin biajb loj yuj za'c naj zi'c bén rigueijn xtiidx Dios abi' rignia'man laan rüjn tëëman zi'c rën Dios, zi'c ni cwa tibgayuu bin loj o zi'c ni cwa gayojn o ni cwa gajlbichii.

*Trigo con gui'xhguijdx*

<sup>24</sup> Be Jesús stijb ni naj zi'c cwent loj reeman, rëbaman:

—Xguialrniabee Dios naj zi'c tijb bén badxe' ganax bin zagdx'e loj xguiniaa. <sup>25</sup> Per la'tgaj naga'yëjs gra reeman, bidxin bén rdx'e'ch laaman guxübinman gui'xhguijdx ree loj trigo guin dxel ziaman. <sup>26</sup> Abi' chi gulen trigo guin brii tëë dojn lojn në ree gui'xh guin ma yu' lojn. <sup>27</sup> Dxel bicojn ree xmojs bén naj xguiniaa laan laaman, rëb reeman: “Dad ¿nid ganax bin zagdx'e badxe' loj xguiniaal ya? yan, ¿banza guza gui'xh yu' lojn?” <sup>28</sup> Badxi'man laan rëbaman: “Wed tijb bén rdx'e'ch naj bidgadxe' laan.” Dxel gunabdiix ree mojs guin lojman rëb reeman: “¿Xhie nal zudojxhan gui'xh guin ree ya?” <sup>29</sup> Dxel rëbaman loj reeman: “Yajqui, chitëë guial gaxhidi gui'xh guin gaxhidi në trigo guin. <sup>30</sup> Zagdxeli gol basa'nan din ni'snën trigo guin xt chi ma gojcan. Abi' chi guidxin dxej yado'p trigo guin guiën loj ree bén guto'p laan din yalojxgaj gui'xh guin yato'p reeman din guixhii reeman lënan zianz che'can. Dxelri yato'p reeman trigo guin din cu'chaaw reeman laa reen lod ruchaaw reen.”

*Xcwent xhaj moxtajs*

(Mr 4:30-32; Lc. 13:18-19)

<sup>31</sup> Be Jesús stijb ni naj zi'c cwent loj reeman, rëbaman:

—Xguialrniabee Dios naj zi'c xhaj moxtajs, ni rudxe' tijb bejn loj xguiniaaman. <sup>32</sup> Abi' bin guin naj mazri ni wit loj gra ree bin, per chi rni'san laan rajc mazri ni naroo loj gra ree cwaan. Abi' guial naroo da't rajcan, xt rüjn xguixbitia's ree biguijn xidxan.

*Xcwent levadur*

(Lc. 13:20-21)

<sup>33</sup> Be tëë Jesús stijb ni naj zi'c cwent loj reeman, rëbaman:

—Xguialrniabee Dios naj zi'c levadur ni rugo'ch tijb béngunaa choon midid harin, abi' laan rusaaguij gra cob guin.

*Chexc zeel rülüü Jesús con ni naj ree zi'c cwent*

(Mr 4:33-34)

<sup>34</sup> Gra ree ni balüü Jesús bejn ree, balüüman laa reeman con ganax ree ni naj zi'c cwent, achet balüüman laa reeman con ni ad najt ree zi'c cwent. <sup>35</sup> Zian gojc persi guzobj xtiidx bén badëë xtiidx Dios loj ree bejn, chi rëbaman: Con ganaxzi ni naj ree zi'c cwent gulün bejn ree, guiën loj reeman ni gad reeman gagbee diizd chi gocchaaw guidxliuj.

*Rusignia' Jesús xcwent gui'xhguijdx*

<sup>36</sup> Chi ma bazaadiidxnë Jesús benzien guin ree, dxel bayuman lënü con ree xbejnman, abi' gunabdiidx reeman lojman, rëb reeman:

—Basignia' dunujn xcwent gui'xhguijdx ni gulen loj guiniaa guin.

<sup>37</sup> Badxi' Jesúsán rëbaman:

—Bén rudxe' bin zagdxe guin naj Bén guxhaal Dios, <sup>38</sup> abi' guiniaa guin naj guidxliuj. Guiáad bin zagdxe guin naj ree bén naj par loj xguialrniabee Dios. Abi' ree gui'xh guin naj bén naj ree par xindxab. <sup>39</sup> Guiáad bén rdxe'ch, bén guxübin trigo guin naj xindxab. Abi' guial rado'p guialnaza'c guin rën guiëb chi nit guidxliuj, guiáad ree bén yato'p guialnaza'c guin naj ree xianjl Dios. <sup>40</sup> Zian zi'c rado'p ree gui'xhguijdx guin par che'c reen, zian gac chi nit guidxliuj. <sup>41</sup> Bén guxhaal Dios guixhiaal ree xianjlaman din yabëe reeman bén rayal ree yarii loj xguialrniabeeman, bén ruzaalguiiw bejn ree din güün reeman dol në gra ree bén cayün dol. <sup>42</sup> Abi' guzaal reeman laa reeman loj bajl lod goon reeman xt gaw lay reeman. <sup>43</sup> Dxel bén naban ree zi'c rën Dios, guidiin reeman bacha' loj xguialrniabee xDad reeman Dios, zi'c rdiin gubijdx bacha'. Bén rën gucaagdiajg, gol bacaagdiajg.

### *Xcwent ni lasajc*

<sup>44</sup> 'Xguialrniabee Dios naj zi'c tijb ni lasajc da't, ni naguie'ch loj tijb guidxliuj. Abi' rdxejl tijb bejn laan zianz ruquie'chaman laan stijb, lod gulëeman laan. Abi' dád rabaaman ruto' gra ni rajpaman persi rsiiman guidxliuj guin.

### *Xcwent perl*

<sup>45</sup> 'Rni tëën lëjt: Xguialrniabee Dios naj zi'c tijb bén rguuil perl zagdxe din siiman laan. <sup>46</sup> Chi rdxejlaman tijb perl lasajc, ruto' gra ni rajpaman abi' rsiiman laan.

### *Xcwent guijxh rniaaz bëjl*

<sup>47</sup> 'Abi' tëë xguialrniabee Dios naj zi'c tijb guijxh ni ruzaal reeman loj nijs abi' rniaazan graloj bëjl. <sup>48</sup> Dxel chi ma gudxa guijxh guin rabëe reeman laan ro' nijs guin, abi' rbej reeman rabe reeman loj bëjl guin, dxel ragu' reeman be zagdxe lën dxüm guiáad be ad najt zagdxe rusëeb reeman. <sup>49</sup> Zian gac dxej nit guidxliuj, gui't ree xianjl Dios yabe reeman benmal loj ree benza'c. <sup>50</sup> Abi' guzaal reeman benmal guin ree loj bajl lod goon reeman abi' xt gaw lay reeman.

### *Bén rbe nicüb në ni yojx*

<sup>51</sup> Dxel gunabdiidx Jesús loj ree xbejnman, rëbaman:

—¿Rignia'di gra ni canin lëjt ya?

Badxi' reeman laan rëb reeman:

—Rayignia'nan, Dad.

<sup>52</sup> Dxel rëb Jesús loj reeman:

—Gra ree mextr ni rajc ley, abi' cusiid reeman xhienaag naj xguialrniabee Dios, laa reeman naj zi'c tijb bén rbe nicüb në ni yojx loj gra ni rajpaman.

### *Badxin Jesús Nazaret*

*(Mr. 6:1-6; Lc. 4:16-30)*

<sup>53</sup> Chi gulox gunee Jesús loj reeman zian, zianz bazaman. <sup>54</sup> Dxel badxin ladxaman, ni guzuloj culüüman bejn ree lën xyadoo reeman. Abi' dád badxaloj ree bén guin, rëb reeman:

—¿Ban guin basiidaman gra ree ni rajcaman? ¿Chexquiza zeel rajc rünman milagr ree?

<sup>55</sup> ¿Nid laaman naj xi'n carpinter ya, abi' xniaaman naj Li, guiáad ree bijchaman naj Jacob, Xiëb, Simón, në Judas? <sup>56</sup> ¿Nid luguiedx guie zobj ree bizanman ya? ¿Banza guin basiidaman gra ree ni rajcaman?

<sup>57</sup> Abi' ad bidxga't reeman Jesús. Per rëbaman loj reeman:

—Bantëez guin rajp ree bejn respejt tijb bén rudëe xtiidx Dios loj ree bejn, per ladxaman achut rajp laaman respejt ni'qui lidxaman.

<sup>58</sup> Abi' ad zient milagr beenman yagaj guial ad bililadxt reeman laaman.



## 14

*Güjt Waj Bén baroobnijs bejn ree*  
(Mr. 6:14-29; Lc. 9:7-9)

<sup>1</sup> Tiampzii Herodes bén canabee niz Galilea, biguiejnman ni cayüjn Jesús. <sup>2</sup> Abi' rëbaman loj ree xbejnman:

—Waj bén baroobnijs bejn ree, laaman baban zatijb, zeel rajpaman guialrniabee rüjnman milagr ree.

<sup>3</sup> Rëb Herodes zian guial laaman gunabee biniaaz Waj, abi' bixiiman con caden dxel badxe' reeman laaman ladxguiib. Been Herodes guin zian por Herodías lacheel bijchaman bén la Felip, <sup>4</sup> guial rëb Waj guin loj Herodes:

—Ad laat guial zojbnël laagajc lacheel bijchil.

<sup>5</sup> Guyën Herodes nugüjtaman Waj, per bidxebaman xhie nüjn ree bejn laaman guial graczi reeman rëb Waj naj tijb bén rudëed xtiidx Dios loj ree bejn. <sup>6</sup> Per chi baza' Herodes ijz, brieri xi'n Herodías baya'm loj ree xbioozaman. Abi' dád bayuladx Herodes zi'c baya'm, <sup>7</sup> dxel rëb Herodes gudëedaman xhietëez ni guiniabim. <sup>8</sup> Abi' xniaam rëb lojm xhie guiniabim, dxel rëbim loj Herodes:

—Banee guijc Waj bén ruroobnijs bejn ree, baneen loj tijb pliajt.

<sup>9</sup> Dád gyunaya rey Herodes, per guial mal baya'n reeman diidx niz loj gra ree xbioozaman, gunabeeman xsuldadaman gudëed reeman ni gunabim. <sup>10</sup> Dxel gunabeeman gütü' reeman guijc Waj lën ladxguiib guin, <sup>11</sup> abi' bidxinnë reeman laan loj tijb pliajt badëed reeman laan lojm, dxel bayümin loj xniaam.

<sup>12</sup> Zianz bidxin ree xbejn Waj baca' reeman xcuerpaman persi biquie'ch reeman laaman. Dxel bicojn reeman Jesús.

*Ruyaan Jesús gaay mil bejn*  
(Mr. 6:30-44; Lc. 9:10-17; Jn.6:1-14)

<sup>13</sup> Chi gogbee Jesús zian, guyuman loj tijb barcw zëman niz lod achutczi zojb din su laazaman. Chi gogbee ree bejn, dxel brieri ladx reeman zë guia'zi reeman lod guidxinman. <sup>14</sup> Chi barii Jesús loj barcw guin baguiaaman bén guixiuj ree riga' yagaj, bayaman laa reeman abi' bayüjnman bénragxuu zinë reeman. <sup>15</sup> Chi ma gudxe, gubig ree xbejnman lojman rëb reeman:

—Ma gudxe yan, abi' achut bejn zojb niz guie. Güjdx loj ree bén guin ma gojl yaguiaj reeman, din che reeman guiedx lod sii ni gaw reeman.

<sup>16</sup> Per badxi' Jesús rëbaman:

—Ad rüjnt naguiejn yaguiaj reeman, lëjt gol badëe ni gaw reeman.

<sup>17</sup> Badxi' reeman laan rëb reeman:

—Per gaayzi guiadxtil naca'n con zatio'p bëjl.

<sup>18</sup> Dxel rëb Jesús loj reeman:

—Gol tanë reen guie.

<sup>19</sup> Dxel gunabeeman gurej gra ree bén guin loj guixya'. Abi' cwa'man guigaay guiadxtil guin con grop bëjl guin. Dxel gules lojman xanyabaa badëeman quixtëe loj Dios, abi' gula'man guiadxtil guin badëeman laan loj ree xbejnman persi gudi's reeman laan loj gra ree bén guin. <sup>20</sup> Gra reeman gudaw xt bigdxinladx reeman, abi' staczi bacha reeman za chiptio'p dxüm ni baya'n. <sup>21</sup> Bén gudaw guin ree naj reeman cost gaay mil xinguaaw garenqui ree béngunaa con ree xindoo.

*Riza Jesús loj nijs*  
(Mr. 6:45-52; Jn.6:16-21)

<sup>22</sup> Dxel gunabee Jesús xbejnman guyu reeman loj barcw din ned reeman téd gaj reeman stiblad ro' nijs guin, la'tgaj cuzaadiidx nëman benzien guin ree. <sup>23</sup> Chi ma gulox bazaadiidx nëman laa reeman, dxel zë xtijbaman guijc tijb guia' din cwedx guiniabaman

Dios. Chi gure guiaal xtijbzaman za' guiyc guia' guin. <sup>24</sup> Guiáad barcw guin zijt ma zën loj nijs, dád rliaro' xtüjp nijs guin laan guial rliaj bi niz loj barcw guin. <sup>25</sup> Chi ma cayreguiaal, zibig Jesús loj ree xbejnman rzaman loj nijs guin. <sup>26</sup> Dxel baguiaa ree xbejnman laaman rzaman loj nijs guin, dád bidxeb reeman abi' gurixdiaj reeman rëb reeman:

—¡Tijb anman!

<sup>27</sup> Per guneenë Jesús laa reeman rëbaman:

—¡Gol bagu' luxdoodi! ¡Najn, ad rdxebidi!

<sup>28</sup> Badxi' Bëdan rëbaman:

—Dad, bal lüjn, gunabee gazan loj nijs guin guialan lojl.

<sup>29</sup> Abi' rëb Jesús lojman:

—Guda.

Dxel baguiaajt Bëd loj barcw guin, rzaman loj nijs guin zëman loj Jesús. <sup>30</sup> Per chi baguiaaman bidoxhan cabi' dxel bidxebaman, abi' guial guzuloj cazëëbaman xan nijs guin guridxa'man rëbaman:

—¡Gognë naj, Dad!

<sup>31</sup> Loj hor ziigajc basli yaa Jesús gunaazaman yaa Bëd, rëbaman lojman:

—¿Chexc zeel ad rliadxza'ctil, chexc zeel yu' nawëëguil?

<sup>32</sup> Abi' chi bayë'p reeman loj barcw guin, laa bacwëëz gajc bi guin. <sup>33</sup> Guiáad ree bën yu' loj barcw guin bazuxib reeman loj Jesús, rëb reeman:

—Diidxiczi lüjn naj xi'n Dios.

*Rayüjn Jesús bënragxuu ree Genesaret*

*(Mr. 6:53-56)*

<sup>34</sup> Chi gudëd reeman loj nijs guin dxel bidxin reeman xyuj ree bën Genesaret. <sup>35</sup> Abi' ree bën niz ni bayünbee reeman Jesús, abi' guidibczi niz yagaj gutie'ch reeman diidx guial za'man ni. Dxel binë ree bejn bënragxuu ree lojman, <sup>36</sup> guzajc reeman liaadx lojman din tiëbaman gugaal reeman majsi guia'zi xabaman. Abi' gra ree bën bagaal xabaman bayajc.

## 15

*Ni rüjn persi rajc bejn bëndol*

*(Mr. 7:1-23)*

<sup>1</sup> Bënfarisew ree con ree mextr rajc ley, bën za ree Jerusalén, gubig reeman loj Jesús abi' gunabdiidx reeman lojman, rëb reeman

<sup>2</sup> —¿Chexc zeel ad zinalt ree xbejn costumbr ni basa'n dux béngulal ree? ¿Chexc zeel ad zinalt reeman costumbr zi'c rayal gunaa reeman chi gad reeman gaw?

<sup>3</sup> Dxel rëb Jesús loj reeman:

—Laadx lëjt, ¿chexc zeel rüjndi xtiidx Dios tibladd persi zinal xcostumbridi? <sup>4</sup> Din Dios rëb: “Gojp respejt xDadil con xniaal”, abi’ “Bën rníee diidxguijdx loj xdadaman o xniaaman ya, rayal guiëtaman.” <sup>5</sup> Per lëjt rëb zile' guiëb bejn loj xdadaman o xniaaman: “Ad zile't günan lüj yudar, din gra ni ra'pan naj par Dios.” <sup>6</sup> Rëbidi guial bën guinee zian, ad zile't günn yudar xdadaman con xniaaman, abi' zian rbëëladxidi xtiidx Dios persi zinal xcostumbridi. <sup>7</sup> ¡Bën rusquiee! ¡Rüjnzidi guial nabandi xnejz! Waliqúi ni gunee Isaías, bën badëë xtiidx Dios loj ree bejn, chi rëbaman:

<sup>8</sup> Bën guie ree rëbzi reeman rníajchi' reeman naj, per ad rënt reeman naj con guidib luxdoo reeman.

<sup>9</sup> Xliá'czi rníajchi' reeman naj, abi' rulüü reeman bejn ree ganaxzi ni rbëëguijyc ree bénguidxliuj.

<sup>10</sup> Dxel gurejdx Jesús ben zien riga' ree yagaj, abi' rëbaman loj reeman:

—Gol bacaagdiajg, gol bignia' tëë ni ganin lojdi. <sup>11</sup> Ad ni rawt bejn rüjn laaman bëndol, ni ririi ro'man laan rüjn laaman bëndol.

12 Dxel gubig ree xbejn Jesús lojman, rëb reeman:

—¿Gogbeel ya bidxe'ch ree bënfarisew chi biguiejn reeman ni guneel?

13 Badxi' Jesús laan rëbaman:

—Gra ni ad zëëdt por da Dadan Dios bën yu' xanyabaa, yu' dxej nitan. 14 Zeel gol basa'n reeman din laa reeman naj zi'c tijb bénlutia'p rulüü stijb bénlutia'p ban niz cheman. Abi' bal tijb bénlutia'p gulüü stijb bénlutia'p guin, zayajb grop reeman ro' bala'.

15 Dxel rëb Bëd loj Jesús:

—¿Basignia' dunujn xhie rën guiëb ni guneel?

16 Badxi' Jesús laan rëbaman:

—¿Wen, ni'qui lëjt ad rignia'tan ya? 17 ¿Id rignia'di ya guial gra ni raw bejn rej lënman abi' rariin? 18 Per diidx ririi ro' bejn, luxdoozan, abi' laan rüjn laaman bëndol. 19 Din luxdoo bejn za graloj ree xgabmal, guialrugüjt bejn, guial rüjn nidxuudx, guialrzunë lacheel ben ren, guialrban, guialrusquiee në guialrniee diidxguijdx loj lasa'. 20 Gra ree ni guie naj ni rüjn bejn bëndol. Per guial ad zunaat bejn zi'c naj costumbr ni rayal güün bejn chi gadaman gaw, ad laatan naj ni rüjn laaman bëndol.

### *Tijb béngunaa Canaán bililadx Jesús*

(Mr. 7:24-30)

21 Chi baza Jesús yagaj zëman niz Tiro në niz Sidón. 22 Abi' yagaj zojb tijb béngunaa za niz Canaán, briiman, rbixdiajman rëbaman loj Jesús:

—¡Dad, xdiaa Davi, baya naj! Da xi'ndxa'pan yu' bendxab luxdoo, dád rusagziman laam.

23 Abi' Jesús ad badxi'taman xtiidx béngunaa guin. Dxel gubig ree xbejnman lojman, rëb reeman:

—Bidxga' béngunaa guin, din yaguaajman, din rbixdiajman nalaman dunuj ree.

24 Dxel rëb Jesús:

—Dios guxhaal naj din günan yudar ganaxzi ree bën Israel zë loj nejz mal.

25 Per béngunaa guin bigzuxibaman loj Jesús, rëbaman:

—¡Dad, gognë naj!

26 Badxi' Jesús laan rëbaman:

—Ad zagdxet naj chiquied bejn guiadxtil loj xi'nman din gudëëdaman laan loj ree bë'cw.

27 Badxi' béngunaa guinan, rëbaman:

—Waliquil, Dad, per në ree bë'cw ruto'p guiadxtil laay ni ryajb xan xmex bën naj xbë'cw laa reeb.

28 Dxel rëb Jesús lojman:

—¡Na, waliquil rliladxil con guidib luxdool! Gac zi'c rënl.

Loj hor guin gajc bayajc xi'n bën guin.

### *Rayüjn Jesús zien ree bënragxuu*

29 Baza Jesús yagaj, bidxinman ro' nijs Galilea, dxel wë'paman guiyc tijb guia' abi' gurejman yagaj. 30 Dád zien bejn bido'p lod za'man. Binë reeman bencoj ree, në ree bénlutia'p, në ree bën ad rüjnt xu'c dxiin, con ree bengop në zien ree bënragxuu ren ree, badxig reeman laa reeman loj Jesús, abi' bayüjnman laa reeman. 31 Dád badxa loj ree bejn chi baguiaa reeman ma rniee ree bengop, ma bayajc xu'c ree bën ad rüjnt dxiin xu'c, guiáad ree bencoj ma rza reeman abi' ree bénlutia'p ruguiaa reeman. Zianz guzuloj cuza't reeman zagdxex Dios ree bën Israel.

### *Ruyaana Jesús tajp mil bejn*

(Mr. 8:1-10)

32 Abi' gurejdx Jesús bën naj ree xbejnman, rëbaman loj reeman:

—Rayan b́en guin ree, din ma gojc choon dxej za' reeman con naj, abi' achet ni gaw reeman. Ad ŕentan yagu'nejzan laa reeman sin guialraw ad nial yadaj reeman niz lunejz.

<sup>33</sup> Dxel ŕeb ree xbejnman lojman:

—Per ¿ban guin yuca'n ni gaw ree benzien guin, zi'c naj guie lod achutczi bejn zojb?

<sup>34</sup> Gunabdiidx Jesús loj reeman, ŕebaman:

—¿B́el guiadxtil ca'di?

Badxi' reeman laan ŕeb reeman:

—Gajdx guiadxtil con zatio'p choon b́ejl.

<sup>35</sup> Dxel gunabee Jesús gurej gra ree b́en guin luyuj. <sup>36</sup> Abi' cwa'man guigajdx ree guiadxtil guin con ree b́ejl guin, bad́eeman quixt́e loj Dios. Dxel gula'man laa reen, bad́eeman laa reen loj ree xbejnman persi gudi's reeman laa reen loj gra ree b́en guin. <sup>37</sup> Gra reeman gudaw xt bigdxinladx reeman. Abi' staczi bacha reeman gajdx dx́um ni baya'n. <sup>38</sup> B́en gudaw ree naj reeman tajp mil xinguaaw, garenqui ree b́engunaa con ree xindoo. <sup>39</sup> Dxel bazaadiidxńe Jesús laa reeman, abi' guyuman loj barcw ziaman niz Magadán.

## 16

### *Rniab reeman güün Jesús tijb milagr*

*(Mr. 8:11-13; Lc. 12:54-56)*

<sup>1</sup> B́enfarisew ree con ree b́ensaducew bidxin reeman lod za' Jesús, abi' par güün reeman laaman prueb gunab reeman lojman din güünman tijb milagr din guiguien guial Dios guxhaal laaman. <sup>2</sup> Per badxi' Jesús laan ŕebaman:

—Wadxe ree chi ruguiaadi naxnia xanyabaa, ŕebidi: “Zagdx e gac guixie din naxnia xanyabaa.” <sup>3</sup> Guiáad rsil chi naxnia xanyabaa yu' t́e źaj, ŕebidi: “Ad laat gac yandxej.” ¿B́en rusquiee!, bal ragbeedi xhie ŕen guiéb sen yu' xanyabaa, ¿chexc ad rignia'tidi xhie ŕen guiéb gra ni cuguaadi yan? <sup>4</sup> B́en mal, ad rliladxtidi abi' rniabidi günan tijb milagr, per achet guguaadi, tijbzi zi'c guzac Jonás.

Dxel basa'n Jesús laa reeman, ziataman.

### *Xlevadur ree b́enfarisew*

*(Mr. 8:14-21)*

<sup>5</sup> Dxel gudédńe ree xbejnman stiblad ro' nijs guin, per bayanladx ree xbejnman nińe reeman guiadxtil. <sup>6</sup> Abi' ŕeb Jesús loj reeman:

—Gol gojp cudad con xlevadur ree b́enfarisew ńe ree b́ensaducew.

<sup>7</sup> Dxel guzuloj ŕeb loj lasa' reeman:

—Naman duloj ree zian guial ad naca't ree guiadxtil.

<sup>8</sup> Gogbee Jesús ni canee reeman abi' ŕebaman loj reeman:

—¿Chexc zeel ŕebidi guial ad ca'tidi guiadxtil? Ta'nnijt rliladxidi naj. <sup>9</sup> ¿Staczi ad rignia'tidi ya? ¿Nid rusaaladxidi ya chi gudi'san gaay guiadxtil loj gaay mil bejn, abi' zabél dx́um ni baya'n bato'pidi? <sup>10</sup> ¿Nid zaladx t́eedi ya chi gudi'san gajdx guiadxtil loj tajp mil bejn, abi' zabél dx́uman bato'pidi? <sup>11</sup> ¿Chexc zeel ad rignia'tidi guial ad guiadxtiltan cuzatan lojdi, chi rnin lojdi gapidi cudad con xlevadur ree b́enfarisew ńe ree b́ensadusew?

<sup>12</sup> Dxel bignia' ree xbejnman guial ad xlevadurt guiadxtilan cuza'taman loj reeman, ŕebaman zian din gap reeman cudad con ni rulüü ree b́enfarisew ńe ree b́ensaducew.

### *Ŕeb B́ed guial Jesús naj Cristo*

*(Mr. 8:27-30; Lc. 9:18-21)*

<sup>13</sup> Chi bidxin Jesús niz Cesarea de Filipino, gunabdiidxaman loj ree xbejnman, ŕebaman:

—¿Chu ŕeb ree bejn, naj B́en guxhaal Dios?

<sup>14</sup> Badxi' reeman laan, rëb reeman:

—Yu' reeman rëb guial Wajn, bën baroobnijs bejn ree. Yu'za reeman rëb guial Elíasan, bën badëë xtiidx Dios loj ree bejn, yu' tää reeman rëb guial Jeremíasan, bën badëëd xtiidx Dios loj ree bejn o stijb ben ren ya, bën badëëd xtiidx Dios loj ree bejn.

<sup>15</sup> Dxel rëbaman loj reeman:

—Laadx lëjt, ¿xhie nadi, chu naj?

<sup>16</sup> Badxi' Simón Bëdan, rëbaman:

—Lüjn naj Cristo. Lüjn naj Xi'n Dios naban.

<sup>17</sup> Dxel rëb Jesús lojman:

—Xiquilbaal, Simón, xi'n Jonás, din ad bénguidxliujt guna lojl ni guinieel, da Dadan bën yu' xanyabaa laaman naj bën guna lojl. <sup>18</sup> Abi' naj rni lojl, Bëd, (rën guiëban “guiaj”) lüj naj zi'c tijb guiaj ni gacnë lidxan, din por lüj grii ree bën gac da bejnan abi' ni'qui guialgüjt ad zunijtt laa reeman. <sup>19</sup> Naj gune lüj guialrniabee ni za xanyabaa, abi' gra ni tiëbil gac loj guidxliuj guie ma naj gacan xanyabaa, guiáad ni ad zatiëjbtíl gac loj guidxliuj guie ad najt gacan xanyabaa.

<sup>20</sup> Dxel gunabee Jesús loj gra ree xbejnman guial achu loj guiëb reeman guial laaman naj Cristo.

### *Rugojn Jesús guiëtaman*

*(Mr. 8:31-9:1; Lc. 9:22-27)*

<sup>21</sup> Diisd nadxel guzuloj Jesús bagojn ree xbejnman guial naj cheman Jerusalén, abi' ree guxtis Israel con ree bixhioz rniabee ree bixhioz në ree mextr rajc ley, laa reeman naj bën gusagzi laaman, gugüjt reeman laaman, per ni yayon dxej yabanman. <sup>22</sup> Dxel gulëëcaan Bëd laaman, rëbaman lojman:

—¡Dios ad zabëëladxt lüj, Dad! ¡Laaman ad zatiëjbt saquil zian!

<sup>23</sup> Per badxi' loj Jesús, rëbaman:

—¡Basa'n naj, xindxab!, ad rüjn nawëëguil lon. Din ad por Diost zëed ree xgab ni rüjnl, xixgab bénguidxliujn rüjnl.

<sup>24</sup> Dxel rëb Jesús loj ree xbejnman:

—Bal yu' bën rën gac da bejnan ad zajct güünman zi'c naj xixgabaman, siibnejzaman guialzi ni tëdzaman abi' guidnalaman naj. <sup>25</sup> Din bën mazri rën xguialnaban ni rajpaman loj guidxliuj guie zadxin dxej gunijtaman laan. Per bën guiët por naj, zajpaman guialnaban tiblayaa con Dios. <sup>26</sup> Xhieci gan gap bejn gra ni yu' loj guidxliuj, abi' nitaman loj Dios. Din ad zile't sii bejn xguialnabanman xanyabaa. <sup>27</sup> Abi' Bën guxhaal Dios, gui'taman con xguialrniabee xDadaman Dios në ree xianjl Dios din gudëëman ni rayal tijbgaj bejn, bal gonin been bejn. <sup>28</sup> Diidxliczi rnin lojdi guial yu' ree bën riga' guie ad zëjtt reeman chi gad reeman guguaa Bën guxhaal Dios, gui'taman con xguialrniabeeman din nabeeman.

## 17

### *Bidxaa Jesús loj choon ree xbejnman*

*(Mr. 9:2-13; Lc. 9:28-36)*

<sup>1</sup> Chi gudëd xho'p dxej, binë Jesús Bëd, në Jacob con Waj bijch Jacob, binëman laa reeman guijc tijb guia' ya. <sup>2</sup> Ni bidxaa Jesús niz loj reeman. Dád balaa bacha' lojman zi'c rulaa gubijdx bacha', guiáad xabaman bayajcan naquich, balaa tää bacha' zi'c guij. <sup>3</sup> Abi' loj hor guin baguiaa reeman Moisejs con Elías cayünë reeman Jesús diidx. <sup>4</sup> Dxel rëb Bëd loj Jesús:

—Dad, ¡zagdxe naj nadxu' ree guie! Bal rën, günan choon ranch, tijban par lüj, tijban par Moisejs, stijban par Elías.

<sup>5</sup> La'tgaj canee Bëd zian, biguiajt tijb zaj xt guijc reeman ridiinan bacha', loj zaj guin brii cha' bejn rëbaman:

—Bén guie naj da Xi'nan, bén rën da'tan, bén rabaanë' tëen, gol bacaagdiajg xtiidxaman.

<sup>6</sup> Chi biguiejn ree xbejn Jesús diidx guin ree, bazuxib reeman basajb loj reeman xt luyuj, dád bidxeb reeman. <sup>7</sup> Dxel gubig Jesús lod za' reeman, baqui'man laa reeman, rëbaman:

—Gol guzuli, ad ridxebidi.

<sup>8</sup> Abi' chi gules loj reeman achutri baguiaa reeman, tijbzi Jesús za' yagaj.

<sup>9</sup> La'tgaj cayguiajt reeman ruguia' guin, rëb Jesús loj reeman:

—Achuczi loj guiëbidi ni baguiaadi, xt chi yaban Bén guxhaal Dios.

<sup>10</sup> Dxel gunabdiidx ree xbejnman lojman, rëb reeman:

—¿Chexquiza zeel rëb ree mextr rajc ley guial yaloj Elías gui't?

<sup>11</sup> Badxi' Jesúsán, rëbaman:

—Walican guial yaloj Elías gui't, laaman guzuxnejz gra. <sup>12</sup> Per naj rni lëjt guial mal bi't Elías, abi' ad bayagbeet ree bejn laaman, beennë reeman laaman ni guyëntzi reeman. Abi' ziangajc gusagzi reeman Bén guxhaal Dios.

<sup>13</sup> Dxel gogbee ree xbejnman guial Wajñ Bén baroobnijs bejn ree cuza'taman.

*Rayüjn Jesús tijb xin rëjtya'*

*(Mr. 9:14-29; Lc. 9:37-43)*

<sup>14</sup> Chi badxin Jesús con guiyon ree xbejnman, lod cabëz ree ben zien laaman bibig tijb xinguaaaw lojman, bazuxibix lojman rëbix:

<sup>15</sup> —Dad, baya da xi'nan, din dád rzagdiajx rëjtya'x. Bëlczi volt riyajbix lojguij o lojnijs ya. <sup>16</sup> Bidnë'n laax loj ree xbejn, per ad rajct rayüjn reeman laax.

<sup>17</sup> Badxi' Jesúsán, rëbaman:

—¿Benguijdx, bén ad rliladxt! ¿Xt goc gazunë'n lëjt? ¿Xt goc gadaanán lëjt? Gol tanë xinzii guie.

<sup>18</sup> Dxel gudilë Jesús xindxab guin, babëëman laax luxdoo xin guin. Loj hor guin gajc bayajquix.

<sup>19</sup> Abi' gunabdiidx ree xbejn Jesús lojman lood ren, rëb reeman:

—¿Chexc zeel ad gojct nalëen xindxab guin luxdoo xin guin?

<sup>20</sup> Dxel rëb Jesús loj reeman:

—Guial ta'nzi rliladxidi. Naj rni lojdi bal naj xguialrliladxidi majsi zi'ctzi naj xhaj moxhtajs, zile' guiëbidi loj guia' guin: “Bisüd guie, bisob lood ren”, zucaagdiajgan xtiidxidi. Achetczi gac nawëëg par lëjt. <sup>21</sup> Per par yarii lasa' ree xindxab guie ryaadx chu cwedx guiniab Dios guiba'n tëë.

*Rugojn Jesús zatijb guial guiëtaman*

*(Mr. 9:30-32; Lc. 9:43-45)*

<sup>22</sup> La'tgaj za' Jesús niz Galilea con ree xbejnman, rëbaman loj reeman guial yayü reeman Bén guxhaal Dios loj ree bejn, <sup>23</sup> abi' gugüjt reeman laaman, per ni yayon dxej yabanman. Chi biguiejn ree xbejnman zian, dád guyu naya reeman.

*Ni rajx par yadoo*

<sup>24</sup> Chi badxin Jesús con ree xbejnman guiedx Capernaum, bén ruquijx ree impuest par yadoo wej reeman loj Bëd bignabdiidx reeman, rëb reeman:

—¿Rguijx xmextril impuest par yadoo ya?

<sup>25</sup> Badxi' Bëdan, rëbaman:

—Riguijxcaman laan.

Dxel chi bayu Bëd lënü lod za' Jesús, yalojli Jesús gunabdiidx lojman, rëbaman:

—¿Xhie naladxil, Simón? ¿Chu rguijx impuest loj ree rey yu' loj guidxliuj guie? ¿Xi'n reeman ya o benzit ree?

<sup>26</sup> Badxi' Bëd laan rëbaman:

—Benzit ree.

Dxel rëb Jesús:

—Abi' ree bën ladx reeman ad rguixt reeman laan. <sup>27</sup> Per chitëe guidxe'ch reeman, wej ro' nijs, bazaal xiansuelil, dxel bëjl yaloj ni guiniaazil babëeb. Ro' bëjl guin guidxelil tijb cintabl, con laan bitijx dux impuest.

## 18

*¿Chu mazri zobjloj?*

*(Mr. 9:33-37; Lc. 9:46-48)*

<sup>1</sup> Lën ree dxejzii bidxin ree xbejn Jesús lod za'man, abi' gunabdiidx reeman lojman, rëb reeman:

—¿Chu mazri zobjloj lod rniabee Dios?

<sup>2</sup> Dxel gurejdx Jesús tijb xindoo, bazujman laax galay reeman, <sup>3</sup> abi' rëbaman:

—Diidxliczi rnin lojdi bal id zayüjndi xgab por xtolidi, bal id zajc tëedi zi'c tijb xindoo, ad zutidi lod rniabee Dios. <sup>4</sup> Bén güün naya loj Dios, gac tëëman zi'c xindo guie, laaman gac bën mazri zobjloj lod rniabee Dios. <sup>5</sup> Abi' bën yaca' tijb xindoo, por naj, najn raca'man.

*Bén rüjn persi ryajb ree bejn loj dol*

*(Mr. 9:42-48; Lc. 17:1-2)*

<sup>6</sup> Bal chu gusajb tijb bën qui rliladxri naj loj dol, zagdxeli guixhii reeman tijb guiajro' yëjnman guzaal reeman laaman xt xan nijs. <sup>7</sup> ¿Probza bénguidxliuj guial yu' da't ni rusajb laaman loj dol! Zianczi yu' ni mal guin loj guidxliuj, per ¿probza bën gusajb bejn ree loj dol!

<sup>8</sup> Zeel, bal laagajc yaal o guia'l rusajb lüj loj dol, zagdxeli gutü'n bazaalan zijt, din zagdxeli chu'l xanyabaa con tiblodzi yaal o con tiblodzi guia'l, luar chu'l con groplad yaal o groplad guia'l loj bajl ni ad yu't dxej yayü'. <sup>9</sup> Abi' bal laagajc guiaalojl rusajb lüj loj dol, gulëen bazaalan zijt, zagdxeli chu'l con tiblodzi guiaalojl xanyabaa, luar chu'l con gropladan loj bajl yu' gabijl.

*Xcwent xiil gunit*

*(Lc. 15:3-7)*

<sup>10</sup> Ad guiniajgaadi loj ree bën qui rliladxri naj. Din diidxliczi rnin lëjt guial xanyabaa yu' ree anjl rniaj laa reeman zianczi za' reeman loj da Dadan Dios bën yu' xanyabaa. <sup>11</sup> Guiáad Bén guxhaal Dios zëedaman par ree bën ad zinalt xnejz Dios din laa reeman loj dol.

<sup>12</sup> ¿Xhie naladxidi? Bal tijb bejn rajp tibgayuu xiil, abi' rizëeb tijbib, ¿nid zusa'nman zatajpgajlchiinbitapib dajn ya din chigdiilaman be bizëeb guin? <sup>13</sup> Abi' bal yadxejlaman laab, diidxliczi rnin mazri yabaanëman laab guial loj tajpgajlchiinbitap be ad bizëeb guint. <sup>14</sup> Ziangajc dux Dad ree Dios bën yu' xanyabaa ad rëntaman nit ni'czi tijb ree bën qui rliladxri laaman.

*Xhienaag yaguieen perdon du lasa' ree*

*(Lc. 17:3)*

<sup>15</sup> Bal xhie tijb ni mal güün lasa'l lüj, guneenëman lüjzi din gagbeeman xhie falt badxe'man. Bal guidxga'man xtiidxil, ma beenl gan yaneenël laaman zagdxë. <sup>16</sup> Bal id ridxga'man lüj, binë zatijb o zatío'p bejn, din chigneenëdi laaman din con xtiidx tio'p o choon bejn guiguien guial ma bigneenël laaman. <sup>17</sup> Dxel bal ni'qui xtiidx reeman ad ridxga'taman, bagojn ree bën zinal xnejz Dios, abi' bal ni'qui xtiidx reeman ad ridxga'taman, dxel ma guguaadi laaman zi'c tijb bën ad rliladxt Dios o zi'c tijb bën ruquijx impuest par Rom.

<sup>18</sup> Diidxliczi rnin, gra ni ad zatiëjbtidi gac loj guidxliuj guie ad rajctan xanyabaa, guiáad ni tiëbidi gac loj guidxliuj guie mal rajcan xanyabaa.

<sup>19</sup> 'Rni tëën lëjt: Bal yaya'n tio'pidi diidx loj guidxliuj guie, par guiniabidi xhienin loj da Dadan bën yu' xanyabaa, laaman gunee laan. <sup>20</sup> Din lod rado'p tio'p o choon bejn por naj, laa naj za' galay reeman.

<sup>21</sup> Dxel gubig Bëd gunabdiidxaman loj Jesús, rëbaman:

—Dad, ¿bël volt rayal günan perdon lasa'n, bal güünman naj xhienin? ¿Xt gajdx volt ya?

<sup>22</sup> Badxi' Jesúsán rëbaman:

—Ad gajdx voltizi rayal güün lasa'l perdon, rayal güünl perdon gajdx volt gayojnchii.

### *Xcwent bën ad rüjnt perdon lasa'*

<sup>23</sup> 'Xgualrniabee Dios naj zi'c tijb rey ni been xgab guial ma gojl yaguijx ree xmojsaman lojman. <sup>24</sup> Chi guzulojman caybëëman cwent guin, bidxin tijb xmojsaman lojman bën ral zro' da't. <sup>25</sup> Abi' guial achet rajp bën guin din yaguijxaman ni ralaman, gunabee rey guin to'man loj ree bejn në lacheelaman con ree xi'nman nètëë gra ni rajpaman din chile' yaguijxaman di'n guin. <sup>26</sup> Dxel bazuxibaman loj rey guin, beenman naya rëbaman: “Dad, gojp naj pacens zaguixcan graczi ni ralan lojl.” <sup>27</sup> Zianz baya rey guin laaman, beenman laaman perdon gra ni ralaman, abi' baslaaman laaman ziaman. <sup>28</sup> Per chi barii mojs guin yagaj, badxajgaman tijb bën rüjnnëman dxiin, ralaman ta'nzi milia lojman. Dxel gunaazaman laaman guzuloj caguiajman yëjnman, rëbaman: “¡Baguijx ni ralil lon!” <sup>29</sup> Dxel bazuxib bën guin lojman beenman naya rëbaman: “Gojp naj pacens zaguixcan graczi ni ralan lojl.” <sup>30</sup> Per ad guyënt bën guin, badxe'man laaman ladxguuib xt lodzi yaguijxaman di'n guin. <sup>31</sup> Chi baguiaa ree los demazri ree xmojs rey guin, dád gognaa luxdoo reeman, abi' wej reeman biguiedx reeman lojman gra ni goc. <sup>32</sup> Dxel gurejdx rey guin mojs guin, zianz rëbaman lojman: “¡Mojs guiidx! Benan perdon gra ni ralil lon guial beenl naya. <sup>33</sup> ¿Nid nëgajc lüj rayal naya xcompniaril ya, zi'cgajc bayan lüj?” <sup>34</sup> Abi' guial tant balen rey guin, gunabeeman badxe' reeman laaman ladxguuib xt lodzi baguijx gra ni ralaman.

<sup>35</sup> Basnuu Jesús rëbaman:

—Ziangajc günnë da Dadan lëjt, bën yu' xanyabaa, bal id züjn perdon lasa'di con guidib luxdoodi ni rüjnnë reeman lëjt.

## 19

### *Rülüü Jesús xcwent guial rala' lasa'*

*(Mr. 10:1-12; Lc. 16:18)*

<sup>1</sup> Chi gulox gunee Jesús zian, bazaman niz Galilea, zëman niz Judea, niz stiblad ro' guiiw Jordán. <sup>2</sup> Zien ree bejn binal laaman, yagaj bayüjnman bënragxuu ree.

<sup>3</sup> Abi' tio'p choon ree bënfarisew bibig loj Jesús, dxel par güün reeman laaman prueb, gunabdiidx reeman lojman rëb reeman:

—¿Zile' yala' bejn lacheelaman por xhiedxitzinin ya?

<sup>4</sup> Badxi' Jesúsán rëbaman:

—¿Nid wayoolidi loj xtiidx Dios ya, guial diizd guia'xchej Dios “been xinguaaaw në béngunaa”? <sup>5</sup> Rëb tëëman: “Zeel xinguaaaw gusa'n xdad xniaax din guibannë lacheelix, dxel grop reex ma gac zi'c tijbzi bejn.” <sup>6</sup> Zianan zeel ad najtri reex tio'p, ma naj reex tijbzi. Zeel bénguidxliuj ad rayalt yala'man lasa' ni ma bachajg Dios.

<sup>7</sup> Dxel rëb ree bënfarisew guin loj Jesús:

—¿Chexquiza zeel rëb Moisejs guial zile' yala' lacheel bejn, con gudëëdaman gui'ch guial ma bala' lasa' reeman?

<sup>8</sup> Badxi' Jesúsán, rëbaman:

—Cwëjb Moisejs gojc zian guial ad rëntidi guzoobidi diidx, per ad ziant gojc diizd guia'xchej. <sup>9</sup> Naj rni lojdi. Xin yala' lacheel, bal id za'në lacheelix xin ren, abi' tia'x ben ren dolan cayüjnx. Ziangajc xin tia' bën qui bala'ri lasa' guin dolan cayüjnx.



<sup>10</sup> Dxel rëb ree xbejn Jesús lojman:

—Bal zian naj xcwent guial ru lacheel, zagdxeli ad zut lacheel bejn

<sup>11</sup> Badxi' Jesúsán rëbaman:

—Ad grat bejn zile' chignia' ni canin, bën ca'zi ree quiarguejn par chignia' reeman laan. <sup>12</sup> Yu' bejn diizd rajlaman ad zëëdtaman loj guidxliuj par guxhliaaman, yu'za reeman, bejn rüjn laa reeman zian. Abi' yu' reeman rüjn xgab guial zagdxeli guitie'ch reeman xtiidx Dios luar guxhliaa reeman. Bën rën chignia', gol bignia'.

*Rüjnle' Jesús xindoo ree*

*(Mr. 10:13-16; Lc. 18:15-17)*

<sup>13</sup> Binë ree bejn xindoo ree lod za' Jesús, din guixhioob yaaman guijc reex cwedx guiniab tëëman Dios por laa reex, per ree xbejnman guzuloj cadilë reeman bën zinë ree laa reex. <sup>14</sup> Dxel rëb Jesús loj reeman:

—Gol baslaa gui't reex lon, ad bal rudxoondi, din lod rniabee Dios naj par ree bën naj zi'c laa reex.

<sup>15</sup> Abi' guxhoob yaa Jesús guijc ree xindo guin, dxel ziaman.

*Tijb xinrijcw*

*(Mr. 10:17-31; Lc. 18:18-30)*

<sup>16</sup> Bidxin tijb xin guin loj Jesús, abi' gunabdiidxix lojman, rëbix:

—Mextr, ¿xhie ni zagdxë günan din ga'pan guialnaban tiblayaa con Dios?

<sup>17</sup> Dxel rëb Jesús lojx:

—¿Chexc zeel rniabdiidxil lon conin naj ni zagdxë? Achut naj benza'c, tijbzi Dios. Per bal rënl gapil guialnaban tiblayaa con Dios, been zi'c rëb ree mandamient.

<sup>18</sup> Dxel gunabdiidxix loj Jesús rëbix:

—¿Con ree mandamientan?

Badxi' Jesúsán, rëbaman:

—Ad gugüjtil bejn, ad sunël lacheel ben ren, ad cwanl, ad cwëël xtiidx bejn, <sup>19</sup> gojp respejt xdad xniaal, guyën tëë ree lasa'l zi'c rën lüj gajc.

<sup>20</sup> Dxel rëbix:

—Gra ree ni guin cayünan diizd najn xindoo, ¿xhieri ryaadx günan yan?

<sup>21</sup> Badxi' Jesúsán, rëbaman:

—Bal rënl gaquil benza'c loj Dios, bigto' gra ni rajpil dxel gudëël milia guin loj ree bënprob. Zian gapil guialnaza'c xanyabaa. Zianz guidnalil naj.

<sup>22</sup> Chi biguejn xin guin zian, dád guyu nayax ziax, guial dád xinrijcwan.

<sup>23</sup> Dxel rëb Jesús loj ree xbejnman:

—Diidxliczi rnin lojdi: Dád nawëëg chu' benrijcw lod rniabee Dios. <sup>24</sup> Naj rni lëjt. Adli nawëëgt téd tijb camell xan gagux, guial chu' tijb benrijcw lod rniabee Dios.

<sup>25</sup> Chi biguejn ree xbejn Jesús zian, dád badxaløj reeman, abi' rëb reeman:

—¿Chuza zajc gac perdon loj Dios?

<sup>26</sup> Dxel baguiaa Jesús loj reeman, rëbaman:

—Nawëëg gac zian par bénguidxliuj, per par Dios achet ni nawëëg yu'.

<sup>27</sup> Abi' rëb Bëd lojman:

—Ma basa'nan graczi ni raya'pan, persi zudnaalan lüj. Abi' ¿xhieza yayalan?

<sup>28</sup> Badxi' Jesúsán, rëbaman:

—Diidxliczi rnin lojdi chi guidxin dxej yacüb gra, guidxin tëë dxej cwe Bën guxhaal Dios luar lod nabeeman, në lëjt, guial zidnalidi naj, cwedi loj chiptio'p ree luar lod nabeedi, din güün xguialguxtisidi loj guidxiptio'p ree xdiaa Israel. <sup>29</sup> Abi' gra ree bën basa'n lidx, bijch, bizan, xdad, xniaa, xi'n, o guidxliuj ree por naj, zaca' reeman tibgayuu volt mazri guial loj ni basa'n reeman, zajp tëë reeman guialnaban tiblayaa con Dios.

<sup>30</sup> Per zien ree bën naj bën yaløj, gac reeman bën bigra, abi' zienza ree bën naj bën bigra, gac reeman bën yaløj.

## 20

*Xcwent ree bén rüjn dxiin*

<sup>1</sup> Rëb tëë Jesús:

—Xgualrniabee Dios naj zi'c tijb bén rajp tijb guiniaaro', rsildoo briiman zitiilaman mojs güün dxiin loj xguiniaaman. <sup>2</sup> Baya'nnëman laa reeman diidx plac quixaman tijb gaj reeman tibdxej, dxel guxhaalaman laa reeman loj xguiniaaman. <sup>3</sup> Dxel briiman stijb cost raca gaa rsil, abi' baguiaaman ben ren ree za' reeman galay luguiedx, achet xchiin reeman. <sup>4</sup> Zianz rëbaman loj reeman: “Gol biguieen dxiin loj da guiniaan, naj gaguix lëjt zi'c rayal.” Dxel zë reeman. <sup>5</sup> Cost garol dxej briiman stijb, abi' brie gajman cost raca choon wadxe ziangajc rëbaman loj ree bén riga' yagaj, bén achet xchiin. <sup>6</sup> Cost raca gaay wadxe wejman galay luguiedx guin stijb, abi' bidxaaglojman ben ren ree, bén achet ree xchiin, gunabdiidxaman loj reeman, rëbaman: “¿Chexc zeel za'di guin gudëdchej ad cayüjntidi dxiin?” <sup>7</sup> Badxi' reeman laan rëb reeman: “Achut wanee dxiin yaguieenan.” Dxel rëbaman loj reeman: “Në lëjt gol biguieen dxiin loj da guiniaan naj gaguix lëjt zi'c rayal.” <sup>8</sup> Chi ma gurej guiaal, rëb bén naj xguiniaan loj bén naaz dxiin guin: “Gurejdx ree mojs guin din quixil laa reeman, per yalojxgaj gudijx ree bén bigra guyu, zianz quixil bén guyu ree yaloj.” <sup>9</sup> Chi bidxin ree bén guyu loj dxiin guin raca gaay wadxe, gojx tijbgaj reeman xieen tibdxej. <sup>10</sup> Dxel chi bidxin ree bén guyu loj dxiin diizd rsil, gunaladx reeman niajx reeman mazri, per nëgajc reeman gojx xieen tibdxej. <sup>11</sup> Abi' chi cayajx reeman, guzuloj cadxe'ch reeman bén naj xguiniaa laan, <sup>12</sup> rëb reeman lojman: “Bén bigra guyu ree, been reeman dxiin tib horzi abi' zi'cgajc caguixil dunujn gudijxil laa reeman, abi' dunujn badaanan baguieenan dxiin dëchej loj guialnalaa.” <sup>13</sup> Per rëb bén guin loj tijb reeman: “Achet ni mal cayünan lüj. ¿Nid baya'n diidx ya plac gunen tia'l tibdxej? <sup>14</sup> Cwa' ni bayalil baguiaj. Din naj rënan gaguixan bén bigratë guyu zi'c gudixan lüj, <sup>15</sup> zajc günnë' da milian ni rëntzan. ¿O nadëdloj ya guial najn benza'c?” <sup>16</sup> Zianan zeel bén naj ree bén bigra gac reeman bén yaloj, guiáad ree bén yaloj gac reeman bén bigra.

*Bayon volt bagojn Jesús guial guiëtaman*

(Mr. 10:32-34; Lc. 18:31-34)

<sup>17</sup> Chi zë Jesús Jerusalén, gurejdx guidxiptio'p ree xbejnman tiblax, rëbaman loj reeman:

<sup>18</sup> —Ganin lëjt, ziyo' ree Jerusalén, lod yayü reeman Bén guxhaal Dios, loj ree bixhioz rniabee ree bixhioz në loj ree mextr rajc ley, abi' laa reeman nabee guiëtaman, <sup>19</sup> yayü reeman laaman loj ree benzit, din guze' reeman laaman quin tëë reeman laaman, abi' gucaa reeman laaman loj crüzj, per yayon dxej yabanman.

*Ni gunab xniaa Jacob con Waj*

(Mr. 10:35-45)

<sup>20</sup> Gubig lacheel Zebedeo loj Jesús con grop ree xi'nman, bazuxibaman lojman din guiniabaman ni rënman. <sup>21</sup> Gunabdiidx Jesús lojman, rëbaman:

—¿Xhie rënl?

Badxi' bén guinan, rëbaman:

—Rënan nabeel cwe tijb da xi'nman xladbeel, stijbim xladruvejsil, chi ma canabeel.

<sup>22</sup> Dxel rëb Jesús:

—Ad ragbeetidi ni rniabidi. ¿Wen zajc tädidi guialzi zi'c naj ni gadëëdan ya?

Badxi' reeman laan, rëb reeman:

—Zayajcan.

<sup>23</sup> Abi' rëbaman:

—Diidxliczi rnin zajc tädidi guialzi zi'c naj ni gadëëdan, per guial cwedi da ladbeen o da ladruvejsan ya ad najt rayal ganabee, din ma najn par ree bén bacaabee da Dadan.

<sup>24</sup> Chi biguiejn zachii ree xbejn Jesús zian dád balen reeman grop bijch reeman. <sup>25</sup> Per gurejdx Jesús laa reeman, rëbaman:

—Lëjt ragbee, bën rniabee ree loj guidxliuj, rniabee reeman bejn ree zi'ctzi rën reeman, guiáad ree bën zobjloj rüjnnë reeman bejn ree zi'ctzi rën reeman por guialrniabee ni rajp reeman. <sup>26</sup> Per con lëjt ad rayalt gac zian. Bal chu rën gac bën rniabee lojdi, rayal güünman sirv lojdi. <sup>27</sup> Ziangajc bën rën gac bën zobjloj lojdi, rayal güünman sirv lojdi zi'c bën nado'. <sup>28</sup> Zi'c Bén guxhaal Dios ad bi'ttaman par güün reeman sirv lojman, bi'taman par güünman sirv gudëë tëë xguialnabanman din laa zien bejn loj dol.

*Rayüjn Jesús tio'p ree bénlutia'p*  
(Mr. 10:46-52; Lc. 18:35-43)

<sup>29</sup> Chi bazaman luguiedx Jericó con ree xbejnman, dád zien ree bejn binal laaman. <sup>30</sup> Dxel tio'p ree bénlutia'p zobj cwë' nejj chi biguiejn reeman cadëd Jesús niz yagaj, gurixdiaj reeman rëb reeman:

—¡Dad, xdiaa Davi, baya dunujn!

<sup>31</sup> Abi' rdilë ree ben guin laa reeman din yacwëëz ro' reeman, per mazri ribixdiaj reeman rëb reeman:

—¡Dad, xdiaa Davi, baya dunujn!

<sup>32</sup> Dxel guzudxe Jesús, gurejdxaman laa reeman, gunabdiidxaman loj reeman, rëbaman:

—¿Xhie rëndi günan por lëjt?

<sup>33</sup> Badxi' reeman laan, rëb reeman:

—Dad, rayënan yaxal du lojn.

<sup>34</sup> Dxel baya Jesús laa reeman, abi' baqui'man loj reeman. Loj hor zii baxal loj reeman, dxel binal reeman Jesús.

## 21

*Ru Jesús Jerusalén*  
(Mr 11:1-11; Lc. 19:28-40; Jn.12 :12-19)

<sup>1</sup> Chi ma cadxin Jesús con ree xbejnman Jerusalén, niz guiedx la Betfagé, gajxh ruguia' Olivos, guxhaal Jesús tio'p ree xbejnman, <sup>2</sup> rëbaman loj reeman:

—Golchej guiedx riga' lad ni, ni guidxaaglojdi tijb bur, caduunë xi'nb. Gol guxhiec reeb gol tanë reeb guie. <sup>3</sup> Abi' bal chu xhie na lojdi, gol güjdx guial Dad Jesús cayaadx laa reeb, gandoo yaxhaalaman laa reeb.

<sup>4</sup> Zian gojc persi gojc cumplid ni gunee bën badëë xtiidx Dios loj ree bejn, chi rëbaman:

<sup>5</sup> Gol güjdx loj ree bën Sión:

“Gol baguiaa laa xreydi zëëd lojdi,  
ad zëëdtaman nabë, dxiibaman tijb bur,  
tijb burdoo xi'n tijb be rüü.”

<sup>6</sup> Dxel wej ree xbejn Jesús abi' been reeman zi'c rëbaman loj reeman, <sup>7</sup> binë reeman bur guin con xi'nb, abi' badxiib xab reeman xijch reeb zianz gudxib Jesús burdo guin. <sup>8</sup> Abi' guial zien ree bejn, yu' reeman rguijxh xab lunejz, zien tëë reeman ritü' xidx ree yag persi rguijxh reeman laa reen lod cadëdaman. <sup>9</sup> Abi' zi'c ree bën ned zi'c ree bën zidnal laaman, rbixdiaj reeman, rëb reeman:

—¡Benza'c bendxoon naj xdiaa rey Davi! ¡Nüjnle' Dios bën guxhaalaman! ¡Benza'c bendxoon naj Dios bën yu' xanyabaa!

<sup>10</sup> Chi guyu Jesús luguiedx Jerusalén, gra ree bën luguiedx guin badxaloj, abi' riniabdiidx loj lasa' reeman, rëb reeman:

—¿Chu bën guin?

<sup>11</sup> Dxel rëb ree benzien guin:

—Laaman naj Jesús, bén rudëe xtiidx Dios loj ree bejn, bén Nazaret guiedx riga' niz Galilea.

*Rabëe Jesús bén ruto' ree lën yadoo Jerusalén*  
(Mr. 11:15-19; Lc. 19:45-48; Jn.2 :13-22)

<sup>12</sup> Chi bidxin Jesús ro' yadooro' Jerusalén, guzuloj caybëeman bén cuto' ree në ree bén cazii. Barexguiataman xmex ree bén cuchaa milia në xmex ree bén cuto' palom. <sup>13</sup> Dxel rëb Jesús loj reeman:

—Loj xtiidx Dios rëb: “Lidxan grii laj yu lod rbejdx rniab bejn Dios.” Per lëjt nüjndan zi'c lidx ree xingubaan.

<sup>14</sup> Dxel bénlutia'p ree con ree bencoj bibig reeman loj Jesús lën yadoo guin abi' bayüjnman laa reeman. <sup>15</sup> Per chi baguiaa ree bixhioz rniabee ree bixhioz con ree mextr rajc ley milagr cayüjn Jesús, biguejn tëe reeman rëb ree xindoo lën yadoo guin: “Benza'c bendxoon naj xdiaa rey Davi”, dxel dád bidxe'ch reeman. <sup>16</sup> Abi' rëb reeman loj Jesús:

—¿Rguejnl ni canee ree xindo guin ya?

Badxi' Jesúsán, rëbaman:

—Rguejncan. Per ¿gadidi gool loj xtiidx Dios ya? Lod rëb:

Lüj badëed ni gool ree xindoo në ree xindobëz sta rë' dud, din guilies reex xvaloril.

<sup>17</sup> Dxel basa'n Jesús laa reeman, zëman Betania ni baya'nman guxin guin.

*Tijb yag higo ni gubidx*  
(Mr. 11:12-14, 20-26)

<sup>18</sup> Chi bareguiaal rsil la'tgaj zë Jesús Jerusalén stijb, guzuloj gulaanman. <sup>19</sup> Abi' baguiaaman zobjb tijb yag higo cwë' nejb, dxel gubigaman cwë'n, per ganaxzi balag ca lojn. Zianz rëbaman loj yag higo guin:

—¡Ad yu'tri dxej tial higo!

Loj hor guin gajc gubidx yag guin. <sup>20</sup> Chi baguiaa ree xbejnman zian, dád badxaloj reeman abi' gunabdiidx reeman loj Jesús, rëb reeman:

—¿Xhienaag gojc zeel laa gubidx gajc yag higo guin?

<sup>21</sup> Badxi' Jesúsán, rëbaman:

—Naj rni lojdi, bal rliladxidi Dios abi' ad zunawëegtidi, ad ni bentzan con yag higo guin zajc güündi, zajc guiëbidi loj guia' guie: “Biquied guie, bisob loj nijsdoo”, abi' zajc gajc zian. <sup>22</sup> Gra ni guiniabidi loj Dios, bal rliladxidi laaman, zuneeman laan.

*Xgualrniabee Jesús*  
(Mr. 11:27-33; Lc. 20:1-8)

<sup>23</sup> Chi guyu Jesús lën yadooro' Jerusalén, la'tgaj culüüman bejn ree. Bixhioz rniabee ree bixhioz con ree guxtis Israel, gubig reeman loj Jesús, abi' gunabdiidx reeman, rëb reeman:

—¿Chu na güünl ni guin ree? ¿Chu banee gualrniabee lojl?

<sup>24</sup> Badxi' Jesúsán, rëbaman:

—Ziangajc naj yu' tijb ni ganabdiidxan lojdi, bal yadxi'dan dxel ganin lëjt chu banee gualrniabee günan ni guin ree. <sup>25</sup> ¿Chu guxhaal Waj chigroobnijsaman bejn ree, Dios ya o bénguidxliuj?

Dxel guzuloj cayü reeman diidx, rëb reeman:

—Bal yaguie'ch ree, “Dios guxhaal laaman”, zanaman: “¿Chexza zeel ad bililadxtidi laaman?” <sup>26</sup> Abi'za bal yaguie'ch ree: “bénguidxliuj guxhaal laaman”, radxeb ree yalen ree bejn din gra reeman rliladx gual Waj naj bén badëed xtiidx Dios loj ree bejn.

<sup>27</sup> Dxel rëb reeman loj Jesús:

—Ad rayagbeetan.

Badxi' Jesúsán, rëbaman:

—Ni'qui naj ad zanitan lojdi chu banee guialrniabee gūnan ni guin ree.

*Tijb bén guyu tio'p xi'n*

<sup>28</sup> Basnuu Jesús rēbaman loj ree bixhioz rniabee ree bixhioz nē loj ree guxtis Israel.

—¿Xhie nadi ni ganin lējt? Tijb bejn guyu tio'p xi'nman, dxel rēbaman loj tijbix: “Xi'n, wej yandxej biguieen dxiin loj guiniaa yu' uv.” <sup>29</sup> Badxi'xan, rēbix: “Ad zatan.” Per dxelri bayūjnx xgab zianz wejx. <sup>30</sup> Abi' rēbaman loj stijb xi'nman din chex, badxi'xan, rēbix: “Yo dad, gazacan.” Per ad wejtix. <sup>31</sup> Yan, ¿chu loj grop reex been ni rēn xdad reex?

Badxi' reeman laan, rēb reeman:

—Xin rēbaman loj yaloj guin.

Dxel rēb Jesús loj reeman:

—Diidxliczi rnin, bén ruquijx ree impuest con ree bēngunaa naban nadxuudx, yalojl laa reeman chu' lod rniabee Dios guial lojdi. <sup>32</sup> Din bi't Waj, bén baroobnijs bejn ree par gulüüman lējt xhienaag guibandi, per ad bililadxtidi xtiidxaman. Guiáad ree bén ruquijx impuest con ree bēngunaa naban nadxuudx, bililadx reeman xtiidxaman. Per lējt majsi baguiaadi gra ree ni guin, ad bayūjntidi xgab por xtolidi din nililadxidi laaman.

*Xcwent ree mojs guijdx*

*(Mr. 12:1-12; Lc. 20:9-19)*

<sup>33</sup> Rēb tēe Jesús loj reeman:

—Yan, gol bacaagdiajg ganin lējt stijb ni naj zi'c cwent. Guyu tijb bejn guxūbinman uv ree loj xguiniaaman, dxel beenman gurajl gadēd ro'n, beenchaaw tēeman tijb luar lod grii xnijs uv guin, abi' bazoobaman tijb yu ya da't din guiya'p guidib guiniaa guin.

'Zianz badēedaman laan garol loj ree bén güün dxiin lojn, zētaman zijt. <sup>34</sup> Chi bidxin dxej yaru' ree uv guin, guxhaalaman tio'p choon ree xmojsaman chigxii reeman ni rayalaman. <sup>35</sup> Per ree bén rüjn dxiin loj guiniaa guin gunaaz reeman mojs guin ree. Tijbaman gudijn reeman, stijbaman bagūjt reeman, stijbaman bacaaguiaj reeman. <sup>36</sup> Dxel bén naj xguiniaan guxhaalaman mazri ree mojs guial loj ree bén we yaloj, per ziangajc beennē ree bén guin laa reeman.

<sup>37</sup> 'Ni bigra, guxhaal xi'nman guial gunaladxaman: “Zajpqui reeman da xi'nan respejt.” <sup>38</sup> Per chi baguiaa ree bén guin xi'nman, rēb loj lasa' reeman: “Xin guinan naj xin tia' guidxliuj guin, yagūjt reex din gacan du xieen ree.” <sup>39</sup> Abi' gunaaz reeman laax, babēe reeman laax loj guiniaa guin dxel bagūjt reeman laax.

<sup>40</sup> Dxel gunabdiidx Jesús loj ree bén caneenēman, rēbaman:

—Chi yadxin bén naj xguidxliuj laan, ¿xhie naladxidi güünnēman bén guin ree?

<sup>41</sup> Abi' rēb reeman loj Jesús:

—Ad zayataman gugūjtaman bén guin ree, dxel gudēeman guidxliuj guin garol loj ree ben ren, bén yayü ni rayalaman chi guidxin dxej yaru' ree uv guin.

<sup>42</sup> Dxel rēb Jesús loj reeman:

—¿Id wayolczidi loj xtiidx Dios ya? Lod rēb:

Guiaj ni gulēego'n ree bén rüjn yu.

Laan goc ni mazri been sirv gojcnē yu guin.

Laan naj ni been Dios,  
abi' dád radxa du loj ree.

<sup>43</sup> Zeel rnin lojdi, zariicadi loj xguialrniabee Dios abi' ben ren ree yayu xluaridi, bén wali ree güün zi'c rēnman. <sup>44</sup> Abi' chutēez bén yab guijc guiaj guin, zarooxaman, guiáad bal yab guiaj guin guijcaman zanidlojman.

<sup>45</sup> Chi biguiejn ree bixhioz rniabee ree bixhioz con ree bēnfarisew guin ni cayü Jesús zi'c cwent, dxel gogbee reeman guial laa reeman cuza'taman. <sup>46</sup> Abi' guyēn reeman niniaaz reeman laaman, per bidxeb reeman bejn ree guial rliladx reeman laaman naj bén rudēed xtiidx Dios loj ree bejn.

## 22

### *Xcwent guialruxhliaa*

<sup>1</sup> Basnuu Jesús beman zi'c cwent loj reeman rëbaman:

<sup>2</sup> —Xguialrniabee Dios naj zi'c tijb rey bën been lanijro' chi baxhliaa xi'nman. <sup>3</sup> Abi' guxhaalaman mojs ree bignee reeman biooz ree, per biooz guin ree ad guyënt reeman niej reeman. <sup>4</sup> Dxel guxhaalaman mojs ren ree, rëbaman loj reeman: “Gol güjdx loj ree biooz guin ma naj guialraw, ma gunabeen güjt ree da go'nan në ree beren, bero' ree. Ma najcchaaw graczi, gol güjdx loj reeman din gui't reeman loj guialruxhliaa guin.” <sup>5</sup> Per biooz guin ree ad bidxga't reeman xtiidx rey guin, yu' reeman zë loj xguiniaa, yu' reeman zë xmandad, <sup>6</sup> yu' tää reeman gunaaz mojs guin ree gudijn reeman laa reeman abi' bagüjt reeman laa reeman. <sup>7</sup> Chi gogbee rey guin zian, dád bidxe'chaman. Guxhaalaman bën naj ree xsuldadaman persi bagüjt reeman bën guin ree baze'c tää reeman lidx reeman. <sup>8</sup> Dxel rëbaman loj ree xmojsaman: “Graczi ma najcchaaw par loj guialruxhliaa guin, per ree bën gunen ad najt guial ni't reeman. <sup>9</sup> Yan, gol wej lod radxaag lasa' ree nejz, gol güjdx loj ree bën guidxaalojtzidi din gui't reeman loj guialruxhliaa guin.” <sup>10</sup> Abi' brii ree mojs guin wej reeman lunejz guin ree, bato'p reeman gra ree bën bidxaalojtzidi reeman, zi'c ree benmal zi'c ree benza'c, zian gudxa ree biooz lidx rey guin.

<sup>11</sup> 'Per chi guyu rey guin din guguaaman biooz guin ree, baguiaaman tijb bën ad najcwt xab ni rayal gacwaman loj guialruxhliaa guin. <sup>12</sup> Abi' rëb rey guin lojman: “Laadx lüj, ¿xhienaag beenl guyul guie abi' ad najcwt xabil ni rayal gacwil loj guialruxhliaa?” Dxel achet badxejl niëjb bën guin. <sup>13</sup> Zianz rëb rey guin loj ree bën cagui's guialraw: “Gol guxhii guia'x në yaax, gol bazaal tääx xchu lod nacay da't lod goonx gaw tää layix.” <sup>14</sup> Din zien ree bejn rdxejl, per ad grataman chu'.

### *¿Rayal gax impuest ya?*

*(Mr. 12:13-17; Lc. 20:19-26)*

<sup>15</sup> Dxel baza ree bënfarisew yagaj, abi' baya'n reeman diidx xhie guiniabdiidx reeman loj Jesús din guidoon xhie guiëbaman, zian chile' gutedia' reeman laaman. <sup>16</sup> Abi' guxhaal ree xbejn reeman con ree xbejn Herodes, rëb reeman lojman:

—Mextr, dunujn rayagbee guial lüj rniece diidxli, abi' walil rulüül guial xhienaag rën Dios guiban bejn, ad ridxga' täätil chu naj bejn. Din lojl tiblojzi naj bejn. <sup>17</sup> Guna du lojn: ¿Zagdxen ya yadijxan impuest loj César o ad zagdxetan ya?

<sup>18</sup> Per gogbee gajc Jesús xgabmal ni cayüjn reeman, abi' rëbaman loj reeman:

—Bën rusquiee, ¿chexc zeel raguiilidi mod xhienaag gutidia'di naj? <sup>19</sup> Gol balüü tijb cintabl lon ni rguijxnëdi impuest.

Dxel badëed reeman tijban lojman, <sup>20</sup> abi' gunabdiidx Jesús loj reeman, rëbaman:

—¿Chu loj ca lojn chu tää laj ca lojn?

<sup>21</sup> Badxi' reeman laan, rëb reeman:

—Laj César në lojman.

Dxel rëbaman:

—Gol badëed loj César ni naj xieen César, guiáad loj Dios gol badëed ni naj xieen Dios.

<sup>22</sup> Chi biguiejn reeman zian, dád badxaloj reeman, dxel basa'n reeman laaman, zianz zia reeman.

### *Gunabdiidx reeman xcwent guial yaban ree bengüt*

*(Mr. 12:18-27; Lc. 20:27-40)*

<sup>23</sup> Dxejzii gajc tio'p choon ree bénsadusew wej reeman bignaj reeman Jesús, bénsadusew guin ree ad rliladxt reeman guial yaban ree bengüt, zeel rëb reeman loj Jesús:

<sup>24</sup> —Mextr, Moisejs rëb guial bal guiët tijb xinguaaaw abi' achut xi'n reex guyu con lacheelix, bijch xingüt guin guxhlianë béngunaa bizëjb guin din chu' xi'n reex luar

bijchix. <sup>25</sup> Du lojn guyu tijb famil lod gojc reex gajdx bijch. Baxhliaa xin yaløj guin, per gütix abi' guial ad guyut xi'nix, dxel bijch barojpax baxhliaanë béngunaa guin. <sup>26</sup> Per ziangajc guzajc xin barojp guin abi' ziangajc guzajc xin bayon guin, xt bagajdx reex guzajc zian. <sup>27</sup> Chi bara reex güt dxel güt béngunaa guin. <sup>28</sup> Yan, chi yaban ree bengüt, loj guigajdx reex, ¿chu gac xbéngunaa laaman guial gra reex baxhliaanë laaman?

<sup>29</sup> Badxi' Jesúsán, rëbaman:

—¡Ragdxadi guial ad nünbeetidi xtiidx Dios ad nünbee tëtidi xhienaag naj xguialrniabeeman! <sup>30</sup> Din chi yaban ree bengüt, ad zuxhliaatri reeman ad zudëd tëttri xi'n reeman guxhliaa, ma gac reeman zi'c ree anjl yu' xanyabaa. <sup>31</sup> Abi' xcwent ni yaban ree bengüt, ¿gadidi gool ya lod ca guial Dios gajc rëb: <sup>32</sup> “Naj naj xDios Abraham, xDios Isaac në xDios Jacob”? Abi' Dios ad najtaman xDios ree bengüt, najman xDios ree bën naban.

<sup>33</sup> Chi biguiejn ree bejn zian, dád badxaløj reeman zi'c rulüüman laa reeman.

### *Mandamient mazri zøjbloj*

*(Mr. 12:28-34)*

<sup>34</sup> Chi gogbee ree bënfarisew guial achet badxejl niëjb ree bénsadusew loj Jesús, dxel baya'n reeman diidx badxaag lasa' reeman. <sup>35</sup> Abi' tijb ree bënfarisew guin, bën naj mextr rajc ley, gunabdiidxaman loj Jesús din guidoon xhie guiëbaman, rëbaman:

<sup>36</sup> —Mextr, ¿con mandamientan mazri zøjbloj loj gra ree mandamient ni zëd loj ley?

<sup>37</sup> Badxi' Jesúsán rëbaman:

—“Guyën xDadil Dios guidiblagaa guidib guiyc guidib ladxil.” <sup>38</sup> Laan naj mandamient mazri zøjbloj. <sup>39</sup> Ziangajc naj mandamient rarojp ni rëb: “Guyën ree bejn zi'c rën lüj gajc.” <sup>40</sup> Con grop ree mandamient guie, ma cayüjn bejn cumplid gra ley bacaa Moisejs në ree ni bacaa ree bën badëe xtiidx Dios loj ree bejn.

### *Chu loj xdiaa za Cristo*

*(Mr. 12:35-37; Lc. 20:41-44)*

<sup>41</sup> La'tgaj nadxag lasa' ree bënfarisew guin, gunabdiidx Jesús loj reeman, rëbaman:

<sup>42</sup> —¿Xhie xgab rüjndi por Cristo? ¿Chu loj xdiaa zaman?

Badxi' reeman laan rëb reeman:

—Loj xdiaa Davi.

<sup>43</sup> Dxel rëb Jesús loj reeman:

—Per, ¿chexquiza zeel por xSprijt Dios rëb Davi lojman, Dad? Din Davi rëb:

<sup>44</sup> Dios rëb loj bën rniabee naj:

“Gurej da ladbeen, xt gabecan xin rdxe'ch ree lüj guia'l.”

<sup>45</sup> Yan, bal xi'n Davi naj Cristo, ¿chexquiza zeel rëb Davi lojman Dad?

<sup>46</sup> Achutczi gojc nadxi' xtiidx Jesús, ni'czi tijb diidx. Abi' diizd dxejzii achutczi bayax niniabdiidx xhienin lojman.

## 23

### *Ni rüjn ree mextr rajc ley në ree bënfarisew*

*(Mr. 12:38-40; Lc. 11:37-54; 20:45-47)*

<sup>1</sup> Rëb Jesús loj ree bejn në loj ree xbejnman:

<sup>2</sup> —Mextr rajc ree ley con ree bënfarisew rulüü reeman xhie rën guiëb ni ca loj xley Moisejs. <sup>3</sup> Zeel gol bazoob xtiidx reeman, gol been tëe gra ni na reeman lojdi, per ad güüdi zi'c rüjn reeman, din laa reeman ni ren na reeman abi' ni ren rüjn reeman.

<sup>4</sup> Rniabee reeman güün bejn ni nawëeg da't, per rniabeezi reeman güün bejn zian, guiáad laa reeman ni'qui ta'n ad rüjnt reeman bejn yudar din güün reeman zi'c rën reeman. <sup>5</sup> Gra ni rüjn reeman, rüjn reeman laan din yadxaløj bejn laa reeman. Ruladx

reeman guixhii lucwaj reeman në xu'c reeman tijb cint ni ca xtiidx Dios loj, ruladx tëë reeman gacw reeman lajd zagdx. <sup>6</sup> Ruladx reeman cwe reeman lod rayal rbej ree bën zobjloj, loj tijb guialraw, abi' ziangajc rüjn reeman lën ree yadoo. <sup>7</sup> Ruladx tëë reeman gugajpdioz bejn laa reeman zagdx niz lunejz guiëb tëë reeman loj reeman mextr.

<sup>8</sup> 'Per lëjt ad sëëbladixidi guiniee bejn lëjt mextr, din tijbzi naj gradi, tijbzi mextr rajpidi abi' laaman naj Cristo. <sup>9</sup> Ni'qui tijb loj bénguidxliuj, bën ad najt xdadidi, ad guiëbidi dad, din tijbzi xdadidi yu', laaman yu' xanyabaa. <sup>10</sup> Ad güün tëëdi naguiejn yayagbee ree bejn lëjt zi'c bën rniabee, din tijbzi bën rniabee yu', laaman naj Cristo. <sup>11</sup> Bën mazri zobjloj lojdi, laaman rayal güün sirv lojdi. <sup>12</sup> Din bën rlies xvalor gajc achet lasajcaman. Guiáad bën rüjn naya, zajs xvaloraman.

<sup>13</sup> 'iProbza lëjt mextr rajc ley në lëjt bënfarisew, bën rusquiee!, ad rtiëjbtidi gagbee ree bejn xhienaag din gac reeman xbejn Dios, ni'quiza lëjt ad rüjntidi naguiejn gaquidi xbejn Dios, abi' rudxoondi gac xbejn Dios bën rën ree gac xbejnman.

<sup>14</sup> 'iProbza lëjt mextr rajc ley në lëjt bënfarisew, bën rusquiee!, din raca'di lidx ree béngunaa bizëjb, abi' din guiëb bejn guial benza'c lëjt dád xchej rbejdx rniabidi Dios. Zeel mazri castiro' yayalidi.

<sup>15</sup> 'iProbza lëjt mextr rajc ley në lëjt bënfarisew, bën rusquiee!, zizadi guidibdoo rguilidi bën gac ree xbejn, abi' chi ma beendi gan tijbaman al mazri xi'n xindxab rüjndi laaman guial lojdi.

<sup>16</sup> 'iProbza lëjt, bën lutia'p!, rëbidi: “Achet güünan bal id züjn bejn ni guneeman, majsi ma baza'taman yadooro' Jerusalén, per bal guza'taman ni or yu' ree lën yadoo guin, dxel ma rüjn naguiejn güünman ni guneeman.” <sup>17</sup> iNatontidi, wed natia'p lojdi! ¿Conin mazri lasajc: Or guin ya o yadoo beenle' or guin? <sup>18</sup> Rëb tëëdi: “Achet güünan bal id züjn bejn ni guneeman majsi ma baza'taman xialtar yadoo guin, per bal guza'taman gon dxiib loj altar guin, rüjn naguiejn güünman ni guneeman.” <sup>19</sup> iBën lutia'p! ¿Conin mazri lasajc par lëjt: Gon guin ya o altar beenle' gon guin? <sup>20</sup> Bën ruza't altar guin ad altar guintzan ruza'taman, nëgajc gra ni dxiib lojn ruza'taman. <sup>21</sup> Guiáad bën ruza't yadoo guin, ad yadoo guintzan ruza'taman, Diosan ruza'taman din lidxaman naj yadoo guin. <sup>22</sup> Abi' bën ruza't xanyabaa, Diosan ruza'taman në lod zobjbaman.

<sup>23</sup> 'iProbza lëjt mextr rajc ley në lëjt bënfarisew, bën rusquiee!, rbëëcadi bidxtil, anís nëtëë comin ni rayal gudëëdi loj Dios, abi' ad ruzoobtidi xley Moisejs ni mazri zobjloj, ad rüjntidi zi'c rayal, ad rayat lasa'di, ad za'dxi'ch tëëtidi loj xnejz Dios. Laa reen rayal güündi, per ad cwëëladixidi gudëëdi ni rayal loj Dios. <sup>24</sup> iBën lutia'p, rajpidi cudad chitëë guiëbidi tijb bizëdlajs, abi' rguiëjbidi tijb camell!

<sup>25</sup> 'iProbza lëjt mextr rajc ley në lëjt bënfarisew, bën rusquiee!, rusiadi xijch ree vajs në xijch ree pliajt naj nadxuudx, guiáad luxdoodi guidxa ni dxuudx, në guialgubaan nëtëë guialrdxe'ch lasa'. <sup>26</sup> iBënfarisew lutia'p: Yalojxgaj gol basia, zian guiguien waliquidi nayadi loj Dios!

<sup>27</sup> 'iProbza lëjt mextr rajc ley në lëjt bënfarisew, bën rusquiee!, najdi zi'c baa nayë' culor naquich, guijcan rguien nix da't, per lënan guidxa ree xdxijt bengüt në graloj ree ni dxuudx. <sup>28</sup> Zian najdi, niz loj ree bejn, rulüüdi benza'c, per luxdoodi guidxa guialrusquiee në guialnaladx.

<sup>29</sup> 'iProbza lëjt mextr rajc ley në lëjt bënfarisew, bën rusquiee!, rüjndi xbaa ree bën badëë xtiidx Dios loj ree bejn, abi' rüjnchaawidi xbaa ree bën goc benza'c, <sup>30</sup> dxel rëbidi: “Bal nabajnan xtiamp ree dux béngulalan, ad nët dunujn nagüjt bën badëë ree xtiidx Dios loj ree bejn.” <sup>31</sup> Abi' con ni guin ree, rayünbeegajquidi guial loj xdiaa bën bagüjt ree bën badëë xtiidx Dios loj ree bejn zëëdidi. <sup>32</sup> iGol baloozza ni guzuloj been xbéngulalidi!

<sup>33</sup> iBëndol, xi'n xindxab! ¿Xhienaag laadi loj castiro' ni yu' gabijl? <sup>34</sup> Zeel gaxhalan lojdi bën gudëë ree xtiidx Dios, bën rajc ree në ree mextr. Per yu' reeman gugüjtidi, yu' reeman gucaadi loj crüjz, yu' tëë reeman quindi lën ree xyadoodi abi' sunalidi laa reeman guiedx



por guiedx din güündi laa reeman xhienin. <sup>35</sup> Zianan zeel guijquidi yab xtol gra ree bën bagüjt bën goc ree benza'c diizd Abel bën guban xnejz loj Dios xt Zacarías xi'n Berequías, bën bagüjt reeman lule' yadooro' Jerusalén. <sup>36</sup> Diidxliczi rnin lëjt, xcasti gra ree ni guin yab guijc ree bën riga' loj guidxliuj yan.

*Roon Jesús por Jerusalén*

*(Lc. 13:34-35)*

<sup>37</sup> Rëb tëë Jesús:

—¡Bën Jerusalén, bën Jerusalén, rugüjtidi bën rudëë ree xtiidx Dios loj ree bejn abi' rucaaguaajdi bën rxhiaal Dios lojdi! ¡Bëlczi volt guyënan nuchagan lasa'di, zi'c rüjn tijb guid ruchajg lasa' ree xi'nb lën xhiilib, per ad gutiëjbtidi! <sup>38</sup> Zianan zeel yaya'n ladxidi zi'c tijb guiedx lod achut zojb. <sup>39</sup> Abi' rnin lëjt diizd yan ad zuguaatrudi naj, xt chi guidxin dxej guiëbidi: “¡Nüjnle' Dios bën guxhaalaman!”

## 24

*Rëb Jesús guial yaze'n yadooro'*

*(Mr. 13:1-2; Lc. 21:5-6)*

<sup>1</sup> Chi barii Jesús lën yadooro' Jerusalén, ziaman, bibig ree xbejnman lojman balüü reeman gra ree xyu yadoo guin lojman. <sup>2</sup> Abi' rëb Jesús loj reeman:

—Diidxliczi rnin, gra ni cuguaadi yu' dxej ni'qui tijb guiaj guin ad zaya'nt guijc stijban, gran yaze'n.

*Ni gac chi gad guidxliuj nit*

*(Mr. 13:3-23; Lc. 21:7-24; 17:22-24)*

<sup>3</sup> La'tgaj zojb Jesús guijc guia' la Olivos, gubig ree xbejnman lojman, rëb reeman:

—Rayënan nal goc gac zian. ¿Xhie ree sen gac chi ma zidyob gui'til stijb, në chi ma zidyob nit guidxliuj?

<sup>4</sup> Dxel rëb Jesús loj reeman:

—Gol gojp cudad achu gusquiee lëjt. <sup>5</sup> Din zien ree bejn gui't guiëb reeman guial por naj zëed reeman, guiëb tëë reeman: “Naj naj Cristo”, abi' zien bejn gusquiee reeman. <sup>6</sup> Per lëjt chi guiguiejndi cayajc wadijl o zëeb diidx guial gac wadijl, ad guidxebidi din zian naj gac. Per ad wadxint dxej nit guidxliuj. <sup>7</sup> Din til nacion con stijb nacion, në bën rajp guialrniabee con stijb bën rajp guialrniabee. Abi' gui't xudoxh në gubijn niz ni niz guie. <sup>8</sup> Gra ree nine ree gac chi ma suloj guialzi guin.

<sup>9</sup> 'Dxel yayü ree bejn lëjt loj ree bën gusagzi lëjt, gugüjt reeman lëjt, abi' gra ree bénguidxliuj guidxe'ch lëjt guial najdi da bejnan. <sup>10</sup> Chi gac zian zien ree bejn gusa'n guialrliladx reeman naj, guidxe'ch lasa' reeman abi' yayü lasa' reeman loj ree bën ralen laa reeman. <sup>11</sup> Gui't tëë zien ree bën gusquiee, guiëb reeman guial rudëed reeman xtiidx Dios, abi' zien bejn gusquiee reeman. <sup>12</sup> Abi' guial dád zien ni mal gac, zien da't bën ad zëntri ree lasa'. <sup>13</sup> Per bën sudxi'ch loj guialrliladxaman naj, xt dxej chigra guibanman, laaman yayal xanyabaa. <sup>14</sup> Abi' xtiidx Dios ni canin lëjt yan guire'chan guidibczi guidxliuj din gagbee gra bejnan, dxelri nit guidxliuj.

<sup>15</sup> Zianan zeel chi guguaadi zojb tijb ni dxuudx, ni ad rüjnt sirv lën yadooro' Jerusalén, zi'c gunee Daniel bën badëë xtiidx Dios loj ree bejn (bën gool gui'ch guie ree, gol bignia'), <sup>16</sup> guial bën zojb ree Judea rayal guxüün reeman che reeman dajn. <sup>17</sup> Guiáad ree bën yë'p guijc yulidx dxejzii, ad yayu lënülidx reeman par tia' xhie xieen reeman. <sup>18</sup> Abi' ree bën za' dajn, ad yajejc reeman chigxii xab reeman. <sup>19</sup> ¡Probza ree béngunaa nüü xi'n o bën ca' ree xindobëz lën ree dxejzii! <sup>20</sup> Gol gurejdx gunab Dios chitëë gac zian tiamp nayaag o dxej raziiladx ree bejn ya. <sup>21</sup> Din nadxel dád guialziro' chu', zi'c ad wayajtczi diizd guia'xchej chi gad guidxliuj gacchaaw ad yu' tëët dxej gac zian. <sup>22</sup> Abi' bal id Dios

gucwëez guialzi chu' lën ree dxej guin, ni'qui tijb bejn ad zalaat, per gucwëezaman laa reen por ree bën guleman.

<sup>23</sup> 'Lën ree dxejzii bal chu na lojdi: “Gol baguiaa, laa Cristo za' guie”, o “Gol baguiaa laaman za' ni”, ad bal chililadxidi. <sup>24</sup> Din zi't zien ree bën gusquiee na guial laa reeman naj bën guxhaal Dios o na reeman guial laa reeman naj bën rudëed xtiidx Dios. Abi' züjn reeman milagr ree në graloj ni yadxaloj bejn din gusquiee reeman laa reeman, abi' bal zile'n xt në ree bën gulej Dios gusquiee reeman. <sup>25</sup> Ma rni xgajn lojdi ni gac. <sup>26</sup> Zeel bal chu na lojdi: “Gol baguiaa laa Cristo za' niz loj yujbidx”, ad bal chedi o na reeman lojdi: “Laa Cristo yu' lënu ni”, ad bal chililadxidi. <sup>27</sup> Din zi'c chi rë'p nijs, abi' rulaan bacha' niz lod rliejn gubijdx xt lod rëezan, ziangajc gac dxej gui't Bén guxhaal Dios stijb. <sup>28</sup> Bén rlliladx ree naj gui't reeman lon, zi'c chi rado'p ree golbich lod naga' tijb begüt.

### *Gui't Bén guxhaal Dios stijb*

*(Mr. 13:24-37; Lc. 21:25-33; 17:26-30, 34-36)*

<sup>29</sup> 'Chi ma gudëd ree dxej ni gac ree guialzi guin, guicajy loj gubijdx, ad zusnit bëew, guiyajb ree bajl xanyabaa abi' gra ree ni yu' xanyabaa guiniib. <sup>30</sup> Dxel guiguien tijb sen xanyabaa guial ma gui't Bén guxhaal Dios. Abi' gra ree bénguidxliuj goon da't chi guguaa reeman Bén guxhaal Dios, rdiinman bacha' zëedaman loj zaj con xgualrniabeeman. <sup>31</sup> Dxel guixhiaal ree xianjlaman, abi' rejs da't gucwejdx reeman trompejt, din yadxajg lasa' ree bën guleman, bën za' ree gralad guidiblagaa guidxliuj.

<sup>32</sup> 'Yan, gol baguiaa xhienaag rajc con tijb yag higo. Chi ma naquie'n xidxan, chi ma caydxib ree xbalagan, lëjt ragbee guial ma zëed tiamp nalaa. <sup>33</sup> Ziangajc chi guguaadi ma cayajc ree ni guin, gagbeedi guial ma zidyob gac zi'c rnin lëjt. <sup>34</sup> Diidxliczi rnin lëjt guial gra ree ni guin gac chi gad ree bën naban yan guiët. <sup>35</sup> Guidxliuj në xanyabaa zanijt reen, per da diidxan ad zanijtan.

<sup>36</sup> 'Per achut ragbee xhie dxejn në xhie horan gac zian, ni'qui ree anjl yu' xanyabaa, ni'qui Xi'n Dios ad ragbeet. Tijbzi da Dadan Dios ragbee.

<sup>37</sup> 'Zi'c goc gulal chi guban Noé, zian gac chi yaguaaad Bén guxhaal Dios. <sup>38</sup> Din chi gad Dios guixhiaal guiadoxh loj guidxliuj, bejn ree, raw reeman, rë' reeman, ruxhliaa reeman, rudëe tée xi'n reeman ruxhliaa, xt chi bidxin dxej guyu Noé lën barcwro' ni beenman. <sup>39</sup> Abi' ad bidxgatzci reeman, dxejlczi gol guiadoxh abi' zinë nijs laa reeman, ziangajc gac chi yaguaaad Bén guxhaal Dios. <sup>40</sup> Dxej guin, lod za' tio'p ree xinguaaw dajn, tijbix yaza, stijbix yaya'n. <sup>41</sup> Guiáad lod cayojt tio'p ree béngunaa, tijbaman yaza, stijbaman yaya'n.

<sup>42</sup> 'Zeel gol guzujsin din ad ragbeetidi xhie dxej yaguaaad xDadidi. <sup>43</sup> Gol been xgab, bal tijb bejn ragbee xhie guxhin xhie tée horan chu' xingubaan lidxaman cwax, zabejnaaman abi' ad zatiëjbtaman chu' xingubaan guin lidxaman. <sup>44</sup> Zianan zeel gol guzujsin, din ad ragbeetidi dxejlczi yaguaaad Bén guxhaal Dios.

### *Mojs za'c në mojs guiidx*

*(Lc. 12:41-48)*

<sup>45</sup> '¿Chu lëjt naj zi'c tijb mojs rusa'n xpatronx lidxaman din gulenx gra ree mojs, gudëe tée ni gaw reeman chi gal hor? <sup>46</sup> Xiquilbaa mojs cayüjn dxiin zi'c rayal chi yadxin xpatronx. <sup>47</sup> Din diidxliczi rnin lëjt, patron guin zusa'n gra xieenman loj mojs guin. <sup>48</sup> Per bal naj mojs guin mojs dxuudx, naladxix: “Zaglaari da patronan.” <sup>49</sup> Zianz suloj gusagzix los demazri ree mojs guin, suloj gawix, guië'në tée xingu' ree. <sup>50</sup> Abi' yadxin xpatronx tijb dxej ni ad ragbeetix ad rbëz tëetix laaman. <sup>51</sup> Dxel dád castiro' gudëed patron guin laax, guixhiaal tée man laax lod rayal ree bën rusquiee, lod goonx gaw tée layix.

## 25

*Xcwent chii biinxdüb*

<sup>1</sup> Basnuu Jesús rëbaman:

—Loj xguialrniabee Dios gac zi'c guzac ree chii biinxdüb we loj tijb guialruxhliaa cwa' tijbgaj xguij reem bilëz reem xin cuxhliaa guin. <sup>2</sup> Gaay reem been xgab xhie güün reem, per za gaay reem ad beent xgab. <sup>3</sup> Biin ad beent ree xgab guin binë xguij reem per ad binët reem mazri sejt ni che'cnë ree guij guin. <sup>4</sup> Guiáad ree biin been xgab guin xhie güün reem, binë reem za tib lumejtgaj sejt con xguij reem. <sup>5</sup> Abi' guial goglaa badxin xinruxhliaa guin, bi't bacaal loj gra reem, abi' goodyëjs reem. <sup>6</sup> Cost garol guiaal, biguien cha' tijb bejn rëbaman: “¡Laa xinruxhliaa guin ma ziaad, gol tagchaaglojx!” <sup>7</sup> Dxel bixche gra ree biinxdüb guin, abi' beenchaaw xguij reem. <sup>8</sup> Abi' gaay ree biin ad beent xgab guin xhie güün reem, rëb reem loj za gaay biin been xgab guin: “Gol baneesii tibda'n xsejtidi, din dux guijn ma cayü' reen.” <sup>9</sup> Per badxi' reemin rëb reem: “Yajqui, din dool ad zadaantan par lëjt ni'qui par dunujn. Zagdxeli gol wëj lod rdo'n din siidan par lëjt gajc.” <sup>10</sup> Abi' la'tgaj zë reem zisii reem sejt, bidxin xinruxhliaa guin, abi' za gaay ree biin been xgab guin gyyunë reem laax loj guialruxhliaa guin dxel bida'cw ro' port. <sup>11</sup> Dxel chi badxin za gaay biin bisii ree sejt guin, rëb reem: “¡Dad, dad, guxhal din yadxu'n!” <sup>12</sup> Per badxi'xan rëbix: “Diidxliczi rnin, ad nünbeetan lëjt.”

<sup>13</sup> Dxel basnuu Jesús rëbaman:

—Zeel gol guzusin din ad ragbeetidi goc yaguaad Bén guxhaal Dios.

*Xcwent bén badëéd milia*

<sup>14</sup> Dxel rëb tëë Jesús:

—Xguialrniabee Dios naj zi'c tijb bén ma grii cheman zijt, abi' gurejdx ree xmojsaman, basa'n xmiliaman loj reeman. <sup>15</sup> 'Loj tijbaman badëëman gaay mil cintabl, loj zatijbaman badëëman zatio'p milan, guiáad loj zatijbaman badëëman za timilan. Loj tijbgaj reeman badëëdaman ni naladxaman zajc güünnë reeman dxiin, dxel briütaman zëman zijt. <sup>16</sup> Abi' mojs cwa' gaay mil cintabl guin beennëman laan dxiin abi' beenman gan za ziant gajcan. <sup>17</sup> Ziangajc been mojs cwa' tio'p milan, beenman gan za tio'p mil gajcan. <sup>18</sup> Per mojs cwa' timil cintabl guin bitëënman luyuj persi baquie'chaman cintabl guin ni badëéd xpatronman.

<sup>19</sup> 'Gojc xchej da't dxel badxin patron guin abi' babëëman cwent con la reeman. <sup>20</sup> Yaloj bidxin mojs cwa' gaay mil cintabl guin abi' bayüman zagaay milan, rëbaman: “Dad, lüj banee gaay milan lon, yan, laa za gaay milan guie ni benan gan.” <sup>21</sup> Dxel rëb patron guin lojman: “Zagdxen, mojsza'c, zagdxe beenl, guial zagdxe beenl con tibda'n ni banen, yan, gunen mazri guial loj ni banen. Guyu, babaa con naj.” <sup>22</sup> Zianz bidxin mojs cwa' zatio'p mil cintabl guin rëbaman: “Dad, lüj banee tio'p milan lon, yan, laa zatio'p milan guie ni benan gan.” <sup>23</sup> Dxel rëb patron guin lojman: “Zagdxen, mojsza'c, zagdxe beenl, guial zagdxe beenl con tibda'n ni banen, yan, gunen mazri guial loj ni banen. Guyu, babaa con naj.”

<sup>24</sup> 'Per chi bidxin mojs cwa' timil cintabl guin, rëb loj xpatronman: “Dad, naj ragbee guial ad rayatil bejn, rabëël guialnaza'c lod ad rgu'til bin, rato'p tëël guialnaza'c lod ad rtie'chtil bin. <sup>25</sup> Zeel bidxeban abi' biquiechan xmilial lën liuj, yan, laa xmilial guie.” <sup>26</sup> Badxi' patron guinan, rëbaman: “Mojs mal, mojs ploj, bal ragbeel rabën guialnaza'c lod ad rgu'tan bin, ratop tëen guialnaza'c lod ad rtiechtan bin. <sup>27</sup> Adil nilu' da milian lën bancw, din chi naguialan naca'nan con xi'nan ni beenan gan.” <sup>28</sup> Dxel rëb patron guin loj ree bén za' yagaj: “Gol biquied timil cintabl guin lojx, gol badëëdan loj xin rajp chii milan. <sup>29</sup> Din bén rajp zaca'man mazri, abi' gapaman zro' da't, per bén rajp ta'nzi, xt ni rajpaman chiquied lojman. <sup>30</sup> Abi' mojs ad rünjt sirv guin gol bazaalix xchuni lod nacay, lod goonx, lod gaw tëë layix.”

### *Xgualguxtis Jesús*

<sup>31</sup> 'Chi gui't Bén guxhaal Dios, gui'taman con xgualrniabeeman, në con gra ree xianjlaman din cweman lod nabeeman. <sup>32</sup> Dxel gra ree bénguidxliuj yado'p lojman, abi' cweman laa reeman zi'c rüjn tijb bén rajp xiil chi rabëëcaman xiil ree loj ree dxib. <sup>33</sup> Abi' guzujman bén naj ree xbejnman xladbeeman, guiáad ree bén ad najt xbejnman guzujman xladruvejsaman. <sup>34</sup> Dxel guiëb rey guin loj ree bén za' xladbeeman: “Gol guda bén ma nünle' da Dadan. Gol guyu loj guialrniabee najcchaaw par lëjt, diizd chi go'tchaaw guidxliuj. <sup>35</sup> Din chi gulaanan, baneedi ni gudawan, chi we'can nijs, baneedi ni gu'n, chi bizaan zi'c tijb benzit, baneedi lod baya'nan. <sup>36</sup> Chi byaadx da xaban, lëjt bane ni go'tan, chi gogxuun, bidgatixlojdi naj, abi' chi guyu'n ladxguiib, bidganajdi naj.” <sup>37</sup> Dxel guiëb ree bén za' ladbee guin: “Dad, ¿goc baguiaan lüj rliaanl, abi' baneen ni gudawil?, ¿o goc baguiaan lüj we'quill nijs, abi' baneen nijs gu'l? <sup>38</sup> ¿Goc baguiaan lüj zizal zi'c tijb benzit, abi' baneen lod baya'n, o goc biyaadx xabil, abi' baneen ni gotil? <sup>39</sup> ¿Abi' goc baguiaan lüj ragxuul, o guyul ladxguiib, abi' budganajn lüj?” <sup>40</sup> Dxel guiëb rey guin loj reeman: “Diidxiczi rnin lojdi, gra yudar beendi da bejn reen majsi ad najt reeman bén lasajc, najn beendi yudar.”

<sup>41</sup> 'Dxel guiëbaman loj ree bén za' xladruvejsaman: “Gol biquied lon, benmal gol chej loj bajl ni ad yu't dxej yayü' ni ma naj par xindxab në ree xbejnx. <sup>42</sup> Din chi gulaanan, ad baneetidi ni niawan, chi we'can nijs, ad baneetidi ni nië'n. <sup>43</sup> Chi bizaan zi'c benzit, ad baneetidi lod naya'n, chi biyaadx da xaban, ad baneetidi ni nia'cwan. Abi' chi gogxuun në chi guyu'n ladxguiib, ad bidganajtidi naj.” <sup>44</sup> Dxel guiëb reeman lojman: “Dad, ¿goc baguiaan lüj rliaanl o re'quill nijs, o zizal zi'c tijb benzit, o goc baguiaan lüj ryaadx xabil, o ragxuul, o yu'l ladxguiib, abi' ad bayidxga'tan lüj?” <sup>45</sup> Abi' yadxi'man laan guiëbaman: “Diidxiczi rnin lëjt, gra ni ad beentidi din nünjdi yudar da bejn reen majsi ad najt reeman bén lasajc, najn ad beentidi yudar.” <sup>46</sup> Laa reeman yayal loj casti tiblayaa, guiáad ree bén been zi'c rayal, laa reeman rayal guialnaban tiblayaa con Dios.

## 26

### *Baya'n reeman diidx xhienaag guiniaaz reeman Jesús*

*(Mr. 14:1-2; Lc. 22:1-2; Jn.11 :45-53)*

<sup>1</sup> Chi gulox gunee Jesús diidx guin ree, dxel rëb loj ree xbejnman:

<sup>2</sup> —Lëjt ragbee guial ryaadx zatio'p dxejzi guial guidxin lanij pascw, abi' Bén guxhaal Dios yayü ree bejn laaman din tiaman loj crüjz.

<sup>3</sup> Lën ree dxejzii badxaag lasa' ree bixhioz rniabee ree bixhioz, con xguxtis ree bén Israel, lidx Caifás quijb bixhioz zojbloj. <sup>4</sup> Ni baya'n reeman diidx xhienaag gusquiee reeman Jesús din guiniaaz reeman laaman, abi' gugüjt reeman laaman. <sup>5</sup> Per rëb reeman:

—Ad zaguieent ree zian loj lanij guin chitëë gac naquie' luguiedx guin.

### *Ruroob tijb béngunaa perfum guiyc Jesús*

*(Mr. 14:3-9; Jn.12 :1-8)*

<sup>6</sup> Chi za' Jesús luguiedx Betania lidx Simón, bén rniee reeman Leproso, <sup>7</sup> bidxin tijb béngunaa ca'man tijb lumejt guidxan perfum ni lasajc wayëjx. Abi' la'tgaj zojb Jesús xan mex, baroobaman perfum guin guiyc Jesús. <sup>8</sup> Chi baguiaa ree xbejn Jesús ni been béngunaa guin, dád bidxe'ch reeman, abi' rëb reeman:

—¿Chexc zeel bixie' perfum guin? <sup>9</sup> Zile' nido'n zro' da't din nünjan yudar bénprob ree.

<sup>10</sup> Chi biguiejn Jesús ni canee reeman, rëbaman loj reeman:

—¿Chexc zeel rdxe'chidi béngunaa guin? Zagdx naj ni beenman naj. <sup>11</sup> Din bénprob guin ree zianczi za'në reeman lëjt, sa'n naj ad ziantczi gazunë'n lëjt. <sup>12</sup> Abi' ni baroobaman perfum guin guican, rën guiëban guial ma beenchaaw xgajman naj par

chi guiguie'chan. <sup>13</sup> Diidxiczi rnin, bantëez guin guire'ch xtiidxza'c Dios loj guidxliuj, zü ree bejn gra ni been béngunaa guin por naj, din gusaaladx reeman laaman.

*Rayü Judas Jesús*

(Mr. 14:10-11; Lc. 22:3-6)

<sup>14</sup> Loj guidxiptio'p ree xbejn Jesús, bén la Judas Iscariote, bigneenëman bixhioz rniabee ree bixhioz, <sup>15</sup> rëbaman loj reeman:

—¿Plac guneedi din yanen Jesús lojdi?

Abi' badëed reeman gajlbichii milia plajt lojman. <sup>16</sup> Diizd dxejzii guzulojman raguiil-aman mod xhienaag yayüman Jesús.

*Gudawnë ree xbejn Jesús xche*

(Mr. 14:12-25; Lc. 22:7-23; Jn.13 :21-30; 1Co.11 :23-26)

<sup>17</sup> Dxej ni guzuloj lanij ni raw ree bejn guiadxtil ni ad yu't lewadur, gubig ree xbejn Jesús lojman, rëb reeman:

—¿Ban guin rënl yaguieenchaawan ni yadaaw ree guxhin lanij pascw?

<sup>18</sup> Badxi' Jesúsán rëbaman:

—Gol chej Jerusalén lidx bén guin, gol biguiedx lojman: “Na Mextr: Ma bidxin xihoraman abi' rënman tédaman pascw lidxil con ree xbejnman.”

<sup>19</sup> Dxel been ree xbejnman zi'c rëbaman, been tëë reeman ni gaw reeman guxhin lanij pascw.

<sup>20</sup> Chi gure guiaal, zojb Jesús xan mex con guidxiptio'p ree xbejnman. <sup>21</sup> Abi' la'tgaj cayaw reeman, rëbaman loj reeman:

—Diidxiczi rnin, tijb gajc lëjt yayü naj.

<sup>22</sup> Abi' dád guyunaya reeman, zianz guzuloj rniabdiidx tijbgaj reeman loj Jesús, rëb reeman:

—¿Najn ya, Dad?

<sup>23</sup> Badxi' Jesúsán, rëbaman:

—Bén cayaw loj pliajt ni cayaw gajcan, laaman yayü naj. <sup>24</sup> Walican, Bén guxhaal Dios naj guial sacaman zi'c rëb loj xtiidx Dios. Per i'probza bén yayü laaman!, zagdxeli naj par laaman ad niutaman loj guidxliuj.

<sup>25</sup> Dxel Judas bén yayü Jesús, gunabdiidxaman rëbaman:

—Mextr, ¿wen najn ya?

Badxi' Jesúsán, rëbaman:

—Lüjn.

<sup>26</sup> La'tgaj cayaw reeman, cwa' Jesús guiadxtil, badëedaman quixtëë loj Dios. Dxel gula'man guiadxtil guin gudi'saman laan loj ree xbejnman, rëbgajman:

—Gol gudaw guiadxtil guie, laan naj da cuerpan.

<sup>27</sup> Dxel cwa'man tib cojp vin, chi gulox badëedaman quixtëë loj Dios, badëedaman cojp guin loj reeman, rëbgajman:

—Gol gu' gradi loj cojp guie. <sup>28</sup> Din laan naj da rejnan ni gaxhie'n chi guiëtan por zien ree bénguidxliuj. Din por da guialgüjtan guixal tijb nejz cüb xhienaag gap ree bejn perdon loj Dios por xtol reeman. <sup>29</sup> Abi' diidxiczi rnin lëjt ad yu'tri dxej guië'n vin rajcchaawnë uv, xt chi guidxin dxej guië'në'n lëjt vin cüb lod rniabee da Dadan.

*Rëb Jesús guial guiëb Bëd ad nünbeetaman laaman*

(Mr. 14:26-31; Lc. 22:31-34; Jn.13 :36-38)

<sup>30</sup> Chi gulox biil reeman tijb cant par Dios, dxel zë reeman guijc guia' Olivos. <sup>31</sup> Abi' rëb Jesús loj reeman:

—Gradi zabëeladx naj yan guxhin, zi'c ca loj xtiidx Dios lod rëb: “Gugüjtan bén rajp ree xiil, dxel guire'ch ree xiil guin.” <sup>32</sup> Per chi yabanan, yaløj naj ganeed ga gajn Galilea dxelri gui'tidi.

<sup>33</sup> Dxel rëb Bëd lojman:

—Majsi gra reeman cwëeladx lüj per naj ad yu't dxej gabëladxan lüj.

<sup>34</sup> Per rëb Jesús lojman:

—Diidxliczi rnin lojl, yan guxhin gajc chi gad gujð cwidxa', mal rëbil choon volt guial ad nünbeetil naj.

<sup>35</sup> Abi' rëb Bëd lojman:

—Majsi guiëtnë'n lüj, per ad yu't dxej guiën guial ad nünbeetan lüj.

Abi' gra ree xbejn Jesús ziangajc rëb reeman.

*Gurejdx gunab Jesús Dios lod la Getsemaní*

*(Mr. 14:32-42; Lc. 22:39-46)*

<sup>36</sup> Chi bidxin Jesús con ree xbejnman tijb luar la Getsemaní, rëbaman loj reeman:

—Gol gurejsii guie, la'tgaj gan ni din gabedx ganaaban Dios.

<sup>37</sup> Dxel zinëman Bëd con grop ree xi'n Zebedeo, zianz guzuloj cayunayaman abi' ad nixtri yu' luxdooman. <sup>38</sup> Zianz rëbaman loj reeman:

—Dád yu'naya luxdoon, rulüü ma gugüjt guialyu'naya guin naj. Gol baya'n guie ad gaayëjsidi.

<sup>39</sup> Dxel zë Jesús mazri delant abi' gurerulojman gurejdx gunabaman Dios, rëbaman:

—Dad, bal zile' yabëel naj loj guialzi ni gadëëdan, per ad gac zi'c rënan, gac zi'c rënl.

<sup>40</sup> Dxel baguiajman lod za' ree xbejnman, abi' baguiaaman naga'yëjs reeman, zianz rëbaman loj Bëd:

—¿Wen ni'qui tib hor ad bile't natie'ch xbacaalidi ya, din sunëdi naj? <sup>41</sup> Gol batie'ch xbacaalidi gol gurejdx gunab tëë Dios, chitëë güün xindxab lëjt gan, din rënquidi güündi zi'c rayal, per xcuerpidi ad rtiëjbtan.

<sup>42</sup> Ni barojp volt wejman gurejdx gunabaman Dios, rëbaman:

—Dad, bal id zile' téd guialzi ni naj gadëëdan, bal rüjn naguiejn gadëëdanan gacri zi'c rënl.

<sup>43</sup> Chi badxinman lod za' ree xbejnman stijb, laa reeman naayëjs guial dád guidxa bacaal loj reeman. <sup>44</sup> Dxel basa'nman laa reeman stijb, zëman, bayon volt cabejdx canabaman Dios con diidx guin gajc ree. <sup>45</sup> Chi badxinman lod za' ree xbejnman, rëbaman loj reeman:

—¿Sta naga'yëjsidi ya, cayziiladx tëëdi? Guiáad Bén guxhaal Dios ma bidxin hor yayü reeman laaman loj ree bëndol. <sup>46</sup> Gol bixche, yo' ree, gol baguiaa laa bén yayü naj ma zëëd gajxh.

*Gunaaz reeman Jesús*

*(Mr. 14:43-50; Lc. 22:47-53; Jn.18 :2-11)*

<sup>47</sup> Sta caneenë Jesús bén naj ree xbejnman, chi bidxin Judas bén naj gajc tijb xbejn Jesús. Bidxinnëman zien ree bëjn, ca' reeman espad në yag. Guxhaal ree bixhioz rniabee ree bixhioz con ree xguxtis ree bén Israel laa reeman. <sup>48</sup> Abi' Judas bén bayü laaman mal rëbxgajman loj ree bén guin: “Bén gawan xid xhajg, laaman raguilidi, gol gunaazaman.”

<sup>49</sup> Chi bidxin Judas bibigaman loj Jesús, dxel rëbaman:

—¡Xchan, Mextr!

Laa gudaw gajcaman xid xhajgaman.

<sup>50</sup> Abi' rëb Jesús lojman:

—Judas, been ni zidguieenl.

Dxel gubig ree bén guin, gunaaz reeman Jesús persi zinë reeman laaman.

<sup>51</sup> Per tijb ree bén za'në Jesús yagaj, gulëë xiespadaman dxel gutü'man guidiajg xmojs quijb bixhioz zojbloj. <sup>52</sup> Dxel rëb Jesús lojman:

—Bagu'chaaw xiespadil xluaran. Din bén rdil con espad, con espad rëjtaman. <sup>53</sup> ¿Wen, id ragbeel ya guial zajc gabedx ganaab da Dadan, abi' laa guixhiaal gajcaman por mil

ree xianjlaman din gagnë reeman naj? <sup>54</sup> Per ¿xoxa gac cumplid zi'c ca loj xtiidx Dios ni rëb guial rüjn naguiejn gac ree ni cayajc?

<sup>55</sup> Loj hor guin gajc rëb Jesús loj ree benzien guin:

—¿Chexc zeel zëedidi con espad në con yag din guiniaazidi naj zi'c tijb xingubaan? Guixie guixie guzunë'n lëjt lën yadooro' Jerusalén balün lëjt xtiidx Dios, abi' ad gunaaz-tidi naj. <sup>56</sup> Per gra ree ni guie cayajc din gac cumplid ni bacaa ree bën badëë xtiidx Dios loj ree bejn.

Loj hor guin gajc baxüün ree xbejn Jesús, guro'nladx reeman laaman.

*Za' Jesús loj ree guxtis Israel*

(Mr. 14:53-65; Lc. 22:54-55, 63-71; Jn.18 :12-14, 19-24)

<sup>57</sup> Bën gunaaz ree Jesús binë reeman laaman lidx Caifás, quijb bixhioz zojbloj, yagaj badxaag lasa' ree mextr rajc ley con ree xguxtis ree bën Israel. <sup>58</sup> Abi' Bëd zijt zijt nalaman Jesús, xt lule' lidx bixhioz guin. Dxel guyuman abi' gurejnëman bën rajp ree lidx bixhioz guin, din guguaaman xhie güünnë ree bën guin Jesús.

<sup>59</sup> Guiáad ree bixhioz rniabee ree bixhioz con gra ree guxtis guin raguuil reeman xhie gusquiee reeman din gutedia' reeman Jesús din nabee reeman guiëtaman. <sup>60</sup> Per ad radxejlt xhienaag gutedia' reeman laaman majsi zien ree bën basquiee. Dxel bibig zatio'p reeman, <sup>61</sup> rëb reeman:

—Bën guie rëb: “Zile' yase'n nan xyadoo Dios abi' loj choon dxejzi yayünanan.”

<sup>62</sup> Dxel guzuli quijb bixhioz zojbloj guin, rëbaman loj Jesús:

—¿Nid zadxi'lan ya? ¿Waliqui ni canee ree bën guin contr lüj ya?

<sup>63</sup> Per achet rëb Jesús. Dxel rëb bixhioz guin lojman:

—Por Dios bën naban, rniabeen lüj guna diidxli. Guna bal lüjn naj Cristo, Xi'n Dios.

<sup>64</sup> Badxi' Jesús reebaman:

—Waliquil. Rni tëën lëjt, zuguaadi Bën guxhaal Dios zojbaman xladbee Dios bën rajp guialrniabee abi' zuguaa tëëdi gui'taman loj zaj xanyabaa.

<sup>65</sup> Chi biguiejn bixhioz guin zian, gudixya' xabaman, rëbaman:

—Diosan canee guijdx bën guin. ¿Xhie mazri rüjn naguiejn yadiil ree testiw? Lëjt gajc ma biguiejn guial rniee guijdxaman Dios. <sup>66</sup> Yan, ¿xhie nadi?

Badxi' ree bën guinan rëb reeman:

—Rayal guiëtix.

<sup>67</sup> Dxel bacojp xhiejn reeman lojman, gudijn reeman laaman, yu' tëë reeman wëëz ro'man, <sup>68</sup> rëb reeman lojman:

—Bal lüjn naj Cristo, guneeya' chu gudin lüj.

*Rëb Bëd ad nünbeetaman Jesús*

(Mr. 14:66-72; Lc. 22:56-62; Jn.18 :15-18, 25-27)

<sup>69</sup> La'tgaj zojb Bëd lule' lidx bixhioz guin, gubig tijb biin rüjn dxiin yagaj, rëbim lojman:

—Në lüj nal Jesús, bën Galilea.

<sup>70</sup> Per Bëd gurexuuman, rëbaman niz loj gra reeman:

—Ad ragbeetan xhienin rnieel.

<sup>71</sup> Chi zëman niz ro' port baguaa stijb biin rüjn dxiin yagaj laaman, abi' rëbim loj ree bën riga' yagaj:

—Në bën guin nal Jesús bën Nazaret.

<sup>72</sup> Per Bëd gurexuuman stijb, xt baza'taman Dios, rëbaman:

—Ad nünbeetan bën guin.

<sup>73</sup> Dxel ad gojct xchej, gubig ree bën riga' yagaj loj Bëd, rëb reeman lojman:

—Laa rguien gajc në lüj naj xbejn reeman, din zi'cgajc rniee reeman rnieel.

<sup>74</sup> Per Bëd baza'taman Dios, rëbaman loj reeman:

—Dios gudëed naj casti bal rusquieen, per ad nünbeetan bën guin.

Hor guin gajc guridxa' tijb guid. <sup>75</sup> Abi' basaaladxaman guial rëb Jesús lojman: “Chi gad guid cwidxa', mal rëbil choon volt ad nünbeetil naj.” Dxel barii Bëd yagaj abi' dád naya biinman.

## 27

### *Binë reeman Jesús loj Pilato*

(Mr. 15:1; Lc. 23:1-2; Jn.18 :28-32)

<sup>1</sup> Chi bani luyuj, gra ree bixhioz rniabee ree bixhioz con ree guxtis Israel baya'n reeman diidx xhienaag güün reeman din guiët Jesús. <sup>2</sup> Dxel guxhii reeman laaman abi' binë reeman laaman loj gobernador Pilato.

### *Güjt Judas*

<sup>3</sup> Dxel Judas, bën bayü Jesús, chi baguiaaman guial ma naj guiët Jesús, gyunayaman, abi' bayüman gajlbichii milia plajt guin loj ree bixhioz rniabee con loj ree guxtis Israel, <sup>4</sup> rëbaman loj reeman:

—Ma benan dol guial banen tijb bën achet dol rajp.

Badxi' reeman laan rëb reeman:

—Xhieczi yaguieenan, ¡luj gunaj!

<sup>5</sup> Abi' bazaal Judas milia guin lën yadooro' Jerusalén zianz bariiman wejman bigxhii yëjnman.

<sup>6</sup> Dxel bato'p ree bixhioz rniabee guin milia guin, abi' rëb reeman:

—Ad rayalt yadxe' ree milia guin lën lod ru gon, din con laan bio' bën guiët.

<sup>7</sup> Dxel be reeman diidx, abi' con milia guin guzii reeman xguidxliuj bën rüjn trast bajn ree, din gacan lod guiguie'ch ree benzit. <sup>8</sup> Zeel xt yan la guidxliuj guin Yuj Rejn. <sup>9</sup> Zian gojc cumplid ni gunee Jeremías, bën badëë xtiidx Dios loj ree bejn, chi rëbaman: “Cwa' reeman gajlbichii milia plajt, prejs ni rëb ree bën Israel lasajcaman, <sup>10</sup> abi' con milia guin guzii reeman xguidxliuj bën rüjn trast bajn ree, zi'c gunabee Dios naj.”

### *Rniabdiidx Pilato loj Jesús*

(Mr. 15:2-5; Lc. 23:3-5; Jn.18 :33-38)

<sup>11</sup> Dxel badxig reeman Jesús loj gobernador Pilato, abi' gunabdiidxaman loj Jesús, rëbaman:

—¿Lüjn naj xrey ree bën Israel ya?

Badxi' Jesúsán, rëbaman:

—Najcan.

<sup>12</sup> Abi' chi cutedia' ree bixhioz rniabee ree bixhioz con ree guxtis Israel laaman, achetczi radxi'man. <sup>13</sup> Dxel rëb Pilato lojman:

—¿Nid rigujejnl gra ni canee reeman contr luj ya?

<sup>14</sup> Per Jesús ni'qui tijb diidx ad badxi'taman, zeel dád badxa loj gobernador guin.

### *Gunabee reeman guiët Jesús*

(Mr. 15:6-20; Lc. 23:13-25; Jn.18 :38-19:16)

<sup>15</sup> Lën ree dxej lanij, ruslaa gobernador Pilato tijb bën yu' ladxguiib bën guiëb ree bénguiedx guin laa, zi'c naj xcostumbr reeman. <sup>16</sup> Lën ree dxejzii yu' Barrabás ladxguiib, tijb bën nünbee ree bejn niz ni niz guie. <sup>17</sup> Abi' chi badxaag lasa' gra ree bejn, gunabdiidx Pilato loj reeman, rëbaman:

—¿Chu rëndi guslaan? ¿Barrabás ya, o Jesús, bën rëb ree bejn naj Cristo?

<sup>18</sup> Rëbaman zian guial gogbeeman ganaxzi guialnadëdlojn zeel bayü reeman Jesús.

<sup>19</sup> La'tgaj zojb Pilato lod rüjnman guialguxtis, bidxin xruson lacheelaman, rëbaman lojman: “Adxhie güünnël bën guin achet dol rajpaman, din dád nadxuudx gune'xchalan laaman nuche.”



<sup>20</sup> Per bixhioz rniabee ree bixhioz con ree guxtis Israel, badxe' reeman diidx gra ree bejn persi gunab reeman guslaaman Barrabás, guiáad Jesús guiëtaman. <sup>21</sup> Gunabdiidx Pilato loj reeman stijb, rëbaman:

—¿Chu loj grop reeman rëndi guslaan?

Badxi' reeman laan rëb reeman:

—Barrabás.

<sup>22</sup> Abi' rëb Pilato loj reeman:

—¿Xhieza günnë'n Jesús, bën rëb ree bejn naj Cristo?

Badxi' gra reeman laan rëb reeman:

—¡Bacaaman loj crüjz!

<sup>23</sup> Abi' rëb Pilato loj reeman:

—¿Xhieza ni mal beenman?

Per laa reeman mazri rejs rbixdiaj reeman, rëb reeman:

—¡Bacaaman loj crüjz!

<sup>24</sup> Chi baguiaa Pilato guial achet rîle' güünman, al mazri naquie' cayüjn ree bën guin, dxel cwa'man nijs abi' banaaman delant loj gra reeman, rëbaman:

—Achet dol ra'pan guial guiët bën guie, xcwentidan.

<sup>25</sup> Badxi' gra ree bën guinan rëb reeman:

—¡Du guijcan, në guijc du xi'nan cwiban guial guiëtaman!

<sup>26</sup> Dxel baslaa Pilato Barrabás, zianz gunabeeman gudijn reeman Jesús abi' bayüman laaman din gucaa reeman laaman loj crüjz.

<sup>27</sup> Zianz xsuldad ree gobernador guin binë reeman Jesús lën palas lod bado'p gra ree suldad, gadëd lod za'man. <sup>28</sup> Dxel gulëë reeman xabaman bascajcw reeman laaman tijb lajd xnia. <sup>29</sup> Abi' beenchaaw reeman tijb coron guiëjch badxe' reeman laan guijcaman, zianz бага's reeman tijb yag ladxaaman ladbee. Dxel bazuxib reeman lojman, ruze' reeman laaman, rëb reeman:

—¡Guibanri xrey ree bën Israel!

<sup>30</sup> Abi' rucojp xhiejn reeman lojman, laagajc tëë yag ni ca'man rugaz reeman guijcaman. <sup>31</sup> Chi gulox baze' reeman laaman, dxel babëë reeman lajd xnia guin ladaman, bascajcw reeman xabaman, zianz zinë reeman laaman din gucaa reeman laaman loj crüjz.

### *Cwa Jesús loj crüjz*

*(Mr. 15:21-32; Lc. 23:26-43; Jn.19 :17-27)*

<sup>32</sup> Chi zinë reeman Jesús, badxaagloj reeman tijb bën Cirene, laman Simón, abi' been reeman laaman naguiejn byaaman xcrüjz Jesús.

<sup>33</sup> Chi bidxin reeman tijb luar la Gólgota (rën guiëban Xluar Calaver), <sup>34</sup> ni badëëd reeman vin, no'chan nijs nala da't guië' Jesús. Per chi beenman laan prueb, ad cwëjbtaman nië'man laan.

<sup>35</sup> Chi gulox bacaa reeman laaman loj crüjz, dxel gudxijt reeman suert guijc xabaman din yala' reeman laan. <sup>36</sup> Dxel gurej reeman yagaj din gap reeman laaman. <sup>37</sup> Abi' guijc crüjz guin bacaa reeman lejtr ni rëb, chexc zeel cwaman loj crüjz. Rëb lëjtr guin: “BEN GUIE NAJ JESÚS XREY REE BEN ISRAEL.”

<sup>38</sup> Në tio'p xin gubaan bacaa reeman loj crüjz, tijbix xladbee Jesús stijbix xladruvejsaman. <sup>39</sup> Abi' ree bën rdëd, rnieeguijdx reeman Jesús, runij guijc reeman, <sup>40</sup> rëbgaj reeman:

—Lüj rëb, nuse'nl yadooro' abi' loj choon dxejzi nayüjnlan, baslaa lüj gajc. Bal walil najl Xi'n Dios baguiajt loj crüjz guin.

<sup>41</sup> Ziangajc ree bixhioz rniabee ree bixhioz në ree mextr rajc ley con ree guxtis Israel, ruze' reeman Jesús, rëb reeman:

<sup>42</sup> —Baslaax ben ren ree, abi' ad rajct ruslaa laagajquix. Bal wali najx xrey ree bën Israel, yaguaajtix loj crüzj guin, din yaliladx reex. <sup>43</sup> Rililadxix Dios. ¡Yan, guslaaza Dios laax, bal wali rënman laax, din rëbix: “Xi'n Dios najx”!

<sup>44</sup> Abi' nëgajc ree xingubaan ca cwë'man ruze' laaman.

### *Güjt Jesús*

(Mr. 15:33-41; Lc. 23:44-49; Jn.19 :28-30)

<sup>45</sup> Dxel diizd garol dxej bicajy loj guidib guidxliuj, xt raca choon wadxe. <sup>46</sup> Loj horzii gurixdiajman rejs da't, rëbaman:

—Elí, Elí, ¿lama sabactani? —rën guiëban: Dios, Dios, ¿chexc zeel gulëladxil naj?

<sup>47</sup> Yu' ree bën za' yagaj, chi biguiejn reeman, rëb reeman:

—Laaman cabejdx Elías, bën badëë xtiidx Dios loj ree bejn.

<sup>48</sup> Laa baxüün gajc tijbaman bicajdxaman tijb xiil loj vinagr, abi' bacaaman laan loj tijb yag zianz badxigaman laan ro' Jesús din guië'man laan. <sup>49</sup> Per rëb los demazri reeman:

—Basa'nx, din yaguaa ree don zidgaslaa Elías laax ya.

<sup>50</sup> Zianz gurixdiaj Jesús rejs da't stijb, dxel güjtaman. <sup>51</sup> Loj hor zii goxya' lajd nal lën yadooro' Jerusalén gojcan tio'p lala', diizd guiyc guin xt guia' guin goxya'. Abi' guxu, gula' tée ree guiajro'. <sup>52</sup> Guiáad ree baa bixal reen, abi' zien ree bejn bën naj xbejn Dios, bën ma güjt ree baban. <sup>53</sup> Dxel chi baban Jesús, barii lën xbaa reeman, abi' guyu reeman Jerusalén, lod baguiaa zien ree bejn laa reeman.

<sup>54</sup> Dxel suldad rniabee ree suldad në gra ree suldad za'nëman yagaj canaj reeman Jesús, chi baguiaa reeman caxu në gra ni cayajc, dád bidxeb reeman abi' rëb reeman:

—Walican Xi'n Dios bën guin.

<sup>55</sup> Zien ree bëgunaa guzanal Jesús diizd Galilea, bën been tée ree laaman yudar, za' reeman zijt ruguiaa reeman ni cayajc. <sup>56</sup> Loj reeman no'ch María Magdalena, në Li xniaa Santiaaw con Xiëb nëtëë xniaa ree xi'ngaan Zebedeo.

### *Biguie'ch Jesús*

(Mr. 15:42-47; Lc. 23:50-56; Jn.19 :38-42)

<sup>57</sup> Chi gure guiaal, bidxin tijb benrijcw laman Xiëb, bën Arimatea, në laaman binal Jesús. <sup>58</sup> Wejman loj Pilato, bignabaman xcuerp Jesús. Dxel gunabee Pilato bayü reeman cuerp guin lojman. <sup>59</sup> Abi' cwa'man cuerp guin batüübaman tijb lajd naya.

<sup>60</sup> Dxel biquie'chaman laaman lën tijb baa cüb ni gudëenman par laagajcaman lën tijb guiaj. Zianz basiaawaman ro' baa guin con tijb guiajro', ziataman. <sup>61</sup> Abi' zojb María Magdalena con stijb bën la gajc Li, ro' baa guin.

### *Rajp ree suldad ro' xbaa Jesús*

<sup>62</sup> Chi bareguiaal, dxej raziiladx ree bejn, wej ree bixhioz rniabee ree bixhioz në ree bënfarisew, bigneenë reeman Pilato, <sup>63</sup> rëb reeman lojman:

—Dad, rasaaduladxan, chi ziz naban bën rusquiee ni, rëbaman guial chi gac choon dxej yabanman. <sup>64</sup> Zeel gunabee guiyaawdxi'ch ro' baa guin xt chi gac choon dxej, chitëë gui't ree xbejnman guxin cwan reeman xcuerpaman. Abi' guiëb reeman loj ree bejn guial ma babanman. Abi' mazri gusquiee reeman bejn guial loj ni yaloj.

<sup>65</sup> Dxel rëb Pilato loj reeman:

—Laa ree suldad za' yagaj. Gol chinë reeman, gol basiaawdxi'ch ro' baa guin zi'c rëndi.

<sup>66</sup> Abi' zë reeman, dxel basiaawdxi'ch reeman ro' baa guin. Zianz basa'n reeman suldad guin ree cayajp reeman laan.

## 28

### *Raban Jesús*

(Mr. 16:1-8; Lc. 24:1-12; Jn.20 :1-10)

<sup>1</sup> Chi gudöd dxej raziiladx ree bejn, bareguiaal chidumingw, María Magdalena con stijb bén la gajc Li biquiaa reeman ro' baa guin. <sup>2</sup> Dxel bi't tijb xudoxh, guial biguiajt tijb xianjl Dios diidz xanyabaa, dxel bibig anjl guin ro' baa guin biquiedaman guiaj nayaaw ro'n, zianz gurejman guijcan. <sup>3</sup> Dád rliajman bacha' zi'c chi rë'p nijs, guiáad xabaman naquichbéjn. <sup>4</sup> Chi baguiaa ree suldad guin anjl guin, binij reeman guial dád bidxeb reeman xt badaj reeman abi' biyajb reeman luyuj. <sup>5</sup> Dxel rëb anjl guin loj ree béngunaa guin:

—Ad rdxebidi, ragbeen cayguilidi Jesús bén cwa loj crüjz. <sup>6</sup> Per achutri laaman guie, ma babanman zi'c naman. Gol guida nial din guguaadi lod gudixh reeman laaman. <sup>7</sup> Yan, gol baxüün gol bicojn ree xbejnman guial ma babanman, ma nedaman lojdi zëgajman Galilea, ni guguaadi laaman. Ni nezan naj ni rugojnan lëjt.

<sup>8</sup> Dxel cari da't baza reeman ro' baa guin rdxeb reeman rabaa tëe reeman, ruxüün reeman zia reeman zicojn reeman xbejn Jesús. <sup>9</sup> La'tgaj zia reeman, balüüloj Jesús loj reeman, bagajpdiozaman laa reeman. Abi' bibig reeman lojman, bazuxib reeman, gudiidx reeman guia'man, <sup>10</sup> abi' rëbaman loj reeman:

—Ad rdxebidi. Gol chej, gol biguiedx loj ree da bejnan din che reeman Galilea, ni guguaa reeman naj.

### *Ni rëb ree suldad*

<sup>11</sup> La'tgaj zia ree béngunaa guin, në tio'p choon ree suldad cayajp ro' baa guin zë luguiedx guin zicojn reeman bixhioz rniabee ree bixhioz gra ni goc. <sup>12</sup> Dxel wej ree bixhioz rniabee guin bigneenë reeman guxtis Israel ree persi baya'n reeman diidx xhie güün reeman. Abi' dad zro' milia badëöd reeman loj ree suldad guin, <sup>13</sup> rëb reeman:

—Con gol güjdx loj ree bejn: “Guxhin la'tgaj nadoodyëjsan, bi't ree xbejn Jesús abi' gulan reeman xcuerpaman.” <sup>14</sup> Abi' bal gagbee gobernador, dunujn yaneenë' laaman chitëe xhie güünnëman lëjt.

<sup>15</sup> Dxel cwa' ree suldad guin milia guin abi' been reeman zi'c rëb reeman. Laan naj diidx ni nare'ch loj ree bén Israel xt yan.

### *Rxhial Jesús bén naj ree apóstoles*

*(Mr. 16:14-18; Lc. 24:36-49; Jn.20 :19-23)*

<sup>16</sup> Guidxiptib ree xi apóstoles Jesús, wej reeman Galilea, guijc tijb guia' lod rëb Jesús che reeman. <sup>17</sup> Abi' chi baguiaa reeman Jesús, bazuxib reeman lojman, majsi yu' reeman ad bililadxza'ct. <sup>18</sup> Dxel bibig Jesús loj reeman, rëbaman:

—Dios ma banee gra guialrniabee din ganabeen xanyabaa në loj guidxliuj. <sup>19</sup> Zeel, gol chej guidib guidxliuj, gol biglüü ree bejn din gac reeman da bejnan. Gol baroobnijs reeman por dux Dad ree, por Xi'nman në por xSprijtaman, <sup>20</sup> gol balüü tëe reeman din guzoob reeman diidx gra ni ma rnin lëjt. Abi' naj gazunë' lëjt gradxejczi xt chi nit guidxliuj. Amén.

## Xtiidxza'c Jesucrist ni bacaa San Marcw

*Rzuloj Waj rulüüman xtiidxza'c Jesucrist  
(Mt. 3:1-12; Lc. 3:1-9, 15-17; Jn.1 :19-28)*

<sup>1</sup> Ze guzuloj xtiidxza'c Jesucrist, Xi'n Dios.

<sup>2</sup> Guyu tijb bën badëë xtiidx Dios loj ree bejn brii lajman Isaías, bacaaman xtiidx Dios, rëbaman:

Naj rxhial tijb bën ned lojl,  
bën güünchaaw xnejzil.

<sup>3</sup> Rguien cha' tijb bën rbidxa' loj yujbidx, rëbaman:

“Gol beenchaaw xnejz dux Dad ree, gol guxhal tijb nejz nali.”

<sup>4</sup> Zian bi't Waj bën baroobnijs bejn ree, guzuman niz loj yujbidx, abi' rëbaman loj ree bejn guial rayal yayüjn xgab por xtol reeman, yayejc reeman con Dios din gac reeman perdon tiobnijs tëë reeman. <sup>5</sup> Gra ree bën zojb niz Judea, në ree bën Jerusalén brii reeman zicaagdiajg reeman ni rniee Waj, abi' rxhioobdol reeman. Zianz ruobnijs Waj laa reeman loj guiw Jordán.

<sup>6</sup> Guidxlad camell gojcnë xabaman, abi' lënman bixii tijb cinch guid. Gudawaman bi'tsu con dxijn dajn. <sup>7</sup> Chi guneenëman bejn ree, rëbaman:

—Xichan zëed tijb bën mazri zojbloj guial lon, ni'qui xgurëchaman ad zajct gaxhiecan guial mazri zojblojman guial lon. <sup>8</sup> Naj curobnijs lëjt con nijs, per laaman guroobnijs lëjt con xSprijt Dios.

*Riobnijs Jesús  
(Mt. 3:13-17; Lc. 3:21-22)*

<sup>9</sup> Lën ree dxezii guza Jesús luguiedx Nazaret ni riga' niz Galilea, abi' baroobnijs Waj laaman loj guiw Jordán. <sup>10</sup> Chi bariiman loj nijs guin, laa baguiaa gajcaman bixal xanyabaa, zidguiajt xSprijt Dios zi'c tijb palom xt guijcaman. <sup>11</sup> Dxel biguien cha' bejn xanyabaa, rëbaman:

—Lüj naj da Xi'nan, rënan lüj rabaanë' tëën lüj.

*Been xinxab Jesús prueb  
(Mt. 4:1-11; Lc. 4:1-13)*

<sup>12</sup> Dxel binë xSprijt Dios Jesús loj yujbidx. <sup>13</sup> Ni guzuman tiuu dxej tiuu guiaal, loj ree bedoxh. Abi' been xinxab laaman prueb chitëë nuzoobaman xtiidx Dios, guiáad ree xianjl Dios gunaj laaman.

*Rzuloj Jesús rulüüman bejn ree niz Galilea  
(Mt. 4:12-17; Lc. 4:14-15)*

<sup>14</sup> Chi mal guyu Waj ladxguiib, wej Jesús niz Galilea bigneeman xtiidxza'c Dios, <sup>15</sup> rëbaman:

—Ma bidxin dxej zëed xguialrniabee Dios gajxh, zeel gol bayüjn xgab por xtolidi, gol bililadx tëë xtiidxza'caman.

*Rbejdx Jesús tajp ree bën gac xbejnman  
(Mt. 4:18-22; Lc.5:1-11)*

<sup>16</sup> La'tgaj каза Jesús ro'nijsdoo Galilea, baguiaaman Simón në bijchaman Andrejs, cuzaal xguijxh reeman lojnijs din guiniaaz reeman bëjl. <sup>17</sup> Abi' rëb Jesús loj reeman:

—Gol tanal naj din gulün lëjt xhienaag guto'pidi bejn par Dios, luar rniaazidi bëjl.

<sup>18</sup> Loj hor guin gajc basa'n guijxh rniaaznë reeman bëjl persi zinal reeman Jesús.

<sup>19</sup> Guzaman zatibda'n, dxel baguiaaman Jacob con Waj bén naj ree xi'n Zebedeo, yu' reeman loj barcw rayüjnchaaw xguijxh reeman. <sup>20</sup> Dxel gurejdx Jesús laa reeman, abi' basa'n reeman Zebedeo loj barcw guin, bén naj xdad reeman con ree xmojsaman, guiáad laa reeman zinal reeman Jesús.

*Rabëë Jesús xindxab luxdoo tijb bejn*  
(Lc. 4:31-37)

<sup>21</sup> Chi bidxin Jesús luguiedx Capernaum. Abi' dxej raziiladx ree bejn guyuman lën xyadoo ree bén Israel culüüman laa reeman. <sup>22</sup> Dád radxa loj reeman zi'c rnieenëman laa reeman guial rulüüman laa reeman zi'c tijb bén rniabee, ad rulüütaman zi'c rulüü ree mextr rajc ley. <sup>23</sup> Lën yadoo guin yu' tijb xin yu' xindxab luxdoo, dxejczy guridxa'x rëbix:

<sup>24</sup> —¿Xhie rënl con dunujn, Jesús bén Nazaret? ¿Zëëdil ya zidganijtil dunujn? Nünbeen lüj, ragbeen guial naya nalil najl xi'n Dios.

<sup>25</sup> Dxel gudilë Jesús xindxab guin, rëbaman:  
—¡Bacwëëz ro'l, barii luxdoo xin guin!

<sup>26</sup> Abi' been xindxab guin xin guin zi'c bén rëjtya', zianz gurixdiajx rejs, bariix luxdoo xin guin. <sup>27</sup> Graczi ree bén riga' dád badxaloj reeman, riniabdiidx loj lasa' reeman rëb reeman:

—¿Xhie ree nicüban rulüü bén guin? ¡Con guialrniabee ni rajpaman xt ree xindxab ruzoob xtiidxaman!

<sup>28</sup> Tibrajtzi bire'ch xtiidx Jesús guidib niz Galilea.

*Rayüjn Jesús xnasuegr Bëd*  
(Mt. 8:14-15; Lc. 4:38-39)

<sup>29</sup> Bariiz reeman lën yadoo guin, binë Jesús Jacob con Waj lidx Simón con Andrejs. <sup>30</sup> Abi' naga' xnasuegr Simón, yu'man xliaadoxh. Dxel bagojn reeman Jesús guial ragxuuman. <sup>31</sup> Abi' gubigaman cwë'man gunaazaman yaaman, gulesaman laaman. Loj hor guin gajc bariiman xliaa guin dxel guzuloj cudëëdaman ni gaw reeman.

*Rayüjn Jesús zien ree bénragxuu*  
(Mt. 8:16-17; Lc. 4:40-41)

<sup>32</sup> Chi ma gurej guiaal, binë reeman bénragxuu ree lod za' Jesús, në ree bén yu' xindxab luxdoo. <sup>33</sup> Graczi ree bén luguiedx guin bido'p ruyu lod za' Jesús. <sup>34</sup> Bayüjn Jesús zien ree bén rajc ree gadxagayaa guialguijdx, babëë tëëman zien ree xindxab luxdoo ree bejn. Per ad rudëëtaman mod guiniee ree xindxab guin guial nünbee reex laaman.

*Rulüü Jesús xtiidx Dios niz Galilea*  
(Lc. 4: 42-44)

<sup>35</sup> Bixche Jesús rsildoo, chi ziiz nacay, briiman luguiedx guin wejman tijb luar lod achutzzi bejn zojb, persi gurejdx gunabaman Dios. <sup>36</sup> Abi' Simón con ree xcompniaraman bigdiil reeman laaman. <sup>37</sup> Chi badxejl reeman laaman, rëb reeman lojman:

—Gra ree bejn cayguiil lüj.

<sup>38</sup> Per rëbaman loj reeman:

—Yo' ree guiedx ni riga' ree gajxh din gulün xtiidxza'c Dios, din par zian zialan.

<sup>39</sup> Abi' balüü Jesús xtiidx Dios lën ree xyadoo ree bén Israel guidib niz Galilea babëë tëëman xindxab luxdoo ree bejn.

*Rayüjn Jesús tijb bén rajc guialguijdx la lepra*  
(Mt. 8:1-4; Lc. 5:12-16)

<sup>40</sup> Tijb bén rajc guialguijdx la lepra, gubigaman lod za' Jesús, bazuxibaman lojman rëbaman

—Bal guiënl, zajc yayüjnl naj.

<sup>41</sup> Baya Jesús laaman, baqui'man laaman, rëbgajman:

—Rënan, bayajc.

<sup>42</sup> Chi guneé Jesús zian, hor guin gajc bayajc bën guin abi' baya xcuerpaman. <sup>43</sup> Dxel bagu'nejz Jesús laaman, rëbaman lojman:

<sup>44</sup> —Bacaagdiajg ni ganin lüj. Achu loj guiëbil guial ma bayajquil. Lojzi bixhioz wej din guguaaman lüj, binë gon ni rayal chinël loj Dios zi'c gunabee Moisejs, din gagbee gra ree bejn guial ma bayajquil.

<sup>45</sup> Per bën guin chi ziaman guzuloj catie'chaman diidx loj gra bejn xhienaag bayajcaman. Zeel ad bile't contzi niu Jesús luguiedx ree, ganax dajn ree raya'nman lod achut bejn zojb. Per gra lad rza ree bejn rej reeman lod za'man.

## 2

### *Rayüjn Jesús xin nëjt xcuerp*

*(Mt. 9:1-8; Lc. 5:17-26)*

<sup>1</sup> Chi goc tio'p choon dxej, badxin Jesús luguiedx Capernaum, abi' chi gogbee ree bejn, guial za'man yagaj, <sup>2</sup> tibrajtzi bido'p zien da't reeman lod za'man, xt ni'quid rdaant ro' port chu' reeman, guiáad laaman culüüman laa reeman xtiidx Dios. <sup>3</sup> Dxel bidxin tajp ree bejn yagaj lejn reeman tijb xin nëjt xcuerp. <sup>4</sup> Per ad gojct niunë reeman laax lod za' Jesús guial bën guixiuj guidxa. Abi' guxhal reeman guiyc yu lod za'man persi gulet reeman xinragxuu guin guidib ni naga'x loj xt lod za' Jesús. <sup>5</sup> Chi baguiaa Jesús guial rliladx reeman laaman, rëbaman loj xinragxuu guin:

—Xi'n, ma benan xtolil perdon.

<sup>6</sup> Per yagaj zojb tio'p choon ree mextr rajc ley, been reeman xgab naladx reeman: <sup>7</sup> “¿Chexc zeel rníee xin guin zian? ¿Chexc zeel rüjnx mazri xin zojbloj guial loj Dios? Achutczí rajc rüjn perdon dol tijbzi Dios.” <sup>8</sup> Per gogbee gajc Jesús xgab cayüjn reeman, dxel rëbaman:

—¿Chexc zeel rüjndi xgab zian? <sup>9</sup> ¿Conin ad nawëëgt gac, guial guiën loj bënragxuu guin ya: “Ma benan xtolil perdon”, o guiën ya: “Bixche, gules ni go'til loj, baguiaj”? <sup>10</sup> Per yan gulün lëjt guial Bén guxhaal Dios rajpaman gualrniabee loj guidxliuj guie din güünman dol ree perdon. Dxel rëbaman loj xinragxuu guin:

<sup>11</sup> —Lüj rnin, bixche, baca' ni go'til loj baguiaj lidxil.

<sup>12</sup> Loj hor guin gajc bayajc xin guin, bixchex baca' ni go'tix loj, bariix lënü guin guidib loj gra ree bën riga' yagaj. Abi' gra reeman badxaløj, ruza't reeman Dios zagdx, rëb reeman:

—Ni'qui tijb ad waguiaat ree zi'c naj ni cayguiaa ree yan.

### *Rbejdx Jesús Leví*

*(Mt. 9:9-13; Lc. 5:27-32)*

<sup>13</sup> Dxel wej Jesús ro'nijsdoo Galilea zatijb. Dád zien ree bejn rdxin lod za'man persi rulüüman laa reeman xtiidx Dios. <sup>14</sup> Chi cadëdaman, baguiaaman Leví xi'ngaan Alfeo, zojbaman lod ruquijxaman impuest. Dxel rëb Jesús lojman:

—Tanal naj.

Laa bisu gajc Leví binalaman laaman.

<sup>15</sup> Dxel chi cayaw Jesús lidx Leví con zien ree bën ruquijx impuest në ree bën ad nabant zi'c rën Dios, gra reeman zojbnë Jesús xan mex con ree xbejnman, guial zinal zien ree bejn laaman. <sup>16</sup> Chi baguiaa ree bënfarisew con ree mextr rajc ley guial cayawnë Jesús bën guin ree, rëb reeman loj ree xbejnman:

—¿Chexc zeel rawnë xmextridi bën ruquijx ree impuest në ree bëndol?

<sup>17</sup> Chi biguiejn Jesús ni rëb reeman, zeel rëbaman:

—Bënnadaan ree ad riaadxt reeman doctor, bënragxuu ree, laa reeman riaadx doctor. Ad zialtan par ree benza'c, zialan par ree bëndol din yayüjn reeman xgab por xtol reeman.

*Rniabdiidx reeman loj Jesús xcwent guialrba'n*  
(Mt. 9:14-17; Lc. 5:33-39)

<sup>18</sup> Lën ree dxej zii guba'n ree xbejn Waj bén ruuroobnijs bejn ree, në ree bénfarisew. Abi' yu' ree bén gunabdiidx loj Jesús, rëb reeman:

—¿Chexc zeel ad rba'nt ree xbejnl zi'c rba'n ree xbejn Waj con ree bénfarisew?

<sup>19</sup> Badxi' Jesús laan rëbaman:

—Wen, ¿zajc guiba'n ree biooz za' loj guialruxhliaa ya la'tgaj za'në xin cuxhliaa guin laa reeman? La'tgaj za'nëx laa reeman ad zajct guiba'n reeman. <sup>20</sup> Per guidxin dxej chiquiedix loj reeman, abi' chi guidxin dxej guin dxel guiba'n reeman.

<sup>21</sup> 'Achut bén rata' lajd cüb loj lajd yojx, din zaxü'n lajd cüb guin abi' mazri quixya'n lajd yojx guin. <sup>22</sup> Ad rgu' tëet bejn vin cüb lën anfr yojx, din zaguixya' vin cüb guin anfr guin, abi' zi'c anfr guin zi'c vin guin zaxin reen. Zeel vin cüb rayal chu'n lën anfr cüb.

*Rgui'ch ree xbejn Jesús trigo dxej raziiladx ree bén Israel*  
(Mt. 12:1-8; Lc. 6:1-5)

<sup>23</sup> Tijb dxej raziiladx ree bén Israel, cadëd Jesús con ree xbejnman loj guiniaa lod yu' trigo, abi' ree xbejnman guzuloj cagui'ch reeman trigo guin chi cadëd reeman. <sup>24</sup> Dxel rëb ree bénfarisew loj Jesús:

—¿Chexc zeel rüjn ree xbejnl ni ad rayalt gac dxej raziiladx ree bejn?

<sup>25</sup> Per rëb Jesús loj reeman:

—¿Gadidi gool loj xtiidx Dios ya ni been Davi chi gulaanman con ree xcompniaraman?

<sup>26</sup> Tiamp ni goc Abiatar bixhioz rniabee gra ree bixhioz, guyu Davi lën xyadooro' Dios, gudawnë ree xcompniaraman guiadxtil ma nagle' abi' bixhiosi ree rayal gaw laa reen.

<sup>27</sup> Rëb tëë Jesús:

—Dios badxe' dxej raziiladx bejn, per ad badxe'taman dxej guin par sagdiaj bejn.

<sup>28</sup> Abi' naj, guial najn Bén guxhaal Dios, ra'pan guialrniabee dxej raziiladx ree bejn.

### 3

*Rayajc tijb xin naxü'n tibladyaa*  
(Mt. 12:9-14; Lc. 6:6-11)

<sup>1</sup> Tijb dxej guyu Jesús lën tijb yadoo. Lën yadoo guin za' tijb xin naxü'n tibladyaa.

<sup>2</sup> Abi' ree bén yu' lën yadoo guin rula'ch reeman Jesús din guidoon zayüjnman laax dxej raziiladx reeman ya, din gac gutedia' reeman Jesús. <sup>3</sup> Dxel rëb Jesús loj xin naxü'n yaa guin:

—Bisu, guzuj galay guin.

<sup>4</sup> Abi' rëbaman loj ree bén guin:

—¿Xhie rayal güün bejn dxej raziiladx reeman? ¿Ni zagdxe ya o ni mal? ¿Guslaaman xguialnaban bejn ya o gugüjtaman laaman?

Per ad badxi't reeman xtiidxaman. <sup>5</sup> Dxel rdxe'ch Jesús ruguiaaman loj gra reeman, dád guyunaya luxdooman guial ad guyënt reeman naya lasa' reeman. Zianz rëbaman loj xin guin:

—Basli yaal.

Abi' basli yaax, loj hor guin gajc bayajcan. <sup>6</sup> Chi baza ree bénfarisew guin, zianz baya'n reeman diidx con ree xbejn Herodes din gugüjt reeman Jesús.

*Zien ree bejn riga' ro'nijsdoo*

<sup>7</sup> Per Jesús zë gajcaman ro'nijsdoo Galilea con ree xbejnman. Zien da't ree bén Galilea con ree bén Judea binal laaman, <sup>8</sup> në ree bén Jerusalén con ree bén Idumea, në ree bén zojb zatiblad ro' guiwro' Jordán, në ree bén Tiro con ree bén zojb niz Sidón. Dád zien ree bejn wej lod za' Jesús guial gogbee reeman ni rüjnman. <sup>9</sup> Zeel rëbaman loj ree xbejnman din guzujsin reeman tijb barcw par laaman chitëë gutëë ree bén guin

laaman. <sup>10</sup> Guial ma bayünman zien ree bejn, zeel rbig gra ree bénragxuu lojman din guqui' reeman laaman. <sup>11</sup> Guiáad ree bén yu' xindxab luxdoo chi ruguiaa reeman Jesús, ruzuxib reeman lojman, rbidxa' reeman rëb reeman:

—¿Lüj naj Xi'n Dios!

<sup>12</sup> Per gunabeeman xindxab guin ree chitëë guiëb reex chu laaman.

*Rbe Jesús chiptio'p ree apóstoles*  
(Mt. 10:1-4; Lc. 6:12-16)

<sup>13</sup> Dxel wë'p Jesús tijb ruguia', abi' gurejdxaman gra ree bén guleman. Zianz wej reeman, <sup>14</sup> loj gra reeman gulejman chiptio'p reeman din su reeman con laaman zianczi guixhiaal tēëman laa reeman chigtie'ch reeman xtiidx Dios. <sup>15</sup> Abi' badëëman guialrniabee din yayün reeman bénragxuu ree yabëë tēë reeman xindxab luxdoo ree bejn. <sup>16</sup> Bén guie ree naj guidxiptio'p ree bén gule Jesús: Simón bén gulëëljajman Bëd, <sup>17</sup> Jacob con Waj, bén naj ree xi'n Zebedeo, gunee Jesús laa reeman Boanerges (rën guiëban, xi'n guziaaw); <sup>18</sup> në Andrejs, Felip, Tol, Matew, Tumajs con Jacob xi'n Alfeo, në Tadeo, nëtëë Simón bén bi'ch loj ree bén Cananistas, <sup>19</sup> con Judas Iscariote bén bayü Jesús.

*Rëb ree bejn ca' Jesús xguialrniabee Beelzebú*  
(Mt. 12:22-32; Lc. 11:14-23; 12:10)

Chi gulox bacaabeeman laa reeman dxel badxinnëman laa reeman lod zojbaman. <sup>20</sup> Dád zien ree bejn bido'p yagaj stijb, xt ni'quid bile't niajw Jesús con ree xbejnman. <sup>21</sup> Chi gogbee ree xfamil Jesús, dxel bidxin reeman din yaca' reeman laaman guial rëb reeman guijcaman rajc.

<sup>22</sup> Abi' ree mextr rajc ley bén zëed ree Jerusalén rëb reeman:

—Bén guin rabëë xindxab luxdoo ree bejn por xguialrniabee Beelzebú, xin rniabee ree xindxab.

<sup>23</sup> Dxel gurejdx Jesús laa reeman, rëbaman:

—¿Xhienaag yabëë satanás lasa' xindxab gajquix? <sup>24</sup> Bal tijb nacion, ad nadxagt riga' ree gobiarn, zadijl reeman abi' ad zanuut xguialrniabee reeman, <sup>25</sup> ziangajc tijb famil, bal rdilnë lasa' reeman, nayob la' lasa' reeman. <sup>26</sup> Yan, ziangajc bal satanás su contr lasa' xindxabgajquix, zala' lasa' reex abi' wed yagaj lox xguialrniabee reex.

<sup>27</sup> 'Abi' achut zajc chu' lidx tijb béngojl da't din cwanman gra xieenman bal id zaxhii xgajman laaman. Zian zile' cwanman ni rajpaman.

<sup>28</sup> 'Naj rni lojdi guial yu' perdon par gra dol ni rüjn bejn, yu' tēë perdon par gra diidxguijdx ni rniee bejn chutëëz. <sup>29</sup> Per bén guinieeguijdx xSprijt Dios, ad yu't dxej gacaman perdon, ma banijtaman loj Dios.

<sup>30</sup> Rëb Jesús zian guial rëb reeman yu' xsprijt xindxab luxdooan.

*Xniaa Jesús con ree bijchaman*  
(Mt. 12:46-50; Lc. 8:19-21)

<sup>31</sup> Hor guin bidxin xniaa Jesús con ree bijchaman yu' lod za'man, per ad bile't niu reeman zeel guxhaal reeman bén chignee laaman. <sup>32</sup> Dxel ree bén zojbnë laaman yagaj bagojn reeman laaman, rëb reeman:

—Laa xniaal con ree bijchil za' lule' guin cayguiil reeman lüj.

<sup>33</sup> Badxi' Jesús xtiidx reeman rëbaman:

—¿Chunin naj da nan con ree da bichan?

<sup>34</sup> Dxel baguiaaman bén zojb ree gadëd lod zojbaman, rëbaman:

—Bén guie ree naj da nan con ree da bichan, <sup>35</sup> din graczi ree bén rüjn ni rën Dios, laa reeman naj da bichan, da zanan në da nan.



## 4

*Xcwent bén rtie'ch bin  
(Mt. 13:1-9; Lc. 8:4-8)*

<sup>1</sup> Zatiĵb dxej culüü Jesús xtiidx Dios ro'nijsdoo Galilea. Abi' guial dád benzien bido'p lod za'man zeel wè'paman loj tiĵb barcw yu' lojnijs guin, abi' gurejman lojn guiáad ree bén guin riga' reeman ro' nijs guin. <sup>2</sup> Zien ree ni balüüman laa reeman, rüman laan loj reeman zi'c cwent, loj ree ni culüüman laa reeman rëbaman:

<sup>3</sup> —Gol bacaagdiajg ni ganin lojdi: Tiĵb bejn briiman bigtie'chaman bin loj xguiniaaman. <sup>4</sup> Chi catie'chaman laan, ta'nán biaĵb luneĵz abi' bidxin ree biguijn gudaw reeb laan. <sup>5</sup> Zata'nán biaĵb loj ree guiaj lod ad riga't zien yuj, abi' cari gulejnan guial ad zient yuj riga'. <sup>6</sup> Per chi gunan gubijdx, bigoolan abi' guial ad zro't liujn yu', gubidxan. <sup>7</sup> Zata'nán biaĵb loj ree yaquiějch. Abi' chi guni'san, banidloj yaquiějch guin laan, abi' ad cwat ladan. <sup>8</sup> Per zata'nán biaĵb loj yuj za'c, abi' dád gojcan, yu' ni cwa gajlbichii, yu' ni cwa gayojn yu' tēē ni cwa tibgayuu.

<sup>9</sup> Rëb tēē Jesús loj reeman:

—Bén rën gucaagdiajg, gol bacaagdiajg.

*Chexc zeel ruliüü Jesús con cwent ree  
(Mt. 13:10-17; Lc. 8:9-10)*

<sup>10</sup> Chi ma baya'nnē Jesús zata'nz ree bejn con guidxiptio'p ree xbejnman, dxel gunabdiidx reeman xhie rën guiëb cwent guin. <sup>11</sup> Badxi'man laan rëbaman:

—Dios ma basa'n lëjt din chignia'di xhienaag naj xguialrniabeeman ni goc naguie'ch par lëjt, sa'n ree bén ad rliladxt xguialrniabeeman, con ganaxzi ree cwent naj guial gulün laa reeman. <sup>12</sup> Din majsi rani loj reeman, per ad zuguaat reeman, majsi rigueijn reeman, per ad zignia't reeman chitēē yayejc reeman loj Dios abi' güünman perdon xtol reeman.

*Rusignia' Jesús xcwent bén rtie'ch bin  
(Mt. 13:18-23; Lc. 8:11-15)*

<sup>13</sup> Abi' rëb Jesús loj reeman:

—¿Nid rignia'di ya xhie rën guiëb cwent guin? ¿Xhieza naag chignia'di gra ni ganin lojdi? <sup>14</sup> Bén gutie'ch bin guin, laaman naj zi'c bén rtie'ch xtiidx Dios. <sup>15</sup> Bin biaĵb luneĵz, naj zi'c ree bén rigueijn xtiidx Dios, per rdxin gajc xindxab rquiedix laan luxdoo reeman. <sup>16</sup> Yu' ree bén naj zi'c bin biaĵb loj ree guiaj. Rigueijn reeman xtiidx Dios abi' dád nix ru luxdoo reeman rigueijn reeman laan. <sup>17</sup> Per guial naj reeman zi'c tiĵb cwaan ni ad yu't zro' liuj, chi rzagdiaj reeman o chi rzunal ree bejn laa reeman din güün reeman laa reeman ni mal por xtiidx Dios, laa rusa'n gajc reeman ni rliladx reeman. <sup>18</sup> Yu' tēē ree bén naj zi'c bin ni biaĵb loj yaquiějch. Rigueijn reeman xtiidx Dios, <sup>19</sup> per ru reeman xgab por ree ni riga' loj guidxliuj guie. Rusquiee guialnaza'c laa reeman rën reeman gap reeman graloj. Abi' guial yu' xgab guin guijc reeman, zianz rucwëëz rucaagdiajg reeman xtiidx Dios, abi' achet sirv rüjn ni rucaagdiajg reeman. <sup>20</sup> Per yu' ree bén naj zi'c bin biaĵb loj yuj zagdx, ridxga' reeman laan con guidib luxdoo reeman. Rüjn reeman zi'c rën Dios, laa reeman naj zi'c ni cwa gajlbichii o ni cwa gayojn o ni cwa tibgayuu.

*Achet ni naguie'ch yu'  
(Lc. 8:16-18)*

<sup>21</sup> Abi' rëb Jesús loj reeman:

—Achut bén ruze'c tiĵb guij par guta'cwaman laan con tiĵb caj, o gudxe'man laan xan loon, ruzujman laan ya din gusnin guidib. <sup>22</sup> Din achet ni naguie'ch yu' ni ad zaguiant ad yu' tēēt ni ralan ni ad zagbeet bejn. <sup>23</sup> Bén rën gucaagdiajg, gol bacaagdiajg.

<sup>24</sup> Rëb tēē Jesús:

—Gol been xgab por ree diidx ni caguiejndi. Bal ridxga'di xtiidx Dios, mazri gustëdguienman lëjt. <sup>25</sup> Din bén ma rignia' xtiidx Dios, chignia'man mazri. Per bén ad rignia't, xt ta'n ni rignia'man ad zignia'traman.

*Xcwent guial rni's bin*

<sup>26</sup> Rëb tëë Jesús loj reeman:

—Xguialrniabee Dios naj zi'c rzajc bén rxübin loj xguiniaaman. <sup>27</sup> Din majsi naga'yëjsaman o naga'naaman, majsi radxe o guiaal ya, rliejn bin guin abi' rni'san, ni'quid ragbeetaman xhienaag rajcan. <sup>28</sup> Din yuj guin gajc rusni's laan, yaløj rliejnan najn tijb gui'xhdoo, dxel ririin dojn, zianz rtia ladan. <sup>29</sup> Chi ma gojc reen dxel raru' reen guial ma bidxin tiamp yado'p reen.

*Xcwent xhaj moxtajs*

*(Mt. 13:31-32; Lc. 13:18-19)*

<sup>30</sup> Rëb tëë Jesús:

—¿Xhienaag ganin naj xguialrniabee Dios, o xhienaag gën diidx lojdi din chignia'di xhienaag naj xguialrniabeeman? <sup>31</sup> Rnin lojdi guial xguialrniabee Dios naj zi'c naj xhaj moxtajs. Chi rxübin reeman laan. Laan naj ni mazri ni dobëz loj gra ree bin yu' loj guidxliuj. <sup>32</sup> Per chi ma guxübin reeman laan, rni'san rajcan mazri narooob loj gra ree cwaan, xt rajc rüjn xguixbitia's ree biguijn xidxan.

*Baliüü Jesús con ganax cwent*

*(Mt. 13:34-35)*

<sup>33</sup> Balüü Jesús laa reeman xtiidx Dios con ganaxczi cwent zi'c naj ree ni ma beman, xt lodzi bignia' reeman. <sup>34</sup> Ad rulüütaman laa reeman zezi, bal id zulüüman con cwent. Per chi ma za'man con ree xbejnman dxel rusignia'man laa reeman zagdxë xhie rën guiëb ree ni rëbaman.

*Racwëëz Jesús bidoxh*

*(Mt. 8:23-27; Lc. 8:22-25)*

<sup>35</sup> Dxej zii, chi gure guiaal, rëb Jesús loj ree xbejnman:

—Yo' ree zatiblad ro' nijs guin.

<sup>36</sup> Dxel basa'n reeman bén riga' ree yagaj, wë'p reeman loj barcw ni yu' Jesús zinë reeman laaman con ree barcw ren. <sup>37</sup> Dxel brii bidoxh loj nijs guin, xt guzuløj cadxa nijs loj barcw guin. <sup>38</sup> Per Jesús naga'yëjsaman loj barcw guin tijb luar naj xijchan, nucuugaman tijb almoaad. Dxel bacwëën reeman laaman rëb reeman:

—¡Mextr! ¿Nid yu' l xgab ya? ¡Ma cayzëëb ree xan nijs!

<sup>39</sup> Abi' bixche Jesús, bacwëëzaman bidoxh guin rëb tëëman loj nijs guin:

—¡Bacwëëz, bayajcdxe!

Dxel bayajcdxe bi guin con nijs guin. <sup>40</sup> Zianz rëb Jesús loj reeman:

—¿Chexc zeel rdxebidi? ¿Gadzidi chililadx naj ya?

<sup>41</sup> Per laa reeman dád bidxeb reeman abi' rniabdiidx loj lasa' reeman:

—¿Chu bén guin zeel xt bi con nijs ruzoob xtiidxaman?

## 5

*Rayüjn Jesús tijb xin yu' xinxab luxdoo*

*(Mt. 8:28-34; Lc. 8:26-39)*

<sup>1</sup> Chi badxin Jesús con ree xbejnman zatiblad ro' nijsdoo guin, xdajn ree bén Gadara, <sup>2</sup> baguiajtzi Jesús loj barcw guin, tijb xin yu' xinxab luxdoo bigchaaglojx Jesús. Bariix ro' ree baa, <sup>3</sup> guial nabanx ni. Achutczi rajc rixhii laax ni'qui con caden. <sup>4</sup> Zien volt ma guxhii reeman yaax në guia'x con caden, per rüjngajquix gan ruooxix laan. Achut rüjn laax gan. <sup>5</sup> Dxejz guiaal rizax niz dajn con lad ree baa, rbixdiajx rguilguijdx laagajquix

con guiaj. <sup>6</sup> Zijtri baguiaax Jesús, baxüünx bigchaaglojx laaman abi' bazuxibix lojman.

<sup>7</sup> Zianz guneex rejs rëbix:

—¿Xhie rënl con naj Jesús, Xi'n Dios yu' xanyabaa? Rniaaban lojl ad gusagzil naj.

<sup>8</sup> Rëbix zian, guial cayëb Jesús lojx:

—¡Xindxab, barii luxdoo xin guin!

<sup>9</sup> Dxel gunabdiidx Jesús lojx rëbaman:

—¿Chu lal?

Badxi'xan rëbix:

—Legión lan din zien nayajcan.

<sup>10</sup> Abi' rëbix lojman chitëë guixhiaalaman xindxab guin ree lood ren.

<sup>11</sup> Abi' gajxh yagaj riga' zien ree cüch cayaw reeb. <sup>12</sup> Zianz rëb ree xindxab guin loj Jesús:

—Guxhaal dunujn lod za' ree cüch guin din yadxu'n lën reeb.

<sup>13</sup> Dxel cwëjb Jesús barii ree xindxab guin luxdoo xin guin persi bayu reex lën ree cüch guin. Cost tio'p mil naj reeb. Dxel guzuloj cuxüün reeb, zianz bitidya' reeb ro' bala' xt lojnijs, lod gu' reeb nijs zianz güjt reeb. <sup>14</sup> Guiáad ree bën cayajp laa reeb, baxüün reeman bicojn reeman luguiedx në ree dajn abi' zien ree bejn wej biquiaa ni goc. <sup>15</sup> Chi bidxin reeman lod za' Jesús, baguiaa reeman xin barii xindxab guin ree luxdoo, zojbix najcw xabix, ma badëdguienx. Abi' bidxeb reeman. <sup>16</sup> Guiáad ree bën baguiaa gra ni goc con xin guin, në con ree cüch guin, be reeman diidx loj ree bën bidxin. <sup>17</sup> Dxel guzuloj rëb reeman loj Jesús din yazaman niz ladx reeman.

<sup>18</sup> Chi bayu Jesús loj barcw guin, naguiejn rüjn xin barii xindxab guin ree luxdoo din chinalix laaman. <sup>19</sup> Per ad cwëjbt Jesús, rëbaman:

—Baguiaj lidxil, bignaj xfamilil, biguie diidx loj reeman gra ni ma been Dios por lüj, xhie tëë naag bayaman lüj.

<sup>20</sup> Dxel ziax, guzuloj rëbix loj ree bën zojb niz Decápolis gra ni been Dios por laax, abi' graczi reeman badxaloj.

### *Rayajc xi'n Jairo në béngunaa bagaal xab Jesús*

*(Mt. 9:18-26; Lc. 8:40-56)*

<sup>21</sup> Chi badxin Jesús loj barcw stiblad ro' nijs guin, dád zien ree bejn bido'p, persi ro'zi nijs guin baya'nman. <sup>22</sup> Dxel bidxin tijb bën rniabee lën tijb xyadoo ree bën Israel, laman Jairo. Chi baguiaaman Jesús, bazuxibaman lojman, <sup>23</sup> abi' guzajcaman laaman liaadx, rëbaman:

—Ma cayëjt da xi'n'an. Yo'sii din gudxiib yaal guijquim din yayajquim din guibanm.

<sup>24</sup> Zinët Jesús bën guin, dád zien bejn zinal laaman xt rixa't reeman laaman. <sup>25</sup> Loj graczi reeman no'ch tijb béngunaa, ma gojc chiptio'p ijz ragxuuman ryajbaman rejn.

<sup>26</sup> Dád ma guzagdiajman, ma banijt graczi ni rajpaman guial wejman loj ree doctor, per ad bayajctaman, aal mazri zro' rajcaman. <sup>27</sup> Chi biguiejnman gra ni rüjn Jesús, gudëdaman lād ree bën guin, gubigaman niz xijchaman dxel bagaalaman xabaman.

<sup>28</sup> Guial gunaladxaman: “Gugalzan xabaman, ma bayajc gajcan.” <sup>29</sup> Loj hor zii gajc gulëjz biajbaman rejn, abi' gogbeeman ma bayajcaman. <sup>30</sup> Laa gogbee gajc Jesús guial yu' chu ma bayajc por xguialrniabeeman, abi' badxi' lojman loj ree bën guin dxel gunabdiidxaman, rëbaman:

—¿Chu baqui' da xaban?

<sup>31</sup> Abi' rëb ree xbejnman lojman:

—Awa ruguiaal xt rixa't reeman lüj guiáad lüj rniabdiidxil chu baqui' xabil. <sup>32</sup> Per Jesús ruguiaaman gra lad din guguiaaman chu baqui' laaman.

<sup>33</sup> Abi' guidib rnij béngunaa guin guial rdxebaman, guial gogbeeman ma bayajcaman, bigzuxibaman loj Jesús, beman diidxli ni beenman. <sup>34</sup> Dxel rëb Jesús lojman:

—Xi'n, guial bililadxil naj zeel ma bayajquil. Baguiaj zagdxe. Ma bayajquil guialguijdx ni goquil.

<sup>35</sup> Sta canee Jesús zian, chi bidxin ree bén guza lidx Jairo, rëb reeman loj Jairo:

—Ma güjt xi'nl. Ad ruslenril mextr guin mazri.

<sup>36</sup> Per chi biguiejn Jesús ni rëb reeman, rëbaman loj Jairo:

—Ad rdxebil, bililadxzi naj.

<sup>37</sup> Ad cwëjbt Jesús ninal gra ree bén riga' laaman, Bëdзи, con Jacob, con Waj bijch Jacob. <sup>38</sup> Chi bidxin reeman lidxaman, baguiaa Jesús cayajc naquie' guial roon rbixdiaj reeman. <sup>39</sup> Dxel guyuman lënú abi' rëbaman loj reeman:

—¿Chexc zeel roon rbixdiajdi? Ad güjttim, naga'yëjsim.

<sup>40</sup> Per baze' reeman laaman. Dxel gunabeeman barii gra reeman, zianz binëman xdadim con xniaam con ree bén zinëman, lod naga' bindo guin. <sup>41</sup> Dxel gunaazaman yaam rëbaman:

—Talita, cumi —Rën guiëban: Lÿj rnin, bindoo, bixche.

<sup>42</sup> Loj hor ziigajc bixchem guzuloj cazam. Yu'm chiptio'p ijz. Abi' dád badxa loj ree bén riga'. <sup>43</sup> Per gunabee Jesús laa reeman chitëe chu loj guiëb reeman ni goc, gunabee tëeman gudëed reeman ni gawim.

## 6

### *Radxin Jesús Nazaret*

*(Mt. 13:53-58; Lc. 4:16-30)*

<sup>1</sup> Baza Jesús yagaj, badxin ladxaman con ree xbejnman. <sup>2</sup> Chi bidxin dxej raziiladx ree bejn, guzuloj culüüman bejn ree lën yadoo. Abi' gra ree bén cucaagdiajg dád badxa loj reeman ni rnieeman, abi' rëb reeman:

—¿Ban basiid bén guin gra ni rnieeman? ¿Ban gulëëman guialrignia' guin abi' chu badëe guialrniabee zeel rÿjnman milagr guin ree?

<sup>3</sup> ¿Nid laaman naj bén carpinter ya, xi'n Li abi' ree bijchaman naj Jacob, Xiëb, Judas, në Simón? Guiáad ree bizanman zojb luguiedx guie.

Abi' ad bidxga't reeman Jesús. <sup>4</sup> Per rëbaman loj reeman:

—Guidibczi rajp reeman respejt tijb bén rudëe xtiidx Dios loj ree bejn. Per ladxaman achut rajp laaman respejt, ni'qui lidxaman, ni'qui ree xfamilaman ad rajpt laaman respejt.

<sup>5</sup> Ad bile't nüjn Jesús zien ree milagr yagaj. Bëlzi ree bénragxuu bayÿjnman, badxiib yaaman guijc reeman. <sup>6</sup> Dád badxalojman guial ad bililadx reeman laaman. Dxel zëman guiedx naj ree gajxh, ziglüüman bejn ree.

### *Rxhial Jesús guidxiptio'p ree xbejnman chiglüü reeman xtiidx Dios*

*(Mt. 10:5-15; Lc. 9:1-6)*

<sup>7</sup> Dxel gurejdx Jesús guidxiptio'p ree xbejnman, abi' guxhaalaman tio'p gaj reeman. Badëëman guialrniabee loj reeman din yabëe reeman xindxab ree luxdoo ree bejn.

<sup>8</sup> Dxel gunabeeman din achetczi chinë reeman par runejz, ni'qui guijxh, ni'qui guialraw, ni'qui milia, tijbzi yagriadx reeman, <sup>9</sup> con xgurëch reeman, con tijbzi lajd najcw reeman. <sup>10</sup> Dxel rëbaman loj reeman:

—Yu lod guidxindi, tijbzi yagaj yaya'ndi xt guidxin dxej yazadi luguiedx guin. <sup>11</sup> Bal yu' guiedx lod ad rënt reeman lëjt o ad rënt reeman gucaagdiajg reeman ni rnieedi, gol barii yagaj, gol gudxijp guxyuj guia'di zi'c sen guial ad rënt reeman guzooob reeman diidx. Din naj rni lojdi, guial dxej ni yadëed ree bejn cwent loj Dios mazri casti narooob yayal reeman guial loj ree bén Sodoma në Gomorra.

<sup>12</sup> Zianz brii reeman zigüiedx reeman loj ree bejn guial rayal yayÿjn reeman xgab por xtol reeman. <sup>13</sup> Abi' rabëe reeman zien ree xindxab luxdoo ree bejn, zien tëe ree bénragxuu gudëeb reeman sejt, abi' bayÿjn reeman laa reeman.

*Güjt Waj bén baroobnijs bejn ree*

*(Mt. 14:1-12; Lc. 9:7-9)*

<sup>14</sup> Chi biguiejn rey Herodes ni rüjn Jesús guial ruza't ree bejn laaman guidibczi, rëb reeman:

—Waj, bén baroobnijs bejn ree ma baban, zeel rajpaman guialrniabee rüjnman milagr ree.

<sup>15</sup> Per yu' reeman rëb:

—Elíasan, bén rudëë xtiidx Dios loj ree bejn.

Yu'za reeman rëb:

—Tijb bén rudëë xtiidx Dios loj ree bejn lasa' ree bén gocli.

<sup>16</sup> Chi biguiejn Herodes rëb reeman zian, rëbaman:

—Wajn, xin gunabeen biru' yëjn, laaxan ma baban yan.

<sup>17</sup> Rëb Herodes guin zian din laagajcaman gunabee gunaaz reeman Waj, abi' badxe'man laaman ladxguiib por Herodías. Herodías naj xbéngunaa Felip bijch Herodes. Per Herodes cwa'man Herodías. <sup>18</sup> Abi' guial rëb Waj loj Herodes:

—Ad laat tia' xbéngunaa bijchil.

<sup>19</sup> Zeel bidxe'ch Herodías Waj, guyënman nugüjtaman laaman. Per ad rile'tan, <sup>20</sup> din rdxeb Herodes guial ragbeeman rüjn Waj ni rën Dios, rüjn tëëman zi'c rayal, zeel ad cwëjbtaman xhie nünne Herodías Waj. Majsi ad ragbeet Herodes xhie güünman por ni rëb Waj lojman, per ruladxaman gucaagdiajgaman ni rnieeman.

<sup>21</sup> Per bidxin dxej been Herodías ni rënman. Chi baza' Herodes ijz, abi' beenman lanij, badxe'man tijb guialraw par bén rniabee ree në par ree bén rniabee ree suldad nëtëë ree bén zojbloj niz Galilea. <sup>22</sup> Dxel guyu xi'n Herodías lod cayajc lanij guin zianz baya'm. Abi' Herodes con ree xbioozaman dád bayuladx reeman zi'c baya'm. Zeel rëb rey guin lojm:

—Gunab ni rëntzil, naj gune laan.

<sup>23</sup> Xt badëë xtiidxaman gudëëman ni guiniabtzim, majsi garol ni rajpaman. <sup>24</sup> Dxel bariim bignabdiidx loj xniaam, rëbim:

—¿Xhie ganaaban?

Badxi'man laan rëbaman:

—Gunab guijc Waj bén ru-roobnijs bejn ree.

<sup>25</sup> Laa bayugajquim lod za' rey Herodes, rëbim lojman:

—Yan gajc rënan guneel guijc Waj, bén ru-roobnijs bejn ree, guneelan loj tijb pliajt.

<sup>26</sup> Dád guyu naya Herodes, per mal badëëd xtiidxaman guidib loj ree bén riga', zeel ad bile't nibexuuman nudëëman ni gunabim. <sup>27</sup> Dxel gunabee Herodes tijb suldad din chica'x guijc Waj. <sup>28</sup> Zianz wej suldad guin lën ladxguiib guin, gutü'x guijc Waj badxe'xan loj pliajt binëxan lojm. Dxel bayü loj xniaamin.

<sup>29</sup> Chi gogbee ree xbejn Waj guial ma güjtaman, baca' reeman xcuerpaman persi biquie'ch reeman laaman.

*Ruyaan Jesús gaay mil bejn*

*(Mt. 14:13-21; Lc. 9:10-17; Jn.6:1-14)*

<sup>30</sup> Chi bayejc ree xi apóstoles Jesús, be reeman diidx lojman gra ni been reeman në ni balüü reeman. <sup>31</sup> Dxel rëb Jesús loj reeman:

—Gol guda, yo' dunujz ree niz lod achut bejn zojb din yaziiladx ree ta'n.

Rëbaman zian guial dád zien ree bén zia zien tëë ree bén zëëd, xt ni'qui guial gaw reeman ad rile'tan.

<sup>32</sup> Dxel Jesús con ree bén naj ree apóstoles zë reeman loj barcw tijb luar lod achut zojb.

<sup>33</sup> Per dád zien ree bejn baguiaa guial zë reeman, abi' bayünbee reeman laa reeman zeel zien ree bejn brii luguiedx guin ree ruxüün reeman, abi' yalojl laa reeman bidxin lod zë Jesús con ree xbejnman.

<sup>34</sup> Chi baguiajt Jesús loj barcw guin, baguiaaman bén guixiuj riga' yagaj, abi' bayaman laa reeman guial za' reeman zi'c xiil achut rajp. Dxel guzuloj balüüman laa reeman, zien ree ni balüüman laa reeman. <sup>35</sup> Chi ma gudxe, gubig ree xbejnman, rëb reeman lojman: —Ma gudxe yan, abi' achut bejn zojb niz guie. <sup>36</sup> Gÿjdx loj ree bén guin din che reeman ranch ree në ree guiedx ni riga' gajxh chisii xhienin gaw reeman.

<sup>37</sup> Per rëb Jesús loj reeman:

—Lëjt gol badëed ni gaw reeman.

Dxel rëb reeman lojman:

—Per zro' da't milia ryaadx din yo' ni gaw ree bén guin, zi'ct ni rÿjn bejn gan loj tio'p gayuu dxej.

<sup>38</sup> Abi' rëb Jesús loj reeman:

—¿Bël guiadxtil ca'di? Gol baguiaa don.

Chi baguiaa reeman, dxel rëb reeman:

—Gaay guiadxtil con zatio'p bëjl.

<sup>39</sup> Dxel gunabeeman din cwe tibcwaa gaj reeman loj guixya'. <sup>40</sup> Zianz gurej reeman zian, yu' lod gure tibgayuu reeman, yu' lod gure tü'pchii reeman. <sup>41</sup> Abi' cwa' Jesús guigaay guiadxtil guin con grop bëjl guin. Dxel gules lojman xanyabaa, badëeman quixtëe loj Dios, gula'man guiadxtil guin badëeman loj ree xbejnman persi gudi's reeman laan loj ree bén riga', gudi's tëeman grop bëjl guin loj gra reeman. <sup>42</sup> Graczi reeman gudaw xt bigdxinladx reeman, <sup>43</sup> abi' staczi bacha reeman chiptio'p dxüm guiadxtil laay con bëjl ni baya'n. <sup>44</sup> Loj ree bén gudaw no'ch cost gaay mil xinguaaw.

### *Rza Jesús loj nijs*

*(Mt. 14:22-27; Jn. 6:16-21)*

<sup>45</sup> Dxel gunabee Jesús guyu ree xbejnman loj barcw din tëdgaj reeman stiblad ro' nijs par guidxin reeman Betsaida, la'tgaj cuzaadiidxnëman benzien guin ree. <sup>46</sup> Chi gulox bazaadiidxnëman laa reeman, wejman guiyc tijb guia', persi gurejdx gunabaman Dios. <sup>47</sup> Chi ma cabej guiaal, ma yu' barcw guin galay nijs guiáad Jesús baya'n xtijbzaman guiyc guia' guin. <sup>48</sup> Dxel baguiaaman dád cazagdiaj ree xbejnman cusa reeman barcw guin guial rliaj bi niz loj barcw guin. Abi' chi ma cayreguiaal zibig Jesús loj reeman cazaman loj nijs guin, beenman zi'c bén tëdnejz. <sup>49</sup> Chi baguiaa reeman cazaman loj nijs guin gunaladx reeman sprijt malan, abi' gurixdiaj reeman. <sup>50</sup> Dád cadxeb reeman por ni cuguiaa reeman. Per guneenë Jesús laa reeman rëbaman:

—¡Gol bagu' luxdoodi, ad bal rdxebidi, najn!

<sup>51</sup> Dxel guyuman loj barcw guin, zianz gulëjz bi guin. Guiáad laa reeman dád badxa loj reeman, <sup>52</sup> din nayaaw xquiarguejn reeman, abi' ad bignia't reeman milagr ni beenman con guiadxtil guin ree.

### *Rayÿjn Jesús bénragxuu ree Genesaret*

*(Mt. 14:34-36)*

<sup>53</sup> Chi ma gudëd reeman lojnijs guin bidxin reeman xdajn ree bén Genesaret, yagaj guxhii reeman barcw guin ro' nijs. <sup>54</sup> Naabzi baguiajt reeman loj barcw guin, laa bayünbee gajc ree bejn Jesús. <sup>55</sup> Abi' gutie'ch reeman diidx guidib niz yagaj. Dxel guzuloj zinë ree bejn bénragxuu ree lod riguejntzi reeman za' Jesús. <sup>56</sup> Bantëez zëman, majsi guiedx narooob o guiedx dobëz o ranch ree, rguijxh reeman bénragxuu guin ree niz lod tëdaman. Dxel rzajc reeman laaman liaadx din tiëbaman gugaal reeman majsi guia'z xabaman. Abi' graczi ree bén bagaal xabaman bayajc.

## 7

### *Ni rÿjn persi rÿjn bejn dol*

*(Mt. 15:1-20)*

<sup>1</sup> Tijb dxej, tio'p choon ree bénfarisew con ree mextr rajc ley, bén guza ree Jerusalén, bibig reeman loj Jesús. <sup>2</sup> Abi' chi baguiaa reeman guial yu' ree xbejn Jesús cayaw, ad banaat reeman zi'c naj costumbr. Dxel caneeguijdx reeman laa reeman. <sup>3</sup> (Din bénfarisew në gra ree bén Israel zinaldxi'ch reeman xcostumbr xbéngulal reeman guial ad zajct gaw reeman bal id reeman gunaa zi'c naj costumbr guin. <sup>4</sup> Në chi raza reeman lugua', ad rawt reeman bal id zunaa reeman zi'c naj costumbr guin. Dád zien ni zinal reeman güün reeman zi'c xhienaag quiib reeman re, con vajs, con ree trast guiib, në xloon reeman riguiib reeman.) <sup>5</sup> Zeel bénfarisew ree con ree mextr guin, gunabdiidx reeman loj Jesús, rëb reeman:

—¿Chexc zeel ad runaat ree xbejnl zi'c naj xcostumbr dux béngulal ree? ¿Chexc zeel raw reeman zianzi?

<sup>6</sup> Dxel rëb Jesús loj reeman:

—¡Bén rusquiee!, waliqui ni gunee Isaías por lëjt, bén badëë xtiidx Dios loj ree bejn, chi bacaaman:

Bén guie ree, rëbzi reeman guial rën da't reeman naj, per ad rënt reeman naj con guidib luxdoo reeman.

<sup>7</sup> Xlia'czi rën da't reeman naj,

abi' rulüü reeman bejn ree ganaxzi ni rbëëguijc ree bénguidxliuj.

<sup>8</sup> Yan, rusa'ndi xtiidx Dios tibladd persi zinalidi xcostumbr ree bénguidxliuj.

<sup>9</sup> Rëb tëë Jesús loj reeman:

—Par chitëë nit xcostumbridi zeel rusa'ndi xtiidx Dios tibladd. <sup>10</sup> Rëb Moisejs: “Gojp re-spejt xdadil con xniaal”, abi' “Bén guzaal diidxmal guijc xdad o xniaa, rayal guiëtaman.”

<sup>11</sup> Per lëjt rëbidi guial zile' guiëb bejn loj xDadaman o xniaaman: “Ad zajct günan lüj yudar, din gra ni ra'pan naj Corbán” (Corbán rën guiëb gran naj par Dios). <sup>12</sup> Rëbidi, bén guiëb zian, ad zile'tri güün xdad xniaaman yudar. <sup>13</sup> Abi' rbëëladxidi xtiidx Dios persi zinal xcostumbridi ni rulüü lasa'di, në zien ree ni ren rüjndi lasa' ree ni guin.

<sup>14</sup> Dxel gurejdx Jesús bén zien guin ree, rëbaman:

—Gol bacaagdiajg gradi gol bignia' tëë ni ganin: <sup>15</sup> Ad ni rawt bejn rüjn persi rüjnman dol. Ni ririi ro'man në ni rüjnman, laan rüjn persi rüjnman dol. <sup>16</sup> ¡Bén rën gucaagdiajg, gol bacaagdiajg!

<sup>17</sup> Chi baza Jesús lod za' ree bén guin bayuman lënü, dxel gunabdiidx ree xbejnman xhie rën guiëb ni rëbaman. <sup>18</sup> Dxel rëbaman loj reeman:

—¿Në lëjt ad rignia't ni canin ya? ¿Nid ragbeedi ya guial ad ni rawt bejn rüjn persi rüjnman dol, <sup>19</sup> din ni raw bejn ad rejtan luxdoo, rejn lënman, abi' rariin?

Zian basignia'man guial ad rüjnt bejn dol por ni rawzaman. <sup>20</sup> Rëbaman:

—Ni ririi ro' bejn në ni rüjnman, laan rüjn persi rüjnman dol. <sup>21</sup> Din guijc bejn zëed graloj xgab mal, guial rüjn ni dxuudx, guialgubaan, guialrugüjt lasa', <sup>22</sup> guial rzunë béngunaa ren o xinguaaw ren, guialrzëëbladx xieen ben ren, guial rüjn ni mal, guialrusquiee, guialrajp vijs, guialnadëdloj, guialrbëë xtiidx bejn, guialrüjn benro', në guial rüjn ni ad rayalt. <sup>23</sup> Graczi ree ni guin zëed guijc bejn, abi' laan rüjn persi rüjnman dol.

### *Rayajc xi'n tijb bén Sirofenicia*

*(Mt. 15:21-28)*

<sup>24</sup> Chi baza Jesús niz yagaj, zëman niz Tiro në Sidón. Dxel guyuman tijb lënü guial ad guyëntaman niagbee ree bejn, per ad gojct nuquie'ch lojman. <sup>25</sup> Din gogbee gajc xniaa tijb bindoo yu' xindxab luxdoo. Abi' wej xniaam lod za' Jesús zianz bazuxibaman lojman. <sup>26</sup> Ad najtaman bén Israel, najman bén Sirofenicia. Dxel guzajcaman liaadx loj Jesús din yabëëman xindxab guin luxdoo bindoo guin. <sup>27</sup> Per rëb Jesús lojman:

—Badëëdxgaj mod gaw yaloj ree xindoo, din ad rayalt chiquied bejn guiadxtil loj xi'nman din gudëëman laan gaw ree bë'cw.

<sup>28</sup> Badxi' bén guinan rëbaman:

—Waliquil, Dad, per në ree bë'cw raw xguiadxtil laay reem ni ryajb xan mex.

<sup>29</sup> Dxel rëb Jesús:

—Laaqui guneel. Ma zajc yaguaiajl, ma barii xindxab guin luxdoo xi'nl.

<sup>30</sup> Chi badxin lidx bén guin, baguiaaman laa bindo guin naga' loj loon, ma barii xindxab guin luxdoo.

### *Bayajc tijb bén nacwa't ad rniee tëëtaman zagdxë*

<sup>31</sup> Baza Jesús niz Tiro, gudëdaman niz Sidón, në loj ree guiedx riga' Decápolis abi' bidxinman ro'nijsdoo Galilea. <sup>32</sup> Ni bidxinnë reeman tijb xinguaaaw nacwa'tix ad rajc tëët rnieex zagdxë. Abi' rëb reeman loj Jesús din gudxiib yaaman guijquix. <sup>33</sup> Zianz binë Jesús laax tibladd, badxe' xbacwënman lën guidiajguix, abi' con xhiejnman bagaalaman lüdxix. <sup>34</sup> Dxel gules lojman xanyabaa, banajladxaman, rëbaman:

—¡Efata! —rën guiëban: ¡Baxal!

<sup>35</sup> Loj hor zii gajc baxal ree guidiajg xin guin, baban lüdxix dxel guzuloj caneex zagdxë.

<sup>36</sup> Dxel gunabee Jesús laa reeman chitëë chu loj guiëb reeman ni goc. Per guial rëbaman zian, mazri rü reeman laan loj ree bejn. <sup>37</sup> Dád badxa loj reeman rëb reeman:

—Xi zagdxë naj gra ree ni rüjnman, xt rüjnman persi rigueijn ree bén nacwa't, abi' ree bengop rniee reeman.

## 8

### *Ruyaan Jesús tajp mil bejn*

*(Mt. 15:32-39)*

<sup>1</sup> Tijb dxej bido'p zien ree bejn abi' achet ni gaw reeman. Dxel gurejdx ree xbejn Jesús rëbaman loj reeman:

<sup>2</sup> —Rayan bén guin ree din ma gojc choon dxej nadxu'në' reeman guie, abi' ad ca't ni gaw reeman. <sup>3</sup> Abi' bal yaxhalan laa reeman lidx reeman sin guialraw, dool yadaj reeman lunejz, din yu' reeman zëed zijt.

<sup>4</sup> Dxel rëb ree xbejnman:

—Per, ¿ban guin yuca'n ni gaw ree bén guin, achutczí bejn zojb niz guie?

<sup>5</sup> Dxel gunabdiidxaman loj reeman rëbaman:

—¿Bël guiadxtil ca'di?

Abi' rëb reeman:

—Gajdxan.

<sup>6</sup> Dxel gunabeeman gurej ree bén guin luyuj. Zianz cwa'man guigajdx guiadxtil guin, badëëman quixtëë loj Dios, abi' gula'man laa reen badëëd loj ree xbejnman persi gudi's reeman laa reen loj gra ree bén guin. <sup>7</sup> Nëgajc tio'p choon ree bëjldoo ca' reeman, abi' badëëman quixtëë loj Dios dxel gunabeeman gudi's reeman në laa reeb loj ree bén guin.

<sup>8</sup> Graczi reeman gudaw xt bigdxinladx reeman, abi' staczi bacha reeman gajdx dxüm guiadxtil laay në bëjl ni baya'n. <sup>9</sup> Bén gudaw ree naj reeman cost tajp mil. Chi gulox gudaw reeman, dxel bazaadiidxnë Jesús laa reeman. <sup>10</sup> Zianz guyuman loj barcw con ree xbejnman zë reeman niz Dalmanuta.

### *Rniab ree bénfarisew tijb milagr loj Jesús*

*(Mt. 16:1-4; Lc. 12:54-56)*

<sup>11</sup> Dxel bidxin ree bénfarisew, guzuloj cadildiidxnë reeman Jesús, abi' par güün reeman laaman prueb, gunab reeman güünman tijb milagr zi'c tijb sen guial por Dios zëëdaman.

<sup>12</sup> Dxel banajladx Jesús, rëbaman:

—¿Chexc zeel rëndi güünan tijb milagr? Diidxli ganin, achetczi milagr güünan guguaadi.

<sup>13</sup> Dxel basa'nman laa reeman, bayuman loj barcw zatijb, zignë ree xbejnman stiblad ro' nijs guin.



*Xlevadur ree bénfarišew*  
(Mt. 16: 5-12)

<sup>14</sup> Bayanladx ree xbejn Jesús ninë reeman gualraw, tijbzi guiadxtil ca' reeman loj barcw guin. <sup>15</sup> Abi' chi rëbaman loj reeman:

—Gol gojp cudad con xlevadur ree bénfarišew në xlevadur Herodes.

<sup>16</sup> Dxel guzuloj rëb loj lasa' reeman:

—Naman duloj ree zian gual ad naca't ree guiadxtil.

<sup>17</sup> Abi' gogbee Jesús ni canee reeman, zianz rëbaman:

—¿Chexc zeel rëbidi gual ad ca'tidi guiadxtil? ¿Staczi ad rignia'tidi ya? ¿Sta nayaaw xquiarguejndi ya? <sup>18</sup> Yu' guiaalojdi per rulüü ad ruguiaatidi, yu' guidiajguidi per rulüü ad riguejntidi. ¿Nid rusaaladxidi ya? <sup>19</sup> Chi gudi'san gaay guiadxtil loj gaay mil bejn, ¿bël dxüm ni laay bato'pidi?

Badxi' reeman laan rëb reeman:

—Chiptio'pan.

<sup>20</sup> Dxel rëbaman:

—Laadx chi gudi'san gajdx guiadxtil loj tajp mil bejn, ¿bël dxüm guidxa baca'di?

Badxi' reeman laan rëb reeman:

—Gajdxan.

<sup>21</sup> Dxel rëbaman:

—¿Staczi ad waygnia'tidi ya?

*Rayüjn Jesús tijb bén ad ranit loj*

<sup>22</sup> Chi bidxin Jesús guiedx Betsaida con ree xbejnman. Binë ree bejn tijb bén ad ranit loj, rëb reeman loj Jesús din gugaalaman guiaalojman. <sup>23</sup> Dxel gunaaz Jesús yaa-man gulëëman laaman luguiedx guin, abi' gudëëb xhiejnman guiaalojman, baqui'man guiaalojman. Zianz gunabdiidxaman rëbaman:

—¿Rajc ruguiaal ta'n ya?

<sup>24</sup> Dxel guzuloj cuguaaman, abi' rëbaman:

—Rugian bejn ree, per rulüü naj reeman zi'c yag ni caza.

<sup>25</sup> Dxel bagaal Jesús guiaalojman stijb, abi' rëbaman lojman din guguaadxiychaman, dxel guzuloj cuguaaman zagdxë, naynidxuj ma ruguiaaman gra. <sup>26</sup> Abi' baxhaal Jesús laaman lidxaman, rëbaman:

—Ad yayul luguiedx guin achu tëë loj guiëbil xhienaag bayajc lojl.

*Rëb Bëd gual Jesús naj Cristo*  
(Mt. 16:13-20; Lc. 9:18-21)

<sup>27</sup> Bazanë ree xbejn Jesús niz Galilea, wej reeman guiedx riga' ree Cesarea de Filipo. Chi zë reeman lunejz gunabdiidx Jesús loj ree xbejnman, rëbaman:

—¿Chu rëb ree bejn najn?

<sup>28</sup> Badxi' reeman laan rëb reeman:

—Yu' reeman rëb lüj naj Waj bén baroobnijs bejn ree, yu'za reeman rëb lüj naj Elías, yu' tëë reeman rëb lüj naj tijb ree bén badëëd xtiidx Dios loj ree bejn gocli.

<sup>29</sup> Dxel gunabdiidxaman rëbaman:

—Laadx lëjt, ¿xhie nadi chu najn?

Badxi' Bëdan rëbaman:

—Lüj naj Cristo.

<sup>30</sup> Per rëb Jesús loj reeman achu loj guiëb reeman zian.

*Rugojn Jesús guiëtaman*  
(Mt. 16:21-28; Lc. 9:22-27)

<sup>31</sup> Guzuloj Jesús rëb loj ree xbejnman:

—Rayal sagdiaj da't Bén guxhaal Dios. Ad zënt ree guxtis Israel laaman, ni'qui ree bixhioz rniabee ree bixhioz, ni'qui ree mextr rajc ley. Gugüjt reeman laaman, per ni yayon dxej yabanman.

<sup>32</sup> Zagdxe basignia'man laa reeman. Dxel gulëëcaan Bëd laaman, rëbaman lojman chitëë rëbraman zian. <sup>33</sup> Per badxi' lojman baguiaa ree xbejnman, dxel gudilëman Bëd rëbaman:

—¡Bisüd lon, Satanás!, din ad por Diost zëed ree xgab ni rüjnl, rüjnl zi'c naj xixgab bénguidxliuj.

<sup>34</sup> Dxel gurejdx ree xbejn Jesús con ree bén riga' yagaj, abi' rëbaman loj reeman:

—Bal chu rën gac da bejnan, ad rayalt güünman zi'c naj xixgabaman. Siibnejzaman guialzi ni tédzaman abi' guidnalaman naj. <sup>35</sup> Din bén mazri rën guialnaban ni rajpaman loj guidxliuj guie, zadxin dxej gusëëbaman laan, per bén guiët por naj në por da diidxan, zajpaman guialnaban tiblayaa con Dios. <sup>36</sup> ¿Xhie gan güün bejn gapaman gra ni yu' loj guidxliuj bal canijtaman loj Dios? <sup>37</sup> Din ad zile't sii bejn xguialnabanman xanyabaa. <sup>38</sup> Din bén yatunë naj në da diidxan niz loj ree bëndol bén ad zinalt ree xnejz Dios, bén riga' ree yan, ziangajc naj, najn Bén guxhaal Dios, yatunë'n laaman chi guialan con xguialrniabee da Dadan con ree xianjlaman.

## 9

<sup>1</sup> Rëb tëë Jesús loj reeman:

—Diidxliczi ganin, yu' ree bén za' guie, ad zëjtt xt guguiaa reeman gui't xguialrniabee Dios.

*Bidxaa Jesús loj choon ree xbejnman*

*(Mt. 17:1-13; Lc. 9:28-36)*

<sup>2</sup> Chi goc xho'p dxej, wej Jesús tijb ruguia'ya, binëman Bëd, Jacob con Waj. Yagaj bidxaa Jesús niz loj reeman. <sup>3</sup> Balaa xabaman bacha', gojcan naquichbëj, achutczu rguuib lajd zian loj guidxliuj guie. <sup>4</sup> Dxel baguiaa reeman Elías në Moisejs cayünë reeman Jesús diidx. <sup>5</sup> Abi' rëb Bëd lojman:

—Mextr, ¡zagdxen nadxu'n guie! Yaguieenan choon ranch, tijban par lüj, tijban par Moisejs, zatijban par Elías.

<sup>6</sup> Per ad ragbeet Bëd xhienin caneeman guial dád bidxeb reeman. <sup>7</sup> Loj hor guin biguiajt tijb zaj beenan bala guijc reeman, abi' loj zaj guin biguien cha' bejn rëbaman:

—Bén guie naj da Xi'nan, bén rën da'tan, gol bazoob xtiidxaman.

<sup>8</sup> Abi' chi baguiaa reeman gadëd lod za' reeman achutri za'në Jesús, tijbzi laaman za' yagaj. <sup>9</sup> La'tgaj cayguiajt reeman ruguia' guin, rëb Jesús loj reeman chitëë chu loj guiëb reeman ni baguiaa reeman, xt yaban Bén guxhaal Dios. <sup>10</sup> Abi' laaz reeman ragbee ni baguiaa reeman, rniabdiidx tëë loj lasa' reeman xhie rën guiëb guial yabanman loj ree bengüt. <sup>11</sup> Dxel gunabdiidx reeman loj Jesús, rëb reeman:

—¿Chexc zeel rëb ree mextr rajc ley guial yaløj Elías gui't?

<sup>12</sup> Badxi'man laan rëbaman:

—Walican yaløj Elías gui't, laaman guzuxnejz gra. Per, ¿chexc zeel ca loj xtiidx Dios guial Bén guxhaal Dios sagdiaj da'taman ad zën tëët reeman laaman? <sup>13</sup> Naj rni lojdi guial mal bi't Elías, abi' beennë reeman laaman ni guyëntzi reeman zi'c ca loj xtiidx Dios ni rayal sacaman.

*Rayüjn Jesús tijb xin yu' xinxab luxdoo*

*(Mt. 17:14-21; Lc. 9:37-43)*

<sup>14</sup> Chi badxin Jesús lod za' sta'n ree xbejnman, baguiaaman dád zien bejn riga', në ree mextr rajc ley za' yagaj cadildiidx reeman con ree xbejnman. <sup>15</sup> Chi baguiaa reeman zëed Jesús, dád badxa loj reeman abi' baxüün reeman bicajpdioz reeman laaman.

<sup>16</sup> Dxel gunabdiidxaman loj reeman rëbaman:

—¿Chexc zeel cadildiidxidi?

<sup>17</sup> Abi' rëb tijb bën za' yagaj:

—Mextr, zidnë' da xi'nan lojl guial yu' xindxab luxdoox abi' nusa'nx laax gop.

<sup>18</sup> Bantëez guin za'x, chi ru xindxab guin luxdoox rureeyujx laax, abi' rbëex bichijn ro'x, raw tée ree layix, dxel ratiaguix. Ma gunaaban loj ree xbejnl din nabëe reeman xindxab guin, per ad gojct reeman.

<sup>19</sup> Zeel rëb Jesús:

—¿Bën ad rliladxt! ¿Xt goc gazunë'n lëjt gadaan tēen lëjt? Gol tanë xinzii guie.

<sup>20</sup> Dxel binë reeman laax lojman. Per chi baguiaa xindxab guin laaman, laa bagüjtya'gajquix xin guin, bareeyujx laax abi' rbixtjüpix ririi tēe bichijn ro'x. <sup>21</sup> Dxel gunabdiidx Jesús loj xdadix rëbaman:

—¿Goc guzuloj rajquix zian?

Badxi'man laan rëbaman:

—Diüzd xindobëzix. <sup>22</sup> Dád zien volt ruzaalix laax loj guij nē loj nijs din guiëtix. Zeel bal zajc güünl xhienin por dunujn, gognë dunujn, baya dunujn.

<sup>23</sup> Dxel rëb Jesús lojman:

—¿Chexc zeel nal, “bal zajcan”? Graczan zajc bal chu rliladx naj.

<sup>24</sup> Dxel gurixdiaj xdadix rëbaman:

—¿Rliladxan lüj, gognë naj din chililadxan mazri!

<sup>25</sup> Chi baguiaa Jesús cado'p zien bejn dxel gudilëman xindxab yu' luxdoo xin guin, rëbaman:

—Xindxab gop nacwa't tēe, rniabeen lüj din yariil luxdoo xin guin. Ad bal yayejcril luxdoox zatijb.

<sup>26</sup> Dxel gurixdiaj xindxab guin, abi' bagüjtya'x laax zatijb abi' bariix luxdoox, basa'nx laax zi'c xingüt zeel rëb ree bejn guial ma güjtix. <sup>27</sup> Per gunaaz Jesús yaax gulesaman laax, dxel guzulix.

<sup>28</sup> Dxel bayu Jesús lēnü con ree xbejnman, abi' gunabdiidx reeman lojman, rëb reeman:

—¿Chexc zeel ad gojct nalēen xindxab guin luxdoo xin guin?

<sup>29</sup> Badxi' Jesús rëbaman:

—Par yarii lasa' ree xindxab guin, rayal cwedx guiniabidi Dios guiba'n tēedi.

*Rugojn Jesús zatijb guial guiëtaman*

*(Mt. 17:22-23; Lc. 9:43-45)*

<sup>30</sup> Chi baza reeman yagaj, gudëd reeman niz Galilea, per ad guyënt Jesús chu niagbee guial cadëdaman niz yagaj, <sup>31</sup> guial culüü ree xbejnman, rëbaman:

—Yayü reeman Bën guxhaal Dios loj ree bën gugjyt laaman, per ni gac choon dxej yabanman.

<sup>32</sup> Per laa reeman ad bignia't reeman ni rëbaman, abi' bidxeb reeman niniabdiidx reeman lojman.

*¿Chu mazri zojbloj?*

*(Mt. 18:1-5; Lc. 9:46-48)*

<sup>33</sup> Dxel badxin Jesús Capernaum con ree xbejnman, abi' badxin reeman yu lod zojbloj reeman. Dxel gunabdiidxaman loj reeman rëbaman:

—¿Xhie diidxan rüdi lunejz chi zio'p ree?

<sup>34</sup> Per achet rëb reeman guial cadildiidx reeman lunejz chu reeman mazri zojbloj.

<sup>35</sup> Dxel gurej Jesús, gurejdxaman guidxiptio'p reeman, rëbaman:

—Bal chu bën rën gac mazri bën zojbloj lojdi, rayal güün laagajcaman zi'c tijb bën ad zojblojt güün tēeman sirv loj gradi.

<sup>36</sup> Dxel cwa'man tijb xindoo, bazujman laax galay reeman, zianz gudiidxaman laax, rëbaman:

<sup>37</sup> —Bén ridxga' tijb xindoo por naj, najn ridxga'man, guiáad bén ridxga' naj, bén guxhaal najn ridxga'man.

*Bén ad za't contr dunuj ree za'man con dunuj ree*  
(Lc. 9:49-50; Mt. 10 :42)

<sup>38</sup> Rëb Waj loj Jesús:

—Mextr, baguaan tijb bejn rabëëman xindxab luxdoo ree bejn por xguialrniabeel. Per badxoonan guial ad najtaman dux bejn ree.

<sup>39</sup> Badxi' Jesúsan rëbaman:

—Ad rudxoondi, din bén rüjn milagr por da guialrniabeen, ad zile't guinieeguidxaman naj. <sup>40</sup> Bén ad za't contr dunuj ree, za'man con dunuj ree. <sup>41</sup> Chutëöz bén gunee majsi tibxijgzi nijs lojdi guial najdi xbejn Cristo, diidxli rnin guial ziangajc yu' ni gudëöd Dios lojman.

*Bén ruzaalguiiw bejn din güünman dol*  
(Mt. 18:6-9; Lc. 17:1-2)

<sup>42</sup> 'Chutëöz bén guzaalguiiw tijb bén qui rliladxri naj din güünman dol, par laaman zagdxeli naj guixhii reeman tijb guiaj mulin yëjnman guzaal reeman laaman loj nijsdoo.

<sup>43</sup> Bal laagajc yaal rusajb lüj loj dol, zagdxeli gutü'n. Mazri zagdxé chu' con tiblodzi yaal xanyabaa, guial che con grop yaal gabijl loj bajl ni ad yu't dxej yayü', <sup>44</sup> lod ad rëjtt ree bizog lod ad rayü' tëët bajl. <sup>45</sup> Abi' bal laagajc guia'l rusajb lüj loj dol, zagdxeli gutü'n. Mazri zagdxé chu' con tiblodzi guia'l xanyabaa guial che con groplad guia'l gabijl lod yu' bajl ni ad yu't dxej yayü', <sup>46</sup> lod ad rëjtt ree bizog lod ad rayü' tëët bajl. <sup>47</sup> Bal laagajc guiaalohl rusajb lüj loj dol, zagdxeli gulëën. Mazri zagdxé chu' con tiblodzi guiaalohl xanyabaa guial che con groplad guiaalohl gabijl lod yu' bajl ni ad yu't dxej yayü', <sup>48</sup> lod ad rëjtt ree bizog lod ad rayü' tëët bajl.

<sup>49</sup> 'Zi'c ru zëd guiyc guialraw, ziangajc ree bén rliladx naj sagdiaj reeman din gac reeman naya.

<sup>50</sup> 'Ni zagdxé naj zëd, per bal id zajcran naxij, ¿xhieza naag yayajcan naxij zatijb? Gol been zi'c rayal chitëë saquidi zi'c zëd ni ad rüjnt sirv, gol gubajnnë tëë lasa'di zagdxé.

## 10

*Rülüü Jesús xcwent guial rala' lasa'*  
(Mt. 19:1-12; Lc. 16:18)

<sup>1</sup> Chi baza Jesús Capernaum, dxel wejman niz Judea në stiblad ro' guiiw Jordán. Abi' lod za'man bido'p ree bejn zatijb, dxel guzuloh culüüman laa reeman zi'c goc xcostumbraman. <sup>2</sup> Yu' ree bënfarisew gubig lod za'man. Abi' par güün reeman laaman prueb, gunabdiidx reeman lojman rëb reeman:

—¿Zajc yala' xinguaaw lacheelix ya?

<sup>3</sup> Badxi'man laan rëbaman:

—¿Xhie gunabee Moisejs güündi?

<sup>4</sup> Abi' rëb reeman:

—Cwëjb Moisejs yala' xinguaaw lacheelix, per gudëödix gui'ch tia'man guial ma bala' reex.

<sup>5</sup> Dxel rëb Jesús:

—Rëb Moisejs gac zian guial nadidi. <sup>6</sup> Per guia'xchej chi gule'cchaaw Dios guidxliuj, “beenman xinguaaw con bëgunaa”. <sup>7</sup> “Zeel xinguaaw gusa'n xdad xniaax din guibannë lacheelix, <sup>8</sup> dxel grop reex ma gac zi'c tijbzi bejn.” Zianan zeel ad najtri reex tio'p, ma naj reex tijbzi. <sup>9</sup> Zeel, bënguidxliuj ad rayalt yala'man lasa' ni ma bachajg Dios.

<sup>10</sup> Chi bayu reeman lënü, gunabdiidx ree xbejnman lojman zatijb, xcwent ni gunee-man. <sup>11</sup> Abi' rëbaman loj reeman:

—Xin rala' lacheel, abi' rtia'x ben ren dolan cayüjnx,<sup>12</sup> ziangajc bal tijb béngunaa yala' lacheelaman abi' tia' xin ren laaman, dolan cayüjnman.

*Rüjnle' Jesús xindoo ree*

(Mt. 19:13-15; Lc. 18:15-17)

<sup>13</sup> Binë ree bejn xindoo ree lod za' Jesús din gudxiib yaaman guijc reex. Per ree xbejnman guzuloj cadilë reeman bën binë ree laa reex. <sup>14</sup> Chi baguiaa Jesús zian, balenman zeel rëbaman:

—Gol badëed mod gui't reex lon, ad bal rudxoondi. Din lod rniabee Dios naj par ree bën naj zi'c laa reex. <sup>15</sup> Diidxiczi rnin, bën ad rliladxt xguialrniabee Dios zi'c tijb xindoo, ad zile't chu'man lod rniabee Dios.

<sup>16</sup> Dxel gudiidx Jesús laa reex, badxiib yaaman guijc reex, beenle'man laa reex.

*Xcwent tijb xinrijcw*

(Mt. 19:16-30; Lc. 18:18-30)

<sup>17</sup> Chi ma gusnuu xnejz Jesús, ruxüün tijb xinguaaaw bidxinx abi' bazuxibix lojman, dxel gunabdiidix rëbix:

—Mextr za'c, ¿xhie rayal günan din ga'pan guialnaban tiblayaa con Dios?

<sup>18</sup> Badxi' Jesús laan rëbaman:

—¿Chexc zeel nal lon benza'c? Achut naj benza'c, tijbzi Dios. <sup>19</sup> Lüy rajc ree mandamient, “Ad gugüjtil bejn, ad sunël béngunaa ren, ad cwanl, ad cwëel xtiidix bejn ad gusquiee tëel, gojp respekt xdad xniaal.”

<sup>20</sup> Dxel rëbix loj Jesús:

—Mextr, gra ree ni guin cayünan diidz xindoon.

<sup>21</sup> Baguiaa Jesús lojx, bayaman laax, rëbaman:

—Per yu' zatijb ni riaadx güünl: bigto' gra ni rajpil, badëed milia guin loj ree bënprob, zian gapil guialnaza'c xanyabaa dxel guidnalil naj majsi xhietëez saquil.

<sup>22</sup> Chi biguiejn xin guin zian, ad nixt guyu luxdoox abi' dád yu'nayax ziax guial dád xinrijcwan.

<sup>23</sup> Dxel baguiaa Jesús loj gra reeman, abi' rëbaman loj ree xbejnman:

—¡Dád nawëeg naj chu' benrijcw loj xguialrniabee Dios!

<sup>24</sup> Dád badxa loj ree xbejnman ni rëbaman. Per rëbaman loj reeman zatijb:

—Xi'n, ¡bën yu'guijc mazri ni rajpaman, dád nawëeg naj chu'man loj xguialrniabee Dios! <sup>25</sup> Adli nawëegt téd tijb camell xan gagux guial chu' tijb benrijcw loj xguialrniabee Dios.

<sup>26</sup> Chi biguien reeman diidix guin ree, mazri badxa loj reeman, dxel rniabddiidx loj lasa' reeman, rëb reeman:

—¿Chu zajc laa loj xcasti Dios?

<sup>27</sup> Baguiaa Jesús loj reeman, abi' rëbaman:

—Par bejn nawëëgan, per par Dios ad nawëëgtan din par Dios graczan zile' gac.

<sup>28</sup> Dxel guzuloj rëb Bëd loj Jesús:

—Dunujn basa'nan graczi ni raya'pan persi zudnaalan lüy.

<sup>29</sup> Badxi' Jesús rëbaman:

—Diidxiczi ganin lëjt, chutëez bën rusa'n lidx, o bijch, o bizan, o xdad xniaa, o lacheel o xi'n, o guidxliuj ree por naj në por xtiidixza'c Dios, <sup>30</sup> loj guidxliuj guie tia'man tibgayuu volt mazri guial loj ni basa'nman, bal najn lidxaman, bijchaman, bizanman, xniaaman, xi'nman, në xguidxliujman, majsi guidib wazagdiaj, abi' guidxin dxej gapaman guialnaban tiblayaa con Dios. <sup>31</sup> Per dád zien ree bën naj bën yaløj yan, gac reeman bën bigra, guiáad ree bën naj bën bigra yan, gac reeman bën yaløj.

*Rugojn Jesús zatijb guial guiëtaman*

(Mt. 20:17-19; Lc. 18:31-34)

<sup>32</sup> Chi zè reeman Jerusalén, ned Jesús loj ree xbejnman, abi' dád radxaloj reeman guial zëman Jerusalén, guiáad ree bën nallaaman rdxeb reeman. Dxel gurejdx guidxiptio'p ree xbejnman lood ren, zianz guzuloj rëbaman ni sacaman:

<sup>33</sup> —Rëbaman loj reeman: Lëjt ragbee guial ziyo' ree Jerusalén, abi' naj najn Bén guxhaal Dios, yayü reeman naj loj ree bixhioz rniabee ree bixhioz, në loj ree mextr rajc ley. Abi' nabee reeman guiëtan, yayü tää reeman naj loj ree bën ad najt bën Israel.

<sup>34</sup> Guze' reeman naj, gucojp xhiejn reeman lon, quin reeman gugüjt tää reeman naj, per yayon dxej yabanan.

*Ni gunab ree Jacob con Waj*

*(Mt. 20:20-28)*

<sup>35</sup> Dxel Jacob con Waj xi'n Zebedeo, gubig reeman loj Jesús rëb reeman:

—Mextr, rayënan güünl tijb favor ni yanaaban lojl.

<sup>36</sup> Abi' gunabdiidxaman rëbaman:

—¿Xhie rëndi günan?

<sup>37</sup> Badxi' reeman laan rëb reeman:

—Rayënan guial chi ma canabeel, yadxu'n cwë'l, tijb dunujn yadxu' xladbeel, zatijb dunujn yadxu' xladruvejsil.

<sup>38</sup> Badxi'man laan rëbaman:

—Ni'quid ragbeetidi xhie ni guin rniabidi. ¿Wen zajc sagdiajdi zi'c gazaagdiajn ya? ¿Zajc guiëtidi zi'c guiëtan ya?

<sup>39</sup> Badxi' reeman laan rëb reeman:

—Zayajcan.

Dxel rëb Jesús:

—Waliquidi sagdiajdi zi'c naj guiët täädi zi'c naj, <sup>40</sup> per guial cwedi da ladbeen o da ladruvejsan, ad najt rayal gune laan, din ma najn par ree bën rayal laan.

<sup>41</sup> Chi biguien zachii xbejn Jesús ni rëb reeman, dád balen reeman Jacob con Waj, <sup>42</sup> per gurejdx Jesús laa reeman rëbaman:

—Lëjt ragbee guial ree bën rniabee loj guidxliuj guie, rniabee reeman bejn ree zi'ctzi rën reeman, guiáad ree bën zojbloj rüjnnë reeman bejn ree zi'ctzi rën reeman por guialrniabee ni rajp reeman. <sup>43</sup> Per con lëjt ad rayalt gac zian. Din bal chu rën gac bën rniabee lojdi, rayal güünman sirv lojdi, <sup>44</sup> guiáad bën rën gac bën zojbloj, rayal güünman sirv loj gradi zi'c bën nado'. <sup>45</sup> Din ni'qui naj najn Bén guxhaal Dios, ad zialtan loj guidxliuj par güün ree bejn sirv lon, zialan din günan laa reeman sirv, abi' con da guialnabanan gaguixan por xtol zien ree bénguidxliuj.

*Rayajc guiaaloj tijb xin ad ranit loj la Bartimeo*

*(Mt. 20:29-34; Lc. 18:35-43)*

<sup>46</sup> Bidxin reeman guiedx Jericó, abi' chi ma cayrii Jesús luguiedx guin, con ree xbejnman në ree benzien. Tijb xin ad ranit loj lax Bartimeo, xi'n bën la Timeo, zojbix cwë' nejz rniabix carda. <sup>47</sup> Chi biguiejnx cadëd Jesús bën Nazaret niz yagaj, guzuloj cabidxa'x rëbix:

—¡Jesús, xdiaa Davi, baya naj!

<sup>48</sup> Dád zien ree bejn ridilë laax din yacwëöz ro'x. Per mazri rejs rbidxa'x rëbix:

—¡Xdiaa Davi, baya naj!

<sup>49</sup> Dxel guzudxe Jesús rëbaman:

—Gol gurejdxix.

Dxel gurejdx reeman laax, rëb reeman:

—Bagu' luxdool, bisu, lüj caneeman.

<sup>50</sup> Dxel laa badxe'bi gajc xin guin lajd najcwix luya, xt gutiajsix guzulix bibiguix loj Jesús. <sup>51</sup> Gunabdiidx Jesús lojx rëbaman:

—¿Xhie rënl günan por lüj?

Badxi'xan rëbix:

—Mextr, rënan yani lon.

<sup>52</sup> Dxel rëb Jesús:

—Ma zajc yaguiajl, ma bayajquil guial bililadxil naj.

Loj hor zii gajc bani lojx dxel zinalix Jesús niz yagaj.

## 11

### *Ru Jesús Jerusalén*

(Mt. 21:1-11; Lc. 19:28-40; Jn. 12 :12-19)

<sup>1</sup> Chi ma zë reeman gajxh Jerusalén, niz lod riga' guiedx Betfagé con Betania, gajxh guia' la Olivos, dxel guxhaal Jesús tio'p ree xbejnman, <sup>2</sup> rëbaman:

—Gol chej guiedxdo riga' delant guin. Chi guidxindi guidxaaglojdi tijb burquie'n, caduub achut wabib laab. Gol guxhiequib gol tanëb. <sup>3</sup> Abi' bal chu guiniabdiidx lojdi: “Chexc zeel caxhiequidi laab”, gol güjdx: “Dad Jesús cayaadx laab, doo yaxhaal gajcaman laab.”

<sup>4</sup> Dxel wej reeman, bidxaagloj gajc reeman burdo guin, caduub runejz ro' tijb port, abi' guxhiec reeman laab.

<sup>5</sup> Bén baguiaa ree zian gunabdiidx reeman loj reeman, rëb reeman:

—¿Xhie rüjndi? ¿Chexc zeel caxhiequidi burdo guin?

<sup>6</sup> Badxi' reeman laan zi'c rëb Jesús, abi' cwëjb ree bén guin zinë reeman laab.

<sup>7</sup> Bidxinnë reeman laab lojman, badxiib xab reeman xijchib, persi gudxibaman laab.

<sup>8</sup> Zien ree bejn riguijxh xab niz lod rdëdaman, yu' tää reeman rutüüg ziji persi rguijxh reeman laan niz lod rdëdaman.

<sup>9</sup> Abi' zi'c ree bén ned, në ree bén nal rbixdiaj reeman, rëb reeman:

—¡Gagnëman dunuj ree yan! ¡Nagle' bén zëed por Dios! <sup>10</sup> ¡Nagle' bén zëed nabee zi'c dux béngulal ree rey Davi! ¡Quixtëe dux Dad ree Dios Bén yu' xanyabaa!

<sup>11</sup> Zian guyu Jesús Jerusalén abi' guyuman lën yadooro' Jerusalén. Chi gulox baguiaaman graczi, dxel zinë guidxiptio'p ree xbejnman Betania guial ma gudxe.

### *Bazaal Jesús diidx guijc yag higo*

(Mt. 21:18-19)

<sup>12</sup> Chi bareguiaa, barii reeman Betania. Dxel guzuloj calaan Jesús. <sup>13</sup> Zijtri baguiaaman tijb yag higo ca ree balag lojn. Abi' wejman biquiaaman bal ca higo lojn. Per achet bidxaaglojman, balagzi ree ca lojn din ad xtiamptanan. <sup>14</sup> Dxel rëbaman loj yag higo guin:

—¡Ad yu'tri dxej gaw bejn ninejxh tia lojl!

Abi' biguiejn ree xbejnman ni rëbaman.

### *Rabëe Jesús bén ruto' ree ro' yadooro' Jerusalén*

(Mt. 21:12-17; Lc. 19:45-48; Jn. 2:13-22)

<sup>15</sup> Chi bidxin reeman Jerusalén. Dxel guyu Jesús ro' yadooro' Jerusalén guin, abi' guzuloj caybëeman bén cuto' ree në ree bén cazii. Barexguiataman xmex ree bén ruchaa milia con xyagxhil ree bén ruto' ree palom, <sup>16</sup> ad rtiëjbtaman xhie chu'në ree bejn ro' yadoo guin. <sup>17</sup> Abi' guzuloj culüüman laa reeman, rëbaman:

—Loj xtiidx Dios rëb: “Lidxan grii laj yu lod rbejdx rniab bejn Dios.” Per lëjt nüjndan zi'c lidx ree xingubaan.

<sup>18</sup> Bixhioz rniabee ree bixhioz con ree mextr rajc ley, chi biguiejn reeman ni rëb Jesús, guzuloj raguiil reeman mod xhienaag gugüjt reeman Jesús, guial rdxeb reeman laaman din gra bejn radxalaj ni rulüüman. <sup>19</sup> Chi ma caxhin, bazané ree xbejn Jesús Jerusalén.

### *Tijb yag higo ni gubidx*

(Mt. 21:20-22)

<sup>20</sup> Chi bareguiaa rsildoo, badëd reeman niz lod zojb yag higo guin, abi' baguiaa reeman ma gubidx diizd liujn. <sup>21</sup> Dxel basaaladx Bëd ni rëb Jesús, abi' rëbaman lojman:

—Mextr; jbaguiaa yag higo ni bazaalil diidx guijc ma gubidxan!

<sup>22</sup> Badxi' Jesúsán rëbaman:

—Gol bililadx Dios. <sup>23</sup> Din diidxliczi ganin, bal chu guiëb loj guia' guin: “Bisüd guie biajb loj nijsdoo”, bal id yu' nawëëg luxdooman, bal riladxaman, gac ni guneeman. Zian gacan. <sup>24</sup> Zeel rnin lojdi, gra ni rniabidi loj Dios, gol bililadx guial ma cwa'di laan, abi' zaca'dan. <sup>25</sup> Guiáad chi ribejdx rniabidi Dios, bal yu' bën rdxe'chidi, gol beenman perdon din ziangajc xDadidi bën yu' xanyabaa güünman perdon xtolidi. <sup>26</sup> Din bal id züjndi perdon, ziangajc xDadidi Bën yu' xanyabaa ad züjntaman perdon xtolidi.

### *Xgualrniabee Jesús*

*(Mt. 21:23-27; Lc. 20:1-8)*

<sup>27</sup> Chi badxin reeman Jerusalén. Chi caza Jesús niz lën yadooro' Jerusalén guin, dxel gubig bixhioz rniabee ree bixhioz con ree mextr rajc ley con ree xguxtis ree bën Israel, <sup>28</sup> gunabdiidx reeman loj Jesús, rëb reeman:

—¿Xhie guialrniabee rajpil zeel rüjnl ni guin ree? ¿Chu banee guialrniabee lojl güünl zian?

<sup>29</sup> Badxi' Jesúsán rëbaman:

—Ziangajc naj yu' ni ganabdiidxan lojdi, bal yadxi'dan dxel ganin chu banee guialrniabee günan ni guin ree. <sup>30</sup> ¿Chu guxhaal Waj bidgaroobnijsaman bejn ree? ¿Dios ya o bénguidxliuj? Gol badxi'n.

<sup>31</sup> Dxel guzuloj rëb loj lasa' reeman:

—Bal yaguie'ch ree, Dios guxhaal laaman, zanaman: “¿Chexquiza zeel ad bililadxtidi laaman?” <sup>32</sup> Ad zajc tëët yaguie'ch ree, bénguidxliuj guxhaal laaman.

Rëb reeman zian guial rdxeb reeman bejn ree, din graczi reeman riladx guial gojc Waj tijb bën badëë xtiidx Dios loj ree bejn, bën wali gunee xtiidx Dios. <sup>33</sup> Abi' badxi' reeman laan rëb reeman:

—Ad rayagbeetan.

Zeel rëb Jesús loj reeman:

—Ni'qui naj ad zanitan lojdi chu banee guialrniabee günan ni guin ree.

## 12

### *Xcwent ree mojs guijdx*

*(Mt. 21:33-46; Lc. 20:9-19)*

<sup>1</sup> Dxel guzuloj caneenë Jesús laa reeman con ganax ree cwent, rëbaman:

—Tijb bejn guxübinman uv loj xguiniaaman, dxel beenman gurajl gadëd ro'n, beenchaaw tëëman tijb luar lod grii xnijs uv guin, abi' beenman tijb yu ya da't lod guiya'p guiniaa guin.

'Zianz badëëman laan garol loj ree bën güün laan dxiin, briitaman zëman zijt. <sup>2</sup> Chi bidxin dxej yala' reeman uv guin, guxhaal tijb xmojsaman din chigxiiman ni rayalaman. <sup>3</sup> Per ree bën rüjn dxiin loj guiniaa guin gunaaz reeman laaman, gudijn reeman laaman abi' badxi' reeman laaman zezi. <sup>4</sup> Dxel guxhaal bën naj xguidxliuj laan zatijb xmojsaman, per ziangajc, bacaaguiaj reeman laaman, gula' reeman guijcaman abi' guneeguijdx reeman laaman. <sup>5</sup> Guxhaalaman ben ren, per bagüjt reeman laaman. Zien ree ben guxhaalaman, yu' reeman gudijn reeman yu' tëë reeman bagüjt reeman.

<sup>6</sup> 'Dxel bën naj xguidxliuj laan stijbzi xi'ngaanman ryaadx guixhiaalaman, xin rën da'taman. Dxel guxhaalaman laax guial gunaladxaman: “Zajp reeman da xi'nan respejt.” <sup>7</sup> Per ree bën guin, rëb loj lasa' reeman: “Xin guin naj xin yaya'nnë guidxliuj guin, yagüjt reex din gacan du xieen ree.” <sup>8</sup> Dxel gunaaz reeman laax, bagüjt reeman laax abi' babëë reeman laax loj guidxliuj guin.



<sup>9</sup> Dxel gunabdiidx Jesús loj ree bén caneenëman, rëbaman:

—Yan, ¿xhie naladxidi güün bén naj xguidxliuj laan? Zi'taman din gugüjtaman bén guin ree, dxel gudëëman guidxliuj guin loj ree ben ren.

<sup>10</sup> ¿Nid wayoolidi loj xtiidx Dios ya?, lod rëb:

Guiaj ni gulëëgo'n ree bén rüjn yu,  
laan goc ni mazri been sirv gojcnë yu guin.

<sup>11</sup> Zian been dux Dad ree Dios, zeel radxaduloj ree.

<sup>12</sup> Chi biguiejn ree bén rniabee guin ni guneë Jesús, guyën reeman niniaaz reeman laaman guial gogbee reeman laa reeman cuza'taman, per guial rdxeb reeman bejn ree, basa'n reeman laaman, ziat reeman.

### *Xcwent Impuest*

*(Mt. 22:15-22; Lc. 20:20-26)*

<sup>13</sup> Guxhaal reeman tio'p choon ree béntarisew në tio'p choon ree xbejn Herodes lod za' Jesús, din yaguiil reeman mod guinieë Jesús diidx ni gudxiib reeman guijc din gac cwe'c reeman xguialquiaman. <sup>14</sup> Abi' rëb reeman:

—Mextr, dunujn rayagbee guial lüj rnieë diidxli ad ridxga' tëëtli chu naj bejn. Din par lüj tiblojzi naj bejn, abi' walil rulüül guial xhienaag rën Dios guiban bejn. Zeel ranabdiidxan lojl: ¿Zagdxen ya radijxan impuest loj César o ad zagdxetan? ¿Zadijxanan ya o ad zadijxtanan?

<sup>15</sup> Per gogbee gajc Jesús guial wed rüjnz reeman, zeel rëbaman:

—¿Chexc zeel rüjndi naj prueb? Gol tanë cintabl din guguianan.

<sup>16</sup> Dxel badëëd reeman cintabl guin lojman, abi' rëbaman:

—¿Chu loj ca lojn, chu tëë laj ca lojn?

Badxi' reeman laan rëb reeman:

—Loj César ca lojn në lajman.

<sup>17</sup> Dxel rëb Jesús loj reeman:

—Gol badëëcliza loj César ni naj xieen César, guiáad loj Dios gol badëëd ni naj xieen Dios.

Dád badxa loj reeman ni rëbaman.

### *Xcwent guial yaban ree bengüt*

*(Mt. 22:23-33; Lc. 20:27-40)*

<sup>18</sup> Tio'p choon ree bénsaducew bignaj Jesús, laa reeman ad rliladxt guial yaban ree bengüt. Zeel gunabdiidx reeman loj Jesús rëb reeman:

<sup>19</sup> —Mextr, loj xley Moisejs rëb guial bal guiët tijb xinguaaaw abi' achut xi'nx guyu con lacheelix, bijch xin güt guin guixhlianë béngunaa bizëjb guin din chu' xi'n reex zi'c gulüü xi'n xingüt guinan. <sup>20</sup> Guyu tijb famil lod goc reex gajdx bijch. Baxhliaa xin yaloj guin, per güjtix abi' ad guyut xi'n reex con lacheelix. <sup>21</sup> Dxel bijch barojpax baxhlianë béngunaa guin, per güjt gajquix, ad guyu gajct xi'n reex. Abi' ziangajc guzajc xin bayon guin, <sup>22</sup> abi' zianz baxhlianëman guigajdx reex, zianz bara reex güjt achut xi'n reex guyu con laaman. Ni bigra tëë në béngunaa guin güjt. <sup>23</sup> Yan, chi yaban ree bengüt, loj guigajdx reex, ¿chu loj gra reex gac xbéngunaa laaman guial gra reex baxhlianë laaman?

<sup>24</sup> Badxi' Jesús reeman:

—Ad laat naj xgab rüjndi guial ad nünbeetidi xtiidx Dios ad ragbee tëëtidi xhienaag naj xguialrniabeeman. <sup>25</sup> Din chi yaban ree bengüt, ad zuxhliaatri reeman, ad zudëë tëëtri xi'n reeman guixhliaa, ma gac reeman zi'c ree anjl yu' xanyabaa. <sup>26</sup> Abi' xcwent ni yaban ree bengüt, ¿nid wayoolidi loj xlibr Moisejs ya, lod rëb guial baguiaaman yag ni cayè'c? Yagaj biguien cha' Dios, rëbaman lojman: “Naj naj xDios Abraham, xDios Isaac në xDios Jacob.” <sup>27</sup> Din Dios ad najtaman xDios ree bengüt, najman xDios ree bén naban. Zeel ad laat naj xgab rüjndi.

*Mandamient mazri zojbloj**(Mt. 22:34-40)*

<sup>28</sup> Chi biguiejn tijb mextr rajc ley badxi' Jesús xtiidx reeman zagdxe guial bacaagdia-jgaman diidx ni cayü reeman, gubigaman lojman, abi' gunabdiidxaman rëbaman:

—¿Con mandamientan mazri zojbloj loj gra ree mandamient?

<sup>29</sup> Badxi'man laan rëbaman:

—Mandamient mazri zojbloj rëban: “Gol bacaagdiajg, bén Israel, dux Dad ree Dios, tijbzi laaman naj Dios. <sup>30</sup> Guyën xDadil Dios guidiblagaa guidib guiyc guidib ladxil.” Laan naj mandamient mazri zojbloj. <sup>31</sup> Mandamient rarojp, rëban: “Guyën ree ben ren zi'c rën lüj gajc.” Achet mandamient mazri zojbloj guial loj grop ree mandamient guie.

<sup>32</sup> Dxel rëb mextr guin loj Jesús:

—Zagdxequi guneel, Mextr. Waliquil tijbzi Dios yu', achutri ben ren yu'. <sup>33</sup> Abi' guidib guiyc guidib ladx bejn guiënman laaman guidiblagaa, guiën tëëman ben ren ree zi'c rën laagajcaman. Laan naj ni mazri zojbloj guial loj gra gon ni rudëed bejn loj Dios.

<sup>34</sup> Chi biguien Jesús badxi' mextr guinan zagdxe, rëbaman:

—Ad zijtt za'l par chu'l loj xguialrniabee Dios.

Dxel achutri bayax xhie niniabdiidx lojman.

*Chu loj xdiaa za Cristo**(Mt. 22:41-46; Lc. 20:41-44)*

<sup>35</sup> Chi culüü Jesús bejn ree lën yadooro' Jerusalén, gunabdiidxaman loj reeman rëbaman:

—¿Chexc zeel rëb ree mextr rajc ley guial za Cristo loj xdiaa rey Davi? <sup>36</sup> Awa Davi guin gajc gunee por xSprijt Dios, rëbaman:

Dios rëb loj da Dadan:

“Gurej da ladbeen,

xt gabecan xin rdxe'ch ree lüj guia'l.”

<sup>37</sup> Yan bal xi'n Davi naj Cristo, ¿chexquiza zeel rëb Davi guin lojman Dad?

Graczi ree bén riga' lën yadoo guin dád nix yu' luxdoo reeman rucaagdiajg reeman xtiidxaman.

*Ni rüjn ree mextr rajc ley**(Mt. 23:1-36; Lc. 11:37-54; 20: 45-47)*

<sup>38</sup> Chi culüü Jesús bejn ree, rëbaman loj reeman:

—Gol gojp cudad con ree mextr rajc ley, din ruladx reeman sa reeman gacw reeman lajd zagdxe, ruladx tëë reeman gugajpdioz ree bejn laa reeman con respejt niz lunejz.

<sup>39</sup> Abi' lën ree yadoo ruladx reeman cwe reeman lod rbej ree bén zojbloj, ziangajc rüjn reeman lod ritaw reeman. <sup>40</sup> Raca' tëë reeman lidx ree béngunaa bizëjb, abi' din guiëb ree bejn guial benza'c naj reeman, dád xchej rbejdx rniab reeman Dios. Per laa reeman mazri casti narooob yalay reeman.

*Gon badëed tijb béngunaa bizëjb**(Lc. 21:1-4)*

<sup>41</sup> Tijb dxej zojb Jesús lën yadooro' Jerusalén niz lod za' alcancia ni ru gon, abi' ruguiaaman rgu' ree bejn milia lën alcancia guin, në zien ree benrijcw rgu' zro' milia.

<sup>42</sup> Dxel bidxin tijb béngunaa bizëjb prob, badxe'man tio'p zintabldoo ni lasajc ta'nzi.

<sup>43</sup> Abi' gurejdx Jesús bén naj ree xbejnman, rëbaman:

—Diidxli rnin lojdi guial bén bizëjb prob guin mazri lasajc gon badxe'man guial loj gon badxe' gra ree bén guin. <sup>44</sup> Din graczi reeman rudxe' ni rüjn laa reeman sobr, per laaman majsi najman bénprob, badxe'man graczi ni rajpaman par guibannëman.

## 13

### *Rëb Jesús guial yaze'n yadooro' Jerusalén*

(Mt. 24:1-2; Lc. 21:5-6)

<sup>1</sup> Chi barii Jesús lën yadooro' Jerusalén, rëb tijb ree xbejnman lojman:

—Mextr, jbaguiaa xi nix naj ree guiaj guin nix tëë naj ree yu guin!

<sup>2</sup> Badxi' Jesúsán rëbaman:

—Zi'c ruguiaal yu narooob guin ree, zadxin dxej, ni'czi tijb guiaj guin ad zaya'nt guijc stijban, gran yaze'n.

### *Ni gac chi gad guidxliuj nit*

(Mt. 24:3-28; Lc. 21:7-24; 17:22-24)

<sup>3</sup> Chi zojb Jesús ruguia' la Olivos, ni naj niz lod nudxi' loj yadooro' Jerusalén. Dxel gubig Bëd lojman con Jacob, Waj con Andrejs, laaz reeman za'në laaman yagaj, abi' gunabdiidx reeman lojman, rëb reeman:

<sup>4</sup> —Guna, ¿goc gac zian? ¿Xhie sen gac chi ma zidyob gac zian?

<sup>5</sup> Badxi' Jesús laan rëbaman:

—Gol gojp cudad chitëë chu gusquiee lëjt. <sup>6</sup> Din zien ree bën gui't guiëb reeman guial por naj zëëd reeman, guiëb tëë reeman: “Naj naj Cristo”, abi' gusquiee reeman zien bejn.

<sup>7</sup> Per lëjt chi guiguiejndi cayajc wadijl o zëëb diidx gac wadijl, ad guidxebidi; din najczi gac zian, per ad por laatan ma bidxin dxej nit guidxliuj. <sup>8</sup> Din til nacion con stijb nacion, til tëë bën rajp guialrniabee con stijb bën rajp guialrniabee, gui't tëë ree xudoxh në gubijn niz ni niz guie. Zian gac chi ma suloj ree guialzi ni naj gac.

<sup>9</sup> 'Gol gojp cudad, din zadxin dxej yayü ree bejn lëjt loj ree guxtis, abi' quin reeman lëjt lën ree yadoo. Chinë reeman lëjt loj ree gobernador në loj ree rey guial najdi da bejnan, zian gac din chile' güdi da diidxan loj reeman. <sup>10</sup> Per yaloxgaj rüjn naguiejn guire'ch xtiidxza'c Dios loj gra ree nacion, dxelri nit guidxliuj. <sup>11</sup> Chi chinë reeman lëjt loj ree guxtis, ad bal chu'di xgab, ad bal güün tëëdi xgab xhie guiëbidi loj reeman. Gol gunee diidx gunee Dios lëjt loj hor guin. Din ad lëjtta guiniee, xSprijt Diosan guiniee. <sup>12</sup> Abi' guidxin dxej yayü bejn laagajc bijchaman din guiëtix, ziangajc ree bën naj dad yayü laagajc xi'n reeman, abi' ree bejn yayü xdad xniaa reeman par guiët reeman. <sup>13</sup> Gra bénguidxliuj guidxe'ch lëjt guial najdi da bejnan, per bën sudxi'ch loj ni rliladxaman naj xt dxej chigra guibanman, laaman yayal xanyabaa.

<sup>14</sup> 'Chi guguaadi zojb tijb ni dxuudx lën yadooro' Jerusalén, zi'c bacaa Daniel, bën badëë xtiidx Dios loj ree bejn diizd gulal (bën gool ree gui'ch guie, gol bignia'n), guial bën zojb ree niz Judea chigxüün reeman niz dajn. <sup>15</sup> Guiáad bën yë'p guijc yu lidx dxejzii, ad yayu lënu lidxaman tia' xhie xieenman. <sup>16</sup> Guiáad bën za' dajn, ad yajejc lidxaman chigxii xabaman. <sup>17</sup> jProbza ree béngunaa nüü xi'n o bën ca' ree xindobëz lën ree dxej zii! <sup>18</sup> Gol gurejdx gunab Dios chitëë yayal gac zian tiamp nayaag, <sup>19</sup> din dád guialziro' chu' dxejzii ree, zi'c ad wayajctczi diizd chi beenchaaw Dios guidxliuj, ad yu' tëëtri dxej gac zian. <sup>20</sup> Bal id zasdop Dios dxej zii ree, ni'czi tijb bejn ad zalaat, per gusdopaman laa reen, por ree bën rënman, bën gulejman par laaman.

<sup>21</sup> 'Bal chu na lojdi: “Gol baguiaa, laa Cristo za' guie”, o “laaman za' ni”, ad bal chililadxidi. <sup>22</sup> Din gui't zien ree bejn, na reeman guial laa reeman naj Cristo o na reeman laa reeman naj bën rudëë xtiidx Dios loj ree bejn, abi' güün reeman milagr ree në ree graløj ni yadxaløj ree bejn, din gusquiee reeman laa reeman, abi' bal zile'n xt zajc në ree bën gulej Dios gusquiee reeman. <sup>23</sup> Zeel gol gojp cudad, ma bagojnxgajn lëjt gra ni gac.

### *Gui't Bén guxhaal Dios zatijb*

(Mt. 24:29-35, 42-44; Lc. 21:25-36)

<sup>24</sup> 'Per lèn ree dxej ni ma gudöd gra ree guialzi guin, zacajy loj gubijdx abi' ad zusnitri bëëw, <sup>25</sup> zayajb ree bajl yu' xanyabaa guiáad gra ree ni yu' xanyabaa guiniib reen. <sup>26</sup> Dxel guguaa ree bejn Bén guxhaal Dios rdiinman bacha' zëëdaman loj zaj con xguialrniabee narooaman. <sup>27</sup> Abi' guixhiaal ree xianjlanan guidiblagaa guidxliuj din guchajg reeman lasa' ree bén ma naj par Dios.

<sup>28</sup> 'Gol badxe'guijc ni ganin lëjt: Chi ma naquie'n xidx yag higo abi' ma caydxib ree xbalagan, lëjt ragbee guial ma zidyob tiamp nalaa. <sup>29</sup> Ziangajc chi guguaadi ma cayajc ree ni guin, gol gogbee guial ma zidyob dxej gac zi'c ma rnin. <sup>30</sup> Diidxli rnin lëjt guial gra ree ni guin gac chi gad ree bén naban lèn ree dxej guie guiët. <sup>31</sup> Guidxliuj në xanyabaa zanijt reen, per da diidxan ad zadëdt gacan cumplid.

<sup>32</sup> 'Per achut ragbee xhie dxejn xhie tëë horan gac ree ni guin, ni'qui ree anjl yu' xanyabaa, ni'qui Xi'n Dios ad ragbeet, tijbzi dux Dad ree Dios ragbee.

<sup>33</sup> 'Zeel gol gojp cudad, gol guzujsin tëë, gol gurejdx gunab Dios din ad ragbeetidi goc gac zian. <sup>34</sup> Ni guin ree naj zi'c chi ririi tijb bejn rejman zijt. Abi' chi gadaman grii rudëëman dxiin loj tijbgaj ree xmojsaman, rniabee tëëman susin bén rajp ro' port. <sup>35</sup> Yan ziangajc lëjt gol guzujsin, din ad ragbeetidi goc o xhie horan guialan bal chi ma ribej guiaal ya, o garol guiaal, o chi ma rbidxa' guid, o rsildoo. <sup>36</sup> Zeel gol guzusin din bal dxejczy guialan ad guidxaaglojn lëjt ad cayüjntidi zi'c rayal. <sup>37</sup> Abi' ni canin lojdi, loj gradi caninan: Gol guzujsin.

## 14

### *Baya'n reeman diidx xhienaag guiniaaz Jesús* (Mt. 26:1-5; Lc. 22:1-2; Jn.11 :45-53)

<sup>1</sup> Zatio'p dxej riaadx gal lanij pascw, lanij raw ree bejn guidxtil ni ad yu't levadur. Abi' ree bixhioz rniabee ree bixhioz con ree mext rajc ley, raguiil reeman mod xhienaag gusquiee reeman Jesús, din guiniaaz reeman laaman gugüjt reeman laaman. <sup>2</sup> Per rëb reeman:

—Ad zaguieent ree zian loj ree dxej lanij guin, chitëë gac naquie'!

### *Baroob tijb béngunaa perfum guijc Jesús* (Mt. 26:6-13; Jn.12 :1-8)

<sup>3</sup> Dxel chi za' Jesús luguiedx Betania lidx Simón, bén gunee reeman leproso, abi' chi zojbaman xan mex cayawaman, bidxin tijb béngunaa ca'man lumejt yu'n perfum ni lasajc wayëjx guial gojcchaawnën ganax nardo, zianz guxhalaman ro' lumejt guin persi baroobaman perfum guin guijc Jesús. <sup>4</sup> Abi' yu' ree bén za' yagaj bidxe'ch, rëb loj lasa' reeman:

—¿Chexc zeel guxie'man perfum guin? <sup>5</sup> Awa zajc nido'n choon gayuu denario din nüjnan yudar bénprob ree.

Abi' caneeguijdx reeman béngunaa guin.

<sup>6</sup> Per rëb Jesús loj reeman:

—Gol basa'nman. ¿Chexc zeel ruslendi laaman? Zagdx naj ni beenman con naj. <sup>7</sup> Zianczi sunëdi bénprob ree, abi' zajc güündi laa reeman yudar chi guiëndi, sa'n naj ad ziantczi sunëdi naj. <sup>8</sup> Béngunaa guie beenman ni golguzujman, ma beenchaawxgajman da cuerpan par chi guidxin dxej guiguie'chan. <sup>9</sup> Diidxliczi rnin lëjt, guial guidib loj guidxliuj bantëëz guin guiniee reeman xtiidxza'c Dios, zü ree bejn diidx ni been béngunaa guin con naj din gusaaladx reeman laaman.

### *Baguiil Judas mod xhienaag yayüman Jesús* (Mt. 26:14-16; Lc. 22:3-6)

<sup>10</sup> Judas Iscariote, tijb ree xbejn Jesús, wejman bigneenëman bixhioz rniabee ree bixhioz din yayüman Jesús loj reeman. <sup>11</sup> Chi biguiejn ree bixhioz guin zian, dád babaa

reeman. Abi' rëb reeman gudëed reeman milia lojman. Dxel guzuloj raguiilaman mod xhienaag yayüman Jesús.

*Gudawnë ree xbejn Jesús xche*

*(Mt. 26:17-29; Lc. 22:7-23; Jn.13 :21-30; 1Co.11 :23-26)*

<sup>12</sup> Dxej ni guzuloj lanij raw ree bën Israel guidxtil ni ad yu't levadur, chi rugüjt reeman tijb xiildoo par lanij pascw, gunabdiidx ree xbejn Jesús lojman, rëb reeman:

—¿Ban guin rënl yuguieenan ni yadaaw ree guxhin pascw?

<sup>13</sup> Dxel guxhaal Jesús tio'p ree xbejnman, rëbaman:

—Gol chej Jerusalén. Ni guguaiaadi tijb xinguaaw ca' re yu' nijs. Gol chinalix. <sup>14</sup> Abi' lod yayux, gol güjdx loj bën naj lidxan: “Na mextr: ¿Ban lënü gawnë ree xbejnman yan guxhin pascw?” <sup>15</sup> Dxel gulüüman lëjt tijb lënü naroo ni rarojp cwaa, ma najcchaaw lënü guin. Yagaj gol been ni yadaaw ree xche.

<sup>16</sup> Dxel brii ree xbejnman wej reeman luguiedx guin, abi' bidxaagloj gajc reeman zi'cgajczi rëbaman, zianz been reeman ni gaw reeman guxhin pascw.

<sup>17</sup> Chi gure guiaal, bidxin Jesús con guidxiptio'p ree xbejnman. <sup>18</sup> Dxel chi zojb reeman xan mex cayaw reeman, rëb Jesús loj reeman:

—Diidxliczi rnin lojdi guial tijb lëjt, bën cayawnë naj, laaman yayü naj.

<sup>19</sup> Dád guyunaya reeman, abi' guzuloj canabdiidx tijb gaj reeman, rëb reeman lojman:

—¿Najn ya?

Abi' rëb stijbaman:

—¿Wa najn ya?

<sup>20</sup> Badxi'man laan rëbaman:

—Loj guidxiptio'pιδi, tijb lëjtan, bën cugajdx xguiadxttil loj gajc pliajt lod cugajdx da guidxtilan, laaman. <sup>21</sup> Walican guial Bén guxhaal Dios naj sacaman zi'c ca loj xtiidx Dios. Per, i'prob bën yayü laaman! Zagdxeli naj par laaman ad niutaman loj guidxliuj

<sup>22</sup> La'tgaj cayaw reeman, cwa' Jesús guidxtil abi' badëëman quixtëe loj Dios, dxel gula'man laan badëëman loj reeman, rëbaman:

—Gol gudaw guidxtil guie, laan naj da cuerpan.

<sup>23</sup> Dxel cwa'man tijb cojp yu' vin, chi gulox badëëman quixtëe loj Dios, badëëman cojp guin loj reeman, abi' gra reeman gu' vin yu' lojn. <sup>24</sup> Zianz rëbaman loj reeman:

—Vin guie naj da rejnan ni gaxhie'n chi guiëtan por zien ree bénguidxliuj, din guixal tijb nejz cüb xhienaag gap ree bejn perdon loj Dios. <sup>25</sup> Naj rni lëjt, ad yu'tri dxej guië'n vin rajcchaawnë uv, xt dxej ni guië'n vin cüb lod rniabee Dios.

*Rëb Jesús guial guiëb Bëd ad nünbeetaman laaman*

*(Mt. 26:30-35; Lc. 22:31-34; Jn.13 :36-38)*

<sup>26</sup> Chi gulox biil reeman tijb cant par Dios. Dxel zë reeman ruguia' Olivos. <sup>27</sup> Dxel rëb Jesús loj reeman:

—Graczidi tio'nladx naj yan guxhin, zi'c ca loj xtiidx Dios lod rëb: “Gugüjtan bën rajp ree xiil, abi' guire'ch reeb.” <sup>28</sup> Per chi yabanan, yaløj naj ganeed lojdi gan Galilea.

<sup>29</sup> Dxel rëb Bëd lojman:

—Majsi gra reeman tio'nladx lüj, per naj ad zaro'nladxtan lüj.

<sup>30</sup> Badxi' Jesús rëbaman:

—Najn rni lüj Bëd, yan guxhin gajc chi gad güid cwidxa' tio'p volt, choon volt mal rëbil guial ad nünbeetil naj.

<sup>31</sup> Per naguiejn rüjn Bëd rëbaman:

—Majsi guiëtnë'n lüj, per ad zëtan guial ad nünbeetan lüj.

Abi' graczi reeman rëb zian.

*Rbejdx rniab Jesús Dios lod la Getsemaní*

*(Mt. 26:36-46; Lc. 22:39-46)*

<sup>32</sup> Chi bidxin reeman tijb luar la Getsemaní, dxel rëb Jesús loj ree xbejnman:

—Gol gurejsii guie, la'tgaj gabledx ganaaban Dios.

<sup>33</sup> Abi' binëman Bëd, Jacob con Waj, dxel guzuloj guyunayaman abi' ad nixtri yu' luxdooman. <sup>34</sup> Zianz rëbaman loj reeman:

—Yu' naya da't luxdon, rulüü ma gugüjtan naj. Gol baya'n guie ad gaayëjsidi.

<sup>35</sup> Abi' guzaman zata'n, zianz gurerulojman, gunabaman loj Dios, bal zile' téd ni naj sagdiajman. <sup>36</sup> Chi cabejdx canabaman Dios, rëbaman:

—Dad, graczi zajc güünl. Babëë naj loj ni gazaagdiajn. Per ad gac zi'c rënan, rayal gac zi'c rënl.

<sup>37</sup> Dxel ziaman lod baya'n ree xbejnman, chi badxinman cwë' reeman laa reeman naga'yëjs, zianz rëbaman loj Bëd:

—Simón, ¿naga'yëjsil ya? ¿Ni'qui tib hor ad gojct nibejnaal ya? <sup>38</sup> Gol gurenaa, gol gurejdx gunab Dios chitëë güün xindxab lëjt gan. Din rëndi güündi zi'c rayal, per xcuerpidi ad rtiëjbtan.

<sup>39</sup> Dxel zëman zatijb persi gurejdx gunabaman Dios con diidx guin gajc ree. <sup>40</sup> Chi badxinman lod riga' reeman, laagajc reeman naga'yëjs zatijb, guial yu' da't bacaal loj reeman, abi' ni'quid radxejlt xhie guiëb reeman lojman. <sup>41</sup> Ni bayon volt badxinman, rëbaman:

—¿Sta naga'yëjsidi ya? ¿Sta cayziiladxidi ya? Gol batie'ch xbacaalidi din naj, najn Bén guxhaal Dios ma bidxin hor yayü reeman naj loj ree bëndol. <sup>42</sup> Gol bixche, yo' ree, laa bén yayü naj ma zëed gajxh.

### *Gunaaz reeman Jesús*

*(Mt. 26:47-56; Lc. 22:47-53; Jn.18 :2-11)*

<sup>43</sup> Sta caneenë Jesús laa reeman chi bidxin Judas, Bén goc tijb ree xbejnman. Bidx-innëman zien ree bejn ca' reeman espad con yag, guxhaal ree bixhioz rniabee ree bixhioz laa reeman con ree mextr rajc ley con ree guxtis Israel. <sup>44</sup> Abi' Judas Bén bayü laaman ma bagojnxgajman Bén guin ree rëbaman:

—Bén gawan xid, laaman naj Bén raguilidi, gol gunaazaman gol chinëman, gol gojpaman ad guslaadi laaman.

<sup>45</sup> Chi bidxin Judas dxel gubigaman loj Jesús, rëbaman:

—Mextr, Mextr.

Dxel gudawaman laaman xid. <sup>46</sup> Zianz gunaaz ree Bén guin laaman din chinë reeman laaman. <sup>47</sup> Per tijb Bén za' yagaj gulëë xiespadaman, gutü'man guidiajg xmojs bixhioz rniabee gra ree bixhioz. <sup>48</sup> Dxel rëb Jesús loj ree Bén guin:

—¿Chexc zeel zëedidi con espad con yag din chinëdi naj zi'c tijb xingubaan? <sup>49</sup> Zianczi guzunë'n lëjt lën yadooro' Jerusalén rulün lëjt xtiidx Dios, abi' ad gunaaztidi naj. Per gra ree ni guie cayajc din gac cumplid ni ca loj xtiidx Dios.

<sup>50</sup> Dxel graczi ree xbejn Jesús baxüün, guro'nladx reeman laaman.

### *Tijb xin binal Jesús*

<sup>51</sup> Per guyu tijb xinguiag binalix Jesús, nadüübix tijbzi lajd. Abi' chi gunaaz ree Bén guin laax, <sup>52</sup> baslaagajquix lajd guin, zigxüünt ziladix.

### *Za' Jesús loj ree guxtis*

*(Mt. 26:57-68; Lc. 22:54-55, 63-71; Jn.18 :12-14, 19-24)*

<sup>53</sup> Dxel binë reeman Jesús loj bixhioz rniabee gra ree bixhioz, abi' badxaag lasa' ree bixhioz rniabee ree bixhioz con ree guxtis Israel con ree mextr rajc ley. <sup>54</sup> Abi' zijt zijt binal Bëd Jesús xt rule' lidx bixhioz guin, dxel gurejman rudëj con ree Bén rajp rulidx bixhioz guin,

<sup>55</sup> Abi' ree bixhioz rniabee ree bixhioz con gra ree guxtis, baguüil reeman mod xhien-aag gutedia' reeman Jesús din chile' gugüjt reeman laaman, per ad badxejlt xhienaag

nutedia' reeman laaman, <sup>56</sup> majsi zien reeman rudxiib diidx rusquiee guijcaman, per garent garen rëb tijb gaj reeman. <sup>57</sup> Dxel guzuli tio'p choon reeman gunee reeman diidx rusquiee ree contr laaman, rëb reeman:

<sup>58</sup>—Dunujn baguiejn rëbix: “Naj guse'n yadooro' Jerusalén ni been ree bejn, abi' choon dxejzi yayünanan sin xyudar ree bejn.”

<sup>59</sup> Per ni'qui zian ad guneet reeman tibloj, garent garen gunee reeman.

<sup>60</sup> Dxel bixhioz rniabee gra ree bixhioz guzuliman galay ree bén riga' yagaj, abi' gunabdiidxaman loj Jesús, rëbaman:

—¿Nid xhie diidx yadxi'l ya? ¿Wali ni canee reeman contr lüj ya?

<sup>61</sup> Per achetczi rëb Jesús, ad badxi'taman diidx, dxel gunabdiidx bixhioz rniabee guin lojman zatijb, rëbaman:

—¿Lüj naj Cristo ya, Xi'n Dios Bén nagle'?

<sup>62</sup> Badxi' Jesúsán rëbaman:

—Walican, najcan. Abi' lëjt zuguaadi naj najn Bén guxhaal Dios zooban xladbee Dios Bén ca' gra guialrniabee guguaa tēedi naj guialan loj zaj xanyabaa.

<sup>63</sup> Chi biguiejn bixhioz guin zian, gudixya' xabaman, dxel rëbaman:

—Ad rüjntri naguiejn yadiil ree testiw. <sup>64</sup> Lëjt ma biguiejn canee guijdxix Dios. Yan, ¿xhie nadi?

Abi' graczi reeman rëb, guiëtaman.

<sup>65</sup> Yu' reeman rucojp xhiejn lojman, ruta'cw tēe reeman lojman, dxel riguin reeman laaman, rëb reeman:

—¡Guneeya' chu gudin lüj!

Guiáad ree bén rajp yagaj wēez reeman lojman.

### *Rëb Bëd ad nünbeetaman Jesús*

*(Mt. 26:69-75; Lc. 22:56-62; Jn.18 :15-18, 25-29)*

<sup>66</sup> Chi za' Bëd rule' guin, dxel bidxin tijb béngunaa rüjn dxiin lidx bixhioz rniabee guin.

<sup>67</sup> Chi baguaaaman zojb Bëd rudëj guin cucha'man, baguaaaman lojman, dxel rëbaman:

—Në lüj za'në Jesús bén Nazaret.

<sup>68</sup> Per gurexuu Bëd rëbaman:

—Ad nünbeetan laaman, ad ragbeetan xhienin rnieel.

Chi bariiman ro' port guin, dxel guridxa' guid. <sup>69</sup> Dxel baguaa béngunaa guin Bëd zatijb, zianz guzuloj rëbaman loj ree bén riga' yagaj:

—Në bén guin naj xbejn Jesús.

<sup>70</sup> Per gurexuu Bëd zatijb. Gojc xchejdoo rëb ree bén riga' yagaj loj Bëd:

—Walican në lüj naj xbejnx din xin Galilea lüj, abi' zi'cgajc rniee reeman rnieel.

<sup>71</sup> Per guzudxi'ch Bëd con ni rëbaman, zianz rëbaman:

—Gudëed Dios naj casti bal rusquieen, ad nünbeetan bén nadi.

<sup>72</sup> Loj hor zii gajc barojp volt guridxa' guid. Dxel basaaladx Bëd guial rëb Jesús lojman: “Chi gad guid cwidxa' tio'p volt, mal gojc choon volt rëbil ad nünbeetil naj.” Chi basaaladxaman zian, dxel guzuloj cayoonman.

## 15

### *Binë reeman Jesús loj Pilato*

*(Mt. 27:1-2, 11-14; Lc. 23:1-5; Jn.18 :28-38)*

<sup>1</sup> Chi bareguiaal rsildoo, badxajg lasa' ree bixhioz rniabee ree bixhioz con ree guxtis Israel në ree mextr rajc ley con gra ree guxtis, abi' baya'n reeman diidx xhienaag güün reeman. Dxel guxhii reeman Jesús binë reeman laaman loj Pilato. <sup>2</sup> Abi' gunabdiidx Pilato loj Jesús rëbaman:

—¿Lüjn naj xrey ree bén Israel ya?

Badxi' Jesús laan rëbaman:

—Najcan.

<sup>3</sup> Abi' ree bixhioz rniabee ree bixhioz zien ni rudxiib reeman guijcaman, <sup>4</sup> zeel gunabdiidx Pilato lojman zatijb, rëbaman:

—¿Nid xhie diidx yadxi'l ya? Baguiaa dád zien ni rudxiib reeman guijquil.

<sup>5</sup> Per achetczi badxi' Jesús, zeel dád badxa loj Pilato

*Gunabee reeman guiët Jesús*

(Mt. 27:15-31; Lc. 23:13-25; Jn.18 :38-19:16)

<sup>6</sup> Loj ree dxej lanij pascw, ruslaa Pilato tijb bën yu' ladxguuib, bën rëb ree bën guiedx guin guslaaman. <sup>7</sup> Lën ree dxej zii yu' bën la Barrabás ladxguuib con ree ben ren, bën bagüjt ree bejn loj tijb wadijl ni been reeman contr gobiarn. <sup>8</sup> Dxel chi bido'p ree bejn, rëb reeman loj Pilato din güünman zi'c naj costumbr, <sup>9</sup> Abi' rëb Pilato loj reeman:

—¿Rëndi ya guslaan xreydi?

<sup>10</sup> Rëbaman zian guial ragbeeman bayü ree bixhioz guin laaman por guial rdëdlojzi reeman laaman. <sup>11</sup> Per ree bixhioz rniabee guin badxe' reeman bejn ree diidx din guiëb reeman loj Pilato guslaaman Barrabás. <sup>12</sup> Abi' gunabdiidx Pilato loj reeman rëbaman:

—¿Xhie rëndi günnë'n bën nadi naj xreydi?

<sup>13</sup> Dxel gurixdiaj reeman rëb reeman:

—¡Bacaax loj crüjz!

<sup>14</sup> Zianz rëb Pilato loj reeman:

—Per ¿xhieza ni mal beenx?

Guiáad laa reeman mazri rbixdiaj reeman, rëb reeman:

—¡Bacaax loj crüjz!

<sup>15</sup> Abi' guial rën Pilato yaya'nman zagdxe loj reeman, zeel baslaaman Barrabás, gunabeeman a Jesús, dxel bayüman laaman loj reeman din tiaman loj crüjz.

<sup>16</sup> Abi' binë ree xin suldad guin Jesús xlule' palas, yagaj badxaag lasa' gra reex. <sup>17</sup> Abi' bascajcw reex laaman tijb lajd murad, dxel been reex tijb coron guiëjch badxe' reex guijcaman. <sup>18</sup> Dxel guzuloj rbixdiaj reex rëb reex:

—¡Guibanri xrey ree bën Israel!

<sup>19</sup> Zianz rugaz reex var guijcaman, rulaa xhiejn reex lojman, abi' ruzuxib reex lojman.

<sup>20</sup> Chi gulox baze' reex laaman, babëë reex lajd murad guin ladaman, bascajcw reex xabczaman, dxel zinë reex laaman din gucaa reex laaman loj crüjz.

*Baca reeman Jesús loj crüjz*

(Mt. 27:32-44; Lc. 23:26-43; Jn.19 :17-27)

<sup>21</sup> Chi zinë reex Jesús, badxaagloj reeman tijb bën Cirene, laman Simón, xdad Lejandr con Rufo, ziaadaman bazaman dajn. Abi' been ree suldad guin naguiejn biaaman xcrüjz Jesús.

<sup>22</sup> Abi' binë reex Jesús luar la Gólgota, rën guiëban Calaver. <sup>23</sup> Yagaj badëëd reex vin no'ch ni la mirra lojman din guië'man laan, per ad gu'taman laan. <sup>24</sup> Chi ma baca reex laaman loj crüjz, dxel gudxijt reex suert guijc xabaman din guidoon xhie yayal tijbgaj reex

<sup>25</sup> Raca gaa rsil baca reex laaman loj crüjz. <sup>26</sup> Guijc crüjz guin baca reex lejtr ni rëb chexc zeel baca reex laaman loj crüjz, rëban: “Xrey ree bën Israel.” <sup>27</sup> Chi baca reex laaman loj crüjz, në zatio'p ree xin gubaan baca reex loj crüjz, tijbix cwa xladbeeman, zatijbix cwa xladruvejsaman. <sup>28</sup> Zian gojc cumplid ni ca loj xtiidx Dios, lod rëb: “Nayabaman loj ree benmal.”

<sup>29</sup> Abi' ree bën ridëd yagaj ruze' reeman laaman runij guijc reeman, rëb reeman:

—Conza ni rnieel guial rëbil, yase'nl yadooro' Jerusalén abi' loj choon dxejzi ma bayüjnlan zatijb, <sup>30</sup> yan baslaa lüj gajc baguiajt tëë loj crüjz zii.



<sup>31</sup> Ziangajc ruze' ree bixhioz rniabee laaman con ree mextr rajc ley, rëb reeman:  
—Gognëx ben ren ree, guiáad laax ad rajct ruslaa laagajquix. <sup>32</sup> Yaguiajtix loj crüjz guin, bal laax naj Cristo, xrey ree bën Israel, din yaguaiaa ree, dxel validuladx ree.  
Xt në ree xingubaan canëman loj crüjz guneequijdx laaman.

### *Güjt Jesús*

*(Mt. 27:45-56; Lc. 23:44-49; Jn.19 :28-30)*

<sup>33</sup> Chi gol garol dxej, bicajy guidib guidxliuj xt raca choon wadxe. <sup>34</sup> Dxel raca choon guin gurixdiaj Jesús rejs, rëbaman:

—Eloi, Eloi, ¿lama sabactani? —rën guiëban: Diosan, Diosan, ¿chexc zeel gulëladxil naj?

<sup>35</sup> Yu' ree bën za' yagaj biguiejn, abi' rëb reeman:

—Gol bacaagdiajg niad. Laax cabejdx Elías bën badëë xtiidx Dios loj ree bejn.

<sup>36</sup> Dxel ruxüün tijbaman, bicajdxaman tijb xiil loj vinagr, bacaaman laan loj tijb yag, abi' bacaaman laan ro' Jesús din guië'man laan, rëbaman:

—Gol basa'nx, yaguaiaa ree don zi't Elías yalet laax loj crüjz guin ya.

<sup>37</sup> Per Jesús dád rejs gurixdiajman, dxel güjtaman. <sup>38</sup> Loj hor zii goxya' lajd nal lën yadooro' Jerusalén, gojcan tio'p lala', diizd guijc guin xt guia' guin goxya'. <sup>39</sup> Dxel suldad rniabee ree suldad guial za'x niz loj Jesús. Chi baguiaax xhienaag güjtaman, rëbix:

—Walican, Xi'n Dios bën guin.

<sup>40</sup> Në tio'p choon ree béngunaa za' zijt ruguiaa ni cayajc. Loj ree béngunaa guin no'ch María Magdalena, në Salomé në Li xniaa Xiëb con Jacob bën naj benguiag loj Xiëb.

<sup>41</sup> Béngunaa guin ree binal Jesús, been tëë reeman laaman yudar chi guzuman Galilea, në zien ree béngunaa ren binal laaman diizd Galilea xt Jerusalén.

### *Biguie'ch Jesús*

*(Mt. 27:57-61; Lc. 23:50-56; Jn.19 :38-42)*

<sup>42</sup> Chi bidxin dxej rüjn ree bën Israel gra, chi guixiezi naj dxej raziiladx reeman, ma cabej guiaal, <sup>43</sup> bidxin Xiëb bën za guiedx Arimatea. Gojcaman tijb xguxtis ree bën Israel, abi' gojp ree bejn laaman respejt, në laaman rbëz xguialrniabee Dios, abi' guyuman valor wejman loj Pilato, persi banabaman xcuerp Jesús. <sup>44</sup> Dád badxa loj Pilato guial ma güjt Jesús, dxel gurejdxaman xin suldad rniabee ree suldad persi gunabdiidxaman bal walin. <sup>45</sup> Abi' rëb suldad guin guial walican ma güjtaman, dxel cwëjb Pilato baca' Xiëb cuerp guin. <sup>46</sup> Guzii Xiëb tijb lajd, abi' chi baletaman xcuerp Jesús loj crüjz guin dxel batüübaman laaman lajd guin, biquie'chaman laaman lën tijb baa ni bidëen lën tijb guiaj, dxel basiaawaman ro' baa guin con tijb guiajro'. <sup>47</sup> María Magdalena con Li xniaa Xiëb, baguiaa reeman lod baquie'ch reeman Jesús.

## 16

### *Raban Jesús*

*(Mt. 28:1-10; Lc. 24:1-12; Jn.20 :1-10)*

<sup>1</sup> Chi gudëd dxej raziiladx ree bejn, María Magdalena, në Salomé, në Li xniaa Jacob, bisii reeman perfum din chitëëb reeman laan xcuerp Jesús. <sup>2</sup> Bareguiaal chidumingw, rsildoo brii reeman wej reeman ro' xbaa Jesús, naabzi rliejn gubijdx. <sup>3</sup> Chi zë reeman lunejz, rëb loj lasa' reeman:

—¿Chuzá chisüd guiaj nayaaw ro' baa guin?

<sup>4</sup> Per chi bidxin reeman baguiaa reeman ma biniib guiaj za' ro' baa guin ad za'tri loj xluaran. <sup>5</sup> Chi guyu reeman lën baa guin, baguiaa reeman tijb xinguiag zojbix ladbee, najcwix lajd naquich yool, abi' bidxeb reeman. <sup>6</sup> Per rëbix loj reeman:

—Ad rdxebidi, raguiilidi Jesús bën Nazaret bën cwa loj crüjz. Per ma babanman, achutri laaman guie, gol baguiaa lod gudixh reeman laaman. <sup>7</sup> Yan, gol chej gol

chiguiedx loj Béd në loj los demazri ree xbejnman guial yaloj Jesús ned cheman Galilea dxel chedi, ni guguaadi laaman zi'c ma naman lojdi.

<sup>8</sup> Dxel cari da't barii ree béngunaa guin lën baa guin, dád canij reeman cadxeb reeman, abi' achut loj rëb reeman guial rdxeb reeman.

*Balüüloj Jesús loj María Magdalena*  
(Jn. 20:11-18)

<sup>9</sup> Chi ma baban Jesús, chidumingw rsildoo, yaloj loj María Magdalena balüülojman, bën babëëman gajdx xindxab luxdoo. <sup>10</sup> María Magdalena guin bicojn ree xbejn Jesús, bën yu'naya ree roon tée reeman por laaman. <sup>11</sup> Chi biguiejn reeman guial naban Jesús baguiaa tée María Magdalena laaman, ad bililadxt reeman.

*Balüüloj Jesús loj tio'p ree xbejnman*  
(Lc. 24:13-35)

<sup>12</sup> Chi gudëd gojc zian, garen balüüloj Jesús loj tio'p ree xbejnman lunejz chi zë reeman niz dajn. <sup>13</sup> Dxel bën guin ree bicojn lasa' reeman, per ni'qui laa reeman ad bililadxt reeman.

*Rucaabee Jesús bën naj ree apóstoles*  
(Mt. 28:16-20; Lc. 24:36-49; Jn.20 :19-23)

<sup>14</sup> Ni bigratë balüüloj Jesús loj za chiptib ree xbejnman, chi zojb reeman xan mex cayaw reeman, gudilëman laa reeman guial nad reeman, ad rliladxt reeman bën baguiaa ree laaman guial ma babanman. <sup>15</sup> Dxel rëbaman loj reeman:

—Gol chej guidib guidxliuj, gol chigtie'ch xtiidxza'c Dios loj gra ree bejn. <sup>16</sup> Bën chililadx tiobnijs tée zajcaman perdon loj Dios. Per bën ad zaliladxt xtiidxza'c Dios, laaman yayal casti. <sup>17</sup> Sen guie ree gap ree bën chililadx naj: Por da guialrniabeen zabëë reeman xindxab luxdoo ree bejn, zanee tée reeman diidx ren ree, <sup>18</sup> zanaaz reeman bëël ree, abi' majsi guië' reeman ni yu' venen guijc achet gac reeman, chi gudxiib yaa reeman guijc ree bënragxuu, zayajc reeman.

*Bayë'p Jesús xanyabaa*  
(Lc. 24:50-53)

<sup>19</sup> Chi gulox guneenë Dad Jesús laa reeman, dxel bayë'paman xanyabaa, gurejman xladbee Dios. <sup>20</sup> Guiáad laa reeman brii reeman zigtie'ch reeman xtiidxza'c Dios guidibczi. Abi' Dad Jesús gognë laa reeman, been reeman milagr ree, persi gogbee ree bejn guial xtiidxqui Dios naj ni rniee reeman. Amén.

## Xtiidxza'c Jesucrist ni bacaa San Lujc

### *Rxhiaal Lujc gui'ch loj Teófilo*

<sup>1</sup> Zien ree bèn ma been naguiejn gucaa ni goc con dunuj ree, <sup>2</sup> zi'cgajczi balüü ree bejn dunuj ree, bèn baguiaa ree diizd guia'xchej ni been Jesús nē ni guzacaman, gutie'ch tēē reeman xtiidxaman. <sup>3</sup> Naj baguilxnejzchaaw diizd guia'xchejn, dad Teófilo, zeel naladxan zagdxen gucanan xnejz par lüj, <sup>4</sup> din chignia'l zagdxē diidxli balüü reeman lüj.

### *Rugojn tijb anjl gal Waj*

<sup>5</sup> Tiamp gunabee rey Herodes guidib niz Judea, guyu tijb bixhioz brii laj Zacarías, bachajgaman tib cwaa ree bixhioz brii laj xbejn Abías. Xbéngunaa Zacarías brii laj Elisabet, zaman loj xdiaa bixhioz brii laj Aarón. <sup>6</sup> Grop reeman gubajn xnejz loj Dios bazooob tēē reeman diidx graczi ni rniabee Dios, abi' achut rile' guiēb guial rajp reeman dol. <sup>7</sup> Per achut xi'n reeman guyu guial ad gojct niu xi'n Elisabet, grop reeman ma naj bengol.

<sup>8</sup> Tijb dxej ni bayal ree bixhioz no'ch Zacarías loj, been reeman sirv loj Dios, <sup>9</sup> zi'c naj xcostumbr ree bixhioz guin, gudxijt reeman suert dñ guidoon chu yayal gudxe' goxyaal lēn yadooro' Jerusalén, abi' bayal Zacarías cu'man goxyaal guin. <sup>10</sup> La'tgaj cagu'man goxyaal guin, gra ree bejn riga' lule' cabejdx canab reeman Dios. <sup>11</sup> Dxel balüüloj tijb xianjl Dios loj Zacarías, za'liman xladbee altar lod cayu goxyaal guin. <sup>12</sup> Chi baguiaa Zacarías anjl guin, ad badxejlt xhie nūjnman, dād bidxebaman. <sup>13</sup> Per rēb anjl guin:

—Zacarías, ad rdxebil ma bacaagdiajg Dios ni gunabil. Chu' xi'n xbéngunaa Elisabet, gaquix xinguaaaw abi' yagu'l lajx Waj. <sup>14</sup> Yabaa da'til, nē zien ree bejn yabaa chi galix, <sup>15</sup> guial gaquix xin lasajc loj Dios. Ad zē'tix vin ni'qui ni gusüdx laax. Abi' diizd chi gadix gal mal za'nē xSprijt Dios laax. <sup>16</sup> Por laax zien ree bèn Israel yayejc loj xDad reeman Dios. <sup>17</sup> Laax ned lojman, chu' xSprijt Dios luxdoox gap tēēx guialrniabee zi'c Elías, bèn badēē xtiidx Dios loj ree bejn, yabe'cdxex bèn naj ree dad con xi'n reeman, gulüü tēēx bèn ad ruzoobt ree diidx dñ guzuxnejzix bejn ree guidxga' reeman laaman chi gui'taman.

<sup>18</sup> Dxel rēb Zacarías loj anjl guin:

—¿Xhienaag gagbeen guial gac cumplid ni nal? Din naj con da béngunaan ma nayajcan bengol.

<sup>19</sup> Badxi' anjl guinan rēbaman:

—Naj naj Gabriel, rünan sirv loj Dios, laaman guxhaal naj zidnē'n diidxza'c guie lojl.

<sup>20</sup> Per yan guial ad bililadxtil da diidxan, yaya'nl gop ad zajct guinieel xt guidxin dxej gal xindo guin.

<sup>21</sup> Guiáad ree ben riga' lule' guin cabēz reeman Zacarías yu' nawēēg reeman guial cayaglaaman lēn yadoo guin. <sup>22</sup> Chi bariiman ad rajctri rnieeman, gaz sen rüjnman guial ma baya'nman gop. Dxel gogbee reeman guial yu' xhie baguiaaaman lēn yadoo guin.

<sup>23</sup> Zianz baza' ree dxej ni been Zacarías sirv lēn yadoo guin, dxel zia lidxaman. <sup>24</sup> Chi gudēd ree dxej guin, guyu xi'n xbéngunaa Elisabet. Gaay bēēw tib guyuzaman lēnū, rēbaman: <sup>25</sup> “Ze naj ni beennē Dios naj lēn ree dxej guie chitēē guze'ri ree bejn naj.”

### *Rugojn tijb anjl Li gal Jesús*

<sup>26</sup> Ni goc xho'p bēēw, guxhaal Dios anjl la Gabriel luguiedx Nazaret ni riga' niz Galilea, <sup>27</sup> din chignajman tijb biinxdüb lam Li. Ma naj tia' tijb xin la Xiēb laam, xin zēēd loj xdiaa rey Davi.

<sup>28</sup> Guyu anjl guin lod yu' Li abi' rēbaman:

—¡Xchan Li, Dios ma gulej lüj! Dios za'në lüj, ma beenle' tääman lüj loj gra ree béngunaa.

<sup>29</sup> Chi baguiaa Li anjl guin dád badxa lojm guial rëbaman zian, abi' gunabdiidxim xhie rën guiëb ree diidx guin. <sup>30</sup> Dxel rëb anjl guin:

—Li, ad rdxe bil din lüj gule Dios beenle' tääman lüj. <sup>31</sup> Chu' xi'nl, abi' chi galaman yagu'l lajman JESÚS. <sup>32</sup> Laaman gac bën zobjloj, guiniee ree bejn laaman Xi'n Dios bën yu' xanyabaa. Güün dux Dad ree Dios laaman rey zi'c goc xdiaagulalaman Davi, <sup>33</sup> din nabeeman bën Israel ree xt goctëez, abi' xguialrniabeeman ad yu't dxej loxan.

<sup>34</sup> Dxel rëb Li loj anjl guin:

—¿Xhienaag chu' da xi'n nan awa achut bénguiaaw nabannë'n?

<sup>35</sup> Badxi' anjl guinan rëbaman:

—Por xSprijt Dios chu' xi'nl, abi' xguialrniabee Dios bën yu' xanyabaa gusiaawan guijquil con xbalan. Zeel xi'nl bën gal, gacaman naya nali abi' guiniee ree bejn laaman Xi'n Dios. <sup>36</sup> Ziangajc lasa'l Elisabet ma yu' xi'nman, majsi ma najman bengol, bën rëb ree bejn ad zajct chu' xi'n, per yan ma gojc xho'p bëew yu' xi'nman. <sup>37</sup> Din Dios graczi zajc güünman.

<sup>38</sup> Dxel rëb Li loj anjl guin:

—Dios naj bën rniabee naj, gacza zi'c rënman.

Ziat anjl guin.

### *Rignaj Li Elisabet*

<sup>39</sup> Lën ree dxej guin wej Li cari da't tijb guiedx ni riga' lad ree guia' niz Judea, <sup>40</sup> dxel guyum lënü lidx Zacarías, bagajpdiozim Elisabet. <sup>41</sup> Chi biguiejn Elisabet cha'm cugajpdiozim laaman, laa baniib gajc xindobëz yu' lënman, dxel guyu xSprijt Dios luxdooman guidiblagaa. <sup>42</sup> Abi' gunee Elisabet rejs, rëbaman:

—¡Dios ma beenle' lüj loj gra ree béngunaa, beenle' tääman bejndobëz yu' lën! <sup>43</sup> ¿Chuza najn zeel zidganaj xníaa da Diosan naj, bën rniabee? <sup>44</sup> Din biguiejnzán cha'l bagajpdiozil naj, laa baniib gajc da bindoon lënan guial babaam. <sup>45</sup> Xiquilbaal guial bililadxil, din gac zi'c bagojn Dios lüj.

<sup>46</sup> Dxel rëb Li:

Ruzatan Dios zagdxe,

<sup>47</sup> rabaanë' tään laaman, guial ragnëman naj.

<sup>48</sup> Guial baguiaaman naj, majsi biin rüjnzi sirv lojman naj.

Abi' diidz yan xt goctëez guza't ree bejn naj, guiëb reeman xiquilbaam.

<sup>49</sup> Din Dios, bën rniabee, dád zro' naj ni ma beennëman naj.

Naya naliman.

<sup>50</sup> Ad rbëzt rayaman graczi ree bën ruzoob xtiidxaman.

<sup>51</sup> Zro' naj ni ma beenman con xguialrniabeeman.

Base'nman xixgab ree bën rüjn benro',

<sup>52</sup> biquiedaman guialrniabee loj ree bën rniabee, guíaad loj ree bën ad zobjlojt badëëman guialrniabee loj reeman.

<sup>53</sup> Badëëman guialnaza'c loj ree bën biaadx guialraw, guíaad ree benrijcw basa'nman laa reeman zezi.

<sup>54</sup> Gognëman bën Israel ree, xbejnman,

abi' ad bayanladxtaman nayaman laa reeman,

<sup>55</sup> zi'c rëbaman loj dux béngulal ree,

Abraham në loj ree xdiaaman.

<sup>56</sup> Abi' baya'nnë Li Elisabet cost choon bëew, dxel baguiaj lidxim.

### *Rajl Waj*

<sup>57</sup> Chi bidxin dxej gojl xi'n Elisabet najx xinguaaw. <sup>58</sup> Abi' gogbee ree lasa'man në ree bën zobj gajxh guial baya Dios laaman, dád babaa reeman bignaj reeman laaman.

<sup>59</sup> Chi ma gojc xindobëz guin toxman, dxel binë reeman laax guyux sen ni ru ree bën Israel. Abi' guyën reeman nagu' reeman lajdoox Zacarías zi'c la xdadix, <sup>60</sup> per gunee xniaax, rëbaman:

—Ad zayutan zian. Rayal gaquim Waj.

<sup>61</sup> Dxel rëb reeman lojman:

—¿Chexquiza zeel gaquix Waj? Achut ree lasa'l la zian.

<sup>62</sup> Abi' con sen gunabdiidx reeman loj xdad xindobëz guin chu rënman grii lajx.

<sup>63</sup> Zianz gunabaman tibia' tabl abi' bacaaman lojn: “Waj grii lajx.” Dád badxaloj gra ree bën guin. <sup>64</sup> Loj hor ziigajc gojc banee Zacarías, abi' guzuloj cuza'taman Dios zagdx.

<sup>65</sup> Gra ree bën zojbnëman gajxh dád badxa loj reeman, xt gra ree guiedx riga' lað ree guia' niz Judea gogbee reeman graczi ni goc. <sup>66</sup> Guiáad graczi ree bën gogbee zian, rniabdiidx loj lasa' reeman, rëb reeman:

—¿Chu gac xindo guin ya'n chi ni'six?

Rëb reeman zian guial laa rguien gajc ma beenle' Dios laax.

### *Ni gunee Zacarías*

<sup>67</sup> Zacarías, bën naj xdad xindo guin guyu xSprijt Dios luxdooman guidiblagaa, zianz guzuloj caneeman, rëbaman:

<sup>68</sup> Benza'c bendxoon naj Dios, dux Dad ree nayajc ree bën Israel, guial bi'taman bidganajman dunuj ree nayajc ree xbejnman, bidgalëë tëëman dunuj ree loj ni cayza'c ree.

<sup>69</sup> Guxhaalaman tijb bën rajp guialrniabee din yabëëman dunuj ree loj ni cayza'c ree, zëëdaman loj xdiaa rey Davi, bën naj xbejn Dios.

<sup>70</sup> Zi'c been Dios promejs diizd gocli, zian gunee ree bën badëë xtiidxaman loj ree bejn, bën guban ree zi'c rënman:

<sup>71</sup> guial yabëëman dunuj ree loj ree bën ralen dunuj ree, në loj gra ree bën yu'xyajn dunuj ree,

<sup>72</sup> yaya tëëman dux béngulal ree,

abi' ad zayanladxtaman promejs ni beenman.

<sup>73</sup> Ni ne naj promejs ni beenman loj dux béngulal ree Abraham:

<sup>74</sup> guial yabëëman dunuj ree loj ree bën ralen dunuj ree,

din chile' yaguieen ree sirv lojman sin guialrdxeb,

<sup>75</sup> yabajn ree yaguieen tëë ree zi'c rënman, guidib tiamp ni yabajn ree.

<sup>76</sup> Guiáad lüj xi'n, guiniee ree bejn lüj bën rudëë xtiidx Dios loj ree bejn, Dios yu' xanyabaa.

Din nedil chiguieenchaawil xnejz bën naj Dad,

<sup>77</sup> gulüü tëël xbejnman din gagbee reeman xhienaag gac xtol reeman perdon, laa tëë reeman loj casti.

<sup>78</sup> Guial raya da't dux Dad ree dunuj ree,

zeel guxhaal xi'nman, bën naj zi'c xbacha' gubijdx din gusniman du loj ree,

<sup>79</sup> guixhial tëëman xquiargueijn ree bën zë loj nejzmal, bën ad nabant ree xnejz zi'c rën Dios,

gulüü tëëman dunuj ree yadxoo ree loj xnejzaman din yabajn ree zagdx sin wadijl.

<sup>80</sup> Guiáad xindo guin guni'six guyu tëë xquiargueijnx mazri por Dios. Guzujx loj yujbidx, xt bidxin dxej guneex xtiidx Dios loj ree bën Israel.

## 2

### *Rajl Jesús*

#### *(Mt. 1:18-25)*

<sup>1</sup> Lën ree dxejzii gunabee rey César Augusto guiyab gra ree bejn guidib lod rniabee-man. <sup>2</sup> Laan naj ni yaloj biyab ree bejn chi goc Cirenio gobernador Siria. <sup>3</sup> Graczi ree

bejn naj yaguaiaj ladx ladx din guiyab reeman. <sup>4</sup> Zianan zeel brii Xiëb luguedx Nazaret ni riga' niz Galilea, wejman Belén, ni riga' niz Judea, lod gol rey Davi din loj xdiaa rey Davi zëed Xiëb. <sup>5</sup> Wejman binëman Li, lacheelaman din guiyab reeman. Ma yu' xi'n Li. <sup>6</sup> Abi' la'tgaj za' reeman Belén, bidxin dxej gojl bejndobëz guin. <sup>7</sup> Yagaj gol xi'n yaloj Li, dxel batüübaman bejndobëz guin lajd, gudijxhaman laaman lod ru ni raw ree be, guial ad bidxejlt lënu naya'n reeman.

*Bidxin ree xianjl Dios lod za' ree bën rajp xiil*

<sup>8</sup> Gajxh Belén guin za' ree bën rajp xiil, abi' dajn guin gajc rdëd reeman guiaal rajp reeman laa reeb. <sup>9</sup> Dxejczy balüüloj tijb xianjl Dios loj reeman, naynidxuj basni xbiani Dios lod riga' reeman abi' dád bidxeb reeman. <sup>10</sup> Per rëb anjl guin loj reeman:

—Ad rdxebidi din zidnë'n diidxza'c lojdi, por laan yabaa gra ree bejn. <sup>11</sup> Yan, ladx rey Davi ma gojl bën yabëë lëjt loj ni cazajquidi, laaman naj Cristo, laaman naj Dad. <sup>12</sup> Abi' din yayünbeedi laaman; nadüübaman lajd, naga'man lod ru ni raw ree be.

<sup>13</sup> Dxejczy balüüloj zien da't ree anjl cwë' anjl yaloj guin, ruza't reeman Dios zagdxe, rëb reeman:

<sup>14</sup> jBenza'c bendxoon naj Dios bën yu' xanyabaa, abi' loj guidxliuj yabe'cdxeman luxdoo bën rüjn ree zi'c rënman!

<sup>15</sup> Chi ma zia ree anjl guin xanyabaa, dxel rëb loj lasa' ree bën rajp ree xiil guin:

—Yo' ree Belén yuquiaa ree ni goc ni, zi'c ma bagojn dux Dad ree Dios dunuj ree.

<sup>16</sup> Dxel cari da't zë reeman, abi' bidxaagloj reeman Li në Xiëb, nëtëë bejndobëz guin naga'man lod ru ni raw ree be. <sup>17</sup> Chi baguiaa reeman laaman, be reeman diidx ni rëb anjl guin loj reeman xcwent bejndobëz guin, <sup>18</sup> abi' graczi ree bën biguiejn dád badxa loj reeman ni rëb ree bën rajp ree xiil guin. <sup>19</sup> Per Li, rgu'chaaw luxdooman gra ni rucaagdiajgaman, rüjn tëëman laan xgab. <sup>20</sup> Dxel zia ree bën rajp ree xiil guin, rabaa reeman rudëë tëë reeman quixtëë loj Dios por gra ni baguiaa reeman biguiejn tëë reeman, guial gojc zi'c rëb anjl guin loj reeman.

*Binë reeman Jesús lën yadooro' Jerusalén*

<sup>21</sup> Chi ma gojc toxman gojl bejndobëz guin, badxe' reeman laaman sen ni ru ree bën Israel, bagu' tëë reeman lajman Jesús zi'c rëb anjl guin loj Li chi gad Jesús gacxhie j lënman.

<sup>22</sup> Chi bayaaloj ree dxej ni been Li zi'c rüjn ree béngunaa rajl xi'n, dxel binë reeman bejndobëz guin loj Dios lën yadooro' Jerusalén. <sup>23</sup> Been reeman zian din loj ley guin ca: “Gra ree xindoniguiaaw rajl yaloj ma naj reex par Dios.” <sup>24</sup> Abi' binë reeman gon par Dios zi'c rniabee ley: rayal chinë reeman tio'p gugdoo o tio'p palomdoo.

<sup>25</sup> Tiamp zii zojb bën la Simeón Jerusalén. Najman benza'c rën tëëman Dios, rbëzaman bën gagnë bën Israel ree za'në tëë xSprijt Dios laaman. <sup>26</sup> Abi' por Sprijt guin gogbeeman guial ad zëjttaman xt guguaaman Cristo, bën guixhiaalaman. <sup>27</sup> Dxel por xSprijt Dios wejman lën yadooro' Jerusalén. La'tgaj yu'man lën yadoo guin, Xiëb con Li bidxinnë reeman Jesús din güün reeman zi'c rniabee ley, <sup>28</sup> zianz gudiidx Simeón bejndobëz guin baza'taman Dios zagdxe, rëbaman:

<sup>29</sup> Dad, yanri ma babedxe luxdon.

Ma zajc guslaal naj guiëtan najn xmojsil, ma gojc zi'c nal.

<sup>30</sup> Din con quijb guiaalon ma baguian bën gagnë dunujn.

<sup>31</sup> Guial ma bazujl laaman loj gra ree bénguidxliuj.

<sup>32</sup> Laaman naj biani par ree bën ad najt bën Israel, naj tëëman bacha' par ree xbën Israelil.

<sup>33</sup> Guiáad Xiëb con xniaa Jesús dád badxa loj reeman ni biguiejn reeman rëb Simeón xcwent bejndobëz guin. <sup>34</sup> Dxel beenle'man laa reeman, zianz rëbaman loj Li xniaa Jesús:

—Li, Dios bacaabee bejndobëz guie din por laaman zien da't ree bën Israel laa loj dol, per zien reeman yaya'n loj xtol. Zidgalüüman bejn ree conin naj ni ruladx Dios, per zien reeman ad zënt laaman. <sup>35</sup> Abi' zian gagbeeman xhienaag naj xixgab tijbgaj bejn, guiáad lüj zi'c tijb espad chëëz luxdool chi gac ree ni guin.

<sup>36</sup> Yagaj gajc za' tijb béngunaa yo'xh laman Ana, rudëëman xtiidx Dios loj ree bejn, xdadaman brii laj Fanuel, xdiaagulalaman gojc Aser. Benguiagan chi cwa' xinguaaw laaman, abi' gajdx ijsi gubajnnë lacheelaman. <sup>37</sup> Ma gojc tajpgajlbitap ijz baya'nman bizëjb. Zianczi yu'man lën yadooro', rba'nman rbejdx rniab tëëman Dios. <sup>38</sup> Loj hor ziigajc bibigaman lod za'në Xiëb Li con Jesús, guzuloj cudëëdaman quixtëë loj Dios cuza't tëëman bejndobëz guin loj gra ree bën cabëz guixhiaal Dios bën gagnë bën Jerusalén ree.

### *Zia reeman Nazaret*

<sup>39</sup> Chi ma been reeman graczi ni rniabee xley Dios, dxel zia ladx reeman Nazaret ni riga' niz Galilea. <sup>40</sup> Cani's bejndobëz guin, cayuman gojl, cayajcaman nasin, cayünle' tëë Dios laaman.

### *Yu' Jesús lën yadooro' Jerusalén*

<sup>41</sup> Gazob ijz rej ree xdad Jesús Jerusalén lanij pascw. <sup>42</sup> Chi baza' Jesús chiptio'p ijz, binë ree xdadaman laaman lanij zii zi'c naj xcostumbr reeman. <sup>43</sup> Chi ma gudëd lanij guin, baza ree xdad Jesús ma zia ladx reeman. Ad gogbeet reeman baya'n Jesús Jerusalén. <sup>44</sup> Gunaladx reeman ma no'chaman loj ree bën zia. Zian guza reeman tibdxej. Per chi baguiil reeman laaman loj lasa' reeman në loj ree bën nünbee reeman, <sup>45</sup> achut laaman naguiee. Dxel bayejc reeman zia reeman Jerusalén zatijb zigdiil reeman laaman.

<sup>46</sup> Xt ni gocri choon dxej badxejl reeman laaman lën yadooro' Jerusalén, zojbaman galay ree mextr rajc ley, cucaagdiajgaman canabdiidx tëëman laa reeman. <sup>47</sup> Gra ree bën caguiejn ni rnieeman caydxaloj reeman guial rajcaman në ree diidx radxi'man. <sup>48</sup> Chi baguiaa ree xdadaman laaman, dád badxaloj reeman, dxel rëb xniaaman:

—Xi'n, ¿chexc zeel basajquil dunujn zian? Xdadil con naj dád nadxu'n xgab caydiilan lüj.

<sup>49</sup> Badxi' Jesús laan rëbaman:

—¿Chexc zeel raguiilidi naj? ¿Nid ragbeedi ya rayal günan xchiin da Dadan?

<sup>50</sup> Per ad bignia't reeman xhie rën guiëb ni rëbaman.

<sup>51</sup> Dxel bayejcnëman laa reeman zia reeman Nazaret, graczi xtiidx ree xdadaman ruzoobaman, guiáad xniaaman graczan rgu'chaaw luxdooan. <sup>52</sup> Zi'cri cani's Jesús cayu tëë mazri xquiarguejnman. Rabaanë Dios laaman rabaanë tëë ree bejn laaman.

## 3

### *Rzuloj Waj rulüüman xtiidx Dios*

*(Mt. 3:1-12; Mr. 1:1-8; Jn.1:19-28)*

<sup>1</sup> Chi goc chiin ijz rniabee rey Tiberio, abi' Poncio Pilato najman gobernador Judea, Herodes najman gobernador Galilea, bijchaman Felip najman gobernador Iturea në Traconite, guiáad Lisantias najman gobernador Abilinia. <sup>2</sup> Anás në Caifás naj reeman bixhioz rniabee gra ree bixhioz. Lën ree dxej zii gunee Dios Waj, xi'n Zacarías lod naj yujbidx. <sup>3</sup> Dxel gudëd Waj graczi ree guiedx riga' ro' guiw Jordán, rëbaman loj ree bejn din yayüjn reeman xgab por xtol reeman tiobnijs tëë reeman, din güün Dios xtol reeman perdon. <sup>4</sup> Zian gojc cumplid ni bacaa Isaías bën badëë xtiidx Dios loj ree bejn, lod rëbaman:

Rguien cha' tijb bën rbidxa' loj yujbidx, rëbaman:

“Gol beenchaaw xnejz dux Dad ree Dios,

gol guxhal tijb nejz nali.

<sup>5</sup> Gra ree la'ch yadxa reen guiáad ree guia' con

ree lom yayajc reen tibloj,  
në ree nejz volt yayaali  
yadxa tëë ree lunejz ni ad najt tibloj.

<sup>6</sup> Gra ree bénguidxliuj guguaa bën  
guixhiaal Dios gagnë dunuj ree.”

<sup>7</sup> Chi brier zien ree bejn din guroobnijs Waj laa reeman, rëbaman loj reeman:

—ǰxi'n xinxab lëjt! ǰChu bagojn lëjt guial laadi loj castiro' ni zëed? <sup>8</sup> Gol gubajn zagdxë din guiguien guial waliqui ma bayüjndi xgab por xtolidi, ad guiëb tëë loj lasa'di: “Dunujn zio'p loj xdiaa Abraham”, din naj rni lëjt xt guiaj guie ree zajc yayüjn Dios xdiaa Abraham. <sup>9</sup> Abi' ree bën ad zinalt xnejz Dios zi'c rayal, ma zidyob dxej ni güünnë Dios laa reeman zi'c rüjnnë bejn tijb yag chi ad rtiatan, rütüügaman laan din che'can.

<sup>10</sup> Dxel gunabdiidx reeman, rëb reeman:

—ǰXhie rayal yaguieenan?

<sup>11</sup> Badxi' Wajn rëbaman:

—Bën yu' tio'p xab, rayal gudëëman tijban loj bën achet rajp. Guiaad bën yu' ni raw, rayal gudëëman ta'nän loj bën ryaadxan.

<sup>12</sup> Në tio'p choon ree bën ruquijx impuest bidxin din tiobnijs reeman. Abi' gunabdiidx reeman loj Waj, rëb reeman:

—Mextr, laadx dunujn, ǰxhie rayal yaguieenan?

<sup>13</sup> Badxi' Wajn, rëbaman:

—Ad guquijxidi mazri guial loj ni rayal guquijxidi.

<sup>14</sup> Yu' tëë ree suldad gunabdiidx lojman rëb reex:

—Laadxza dunujn, ǰxhie rayal yaguieenan?

Badxi'män laan rëbaman:

—Ad cwëëxuudi xhie xieen bejn, guial guchejbidi laa reeman o gudxiibidi guijc reeman ni ad beent reeman, gol guziibnejz tëë ni rajxidi.

<sup>15</sup> Guiaad ree bejn gagbeenezdoo reeman bal Wajn naj Cristo, <sup>16</sup> per rëbaman loj gra reeman:

—Naj curobnijs lëjt con nijs. Per zëed tijb bën guroobnijs lëjt con xSprijt Dios në bajl. Laaman rajp mazri guialrniabee guial lon, ni'qui xgurëchaman ad zajc gaxhiecan.

<sup>17</sup> Abi' zi'c raya trigo zian güünnëman bejn. Din bën zinal ree xnejz Dios yayal reeman lod rniabeeman, guiaad ree bën ad zinalt xnejz Dios guixhiaalaman laa reeman loj bajl ni ad yu't dxej yayü'.

<sup>18</sup> Zian guneenë Waj laa reeman, në ree con diidx ren guneenëman laa reeman rulüüman laa reeman xtiidxza'c Dios. <sup>19</sup> Gudilë tëëman rey Herodes guial cwa'män Herodías xbëngunaa bijchaman Filip, në por graczi ni mal ni ma beenman. <sup>20</sup> Per luar nidxga' Herodes xtiidx Waj aal beenman zatijb ni mal: badxe'män Waj ladxguuib.

### *Rirobnijs Jesús*

*(Mt. 3:13-17; Mr. 1:9-11)*

<sup>21</sup> Chi curobnijs Waj bejn ree nëgajc Jesús guroobnijs. Abi' la'tgaj cabejdx canabaman Dios, bixal xanyabaa <sup>22</sup> zianz biguiajxt xSprijt Dios zi'c tijb palom xt guijcaman. Dxel biguien cha' tijb bejn xanyabaa, rëbaman:

—Lüj naj da xi'nän, rënan lüj rabaanë' tëën lüj.

### *Bën goc ree xdiaagulal Jesús*

*(Mt. 1:1-17)*

<sup>23</sup> Cost gajlbichii ijz yu' Jesús chi guzuloj beenman xchiin Dios. Naladx ree bejn xi'n Xiëb najman, Xiëb guin gojc xi'n Elí. <sup>24</sup> Elí gojc xi'n Matat, Matat gojc xi'n Leví, Leví gojc xi'n Melqui, Melqui gojc xi'n Jana, Jana gojc xi'n Xiëb, <sup>25</sup> Xiëb gojc xi'n Matatías, Matatías gojc xi'n Amós, Amós gojc xi'n Nahum, Nahum gojc xi'n Esli, Esli gojc xi'n Nagai, <sup>26</sup> Nagai gojc xi'n Maat, Maat gojc xi'n Matatías, Matatías gojc xi'n Semei, Semei gojc xi'n Xiëb,



Xiëb gojc xi'n Judá, <sup>27</sup> Judá gojc xi'n Joana, Joana gojc xi'n Resa, Resa gojc xi'n Zorobabel, Zorobabel gojc xi'n Salatiel, Salatiel gojc xi'n Neri, <sup>28</sup> Neri gojc xi'n Melqui, Melqui gojc xi'n Adi, Adi gojc xi'n Cosam, Cosam gojc xi'n Elmodam, Elmodam gojc xi'n Er, <sup>29</sup> Er gojc xi'n Josué, Josué gojc xi'n Eliezer, Eliezer gojc xi'n Jorim, Jorim gojc xi'n Matat, <sup>30</sup> Matat gojc xi'n Leví, Leví gojc xi'n Simeón, Simeón gojc xi'n Judá, Judá gojc xi'n Xiëb, Xiëb gojc xi'n Jonán, Jonán gojc xi'n Eliaquim, <sup>31</sup> Eliaquim gojc xi'n Melea, Melea gojc xi'n Mainán, Mainán gojc xi'n Matata, Matata gojc xi'n Natán, <sup>32</sup> Natán gojc xi'n Davi, Davi gojc xi'n Isaí, Isaí gojc xi'n Obed, Obed gojc xi'n Booz, Booz gojc xi'n Salmón, Salmón gojc xi'n Naasón, <sup>33</sup> Naasón gojc xi'n Aminadab, Aminadab gojc xi'n Aram, Aram gojc xi'n Esrom, Esrom gojc xi'n Fares, Fares gojc xi'n Judá, <sup>34</sup> Judá gojc xi'n Jacob, Jacob gojc xi'n Isaac, Isaac gojc xi'n Abraham, Abraham gojc xi'n Taré, Taré gojc xi'n Nacor, <sup>35</sup> Nacor gojc xi'n Serug, Serug gojc xi'n Ragau, Ragau gojc xi'n Peleg, Peleg gojc xi'n Heber, Heber gojc xi'n Sala, <sup>36</sup> Sala gojc xi'n Cainán, Cainán gojc xi'n Arfaxad, Arfaxad gojc xi'n Sem, Sem gojc xi'n Noé, Noé gojc xi'n Lamec, <sup>37</sup> Lamec gojc xi'n Matusalén, Matusalén gojc xi'n Enoc, Enoc gojc xi'n Jared, Jared gojc xi'n Mahalaleel, Mahalaleel gojc xi'n Cainán, <sup>38</sup> Cainán gojc xi'n Enós, Enós gojc xi'n Set, Set gojc xi'n Adán, guiáad Adán gojc xi'n Dios.

## 4

### *Been xindxab Jesús prueb (Mt. 4:1-11; Mr. 1:12-13)*

<sup>1</sup> Yu' xSprijt Dios luxdoo Jesús guidiblagaa. Chi bazaman guiwro' Jordán dxel binë xSprijt Dios laaman lod naj yujbidx. <sup>2</sup> Ni guzuman tiuu dxej tiuu guiaal, abi' been xindxab laaman prueb. Achetczi gudawaman dxej zii ree, zianz gulaanman. <sup>3</sup> Dxel rëb xindxab guin lojman:

—Bal wali najl Xi'n Dios, gunabee yayajc guiaj guie guiadxtil.

<sup>4</sup> Badxi' Jesús laan rëbaman:

—Loj xtiidx Dios rëb: “Ad ganaxtizi guiadxtil guiban bejn, nëgajc gra diidx rníee Dios.”

<sup>5</sup> Dxel binë xindxab guin laaman tijb guijc guia' ya da't, lod balüüx laaman gra ree nacion riga' loj guidxliuj. <sup>6</sup> Abi' rëb xindxab guin lojman:

—Gunen graczi guialrniabee në guialnaza'c ni yu' loj ree nacion guie. Din naj ca' laa reen, zajc gudëdan laa reen loj chutëëz bën rënan. <sup>7</sup> Bal guzuxibil lon abi' guiën da'til naj, graczan gac xieenl.

<sup>8</sup> Badxi' Jesús laan, rëbaman:

—Loj xtiidx Dios rëb: “Tijbzi loj xDadil Dios guzuxibil guiën tëël laaman, abi' tijbzi laaman been sirv.”

<sup>9</sup> Dxel binë xindxab guin laaman Jerusalén, abi' gulë'pix laaman guijc yadooro' zojb luguiedx guin. Zianz rëbix lojman:

—Bal wali najl Xi'n Dios, gudidya' diizd guie xt luyuj, <sup>10</sup> din loj xtiidx Dios rëb: Dios guixhiaal ree xianjlaman din guinia reeman lüj.

<sup>11</sup> Yales reeman lüj con yaa reeman, chitëë quiilguijdx guiaj guia'l.

<sup>12</sup> Badxi' Jesús laan rëbaman:

—Rëb tëë loj xtiidx Dios: “Ad güünl prueb xDadil Dios.”

<sup>13</sup> Chi ad badxejltri xhienaag güün xindxab guin Jesús prueb, dxel biquiedix tibladëd.

### *Rzuloj Jesús rulüüman bejn ree niz Galilea (Mt. 4:12-17; Mr. 1:14-15)*

<sup>14</sup> Badxin Jesús niz Galilea, yu' xSprijt Dios luxdooman guidiblagaa, abi' guidibczi niz yagaj bire'ch xtiidxaman. <sup>15</sup> Rulüüman bejn ree lën ree yadoo guidib niz yagaj, abi' graczi reeman ruza't laaman zagdx.

*Radxin Jesús Nazaret*  
(Mt. 13:53-58; Mr. 6:1-6)

<sup>16</sup> Badxin Jesús Nazaret luguiedx lod guni'saman. Abi' dxej raziiladx ree bejn guyuman lèn yadoo zi'c naj xcostumbraman. Dxel guzuliman persi biilaman xtiidx Dios. <sup>17</sup> Badëéd reeman gui'ch ni bacaa Isaías bèn badëë xtiidx Dios loj ree bejn. Chi bachijlaman loj gui'ch guin, badxejlaman lod rëb:

<sup>18</sup> XSprijt dux Dad ree Dios za'në naj,

din laaman ma beenle' naj din ganen xtiidxza'caman loj ree bënprob.

Guxhaalaman naj din gugoynan bejn ree xhienaag laa reeman loj ni rzajc reeman, yaxhal tëën loj ree bën lutia'p.

Gün tëën yudar bèn rusagzi reeman,

<sup>19</sup> din gugoynan guial ma bidxin dxej za'cdxoon ni güünle' Dios bejn ree.

<sup>20</sup> Dxel batüüb Jesús gui'ch guin bayüman laan loj bèn rüjn yudar lèn yadoo guin, zianz gurejman. Graczi ree bèn riga' yagaj ruguiaadxijch laaman. <sup>21</sup> Dxel guzuloj caneenëman laa reeman, rëbaman:

—Yan dxej gajc ma gojc cumplid zi'c ca loj xtiidx Dios ni ma biguiejndi.

<sup>22</sup> Graczi reeman cuza't laaman zagdxe caydxa tëë loj reeman diidxza'cdxoon ni caneeman. Dxel canabdiidx loj lasa' reeman rëb reeman:

—¿Nid laaman naj xi'n Xiëb ya?

<sup>23</sup> Dxel rëb Jesús loj reeman:

—Ma ragbeen guial nadi tijb diidx ni rëb: “Doctor, bayüjn lüj gajc”, na tëëdi: “Ni ma baguiejnan beenl Capernaum nëgajc guie beenan najn ladxil.”

<sup>24</sup> Rëb tëë Jesús:

—Diidxliczi rnin, ni'czi tijb bèn rudëë xtiidx Dios loj ree bejn, ad rënt reeman laaman ladx gajcaman. <sup>25</sup> Gol basaaladx dád zien ree bëngunaa bizëjb zojb Israel lèn ree dxej guban Elías bèn badëë xtiidx Dios loj ree bejn, chi ad golt guia choon ijz garol, abi' guyu gubijn guidibczi. <sup>26</sup> Per ad guxhaalt Dios Elías guin loj tijb ree bèn bizëjb zojb Israel, guxhaalaman laaman loj tijb bèn bizëjb zojb guiedx la Sarepta, gajxh Sidón. <sup>27</sup> Nè lèn ree dxej guban Eliseo bèn badëë xtiidx Dios loj ree bejn, dád zien ree bejn rajc guialguijdx la lepra, per ni'czi tijb reeman ad bayüjntaman, tijbzi bèn Siria bayüjnman laman Naamán.

<sup>28</sup> Chi biguiejn gra ree bèn yu' lèn yadoo guin ni rëb Jesús, dád balen reeman. <sup>29</sup> Bisu reeman babëë reeman Jesús luguiedx guin, dxel binë reeman laaman ro' tijb bala' ya guial naj guiedx guin guijc tijb guia', din gutedia' reeman laaman. <sup>30</sup> Per gudëd Jesús galay reeman, ziataman.

*Rabëë Jesús xindxab luxdoo tijb bejn*  
(Mr. 1:21-28)

<sup>31</sup> Wej Jesús guiedx Capernaum ni riga' niz Galilea, yagaj rulüüman bejn ree dxej ni raziiladx reeman. <sup>32</sup> Abi' dád badxaloj reeman ni rulüüman guial rnieenëman laa reeman con guialrniabee.

<sup>33</sup> Lèn yadoo guin yu' tijb xin yu' xindxab luxdoo, abi' guridxa' xindxab guin rëbix:

<sup>34</sup> —Basa'n dunujn, ¿xhie rënl con dunujn, Jesús bèn Nazaret? ¿Zëëdil ya zidganijtil dunujn? Nünbeen lüj, naya nalil najl xi'n Dios.

<sup>35</sup> Dxel gudilë Jesús xindxab guin, rëbaman lojx:

—¡Bacwëëz ro'l, barii luxdoo xin guin!

Zianz badxe'bi xindxab guin xin guin luyuj guidib niz loj reeman, bariitix luxdoo achetczi goquix. <sup>36</sup> Graczi reeman badxaloj, rëb loj lasa' reeman:

—¿Xhie ree diidx guin rnieeman? ¡Con guialrniabee ni rajpaman, rniabeeman rarii ree xindxab luxdoo ree bejn!

<sup>37</sup> Abi' guidibczi niz yagaj bire'ch xtiidxaman.

*Rayüjn Jesús xnasuegr Bëd*  
(Mt. 8:14-15; Mr. 1:29-31)

<sup>38</sup> Dxel barii Jesús lën yadoo guin, abi' wejman lidx Simón. Ragxuu xnasuegr Simón guin yu'man xliaadoxh zeel guzajc reeman Jesús liaadx din yayüjnman laaman. <sup>39</sup> Zianz basajb loj Jesús lod naga'man gunabeeman yarii xliaa guin, abi' bariin. Loj hor ziigajc bixchewan guzuloj cudëëman ni gaw reeman.

*Rayüjn Jesús zien ree bénragxuu*  
(Mt. 8:16-17; Mr. 1:32-34)

<sup>40</sup> Chi ma wëëz gubijdx, graczi ree bén rajp bénragxuu bén rajc ree gadxagayaa guialguijdx binë reeman laa reeman loj Jesús, persi badxiib yaaman guijc tijb gaj reeman, bayüjnman laa reeman. <sup>41</sup> Në zien ree bénragxuu guin rarii xindxab luxdoo, rbidxa' reex rëb reex:

—Lüj naj Xi'n Dios!

Per gudilëman xindxab guin ree, ad cwëjbtaman niniee reex, guial ragbee reex laaman naj Cristo.

*Rülüü Jesús xtiidx Dios niz Galilea*  
(Mr. 1:35-39)

<sup>42</sup> Chi bareguiaa, barii Jesús luguiedx guin zëman lod achut bejn zojb. Per raguiil ree bénguiedx guin laaman, bidxin reeman lod za'man abi' rëb reeman lojman din yaya'nnëman laa reeman. <sup>43</sup> Per rëbaman loj reeman:

—Në ree luguiedx ren rayal chinë'n xtiidxza'c Dios guial xhienaag naj xguialrniabee-man, din par zian guxhaalaman naj.

<sup>44</sup> Zian basnuu guneeman xtiidx Dios lën ree yadoo niz Galilea.

## 5

*Rniaaz reeman zien bëjl*  
(Mt. 4:18-22; Mr. 1:16-20)

<sup>1</sup> Tijb dxej chi za' Jesús ro' nijs Genesaret, bidxin ree benzien. Xt rxa't reeman laaman guial rën reeman gucaagdiajg reeman xtiidx Dios. <sup>2</sup> Dxel baguiaa Jesús tio'p barcw ro' nijs guin; ni basa'n ree bén rniaaz bëjl la'tgaj caguiib xguijxh reeman ni rniaaznë reeman bëjl. <sup>3</sup> Zianz wë'paman loj tijb barcw ni naj xbarcw Simón, abi' rëbaman lojman din gudxigaman laan niz galay nijs guin. Dxel gurejman, guzuloj culüüman bejn ree.

<sup>4</sup> Chi gulox guneenëman laa reeman, dxel rëbaman loj Simón:

—Binë barcw guin lod mazri naxhit, gol bazaal xguijxhidi din guiniaazidi bëjl.

<sup>5</sup> Badxi' Simón laan rëbaman:

—Mextr, gudëd guiaalczi baguieenan dxiin, achutczi bëjl wanaazan. Per bal lüj na, yazaalan guijxh guin ree.

<sup>6</sup> Chi bazaal reeman guijxh guin ree loj nijs guin, bëjl zien da't gunaaz reeman xt guzuloj cayaxya' ree guijxh guin. <sup>7</sup> Abi' been reeman sen loj ree xcompniar reeman bén yu' ree loj stijb barcw guin, din chiguieen reeman laa reeman yudar. Dxel wej reeman, abi' bacha reeman bëjl guin ree loj grop barcw guin xt ma nizëëb reen xan nijs. <sup>8</sup> Chi baguiaa Simón Bëd ni goc, bazuxibaman loj Jesús rëbaman:

—Biquied lod za'n, Dad, din bëndol naj.

<sup>9</sup> Guial Simón con ree bén za'nëman badxa loj reeman guial dád zien bëjl gunaaz reeman. <sup>10</sup> Ziangajc badxaloj ree Jacob con Waj, bén naj ree xi'n Zebedeo, naj tëë reeman xcompniar Simón. Per rëb Jesús loj Simón:

—Ad rdxebil, din diizd yan guto'pil bejn ree par Dios luar guiniaazil bëjl.

<sup>11</sup> Dxel babëë reeman barcw guin ree loj nijs guin, basa'n reeman laa reen, zinalt reeman Jesús.

*Rayüjn Jesús tijb bén rajc guialguijdx la lepra**(Mt. 8:1-4; Mr. 1:40-45)*

<sup>12</sup> Chi za' Jesús tijb luguiedx, bidxin tijb bén rajc guialguijdx la lepra, guidibczaman ma yu' guialguijdx guin. Chi baguiaaman Jesús laa bazuxib gajcaman, basajb lojman luyuj, rëbaman:

—Dad, bal rënl, zajc yayüjnl naj.

<sup>13</sup> Zianz basli yaa Jesús baqui'man laaman, rëbaman:

—Rënan. Bayajc.

Loj hor ziigajc bayajc bén guin. <sup>14</sup> Dxel rëb Jesús lojman:

—Achuczi loj guiëbil guial ma bayajquil. Lojzi bixhioz wej din guguiaaman lüj. Binë gon ni rayal chinël zi'c gunabee Moisejs din gagbee gra bejn guial ma bayajquil.

<sup>15</sup> Per guixie guixie mazri bire'ch xtiidx Jesús por gra ree ni zagdxë rüjnman. Abi' dád benzien rdo'p din gucaagdiajg reeman ni rnieeman yayüjn tëëman laa reeman guialguijdx ni rajc reeman. <sup>16</sup> Guiáad laaman rejman niz lod achut bejn zojb, persi rbejdx rniabaman Dios.

*Rayüjn Jesús bén nëjt xcuerp**(Mt. 9:1-8; Mr. 2:1-12)*

<sup>17</sup> Tijb dxej culüü Jesús bejn ree, abi' zojb tio'p choon ree bénfarisew në ree mextr rajc ley, zëed reeman guiedxdo ni riga' ree niz Galilea në niz Judea, në Jerusalén. Za'në xguialrniabee Dios laaman persi rayüjnman bénragxuu ree. <sup>18</sup> Dxel bidxin tio'p choon ree bejn, bidxinnë reeman tijb xin nëjt xcuerp, naga'x loj da. Abi' guyën reeman niunë reeman laax lënü guin din niguijxh reeman laax lod za' Jesús. <sup>19</sup> Per ad badxejlt ban niz niunë reeman laax guial bén guixiuj riga' yagaj. Dxel wë'p reeman guiyc yu guin, abi' biquied reeman tex dxiib guiycan, zianz gulet reeman xinragxuu guin guidib naga'x loj da guin, gudijxh reeman laax galay ree bén guin lod za' Jesús. <sup>20</sup> Chi baguiaa Jesús guial rililadx reeman laaman; rëbaman loj xinragxuu guin:

—Xi'n, ma benan xtolil perdon.

<sup>21</sup> Per ree mextr rajc ley con ree bénfarisew guzuloj cayüjn reeman xgab: “¿Chu xin guin zeel rüjnx mazri xin zojbloj guial loj Dios? Achutczí rajc rüjn perdon dol, tijbzi Dios.”

<sup>22</sup> Per gogbee gajc Jesús xgab cayüjn reeman, dxel rëbaman:

—¿Chexc zeel rüjndi xgab zian? <sup>23</sup> ¿Conin ad nawëëgt gac, guial guiën ya: “Ma naj xtolil perdon”, o guiën: “Bixche guza tëë”? <sup>24</sup> Per yan, gulün lëjt guial Bén guxhaal Dios rajpaman guialrniabee loj guidxliuj guie din güünman perdon dol ree.

Dxel rëb Jesús loj xinragxuu guin:

—¡Bixche, baca' ni go'til loj! Baguiaj lidxil.

<sup>25</sup> Loj hor guin gajc bixchex guidibloj gra ree bén riga' yagaj balesix ni go'tix loj, zianz zia lidxix ruza'tix Dios zagdxë. <sup>26</sup> Graczi reeman badxaløj ruza't tëë reeman Dios zagdxë abi' dád bidxeb reeman, rëb reeman:

—¡Ni'qui tijb ad waguiaat ree zi'ct naj ni cayguiaa ree yan!

*Rbejdx Jesús Leví**(Mt. 9:9-13; Mr. 2:13-17)*

<sup>27</sup> Chi gudëd gojc zian, baguiaa Jesús tijb bén ruquiix impuest, laman Leví, zojbaman lod ruquiixaman. Abi' rëbaman lojman:

—Tanal naj.

<sup>28</sup> Dxel bisu Leví, guro'nladxaman gran zinaltaman Jesús.

<sup>29</sup> Abi' been Leví lanijro' lidxaman par Jesús, në zien ree bén ruquiix impuest zojb nëtëë ree ben ren zojbnë reeman xan mex. <sup>30</sup> Per ree bénfarisew ree në ree mextr rajc ley, bén nuchajg gajc ree bénfarisew guin, guzuloj caneeguijdx reeman xbejn ree Jesús, rëb reeman:

—¿Chexc zeel rë' rawnëdi bén ruquiix ree impuest në ree béndol?

<sup>31</sup> Badxi' Jesús laan rëbaman:

—Bénnadaan ree ad riaadxt reeman doctor, bénragxuu ree laa reeman riaadx Doctor.

<sup>32</sup> Ad zialtan par ree benza'c, zialan par ree béndol din yayüjn reeman xgab por xtol reeman.

*Rniabdiidx reeman loj Jesús xcwent guialrba'n*

*(Mt. 9:14-17; Mr. 2:18-22)*

<sup>33</sup> Bénfarisew ree në ree mextr rajc ley, rëb reeman loj Jesús:

—Xbejn Waj, në ree xbejn ree bénfarisew dád zien volt rba'n reeman rbejdx rniab tëë reeman Dios, guiáad ree xbejnl ganax rë' raw reeman.

<sup>34</sup> Badxi' Jesús laan rëbaman:

—¿Wen zajc güündi nagueijn ya guiba'n ree biooz za' loj guialruxhliaa, la'tgaj za'në xin cuxhliaa guin laa reeman? <sup>35</sup> Per guidxin dxej chiquiedix, dxel guiba'n reeman.

<sup>36</sup> Rëb tëëman loj reeman:

—Achut bén rutüüg ta'n lajd cüb din yata'man laan loj lajd yojx. Bal güünman zian, zaguixya' lajd cüb guin lajdyojx guin, nëtëë yan ad zuguaatan zagdxe loj lajdyojx guin.

<sup>37</sup> Ad rgu' tëët bejn vin cüb lën anfr yojx, din bal güünman zian, zaguixya' vin cüb guin anfr guin, abi' zi'c anfr guin zi'c vin guin zaxin reen. <sup>38</sup> Zeel vin cüb rayal chu'n lën anfr cüb din ni'qui tijb reen ad zaxint. <sup>39</sup> Abi' tijb bén ma gu' vin yu' gocli ad rë'taman vin cüb, din rëbaman: “Vin yu' gocli mazri ni zagdxen.”

## 6

*Rgui'ch ree xbejn Jesús trigo dxej raziiladx ree bén Israel*

*(Mt. 12:1-8; Mr. 2:23-28)*

<sup>1</sup> Tijb dxej raziiladx ree bén Israel, la'tgaj cadëd Jesús con ree xbejnman loj tijb guiniaa lod yu' trigo. Guzuloj cagui'ch reeman trigo guin, dxel cuxho'p reeman laan cayaw reeman. <sup>2</sup> Abi' yu' ree bénfarisew rëb loj reeman:

—¿Chexc zeel rüjndi ni ad rayalt güündi dxej raziiladx ree bejn?

<sup>3</sup> Badxi' Jesús laan, rëbaman:

—¿Gadidi gool loj xtiidx Dios ya ni been Davi chi gulaanman con ree xcompniaraman?

<sup>4</sup> Guyuman lën xyadoo Dios, cwa'man guiadxtil ma nagle' ree gudawaman con ree xcompniaraman, ni ad rayalt niajw reeman bixhiosi ree rayal gaw laa reen.

<sup>5</sup> Rëb tëë Jesús loj reeman:

—Bén guxhaal Dios rajpaman guialrniabee dxej raziiladx ree bejn.

*Rayajc tijb xin naxü'n tiblad yaa*

*(Mt. 12:9-14; Mr. 3:1-6)*

<sup>6</sup> Zatijb dxej raziiladx reeman, guyu Jesús lën tijb yadoo abi' guzuloj culüüman bejn ree. Yagaj za' tijb xin naxü'n yaa ladbee. <sup>7</sup> Abi' ree mextr rajc ley në ree bénfarisew rzunal reeman din guidoon zayüjn Jesús laax dxej raziiladx reeman ya, din gac gutedia' reeman Jesús. <sup>8</sup> Per laaman ragbee gajcaman xhie xgab cayüjn reeman, zeel rëbaman loj xin naxü'n yaa guin:

—Bisu, guzuli galay guin.

Dxel guzulix, guzujx galay guin. <sup>9</sup> Dxel rëb Jesús loj reeman:

—Ganabdiidxan lëjt: ¿Xhie rayal güün bejn dxej raziiladx reeman, ni zagdxe ya o ni mal? ¿Guslaaman xguialnaban bejn ya o gugüjtaman laaman?

<sup>10</sup> Dxel baguiaa Jesús gra ree bén riga' yagaj, abi' rëbaman loj xin guin:

—Basli yaal.

Dxel beenx zi'c rëbaman, abi' bayajc yaax. <sup>11</sup> Per laa reeman dád bidxe'ch reeman, guzuloj rëb loj lasa' reeman xhienaag güünnë reeman Jesús.

*Rbe Jesús chiptio'p ree apóstoles*  
(Mt. 10:1-4; Mr. 3:13-19)

<sup>12</sup> Lën ree dxej zii wej Jesús tijb ruguia' persi gurejdx gunabaman Dios, abi' gudëd guiaalczi gurejdx gunabaman Dios yagaj. <sup>13</sup> Chi bareguiaal, gurejdxaman bën nal ree laaman, dxel gulejman chiptio'p reeman loj reeman, abi' guneeman laa reeman apóstoles. <sup>14</sup> La reeman: Simón, bën gulëelajman Bëd, Andrejs bijch Simón, Jacob, Waj, Felip, Tol, <sup>15</sup> Matew, Tumajs, Jacob xi'n Alfeo, Simón, bën bi'ch loj ree bën cananistas, <sup>16</sup> Judas xi'n Jacob, në Judas Iscariote bën bayü Jesús.

*Ruliü Jesús zien ree bejn*  
(Mt. 4:23-25)

<sup>17</sup> Baguiajt Jesús ruguia' guin con guidxiptio'p ree xbejnman, badxin reeman lod naj tijb la'ch. Yagaj bado'p zien ree xbejnman në ree ben ren, bën zëed ree niz Judea në Jerusalén në ree bën zëed Tiro con Sidón, guiedx riga' ree gajxh ro' nijsdoo. Bidxin reeman din gucaagdiajg reeman xtiidx Jesús din yayüjn tëeman laa reeman guialguijdx ni rajc reeman. <sup>18</sup> Në ree bën yu' xindxab luxdoo bayajc. <sup>19</sup> Zeel graczi ree bejn rën guqui' laaman, guial rayüjnman laa reeman con xguialrniabeeman.

*Xiquilbaa ree bejn*  
(Mt. 5:1-12)

<sup>20</sup> Dxel baguiaa Jesús loj ree xbejnman, abi' rëbaman:  
—Xiquilbaadi bënprob, din lëjt rayal loj xguialrniabee Dios.  
<sup>21</sup> 'Xiquilbaadi bën rliaan ree yan, din Dios gunee ni gawidi xt chigdxinladxidi.  
'Xiquilbaadi bën roon ree yan, din zadxin dxej guxijdxidi.  
<sup>22</sup> 'Xiquilbaadi chi rdxe'ch bejn lëjt, chi rabëëca reeman lëjt, rnieeguijdx tëe reeman lëjt, naladx reeman najdi bendxuudx guial rliladxidi Bén guxhaal Dios. <sup>23</sup> Gol babaa gol badxe' tëe luxdoodi zagdxe chi güünnë reeman lëjt zian, din zro' ni tia'di yu' xanyabaa, din ziangajc beennë xbéngulal reeman bën badëë ree xtiidx Dios loj ree bejn.  
<sup>24</sup> 'Per probza lëjt benrijcw, din ma guyuxgaj luxdoodi nix.  
<sup>25</sup> 'Probza lëjt bën raw xt rigdxinladx yan, din zadxin dxej guiliaandi.  
'Probza lëjt bën ruxijdx yan, din zadxin dxej goondi guial chu'nayadi.  
<sup>26</sup> 'Probza lëjt, bën ruladx ree guilies bejn xvalor, din zian beennë ree xbéngulal reeman bën goc ree bën rusquiee, rëb reeman rudëë reeman xtiidx Dios loj ree bejn.

*Guyën bën rdxe'ch lüj*  
(Mt. 5:38-48; 7:12)

<sup>27</sup> 'Per ganin lëjt bën rucaagdiajg ree da diidxan: Gol guyën bën ralen lëjt, gol gojc benza'c con ree bën yu'xyajn lëjt, <sup>28</sup> gol bazaal diidxza'c guiyc ree bën ruzaal diidxmal guijquidi, gol gurejdx gunab Dios por ree bën rnieeguijdx lëjt. <sup>29</sup> Bal chu chëez tiblaxhajguil, badëed zatibladan, bal chu cwëëxuu xchamarril, ad cwexuul chinëman në xmanguil. <sup>30</sup> Chutëez bën rniab xhienin lojl, badëedan. Bal chu rquied xhie xieenl, ad bal yanabilan. <sup>31</sup> Gol beennë ree bejn zi'c rëndi güünnë reeman lëjt.  
<sup>32</sup> 'Bal rëndi ganaxzi bën rën lëjt, ¿xhieza ni zagdxen cayüjndi? Din xt bëndol ree rüjn zian, rën reeman bën rën laa reeman. <sup>33</sup> Abi' bal rüjndi wen ganaxzi bën rüjn lëjt wen, ¿xhieza ni zagdxen cayüjndi? Din xt bëndol ree rüjn zian. <sup>34</sup> Ziangajc bal rudëedidi ni rgui'n ganaxzi bën naladxidi zajc yaguijx lojdi, ¿xhieza ni zagdxen cayüjndi? Din xt në ree bëndol rudëed rgui'n ree bën naladx reeman zajc yaguijx loj reeman. <sup>35</sup> Per lëjt gol guyën bën ralen lëjt, gol been reeman wen. Gol badëed qui'n reeman, ad cwëzidi xhie tia'di guijcan. Zian tia'di zro' guialnaza'c ni gunee Dios bën yu' xanyabaa, gac tëedi xi'nman, din laaman naj benza'c con ree bën ad rudëët quixtëe lojman në con ree benmal. <sup>36</sup> Gol baya bejn zi'c raya dux Dad ree Dios bejn.

*Xcwent guialrula'ch*  
(Mt. 7:1-5)

<sup>37</sup> 'Ad gula'chidi, ad gudxiib tēedi ni mal guiyc ree bejn chitēē saquidi zian, gol been perdon din gaquidi perdon. <sup>38</sup> Gol badēēd ni riaadx ree bejn, Dios mazri zro' naj ni guneeman zi'c tijb bols guidxadi. Din zi'c rudēēdidi loj ree bejn, ziant gajc naj ni gunee Dios lojdi.

<sup>39</sup> Rēb Jesús loj reeman zatijb diidx:

—¿Wen zajc chinē bēnlutia'p zatijb bēnlutia'p ya? ¿Nid zayajb grop reeman ro' bala' ya? <sup>40</sup> Tijb bēn cusiid, ad mazt rajcaman guial loj xmextraman. Guiáad chi ma gulox basiidaman rajcaman zi'ctgajc rajc xmextraman.

<sup>41</sup> 'Ad gula'chil ben ren por faltdobēz ni rajpaman, zagdxeli guyu xgab por falt narooob ni rajpil. <sup>42</sup> Abi' bal mazri falt narooob rajpil, ¿xoza guiēbil loj zatijb bejn: “Ad laat naj ni rüjnl”? ¡Bén rusquiee! yalojxgaj been zi'c rayal, chi ma beenl zian dxel ma zile' guiēbil loj zatijb bejn: “Ad laat naj ni rüjnl”.

*Por ni rtia loj yag rayünbee bejn xhie yagan*  
(Mt. 7:17-20; 12:33-35)

<sup>43</sup> 'Ad yu't yag zagdxē rtia ni guiidx loj, ad yu' tēēt yag guiidx rtia ni zagdxē loj. <sup>44</sup> Din tijbgaj yag rayünbee bejn xhie yagan por ni rtia lojn. Ad raru't higo loj yaquiejch, ad raru' tēēt uv loj gui'xh. <sup>45</sup> Benza'c rnieeman diidxza'c din laan yu' luxdooman, guiáad benmal rnieeman diidxmal din laan yu' luxdooman. Din ni yu' luxdoo bejn laan rnieeman.

*Tio'ploj cimiant*  
(Mt. 7:24-27)

<sup>46</sup> ¿Chexc zeel rnieedi naj, “Dad, Dad”, abi' adza rüjntidi ni rnin? <sup>47</sup> Ganin lojdi chu naj zi'c bēn ri't lon, rigueijnman ni rēn, abi' rüjnman laan: <sup>48</sup> laaman naj zi'c tijb bēn been yu, yaloj xgaj gudēēnman naxhit xt chi bila loj guiaj, dxel gulesaman xcimiantan guiyc guiaj guin. Abi' chi bi't nijsro' majsi gulajn lad yu guin, per ni'quid baniibtan laan guial naj cimiant guin guiyc guiaj. <sup>49</sup> Per bēn rigueijn da diidxan abi' ad rüjntaman laan, najman zi'c tijb bēn been yu ni ad yu't xcimiant. Abi' chi bi't nijsro' gulajn lad yu guin, balenxanan laan, tiblayaazi base'nan laan.

## 7

*Rayajc xmojs tijb suldad rom xin rniabee ree suldad*  
(Mt. 8:5-13)

<sup>1</sup> Chi gulox guneenē Jesús bejn ree, dxel zēman Capernaum. <sup>2</sup> Yagaj zojb tijb suldad Rom xin rniabee ree suldad. Yu' tijb xmojsix xin rēn da'tix, ragxuu mojs guin ma rulüücüzi guiētix. <sup>3</sup> Chi bigueijn suldad rniabee guin ruza't ree bejn Jesús, guxhaalix tio'p choon ree bēn rniabee Israel lojman din chisajc reeman liaadx yayüjnman xmojsix. <sup>4</sup> Abi' bidxin reeman loj Jesús guzajc reeman liaadx, rēb reeman:

—Gagnēsiil suldad rniabee guin, <sup>5</sup> din rēnx bēn duladx ree, nē yan por laax gojc dux yadoo ree.

<sup>6</sup> Dxel binē Jesús laa reeman. Per chi ma cadxin reeman gajxh lidxix, guxhaal tio'p choon ree xmiwix loj Jesús biguiedx reex lojman:

—Dad, ad chu'l xgab, din ad rayaltan chu'l lēnü lidxan, <sup>7</sup> zeel ad bayaxtan nial quijb naj nidgadilan lüj. Per con gunee diizd lod za'l din yayajc da mojsan. <sup>8</sup> Din zi'c naj yu' ree bēn rniabee naj, ziangajc naj yu' ree da suldadan xin rniabeen. Chi rēn loj tijb reex: “Wej”, reyx. Chi rēn loj zatijbix: “Guda”, ri'tix. Abi' chi rēn loj da mojsan: Been ni guin, rüjngajquixan.

<sup>9</sup> Chi bigueijn Jesús zian, dád badxa lojman ni rēb suldad guin, abi' badxi' lojman loj gra ree bēn zinal laaman, rēbaman:

—Diidxiczi rnin, ni'qui Israel ad wadxaaglojtan tijb b́en rliiladx da't Dios zi'c rliiladx xin guin Dios.

<sup>10</sup> Chi badxin ree xin guxhaal suldad rniabee guin lidxix, baguiaa reex ma bayajc mojs guin.

### *Rasban Jesús xi'n tijb b́engunaa bizējb*

<sup>11</sup> Chi gudēd gojc zian, wej Jesús tijb luguiedx la Naín binē ree xbejnman, nē zien ree ben ren. <sup>12</sup> Chi bidxinman gajxh ro' guiedx guin, baguiaaman ziquie'ch reeman tijb xingüt, tijbzi laax naj xi'n xniaax, najman b́en bizējb. Zien da't ree b́enluguiedx guin zinal laaman. <sup>13</sup> Chi baguiaa Dad Jesús laaman, bayaman laaman, dxel rēbaman lojman:

—Ad roonl.

<sup>14</sup> Abi' bibig Jesús baqui'man xcaj xingüt guin, dxel guzudxe ree b́en zinē laax. Zianz rēbaman lojx:

—Xi'n, naj rni lojl: ¡Bixel!

<sup>15</sup> Dxel gureli xin guin, guzuloj caneex, zianz bayü Jesús laax loj xniaax. <sup>16</sup> Chi baguiaa reeman zian, graczi reeman bidxeb guzuloj cuza't reeman Dios zagdxe, rēb reeman:

—Du loj ree ma gules Dios tijb b́en zobjloj, b́en rudēē xtiidx Dios loj ree bejn.

Rēb tēē reeman:

—Ma bi't Dios din gagnē ree xbejnman.

<sup>17</sup> Abi' guidib niz Judea nē ree guiedx riga' niz yagaj gogbee ree bejn ni been Jesús.

### *Bigneenē ree xbejn Waj Jesús*

*(Mt. 11:2-19)*

<sup>18</sup> Gogbee Waj gra ree ni cayüjn Jesús, guial bagojn ree xbejnman laaman. Abi' guneeman tio'p reeman, <sup>19</sup> dxel guxhaalaman laa reeman loj Jesús din chignabdiidx reeman bal laacaman naj Cristo b́en naj diidx gui't, b́en cabēz reeman, o cwēz reeman ben ren ya. <sup>20</sup> Abi' bibig reeman, guneenē reeman laaman, rēb reeman lojman:

—Waj b́en ruroobnijs bejn ree guxhaal dunujn lojl zudganabdiidxan bal lūjcan naj Cristo b́en naj diidx gui't, b́en caylējzan o yalējzan ben ren ya.

<sup>21</sup> Hor ziigajc bayüjn Jesús zien da't ree b́enragxuu, nē ree b́en rdoob, nētēē ree b́en yu' xindxab luxdoo, baxhal tēēman loj ree b́enlutia'p. <sup>22</sup> Dxel badxi' Jesús xtiidx ree b́en guxhaal Waj, rēbaman:

—Gol chej, gol chiguiedx loj Waj ni cuguiaadi nē ni caguiejndi. Gol güjdx lojman guial ma ruguiaa ree b́enlutia'p, ma rajc rza ree bencoj, ma rayajc tēē ree b́en goc guialguijdx la lepra, ma rigueijn ree b́en nacwa't, guiáad ree bengüt ma baban reeman, abi' ree b́enprob ma caguiejn reeman xtiidxza'c Dios. <sup>23</sup> ¡Xiquilbaa ree b́en ad zucwēēt chililadx naj!

<sup>24</sup> Chi baza ree b́en guxhaal Waj, guzuloj Jesús caneeman xcwent Waj loj ree bejn, rēbaman:

—¿Chu naladxidi naj b́en biquiaadi loj yujbidx? ¿Naladxidi ya najman zi'c tijb biqui runiib bi? <sup>25</sup> ¿O chu biquiaadi? ¿Tijb b́en najcw lajd zagdxe ya? Lējt ragbee guial b́en rajcw ree lajd zagdxe, nē ree b́en naban zagdxe, lēn palas zobj reeman. <sup>26</sup> ¿Chu biquiaadi? ¿Tijb b́en rudēē xtiidx Dios loj ree bejn ya? Per diidxiczi rnin lojdi, biquiaadi tijb b́en mazri zobjloj guial loj tijb b́en rudēē xtiidx Dios loj ree bejn. <sup>27</sup> Wajn naj b́en ruza't xtiidx Dios, lod rēb:

Naj rxhial tijb b́en ned lojl,

b́en güünchaaw xnejzil.

<sup>28</sup> Rnin lējt, loj graczi ree b́enguidxliuj ad wayut b́en rudēē xtiidx Dios loj ree bejn, b́en mazri zobjloj guial loj Waj. Per majsi zian, b́en ad zobjlojt loj xguialrniabee Dios, laaman mazri zobjloj guial loj Waj.

<sup>29</sup> Gra ree bejn, nē ree b́en ruquiix impuest b́en baroobnijs Waj, chi bigueijn reeman ni rēb Jesús bignia' reeman guial rüjn Dios zi'c rayal. <sup>30</sup> Per ree b́enfarisew con ree mextr



rajc ley ad cwëjbt reeman nuroobnijs Waj laa reeman, zian ad guyënt reeman ni rën Dios par laa reeman.

<sup>31</sup> Rëb tëë Jesús:

—¿Xhienaag ganin lëjt naj ree bën riga' loj guidxliuj guie yan? ¿Chu naj zi'c laa reeman?

<sup>32</sup> Laa reeman naj zi'c ree xindoo rguijt niz galay luguiedx, abi' rbixdiaj reex rëb loj lasa' reex: “Bacwejdxan par nuya'di, per ad baya'tidi, badoolan ni naya ree, per ad biintidi.”

<sup>33</sup> Din bi't Waj bën baroobnijs bejn ree, ad rawtaman ad rë' tëëtaman vin, abi' rëbidi xindxab yu' luxdooman. <sup>34</sup> Yan bi't Bén guxhaal Dios, rawaman rë' tëëman vin, abi' rëbidi guial dád nalaman ruladxaman guië'man, ruchajg tëëman bëndol ree con ree bën ruquijx impuest. <sup>35</sup> Per xguialrignia' Dios, rguienan por ree xbejnman.

### *Rej Jesús lidx tijb bënfarisew la Simón*

<sup>36</sup> Tijb bënfarisew rëb loj Jesús din chitaw Jesús guin lidxaman. Abi' bidxinman lidxaman gurejman xan mex. <sup>37</sup> Dxel tijb béngunaa dxuudx zojb gajc luguiedx guin. Chi gogbeeman cayaw Jesús lidx bënfarisew guin, bidxinnëman tijb lumejt yu' perfum. <sup>38</sup> Dxel roonman gurejman lod nuzuj guia' Jesús, guzuloj caxhie' nijs carii lojman guia' Jesús. Abi' cucwiidxnë guidxguijcaman laan, cayawaman xid guia'man curoob tëëman laan perfum guin. <sup>39</sup> Chi baguiaa bënfarisew guin zian, beenman xgab: “Balgui zian wali bën guin najman bën rudëë xtiidx Dios loj ree bejn, zagbeeman chunin cuqui' laaman xhie tëë naag naban béngunaa guin, najman bendxuudx.” <sup>40</sup> Dxel rëb Jesús loj bënfarisew guin:

—Simón, yu' tijb ni ganin lüj.

Badxi' bënfarisew guinan rëbaman:

—Gunan, mextr.

<sup>41</sup> Abi' rëb Jesús lojman:

—Tijb bën rudëëd milia rgui'n ree bejn, ral tio'p ree bejn lojman. Tijbaman nuzëëb gaaygayuu denario, zatijbaman nuzëëb tü'pchiin. <sup>42</sup> Grop reeman ad beent gan naguijx lojman, per bën badëëd milia guin rëbaman loj reeman guial ad zaguijxt reeman ni nuzëëb reeman. Yan guna, ¿chu loj grop reeman mazt guiën laaman?

<sup>43</sup> Badxi' Simón laan, rëbaman:

—Par naj, bën bazëëb mazri zro' guin.

Dxel rëb Jesús:

—Waliquil.

<sup>44</sup> Zianz baguiaa Jesús loj béngunaa guin, abi' rëbaman loj Simón:

—¿Ruguiaal béngunaa guie ya? Chi guyu'n lidxil ad baneetil nijs niëd guia'n. Guiáad laaman gudiibaman guia'n con nijs brii lojman, abi' bacwiidxaman laan con guidxguijcaman. <sup>45</sup> Ad gudawtil naj xid, guiáad laaman diizd chi guyu'n ad rbëzt rawaman xid guia'n. <sup>46</sup> Achet sejt badxe'l guican, per laaman ma badxe'man perfum guia'n. <sup>47</sup> Zeel rnin lüj, gra ree xtolaman ma gojc perdon guial rën da'taman naj. Per bën yu' ta'nz xtol abi' rajcaman perdon, ta'nz rënman naj.

<sup>48</sup> Dxel rëb Jesús loj béngunaa guin:

—Ma naj gra xtolil perdon.

<sup>49</sup> Guiáad ree bën zojbnëman yagaj guzuloj canabdiidx loj lasa' reeman, rëb reeman:

—¿Chu bën guin zeel xt në ree dol rüjnman perdon?

<sup>50</sup> Per rëb Jesús loj béngunaa guin:

—Ma najl perdon guial rliladxil naj, baguiaj zagdxe ad ruril xgab.

## 8

### *Béngunaa been ree Jesús yudar*

<sup>1</sup> Chi gudëd gojc zian, wej Jesús gra ree guiedx narooob në ree guiedx dobëz bicojnman biglüü tëëman xhienaag naj xguialrniabee Dios. Në guidxiptio'p ree apóstoles binëman,

<sup>2</sup> nētēē tio'p choon ree béngunaa, bén babēēman xindxab luxdoo, nē ree bén bayünman guialguijdx ni rajc reeman. Loj reeman no'ch María Magdalena, bén babēē Jesús gajdx xindxab luxdoo. <sup>3</sup> Nē Xuan, lacheel Cuza, Cuza guin goc bén nulen xchiin Herodes. Nē Susan nētēē zien ree béngunaa ren, been reeman yudar Jesús con ni rajp reeman.

*Xcwent bén rtie'ch bin*  
(Mt. 13:1-9; Mr. 4:1-9)

<sup>4</sup> Zien ree bejn brii loj ree guiedx ziquiaa reeman Jesús. Chi bido'p ree benzien, beman tijb cwent loj reeman rēbaman:

<sup>5</sup> —Tijb bejn zēman zigtie'chaman bin. Chi catie'chaman laan, ta'n nan biajb lunejz abi' balēē ree bejn gujcan gudaw tēē ree biguijn laan. <sup>6</sup> Zata'n nan biajb loj ree guiaj, chi gulejn reen gubidx reen guial ad yu' xcojpt loj ree guiaj guin. <sup>7</sup> Zata'n nan biajb loj ree yaquiējch. Abi' chi guni's reen tijbzi, banidloj yaquiējch guin laa reen. <sup>8</sup> Zata'n nan biajb loj yujza'c abi' dád gojcan, cwa xt tibgayuu bin loj tijbgajn.

Chi gulox gunee Jesús zian, dxel guneeman rejs rēbaman:

—Bén rēn gucaagdiajg, gol bacaagdiajg.

*Chexc zeel rulüü Jesús con cwent ree*  
(Mt. 13:10-17; Mr. 4:10-12)

<sup>9</sup> Dxel gunabdiidx ree xbejn Jesús lojman, rēb reeman:

—¿Xhie rēn guiēb cwent guin?

<sup>10</sup> Badxi' Jesús laan rēbaman:

—Lējt, Dios ma basa'n lējt din chignia'di xhienaag naj xguialrniabeeman. Per loj gra reeman rünan zi'c cwent din majsi rani loj reeman, per ad zuguaat reeman, majsi riguejn reeman, per ad zignia't reeman.

*Rusignia' Jesús xcwent bén rtie'ch bin*  
(Mt. 13:18-23; Mr. 4:13-20)

<sup>11</sup> 'Ni ne rēn guiēb xcwent bén rtie'ch bin: Bin guin naj zi'c xtiidx Dios, <sup>12</sup> guiáad bin biajb runejz naj zi'c ree bén riguejn xtiidx Dios; per rdxin gajc xindxab rquiedix laan luxdoo reeman chitēē chililadx reeman laan abi' gac reeman perdon. <sup>13</sup> Guiáad bin biajb loj ree guiaj, naj zi'c ree bén riguejn xtiidx Dios, abi' dád nix ru luxdoo reeman riguejn reeman laan, per guial naj reeman zi'c cwaan ni ad yu't liuj, rliladx reeman laan tiblādēd abi' chi rzagdiaj reeman laa rusa'n gajc reeman ni rliladx reeman. <sup>14</sup> Guiáadza bin biajb loj ree yaquiējch, naj zi'c ree bén riguejn xtiidx Dios; per ru reeman xgab por gra ree guialnaza'c riga' loj guidxliuj guie rüjn tēē reeman ni rēntzi reeman, abi' zianz rucwēēz rucaagdiajg reeman xtiidx Dios ad rüjn tēēt reeman ni rēnman. <sup>15</sup> Guiáad bin biajb loj yujza'c, laan naj zi'c ree bén rucaagdiajg xtiidx Dios, rucaagdiajg reeman laan con guidib luxdoo reeman za'dxi'ch tēē reeman loj xnejzaman, zianczi rüjn reeman ni rēnman.

*Achet ni naguie'ch yu'*  
(Mr. 4:21-25)

<sup>16</sup> 'Achut bén ruze'c tijb guij dxel ruta'cwaman laan, ad rudxe' tēētaman laan xan lon, ruzujman laan ya din gusnin loj ree bén chu' lēnü. <sup>17</sup> Achet ni naguie'ch yu' ni ad zaguiant ad yu' tēēt ni ralan ni ad zagbeet bejn, zadxin dxej gagbee bejn laan.

<sup>18</sup> 'Zeel gol bacaagdiajg zagdxe, bén ma rignia' gusnuu chignia'man mazri, per bén ad rignia't, xt ta'n ni naladxaman rignia'man ad zignia'traman.

*Xniaa Jesús con ree bijchaman*  
(Mt. 12:46-50; Mr. 3:31-35)

<sup>19</sup> Xniaa Jesús con ree bijchaman bidxin reeman lod za'man, per ad gojct nibig reeman lojman guial dád zien bejn riga'. <sup>20</sup> Abi' yu' bén bagojn Jesús rēbaman:

—Laa xniaal con ree bijchil za' lule' guin rēn reeman guinieenē reeman lüj.

<sup>21</sup> Badxi' Jesús laan rëbaman:

—Bén rucaagdiajg ree xtiidx Dios rüjn tëë reeman zi'c rënman, laa reeman naj da nan laa tëë reeman naj da bichan.

*Racwëëz Jesús bidoxh*

(Mt. 8:23-27; Mr. 4:35-41)

<sup>22</sup> Tijb dxej guyu Jesús loj barcw con ree xbejnman, abi' rëbaman loj reeman:

—Yo' ree zatiblad ro' nijs guin.

Zianz zë reeman. <sup>23</sup> La'tgaj cadëd reeman loj nijs guin, goodyëjs Jesús. Dxel guzuloj cabi' bidoxh loj nijs guin, abi' cadxa nijs loj barcw guin, ma cazëëbczi barcw guin xan nijs. <sup>24</sup> Dxel bacwëën reeman Jesús, rëb reeman:

—¡Mextr! ¡Mextr! ¡Ma cayzëëb ree xan nijs!

Abi' bixche Jesús gunabeeman bacwëëz bidoxh guin në xtüjp nijs guin, zianz gulëjz reen dxel bayajcdxe. <sup>25</sup> Abi' rëbaman loj reeman:

—¿Conza xguialrliladxidi?

Per laa reeman dád bidxeb reeman badxa tëë loj reeman, abi' canabdiidx loj lasa' reeman rëb reeman:

—¿Chu Bén guin zeel rniabeeman bi në nijs, abi' ruzoob reen xtiidxaman?

*Rayüjn Jesús tijb xin yu' xinxab luxdoo*

(Mt. 8:28-34; Mr. 5:1-20)

<sup>26</sup> Dxel badxin Jesús con ree xbejnman xdajn ree Bén Gadara, ni riga' zatiblad ro' nijs Galilea. <sup>27</sup> Chi barii Jesús loj barcw guin, bibig tijb xin luguiedx guin lojman. Ma gojc xchej da't yu' xinxab luxdoox. Ad rajcwt xabix, ad nabantix lënü, ganaxzi ro' ree baa nabanax. <sup>28</sup> Chi baguiaax Jesús bazuxibix lojman, guneex rejs rëbix:

—¿Xhie rënl con naj, Jesús, Xi'n Dios yu' xanyabaa? Rniaaban lojl ad gusagzil naj.

<sup>29</sup> Rëbix zian guial ma canabee Jesús din yarii xinxab guin luxdoox. Ma gojc xchej naaz xinxab guin laax. Abi' ma guxhii ree bejn yaax në guia'x con caden chitëë ban chex, per rutüguia'gajquix caden guin abi' rulaagdxax xinxab guin laax niz lod achut bejn zojb.

<sup>30</sup> Gunabdiidx Jesús lojx rëbaman:

—¿Chu lal?

Badxi'xan rëbix:

—Legión lan.

Rëbix zian guial zien da't ree xinxab yu' luxdoox. <sup>31</sup> Rëb ree xinxab guin loj Jesús chitëë guixhiaalaman laa reex gabijl. <sup>32</sup> Dajn guin riga' zien ree cüch cayaw reeb. Zeel rëb ree xinxab guin lojman din gudëëman mod chu' reex lën ree cüch guin, dxel cwëjbaman. <sup>33</sup> Zianz barii reex luxdoox bayu reex lën ree cüch guin, abi' guzuloj cuxüün reeb zianz bitidia' reeb ro' bala' xt loj nijs, lod gu' reeb nijs abi' güjt reeb.

<sup>34</sup> Chi baguiaa ree Bén cayajp ree cüch guin ni goc, baxüün reeman bicojn reeman bejn ree luguiedx në ree dajn. <sup>35</sup> Dxel wej reeman biquiaa reeman ni goc. Chi bidxin reeman lod za' Jesús, baguiaa reeman xin barii xinxab guin ree luxdoo, zojbix guia'man ma najcw xabix, ma badëdguienx abi' bidxeb reeman. <sup>36</sup> Guiáad ree Bén baguiaa ni goc, be reeman diidx loj reeman xhienaag bayajquix. <sup>37</sup> Graczi ree Bén zojb Gadara gunab loj Jesús din yazaman yagaj guial dád rdxeb reeman. Dxel bayë'paman loj tijb barcw, ziataman. <sup>38</sup> Guiáad xin barii xinxab guin ree luxdoo rëbix lojman din chinalix laaman, per ad cwëjbtaman, rëbaman lojx:

<sup>39</sup> —Baguiaj lidxil, biguiedx graczi ni been Dios por lüj.

Dxel ziax luguiedx guin abi' bex diidx loj gra ree bejn ni been Jesús por laax.

*Rayajc xi'n Jairo në béngunaa bagaal xab Jesús*

(Mt. 9:18-26; Mr. 5:21-43)

<sup>40</sup> Chi badxin Jesús zatiblad ro' nijs guin, dád rabaa gra ree bén za' yagaj guial badxinman din mal cabëz reeman laaman. <sup>41</sup> Dxel bidxin bén la Jairo, laaman rniabee lën tijb xyadoo ree bén Israel. Bazuxibaman loj Jesús, rëbaman lojman din cheman lidxaman, <sup>42</sup> guial yu' tijb xi'nman biin chiptio'p ijz, ma guiëtczim. Chi zë Jesús dád zien ree bejn zinal laaman xt rixa't reeman laaman.

<sup>43</sup> Abi' tijb béngunaa no'ch loj reeman, ma gojc chiptio'p ijz ragxuuman ryajbaman rejn. Ma banijtaman graczi ni rajpaman guial wejman loj ree doctor, per ni'qui tijbaman ad gojct nayüjn laaman. <sup>44</sup> Bibigaman niz xijch Jesús abi' bagaalaman guia' xabaman. Loj hor ziigajc bayajcaman.

<sup>45</sup> Dxel gunabdiidx Jesús rëbaman:

—¿Chu baqui' naj?

Abi' graczi reeman rëb guial ad laat reeman baqui' laaman. Zianz rëb Bëd loj Jesús:  
—Mextr, graczi ree bejn xt rixa't reeman lüj cucadxaa tëë reeman lüj, abi' rniabdiidxil chu baqui' lüj.

<sup>46</sup> Per rëb Jesús zatijb:

—Yu' chu baqui' naj din gogbeen yu' tijb bén ma bayajc con da guialrniabeen.

<sup>47</sup> Chi gogbee béngunaa guin guial ma gogbee gajc Jesús ni beenman, guidib rnijman bigzuxibaman loj Jesús. Dxel rëbaman lojman guidibloj ree bén guin chexc zeel baqui'man xabaman abi' loj hor guin gajc bayajcaman. <sup>48</sup> Dxel rëb Jesús lojman:

—Xi'n, ma bayajquil guial bililadxil naj, baguiaj zagdxé.

<sup>49</sup> Sta caneenë Jesús béngunaa guin, chi bidxin tijb bén guza lidx Jairo, bén rniabee lën xyadoo ree bén Israel, rëbaman loj Jairo:

—Mal güjt xi'nl, ad ruslenril Mextr guin.

<sup>50</sup> Per chi biguiejn Jesús zian, rëbaman loj Jairo:

—Ad rdxebil, bililadxzi, zayajcqui xi'nl.

<sup>51</sup> Chi bidxin reeman lidxaman, ad cwëjbt Jesús niu ree ben ren, Bëdzi con Waj, con Jacob, con ree xdad xniaa bindo guin. <sup>52</sup> Graczi ree bén riga' yagaj cayoon, yu'naya tëë reeman por laam. Per rëb Jesús loj reeman:

—Ad roondi, ad güjttim, naga'yëjszim.

<sup>53</sup> Graczi reeman baze' laaman guial ma ragbee reeman güjtim. <sup>54</sup> Dxel gunaaz Jesús yaam, guneeman rejs, rëbaman:

—Bindoo, bixche.

<sup>55</sup> Loj hor ziigajc babanm, bixchem. Dxel gunabee Jesús badëëd reeman ni gudawim.

<sup>56</sup> Dád badxa loj ree xdadim, per rëb Jesús loj reeman achu loj guiëb reeman ni goc.

## 9

### *Rxhiaal Jesús guidxiptio'p ree xbejnman chiglüü reeman xtiidx Dios (Mt. 10:5-15; Mr. 6:7-13)*

<sup>1</sup> Gurejdx Jesús guidxiptio'p ree xbejnman, abi' badëëman guialrniabee loj reeman din yabëë reeman graloj xindxab luxdoo ree bejn yayüjn tëë reeman bénragxuu ree. <sup>2</sup> Guxhaalaman laa reeman chiglüü reeman xhienaag naj xguialrniabee Dios, yayüjn tëë reeman bénragxuu ree. <sup>3</sup> Rëbaman:

—Ad chinëdi xhienin par runejz: ni'qui yagrliadxidi, ni'qui guijxh, ni'qui guialraw, ni'qui milia, ni'qui stibnejz xabidi. <sup>4</sup> Chutëëz lidx guidxindi, tib gol baya'nzi xt chi yazadi luguiedx guin. <sup>5</sup> Bal yu' guiedx lod ad rënt reeman lëjt, gol baza yagaj, gol gudxiyp guxyuj guia'di zi'c tijb sen guial ad rënt reeman guzoob reeman xtiidx Dios.

<sup>6</sup> Dxel brii reeman zë reeman tijbgaj guiedx zigtie'ch reeman xtiidxza'c Dios, rayüjn tëë reeman bénragxuu ree.

*Riguiejn Herodes ni cayüjn Jesús*  
(Mt. 14:1-12; Mr. 6:14-29)

<sup>7</sup> Chi gogbee rey Herodes graczi ni cayüjn Jesús. Guyunawëëgaman guial yu' ree bejn rëb, Waj bën baroobnijs bejn ree ma baban, <sup>8</sup> yu' tëë reeman rëb Elíasan bën badëë xtiidx Dios loj ree bejn ma balüüloj, yu'za reeman rëb, tijb ree bën badëë xtiidx Dios loj ree bejn gocli ma baban. <sup>9</sup> Per rëb Herodes:

—Naj gajc gunabee biru' yëjn Waj. ¿Chuza bënan riguijnan ruza't ree bejn xcwent ni cayüjnman?

Zianan zeel rüjn Herodes naguiejn guguaaman Jesús.

*Ruyaan Jesús gaay mil bejn*  
(Mt. 14:13-21; Mr. 6:30-44; Jn. 6 :1-14)

<sup>10</sup> Chi badxin ree xi apóstoles Jesús, be reeman graczi ni biguieen reeman. Dxel binëman laa reeman lod achutczi bejn zojb, gajxh guiedx Betsaida. <sup>11</sup> Per chi gogbee ree bejn, dxel zinal reeman laaman lod zëman. Abi' balüüman laa reeman xcwent xguialrniabee Dios bayüjn tëëman bënragxuu ree.

<sup>12</sup> Chi ma cadxe, bibig guidxiptio'p ree apóstoles lojman rëb reeman:

—Güjdx loj gra ree bën guin din yaguaiaj reeman chitiil lod yaya'n reeman luguiedx doo ree në ree ranch, chitiil tëë ni gaw reeman din lod nadxu' ree achetczi yu'.

<sup>13</sup> Dxel rëbaman loj reeman:

—Lëjt gajc gol badëëd ni gaw reeman.

Abi' rëb reeman:

—Per gaayzi guiadxtil naca'n con zatio'p bëjl, bajtëë bal yo'n yusiin ni gaw gra reeman.

<sup>14</sup> Abi' cost gaay mil ree xinguaaw riga' yagaj. Per rëb Jesús loj ree xbejnman:

—Gol güjdx loj reeman din cwe tü'pchii gaj reeman.

<sup>15</sup> Abi' bagojn reeman laa reeman persi gurej gra reeman zian. <sup>16</sup> Dxel cwa'man guigaay guiadxtil guin con zatio'p bëjl guin. Gules lojman xanyabaa, badëëman quixtëë loj Dios, zianz gula'man laa reen badëëman loj ree xbejnman din qui's reeman laan loj ree bën guin. <sup>17</sup> Graczi reeman gudaw xt bigdxinladx reeman. Abi' bato'p reeman chiptio'p dxüm nilaay baya'n.

*Rëb Bëd guial Jesús naj Cristo*  
(Mt. 16:13-19; Mr. 8:27-29)

<sup>18</sup> Tijb dxej cabejdx canab Jesús Dios, za'në ganaxzi ree xbejnman. Gunabdiidxaman loj reeman, rëbaman:

—¿Chu rëb ree bejn najn?

<sup>19</sup> Badxi' reeman laan rëb reeman:

—Yu' reeman rëb lüj naj Waj bën baroobnijs bejn ree, yu'za reeman rëb lüj naj Elías bën badëë xtiidx Dios loj ree bejn, yu' tëë reeman rëb lüj naj tijb ree bën badëë xtiidx Dios loj ree bejn gocli, bën ma baban.

<sup>20</sup> Dxel gunabdiidx Jesús zatijb, rëbaman:

—Laadx lëjt, ¿xhie nadi chu najn?

Badxi' Bëdan rëbaman:

—Lüj naj Cristo. Lüj naj Xi'n Dios.

*Rugojn Jesús guiëtaman*  
(Mt. 16:20-28; Mr. 8:30-9:1)

<sup>21</sup> Rëb Jesús loj reeman achuczi loj guiëb reeman zian, <sup>22</sup> rëb tëëman:

—Rayal sagdiaj Bën guxhaal Dios: ad zënt ree guxtis Israel laaman, ni'qui ree bixhioz rniabee ree bixhioz, ni'qui ree mextr rajc ley. Gugüjt reeman laaman, per ni yayon dxej yabanman.

<sup>23</sup> Dxel rëbaman loj gra reeman:

—Bal chu rën gac da bejnan ad rayalt güünman zi'c naj xixgabaman, siibnejzaman guialzi ni tédzaman guixie guixie abi' guidnalaman naj. <sup>24</sup> Din bën mazri rën guialnaban ni rajpaman loj guidxliuj guie, zadxin dxej guseëbaman laan, per bën guiët por naj, zajpaman guialnaban tiblayaa con Dios. <sup>25</sup> ¿Xhie gan güün bejn gapaman gra ni yu' loj guidxliuj abi' nitaman loj Dios? <sup>26</sup> Bal chu ratu guza't naj në da diidxan, ziangajc naj najn Bén guxhaal Dios, yatunë'n laaman chi guialan con da guialrniabeen loj xbiani da Dadan nètëë loj xbiani ree xianjlaman. <sup>27</sup> Per diidxliczi rnin lojdi, yu' ree bën za' guie ad zëjtt xt guguaa reeman xguialrniabee Dios.

*Bidxaa Jesús loj choon ree xbejnman*  
(Mt. 17:1-8; Mr. 9:2-8)

<sup>28</sup> Chi gudëd cost xhujn dxej ni gunee Jesús diidx guin ree, wejman persi gurejdx gunabaman Dios tijb guiyc guia', binëman Bëd con Waj con Jacob. <sup>29</sup> La'tgaj cabejdx canabaman Dios, bidxaa lojman guiáad xabaman gojcan naquichbëj bidiin tëen bacha'. <sup>30</sup> Dxejczí gulentie tio'p ree bejn, caneenë reeman laaman. Tijbaman naj Moisejs zatijbaman naj Elías. <sup>31</sup> Yu' reeman galay biani cayü reeman diidx guial guiët Jesús Jerusalén. <sup>32</sup> Majsí yu' bacaal loj Bëd në loj ree xcompniaraman, batie'ch xbaaal reeman persi baguiaa reeman xbiani Jesús con zatio'p ree bën za'nëman. <sup>33</sup> Chi ma baza ree bën caneenë Jesús, rëb Bëd lojman:

—Mextr, ¡zagdxen nadxu' ree guie! Zajc yaguieenan choon ranch, tijban par lüj, tijban par Moisejs zatijban par Elías.

Per ad ragbeet Bëd xhienin caneeman. <sup>34</sup> La'tgaj caneeman zian, biguiajt tijb zaj xt guiyc reeman, chi ma yu' reeman lën zaj guin dád bidxeb reeman. <sup>35</sup> Dxel loj zaj guin biguien cha' bejn, rëbaman:

—Bën guie naj da Xi'nan bën rën da'tan. Gol bacaagdiajg xtiidxaman.

<sup>36</sup> Chi gulox biguien cha'man loj zaj guin, baguiaa reeman xtijbzi Jesús za'man. Abi' ad gutie'cht reeman diidx. Lën ree dxej zii achutczi loj rëb reeman ni baguiaa reeman.

*Rayüjn Jesús tijb xin yu' xindxab luxdoo*  
(Mt. 17:14-21; Mr. 9:14-29)

<sup>37</sup> Bareguiaal, chi baguiajt reeman guiyc guia' guin, dád benzien brieri bigchaagloj Jesús. <sup>38</sup> Abi' tijb bën no'ch loj reeman guridxa', rëbaman lojman:

—¡Mextr!, been wen baguiaa da xi'nan din tijbzi laax ra'pan. <sup>39</sup> Tijb xindxab ru luxdoo abi' rucwixdiajx laax, rugüjtya'x laax rbëë tëëx bichijn ro'x. Dád rusagdiajx laax ad rëntix guslaax laax. <sup>40</sup> Ma gunaaban loj ree xbejnl din nabëë reeman xindxab guin, per ad gojct reeman.

<sup>41</sup> Badxi' Jesús laan rëbaman:

—¡Benguijdx, bën ad rliladxt! ¿Xt goc gazunë'n lëjt gadaan tëen lëjt? Tanë xi'nl guie.

<sup>42</sup> Chi cabig xin guin basajb xindxab guin laax luyuj, bagüjtya'x laax zatijb. Per gunabee Jesús barii xindxab guin, bayüjnman laax dxel bayüman laax loj xdadix.

<sup>43</sup> Graczi reeman badxaløj guialrniabee ni rajp Dios.

*Rugojn Jesús zatijb guial guiëtaman*  
(Mt. 17:22-23; Mr. 9:30-32)

La'tgaj caydxa loj reeman ni cayüjn Jesús, rëbaman loj ree xbejnman:

<sup>44</sup> —Gol bacaagdiajgchaaw ni ganin lëjt: yayü reeman Bén guxhaal Dios loj ree bejn.

<sup>45</sup> Per laa reeman ad bignia't reeman ni rnieeman guial ad badëëtaman mod nignia' reeman, abi' bidxeb reeman niniabdiidx reeman lojman xhie rën guiëb ni rëbaman.

*¿Chu mazri zojbloj?*  
(Mt. 18:1-5; Mr. 9:33-37)

<sup>46</sup> Dxel guzuloj ree xbejnman rëb loj lasa' reeman chu loj gra reeman mazri zojbloj.  
<sup>47</sup> Per gogbee Jesús xgab ni cayüjn reeman abi' cwa'man tijb xindoo, bazujman laax cwë'man, <sup>48</sup> dxel rëbaman loj reeman:

—Bén ridxga' tijb xindoo por naj, najn ridxga'man, guiáad bén ridxga' naj, bén guxhaal najn ridxga'man. Din bén rüjn sirv lojdi, laaman mazri zojbloj lojdi.

*Bén ad za't contr dunuj ree za'man con dunuj ree*  
*(Mr. 9:38-40)*

<sup>49</sup> Rëb Waj loj Jesús:

—Mextr, baguiaan tijb bejn rabëëman xindxab luxdoo ree bejn por xguialrniabeel. Per badxoonan guial ad najtaman dux bejn ree.

<sup>50</sup> Per rëb Jesús lojman:

—Ad rudxoondi, din bén ad za't contr dunuj ree, za'man con dunuj ree.

*Gudilë Jesús Jacob con Waj*

<sup>51</sup> Chi ma cadxin dxej yayë'p Jesús xanyabaa, dxel beenman xgab guial rüjn naguiejn cheman Jerusalén. <sup>52</sup> Guxhaalaman bén guned ree, wej reeman tijb guiedxdo nulen Samaria bitiil reeman lod yaya'n reeman. <sup>53</sup> Per ad cwëjbt ree bén Samaria guin nudëed reeman lod naya'nman guial gogbee reeman cheman Jerusalén. <sup>54</sup> Chi baguiaa Waj con Jacob zian, rëb reeman lojman:

—Dad, ¿rënl ya yanabeen guiat bajl xanyabaa din gunijtan bén guin ree zi'c been Elías bén badëë xtiidx Dios loj ree bejn?

<sup>55</sup> Dxel badxi' loj Jesús loj reeman, abi' gudilëman laa reeman rëbaman:

—¿Nid ragbeedi ya guial loj xindxab zëed ni rnieedi? <sup>56</sup> Naj, Bén guxhaal Dios, ad zialtan din gunijtan xguialnaban bejn loj Dios, zialan din yabën laa reeman loj dol.

Dxel zë reeman zatijb guiedx.

*Bén rën chinal Jesús*  
*(Mt. 8:19-22)*

<sup>57</sup> Chi zë reeman lunejz, tijb bejn rëb loj Jesús:

—Dad, rënan guidnaalan lüj bantëez guin chel.

<sup>58</sup> Badxi' Jesús laan rëbaman:

—Cuyojt ree yu' xguiajbiliaa reeb guiáad ree biguijn yu' xguixbitia's reeb. Per Bén guxhaal Dios ni'qui lod quixh guijcaman ad yu't.

<sup>59</sup> Rëb Jesús loj ben ren:

—Tanal naj.

Per badxi'man laan rëbaman:

—Dad, banee mod gabenë' da Dadan xt chi guiëtaman.

<sup>60</sup> Abi' rëb Jesús lojman:

—Basa'n xdadil con ree bén ad rënt guidnal naj, laa reeman guquie'ch laaman. Sa'n lüj bigtie'ch diidx xhienaag naj xguialrniabee Dios.

<sup>61</sup> Dxel rëb zatijb bén guin:

—Dad, rënan guidnaalan lüj, per yalojxgaj banee mod chigzadiidxnë' ree da familan.

<sup>62</sup> Per rëb Jesús:

—Bén guiniaaz guia' garad abi' gudxi' lojman niz xijchaman, ad zile't guilia'man yuj zagdx. Ziangajc bén rën guidnal naj, bal id zusa'nman graczi tiblad ad zile't chu'man loj xguialrniabee Dios.

<sup>1</sup> Chi gudëd gojc ree ni guin, gulej Dad Jesús gayojnchii bejn, abi' guxhaalaman tio'p gaj reeman luguiedx ree në ree ranch din ned reeman che gaj reeman lod naj cheman.

<sup>2</sup> Rëbaman loj reeman:

—Diidxiczi, zien bejn rën gucaagdiajg xtiidx Dios, per ad zient bën gulüü laa reeman yu'. Zeel gol gurejdx gunab Dios din guixhiaalaman mazri zien bën gulüü laa reeman.

<sup>3</sup> Gol chej, naj rxhial lëjt zi'c rej ree xiil galay ree cuyojt. <sup>4</sup> Ad chinëdi guijxh, ni'qui milia, ni'qui zatib nejj xgurëchidi, ad sudxedi guinieenëdi bejn ree runejj. <sup>5</sup> Bantëëz lënü chu'di, yalojxgaj gol güjdx: “Dios yabe'cdxe luxdoodi.”

<sup>6</sup> Abi' bal lënüzi yu' ree bën rayal guialnaza'c guin, zaya'nan yagaj. Guiáad bal id rayal reeman laan zayejcan con lëjt. <sup>7</sup> Yagaj gol baya'n, gol gudaw, gol gu' ni gunee reeman. Din bën rüjn dxiin rayal gaxaman. Yagajzi gol baya'n ad bal yaya'ndi lood ren. <sup>8</sup> Chi guidxindi tijb guiedx lod yaca' reeman lëjt, gol gudaw ni gunee reeman. <sup>9</sup> Gol bayüjn ree bënragxuu yu' ree luguiedx guin, gol güjdx tëë loj reeman: “Ma zëed xguialrniabee Dios gajxh par lëjt.”

<sup>10</sup> Per bal guidxindi tijb guiedx lod ad rënt reeman yaca' reeman lëjt, gol brii lunejj, gol güjdx loj reeman: <sup>11</sup> “Xt xgoxyuj ladxidi ni cwa du guia'n, radxijpan zi'c tijb sen guial ad bidxga'tidi dux tiidxan. Per gol gogbee, guial ma zëed xguialrniabee Dios gajxh par lëjt.”

<sup>12</sup> Naj rni lëjt guial dxej yadëed ree bejn cwent loj Dios, mazri casti narooob yayal reeman guial loj ree bën gure guiedx Sodoma.

### *Bën ad bazoobt ree xtiidx Dios*

*(Mt. 11:20-24)*

<sup>13</sup> Rëb tëë Jesús:

—¡Probza lëjt bën Corazín! ¡Probza lëjt bën Betsaida! Din bal guiedx Tiro në guiedx Sidón niajc gra ree milagr ni goc ladxidi, diizd gocli nayüjn reeman xgab por xtol reeman, niajcw reeman lajd ya's nuroob tëë cobdëj guijc reeman zi'c tijb sen guial ma bayüjn reeman xgab por xtol reeman. <sup>14</sup> Per rnin lojdi guial dxej yadëed ree bejn cwent loj Dios, mazri casti narooob yayalidi guial loj ree bën Tiro në ree bën Sidón. <sup>15</sup> Guiáad lëjt, bën Capernaum, ad naladxidi yayalidi xanyabaa, lëjt yayal gabijl.

<sup>16</sup> Dxel rëb Jesús loj ree xbejnman:

—Bën ridxga' lëjt, najn ridxga'man, per bën ad ridxga't lëjt, najn ad ridxga'taman. Guiáad bën ad ridxga't naj, bën guxhaal najn ad ridxga'taman.

### *Badxin ree bën gayojnchii guxhaal Jesús*

<sup>17</sup> Chi badxin ree bën gayojnchii guxhaal Jesús, dád raba reeman rëb reeman lojman:

—Dad, xt ree xindxab ruzoob dux tiidxan chi raza'tan lajl.

<sup>18</sup> Abi' rëb Jesús loj reeman:

—Waliquidi, naj baguia, zi'czi rë'p nijs basëeb xguialrniabee xindxab. <sup>19</sup> Naj banee lëjt guialrniabee din gulëedi guijc ree bëel në guijc ree nixüb, në par güündi gan loj xguialrniabee xindxab sin guial güünx lëjt xhienin. <sup>20</sup> Per ad rabaadi guial ruzoob ree xindxab guin xtiidxidi, gol babaa guial ca lajdi loj libr yu' xanyabaa.

### *Rabaa Jesús*

*(Mt. 11:25-27; 13:16-17)*

<sup>21</sup> Loj hor ziigajc babaa da't Jesús por xSprijt Dios, abi' rëbaman:

—Ruzatan lüj zagdxe, Dad, lüj rniabee xanyabaa në loj guidxliuj, din ni baquie'chil loj ree bën rajc në loj ree bën rignia', laan ma balüül loj ree bën ad rajcza'ct. Zian gojcan Dad, din zian guyën.

<sup>22</sup> 'Da Dadan banee gra lon. Abi' achut nünbee Jesucrist Xi'n Dios, tijbzi Dios, achu tëët nünbee Dios, tijbzi Jesucrist xi'nman con ree bën rënman güünbee Dios.

<sup>23</sup> Dxel baguiaaman loj ree xbejnman, abi' rëbaman lojzi reeman:

—Xiquilbaa ree bën guguaa ni cuguaadi. <sup>24</sup> Din naj rni lojdi, zien ree bën badëë xtiidx Dios loj ree bejn në ree rey guyën nuguaa ni cuguaadi, per ad baguiaat reeman laan.



Guyën reeman nucaagdiajg reeman ni cucaagdiajguidi, per ad bacaagdiajgt reeman laan.

### *Xcwent tijb bén Samaria*

<sup>25</sup> Tijb mextr rajc ley guzuliman guneenëman Jesús. Abi' din güünman laaman prueb, gunabdiidxaman lojman rëbaman:

—Mextr, ¿xhie rayal günan din ga'pan guialnaban tiblayaa con Dios?

<sup>26</sup> Badxi' Jesús laan rëbaman:

—¿Xhie ca loj ley badëë Dios loj Moisejs? ¿Xhienaag rignia'lan?

<sup>27</sup> Abi' rëb mextr guin:

—“Guyën xDadil Dios guidib guijc guidib ladxil guyën tëë ben ren zi'c rën lüj gajc.”

<sup>28</sup> Badxi' Jesús laan, rëbaman:

—Zagdxequi badxi'lan. Bal güünl zian zajpil guialnaban tiblayaa con Dios.

<sup>29</sup> Per guyën mextr guin naya'nman zagdxë, gunabdiidxaman loj Jesús, rëbaman:

—¿Chu bénan guiënan zi'c rën naj gajc?

<sup>30</sup> Dxel be Jesús tijb cwent lojman, rëbaman:

—Tijb bén Israel briiman Jerusalén zëman guiedx Jericó. Abi' gunaaz ree xingubaan laaman, gudijn reex laaman gulan tëë reex gra ni ca'man xt në xabaman, basa'n reex laaman ma güjtczaman. <sup>31</sup> Dxel gudëd tijb bixhioz niz yagaj, per chi baguiaaman Bén guin, zijt bicaaman volt, zëtaman. <sup>32</sup> Në tijb Bén Levita Bén rüjn yudar bixhioz ree, gudëd niz yagaj, chi baguiaaman Bén guin, zijt bicaaman volt, zëtaman. <sup>33</sup> Per tijb Bén Samaria gudëd niz yagaj, chi baguiaaman Bén guin, bayaman laaman, <sup>34</sup> dxel gubigaman lod naga'man, badxe'man sejt con vin lod nadxeelguijdxaman dxel guxhiiman laan con lajd. Zianz badxiibaman laaman xburaman binëman laaman lënu lod raya'n ree bejn. Yagaj gunajman laaman. <sup>35</sup> Chi bareguiaal, chi ma yaguiaj Bén Samaria guin, gulëëman milia xieen tio'p dxej dxiin badëëman laan loj Bén naj lidxan, rëbaman lojman: “Gunaj Bén guie, bal gunijtil mazri, naj yaguix laan chi yaye'can.”

<sup>36</sup> Dxel rëb Jesús loj mextr guin:

—Yan, loj guiyon ree Bén guin, ¿chu bénan guyën Bén gudin ree xingubaan guin?

<sup>37</sup> Badxi' mextr guinan rëbaman:

—Bén baya laaman.

Dxel rëb Jesús lojman:

—Baguiaj, been ziangajc con ben ren.

### *Rignaj Jesús Mart në Li*

<sup>38</sup> Basnuu Jesús zëman abi' bidxinman tijb guiedxdoo, yagaj wejman lidx tijb biin la Mart. <sup>39</sup> Yu' tijb xbëlim lam Li. Gurej Li guin guia' Jesús cucaagdiajguim ni caneeman.

<sup>40</sup> Per Mart guin mazri ruquiejnne gra xmandadim, abi' bibiguim loj Jesús rëbim:

—Dad, ¿nid rul xgab ya guial rusa'n da bëlan naj con gra mandad guin? Güjdx lojm din güünm naj yudar.

<sup>41</sup> Badxi' Jesús laan rëbaman:

—Mart, Mart, dád rul xgab guial yu' da't xmandadil. <sup>42</sup> Per tijbzi ni mazri zojbloj yu'. Li gulejm ni mazri zojbloj, abi' achut zajc chiquiedan lojm.

## 11

### *Rülüü Jesús xhienaag cwedx guiniab bejn Dios*

(Mt. 6:9-15; 7:7-11)

<sup>1</sup> Tijb dxej cabejdx canab Jesús Dios. Abi' chi gulox gurejdx gunabaman Dios, rëb tijb xbejnman lojman:

—Dad, balüü dunujn yarejdx yanaaban Dios, zi'c balüü ree xbejn Waj Bén baroobnijs bejn ree.

<sup>2</sup> Abi' rëb Jesús loj reeman:  
—Chi cwedx guiniabidi Dios, gol güjdx:

Dad, lüj yu' xanyabaa,

rayal yaya'p da'tan lajl respejt.

Gac zi'c rniabeel.

Gac zi'c rënl loj guidxliuj, zi'c rajc xanyabaa.

<sup>3</sup> Bazaladx ni yadaawan guixie guixie.

<sup>4</sup> Been dunujn perdon gra ree ni mal ma baguieenan, zi'c raguieenan perdon bën rüjn ree dunujn ni mal.

Ad tiëbil güün xindxab dunujn gan yaguieenan dol, babëe dunujn loj gra ni mal.

<sup>5</sup> Abi' rëb Jesús loj reeman:

—Yaguie'ch ree, tijb lëjt yu' xmiw abi' garol guiaal chedi lidxix, guiëbidi: “Miw, baneesii choon guiadxtil gagui'nän, <sup>6</sup> din bi't tijb da miwan abi' achet ra'pan gudëdan lojx.” <sup>7</sup> Dxel nax diizd lënu guin: “Ad ruslenl naj. Ma nayaaw ro' da portan. Ma naga'yë'snë' ree da xi'nän. Ad zile't chixchejn gunen laa reen.” <sup>8</sup> Per rnin lëjt, majsi bal id zixchex din guneex ni ryaadxidi guial rajc xmiwidi laax. Per züjnx naguiejn chixchex din guneex ni ryaadxidi chitëe guslenridi laax. <sup>9</sup> Zeel rnin lëjt: Gol gunab loj Dios, laaman guneex ni rniabidi. Gol baguuilaman, zadxejlidi laaman. Gol gurejdx gunabaman, zidxga'man lëjt. <sup>10</sup> Din bën rniab, zaca'man. Abi' bën rguuil, zadxejlaman guiáad bën rbejdx rniab laaman zidxga'man laaman.

<sup>11</sup> ¿Lëjt najdi dad, wen zudëedi tijb guiaj loj xi'ndi ya chi guiniabix guiadxtil?, ¿o zudëedi tijb bëel ya chi guiniabix bëjl? <sup>12</sup> ¿o zudëedi nixüb ya chi guiniabix dxijt? <sup>13</sup> Nacli lëjt najdi bëndol rajc rudëedi ni zagdx loj xi'ndi. ¡Diidxgui xDadidi bën yu' xanyabaa, nid zudëe xSprijtaman loj ree bën rniab laaman ya!

### *Rëb ree bejn ca' Jesús xguialrniabee Beelzebú*

*(Mt. 12:22-30; Mr. 3:19-27)*

<sup>14</sup> Caybëe Jesús tijb xindxab basa'n tijb bejn gop. Abi' chi barrii xindxab guin guzuloj canee bën guin. Dxel dád badxaloj ree bejn. <sup>15</sup> Per yu' reeman rëb:

—Bën guin rabëe xindxab luxdoo ree bejn por xguialrniabee Beelzebú, xin rniabee ree xindxab.

<sup>16</sup> Yu'za reeman par güün reeman laaman prueb, rëb reeman lojman din güünman milagr zëed xanyabaa. <sup>17</sup> Per Jesús ragbee gajcaman xgab cayüjn reeman, abi' rëbaman:

—Gra nacion bal id nadxag riga' bejn por wadijl, rlia' lasa' reeman, ziangajc tijb famil bal id nadxag riga' reeman por wadijl, rlia' lasa' reeman. <sup>18</sup> Ziangajc bal Satanás xin rniabee ree xindxab su contr lasa' xindxab gajquix, nayob nit xguialrniabeex. Canin zian guial rëbidi por xguialrniabee Beelzebú rabën xindxab luxdoo ree bejn. <sup>19</sup> Per bal rabën xindxab luxdoo ree bejn por xguialrniabee Beelzebú, ¿chuza rudëed guialrniabee loj ree xbejndi din yabëe reeman xindxab? Zeel laagajc reeman rulüü guial ad laat rnieedi. <sup>20</sup> Per por xguialrniabee Dios rabën xindxab luxdoo ree bejn, laan rën guiëb guial ma za'në xguialrniabee Dios lëjt.

<sup>21</sup> Bal tijb béngojl da't ca' xguuibaman, rajp lidxaman. Ad zajct cwan bejn ni rajpaman.

<sup>22</sup> Per bal guidxin bën mazri gojl guial lojman güünman laaman gan abi' chisüdaman guib ni ca'man tia' tëeman gra ni rajpaman.

<sup>23</sup> Bën ad za't con naj, za'man contr naj, guiáad bën ad ruto'pt bejn par naj rtie'chaman laa reeman.

### *Xindxab rayejc*

*(Mt. 12:43-45)*

<sup>24</sup> Chi rarii tijb xindxab luxdoo tijb bejn, abi' rza xindxab guin niz loj yujbidx rguuilix lod yaziiladxix. Chi ad rdxejlt lod yaziiladxix, dxel rüjnx xgab naladxix: “Zagdxeli yaye'can lod bariin.” <sup>25</sup> Abi' chi rayejquix ruguiaax luxdoo bën guin, najn zi'c tijb lënu

lod bilioob lod najcchaaw tëë. <sup>26</sup> Dxel rica'x zagajdx ree xindxab naj mazri xinmal guial lojx. Abi' ru gra reex luxdoo Bén guin. Dxel piorli raya'nman guial zi'c gocaman yaloj.

*Xiquilbaa ree Bén ruzoob xtiidx Dios*

<sup>27</sup> La'tgaj canee Jesús diidx guin ree, gurixdiaj tijb béngunaa no'ch loj ree benzien guin, rëbaman:

—¡Xiquilbaa béngunaa bazuj lüj loj guidxliuj, Bén baslaa tëë lüj!

<sup>28</sup> Per badxi' Jesús laan rëbaman:

—¡Mazri xiquilbaa ree Bén rucaagdiajg xtiidx Dios ruzoob tëë reeman xtiidxaman!

*Rniab ree bejn güün Jesús tijb milagr*

*(Mt. 12:38-42; Mr. 8:12)*

<sup>29</sup> Zi'cri cado'p ree bejn lod za' Jesús, abi' guzuloj rëbaman loj reeman:

—Bén riga' ree loj guidxliuj yan, naj reeman benmal. Abi' rniab reeman tijb milagr, per achet guguaa reeman, tijbzi zi'c guzac Jonás Bén badëë xtiidx Dios loj ree bejn. <sup>30</sup> Zi'c goc Jonás tijb sen par ree Bén gure guiedx Nínive, ziangajc Bén guxhaal Dios najman tijb sen par ree Bén naban yan. <sup>31</sup> Abi' Bén goc reina guiedx Sabá, zabanman chi yadëéd ree bejn cwent loj Dios dxel guiëbaman guial ree Bén riga' yan, yayal reeman xcasti Dios. Din laaman dád zijt guzaman bicaagdiajgaman xguialrajc rey Salomón. Abi' yan, naj za'në'n lëjt, mazri lasajcan guial loj rey Salomón. <sup>32</sup> Ziangajc ree Bén guban guiedx Nínive, zaban reeman chi yadëéd ree bejn cwent loj Dios abi' guiëb reeman guial ree Bén riga' yan, yayal reeman xcasti Dios. Din Bén Nínive ree bayejc reeman loj Dios chi bacaagdiajg reeman xtiidxaman ni gunee Jonás. Abi' yan, naj za'në'n lëjt mazri lasajcan guial loj Jonás.

*Guiaaloy bejn naj zi'c biani*

*(Mt. 5:15; 6:22-23)*

<sup>33</sup> 'Achut rucaaguij tijb guij par sun lod naguie'ch, achu tëët ruta'cw laan lën tijb yagalm. Rayal sun lod guiguienan din gusnin loj Bén chu' lëñü. <sup>34</sup> Guiaaloy bejn naj zi'c tijb biani par xcuerpaman. Bal por ni ruguiaal rüjnl ni zagdxe, guidib xcuerpil naj biani. Per bal por ni ruguiaal rüjnl ni mal, guidib xcuerpil naj zi'c lod nacay. <sup>35</sup> Gojp cudad chitëë chinë guiaaloyl lüj loj nejz mal luar loj nejz zagdxe. <sup>36</sup> Abi' bal ni'qui tilda'n xcuerpil ad rüjnt ni mal, guidibczan gac nayni zi'c chi rusni guij con xbacha'n.

*Ni rüjn ree mextr rajc ley në ree Bénfarisew*

*(Mt. 23:1-36; Mr. 12:38-40; Lc. 20:45-47)*

<sup>37</sup> Chi gulox guneenë Jesús laa reeman, tijb Bénfarisew rëb loj Jesús din chitaw Jesús lidxaman. Chi guyuman, zianz gurejman xan mex. <sup>38</sup> Abi' Bénfarisew guin badxalojman chi baguiaaman ad banaat Jesús chi ma gawaman zi'c naj xcostumbr reeman. <sup>39</sup> Per rëbaman loj reeman:

—Najdi zi'c tijb vajs con pliajt ni naya xijch, rguiendi benza'c, per luxdoodi yu' da't guialgubaan në ni mal. <sup>40</sup> ¡Bennad! ¿Nid Bén been gajc xcuerpidi been luxdoodi ya? <sup>41</sup> Zeel gol been yudar Bén achet rajp din guiguien guial najquidi benza'c.

<sup>42</sup> ¡Probza lëjt Bénfarisew! Rbëëcadi ni naj par Dios, rüjndi chii lala' ni rajpidi zi'c bidxtil në rud në graloy ni rxübindi abi' rudëëdi tijban loj Dios. Per ad rüjntidi zi'c rayal ad rën tëëtidi Dios. Gol bidxga' Dios ad gucwëëz tëë gudëëdi ni rudëëdi lojman.

<sup>43</sup> ¡Probza lëjt, Bénfarisew! guial ruladxidi cwedi lod rbej ree Bén zobjloy lën ree yadoo, ruladx tëëdi gugajpdioz ree bejn lëjt zagdxe niz lunejz.

<sup>44</sup> ¡Probza lëjt, mextr rajc ley në lëjt Bénfarisew, Bén rusquiee!, din najdi zi'c baa ni ad rguien, abi' ad ragbeet ree bejn rë'p reeman guijcan.

<sup>45</sup> Dxel gunee tijb mextr rajc ley, rëbaman loj Jesús:

—Mextr, në dunujn caneguijdxil guial rëbil zian.

<sup>46</sup> Badxi' Jesús laan rëbaman:

—¡Ziangajc lëjt mextr rajc ley, probza lëjt!, guial rniabeedi bejn ree güün reeman ni nawëëgda't abi' rniabeezidi güün bejn zian guiáad lëjt ni'qui ta'n ad rüjntidi laa reeman yudar din güün reeman zi'c rëndi.

<sup>47</sup> ¡Probza lëjt!, guial rüjnchaawidi xbaa ree bën badëë xtiidx Dios loj ree bejn, bën bagüjt gajc ree xbéngulalidi. <sup>48</sup> Zian ragbee ree bejn guial ruladxidi ni been ree xbéngulalidi. Laa reeman bagüjt ree bën badëë ree xtiidx Dios loj ree bejn, guiáad lëjt rayüjnchaawidi xbaa reeman.

<sup>49</sup> Zeel Dios guial ragbeeman gra ni gac, rëbaman: “Gaxhalan bën rudëë ree xtiidx Dios loj ree bejn, në ree apóstoles, yu' reeman gugüjtidi yu' tëë reeman sunalidi din güündi laa reeman xhienin.” <sup>50</sup> Abi' bën naban ree yan, laa reeman yadëed cwent loj Dios por rejn ni guxhie' ree bën badëë xtiidx Dios loj ree bejn, bën güt ree diizd chi go'tchaaw guidxliuj, <sup>51</sup> diizd xrejñ Abel xt xrejñ Zacarías bën bagüjt reeman ro' yadooro' Jerusalén. Zeel rnin lëjt guial ree bën naban yan, laa reeman quix por gra reeman.

<sup>52</sup> ¡Probza lëjt, mextr rajc ley!, guial ad rtiëjbtidi chu' ree bejn loj xnejz Dios, ni'quiza lëjt ad rüjnt naguiejn chu'di loj xnejz Dios abi' rudxoondi chu' ree bejn loj xnejzaman.

<sup>53</sup> Chi gunee Jesús zian, dád bidxe'ch ree bënfarisew guin në ree mextr rajc ley. Abi' guzuloj zien ree ni rniabdiidx reeman lojman, <sup>54</sup> din guidoon xhie guiëbaman din chile' gutedia' reeman laaman.

## 12

### *Xlevadur ree bënfarisew*

<sup>1</sup> La'tgaj canee Jesús zian, guzuloj cado'p por mil bejn, abi' guial zien da't reeman xt rxa't lasa' reeman. Dxel guzuloj Jesús rëbaman yaløj loj ree xbejnman:

—Gol gojp cudad con xlevadur ree bënfarisew, rën guiëban gapidi cudad con ni rusquiee reeman. <sup>2</sup> Din achet ni naguie'ch yu' ni ad zaguiënt, ad yu' tëët ni ralan ni ad zagbeet bejn. <sup>3</sup> Zeel gra diidx ni ma guneedi lod nacay, zaguiejn ree bejn laan lod nayni. Guiáad ree diidx ni ma guneedi ralan lëñü, yu' chi cwidxa' reeman guiniee reeman diidx guin ree diizd guijc ree yu.

### *Chu rayal guidxeb bejn*

*(Mt. 10:28-31)*

<sup>4</sup> Rnin lëjt, ad ridxebidi bën rën ree gugüjt lëjt din zile' gugüjt reeman xcuerpidi, sa'n xsprijtidi ad zile't gugaal reeman laan. <sup>5</sup> Ganin lëjt chu rayal guidxebidi: gol bidxeb Dios bën rajp guialrniabee guial chi ma biquiedaman xguialnabandi zajc guzaalaman lëjt gabijl. Zeel gol bidxebaman.

<sup>6</sup> Lëjt ragbee guial biguijndoo ree ad lasajct reeb wayëjx, per Dios ad rayanladxtaman ni'qui tijb reeb. <sup>7</sup> Guiáad lëjt xt guidxguijquidi, graczan nayab loj Dios. Zeel ad rdxebidi din mazri lasajquidi guial loj zien da't ree biguijndoo.

### *Bën rëb loj ree bejn guial najman xbejn Jesucrist*

*(Mt. 10:32-33; 12:32; 10:19-20)*

<sup>8</sup> Rnin lëjt, chutëëz bën guiëb loj ree bejn guial najman da bejnan, ziangajc naj najn Bën guxhaal Dios guiën loj ree xianjl Dios guial da bejnan najman. <sup>9</sup> Per bën guiëb loj ree bejn guial ad najtaman da bejnan, ziangajc guiën loj ree xianjl Dios guial ad najtaman da bejnan.

<sup>10</sup> Chutëëz bën guinieeguijdx Bën guxhaal Dios zajcaman perdon, sa'n bën guinieeguijdx xSprijt Dios, ad zajctaman perdon.

<sup>11</sup> Chi chinë reeman lëjt lën ree yadoo o loj ree juejs në loj ree guxtis, ad aal chu'di xgab xhienaag yadx'i'di xtiidx reeman. <sup>12</sup> Din chi guidxin hor ni guinieedi, xSprijt Dios gunee diidx guinieedi.

### *Xcwent tijb xinrijcw*

<sup>13</sup> Tijb bén no'ch loj ree benzien guin rëb loj Jesús:

—Mextr, güjdx loj da bichan din guneex ni rayalan.

<sup>14</sup> Per rëb Jesús lojx:

—¿Chu bazuj naj günan guialguxtis o gagui'san ni tia'di?

<sup>15</sup> Rëb tëëman loj reeman:

—Gol gojp cudad; ad sëëbladxidi gapidi ni rajp ree ben ren, din ad ni rajpt bejn runee guialnaban.

<sup>16</sup> Dxel beman tijb cwent loj reeman, rëbaman:

—Guyu tijb xinrijcw, dád gojc xguiniaax. <sup>17</sup> Dxel beenx xgab naladxix: “¿Xhienaag günan? Ad ra'ptan lod gagu'chaawan guialnaza'c guin ree.” <sup>18</sup> Abi' gunaladxix: “Ma ragbeen xhienaag günan. Guse'nan yu lod rgu'chaawan da guialnaza'can din günan mazri yu narooob ree lod gagu'chaawan laa reen, në graczi ni ra'pan. <sup>19</sup> Dxel guiën, dád zien guialnaza'c ra'pan par zien ijz, yaziiladxan, gawan, guië'n yabaa tëën.” <sup>20</sup> Per rëb Dios lojx: “Xin tont, yanguxhin gajc guiëtil, laadx ni nagu'chaawil, ¿chu yaya'nnë laan?”

<sup>21</sup> Zian rzajc bén rgu'chaaw ni za'c par laagajcaman, per loj Dios achet rajpaman.

### *Achetczi rayal chu' bejn xgab*

*(Mt. 6:25-34)*

<sup>22</sup> Dxel rëb Jesús loj ree xbejnman:

—Naj rni lëjt: Ad chu'di xgab por ni gawidi par guibandi ni'qui por lajd ni gacwidi.

<sup>23</sup> Guialnaban mazri lasajcan guial loj guialraw, guiáad xcuerp bejn mazri lasajcan guial loj xabaman. <sup>24</sup> ¡Gol baguiaa balo ree! Ad rxübint reeb ad rato'p tëët reeb guialnaza'c, ad rajp tëët reeb lod yagu'chaaw reeb guialnaza'c guin, per Dios rudëed ni raw reeb. ¡Abi' mazri lasajquidi guial loj reeb! <sup>25</sup> ¿Wen guial ru da'tidi xgab ma güün lëjt gajc mazri ziool ya? <sup>26</sup> Abi' bal ni'qui zian ad zile't güündi, ¿xhieczy gan rudi xgab por ni ren ree?

<sup>27</sup> ¡Gol baguiaa xhienaag rini's ree guiaa dajn! Ad rüjnt reen dxiin ad rguib tëët reen. Per ni'qui rey Salomón ad guzujchaawt zi'c za'chaaw ree guiaa guin, majsi mast guzujchaawaman. <sup>28</sup> Abi' bal gui'xh dajn ruzujchaaw Dios yan, majsi guixiezi che'can. ¡Diidxgui lëjt, bén ad rliladxza'ct ree laaman nid zuneeman ni gacwidi ya! <sup>29</sup> Zeel ad rudi xgab xhie gawidi o xhie guië'di, ad bal tib yu'zidi laan xgab. <sup>30</sup> Din bén ad nünbeet ree Dios rüjn zian. Laa reeman ru xgab por gra ree ni guin. Per lëjt yu' xDadidi, laaman ragbeechaaw xhienin riaadxidi. <sup>31</sup> Per yalojxgaj gol baguuil güündi zi'c rniabee Dios, laaman gunee gra ni ryaadxidi.

### *Guialnaza'c yu' xanyabaa*

*(Mt. 6:19-21)*

<sup>32</sup> Lëjt najdi da bejnan, ad rdxebidi. Ta'nzi najdi, per xDadidi Dios ma beenman xgab nabeenëdi laaman. <sup>33</sup> Gol bato' ni rajpidi din gudëëdan loj ree bénprob. Gol been naguiejn güündi gan guialnaza'c ni ad rarar ni yu' xanyabaa, lod ad zut xingubaan cwan laa reen lod ad zacabe tëët reen. <sup>34</sup> Din lod rajpidi guialnaza'c guin, yagaj za' xquiarguiejndi.

### *Gol guzujsin*

<sup>35</sup> ¡Gol guzujsin zi'c bén ma najcw xab ca' tëë xguijman par griiman. <sup>36</sup> Gol been zi'c ree mojs cabëz yadxin xpatron reex, bén zë loj guialruxhliaa, din diob guixhial reex ro' port yayuman chi gucaaman. <sup>37</sup> ¡Xiquilbaa ree mojs naga'naa cabëz xpatron reex! Naj rni lëjt, laagajc patron guin cwe'c laa reex xan mex, dxel chicchaa xabaman din gudëëman ni gaw reex. <sup>38</sup> Xiquilbaa reex bal guidxaagloj xpatron reex laa reex naga'naa reex, majsi yadxinman garol guiaal o chi ma cayreguiaal ya. <sup>39</sup> Gol been xgab, bal tijb bejn ragbeeman xhie hor chu' xingubaan lidxaman cwanx, ad zatiëjbtaman chu'x lidxaman. <sup>40</sup> Zianan zeel gol guzujsin din ad ragbeetidi dxejczy gui't Bén guxhaal Dios.

*Mojs za'c nē mojs guiidx*  
(Mt. 24:45-51)

<sup>41</sup> Dxel gunabdiidx Bēd loj Jesús, rēbaman:

—Dad, ¿par dunujzan bel cwent guin ya o par gra ree bejn?

<sup>42</sup> Badxi' Jesús laan, rēbaman:

—¿Chu lējt naj zi'c tijb mojs za'c, nazobdiidx, rusa'n xpatronx laax lidxaman persi rulenx gra ree mojs rudēē tēex ni raw reex chi rajl hor? <sup>43</sup> Xiquilbaa mojs cayüjn dxiin zagdxe chi yadxin xpatronx. <sup>44</sup> Din diidxliczi rnin lējt, zusa'n gra xieen patron guin loj mojs guin. <sup>45</sup> Per bal naladx mojs guin: “Zaglaari yaguaaad da patronan”, zianz sulojx gusagzix gra ree bēn rüjn dxiin yagaj, zi'c bēngunaa zi'c xinguaaw, dxel sulojx gawix, guiē'x südx tēex, <sup>46</sup> abi' yadxin xpatronx tijb dxej ni ad rbēztix nē tijb hor ni ad ragbeetix. Dxel dād casti narooob gudēēd patron guin laax, guixhiaalaman laax lod rayal ree bēn ad ruzoobt diidx.

<sup>47</sup> Din tijb mojs ragbee ni rēn xpatronx güünx, abi' ad za'tix porvinid ad ruzoob tēētix diidx, dād casti narooob tēdix. <sup>48</sup> Per mojs ad ragbeet ni rēn xpatronx güünx abi' güünx ni rayal casti, ta'nz tēdix casti. Din bēn badēēd Dios quiarguejn, mazri zien ni rayal güünman por quiarguejn ni badēēd Dios lojman. Ziangajc bēn badēēd Dios gualrniabee, mazri zien ni rayal güünman por gualrniabee ni badēēd Dios lojman.

*Por Jesús rlia' lasa' ree bejn*  
(Mt. 10:34-36)

<sup>49</sup> Zialan loj guidxliuj zi'c tijb bēn zidgacaaguij xhienin, abi' jma rēn nejzdoon tiaguijn! <sup>50</sup> Gazaagdiajn guiēt tēen, abi' j dād yu'nayan diizd yan xt chi gacan cumplid! <sup>51</sup> Ad naladxidi zialan loj guidxliuj par yabecdxen luxdoo bejn, zialan din gual guililadx reeman naj chu' wadijl. <sup>52</sup> Din diizd yan, lod naj reeman gaay loj tijb famil, til choonman contr tio'paman, tio'paman contr choonaman. <sup>53</sup> Dad su contr xi'nman guiáad xi'nman su contr laaman; na su contr xi'ndxa'paman guiáad laam su contr laaman; abi' nasuegr su contr xwalidxaman guiáad laam su contr laaman.

*Sen rguien xanyabaa*  
(Mt. 16:1-4; Mr. 8:11-13)

<sup>54</sup> Rēb tēē Jesús loj ree benzien guin:

—Chi ruguiaadi ririi zaj niz lod rēēz gubijdx, rēbidi: zal guia, abi' rajc gajc zian. <sup>55</sup> Abi' chi ririi bi niz sur, rēbidi: gac nalaa, abi' rajc gajc zian. <sup>56</sup> jBēn rusquiee! Ragbeedi xhie rēn guiēb sen rguien xanyabaa nē loj guidxliuj, ¿chexquiza zeel ad ragbeetidi xhie rēn guiēb ni cayajc loj guidxliuj yan?

*Babej zagdxe con bēn rdxe'ch lüj*  
(Mt. 5:25-26)

<sup>57</sup> ¿Chexc ad rüjnt lējt gajc xgab conin naj ni zagdxe? <sup>58</sup> Bal chu bēn rudēēd lüj loj guxtis, been naguiejn baya'nnēman diidx zagdxe la'tgaj yu' tiamp, chitēē yayüman lüj loj guxtis, abi' guxtis guin yayü lüj loj ree bēn cu' lüj ladxguuib. <sup>59</sup> Naj rni lüj, ad zariitil ladxguuib guin xtczi quixil gra ni na guxtis guin.

## 13

*Gol bayüjn xgab por xtolidi*

<sup>1</sup> Lēn gajc ree dxejzii wej tio'p choon ree bejn biguie reeman diidx loj Jesús gual bagüjt Pilato tio'p choon ree bēn Galilea, abi' bago'chaman xrejn reeman con xrejn ree be bagüjt reeman par gudēēd reeman loj Dios zi'c gon. <sup>2</sup> Dxel rēb Jesús:

—Ad bal naladxidi guzajc ree bēn Galilea guin zian gual naj reeman mazri bēndol gual loj gra ree bēn Galilea. <sup>3</sup> Din naj rni lējt gual ad ziantan. Abi' bal id zayüjndi xgab por xtolidi ziangajc saquidi. <sup>4</sup> Ad bal naladxidi bēn chiinbichoon güt ree chi guxa't torre

ni la Siloé laa reeman, naj reeman mazri béndol guial loj gra ree bén zojb Jerusalén. <sup>5</sup> Naj rni lèjt guial ad ziantan. Abi' bal id zayüjndi xgab por xtolidi ziangajc saquidi.

### *Xcwent yag higo ni ad rtiat*

<sup>6</sup> Dxel be Jesús tijb cwent loj reeman, rëbaman:

—Tijb bejn gojpaman yag higo lod nagu'man uv, abi' biquiaaman bal ca higo lojn, per achetczi bidxaaglojman. <sup>7</sup> Dxel rëbaman loj bén rajp guidxliuj guin: “Baguiaa, ma gojc choon ijz rialan rguilan higo loj yag guin, abi' achetczi rdxaaglojn. Batüügan din nawëgzi rüjnan loj guidxliuj guie.” <sup>8</sup> Per rëb bén rajp guidxliuj guin: “Dad, basa'nsiin zatib ijz, yabeclean yuj xanan gagu' tëënan abon. <sup>9</sup> Rupent zian tian, per bal id zacan dxel tügan.”

### *Bayüjn Jesús tijb béngunaa ca bëw xijch*

<sup>10</sup> Tijb dxej raziiladx ree bejn, culüü Jesús bejn ree lën tijb yadoo, <sup>11</sup> yagaj za' tijb béngunaa ma gojc chiinbichoon ijz ragxuuman, tijb xindxab basa'n laaman con tijb bëw xijchaman, ad rilet'czi yaliman. <sup>12</sup> Chi baguiaa Jesús laaman, gurejdxaman laaman, rëbaman:

—Na, ma bayajquil guialguijdx ni goquil.

<sup>13</sup> Dxel badxiib yaaman guijcaman; abi' loj hor guin gajc baliman, zianz guzuloj cuza'taman Dios zagdxe. <sup>14</sup> Per bén rniabee lën yadoo guin dád bidxe'chaman guial bayüjn Jesús bén guin dxej raziiladx ree bejn, dxel rëbaman loj ree bejn:

—Xho'p dxej yu' guial güün bejn dxiin, loj ree dxej guin gol guida din yayajquidi, per ad dxej raziiladxt bejn.

<sup>15</sup> Badxi' Dad Jesús laan rëbaman:

—Bén rusquiee, ¿nid rxhiecxgo'ndi o xburidi dxej raziiladx ree bejn ya par chiquië'di laa reeb nijs? <sup>16</sup> Béngunaa guie zëëdaman loj xdiaa Abraham, ma gojc chiinbichoon ijz naxhii xindxab laaman con guialguijdx guie. ¿Wen id zajc yayajcaman dxej raziiladx ree bejn ya?

<sup>17</sup> Chi rëb Jesús zian, gra ree bén rdxe'ch laaman baya'n xtu; per graczi ree bejn rabaa guial ruguiaa reeman gra ree ni zagdxe ni rüjnman.

### *Xcwent xhaj moxtajs*

*(Mt. 13:31-32; Mr. 4:30-32)*

<sup>18</sup> Rëb tëë Jesús:

—¿Xhienaag ganin naj xguialrniabee Dios o xhie gulün lojdi din chignia'di xhienaag naj xguialrniabeeman? <sup>19</sup> Laan naj zi'c xhaj moxtajs ni rxübin bejn loj xguiniaaman, rni'san xt rajcan yag naroo. Abi' guial naroo da't rajcan xt rüjn xguixbitia's ree biguijn xidxan.

### *Xcwent levadur*

*(Mt. 13:33)*

<sup>20</sup> Rëb Jesús zatijb:

—¿Xhienaag ganin naj xguialrniabee Dios? <sup>21</sup> Laan naj zi'c levadur ni rugo'ch tijb béngunaa choon midid harin persi rusaaguinj gra cob guin.

### *Port nadëë*

*(Mt. 7:13-14, 21-23)*

<sup>22</sup> Chi zë Jesús Jerusalén, rulüüman bejn ree luguiedx naroo ree në ree luguiedx dobëz niz lod rdëdaman. <sup>23</sup> Abi' tijb bejn gunabdiidx lojman rëbaman:

—Dad, ¿ta'nz ree bén gac perdon ya?

Badxi' Jesús laan rëbaman:

<sup>24</sup> —Gol been naguiejn din chu'di niz ro' port nadëë, din naj rni lèjt, zien ree bén rën chu', per ad zile't chu' reeman. <sup>25</sup> Din chi chisu bén naj lidxan gusiaawaman ro' port guin, lèjt guial yaya'ndi xchu, gucaadi ro' port guin guiëbidi: “Dad, guxhal.” Per

yadxi'man xtiidxidi naman: “Ad ragbeetan ban zadi.” <sup>26</sup> Dxel suloj guiëbidi: “Tijbzi badaaw ree, tijbzi badü' ree, niz lad dux nejzan balüül dunujn.” <sup>27</sup> Per naman lojdi: “Ma rnin, ad ragbeetan ban guzadi. Gol biquied lon bëndol.” <sup>28</sup> Ni goondi gaw tëë layidi chi guguaiaadi Abraham, Isaac, Jacob, në gra ree bën badëë xtiidx Dios loj ree bejn, za' reeman lod rniabee Dios, guiáad lëjt yariicadi. <sup>29</sup> Din gui't ree bën sa gra lad guidiblagaa guidxliuj din cwe reeman gaw reeman lod rniabee Dios. <sup>30</sup> Abi' zien ree bën bigra yan, laa reeman gac bën yaløj nadxel. Guiáad ree bën naj bën yaløj yan, laa reeman gac bën bigra.

*Roon Jesús por Jerusalén*  
(Mt. 23:37-39)

<sup>31</sup> Hor guin gajc bidxin tio'p choon ree bënfarisew, abi' rëb reeman loj Jesús:

—Baguiaj, baza niz guie, din rën rey Herodes gugüjtaman lüj.

<sup>32</sup> Badxi' Jesús laan rëbaman:

—Gol chej gol chiguiedx loj bën rusquiee zii: “Yan, në guixie yabën xindxab yayün tëën bënragxuu ree, abi' widx gulooxan.” <sup>33</sup> Per naj rayal gusnuu da nejzan yan në guixie në widx, din ad najt guial guiët tijb bën rudëë xtiidx Dios loj ree bejn luguiedx ren bal id najn Jerusalén.

<sup>34</sup> ‘;Bën Jerusalén, bën Jerusalén, rugüjtidi bën rudëë ree xtiidx Dios loj ree bejn rucaaguaiaj tëëdi gra ree bën rxhiaal Dios lojdi! ;Bëlczí volt guyënan nuchagan lasa'di zi'c rüjn tijb guid ruchajg lasa' ree xi'nb lën xhiilib, per ad cwëjbtidi! <sup>35</sup> Zianan zeel yaya'n ladxidi zi'c tijb guiedx lod achut zøjb. Abi' rnin lëjt, diizd yan ad zuguaatrídi naj xt chi guidxin dxej guiëbidi: “;Nüjnle' Dios bën zëed por laaman!”

## 14

*Rayüjn Jesús tijb bën rzaaguuj*

<sup>1</sup> Tijb dxej raziiladx ree bejn wej Jesús bitawaman lidx tijb bënfarisew rniabee. Yu' ree bënfarisew guin cula'ch laaman xhie güünman, <sup>2</sup> guial za' tijb xinragxuu lojman rzaaguujx. <sup>3</sup> Dxel gunabdiidx Jesús loj ree mextr rajc ley në loj ree bënfarisew guin, rëbaman:

—;Zajc yayüjn bejn bënragxuu dxej raziiladx ree bejn ya o ad zajctan?

<sup>4</sup> Per laa reeman achetzi rëb reeman. Dxel gunaaz Jesús xinragxuu guin bayüjnman laax, abi' rëbaman lojx din yaguaiajx. <sup>5</sup> Dxel rëbaman loj ree bënfarisew guin:

—;Bal tijb xburídi o tijb xgo'ndi yab lën tijb bizë, nid zabëëdi laab ya, majsi naj dxej raziiladx bejn?

<sup>6</sup> Abi' achet gojc nadxi' reeman.

*Bën rej ree loj guialruxhliaa*

<sup>7</sup> Chi baguiaa Jesús rbe ree biooz luar lod rbej ree bën mazri zøjbloj, rëbaman loj reeman:

<sup>8</sup> —Bal chu guiniee lüj chel loj tijb guialruxhliaa, ad cwel luar rbej ree bën mazri zøjbloj. Din zajc guidxin zatijb biooz mazri zøjbloj guial lojl, <sup>9</sup> abi' gui't bën gunee gropídi naman lojl: “Badëëd lod zøjbil cwe bën guie.” Dxel rayal chel guidib ratul chisobil loj yagxhil bigra. <sup>10</sup> Zeel chi guiniee reeman lüj, zagdxeli bisob loj yagxhil bigra, din chi gui't bën gunee lüj naman lojl: “Miw, badëd loj tijb luar mazri zøjbloj.” Zian, gra ree bën zøjbnël xan mex guza't lüj zagdxë. <sup>11</sup> Din bën rlies xvalor gajc, yaya'nxtuman. Guiáad bën rüjn naya zajs xvaloraman.

<sup>12</sup> Dxel rëb Jesús loj bën gunee laaman:

—Bal goc cu'l guialraw, ad guiniee xmiwil, ni'qui lasa'l, ni'qui bijchil, ni'qui benrijcw zøjbnël gajxh. Din laa reeman yu' dxej guiniee reeman lüj, abi' zian yanee reeman ni gudaw reeman lidxil. <sup>13</sup> Zagdxeli naj, chi güünl tijb lanij, gunee bënprob ree, në ree bën



ad nadaant yaa, në ree bencoj con ree bénlutia'p. <sup>14</sup> Xiquilbaal bal güünl zian, din laa reeman ad zajct yanee ni badëedil. Per chi guidxin dxej yaban ree bën bazoob xtiidx Dios, Dios yaguijx laan lojl.

*Xcwent bën been tijb lanij*

<sup>15</sup> Chi biguiejn tijb bën zojbnë Jesús xan mex ni rëbaman, rëbaman loj Jesús:

—¡Xiquilbaa ree bën yayal gaw lod rniabee Dios!

<sup>16</sup> Dxel rëb Jesús lojman:

—Tijb bejn badxe' guialraw par xche, abi' guneeman zien da't ree bejn. <sup>17</sup> Chi ma gojl hor gaw reeman xche, guxhaal xmojsaman din chex chiguiedxix loj ree biooz guin: “Gol guda din graczi ma najcchaaw.” <sup>18</sup> Per graczi reeman guzuloj caynab perdon. Bën yaloj guin, rëbaman: “Yan gajczi guzin tijb guidxliuj, rayal chiquianan; been wen güjdx lojman din güünman naj perdon.” <sup>19</sup> Zatijbaman rëb: “Guzin gaay nejz go'n, yan chiguienan laa reeb prueb guidoondon rajc rüjn reeb dxiin ya; been wen güjdx lojman din güünman naj perdon.” <sup>20</sup> Zatijbaman rëb: “Yan gajczi baxhlian zeel ad zile't guialan.” <sup>21</sup> Chi badxin mojs guin bagojn xpatronx gra ni rëb ree bën guin, dád balenman, dxel rëbaman lojx: “Baquiejn wej niz galay ni, në niz lad ree nejz, tanë gra ree bënprob në ree bën ad nadaant yaa, në ree bencoj con ree bénlutia'p.” <sup>22</sup> Chi ma been mojs guin zian, dxel rëbix lojman: “Dad, ma benan ni nal, per sta yu' gajc luar lidxil.” <sup>23</sup> Dxel rëbaman lojx: “Wej niz loj carreter në niz loj ree nejz la's, been naguiejn ben ren ree din gui't reeman din cha lëñü lidxan. <sup>24</sup> Din naj rni lojdi, ni'czi tijb ree bën gunen yaloj ad zajwt guialraw benchaawan par xche.”

*Ni rayal güün ree bën rën gac xbejn Jesús*

<sup>25</sup> Dád zien ree bejn zinal Jesús; abi' badxi' lojman loj reeman rëbaman:

<sup>26</sup> —Bal chudi rën guidnal naj, rayal guiëndi naj mazri guial loj xdadidi, guial loj xniaadi, guial loj lacheelidi, në guial loj xi'ndi, o bijchidi o bizandi, rayal tëë guiëndi naj mazri guial loj xguialnabandi, din bal id züjndi zian ad zajct gaquidi da bejnan. <sup>27</sup> Bën ad rënt sagdiaj guidnal tëëman naj, ad zajct gacaman da bejnan.

<sup>28</sup> 'Bal chu rën güün tijb yu narooob, ¿nid yalojxgaj cweman ya din cwëëman cwent zadaan xmiliaman ya din gulooxaman laan? <sup>29</sup> Din bal sulojman xcimiantan abi' ad zulooxtaman laan, graczi ree bën guguaa laan guze' laaman, <sup>30</sup> guiëb reeman: “Guzuloj cayüjn bën guin yu abi' ad gojct nulooxaman laan.”

<sup>31</sup> 'O bal tijb rey güün wadijl contr zatiyb rey, ¿nid yalojxgaj cweman ya güünman xgab züjn chii mil xsuldadaman gan loj stijb rey zidnë gajl mil suldad ya? <sup>32</sup> Per bal naladxaman ad züjntaman gan loj rey guin, la'tgaj sta za' rey guin zijt, guixhiaalaman bën chinë ree xrusonman din yaya'n reeman diidx ad zut wadijl. <sup>33</sup> Yan, ziangajc rnin lojdi, chutëëz lëjt bal id zusa'n gra ni rajpidi din guidnalidi naj, ad zajct gaquidi da bejnan.

*Bal id zajcri zëd naxij*

*(Mt. 5:13; Mr. 9:50)*

<sup>34</sup> Dxel rëb Jesús:

—Ni zagdxe naj zëd. Per bal id zajcran naxij, ¿xhieza naag yayajcan naxij zatiyb?

<sup>35</sup> Ad rüjntan sirv par luyuj ni'qui par loj abon, rzëëbzan. ¡Bën rën ree gucaagdiajg, gol bacaagdiajg!

## 15

*Xcwent xiil gunit*

*(Mt. 18:10-14)*

<sup>1</sup> Gra ree bën ruquijx impuest në gra ree bëndol, bibig reeman lod za' Jesús din gucaagdiajg reeman ni rnieeman. <sup>2</sup> Guiáad ree bënfarisew con ree mextr rajc ley rnieeguidx reeman laaman, rëb reeman:

—Ruchajg b́en guin b́endol ree rawně tēēman laa reeman.

<sup>3</sup> Dxel rēb Jesús loj reeman:

<sup>4</sup> —Bal tijb bejn rajp tibgayuu xiil abi' rnijt tijbib, ¿nid rusa'nman zatajpgajlchiin-bitapib dajn ya abi' rigdiilaman xiil gunit guin xt lodzi radxejlaman laab? <sup>5</sup> Abi' chi radxejlaman laab rabaaman, rudxiibaman laab dxidyējnman. <sup>6</sup> Dxel chi radxin lidxaman, ruto'p ree xmiwaman nē ree b́en zojbnēman gajxh abi' rēbaman loj reeman: “Gol babaa zi'c rabaan, din ma badxejlan da xiilan be gunit.” <sup>7</sup> Yan, rnin lējt, ziangajc rabaaně Dios tijb b́en rayūjn xgab por xtol guial loj tajpgajlchiinbitap benza'c ad ryaadxt yayūjn xgab por xtol.

### *Xcwent milia ni bizēēb*

<sup>8</sup> 'O bal tijb b́engunaa rajpaman chii milia plajt abi' rusēēbaman tijban, ¿nid ruze'caman guij ya ruloob tēēman lēnū abi' raguuilaman laan zagdxe da't xt lodzi radxejlan? <sup>9</sup> Abi' chi radxejlaman laan, ruto'p ree xmiwaman nē ree b́en zojbnēman gajxh, abi' rēbaman loj reeman: “Gol babaa zi'c rabaan din ma badxejlan milia basēban.” <sup>10</sup> Yan, naj rni lojdi, ziangajc rabaan ree xianjl Dios por tijb b́endol rayūjn xgab por xtol.

### *Xcwent b́en rūjn perdon xi'n*

<sup>11</sup> Rēb tēē Jesús loj reeman:

—Tijb bejn yu' tio'p xi'nman. <sup>12</sup> Abi' xin naj mazri xinguiag, rēb loj xdadix: “Dad, banee ni rayal gaca'n.” Dxel badēēman ni rayal tijbgaj reex. <sup>13</sup> Ad gojct xchej ni cwa' reex ni rayal reex, xin naj xinguiag guin bato'gajquix graczi ni badēēd xdadix lojx, abi' con milia guin wejx zijt bignijt xlia'x graczi xmiliax guial beenx ni rēntzix. <sup>14</sup> Per chi ma banijtix gran, dxel guyu gubijn niz lod za'x abi' guzuloj biaadx ni gawix. <sup>15</sup> Dxel wejx bignabix dxiin loj tijb b́en zojb yagaj, abi' guxhaalaman laax chigajpix cūch ree dajn. <sup>16</sup> Guial tant rliaanx xt guyēnx niajwix ni raw ree cūch guin, per achut rudēē laan. <sup>17</sup> Dxel beenx xgab naladxix: “¡Zien ree xin rūjn dxiin lidx da Dadan xt sobr rūjn ni raw reex, guiáad naj guie ma guiētan bējz! <sup>18</sup> Yan, yazaan yaya' lidx da dadan din guiēn lojman: Dad, ma benan dol loj Dios nē lojl. <sup>19</sup> Ad rayaltri guinieel naj xi'n; been naj cwent zi'c tijb ree xmojsil.” <sup>20</sup> Dxel bayunejzix zia lidx xdadix.

'Per zijtri ziaadix chi baguiaa xdadix laax dxel bayaman laax, zianz ruxūnman bigchaaglojman laax, abi' gudiidxaman laax gudaw tēēman laax xid. <sup>21</sup> Dxel rēbix lojman: “Dad, ma benan dol loj Dios nē lojl, ad rayaltri guinieel naj xi'n.” <sup>22</sup> Per rēb xdadix loj ree xmojsaman: “Gol baquiejn gol taně lajd zagdxe, gol bascajcwixan, gol badxe' tijb guibnil yaax gol baslēē tēēx gurēch, <sup>23</sup> gol chica' go'n mazri nadaan, gol bagūjtib din yadaaw ree yaguieen ree lanij. <sup>24</sup> Din par naj ma gūjt da xi'nan abi' yan ma babanx, gunijtix abi' ma badxejlax.” Dxel guzuloj cayūjn reeman lanij.

<sup>25</sup> 'La'tgaj xi'nman xingol guin cayūjnx dxiin dajn. Chi badxinx gajxh lidx xdadix, biguiejnx cucwejdx reeman cuya' tēē reeman. <sup>26</sup> Dxel gurejdxix tijb xmojs xdadix, gunabdiidxix xhienin cayajc lidxix. <sup>27</sup> Badxi' mojs guinan rēbix: “Guial baguiaad bijchil zeel gunabee xdadil gūjt tijb go'n mazri nadaan guial nadaanx baguiaadix.” <sup>28</sup> Per dád bidxe'ch xingol guin, abi' ad guyēntix nayux. Zeel wej xdadix biguiedxaman lojx din yayux. <sup>29</sup> Dxel rēb loj xdadix: “Lūj ragbee ma gojc xchej cayūnan xchiinl, zianczi ruzoban xtiidxil; per ni'czi tijb ad waneetil tijb dxibdobēz din gūnně' ree da miwan lanij. <sup>30</sup> Guiáad yan baguiaad xi'nl, xin ma bignijt xlia' xmiliax con ree b́engunaa dxuudx, abi' gunabeel gūjt go'n mazri nadaan par laax.”

<sup>31</sup> 'Dxel badxi' xdadix laan rēbaman: “Xi'n, zianczi za'l con naj, graczi ni ra'pan naj xieenl. <sup>32</sup> Per yan rayal yaguieen ree lanij yabaa tēē ree, din bijchil xin ma gūjt par naj, ma babanx, gunijtix abi' ma badxejlax.”

## 16

### *Xcwent tijb mojs rniabee ree mojs*

<sup>1</sup> Rëb tëë Jesús loj ree xbejnman:

—Guyu tijb benrijcw, nuzujman tijb mojs guinia graczi ni rajpaman. Abi' biguiedx ree ben ren lojman guial cunijt xlia' mojs guin ni naj xieenman. <sup>2</sup> Dxel gurejdxaman laax rëbaman lojx: “¿Xhie rën guiëb ni riguejnan cayüjnl? Banee cwent lon xcwent xchiinl, din achetri dxiin gunen lojl.” <sup>3</sup> Dxel guzuloj beenx xgab gunaladxix: “¿Xhienaag gūnan yan ma gusa'n da patronan naj sin dxiin? Ad yu'tan gojl gūnan dxiin dajn, ratu tëën ganaaban carda. <sup>4</sup> Ma ragbeen xhienaag gūnan din guiën ree bejn naj chi ad zūntran dxiin.” <sup>5</sup> Dxel gurejdxix tijb gaj ree bën ral loj xpatronx, rëbix loj bën bidxin yaloj: “¿Plac ralil loj da patronan?” <sup>6</sup> Abi' rëbaman: “Ralan tibgayuu barril sejt lojman.” Dxel rëbix: “Cwa' gui'ch guie lod ca ni ralil lojman, been zatijban bacaa lojn ralil tü'pchiizan.” <sup>7</sup> Dxel gunabdiidix loj zatijbaman rëbix: “Laadx lüj, ¿plac ralil?” Abi' rëbaman: “Tib gayuu ingujch trigo.” Zianz rëbix: “Cwa' gui'ch guie lod ca ni ralil lojman, been zatijban bacaa lojn ralil tajpgajlzan.” <sup>8</sup> Dád badxaloj patron guin guial nasin mojs mal guin por ni beenx. Din mazri nasin ree bën ad zinalt xnejz Dios con lasa' reeman guial loj ree bën zinal xnejz Dios.

<sup>9</sup> 'Rnin lojdi, gol beennë dxiin ni rajpidi loj guidxliuj guie par gagnëdi bejn din chu' xmiwidi, din chi yaran ma yu' bën yaca' lëjt lod gapidi guialnaban tiblayaa.

<sup>10</sup> 'Bal chu rüjn zi'c rayal con ta'n ni rudëed bejn lojman, züjnman zi'c rayal con zro'n. Ziangajc bën ad rüjnt zi'c rayal con ta'n ni rudëed bejn lojman, ad züjn gajctaman zi'c rayal con zro'n. <sup>11</sup> Yan, ziangajc bal id züjndi zi'c rayal con ni za'c yu' loj guidxliuj guie, ¿chu gap lëjt confianz con guialnaza'c yu' xanyabaa? <sup>12</sup> Bal id züjndi zi'c rayal con ni ad najt xieendi, ¿chu gunee lëjt ni rayalidi?

<sup>13</sup> 'Ni'qui tijb mojs ad zajct güünx sirv loj tio'p patron; din zadxe'chix tijbaman abi' zënx zatijbaman; o zajquix xinza'c con tijbaman abi' züjnx tiblax zatijbaman. Zeel ad zajct güündi sirv loj Dios, në loj milia.

<sup>14</sup> Abi' ree bënfarisew guial mazri rën reeman milia, chi biguejnan reeman ni rëb Jesús guzuloj cuze' reeman laaman. <sup>15</sup> Dxel rëb Jesús loj reeman:

—Rüjndi benza'c niz loj ree bejn, per Dios nünbee luxdoodi; abi' majsi loj bejn lasajc da'tidi, per loj Dios achet lasajquidi.

### *Xley Moisejs con xguialrniabee Dios*

<sup>16</sup> 'Xley Moisejs në ni bacaa ree bën badëë xtiidx Dios loj ree bejn, naga'loj been reen dxiin xt chi bi't Waj bën baroobnijs bejn ree. Abi' diidz nadxel guzuloj rirë'ch xtiidxza'c Dios xhienaag naj xguialrniabeeman, abi' zien ree bejn rüjn naguiejn chu' loj xguialrniabeeman.

<sup>17</sup> 'Adli nawëëgt nit xanyabaa në guidxliuj, guial yaya'n tijb diidx zëed loj ley guin guial ad zajctan cumplid.

### *Rülüü Jesús xcwent guial rala' lasa'*

*(Mt. 19:1-12; Mr. 10:1-12)*

<sup>18</sup> 'Bal tijb xinguaaaw rala' lacheelix abi' rtia'x ben ren, dolan cayüjnx. Ziangajc xin rtia' tijb bëgunaa bala' lacheel, dolan cayüjnx.

### *Xinrijcw con Lazr*

<sup>19</sup> Basnuu Jesús, rëbaman:

—Guyu tijb xinrijcw, guzujchaawix con ganaxczi lajd zagdxë, abi' guixie guixieczi rüjnx lanijro'. <sup>20</sup> Guyu tëë tijb xinprob brii lajx Lazr, rbejx ro' xport xinrijcw guin abi' guidibлагаax ca guiadx. <sup>21</sup> Rën nejzdoo Lazr guin gawix ni riajb xan xmex xinrijcw guin. Abi' xt ree bë'cw rbig rlie' reeb loj ree guiadx ni cax.

<sup>22</sup> 'Chi bidxin dxej güjt Lazr dxel bignë ree xianjl Dios laax lod naj nix da't, lod za' Abraham. Në xin rijcw guin güjt, abi' biguie'chix. <sup>23</sup> Chi ma cazagdiaj xin rijcw guin gabijl, gules lojx abi' zijtri baguiaax za' Lazr cwë' Abraham. <sup>24</sup> Dxel gurixdiajx rëbix: “Dad Abraham, baya naj, guxhaal Lazr din gugajdx lupunt xbacwën timer din gui'tix yasiaalyujx lüdxan, din dád cazaagdiajn loj bajl guie.” <sup>25</sup> Per badxi' Abraham xtiidix rëbaman: “Xi'n, basaaladx guial dád nix guyu luxdool chi gubanl loj guidxliuj, guiáad Lazr dád naya gubajnx. Yan, rayalix lod yabaax guiáad lüj rayalil lod sagdiajl. <sup>26</sup> Nëtëë yan bën za' ree guie ad zajct téd reeman yagaj, ni'qui ree bën za' yagaj ad zajct téd reeman guie, din za' bala'ro' du galay ree.”

<sup>27</sup> 'Dxel rëb xinrijcw guin lojman: “Rniaaban lojl dad, been wen guxhaal Lazr lidx da dadan, <sup>28</sup> lod zojb gaay ree da bichan din chicojnx laa reex chitëë në laa reex gui't luar guie, lod yu' zro' casti.” <sup>29</sup> Per rëb Abraham lojx: “Ma rajp reex gui'ch ni bacaa Moisejs con ree bën badëë xtiidix Dios loj ree bejn, laan rayal guidxga' reex.” <sup>30</sup> Abi' rëb xinrijcw guin: “Walil, dad Abraham, per ad zaliladxt reex, sa'n bal yaban tijb bën ma güjt chigneenëman laa reex, zayüjn reex xgab por xtol reex.” <sup>31</sup> Per rëb Abraham lojx: “Bal id ridxga' reex xtiidix Moisejs në xtiidix ree bën badëë xtiidix Dios loj ree bejn, ad zaliladxt reex majsi yaban tijb bën ma güjt.”

## 17

### *Bën ruzaalguiiw bejn din güünman dol* (Mt. 18:6-7, 21-22; Mr. 9:42)

<sup>1</sup> Rëb Jesús loj ree xbejnman:

—Zianczi yu' ree ni ruzaalguiiw bejn din güünman dol, per iprobza naj bën ruzaalguiiw zatijb bejn guial güünman dol! <sup>2</sup> Par laaman zagdxeli naj guixhii reeman tijb guiaj mulin yëjnman din guzaal reeman laaman loj nijsdoo, luar guzaalguiiwaman tijb bën qui rliladxri naj din güünman dol. <sup>3</sup> iGol gojp cudad!

'Bal xhie tijb ni mal güün tijb lasa'l, guneenëman. Abi' bal bayüjnman xgab por ni beenman, beenman perdon. <sup>4</sup> Majsi gajdx volt loj tibdxej güünman xhienin contr lüj, abi' bal gui'taman lojl gajdx volt naman: “Been naj perdon ad züntran zian”, rayal güünl laaman perdon.

### *Guialrniabee në guialrliladx*

<sup>5</sup> Dxel rëb ree xi apóstoles Jesús lojman:

—Banee dunujn mazri guialrliladx.

<sup>6</sup> Abi' rëb Jesús loj reeman:

—Bal naj xguialrliladxidi majsi zi'czi naj xhaj moxtajs, zile' guiëbidi loj yagro' guin: “Bia'xh guie, bisob loj nijsdoo”, zuzooban xtiidixidi.

### *Ni rayal güün tijb mojs*

<sup>7</sup> 'Bal tijb lëjt rajp tijb mojs, abi' chi yaguaaad mojs guin bigla'x yuj o bigajpax begui'xh ree ya, iwen zëjbidi lojx ya: “Guyu, gurej din gawil”? <sup>8</sup> Ad zëjbtidi zian, guiëblidi: “Bachaa xabil, been ni gawan, guda'n. Chi lox gawan guië' tëen dxel ma zajc gawil guië' tëël.” <sup>9</sup> Abi' wed ni'qui quixtëë ad zudëëtidi lojx din cayüjnzix ni rayal güünx. <sup>10</sup> Ziangajc lëjt chi loox güündi gra ni gunabee Dios dxel guiëbidi: “Nayajcan mojs ni ad rüjnt sirv, din baguieenzan ni rayal yaguieenan.”

### *Rayüjn Jesús chii ree bën rajc guialguijdx la lepra*

<sup>11</sup> Chi ma cadxin Jesús Jerusalén, gudëdaman guiedx riga' ree niz Samaria në niz Galilea. <sup>12</sup> Abi' chi cayuman tijb luguiedx dobëz, bigchaagloj chii ree bën rajc guialguijdx la lepra laaman. Per zijt guzuj reeman, <sup>13</sup> rbixdiaj reeman, rëb reeman:

—iJesús, Mextr, baya dunujn!

<sup>14</sup> Chi baguiaa Jesús laa reeman, rëbaman loj reeman:

—Gol chej loj ree bixhioz din guguaa reeman lëjt.

Abi' la'tgaj zë reeman, baya xcuerp reeman guialguijdx ni rajc reeman. <sup>15</sup> Dxel tijbaman chi gogbeeman ma bayajcaman, bayejcaman, rbixdiajman rudëëman quixtëë loj Dios. <sup>16</sup> Abi' bazuxibaman loj Jesús, basajb lojman xt luyuj persi badëëman quixtëë lojman. Abi' najman bën Samaria. <sup>17</sup> Dxel rëb Jesús:

—¿Nid chii naj ree bën bayajc ya? ¿Con zagaa reeman? <sup>18</sup> ¿Tijbzi benzit guie bayejc ya rudëëman quixtëë loj Dios?

<sup>19</sup> Dxel rëbaman loj bën guin:

—Bisu. Baguiaj, ma bayajquil guial bililadxil naj.

### *Xhienaag gui't xguialrniabee Dios*

*(Mt. 24:23-28, 36-41)*

<sup>20</sup> Gunabdiidx ree bënfarisew loj Jesús goc gui't xguialrniabee Dios, abi' rëbaman:

—Xguialrniabee Dios ad najtan ni guguaa bejn. <sup>21</sup> Abi' achut guiëb: “Laan za' guie”, o “Laan za' ni” ya, din xguialrniabee Dios mal za'n galaydi.

<sup>22</sup> Dxel rëbaman loj ree xbejnman:

—Zadxin dxej guiëndi guguaadi Bén guxhaal Dios majsi tibdxejzi, per ad zuguaatidi laaman. <sup>23</sup> Abi' yu' reeman na lëjt: “Laaman za' guie”, o “Laaman za' ni” ya, ad bal chinalidi laa reeman. <sup>24</sup> Din zi'c chi rë'p nijs rulaan bacha' guidib xanyabaa, zian gac chi gui't Bén guxhaal Dios loj guidxliuj. <sup>25</sup> Per yalojxgaj sagdiajman abi' ad zënt ree bën riga' yan laaman. <sup>26</sup> Zi'c goc gulal chi guban Noé, zian gac chi gui't Bén guxhaal Dios. <sup>27</sup> Din naxdel gudaw ree bejn, gu' reeman, baxhliaa reeman badëë tëë xi'n reeman baxhliaa xt chi bidxin dxej guyu Noé lën barcwro' ni beenman, abi' guzuloj guiadoxh ni bagüjt gra reeman. <sup>28</sup> Ziangajc gojc chi guban bën brii laj Lot, gudaw ree bejn, gu' reeman, bato' reeman, guzii reeman, guxübin reeman been tëë reeman yu ree. <sup>29</sup> Per chi brii Lot luguiedx Sodoma, guzuloj biyajb gui' xanyabaa në azufre, abi' güjt gra reeman.

<sup>30</sup> Ziangajc gac dxej ni gui't Bén guxhaal Dios.

<sup>31</sup> 'Dxej ni gac zian, bën yë'p gui'c yu ad zaguiajttaman chiglëë ni nagu'man lënü. Abi' bën za' dajn, ad zayejct lidxaman. <sup>32</sup> Gol basaaladx ni guzac lacheel bën brii laj Lot. <sup>33</sup> Bén mazri rën guialnaban rajpaman loj guidxliuj guie, zadxin dxej gunijttaman laan, per bën guiët por naj, zajpaman guialnaban tiblayaa con Dios.

<sup>34</sup> 'Naj rni lëjt, guxhinzii lod naga' tio'p bejn tijbzi loj loon, tijbaman sa zatijbaman yaya'n. <sup>35</sup> Guiáad lod cayojt tio'p ree béngunaa, tijbaman sa zatijbaman yaya'n. <sup>36</sup> Abi' lod za' tio'p ree xinguaaw dajn, tijbix sa zatijbix yaya'n.

<sup>37</sup> Chi biguiejn ree xbejnman zian, rëb reeman:

—¿Ban guin, Dad?

Badxi'man laan rëbaman:

—Laa guiguien gajc ban guinan, zi'c chi rado'p ree golbich laa rguien gajc naga' tijb begüt.

## 18

### *Xcwent tijb béngunaa bizëjb në tijb juejs*

<sup>1</sup> Be Jesús tijb cwent loj ree xbejnman, persi balüüman laa reeman guial zianczi rayal cwedx guiniab reeman Dios ad zadxagtczi reeman. <sup>2</sup> Abi' rëbaman loj reeman:

—Guyu tijb guiedx lod guyu tijb juejs, ad rdxebttaman Dios ad ridxga' tëëtaman bejn ree. <sup>3</sup> Luguiedx ziigajc zojb tijb béngunaa bizëjb, rniabaman loj juejs guin din güünman guialguxtis gagnëman laaman loj bën rdxe'ch laaman. <sup>4</sup> Xchej ad bidxga't juejs guin béngunaa bizëjb guin, per zianz laagajcaman been xgab naladxaman: “Majsi ad

rdxebtan Dios ad ridxga' tēetan bejn ree, <sup>5</sup> per béngunaa guie ad rucwēēt ruslenman naj. Zagdxeli naj gūnan laaman yudar chitēē ri'traman naga gad da pacensan chigra.”

<sup>6</sup> Dxel rēb Jesús loj reeman:

—Zian gunee juejs mal guin. <sup>7</sup> Diidxgui Dios, ¿nid zagnēman bēn guleman ya bēn rbejdx rniab ree laaman dxej guiaal? ¿Wen zaglaa gagnēman laa reeman ya? <sup>8</sup> Naj rni lējt guial ad zaglaat gagnēman laa reeman. Per chi gui't Bēn guxhaal Dios, ¿chuj ni zadxaaglojraman bēn riladx Dios loj guidxliuj ya?

*Xcwent bēnfarisew con bēn ruquijx impuest*

<sup>9</sup> Be Jesús zatijb cwent par ree bēn naladx tijbzi laa reeman naj benza'c guial loj ree ben ren, rēbaman:

<sup>10</sup> —Tio'p ree xinguaaw wej lēn yadooro' Jerusalén persi gurejdx gunab reex Dios, tijbix naj xinfarisew, zatijbix naj xin ruquijx impuest. <sup>11</sup> Xin farisew guin, za'lix cabejdx canabix Dios, rēbix: “Quixtēē runen lojl, Dad, guial ad najtan zi'c ree ben ren, naj reeman béngubaa, benmal, bēn za'nē béngunaa ren, ni'qui zi'c naj bēn ruquijx impuest guin. <sup>12</sup> Rba'nān tio'p volt lēn xuman, abi' gra ni rūnan gan rūnanan chii lala' persi runen tijban lojl.” <sup>13</sup> Per xin ruquijx impuest guin, zijt za'x abi' ni'quid rayaxtix guilies lojx, rga'p luxdoox rēbgajx: “¡Dios, baya naj najn tijb xindol!” <sup>14</sup> Naj rni lējt guial xin ruquijx impuest guin ma been Dios laax perdon chi bayejc lidix, per xin farisew guin ad beentaman laax perdon. Din bēn rliēs xvalor gajc achet lasajcaman loj Dios, guiáad bēn rūjn naya laaman mazri lasajc loj Dios.

*Rūjnle' Jesús xindoo ree*

*(Mt. 19:13-15; Mr. 10:13-16)*

<sup>15</sup> Binē ree bejn xindoo ree lod za' Jesús din gudxiib yaaman guijc reex, per chi baguiaa ree xbejnman guzuloj cadilē reeman bēn zinē ree laa reex. <sup>16</sup> Per gurejdx Jesús laa reeman, rēbaman loj reeman:

—Gol badēē mod gui't reex lon, ad bal rudxoondi, din lod rniabee Dios naj par ree bēn naj zi'c laa reex. <sup>17</sup> Din naj rni lējt, bēn ad riladxt xguialrniabee Dios zi'c tijb xindoo, ad zile't chu'man loj xguialrniabee Dios.

*Xcwent tijb xin rijcw*

*(Mt. 19:16-30; Mr. 10:17-31)*

<sup>18</sup> Tijb xin rniabee, gunabdiidx loj Jesús rēbix:

—Mextrza'c, ¿xhie rayal gūnan din ga'pan guialnaban tiblyaaa con Dios?

<sup>19</sup> Badxi' Jesús laan, rēbaman:

—¿Chexc zeel nal lon benza'c? Achut naj benza'c, tijbzi Dios. <sup>20</sup> Lūj rajc ree mandamient: “Ad sunēl béngunaa ren, ad gugūjtil bejn, ad cwanl, ad cwēēl xtiidx bejn, gojpx respejt xdad xniaal.”

<sup>21</sup> Dxel rēbix loj Jesús:

—Gra ree ni guin cayūnan diizd xindoon.

<sup>22</sup> Chi biguiejn Jesús zian, rēbaman:

—Yu' zatijb ni ryaadx gūn: bigto' gra ni rajpil dxel gudēēl milia guin loj ree bēnprob. Zian gapil guialnaza'c xanyabaa, dxel gui'til guidnalil naj.

<sup>23</sup> Chi biguiejn xin guin zian, dād guyunayax guial dād xinrijcwan. <sup>24</sup> Chi baguiaa Jesús guial dād yu'nayax, rēbaman:

—¡Dād nawēēg naj chu' benrijcw loj xguialrniabee Dios! <sup>25</sup> Adli nawēēgt tēd tijb camell xan gagux, guial chu' tijb bēn rijcw loj xguialrniabee Dios.

<sup>26</sup> Abi' ree bēn biguiejn ni rēb Jesús, rēb reeman:

—¿Chu za zajc laa loj xcasti Dios?

<sup>27</sup> Dxel rēbaman loj reeman:

—Yu' ni ad zajct gūn bénguidxliuj, per Dios graczan zajc gūnman.

<sup>28</sup> Dxel rëb Bëd lojman:

—Dad, ma basa'nan graczi ni raya'pan persi zudnaalan lüj.

<sup>29</sup> Zianz rëb Jesús:

—Diidxliczi rnin lojdi, chutëez bén rusa'n lidx, lacheel, bijch, o xdad, o xniaa, o xi'n guial rüjnman zi'c rniabee Dios, <sup>30</sup> mazri zien ni tia'man loj guidxliuj guie. Abi' zajpaman guialnaban tiblayaa con Dios.

*Rugojn Jesús zatijb guial guiëtaman*

*(Mt. 20:17-19; Mr. 10:32-34)*

<sup>31</sup> Gurejdx Jesús guidxiptio'p ree xbejnman tiblad, abi' rëbaman loj reeman:

—Yan, ziyo' ree Jerusalén lod gac zi'c bacaa ree bén badëë xtiidx Dios loj ree bejn xcwent Bén guxhaal Dios. <sup>32</sup> Yayü reeman laaman loj ree benzit, guze' reeman laaman, guiniee reeman laaman ni rëntzi reeman, abi' gucojp xhiejn reeman lojman. <sup>33</sup> Quin reeman laaman dxel gugüjt reeman laaman, per ni yayon dxej yabanman.

<sup>34</sup> Per laa reeman ad bignia'tczi reeman ni rëbaman, ad ragbee tëët reeman chexc zeel rëbaman zian din ad bile't nignia' reeman xhie rën guiëb ni guneeman.

*Rayajc guiaaloj tijb bénlutia'p*

*(Mt. 20:29-34; Mr. 10:46-52)*

<sup>35</sup> Chi ma cadxin Jesús gajxh guiedx Jericó, tijb bénlutia'p, zojbaman cwë' neiz rniabaman carda. <sup>36</sup> Chi gogbeeman cadëd zien ree bejn, gunabdiidxaman xhie cayajc.

<sup>37</sup> Abi' rëb reeman lojman guial Jesús bén Nazaret cadëd niz yagaj. <sup>38</sup> Dxel gurixdiajman rëbaman:

—¡Jesús, xdiaa Davi, baya naj!

<sup>39</sup> Bén ned ree rdilë reeman laaman din gucwëez ro'man, per mazri rbixdiajman, rëbaman:

—¡Xdiaa Davi, baya naj!

<sup>40</sup> Dxel guzudxe Jesús abi' gunabeeman bica' reeman laaman. Chi bidxinman gajxh lojman, gunabdiidxaman lojman, rëbaman:

<sup>41</sup> —¿Xhie rënl günan por lüj?

Badxi'man laan rëbaman:

—Dad, rënan yani lon.

<sup>42</sup> Dxel rëb Jesús lojman:

—¡Ma zile' guguaal! Ma bayajquil guial bililadxil naj.

<sup>43</sup> Hor guin gajc bani loj bén guin, abi' binalaman Jesús rudëëman quixtëë loj Dios. Në gra ree bén baguiaa ni goc rudëë quixtëë loj Dios.

## 19

*Wej Jesús lidx Zaqueo*

<sup>1</sup> Guyu Jesús luguiedx Jericó abi' guzuloj cadëdaman luguiedx guin. <sup>2</sup> Yagaj zojb tijb benrijcw laman Zaqueo. Laaman rniabee ree bén ruquijx impuest. <sup>3</sup> Rën Zaqueo guin güünbeeman Jesús, per ad rilet' guguaaman laaman guial dád zien ree bejn abi' laaman najman bendop. <sup>4</sup> Zeel ruxüünman gunedaman, abi' din chile' guguaaman Jesús, wë'paman loj tijb yagro' zojb gajxh lod téd Jesús. <sup>5</sup> Chi gudëd Jesús yagaj, gules lojman abi' rëbaman lojman:

—Zaqueo, cari baguiajt, din yandxej naj yaya'nan lidxil.

<sup>6</sup> Dxel cari da't baguiajt Zaqueo, abi' dád rabaaman zignëman Jesús. <sup>7</sup> Chi baguiaa ree bejn zian, gra reeman guzuloj caneeguijdx Jesús rëb reeman zigya'nman lidx tijb béndol.

<sup>8</sup> Dxel guzuli Zaqueo, abi' rëbaman loj Jesús:

—Dad, gagui's garol ni ra'pan loj ree bénprob. Abi' bal yu' bén baquijxan mazri guial loj ni naj quixaman, yayünan tajp volt mazri guial loj ni gulaanan.

<sup>9</sup> Dxel rëb Jesús lojman:

—Yandxej ma been Dios perdon gra ree bèn zojb lidx Zaqueo guial riladxaman Dios zi'cgajc Abraham. <sup>10</sup> Din Bén guxhaal Dios zëédaman zidgadiilaman bèn ad zèt ree loj xnejz Dios din laa reeman loj xcasti Dios.

### *Xcwent milia*

<sup>11</sup> Bén cucaagdiajg ree ni canee Jesús, beman tijb cwent loj reeman guial ma zë reeman gajxh Jerusalén abi' laa reeman naladx reeman guial hor guin guidxin xguialrniabee Dios. <sup>12</sup> Dxel rëbaman loj reeman:

—Guyu tijb bejn, zëédaman loj tijb famil zojbloj. Zëman zijt lod tia'man guialrniabee din gacaman rey dxel yajejcaman nabee ladxaman. <sup>13</sup> Chi gadaman grii gurejdxaman chii xmojsaman abi' loj tijbgaj reex badëëman zro' milia, zianz rëbaman loj reex: “Gol beennë milia guin dxiin xt chi guidxin dxej yaguialan.” <sup>14</sup> Per ree bèn ladxaman guial rdxe'ch reeman laaman, guxhaal reeman tibcwaa ree bèn zinal laaman persi biguiedx reeman guial ad rënt reeman gac bèn guin xrey reeman. <sup>15</sup> Per laaman bazuj reeman gacaman rey, abi' bayejc ladxaman. Chi badxinman dxel gunabeeman bignee reeman mojs badëëman milia guin din gagbeeman plac ma been tijbgaj reex gan. <sup>16</sup> Mojs bidxin yaløj rëbix: “Dad, milia ni baneel ma beenan gan chii volt mazri.” <sup>17</sup> Dxel rëb rey guin lojx: “Zagdxen mojsza'c, ma beenl zi'c rayal. Abi' guial beenl zi'c rayal con ta'nzi ni banen, yan guzun lüj nabeel chii guiedx.” <sup>18</sup> Chi bidxin mojs barojp guin, rëbix: “Dad, milia ni baneel lon ma beenan gan gaay volt mazri.” <sup>19</sup> Ziangajc rëb rey guin loj mojs guin: “Lüj nabee gaay guiedx.” <sup>20</sup> Dxel bidxin zatijb mojs guin abi' rëbix: “Dad, laa xmilial guie, badxe'chaawanan lën tijb baydoo, <sup>21</sup> din bidxeban lüj guial ad rayatil bejn. Raca'l ni ad najt xieenl abi' rato'pil guialnaza'c lod ad guxübintil.” <sup>22</sup> Dxel rëb rey guin: “Mojs guijdx por xtiidxgajquil rayalil casti. Bal ragbeel guial ad rayatan bejn, abi' raca'n ni ad najt da xieenan ratop tëen guialnaza'c lod ad guxübintan. <sup>23</sup> ¿Chexc ad badëëtil da milian nigui'n bejn din chi naguialan naca'nan con guidib xi'nan?” <sup>24</sup> Dxel rëb rey guin loj ree bèn za' yagaj: “Gol baca' milia zii lojx, gol badëëdan loj xin ca' mazran.” <sup>25</sup> Abi' rëb reeman loj rey guin: “Dad, per ma ca'x zro'n.” <sup>26</sup> Badxi'man laan rëbaman: “Bén rajp zro', zaca'man mazri, per bèn rajp ta'nzi, xt ta'n ni rajpaman chiquied lojman. <sup>27</sup> Abi' ree bèn rdxe'ch naj bèn ad guyënt ree niajcan rey, gol tanë reeman guie, gol bagüjt reeman lon.”

### *Ru Jesús Jerusalén*

*(Mt. 21:1-11; Mr. 11:1-11; Jn.12 :12-19)*

<sup>28</sup> Chi gulox rëb Jesús zian, dxel basnuu zëman Jerusalén. <sup>29</sup> Chi bidxinman gajxh guiedx Betfagé con Betania, në gajxh guia' la Olivos, dxel guxhaal tio'p ree xbejnman, <sup>30</sup> rëbaman loj reeman:

—Gol chej guiedxdo riga' guin, chi guidxindi guidxaaglojdi tijb burquie'n, caduub, achut wabib laab. Gol guxhiequib gol tanëb. <sup>31</sup> Abi' bal chu guiniabdiidx lojdi chexc zeel rxhiequidi laab, gol güjdx Dad Jesús cayaadx laab.

<sup>32</sup> Wej ree bèn guxhaalaman bidxaagloj gajc reeman zi'cgajczi rëb Jesús loj reeman. <sup>33</sup> Abi' chi caxhie reeman bur guin, gunabdiidx ree bèn naj xbur laab, rëb reeman:

—¿Chexc zeel caxhiequidi bur guin?

<sup>34</sup> Badxi' reeman laan, rëb reeman:

—Din Dad Jesús cayaadx laab.

<sup>35</sup> Dxel binë reeman bur guin lod za' Jesús, zianz badxiib xab reeman xijchib abi' been reeman laaman yudar persi gudxibaman laab. <sup>36</sup> Abi' ree bejn rguijxh xab reeman lunejz lod zë Jesús. <sup>37</sup> Chi ma zë reeman gajxh laguiajt ni naj guia' la Olivos, gra ree bèn zinal Jesús guzuløj rbixdiaj reeman guial dád rabaa reeman abi' ruza't reeman Dios zagdx por gra ree milagr ni ma baguiaa reeman. <sup>38</sup> Rëb reeman:

—¡Nüjnle' Dios bèn zëéd por laaman! ¡Yu' guialrabaa xanyabaa! ¡Benza'c bendxoon naj Dios bèn yu' xanyabaa!



<sup>39</sup> Dxel ree bénfarisew no'ch loj ree bén zinal laaman, rëb reeman lojman:

—Mextr, gudilë ree bén guin chitëë rniee reeman zian.

<sup>40</sup> Per badxi'man laan rëbaman:

—Naj rni lëjt, bal yacwëëz ro' reeman, guiaj ree cwixdiaj zian.

<sup>41</sup> Chi bidxinman gajxh Jerusalén, dxel baguiaaman guiedx guin, zianz biinman por laan. <sup>42</sup> Rëbaman:

—¡Bén Jerusalén, xi nix majsi yandxejzi yayagbeedi chu yabe'cdxe luxdoodi! Per yan naguie'ch najn par lëjt, ad zile't chignia'di laan. <sup>43</sup> Din guidxin dxej ni güün ree bén rdxe'ch lëjt tijb ze' gadëd ladxidi, abi' gra lad gusiaaw reeman lëjt, <sup>44</sup> gugüjt reeman lëjt. Dxel gunijt reeman ladxidi, ni'qui tijb guiaj ad zaya'nt guijc stijb guiaj, din ad bidxga'tidi hor ni bidganaj Dios lëjt.

### *Rabëë Jesús bén ruto' ree ro' yadooro' Jerusalén*

*(Mt. 21:12-17; Mr. 11:15-19; Jn.2 :13-22)*

<sup>45</sup> Chi bidxin Jesús ro' yadooro' Jerusalén, guzuloj caybëëman bén cuto' ree në ree bén cazii, <sup>46</sup> rëbaman loj reeman:

—Loj xtiidx Dios rëb: “Lidxan naj yu lod rbejdx rniab bejn Dios.” Per lëjt nünndan zi'c lidx ree xingubaan.

<sup>47</sup> Guixie guixie rulüü Jesús bejn ree lën yadooro' Jerusalén, per ree bixhioz rniabee ree bixhioz con ree mextr rajc ley, në ree guxtis luguiedx guin raguuil reeman mod din gugüjt reeman laaman. <sup>48</sup> Per ad radxejlt xhienaag güün reeman, din graczi ree bejn rucaagdiajg chaaw ni rulüüman laa reeman.

## 20

### *Xgualrniabee Jesús*

*(Mt. 21:23-27; Mr. 11:27-33)*

<sup>1</sup> Lën ree dxej ni za' Jesús lën yadooro' Jerusalén, culüüman bejn ree xtiidx Dios, bidxin ree bixhioz rniabee ree bixhioz, con ree mextr rajc ley, në ree guxtis Israel, <sup>2</sup> abi' rëb reeman lojman:

—Guna, ¿chu na güünl ni guin ree? ¿Chu banee gualrniabee lojl?

<sup>3</sup> Badxi' Jesús laan, rëbaman:

—Ziangajc naj yu' tijb ni ganabdiidxan lojdi. Gol badxi'n: <sup>4</sup> ¿chu guxhaal Waj bidgaroobnijsaman bejn ree, Dios ya o bénguidxliuj?

<sup>5</sup> Dxel guzuloj rëb loj lasa' reeman:

—Bal yaguie'ch ree Dios guxhaal laaman, zanaman. “¿Chexquiza zeel ad bililadxtidi laaman?” <sup>6</sup> Abi'za bal yaguie'ch ree bénguidxliuj guxhaal laaman, zugüjt ree bejn dunuj ree con guiaj din gra reeman rliladx gual Waj gojc bén badëë xtiidx Dios loj ree bejn.

<sup>7</sup> Abi' badxi' reeman laan rëb reeman gual ad ragbeet reeman chu guxhaal Waj bidgaroobnijsaman bejn ree. <sup>8</sup> Dxel rëb Jesús loj reeman:

—Ni'qui naj ad zanitan lojdi chu banee gualrniabee günan ni guin ree.

### *Xcwent ree mojs guijdx*

*(Mt. 21:33-44; Mr. 12:1-11)*

<sup>9</sup> Dxel guzuloj cayü Jesús tijb cwent loj ree bejn, rëbaman:

—Guyu tijb bejn guxübinman uv ree loj xguiniaaman, dxel badëëman laan garol loj ree bén güün dxiin lojn, zëtaman zijt. <sup>10</sup> Chi bidxin dxej yala' reeman uv guin, guxhaalaman tijb xmojsaman chigxiix ni rayalaman, per ree bén rüjn dxiin loj guiniaa guin gudijn reeman mojs guin abi' badxi' reeman laax zezi. <sup>11</sup> Dxel guxhaalaman mojs ren, per nëgajc mojs guin gunee reeman ni rëntzi reeman, gudijn reeman laax abi' badxi' reeman laax zezi. <sup>12</sup> Zianz guxhaalaman zatijbix, per gudiilguijdx reeman laax abi' babëë reeman laax loj guiniaa guin.

<sup>13</sup> Dxel rëb bën naj xguidxliuj laan: “¿Xhienaag gūnan yan? Gaxhal da xi'nān xin rēn da'tan, wed zajp reeman laax respejt.” <sup>14</sup> Per chi baguiaa ree bën guin laax, rëb loj lasa' reeman: “Xin guinan naj xin yaya'nnē guidxliuj guin. Yagūjt reex din gacan du xieen ree.” <sup>15</sup> Dxel babēē reeman laax loj guidxliuj guin, bagūjt reeman laax.

Zianz gunabdiidx Jesús loj ree bën caneenēman, rëbaman:

—Yan, ¿xhie naladxidi gūnnē bën naj xguidxliuj laan bën guin ree? <sup>16</sup> Naj rni lojdi guial zi'taman din gugūjtaman bën guin ree dxel gudēēman guidxliuj guin loj ree ben ren.

Chi biguiejn reeman zian dxel rëb reeman:

—¡Gagnē Dios ad zajct zian!

<sup>17</sup> Per Jesús baguiaaman loj reeman, abi' rëbaman:

—Bal id zajc zian ¿xhieza rēn guiēb ni ca loj xtiidx Dios? Lod rëb:

Guiaj ni gulēēgo'n ree bën rūjn yu,  
laan naj ni mazri been sirv gojcnē yu guin.

<sup>18</sup> Chutēēz bën yab guijc guiaj guin, gacaman zi'c tijb ni riroox, guiáad bal yab guiaj guin guijcaman, gacaman zi'c tijb ni ryūüdēj.

### *Xcwent impuest*

(Mt. 21:45-46; 22:15-22; Mr. 12:12-17)

<sup>19</sup> Bixhioz rniabee ree bixhioz con ree mextr rajc ley, hor guin gajc guyēn reeman niniaaz reeman Jesús guial gogbee reeman cuza'taman laa reeman, per bidxeb reeman bejn ree. <sup>20</sup> Abi' guxhaal reeman bën zigla'ch ree laaman din gūnzī reeman guial gulūū naj reeman benza'c, din yaguil reeman mod guinee Jesús diidx ni gudxiib reeman guijc, din chile' yayū reeman laaman loj gobernador Rom. <sup>21</sup> Dxel gunabdiidx reeman lojman, rëb reeman:

—Mextr, dunujn rayagbee guial rnieel rulūū tēel zi'c rayal, din par lūj tiblojzi naj bejn, abi' walil rulūū guial xhienaag rēn Dios guiban bejn. <sup>22</sup> ¿Zagdxen ya radijxan impuest loj rey César, o ad zagdjetan?

<sup>23</sup> Per gogbee gajc Jesús xgab mal ni cayūjn reeman abi' rëbaman loj reeman:

<sup>24</sup> —Gol balūū tijb cintabl lon. ¿Chu loj ca lojn chu tēē laj ca lojn?

Badxi' reeman laan, rëb reeman:

—Loj rey César ca lojn nē lajman.

<sup>25</sup> Dxel rëbaman loj reeman:

—Gol badēēcliza loj rey César ni naj xieen César, guiáad loj Dios gol badēē ni naj xieen Dios.

<sup>26</sup> Abi' gra ni guneeman niz loj ree bejn, achetri badxejl nudxiib reeman guijc din niniaaz reeman laaman. Badxali loj reeman ni guneeman abi' achetri rëb reeman.

### *Xcwent guial yaban ree bengüt*

(Mt. 22:23-33; Mr. 12:18-27)

<sup>27</sup> Tio'p choon ree bénsaducew bignaj Jesús, bénsaducew guin ree ad rliladxt reeman guial yaban ree bengüt, zeel rëb reeman loj Jesús:

<sup>28</sup> —Mextr, loj xley Moisejs rëb guial bal guiēt tijb xinguaaw abi' achut xi'n x guyu con lacheelix, bijch xingüt guin guxhlianē béngunaa bizējb guin din chu' xi'n reex zi'c gulūū xi'n xin güt guinan. <sup>29</sup> Guyu tijb famil lod goc reex gajdx bijch. Baxhliaa xin yaloj guin, per gūjtix abi' ad guyut xi'n reex con lacheelix. <sup>30</sup> Dxel bijch barojpix baxhlianē béngunaa guin, per gūjtgajquix ad guyu gajct xi'n reex. <sup>31</sup> Zianz baxhlianē xin bayon guin béngunaa bizējb guin, zianz baxhlianēman guigajdx reex abi' gra reex gūjt achut xi'n reex guyu con laaman. <sup>32</sup> Ni bigratē nē béngunaa guin gūjt. <sup>33</sup> Yan, chi yaban ree bengüt, ¿chu loj guigajdx reex gac xbéngunaa laaman guial gra reex baxhlianē laaman?

<sup>34</sup> Dxel rëb Jesús loj reeman:

—Loj guidxliuj guie ruxhliaa ree bejn abi' rudëed xi'n reeman ruxhliaa. <sup>35</sup> Per ree bén yaban zatijb, bén rayal ree gap guialnaban tiblayaa con Dios, ad zuxhliaatri reeman ad zudëe tēetri xi'n reeman guxhliaa, <sup>36</sup> din ad zējtttri reeman, gac reeman zi'c ree xianjl Dios. Gac tēe reeman xi'n Dios guial ma baban reeman. <sup>37</sup> Abi' xcwent ni yaban ree bengüt, xt Moisejs rēb zian tiblajt loj xtiidx Dios lod rēbaman guial baguiaaman yag ni caye'c. Yagaj rēb Dios lojman guial Dios naj xDios Abraham, xDios Isaac, nē xDios Jacob. <sup>38</sup> Din Dios ad najtaman xDios ree bengüt, najman xDios ree bén naban, din par laaman gra ree bejn naban.

<sup>39</sup> Dxel yu' ree mextr rajc ley, rēb lojman:

—Mextr, zagdxequi guneel.

<sup>40</sup> Abi' achetri bayax reeman niniabdiidx reeman lojman.

*Chu loj xdiaa zēed Cristo*

*(Mt. 22:41-46; Mr. 12:35-37)*

<sup>41</sup> Rēb Jesús loj ree bejn:

—¿Chexc zeel rēb ree bejn guial zēed Cristo loj xdiaa rey Davi? <sup>42</sup> Awa Davi guin gajc gunee loj libr Salmos, rēbaman:

Dios rēb loj dux Dad ree:

“Gurej da ladbeen,

<sup>43</sup> xt gabecan xin rdxe'ch ree lūj guia'l.”

<sup>44</sup> Yan, bal xi'n Davi naj Cristo. ¿Chexquiza zeel rēb Davi guin lojman Dad?

*Ni rüjn ree mextr rajc ley*

*(Mt. 23:1-36; Mr. 12:38-40; Lc. 11:37-54)*

<sup>45</sup> La'tgaj cucaagdiajg gra ree bejn ni rēb Jesús, rēb loj ree xbejnman:

<sup>46</sup> —Gol gojp cudad con ree mextr rajc ley. Din ruladx reeman sa reeman gacw reeman lajd zagdxeruladx tēe reeman gugajpdioz ree bejn laa reeman con respejt niz lunejz, abi' lēn ree yadoo ruladx reeman cwe reeman lod rbej ree bén zojbloj, ziangajc rüjn reeman lod ritaw reeman. <sup>47</sup> Raca' tēe reeman lidx ree béngunaa bizējb, abi' din guiēb ree bejn guial benza'c naj reeman, dád xchej rbejdx rniab reeman Dios. Per laa reeman mazri casti narooob yayal reeman.

## 21

*Gon badëed tijb béngunaa bizējb*

*(Mr. 12:41-44)*

<sup>1</sup> Chi culüü Jesús bejn ree lēn yadooro' Jerusalén, dxel gules lojman baguiaaman cagu' ree benrijcw gon lēn alcancia. <sup>2</sup> Baguiaa tēeman tijb béngunaa bizējb prob, cagu'man tio'p cintabldoo lēn alcancia guin. <sup>3</sup> Dxel rēb Jesús loj ree xbejnman:

—Diidxli rnin lojdi guial bén bizējb prob guin mazri lasajc gon badxe'man guial loj gon badxe' gra ree bén guin. <sup>4</sup> Din graczi reeman rudxe' ni rüjn laa reeman sobr, per laaman majsi najman bénprob, badxe'man graczi ni rajpaman par guibannēman.

*Rēb Jesús guial yaze'n yadooro' Jerusalén*

*(Mt. 24:1-2; Mr. 13:1-2)*

<sup>5</sup> Tio'p choon ree xbejn Jesús cayü reeman diidx xcwent ree guiaj zagdxer najcchaawnē yadooro' Jerusalén, nē ree ni lasajc ni rudëed ree bejn par suchaaw yadoo guin. Dxel rēb Jesús loj reeman:

<sup>6</sup> —Gra ni cuguaadi yan, zadxin dxej ni'qui tijb guiaj ad zaya'nt guijc stijban, gran yaze'n.

*Ni gac chi gad guidxliuj nit*

*(Mt. 24:3-28; Mr. 13:3-23)*

<sup>7</sup> Dxel gunabdiidx reeman lojman rēb reeman:

—Mextr, ¿goc gac zian? ¿Xhie ree sen gac chi ma zidyob gac zian?

<sup>8</sup> Zianz rëb Jesús loj reeman:

—Gol gojp cudad achu gusquiee lëjt. Din zien ree bén gui't guiëb reeman guial por naj zëed reeman guiëb tëe reeman: “Naj naj Cristo”; o “Ma zidyob dxej gui'taman.” Per ad chililadxidi laa reeman. <sup>9</sup> Abi' chi guiguiejndi cayajc wadijl o chas ree bejn contr xguxtis reeman, ad guidxebidi din yaløj gac zian. Per ad por laatan ma bidxin dxej nit guidxliuj.

<sup>10</sup> Rëb tëe Jesús loj reeman:

—Til nacion con stijb nacion, til tëe bén rajp guialrniabee con stijb bén rajp guialrniabee, <sup>11</sup> gui't tëe xudoxh, në gubijn, në guialguijdxdoxh niz ni niz guie abi' xanyabaa guiguuien ree ni nadxeb.

<sup>12</sup> Per chi gad gra ree ni guin gac, guiniaaz ree bejn lëjt din gusagzi reeman lëjt, chinë reeman lëjt lën ree yadoo din gudëed reeman lëjt casti, cu' reeman lëjt ladxguiib chinë tëe reeman lëjt loj ree rey në loj ree gobernador guial najdi da bejnan. <sup>13</sup> Zian gac din chile' güdi da diidxan loj reeman. <sup>14</sup> Ad aal chu'di xgab xhie guiëbidi loj reeman. <sup>15</sup> Din naj gune diidx ni guinieedi gune tëen quiargueijn. Abi' ni'qui tijb bén rdxe'ch lëjt ad züjnt gan loj xtiidxidi ad zanee tëet reeman contr lëjt. <sup>16</sup> Per lëjt xt xdadidi o xniaadi, o bijchidi o xfamilidi o xmiwidi yayü reeman lëjt, abi' yu'di gugüjt reeman. <sup>17</sup> Gra bénguidxliuj guidxe'ch lëjt guial najdi da bejnan. <sup>18</sup> Per ni'qui tijb guidxguijquidi ad zanijt por zian. <sup>19</sup> Abi' bal sudxi'chidi loj xnejz Dios, zajpidi guialnaban tiblayaa con Dios.

<sup>20</sup> Chi guguaadi nayaw ree suldad Jerusalén, ma qui nit guiedx guin. <sup>21</sup> Dxejzii ree, bén za' ree niz Judea, gol bigxüün niz dajn ree, abi' ree bén za' guiedx Jerusalén gol brii luguiedx guin, guiáad ree bén za' dajn ad bal yayudi luguiedx guin. <sup>22</sup> Din dxej guin ree gudëed Dios bejn ree casti din gac cumplid zi'c ca loj xtiidxaman. <sup>23</sup> ¡Probza ree béngunaa nüü xi'n o béngunaa ca' ree xindobëz lën ree dxejzii! Din dád sagdiaj ree bejn abi' dád casti narooob yayal ree bénluguiedx guin. <sup>24</sup> Yu' ree bén guiët loj wadijl yu' tëe reeman guiniaaz reeman chinë naguiejn reeman laa reeman nacion rent nacion ren ree. Abi' ree benzit zanabee reeman Jerusalén xt yayaaløj dxej ni tiëb Dios nabee reeman yagaj.

### *Gui't Bén guxhaal Dios zatijb*

*(Mt. 24:29-35, 42-44; Mr. 13:24-37)*

<sup>25</sup> Dxel gac sen loj gubijdx, con loj bëew, con loj ree bajl xanyabaa. Abi' loj guidxliuj gagdxa ree bejn guidxeb tëe reeman guial gac naquie' loj nijsdoo gac tëe naquie' por xtüjp nijs. <sup>26</sup> Abi' ree bejn xt yadaj reeman guial guidxeb reeman chi güün reeman xgab ni gac loj guidxliuj, guiáad ree ni rguien xanyabaa guiniib reen. <sup>27</sup> Abi' guguaaa reeman Bén guxhaal Dios, rdinman bacha' zëedaman loj zaj con xguialrniabeeman. <sup>28</sup> Chi suløj gac ree ni guin, gol bagu' luxdoodi zagdxe gol gules tëe lojdi din ma zidyob dxej ni laadi loj casti.

<sup>29</sup> Rëb tëe Jesús loj reeman:

—Gol baguaaa yag higo o xhietëez zatijb yagan. <sup>30</sup> Chi ma caydxib ree xbalagan, lëjt ragbee guial ma zëed tiamp nalaa. <sup>31</sup> Ziangajc chi guguaadi ma cayajc ree ni guin, zagbeedi guial ma zëed xguialrniabee Dios gajxh.

<sup>32</sup> Diidxli rnin lojdi guial gra ree ni guin gac chi gad gra ree bén naban yan guiët. <sup>33</sup> Guidxliuj në xanyabaa zanijt reen, per da diidxan ad zadëdt gacan cumplid.

<sup>34</sup> Gol gojp cudad ad güün graløj ni riga' loj guidxliuj guie lëjt gan, zi'c guial rzüdx, në guial ru xgab por ni ryaadxidi par guibandi din chi guialan zatijb, ad gac dxej guin par lëjt <sup>35</sup> zi'c tijb tramp. Din zian gac dxej guin par gra ree bénguidxliuj. <sup>36</sup> Gol guzujsin, guixie guixie gol gurejdx gunab Dios din gac laadi loj gra ree ni gac loj guidxliuj din chile' tëe sudi loj Bén guxhaal Dios.

<sup>37</sup> Radxe rulüü Jesús bejn ree lën yadooro' Jerusalén guiáad guxhin raya'nman ruguia' la Olivos. <sup>38</sup> Abi' rsildoo rej gra ree bejn lën yadoo guin ricaagdiajg reeman ni rnieeman.

## 22

*Baya'n reeman diidx xhienaag guiniaaz reeman Jesús*  
(Mt. 26:1-5, 14-16; Mr. 14:1-2, 10-11; Jn.11 :45-53)

<sup>1</sup> Chi ma zidyob lanij pascw, chi raw reeman guiadxtil ni ad yu't levadur. <sup>2</sup> Bixhioz rniabee ree bixhioz con ree mextr rajc ley, raguuil reeman mod xhienaag gugüjt reeman Jesús guial rdxeb reeman bejn ree.

<sup>3</sup> Dxel guyu xindxab luxdoo tijb ree xi apóstoles Jesús, bën la Judas Iscariote. <sup>4</sup> Judas guin bigneenë bixhioz rniabee ree bixhioz con ree bën rniabee bën rajp ree yadooro' Jerusalén, abi' benëman laa reeman diidx xhienaag yayüman Jesús loj reeman. <sup>5</sup> Dád babaa reeman abi' rëb reeman guial gudëed reeman milia lojman. <sup>6</sup> Zianz cwëjbaman, dxel guzuloj raguuilaman mod xhienaag yayüman Jesús, guial ad zagbeet ree bejn.

*Gudawnë ree xbejn Jesús xche*  
(Mt. 26:17-29; Mr. 14:12-25; Jn.13 :21-30; 1Co.11 :23-26)

<sup>7</sup> Chi bidxin lanij pascw, tijbgaj yu raw ree bejn guiadxtil ni ad yu't levadur rugüjt tée reeman tijb xiil, <sup>8</sup> dxel guxhaal Jesús Bëd con Waj, rëbaman loj reeman:

—Gol biguieen ni yadaaw ree guxhin pascw.

<sup>9</sup> Abi' gunabdiidx reeman lojman rëb reeman:

—¿Ban guin rënl yuguieenan laan?

<sup>10</sup> Zianz rëb Jesús loj reeman:

—Chi chu'di luguiedx guin, guguaadi tijb xinguaaw ca'x tijb re yu' nijs. Gol chinalix xt lod yayux, <sup>11</sup> gol güjdx loj bën naj lidxan: “Na mextr: ¿Con lënü gawnë ree xbejnman guxhin pascw?” <sup>12</sup> Dxel gulüüman lëjt tijb lënü ni rarojp pijs, ma najcchaaw lënü guin. Yagaj gol been ni yadaaw ree xche.

<sup>13</sup> Zianz wej reeman abi' bidxaagloj reeman gra zi'cgajczi rëb Jesús loj reeman. Dxel been reeman guialraw guin ni gaw reeman guxhin pascw.

<sup>14</sup> Chi bidxin hor, Jesús con ree bën naj apóstoles gurej reeman xan mex. <sup>15</sup> Dxel rëbaman loj reeman:

—¡Diizd gocli rënan gawnë'n lëjt pascw guie, chi gad dxej guidxin gazaagdiajn abi' guiëtan! <sup>16</sup> Din naj rni lëjt guial ad yu'tri dxej gawnë'n lëjt, xt chi ma canabee Dios guidiblagaa.

<sup>17</sup> Dxel cwa'man tijb cojp yu' vin, chi gulox badëëman quixtëe loj Dios, rëbaman loj reeman:

—Gol cwa' vin guie, gol gudi'san loj gradi. <sup>18</sup> Din diidxli rnin lëjt, ad yu'tri dxej guië'n vin xt chi ma canabee Dios guidiblagaa.

<sup>19</sup> Dxel cwa'man guiadxtil badëëman quixtëe loj Dios, zianz gula'man laan, gudi'saman laan loj reeman, rëbgajman:

—Guiadxtil guie naj da cuerpan ni ma bayün din guiëtan por lëjt. Chi güündi zian, gol been zian guial rusaaladxidi naj.

<sup>20</sup> Abi' ziangajc beenman con cojp ni yu' vin guin, chi gulox gudawaman xche, rëbaman:

—Vin guie naj da rejnan ni gaxhie'n chi guiëtan din guixal tijb nejz cüb xhienaag gap ree bejn perdon loj Dios.

<sup>21</sup> Per yan bën yayü naj, laa yaaman xoob loj mex lod xoob gajc yan. <sup>22</sup> Per Bën guxhaal Dios, naj sagdiajman abi' guiëtan. Per ¡probza bën yayü laaman!

<sup>23</sup> Dxel guzuloj rniabdiidx loj lasa' reeman chu reeman yayü laaman.

*Chu mazri zojbloj*

<sup>24</sup> Dxel guzuloj reeman cadildiidx reeman chu loj gra reeman naj mazri bèn zojbloj.  
<sup>25</sup> Per rëb Jesús loj reeman:

—Bèn naj ree rey loj guidxliuj guie rniabee reeman bèn ladx reeman zi'ctzi rën reeman, abi' ree bèn rniabee, rëb reeman guial rüjn reeman ni zagdxe. <sup>26</sup> Per lëjt ad rayalt güündi zian, bèn mazri zojbloj lojdi rayal güün laagajcaman zi'c tijb bèn ad zojblojt. Guiáad bèn rniabee lojdi rayal güün laagajcaman zi'c tijb mojs. <sup>27</sup> ¿Chu naj mazri bèn zojbloj loj guidxliuj guie? ¿Bèn rbej xan mex par gaw ya o bèn rbe'c guialraw? ¿Nid bèn rbej xan mex guin naj mazri bèn zojbloj ya? Guiáad naj za'n lojdi zi'c tijb bèn rbe'c guialraw.

<sup>28</sup> 'Lëjtcci za'në naj loj ree dxej cazaagdiajn. <sup>29</sup> Zeel gunen guialrniabee lojdi zi'c banee da Dadanan lon, <sup>30</sup> abi' gawidi loj da mexan lod ganabeen cwe tēedi loj ree yagxhil lod güündi guialguxtis loj gra ree bèn za loj guidxiptio'p xdiaa Israel.

*Rëb Jesús guial guiëb Bëd ad nünbeetaman laaman*  
 (Mt. 26:31-35; Mr. 14:27-31; Jn. 13 :36-38)

<sup>31</sup> Rëb tēë Jesús:

—Simón, Simón, ma gunab xindxab lëjt din güünx lëjt prueb zi'c rbijb bejn trigo.  
<sup>32</sup> Per naj ma guredx gunaaban Dios por lüj chitëë cwëz chililadxil naj. Guiáad lüj chi yazudxi'chil loj ni rliiladxil naj zatijb, gognë ree lasa'l din sudxi'ch reeman loj ni rliiladx reeman naj. <sup>33</sup> Dxel rëb Bëd lojman:

—Dad, ad zaro'nladxtan lüj majsi gayu'në'n lüj ladxguiib o xt guiëtnë'n lüj.

<sup>34</sup> Abi' rëb Jesús:

—Naj rni lüj Bëd, yan guxhin gajc chi gad guid cwidxa', choon volt mal rëbil ad nünbeetil naj.

*Zidyob dxej sagdiaj Jesús*

<sup>35</sup> Dxel gunabdiidx Jesús loj ree xbejnman rëbaman:

—Chi guxhalan lëjt sin bols, sin milia, në sin gurëch, ¿yu' ni biaadxidi ya?

Badxi' reeman laan rëb reeman:

—Achet.

<sup>36</sup> Dxel rëbaman loj reeman:

—Sa'n yan bèn rajp milia në bols, gol cwa'n. Guiáad bèn ad rajpt espad, gol bato' xabidi din siidi tijban. <sup>37</sup> Din naj rni guial rüjn naguiejn gac zi'c rëb loj xtiidx Dios por naj, lod rëb: “Abi' nayabaman loj ree benmal.” Gra ni ca loj xtiidx Dios por naj, naj gacan cumplid.

<sup>38</sup> Dxel rëb reeman lojman:

—Dad, guie naca'n tio'p espad.

Badxi'man laan rëbaman:

—Zajquican.

*Rbejdx rniab Jesús Dios lod la Getsemaní*  
 (Mt. 26:36-46; Mr. 14:32-42)

<sup>39</sup> Dxel brier Jesús zi'c naj xcostumbraman zëman ruguia' Olivos, abi' binal ree xbejnman laaman. <sup>40</sup> Chi bidxin reeman yagaj, rëbaman loj reeman:

—Gol gurejdx gunab Dios, chitëë güün xindxab lëjt gan.

<sup>41</sup> Abi' wejman zijt zi'ct lod rucaa bejn tijb guiaj, zianz bazuxibaman gurejdx gunabaman Dios, <sup>42</sup> rëbaman:

—Dad, bal tiëbil, babëë naj loj ni gazaagdiajn per ad gac zi'c rënan, rayal gac zi'c rënl.

<sup>43</sup> Dxel balüüloj tijb anjl guza xanyabaa lojman persi badëëman laaman gojl. <sup>44</sup> Abi' chi cazagdiaj da'taman, mazri con gan cabejdx canabaman Dios ryajb tēë ree xnijs ragneeyaman luyuj zi'c rejn.

<sup>45</sup> Chi bisuman lod cabejdx canabaman Dios, bignaj ree xbejnman abi' chi badxinman cwè' reeman laa reeman naga'yèjs, guial yu'naya reeman. <sup>46</sup> Zianz rëbaman loj reeman:  
—¿Chexc zeel naga'yèjsidi? Gol bixche, gol gurejdx gunab Dios chitëë güün xindxab lëjt gan.

*Gunaaz reeman Jesús*

*(Mt. 26:47-56; Mr. 14:43-50; Jn.18 :2-11)*

<sup>47</sup> Sta caneenë Jesús bën naj ree xbejnman chi bidxin ree benzien. Në bën brii laj Judas, bën goc tijb ree xbejn Jesús, nedaman loj ree bën guin abi' bibigaman loj Jesús gudawaman laaman xid. <sup>48</sup> Dxel rëb Jesús lojman:

—Judas, ¿wen con tijb xid rayül Bén guxhaal Dios ya?

<sup>49</sup> Chi baguiaa ree bën za'në Jesús ni cayajc, rëb reeman lojman:

—Dad, ¿zalëë dux espadan ya?

<sup>50</sup> Abi' tijb xbejnman gudiilguijdxaman xmojs bixhioz rniabee gra ree bixhioz, gutü'man guidiajg ladbeeman. <sup>51</sup> Per rëb Jesús loj reeman:

—Guzujr ree bënan. Ma gojczy.

Dxel baqui' Jesús guidiajg mojs guin abi' bayüjnman laan. <sup>52</sup> Zianz rëb Jesús loj ree bixhioz rniabee ree bixhioz, con ree bën rniabee ree bën rajp yadooro' Jerusalén con guxtis ree bën Israel, bën bidxin ree par chinë laaman:

—¿Chexc zeel zëedidi con espad con yag din chinëdi naj zi'c tijb xingubaan? <sup>53</sup> Guixie guixie guzunë'n lëjt lën yadooro' Jerusalén abi' ad gunaaztidi naj. Per yan ma bidxin xihoridi, hor ni nabee xindxab.

*Rëb Bëd ad nünbeetaman Jesús*

*(Mt. 26:57-58, 69-75; Mr. 14:53-54, 66-72; Jn.18 :12-18, 25-27)*

<sup>54</sup> Dxel gunaaz reeman Jesús zinë reeman laaman lidx bixhioz rniabee gra ree bixhioz, binal Bëd laaman zijt zijt. <sup>55</sup> Yagaj gule'c ree bën guin guij galay lule', abi' gurej reeman rudëj guin. Në Bëd gurejnë laa reeman. <sup>56</sup> Per tijb bëngunaa rüjn dxiin yagaj, chi baguiaaman Bëd zobjaman rudëj guin, baguiaaman lojman, abi' rëbaman:

—Në bën guin za'në Jesús.

<sup>57</sup> Per gurexuu Bëd, abi' rëbaman loj bën guin:

—Ad nünbeetan laax.

<sup>58</sup> Ad gojct xchej chi baguiaa zatijb bejn laaman, rëbaman lojman:

—Në lüj naj xbejn Jesús.

Badxi' Bëdan rëbaman:

—Yajqui dad, ad xbejntix naj.

<sup>59</sup> Gudëd cost tib hor, dxel rëb zatijb bejn:

—Nëczy bën guie za'në laaman din nëman naj bën Galilea.

<sup>60</sup> Zianz rëb Bëd:

—Ad ragbeetan xhienin rnieel.

Hor ni canee gajc Bëd zian guridxa' tijb gujđ. <sup>61</sup> Dxel badxi' loj Jesús baguiaaman loj Bëd, abi' basaaladx Bëd guial rëb Jesús lojman: “Yan guxhin gajc chi gad gujđ cwidxa', choon volt mal rëbil ad nünbeetil naj.” <sup>62</sup> Dxel barrii Bëd yagaj, abi' dád naya biinman.

*Baze' reeman Jesús gudijn tëë reeman laaman*

*(Mt. 26:67-68; Mr. 14:65)*

<sup>63</sup> Bén cayajp ree Jesús, baze' reeman laaman gudijn tëë reeman laaman. <sup>64</sup> Guxhii reeman lojman abi' gudijn reeman laaman, dxel rëb reeman lojman:

—¡Guneeya' chu gudin lüj!

<sup>65</sup> Abi' zien ree diidxguijdx rëb reeman lojman.

*Za' Jesús loj ree guxtis Israel*

*(Mt. 26:59-66; Mr. 14:55-64; Jn.18 :19-24)*

<sup>66</sup> Chi bareguiaal, badxajg lasa' ree guxtis Israel, në ree bixhioz rniabee ree bixhioz con ree mextr rajc ley, abi' binë reeman Jesús lod radxaag lasa' gra ree xguxtis reeman, dxel rëb reeman lojman:

<sup>67</sup> —Guna du lojn, ħlÿj naj Cristo ya?

Badxi'man laan rëbaman:

—Bal ganinan ad zaliladxtidi. <sup>68</sup> Abi' bal xhie ganabdiidxan lojdi, ad zadxi'tidan.

<sup>69</sup> Per diizd yan, Bén guxhaal Dios cweman xladbee Dios, bén ca' gra guialrniabee.

<sup>70</sup> Dxel rëb gra reeman lojman:

—ĤLÿjn naj Xi'n Dios ya?

Badxi'man laan, rëbaman:

—Waliquidi najcan.

<sup>71</sup> Zianz rëb reeman:

—ĤXhie mazri rÿjn naguiejn yadiil ree testiw? Dunuj gajc ree ma baguiejn ni nax con quijb xtiidix.

## 23

### *Binë reeman Jesús loj Pilato*

*(Mt. 27:1-2, 11-14; Mr. 15:1-5; Jn.18 :28-38)*

<sup>1</sup> Dxel wajs gra reeman binë reeman Jesús loj Pilato. <sup>2</sup> Yagaj guzuloj cutedia' reeman Jesús lojman, rëb reeman:

—Badxaaglojn xin guie cusquieex bén du ladx ree, rëbix guial ad rayalt yadijx ree impuest loj rey César, rëb tëëx guial laax naj Cristo, naj tëëx rey.

<sup>3</sup> Dxel gunabdiidx Pilato lojman rëbaman:

—ĤLÿjn naj xrey ree bén Israel ya?

Badxi' Jesús laan, rëbaman:

—Waliquil, najcan.

<sup>4</sup> Dxel rëb Pilato loj ree bixhioz rniabee ree bixhioz në loj gra ree bén riga' yagaj:

—Achet xfalt xin guie radxejlan.

<sup>5</sup> Per laa reeman naguiejnczi rÿjn reeman, rëb reeman:

—Cusquieex bejn ree guidib niz Judea con ree ni rulüüx laa reeman. Guzulojx niz Galilea abi' yan cayÿjnx zian niz guie.

### *Binë reeman Jesús loj Herodes*

<sup>6</sup> Chi biguiejn Pilato baza't reeman Galilea, gunabdiidxaman loj reeman bal niz Galilea naj ladx Jesús. <sup>7</sup> Abi' chi rëb reeman guial najman bén Galilea, guxhaalaman laaman loj Herodes bén rniabee Galilea, guial lën ree dxej guin në Herodes za' Jerusalén.

<sup>8</sup> Chi baguiaa Herodes Jesús dád babaaman guial diizd gocli rënman guguaaman laaman guial bacaagdiajgaman ruza't ree bejn laaman, abi' rbëzaman guguaaman güünman tijb milagr.

<sup>9</sup> Zien ree ni gunabdiidxaman lojman, per Jesús achetczi badxi'man. <sup>10</sup> Në ree bixhioz rniabee ree bixhioz za' yagaj con ree mextr rajc ley, ad rucwëëzt rutedia' reeman laaman.

<sup>11</sup> Dxel Herodes con ree xsuldadaman xhiernarajc beennë reeman laaman, baze' reeman laaman, bascajcw reeman laaman lajd zagdxe lasa' ni rajcw ree rey. Zianz baxhaal Herodes guin laaman loj Pilato zatijb. <sup>12</sup> Abi' dxejzii bazuloj baneenë Herodes Pilato zagdxe, din gocli rdxe'ch lasa' reeman.

### *Gunabee reeman guiët Jesús*

*(Mt. 27:15-26; Mr. 15:6-15; Jn.18 :39-19 :16)*

<sup>13</sup> Dxel bachajg Pilato lasa' ree bixhioz rniabee ree bixhioz con ree guxtis, con ree bén luguiedx guin, <sup>14</sup> abi' rëbaman loj reeman:

—Bidnëdi xin guie nadi cusquieex bejn ree. Per niz lojdi ma gunabdiidxan lojx abi' achet xfaltix radxejlan zi'c nadi. <sup>15</sup> Ni'qui Herodes ad badxejlt xfaltix, zeel baxhaalaman



laax lon zatijb. Ma baguiaalojdi achet ni mal beenx din guiëtix. <sup>16</sup> Yan, gudëdan laax casti dxel guslaan laax.

<sup>17</sup> Lën ree dxej lanij guin ruslaa Pilato tijb Bén yu' ladxguiib zi'c goc xcostumbr reeman. <sup>18</sup> Per graczi reeman guzuloj rbixdiaj, rëb reeman:

—¡Bagüjt xin guin! ¡Baslaa Barrabás!

<sup>19</sup> Badxe' reeman Barrabás guin ladxguiib guial beenman tijb wadijl Jerusalén, guial guzujman contr ree suldad rom, në guial bagüjtaman bejn. <sup>20</sup> Guneenë Pilato laa reeman zatijb guial guyënman nuslaaman Jesús, <sup>21</sup> per laa reeman gurixdiaj reeman mazri rejs, rëb reeman:

—¡Bacaax loj crüjz! ¡Bacaax loj crüjz!

<sup>22</sup> Ni bayon volt rëb Pilato loj reeman:

—¿Xhieza ni mal been xin guin? Achet xfaltix radxejlan din guiëtix. Gudëdan laax casti dxel guslaan laax.

<sup>23</sup> Per laa reeman mazri rbixdiaj reeman, rëb reeman loj Pilato din gucaaman laaman loj crüjz. Abi' guial tant rbixdiaj reeman con ree bixhioz rniabee ree bixhioz, been reeman gan gojc zi'c rën reeman. <sup>24</sup> Dxel cwëjb Pilato beenman zi'c rën reeman. <sup>25</sup> Abi' baslaaman Barrabás Bén guyu ladxguiib por wadijl në guial bagüjtaman bejn, guiáad Jesús bayüman laaman loj reeman persi beennë reeman laaman zi'ctzi rën reeman.

*Bacaa reeman Jesús loj crüjz*

*(Mt. 27:32-44; Mr. 15:21-32; Jn. 19:17-27)*

<sup>26</sup> Chi zinë reeman Jesús din gucaa reeman laaman loj crüjz, gunaaz reeman tijb Bén za Cirene laaman Simón. Ziaadaman bazaman dajn, gunabee reeman laaman güüman xcrüjz Jesús din chinalaman laaman.

<sup>27</sup> Zien da't bejn zinal laaman, abi' zien ree béngunaa roon rbixdiaj guial raya reeman laaman. <sup>28</sup> Per baguiaa Jesús loj reeman abi' rëbaman:

—Béngunaa Jerusalén ad roondi por naj, gol biin por lëjt gajc në por xi'ndi. <sup>29</sup> Din zadxin dxej guiëbidi: “Xiquilbaa ree béngunaa ad rajct ru xi'n, në ree béngunaa ad gojlt xi'n con ree béngunaa ad ca't bindobëz.” <sup>30</sup> Dxel suloj guiëb ree bejn loj ree guia': “Gol guxa't du guiican”, guiáad loj ree lom guiëb reeman: “Gol baquie'ch dunujn.” <sup>31</sup> Yan, nacli naj rüjnnë reeman zian, diidxgui lëjt, wed xhieczinin güünnë reeman lëjt.

<sup>32</sup> Abi' në tio'p ree xingubaa zinë reeman din tia reex loj crüjz con Jesús. <sup>33</sup> Chi bidxin reeman lod la Calaver, bacaa reeman Jesús loj crüjz, con grop ree xingubaa guin: tijbix cwa ladbee zatijbix cwa ladruvejs. <sup>34</sup> Abi' chi cucaa reeman Jesús loj crüjz, rëbaman:

—Dad, been reeman perdon, din ad ragbeet reeman xhienin rüjn reeman.

Dxel gudxijt ree suldad suert guiic xabaman din yala' reex laan. <sup>35</sup> Zien ree bejn riga' yagaj cuguaa reeman, abi' xt ree guxtis ruze' laaman, rëb reeman:

—Baslaax ben ren ree, yan guslaa laagajquix bal walix laax naj Cristo.

<sup>36</sup> Në ree xin suldad ruze' laaman, rbig reex rudëed reex vinagr guië'man, <sup>37</sup> rëb reex lojman:

—Bal lüj naj xrey ree Bén Israel, baslaa lüj gajc.

<sup>38</sup> Abi' guiic crüjz guin bacaa reex lëjtr con diidx grieg, diidx latin, në diidx hebreo, rëban: “Bén guie naj xrey ree Bén Israel.”

<sup>39</sup> Tijb xingubaa ni ca loj crüjz guin guneex diidxguijdx loj Jesús, rëbix:

—Bal lüj naj Cristo, baslaa lüj gajc, baslaa tëë dunujn.

<sup>40</sup> Per zatijbix gudilë xcompniarix, rëbix lojx:

—¿Staczi ad rdxeartil Dios ya majsi lasa'gajc casti guin cadëdil? <sup>41</sup> Dunuj rayalczi cayzaagdiaj din zian caydijx ni baguieen. Per Bén guie achetczi ni mal wayüjnman.

<sup>42</sup> Dxel rëbix loj Jesús:

—Basaaladx naj chi ma canabeel.

<sup>43</sup> Abi' rëb Jesús lojx:

—Diidxli rnin lojl guial yandxej gajc sunël naj lod naj nix, lod gan.

### *Güjt Jesús*

*(Mt. 27:45-56; Mr. 15:33-41; Jn.19 :28-30)*

<sup>44</sup> Chi gol garol dxej, bicajy guidibczi guidxliuj xt raca choon wadxe. <sup>45</sup> Bicajy logbijdx guiáad lajd nal lën yadooro' Jerusalén goxya'n, gojcan tio'p lala'. <sup>46</sup> Dxel gurixdiaj Jesús, rëbaman:

—Dad, lojl rusa'n da sprijtan.

Chi gulox guneman zian, dxel güjtaman.

<sup>47</sup> Chi baguiaa suldad rniabee ree suldad ni goc, baza'tix Dios zagdxe, rëbix:

—Walican achet xtol bën guin yu'.

<sup>48</sup> Chi baguiaa gra ree bën za' yagaj ni goc, dád guyunaya reeman zia reeman riga'pgaj luxdoo reeman. <sup>49</sup> Per gra ree bën nünbee Jesús, con ree béngunaa nal laaman diidz Galilea, zijt guzuj reeman baguiaa reeman gra ree ni goc.

### *Biguie'ch Jesús*

*(Mt. 27:57-61; Mr. 15:42-47; Jn.19 :38-42)*

<sup>50</sup> Guyu tijb bejn, brii lajman Xiëb, gojcaman benza'c, beenman zi'c rayal. Gojc ladxaman guiedx Arimatea tijb guiedx naaz Judea. Gojc tēeman tijb xguxtis ree bën Israel. <sup>51</sup> Nēman rbëz nabee Dios, abi' ad nētaman bachajg xixgab ree bën bagüjt Jesús. <sup>52</sup> Wejman loj Pilato bignabaman xcuerp Jesús. <sup>53</sup> Chi gulox baletaman xcuerp Jesús loj crüjz guin, cwa'man laaman batüübaman tijb lajd, dxel biquie'chaman laaman lën tijb baa ni bidēen lën guiaj lod achutczi waguie'ch. <sup>54</sup> Dxej guin rüjn reeman porvinid gra par dxej raziiladx ree bejn. Zamer suloj dxej guin chi biquie'ch reeman Jesús.

<sup>55</sup> Abi' ree béngunaa zidnē Jesús diidz Galilea, nē reeman binal abi' baguiaa reeman xbaa Jesús baguiaa tēē reeman xhienaag gudijxh reeman xcuerpaman. <sup>56</sup> Chi bayejc reeman, zianz beenchaaw reeman perfum nē zaj ni rliaa nejxh ni guidēebaman. Dxel baziiladx reeman dxej raziiladx ree bejn zi'c rniabee ley.

## 24

### *Raban Jesús*

*(Mt. 28:1-10; Mr. 16:1-8; Jn.20 :1-10)*

<sup>1</sup> Chi dumingw rsildoo, wej ree béngunaa guin ro' xbaa Jesús binē reeman perfum ni beenchaaw reeman. <sup>2</sup> Chi bidxin reeman yagaj, baguiaa reeman guiaj ni bida'cw ro' baa guin ad naga'tri xluaran. <sup>3</sup> Abi' guyu reeman, per ad bidxaaglojtri reeman xcuerp Dad Jesús. <sup>4</sup> La'tzi cadxeb reeman ni'quid radxejlt xhie güün reeman, dxejczu baguiaa reeman tio'p ree bejn za'li reeman gajxh lod za' reeman, najcw reeman lajd bacha'. <sup>5</sup> Abi' guial tant bidxeb reeman, basajb loj reeman xt luyuj, dxel rëb ree bën guin loj reeman;

—¿Chexc zeel raguiilidi tijb bën naban loj ree bengüt? <sup>6</sup> Achutri laaman guie din ma babanman. Gol basaaladx ni naman lojdi chi guzuman niz Galilea. <sup>7</sup> Naman lojdi guial yayü reeman Bën guxhaal Dios loj ree bëndol din gucaa reeman laaman loj crüjz, abi' ni yayon dxej yabanman.

<sup>8</sup> Dxel basaaladx reeman diidx ni rëb Jesús loj reeman, <sup>9</sup> abi' chi baza reeman ro' baa guin, bicojn reeman guidxiptib ree xi apóstoles Jesús nē los demazri ree xcompniar reeman gra ni baguiaa reeman. <sup>10</sup> María Magdalena, con Xuan, con Li xniaa Jacob con ree béngunaa ren, laa reeman bignē ruson guin loj ree xi apóstoles Jesús. <sup>11</sup> Per laa reeman ad bililadxt reeman ni rëb ree béngunaa guin, gunaladx reeman wed rëbzi reeman.

<sup>12</sup> Per Bëd baxüünman biquiaaman lën baa guin, abi' chi baguiaaman lën baa guin, lajd ni bidüübzi Jesús baguiaaman, zianz ziaman dád radxalojman por ni goc.

*Balüüloj Jesús loj tio'p ree xbejnman*  
(Mr. 16:12-13)

<sup>13</sup> Dxej guin gajc, tio'p ree xbejn Jesús zë tijb guiedx la Emaús, raya'nan zi'ct chiptib kilometro par Jerusalén. <sup>14</sup> Chi zë reeman lunejz cayü reeman diidx xcwent gra ree ni goc. <sup>15</sup> La'tgaj cayü reeman diidx, gubig Jesús cwë' reeman abi' guzuloj cazanëman laa reeman. <sup>16</sup> Per majsi cuguaa reeman laaman, yu' ni badxoon nayünbee reeman laaman.

<sup>17</sup> Dxel gunabdiidx Jesús loj reeman, rëbaman:

—¿Xhie diidxan rüdi la'tgaj cazadi? ¿Chexc zeel yu'nayadi?

<sup>18</sup> Badxi' tijb bën la Cleofas laan, rëbaman:

—Gra ree bejn ragbee ni goc Jerusalén lën ree dxej guie. ¿Wen tijbzi lüj naj bën guzu Jerusalén ad gogbeetil ni goc ya?

<sup>19</sup> Dxel rëbaman loj reeman:

—¿Xhie goc?

Abi' rëb reeman:

—Ni beennë reeman Jesús bën Nazaret, laaman goc tijb bën badëë xtiidx Dios loj ree bejn, bën gop guialrniabee zi'c ni beenman në ree diidx ni gunee man niz loj Dios në niz loj ree bejn. <sup>20</sup> Në guial bayü ree bixhioz rniabee ree bixhioz laaman në ree dux guxtis ree din guiëtaman, abi' bacaa reeman laaman loj crüjz. <sup>21</sup> Par dunujn laaman naj bën yabëë ree bën Israel loj ree bën rom, per yan gojc choon dxej ni goc ree ni guin. <sup>22</sup> Majsi tio'p choon ree béngunaa no'ch du lojn bachejb reeman dunujn, guial rsildoo wej reeman ro' baa guin, <sup>23</sup> abi' guial ad baguiaat reeman xcuerpaman, bayejc reeman rü reeman diidx guial balüüloj ree anjl loj reeman, rëb ree anjl guin loj reeman guial naban Jesús. <sup>24</sup> Laa biquiaa gajc ree tio'p choon ree dux compniaran ro' baa guin abi' baguiaa reeman zi'cgajczi rëb ree béngunaa guin, per ad baguiaat reeman Jesús.

<sup>25</sup> Dxel rëb Jesús loj reeman:

—¿Xi nawëëg naj chignia'di abi' xi raglaa par chililadxidi gra ni gunee ree bën badëë xtiidx Dios loj ree bejn! <sup>26</sup> ¿Wen id naj ya guial sagdiaj Cristo, dxelri yayë'paman xanyabaa?

<sup>27</sup> Dxel guzuloj cusignia'man laa reeman ni rën guiëb ni ca loj xtiidx Dios xcwentaman. Guzulojman con ree xlibr Moisejs abi' basnuuman con gra ree libr ni bacaa ree bën badëë xtiidx Dios loj ree bejn.

<sup>28</sup> Chi bidxin reeman guiedx lod zë reeman, been Jesús zi'c bën che mazri zijt. <sup>29</sup> Per laa reeman been reeman naguiejn din yaya'nnëman laa reeman, rëb reeman lojman:

—Baya'n con dunujn, din ma gudxe yan abi' ma cabej guiaal.

Dxel guyu Jesús persi baya'nnëman laa reeman. <sup>30</sup> Abi' chi zojbnëman laa reeman xan mex, cwa'man guiadxtil abi' chi gulox badëëman quixtëë loj Dios, gula'man laan persi badëëman laan loj reeman. <sup>31</sup> Hor guin gajc guzajc reeman zi'c bën baxal guiaaloj, abi' bayünbee reeman laaman. Per laa gunidloj gajcaman, <sup>32</sup> zianz rëb loj lasa' reeman:

—¿Ze'cliza dád nix yu' du luxdoo chi zudnë'man lunejz, chi cusignia'man dunuj ni rëb loj xtiidx Dios!

<sup>33</sup> Abi' ni'quid gulëjzt reeman, laa bayunejz gajc reeman zia reeman Jerusalén lod riga' guidxiptib ree xi apóstoles Jesús con ree xcompniar reeman. <sup>34</sup> Rëb reeman loj grop ree bën guin:

—Walican ma baban Dad Jesús, ma balüülojman loj Simón.

<sup>35</sup> Zianz be reeman diidx ni guzac reeman chi zë reeman lunejz xhie tëë naag bayünbee reeman Jesús chi gula'man guiadxtil.

*Balüüloj Jesús loj ree xbejnman*  
(Mt. 28:16-20; Mr. 16:14-18; Jn. 20:19-23)

<sup>36</sup> Sta cayü reeman diidx xcwent ree ni guin, chi balüüloj Jesús galay reeman, rëbaman:

—Yabe'cdxe Dios luxdoodi.

<sup>37</sup> Dád badxaloy reeman abi' bidxeb reeman guial gunaladx reeman anman cuguaa reeman. <sup>38</sup> Per rëb Jesús loj reeman:

—¿Chexc zeel rdxebidi? ¿Chexc zeel yu'nawëëg luxdoodi? <sup>39</sup> Gol baguaa yan në guia'n. Naj gajcan, gol baqui' naj gol baguaa tëë naj, din tijb anm ad yu'taman dxijt ad ca tëëtaman bëël zi'c ruguaadi naj.

<sup>40</sup> Chi rëbaman zian, balüü yaaman në guia'man. <sup>41</sup> Per laa reeman staczi ad rliladxt reeman guial tant rabaa reeman radxa tëë loj reeman, abi' rëbaman loj reeman:

—¿Rajpidi ta'n guialraw ya?

<sup>42</sup> Dxel badëë reeman tibia' bëjl biguie', <sup>43</sup> abi' cwa'man laab gudawaman niz loj reeman. <sup>44</sup> Zianz rëbaman loj reeman:

—Ni ma guza'can naj ni rnin lojdi chi sta za'n con lëjt: Guial naj gac gra ree ni ca loj xlibr Moisejs ni gaza'can, në xlibr ree bën badëë xtiidx Dios loj ree bejn, në loj librsalmos.

<sup>45</sup> Dxel guxhalaman xquiarguejn reeman persi bignia' reeman ni ca loj xtiidx Dios, <sup>46</sup> abi' rëbaman loj reeman:

—Loj xtiidx Dios rëb guial Cristo, naj guial guiëtaman, abi' ni yayon dxej yabanman.

<sup>47</sup> Abi' diizd Jerusalén suloj guire'ch xtiidxaman xt guidib loj guidxliuj guial yu' perdon par gra ree bën yayüjn xgab por xtol guililadx tëë reeman naj. <sup>48</sup> Lëjt naj testiw xcwent gra ree ni guin. <sup>49</sup> Naj gaxhal par lëjt ni ma na da Dadan. Per gol guzujsii luguiedx Jerusalén xt tia'di guialrniabee ni gui't diizd xanyabaa.

### *Bayë'p Jesús xanyabaa*

*(Mr. 16:19-20)*

<sup>50</sup> Dxel briinë Jesús laa reeman luguiedx Jerusalén binëman laa reeman gajxh Betania, zianz gules yaaman beenle'man laa reeman. <sup>51</sup> Abi' la'tgaj cayüjnle'man laa reeman, wajsaman ziaman xanyabaa. <sup>52</sup> Chi gulox bazuxib reeman badëë reeman quixtëë lojman, dxel zia reeman Jerusalén, dád rabaa reeman. <sup>53</sup> Abi' guixie guixie yu' reeman lën yadooro' Jerusalén ruza't reeman Dios zagdxe rudëëd tëë reeman quixtëë lojman.

## Xtiidxza'c Jesucrist ni bacaa San Juan

### *Bi't Xi'n Dios loj guidxliuj*

<sup>1</sup> Diizd guia'xchej chi gad guidxliuj gacchaaw, mal yu' b́en naj xtiidx Dios. Laaman za'ně Dios abi' laagajcaman naj Dios. <sup>2</sup> Laaman mal za'ně Dios diizd guia'xchej. <sup>3</sup> Laaman been graczi ni yu'. Achetczi ni yu' niajc bal id laaman. <sup>4</sup> Laaman rajp guialnaban, guiáad guialnaban guin naj bajl par gra bénguidxliuj. <sup>5</sup> Bajl guin rusni b́en nacay xquiarguejn, abi' ad rajct rutěe guialnacay guin loj bajl guin.

<sup>6</sup> Guyu tijb b́en brii laj Waj, Dios guxhaal laaman, <sup>7</sup> bidgaguieman diidx xcwent b́en naj xbajl Dios, din gac chililadx gra ree bejn laaman. <sup>8</sup> Per ad Wajt goc bajl guin, bi'tzaman bidgaguieman diidx xcwent bajl guin. <sup>9</sup> Din b́en naj quijb bajl guin, laaman rusni xquiarguejn gra bénguidxliuj, abi' ma bi'taman loj guidxliuj.

<sup>10</sup> Laaman guzu loj guidxliuj, abi' majsi laaman been guidxliuj, per ree bénguidxliuj ad bayagbeet reeman laaman. <sup>11</sup> Bi'taman loj ree b́en Israel, abi' majsi gojcaman b́en Israel, per ad bidxga't reeman laaman. <sup>12</sup> Per, gra ree b́en bidxga' laaman bililadx těe reeman laaman, beenman laa reeman xi'n Dios. <sup>13</sup> Abi' naj reeman xi'n Dios, ad zi'c rut xi'n bejn loj guidxliuj por xixgab bejn o guial rěn bejn chu' xi'nman, por guial rliladx reeman ma naj reeman xi'n Dios.

<sup>14</sup> Jesús, b́en naj xtiidx Dios, laaman goc bejn abi' gubajnman loj guidxliuj con dunuj ree, abi' dád guyěnman bejn ree gunee těeman ganax diidxli. Dunujn baguiaa xguialrniabeeman, guialrniabee ni ca'man guial tijbzi laaman naj Xi'n Dios. <sup>15</sup> Chi be Waj xtiidxaman loj ree bejn, gunee man rejs, rěbaman:

—Jesús guie naj b́en ruzatan, chi rnin guial b́en zěed xichan mazri lasajcaman guial lon, din diizd gocli mal yu'man guial lon.

<sup>16</sup> Dád rěnman dunuj ree, gra dxejczy raca' dugra ree xguialnaza'caman. <sup>17</sup> Por Moisejs banee Dios xleyaman duloj ree, per por Jesucrist bayagbee ree xhienaag rěn Dios dunuj ree xhie těe naag naj xtiidxliman. <sup>18</sup> Ad yu't dxej waguiaa bejn Dios. B́en naj tijbzi xi'nman. B́en nabanně laaman balüü duloj ree xhienaag naj Dios.

### *Waj b́en baroobnijs rěbaman chu naj Jesús (Mt. 3:11-12; Mr. 1:7-8; Lc. 3:15-17)*

<sup>19</sup> Diizd Jerusalén guxhaal ree xguxtis ree b́en Israel bixhioz ree con ree b́en naj ree levitas persi bignabdiidx reeman loj Waj chu najman.

<sup>20</sup> Dxel be Waj diidxli loj reeman, rěbaman:

—Ad najtan naj Cristo.

<sup>21</sup> Abi' gunabdiidx reeman lojman stijb rěb reeman:

—¿Chuza najl? ¿Lüjn naj Elías ya, b́en baděe xtiidx Dios loj ree bejn?

Badxi' Wajn rěbaman:

—Ad najtan.

Dxel gunabdiidx reeman stijb rěb reeman:

—O, ¿lüjn naj b́en naj diidx gui't ya, b́en guděe xtiidx Dios loj ree bejn?

Badxi'man laan rěbaman:

—Ad najtan.

<sup>22</sup> Abi' rěb reeman:

—¿Chuza najl? Din rayal yugně'n ruson loj ree b́en guxhaal dunujn. Guna chu najl.

<sup>23</sup> Dxel rěb Waj loj reeman:

—Naj naj tijb b́en rbidxa' loj yujbidx: “Gol guxhal tijb nejz nali par b́en ca' guialrniabee” —zi'c rěb Isaías b́en baděe xtiidx Dios loj ree bejn.

<sup>24</sup> Abi' ree b́en guxhaal ree b́enfarisew din guinieenë reeman Waj, <sup>25</sup> gunabdiidx reeman lojman, rëb reeman:

—Bal id lüjn naj Cristo, ni'qui Elías, ni'qui b́en naj diidx gui't, b́en gudëë xtiidx Dios loj ree bejn, ¿chexquiza zeel ruroobnijsil bejn?

<sup>26</sup> Badxi' Waj laan rëbaman:

—Naj rurobnijs con nijs, per lojdi no'ch tijb b́en ad wayünbeetidi. <sup>27</sup> Laaman naj b́en zëed xichan, ni'qui xgurëchaman ad rayalt gaxhiecan guial najman b́en mazri lasajc guial lon.

<sup>28</sup> Gra niguie gojc lod la Betábara, ni naj stiblad ro' guiiw Jordán, lod baroobnijs Waj bejn ree.

### *Jesús naj Xi'n Dios*

<sup>29</sup> Chi bareguiaal, baguiaa Waj zibig Jesús lod za'man, dxel rëbaman:

—Gol baguiaa, b́en guin naj b́en bacaabee Dios din guiëtaman zi'c xiildoo por xtol ree bénguidxliuj. <sup>30</sup> Laaman bazatan lojdi chi rnin: “Xichan zidnal b́en mazri lasajc guial lon, din laaman mal yu' diizd gocli guial lon.” <sup>31</sup> Ni'qui naj ad gogbeetan guial laaman naj b́en gui't, per naj zialan din gurobnijsan bejn ree con nijs din chile' güünbee ree b́en Israel laaman.

<sup>32</sup> Rëb tëë Waj loj reeman:

—Naj baguia biguiajt xSprijt Dios diizd xanyabaa zi'c tijb palom xt guijcaman. <sup>33</sup> Majsi ad nünbeetan laaman, per b́en guxhaal naj barobnijsan con nijs, laaman na lon: “Chi guguiaal guiat xSprijt Dios xt guijc tijb bejn, laaman naj b́en runee xSprijt Dios.” <sup>34</sup> Naj ma baguia laaman, abi' ragbeechaawan guial laaman naj Xi'n Dios.

### *B́en binal ree Jesús yaløj*

<sup>35</sup> Chi bareguiaal, za' Waj yagaj stijb, za'në tio'p ree xbejnman. <sup>36</sup> Abi' chi baguiaaman cadëd Jesús, dxel rëbaman loj reeman:

—Gol baguiaa, b́en guinan naj zi'c xi xiildoo Dios din guiëtaman por xtol bénguidxliuj.

<sup>37</sup> Chi biguiejn reeman rëb Waj zian, dxel binal reeman Jesús. <sup>38</sup> Chi badxi' lojman, baguiaaman zinal reeman laaman, abi' rëbaman loj reeman:

—¿Xhie rguiilidi?

Badxi' reeman laan rëb reeman:

—Mextr, ¿ban zojbil?

<sup>39</sup> Dxel rëb Jesús loj reeman:

—Gol guda din guguaadi.

Dxel wej reeman biquiaa reeman lod zojbaman, abi' baya'nnë reeman laaman dxej guin, guial ma gojl cost raca tajp wadxë.

<sup>40</sup> Tijb ree xbejn Waj b́en binal Jesús, b́en bacaagdiajg ni rëb Waj, laaman brii laj Andrejs, bijch Simón Bëd. <sup>41</sup> Andrejs guin, yaløjxgaj bijchaman Simón bigdiilaman, abi' rëbaman lojman:

—Ma badxaaglojn b́en naj Mesías —rën guiëban Cristo.

<sup>42</sup> Dxel binë Andrejs Simón lod za' Jesús, chi baguiaa Jesús laaman, rëbaman:

—Lüj naj Simón, xi'n Jonás, per yan grii lajl Cefas —rën guiëban Bëd.

### *Gurejdx Jesús Felip në Natanael*

<sup>43</sup> Chi bareguiaal been Jesús xgab cheman niz Galilea, abi' badxaagaman Felip, zianz rëbaman:

—Tanal naj.

<sup>44</sup> Ladx Felip guin naj guiedx Betsaida, ni gajc naj ladx Andrejs con Bëd. <sup>45</sup> Dxel bigdiil Felip Natanael, abi' rëbaman lojman:

—Ma badxaaglojn b́en ruza't Moisejs loj xlibr xleyaman, b́en ruza't ree b́en badëë xtiidx Dios loj ree bejn loj ni bacaa reeman. Laaman naj Jesús, xi'n Xiëb, b́en Nazaret.

<sup>46</sup> Dxel rëb Natanael lojman:

—¿Wen yu' benza'c Nazaret ya?

Badxi' Felipan rëbaman:

—Yo' din guguiaal.

<sup>47</sup> Chi baguiaa Jesús zëed Natanael, rëbaman:

—Guie zëed tijb bén naj quijb bén Israel, abi' ad rusquieetaman.

<sup>48</sup> Dxel gunabdiidx Natanael lojman, rëbaman:

—¿Xoza nünbeel naj?

Badxi' Jesúsán rëbaman:

—Chi gad Felip cwedx lüj, chi za'l xan yag higo, dxel baguian lüj.

<sup>49</sup> Zianz rëb Natanael lojman:

—Mextr, lüj naj Xi'n Dios, lüj naj rey Israel.

<sup>50</sup> Badxi' Jesús laan rëbaman:

—¿Rliladxil naj ya guialzi rnin baguian lüj xan yag higo? Per mazri naj ree ni guguiaal guial loj ni ma baguiaal.

<sup>51</sup> Rëb tëëman:

—Naj ragbeechaaw, zuguaadi zojbyal xanyabaa, abi' zuguaadi xianjl ree Dios yayë'p reeman xanyabaa yaguiajt tëë reeman xt guijc Bén guxhaal Dios loj guidxliuj.

## 2

### *Wej Jesús loj tijb guialruxhliaa*

<sup>1</sup> Ni goc choon dxex guyu tijb guialruxhliaa luguiedx Caná, ni riga' niz Galilea. Dxel në xniaa Jesús za' yagaj, <sup>2</sup> abi' në Jesús con ree xbejnman gunee reeman persi wej reeman loj lanij guin. <sup>3</sup> Chi babidx vin, dxel rëb xniaa Jesús lojman:

—Achetri vin rajp reeman.

<sup>4</sup> Badxi' Jesúsán rëbaman:

—Na, ¿chexquiza zeel nal lon zian? Ad wadxint da horan günan ni rayal günan.

<sup>5</sup> Per xniaaman rëb gajcaman loj ree bén cayüjn mandad yagaj:

—Gol been gra ni naman.

<sup>6</sup> Yagaj za' xho'p ree guiajs guiaj, ni ru nijs ni rüjnnë ree bén Israel dxiin chi rusia laa reeman zi'c naj xcostumbr reeman. Abi' lën tijbgaj reen ru cost tibgayuu lijtr. <sup>7</sup> Abi' rëb Jesús loj ree bén rüjn mandad guin:

—Gol bacha ree guiajs guie nijs.

Dxel bachadi reeman laa reen, <sup>8</sup> abi' rëbaman loj reeman:

—Yan gol gulëë ta'nán, gol bigdëen loj bén canabee loj lanij guie.

Dxel bigdëe reeman laan lojman, <sup>9</sup> abi' bén canabee loj lanij guin beenman prueb nijs bayajc vin guin, sin guial niagbeeman ban guzan, bén cayüjnz ree mandad guin ragbee, din laa reeman bica' nijs guin. Dxel gurejdxaman xin cuxhliaa guin, <sup>10</sup> rëbaman lojx:

—Graczi bejn rgui's yaloj vin zagdxe, abi' chi ma gu' reeman zilan, dxel rgui'saman vin corrient. Per lüj badxe'chaawil vin zagdxe guin persi cagui'silan yan.

<sup>11</sup> Ni guin naj milagr yaloj been Jesús, beenman milagr guin Caná, guiedx riga' niz Galilea. Zian balüü guialrniabee ni rajpaman abi' bililadx ree xbejnman laaman.

<sup>12</sup> Chi gulox gojc zian dxel zë reeman guiedx Capernaum, con xniaaman, con ree bijchaman con në ree xbejnman. Ni guzu reeman tio'p choon dxex.

### *Babëë Jesús bén ruto' ree ro' yadooro'*

*(Mt. 21:12-13; Mr. 11:15-18; Lc. 19:45-46)*

<sup>13</sup> Chi ma zidyob pascw xlanij ree bén Israel, wej Jesús Jerusalén. <sup>14</sup> Abi' ro' yadooro' bidxaaglojman bén cuto' ree go'n, con ree xiil con ree palom, në ree bén zojb xan mex ruchaa reeman xmilia ree bén ziaad lood ren. <sup>15</sup> Chi baguiaa Jesús zian, dxel beenchaawaman tijb duu persi babëëman gra reeman, con gra ree xgo'n reeman në ree

xiil. Gutie'chaman xmilia ree b́en ruchaa milia guin barexguiat t́eeman xmex reeman.

<sup>16</sup> Dxel ŕebaman loj ree b́en cuto' palom:

—¡Gol bab́eē reeb guie! ¡Ad ŕüjnńedi lidx da Dadan zi'c luguia'!

<sup>17</sup> Dxel basaaladx ree xbejnman ni ca loj xtiidx Dios lod ŕeb: “Dád ralenan ruguian ni ŕüjn reeman lidxil.”

<sup>18</sup> Zianz ŕeb ree b́en Israel lojman:

—¿Xhie milagr gulüül du lojn din yayagbeen guial rajpil guialrniabee güünl zian?

<sup>19</sup> Badxi' Jesús laan ŕebaman:

—Gol base'n yadoo guie, naj yayün laan loj choon dxejzi.

<sup>20</sup> Dxel ŕeb ree b́en Israel guin lojman:

—Tiuubixho'p ijz goglaa reeman been reeman yadoo guie, ¿guiáad lüj ya yayüjnlan choon dxejzi?

<sup>21</sup> Per Jesús xcuerp gajcaman ruza'taman chi ruza'taman yadoo guin. <sup>22</sup> Zeel chi babanman loj ree bengüt, basaaladx ree xbejnman ni ŕebaman, abi' bililadx reeman xtiidxaman bililadx t́eē reeman ni ca loj xtiidx Dios.

### *Jesús nünbee xixgab gra bejn*

<sup>23</sup> Chi guzu Jesús Jerusalén pascw, zien ree bejn bililadx laaman, chi baguiaa reeman milagr ree ni beenman. <sup>24</sup> Per laaman ad ŕebtaman loj reeman chu najman, din laaman nünbeechaaw xhienaag naj xixgab reeman. <sup>25</sup> Ad biaadxtaman chu niéjb lojman xhienaag naj bejn, din laaman ragbeechaaw xhienaag naj xixgab tijbgaj bejn.

## 3

### *Bigneenē Nicodemo Jesús*

<sup>1</sup> Guyu tijb b́enfarisew brii lajman Nicodemo, gojcaman tijb guxtis loj ree b́en Israel.

<sup>2</sup> Abi' wejman bignajman Jesús tijb guxhin, dxel ŕebaman lojman:

—Mextr, rayagbeen guial Dios guxhaal lüj din gulüül dunujn, din achutczi zajc güün lasa' ree milagr ni ŕüjnl bal id za'nē Dios laaman.

<sup>3</sup> Dxel ŕeb Jesús:

—Diidxliczi rnin lüj, b́en ad zajlt stijb, ad zajct guguaaman xguialrniabee Dios.

<sup>4</sup> Abi' ŕeb Nicodemo lojman:

—Per, ¿xhienaag gal bejn stijb chi ma najman bengol? ¿Wen zajc yayu lēn xniaaman ya abi' galaman stijb?

<sup>5</sup> Badxi' Jesús laan ŕebaman:

—Diidxliczi rnin, b́en ad rirobnijst ad nabannē t́eētaman xSprijt Dios ad zile't yayuman loj xguialrniabee Dios. <sup>6</sup> B́en naban zi'c naj xixgabaman, lojzi guidxliuj guie rajpaman guialnaban, per b́en nabannē xSprijt Dios, por Sprijt guin rajpaman stijb guialnaban.

<sup>7</sup> Ad bal radxa lojl guial rnin: “Rüjn naguiejn gal bejn stijb.” <sup>8</sup> Din zi'c rbi' bi gralad abi' majs riguejnl chi rbi'n, per ni'quid ragbeetil ban źeēdan o ban źēn. Ziangajc naj xSprijt Dios con gra ree b́en nabannē laaman.

<sup>9</sup> Dxel ŕeb Nicodemo lojman:

—¿Xhienaag rajc zian?

<sup>10</sup> Badxi' Jesúsán ŕebaman:

—¿Lüj, naj mextr loj ree b́en Israel, ad rignia'til gra ree ni guin ya? <sup>11</sup> Diidxliczi rnin lojl, raneen ni rayagbeen ni baguiaa t́eēn, per ĺejt ad rliladxtidi ni ranan. <sup>12</sup> Bal id rliladxidi chi rnin xcwent ree ni loj guidxliuj guie, ¿xhienaag chililadxidi bal ganin xcwent ree ni xanyabaa?

<sup>13</sup> 'Achut wayej xanyabaa, tijbzi b́en biguiat diizd xanyabaa, B́en guxhaal Dios loj guidxliuj. <sup>14</sup> Abi' zi'c bacaa Moisejs b́eēl guiib loj yag niz loj yujbidx, ziangajc B́en



guxhaal Dios loj guidxliuj, gucaa reeman laaman loj crüjz, <sup>15</sup> din gra bén chililadx laaman ad zanijt reeman loj Dios, gap reeman guialnaban tiblayaa con laaman.

### *Rën Dios bejn*

<sup>16</sup> 'Guial tant rën Dios bénguidxliuj, majsi tijbzi xi'nman, per guxhaalaman laaman loj guidxliuj, din graczi bén chililadx laaman ad zanijt reeman loj Dios, gap reeman guialnaban tiblayaa con laaman. <sup>17</sup> Din Dios ad guxhaalt xi'nman loj guidxliuj din gudëedaman bejn casti, guxhaalaman laaman din gap ree bejn perdon loj Dios.

<sup>18</sup> 'Bén rliiladx Xi'n Dios ad rayaltaman xcasti Dios. Per bén ad rliiladxt, laaman ma rayal casti guial ad rliiladxtaman Xi'n Dios, bén naj tijbzi xi'nman. <sup>19</sup> Bén ad rliiladxt ree rayal reeman casti, din yan ni bi't bén naj xbajl Dios, mazri bayuladx reeman nejz mal, guial rüjn reeman ganax ni mal. <sup>20</sup> Graczi ree bén rüjn ni mal ad ruladxtczi reeman bajl guin, ad rbigt reeman lojn, chitëë guiguien ni mal cayüjn reeman. <sup>21</sup> Per ree bén naban zi'c rayal loj Dios, laa reeman rbig loj xbajlaman din guiguien guial graczi ni cayüjn reeman naj ni rën Dios.

### *Waj bén baroobnijs ruza'taman Jesús stijb*

<sup>22</sup> Chi gudëd gojc zian, Jesús con ree xbejnman wej reeman niz Judea, lod guzunëman laa reeman tio'p choon dxej, ni baroobnijs reeman bejn ree. <sup>23</sup> Nëgajc Waj curoobnijs bejn ree luguiedx la Enón, ni riga' gajxh guiedx Salim, guial yu' zil nijs ni. Abi' rej ree bejn persi rirobnijs reeman. <sup>24</sup> Laan goc chi gad Waj chu' ladxguiib.

<sup>25</sup> Per bëlzi ree xbejn Waj, con za tio'p choon gajc ree bén Israel guzuloj cadildiidx reeman por xcostumbr reeman guial xhienaag gac reeman naya. <sup>26</sup> Dxel biguiedx reeman loj Waj:

—Mextr, bén guzunël stiblad ro' guiw Jordán, bén bel xtiidx du lojn, në laaman curoobnijs bejn ree abi' gra reeman zinal laaman.

<sup>27</sup> Badxi' Waj laan rëbaman:

—Achut zajc gap guialrniabee bal id Dios gudëë laan. <sup>28</sup> Lëjt ragbee guial biguiejndi rën guial ad najtan naj Cristo, naj guneed lojman zidgagojnan por laaman. <sup>29</sup> Dunuj ree rayagbee guial loj guialruxhliaa, xin za'në biingunaa guin, laaxan cuxhliaa, guiáad xmiwix xin za' con laax rabaanë da'tix laax chi rigujejnx rnieex. Ziangajc naj dád rabaanë'n laaman. <sup>30</sup> Abi' laaman gusnuu gacaman mazri bén zobjloj, guiáad naj gusnuu gacan bén ad lasajct guial lojman.

### *Bén zëed xanyabaa*

<sup>31</sup> 'Din bén zëed diizd xanyabaa, laaman naj bén rniabee loj gra. Per bénguidxliuj, bénguidxliujzi najman abi' ganax ni yu' loj guidxliuj ruza'taman. Per Bén zëed diizd xanyabaa laaman rniabee gra, <sup>32</sup> abi' rüman ni ma baguiaaman ni ma bigujejn tëëman, per achut rliiladx ni rnieeman. <sup>33</sup> Bal yu' bén rliiladx xtiidxaman, zian rguien guial ni diidxli naj xtiidx Dios. <sup>34</sup> Abi' bén zëed por Dios, laaman rü xtiidx Dios guial guidiblagaa badëed Dios xSprijtaman lojman. <sup>35</sup> Dios rën Xi'nman abi' basa'nman gra lojman. <sup>36</sup> Abi' chutëëz bén rliiladx Xi'nman, laaman rajp guialnaban tiblayaa loj Dios. Per bén ad rtiëjbt chililadx, ad rajptaman guialnaban guin, laaman rayal xcasti Dios.

## 4

### *Jesús con béngunaa Samaria*

<sup>1</sup> Gogbee ree bénfarisew guial mazri zien bejn ma zinal Dad Jesús mazri zien tëë bejn ruroobnijsaman guial loj Waj, <sup>2</sup> majsi diidxliczi ad Jesústan ruroobnijs bejn ree, bén naj ree xbejnman ruroobnijs. <sup>3</sup> Chi gogbeeman zian dxel briiman niz Judea zëman niz Galilea stijb.

<sup>4</sup> Per chi zëman niz Galilea been naguiejn gudëdaman niz Samaria. <sup>5</sup> Abi' bidxinman tijb guiedx la Sicar, ni nulen Samaria, gajxh lod naga' yuj ni badëë Jacob loj xi'nman Xiëb. <sup>6</sup> Yagaj naj tijb bizëduu rniee reeman laan xbizë Jacob. Abi' guial ma badxag Jesús cazaman, dxel gurejman ro' bizë guin. Ma zidyob garol dxej. <sup>7-8</sup> Guiáad ree xbejnman zë reeman luguiedx guin zisii ni gaw reeman. Hor guin bidxin tijb béngunaa Samaria ro' bizë guin din tia'man nijs, dxel rëb Jesús lojman:

—Bazaladx ta'n xnijsil guië'n.

<sup>9</sup> Per guial ad rnieenët lasa' ree bën Israel zagdxe con ree bën Samaria, badxi' béngunaa guinan rëbaman:

—¿Chexquiza zeel rniabil nijs lon najl bën Israel awa bën Samaria naj?

(Din bën Israel ree ad rnieenët reeman bën Samaria ree zagdxe.) <sup>10</sup> Badxi' Jesús laan rëbaman:

—Bal zian ragbeel ni rën Dios guneeman lüj, chutëë bénan canab nijs lojl, zanabil nijs lon abi' naj zunen nijs runee guialnaban.

<sup>11</sup> Dxel rëb béngunaa guin loj Jesús:

—Dad, ni'quid ca'til ni cwëënël nijs, abi' bizë guin dád naxhitan. ¿Ban chica'l nijs runee guialnaban? <sup>12</sup> Dux béngulalan Jacob basa'nnë dunujn bizë guie, lod gu'man nijs con ree xi'nman con ree xbegui'xhaman. ¿Wen mazri najl guial lojman ya?

<sup>13</sup> Badxi' Jesús laan rëbaman:

—Graczi ree bën rë' nijs guie re'c reeman nijs stijb. <sup>14</sup> Per bën guië' nijs gudëdan, ad yu'tri dxej che'caman nijs. Din nijs gudëdan gacan luxdooan zi'c lod ad rbëzt rajch nijs, abi' nijs guin gudëë guialnaban tiblyaaa.

<sup>15</sup> Dxel rëb béngunaa guin lojman:

—Dad, banee nijs guin lon, chitëë che'cran nijs ad zial tëëtran guidca'n nijs guie.

<sup>16</sup> Rëb Jesús lojman:

—Bignee lacheelil, dxel yaguaadil guie.

<sup>17</sup> Badxi' béngunaa guinan rëbaman:

—Achut da bénguaawan yu'.

Dxel rëb Jesús:

—Waliquil achut lacheelil yu', <sup>18</sup> din ma gojc gaay xinguaaaw rtia' lüj, abi' yan xin zojbnël ad lacheeltilan. Zeel waliqui ni nal.

<sup>19</sup> Chi biguiejnman ni rëb Jesús, dxel rëbaman:

—Dad, ma ragbeen guial lüj naj bën rudëë xtiidx Dios loj ree bejn. <sup>20</sup> Dux béngulalan gunajchi' reeman Dios ruguia' guie, per lëjt najdi bën Israel rëbidi guial Jerusalén naj lod guiniajchi' bejn laaman.

<sup>21</sup> Badxi' Jesús an rëbaman:

—Na, zagdxe rnin guial guidxin dxej guiniajchi'di dux Dad ree Dios, ad zi'ttridi ruguia' guie ad zej tëëtridi Jerusalén. <sup>22</sup> Lëjt ni'quid ragbeetidi chunin rniajchi'di, per dunujn rayagbeen chunin ranajchi'n, din loj ree bën Israel grii bën güün bejn ree perdon. <sup>23</sup> Abi' ma bidxin dxej ni gra ree bën diidxli rniajchi' Dios, guiniajchi' reeman laaman zi'c rayal por xSprijtaman. Din zian rën dux Dad ree Dios güün ree bën rniajchi' laaman. <sup>24</sup> Dios naj Sprijt, abi' bën rniajchi' ree laaman rayal guiniajchi' reeman laaman con guidib luxdoo reeman por xSprijtaman.

<sup>25</sup> Dxel rëb béngunaa guin lojman:

—Naj ragbee gui't bën naj Mesías, bën la gajc, Cristo. Abi' chi gui'taman, laaman gusignia' dunuj ree gran.

<sup>26</sup> Abi' rëb Jesús:

—Najn naj bën zii, laaman caneenë lüj.

<sup>27</sup> Loj hor guin badxin ree xbejn Jesús, abi' dád badxaloj reeman guial cayünëman tijb béngunaa diidx. Per ni'qui tijb reeman ad gunabdiidx lojman xhie rënman o xhie

diidxan cayü reeman. <sup>28</sup> Guiáad béngunaa guin basa'n xreman ro' bizë guin, dxel ziaman luguiedx guin, abi' rëbaman loj ree bejn:

<sup>29</sup> —Gol taquiaa tijb bén ma na graczi ni ma benan. ¿Nid laaman naj Cristo ya?

<sup>30</sup> Dxel brii reeman luguiedx guin zë reeman lod za' Jesús. <sup>31</sup> Per la'tgaj zia béngunaa guin luguiedx guin, rëb ree xbejn Jesús lojman:

—Mextr, gudaw.

<sup>32</sup> Per rëbaman loj reeman:

—Laa da guialrawan yu', ni ad nünbeetidi.

<sup>33</sup> Dxel guzuloj canabdiidx loj lasa' reeman rëb reeman:

—¿Ni yu' chu bidnë ni gudawaman ya'n?

<sup>34</sup> Dxel rëb Jesús loj reeman:

—Da guialrawan naj günan zi'c rën Dios, bén guxhaal naj abi' guloox günan ni naman.

<sup>35</sup> Lëjt rëb: “Ryaadx zatajp bëew din gac ni yu' loj guiniaa.” Per naj rni lëjt: Gol gules lojdi, gol baguiaa loj ree guiniaa, ma naj reen din yado'p reen. <sup>36</sup> Abi' bén rato'p loj guiniaa guin, rtia'man ni rayalaman por dxiin ni rüjnman. Guiáad ni rato'paman naj par lod yu' guialnaban tiblayaa. Dxel zi'c bén rxübin zi'c bén rato'p, rabaa reeman tiblojzi.

<sup>37</sup> Waliqni ni rëb ree bejn: “Ben ren rxübin, ben ren rato'p guialnaza'c.” <sup>38</sup> Naj guxhal lëjt din chigto'pidi guialnaza'c lod ad beentidi dxiin. Ben ren ree been dxiin, guiáad lëjt gaz bigto'pidi guialnaza'c lod ad beentidi dxiin.

<sup>39</sup> Zien ree bén Samaria bililadx Jesús guial be béngunaa guin diidx loj reeman rëbaman: “Ma gunaman graczi ni benan.” <sup>40</sup> Zeel chi bidxin reeman lod za' Jesús, guzajc reeman laaman liaadx din yaya'nnëman laa reeman. Dxel baya'nnëman laa reeman tio'p dxej.

<sup>41</sup> Abi' mazri zien reeman bililadx laaman chi biguiejn reeman ni rnieeman, <sup>42</sup> dxel rëb reeman loj béngunaa guin:

—Bajy yan ad por ni natzil raliduladxan laaman, nëgajc dunujn ma baguiejn ni rnieeman, abi' rayagbeen walican laaman naj Cristo, bén yabëë bénguidxliuj loj dol.

### *Bayüjn Jesús xi'n xbejn tijb rey*

<sup>43</sup> Chi goc tio'p dxej guin, baza Jesús niz Samaria abi' zëman niz Galilea, <sup>44</sup> majsi laagajcaman rëb guial ni'qui tijb bén rudëë xtiidx Dios loj ree bejn ad rajpt reeman laaman respekt ladx gajcaman. <sup>45</sup> Per chi badxinman niz Galilea, bén niz ni ree baca' reeman laaman zagdxe. Din në laa reeman wej lanij pascw Jerusalén, abi' baguiaa reeman gra ni beenman ni. <sup>46</sup> Chi za'man niz ni wejman Caná stijb, lod bayüjnman nijs vin. Abi' luguiedx Capernaum guyu tijb xbejn rey ragxuu xi'nman. <sup>47</sup> Chi gogbee bén guin baza Jesús niz Judea badxinman niz Galilea, wejman lod za' Jesús bisajcaman laaman liaadx din cheman yayüjnman xi'nman guial zamer guiëtix. <sup>48</sup> Abi' rëb Jesús lojman:

—Lëjt, bal id zuguaadi xhie ree sen o milagr ree, ad zaliladxtidi.

<sup>49</sup> Per rëb bén guin:

—Dad, yo' yan gajc, naga gad da xi'nan guiët.

<sup>50</sup> Dxel rëb Jesús lojman:

—Baguiaj lidxil, ma bayajc xi'nl.

Bililadx bén guin ni rëb Jesús, abi' zia lidxaman. <sup>51</sup> La'tgaj ziaman, bigchaagloj ree xmojsaman laaman, abi' rëb reeman:

—Ma bayajc xi'nl.

<sup>52</sup> Dxel gunabdiidxaman loj reeman, rëbaman:

—¿Xhie hor guzuloj banaa da xi'nan?

Abi' rëb reeman lojman:

—Nieey cost raca tijb wadxe bariix xliaa.

<sup>53</sup> Dxel basaaladx bën guin guial hor ziin rëb Jesús lojman: “Ma bayajc xi'nl.” Abi' laaman në gra bën zojb lidxaman bililadx reeman Jesús. <sup>54</sup> Ni ne naj milagr barojp ni been Jesús niz Galilea chi bazaman niz Judea.

## 5

### *Bayüjn Jesús tijb bën ad rajct rza*

<sup>1</sup> Chi gudëd gojc zian, guyu tijb xlanij ree bën Israel, abi' wej Jesús Jerusalén. <sup>2</sup> Jerusalén guin, gajxh ro' port la xport ree Xiil, naj tijb tanc ro', diidx hebreo lan Betesda, yu' gaay xcurduran. <sup>3</sup> Yagaj riga' zien ree bënragxuu, zi'c ree bénlutia'p, në ree bencoj con ree bën ad rajctzi rza, cabëz reeman guiniib nijs yu' lën tanc guin. <sup>4</sup> Din gocli goc rguiajt tijb xianjl Dios runiibaman nijs guin, abi' bën ru lojnijs guin yaloj chi caniiban, rayajcaman xhietëez guialguijdxan rajcaman. <sup>5</sup> Dxel loj ree bën guin no'ch tijb bejn, ma gojc zi'ctiubichoon ijz ragxuuman. <sup>6</sup> Chi baguiaa Jesús laaman naga'man yagaj, abi' gogbeeman guial gocli ragxuuman dxel gunabdiidxaman lojman rëbaman:

—¿Rënl ya yayajquil?

<sup>7</sup> Badxi' bënragxuu guinan rëbaman:

—Dad, achut ra'pan gudxe' naj loj nijs guin chi riniiban. Beegaj chi rënan gayu'n, yalojl ben ren ru.

<sup>8</sup> Dxel rëb Jesús lojman:

—Bixche, baca' ni naal loj, baguiaj.

<sup>9</sup> Loj hor guin gajc bayajc bën guin, baca' ni naaman loj abi' guzuloj cazaman. Per guial dxej zii naj dxej raziiladx ree bën Israel, <sup>10</sup> zianz bën Israel zinal ree ley rëb reeman loj bën bayajc guin:

—Yandxej naj dxej raziiladx bejn, ad zajct yaca' ni go'til loj.

<sup>11</sup> Badxi' bën guinan rëbaman:

—Bën bayüjn naj naman: “Baca' ni naal loj, baguiaj.”

<sup>12</sup> Dxel gunabdiidx reeman lojman rëb reeman:

—¿Chu na lojl: “Baca' ni naal loj, baguiaj”?

<sup>13</sup> Per bën guin ad ragbeetaman chunin bayüjn laaman guial bi'ch Jesús loj ree benzien riga' yagaj. <sup>14</sup> Chi badxaag Jesús laaman lën yadooro' Jerusalén, abi' rëbaman lojman:

—Baguiaa ma bayajquil, ad güünril dol chitëë gaquil mazri guial loj ni goquil.

<sup>15</sup> Dxel zia bën guin abi' biguiedxaman loj ree bën Israel guial Jesús naj bën bayüjn laaman. <sup>16</sup> Zeel guzunal reeman Jesús din gugüjt reeman laaman, guial rüjnman milagr guin ree dxej raziiladx bejn. <sup>17</sup> Per rëb Jesús loj reeman:

—Da Dadan Dios ad rbëzt rüjnman ni rayal güünman, zeel nëgajc naj rün zi'c rüjnman.

<sup>18</sup> Zianan zeel mazri rejs guzuj reeman din gugüjt reeman laaman, ad guialzi rüjntaman ni ad najt gac dxej raziiladx bejn, në guial rüjn laagajcaman zi'c Dios chi rnieeman guial quijb xDadaman naj Dios.

### *Xguialrniabee Xi'n Dios*

<sup>19</sup> Rëb Jesús loj reeman:

—Diidxliczi rnin, achet zajc güün Xi'n Dios por xixgabzaman, rüjnman ni ruguiaaman rüjn xDadaman. Din graczi ni rüjnman rüjn gajc xi'nman. <sup>20</sup> Din Dios rën xi'nman abi' rulüüman laaman gra ree ni rüjnman. Abi' mazri naj ni gulüü loj xi'nman ni yadxa da't lojdi. <sup>21</sup> Din zi'c rasban Dios bengüt ree rudëë tëëman guialnaban loj reeman, ziangajc rudëë xi'nman guialnaban loj ree bën nüjnman xgab. <sup>22</sup> Abi' ad Diost rüjn guialguxtis, bazuj xi'nman din güünman guialguxtis, <sup>23</sup> din gap gra ree bejn xi'nman respejt zi'cgajc rajp reeman laaman respejt. Bën ad rajpt Xi'n Dios respejt, ad rajp gajctaman respejt xDadaman Dios, bën guxhaal laaman.

<sup>24</sup>Diidxliczi rnin: Bén ruzoob da diidxan rliadx tēēman Dios, bén guxhaal naj, laaman ma rajp guialnaban tiblayaa lojman. Abi' ad rayaltraman casti din ad najtraman zi'c bengüt par Dios, rajpaman guialnaban lojman. <sup>25</sup>Diidxliczi rnin ma bidxin hor, abi' yandxej gajcan, bén naj ree zi'c bengüt loj Dios gucaagdiajg reeman cha' xi'nman. Abi' ree bén guzoob xtiidxaman zajp reeman guialnaban tiblayaa con Dios. <sup>26</sup>Din zi'c rajp Dios guialnaban, lasa'gajc guialnaban guin ma badēē loj xi'nman, <sup>27</sup>abi' badēēman guialrniabee lojman din güünman guialguxtis, din laaman naj Bén guxhaal Dios loj guidxliuj. <sup>28</sup>Ad bal radxa lojdi ni rnin, din zadxin dxej guien gra ree bengüt cha' Xi'n Dios, <sup>29</sup>abi' yarii reeman lēn baa. Dxel bén been ree ni ruladx Dios, yaban reeman, din gap reeman guialnaban tiblayaa con laaman. Guiáad ree bén been ni mal, yaban reeman din yajal reeman casti ni rayal reeman.

### *Ni ruliü guialrniabee rajp Jesús*

<sup>30</sup>'Achet zajc günan por da xgabzan, rünan guialguxtis zi'c rniabee da Dadan. Abi' rünan guialguxtis zi'c rayal, din ad rüntanan zi'c naj da xgaban, rünanan zi'c rēn da Dadan bén guxhaal naj. <sup>31</sup>Bal gü da diidx gajcan, achet lasajcan. <sup>32</sup>Per yu' ben ren rü da diidxan, abi' ragbeechaawan guial diidxlin. <sup>33</sup>Lējt guxhaal bén bignabdiidx ree loj Waj, abi' laaman ganax ni diidxli gunaman. <sup>34</sup>Majsi ad ryaadxt yadxi'n ni gunee ree bejn por naj, per canin lojdi ni guna Waj din chililadxidi gap tēēdi perdon. <sup>35</sup>Waj goc zi'cgajczi tijb bajl ni re'c abi' rusnin, guiáad lējt dād babaadi bidxga'di tijb tiamp ni balüüman lējt. <sup>36</sup>Per naj mazri naj ni gulün lējt guial loj ni balüü Waj lējt por naj. Din ni na da Dadan Dios günan, laanan cayünan yan din guiguien guial diidxli laaman guxhaal naj. <sup>37</sup>Nē da Dadan bén guxhaal naj, laagajcaman be da diidxan, majsi ad waguiejntidi cha'man ad waguiaa tēētidi laaman. <sup>38</sup>Ad yu'guijc tēētidi xtiidxaman zeel ad rliadxidi bén guxhaalaman. <sup>39</sup>Lējt con cudad da't roolidi loj xtiidx Dios, guial ragbeedi con laan gapidi guialnaban tiblayaa con Dios. Abi' majsi loj xtiidx gajcaman ruza't naj, <sup>40</sup>per ad rēntidi chililadxidi naj din gapidi guialnaban guin.

<sup>41</sup>'Naj ad raguiltan guilies ree bejn da valoran. <sup>42</sup>Abi' ragbeechaawan guial ad walit rēndi Dios. <sup>43</sup>Naj zial por da Dadan abi' ad ridxga'tidi naj. Per bal stijb bejn gui't por laagajcaman, laaman guidxga'di. <sup>44</sup>¿Xoza chililadxidi naj? Awa mazri naguiejn rüjndi guilies ree bejn xvaloridi luar yaya'ndi zagdxē loj bén naj tijbzi Dios. <sup>45</sup>Ad bal naladxidi naj gabec xguialquiadi loj Dios, din bén cwe'c xguialquiadi naj Moisejs, bén rbēzidi güün lējt yudar. <sup>46</sup>Bal bililadxidi ni rēb Moisejs, nē naj zaliladxidi, din Moisejs bacaa loj xtiidx Dios lod ruza't naj. <sup>47</sup>Per bal id rliadxidi ni bacaaman, ¿xoza chililadxidi ni rnin lējt?

## 6

### *Bayaan Jesús gaay mil bejn*

*(Mt. 14:13-21; Mr. 6:30-44; Lc. 9:10-17)*

<sup>1</sup>Chi gudēd gojc zian, dxel zē Jesús stiblad ro'nijsdoo riga' niz Galilea, nijsdoo la gajc Tiberias. <sup>2</sup>Bénguixiuj binal laaman, guial ruguiaa reeman milagr ree ni rüjnman rayüjnman bénragxuu ree. <sup>3</sup>Dxel wē'paman tijb ruguia' abi' gurenē ree xbejnman. <sup>4</sup>Dxejzii ree ma zidyob pascw, xlanij ree bén Israel. <sup>5</sup>Chi gules loj Jesús, abi' baguiaaman zēēd ree bénguixiuj lod za'man, dxel rēbaman loj Felip:

—¿Ban yusii ree ni gaw gra ree bén guin?

<sup>6</sup>Per rēbzaman zian din guidoon xhie guiēb Felip, din Jesús mal ragbeeman xhie güünman. <sup>7</sup>Dxel badxi' Felipan rēbaman:

—Ni'qui ni rüjn bejn gan loj xhujn bēēw ad zadaant yo' guiadxtil din gaw tijbgaj reeman majsi tiblia'dogajzan.

<sup>8</sup>Dxel gunee stijb xbejn Jesús, bén la Andrejs bijch Simón Bēd, rēbaman:

<sup>9</sup> —Laa tijb xindo ca' gaay guiadxtil con zatio'p bëjl za' guie. Per, ¿të'czi taan ni guin par gra bën guin?

<sup>10</sup> Dxel rëb Jesús:

—Gol güjdx loj gra reeman din cwe reeman.

Abi' guial yu' da't guixya' yagaj, dxel gurej reeman. Naj reeman cost gaay mil xinguaaw. <sup>11</sup> Dxel cwa' Jesús guiadxtil guin ree. Chi gulox badëëman quixtëë loj Dios, badëëman laa reen loj ree xbejnman persi gudi's reeman laa reen loj gra ree bën zobj yagaj. Ziangajc beenman con ree bëjl guin, badëëman laa reen zi'ctzi guyën reeman.

<sup>12</sup> Chi ma bixienladx reeman, dxel rëbaman loj ree xbejnman:

—Gol bato'p gra ree ni laay baya'n, chitëë xhie guizëëb.

<sup>13</sup> Zianz bato'p reeman laa reen, abi' bacha reeman chiptio'p dxüm nilaay baya'n ree loj gaay guiadxtil guin. <sup>14</sup> Chi baguiaa ree bejn milagr narooob ni been Jesús, rëb reeman:

—Walican bën guin naj bën rudëë xtiidx Dios loj ree bejn, bën naj gui't loj guidxliuj.

<sup>15</sup> Per gogbee Jesús guial rën reeman chinë naguiejn reeman laaman din güün reeman laaman rey, dxel bazaman yagaj, wë'paman mazri ladya guijc guia' guin, lod su xtijbaman.

### *Rza Jesús lonijsdoo*

*(Mt. 14:22-27; Mr. 6:45-52)*

<sup>16</sup> Chi ma cabej guiaal, biguiajt ree xbejn Jesús ro'nijsdoo, <sup>17</sup> guyu reeman loj tijb barcw, abi' cadëd reeman loj nijs guin din guidxin reeman Capernaum. Ma bicajy, guiaad Jesús gadaman yadxin. <sup>18</sup> Dxel guzuloj cabi' bidoxh abi' wajs xtüjp nijs guin. <sup>19</sup> Chi ma gojc zi'c gaay o xho'p kilometro zë reeman, baguiaa reeman caza Jesús lojnijs guin cabigaman lod zë barcw guin, dád bidxeb reeman. <sup>20</sup> Per rëbaman loj reeman:

—¡Najn, ad rdxebidi!

<sup>21</sup> Dxel guyën reeman niuman loj barcw guin, per hor guin gajc bidxin reeman lod zë reeman.

### *Bigdiil ree bën bayaan Jesús laaman*

<sup>22</sup> Chi bareguiaal, bën riga' ree stiblad ro' nijs guin, ragbee reeman guial tijbzi barcw guzu yagaj, abi' gogbee reeman, lojn zë ree xbejn Jesús per ad nët laaman. <sup>23</sup> Loj hor zii bidxin ree barcw ren za guiedx Tiberias, gajxh lod gudaw reeman guiadxtil chi gulox badëëd Jesús quixtëë loj Dios. <sup>24</sup> Chi baguiaa reeman achutri Jesús za' yagaj ni'qui ree xbejnman, dxel wë'p reeman loj ree barcw guin, zë reeman Capernaum zigdiil reeman laaman.

### *Jesús naj bën rudëëd guialnaban*

<sup>25</sup> Chi bidxin reeman Capernaum, badxejl reeman Jesús, abi' gunabdiidx reeman lojman, rëb reeman:

—Mextr, ¿goc bi'til guie?

<sup>26</sup> Badxi' Jesúsán rëbaman:

—Ragbeechaawan, raguillidi naj guial gudawidi xt bigdxinladxidi, ad guial baguiaa-tidi milagr ree ni rünan. <sup>27</sup> Ad chu'di xgab guialraw rara, gol guyu xgab guialraw runee guialnaban tiblayaa con Dios. Din laan naj ni runee Bén guxhaal Dios loj guidxliuj guial ma bacaabee Dios laaman.

<sup>28</sup> Dxel gunabdiidx reeman lojman rëb reeman:

—¿Xhie rayal yaguieenan din chile' yaguieenan ni rën Dios?

<sup>29</sup> Badxi' Jesús laan rëbaman:

—Ni rën Dios güündi naj guial chililadxidi bën guxhaalaman loj guidxliuj.

<sup>30</sup> Dxel rëb reeman lojman:

—¿Xhie gulüül dunujn din yaliduladxan lüj? ¿Xhietëe ree milagr rüjnl? <sup>31</sup> Dux béngulal ree gudaw reeman mana chi guzu reeman niz loj yujbidx, zi'c rëb loj xtiidx Dios: “Badëëman guiadxtil biajb xanyabaa loj reeman gudaw reeman.”

<sup>32</sup> Badxi' Jesús laan rëbaman:

—Naj rni lojdi: Ad Moisejst badëed guiadxtil guin, da Dadan naj Bén runee quijb guiadxtil za xanyabaa. <sup>33</sup> Guiadxtil runee Dios, laan bi't diizd xanyabaa abi' runeen guialnaban loj bénguidxliuj.

<sup>34</sup> Abi' rëb reeman lojman:

—Dad, banee guiadxtil guin du lojn zianczi.

<sup>35</sup> Rëb Jesús loj reeman:

—Naj naj guiadxtil runee guialnaban guin. Bén gui't lon, ad yu't dxej guiliaanman, ziangajc Bén chililadx naj, ad yu't dxej che'caman nijs. <sup>36</sup> Per zi'c rnin lojdi, majsi ma baguiaadi naj, ad rliladxtidi naj. <sup>37</sup> Gra ree Bén ma banee da Dadan lon, gui't reeman lon, abi' Bén gui't lon, ad zasiejctan laaman. <sup>38</sup> Din naj zial diizd xanyabaa, zidgaguienan zi'c rën da Dadan Bén guxhaal naj, ad par güntan zi'c rënan. <sup>39</sup> Da Dadan Bén guxhaal naj, ni rënman naj guial gra ree Bén baneeman lon ni'qui tijb reeman ad zunijttan, rënman yasbanan laa reeman chi nit guidxliuj. <sup>40</sup> Din rënman guial gra ree Bén yayagbee Xi'nman chililadx tëe reeman laaman, gap reeman guialnaban tiblayaa con laaman, guiáad naj yasban laa reeman chi nit guidxliuj.

<sup>41</sup> Dxel guzuloj ree Bén Israel caneeguijdx reeman Jesús, guial rëbaman: “Naj naj guiadxtil ni biguiajt diizd xanyabaa.” <sup>42</sup> Abi' rëb reeman:

—¿Nid laaxan naj Jesús ya, xi'n Xiëb? Dunuj ree naguieenbee xdadix con xniaax. Yan, ¿chexc zeel nax xanyabaa biguiajtix?

<sup>43</sup> Dxel rëb Jesús:

—Gol bacwëez rnieeguijdxidi naj loj lasa'di. <sup>44</sup> Dios naj Bén guxhaal naj. Achut zile' gui't lon bal id zëëdaman por da Dadan, abi' naj yasban laaman chi nit guidxliuj. <sup>45</sup> Loj ree libr ni bacaa ree Bén badëe xtiidx Dios loj ree bejn, rëb: “Dios gulüü gra ree bejn.” Zeel gra ree Bén rucaagdiajg xtiidxaman, rusiid tëe reeman ni rulüüman laa reeman, laa reeman zëed lon.

<sup>46</sup> Achutczi waguiaa da Dadan Dios, tijbzi Bén guxhaalaman loj guidxliuj ma baguiaa laaman. <sup>47</sup> Diidxliczi rnin, Bén rliladx naj rajpaman guialnaban tiblayaa con Dios. <sup>48</sup> Naj naj guiadxtil ni runee guialnaban. <sup>49</sup> Xbéngulalidi gudaw mana loj yujbidx, per ni'czi zian güjt gajc reeman. <sup>50</sup> Per naj canin lojdi xcwent guiadxtil za xanyabaa, Bén gaw laan gapaman guialnaban tiblayaa con Dios. <sup>51</sup> Naj naj guiadxtil naban ni biyajb diizd xanyabaa. Bén gaw guiadxtil guie zajpaman guialnaban tiblayaa con Dios. Guiadxtil ni rudëdan, laan naj quijb da cuerpan, gudëdanan din gap ree bénguidxliuj guialnaban.

<sup>52</sup> Dxel guzuloj ree Bén Israel guin cadildiidx reeman, rëb reeman:

—¿Xhienaag gunee xin guin xcuerpix yadaaw ree?

<sup>53</sup> Abi' rëb Jesús loj reeman:

—Naj rni lëjt, bal id zajwidi xcuerp Bén guxhaal Dios, bal id zë' tëedi xrejnman, ad zajptidi guialnaban. <sup>54</sup> Per Bén gaw da cuerpan guië' tëëman da rejnan, zajpaman guialnaban tiblayaa con Dios, abi' naj yasban laaman chi nit guidxliuj. <sup>55</sup> Din da cuerpan naj quijb guialraw, guiáad da rejnan naj quijb ni guië' bejn. <sup>56</sup> Abi' Bén raw da cuerpan rë' tëëman da rejnan, laaman nabannë naj, guiáad naj nabannë' laaman. <sup>57</sup> Da Dadan Bén guxhaal naj, rajpaman guialnaban, abi' naj naban por laaman. Ziangajc Bén gaw da cuerpan, zajpaman guialnaban tiblayaa con Dios por naj. <sup>58</sup> Naj cani xcwent guiadxtil ni biguiajt xanyabaa. Abi' guiadxtil guie ad najtan zi'c naj mana ni gudaw xbéngulalidi, din laa reeman majsi gudaw reeman mana guin, per güjt gajc reeman. Guiáad Bén gaw guiadxtil guie zajpaman guialnaban tiblayaa con Dios.

<sup>59</sup> Zian balüü Jesús bejn ree lën yadoo Capernaum.

### *Diidx runee guialnaban tiblayaa*

<sup>60</sup> Chi gulox bacaagdiajg reeman ni balüü Jesús laa reeman, zien ree bën zinal laaman rëb:

—Nawëëg da't naj yayignia' ree ni naman. ¿Chu zajc guidxga' laaman?

<sup>61</sup> Chi gogbee Jesús ni canee reeman, gunabdiidxaman loj reeman, rëbaman:

—¿Rüjnnaa ni rnin lëjt ya? <sup>62</sup> ¿Xhieza güündi bal guguaadi Bén guxhaal Dios yayë'paman lod guzuman gocli? <sup>63</sup> Tijbzi por xSprijt Dios rajp bejn guialnaban tiblayaa, bejn ad zile't güün laazaman xhienin. Abi' naj por xSprijt Dios zëed ree diidx ni gunen lojdi, por ree diidx guin rajp bejn guialnaban. <sup>64</sup> Per lëjt yu'di ad waliladxt.

Rëb Jesús zian guial ragbeechaawaman diizd yaloj chu ree ad rliladxt laaman chu tää yayü laaman. <sup>65</sup> Rëb tääman loj reeman:

—Zeel ma rnin lojdi guial achut zile' gui't lon bal id zëedaman por da Dadan Dios.

<sup>66</sup> Diizd nadxel, zien ree bën zinal Jesús guro'nladx laaman, abi' ad guzanëtri reeman laaman. <sup>67</sup> Dxel rëb Jesús loj guidxiptio'p ree xbejnman:

—¿Në lëjt rën yaguij ya?

<sup>68</sup> Per badxi' Simón Bëd laan, rëbaman:

—Dad, ¿chu loj yo'n? Awa xtiidxil zidnë guialnaban tiblayaa con Dios. <sup>69</sup> Dunujn ma baliduladx rayagbee tää guial lüj naj Cristo, Xi'n Dios naban.

<sup>70</sup> Dxel rëb Jesús loj reeman:

—¿Nid naj gule guidxiptio'pidi ya? Abi' yan tijb gajqui lëjt naj zi'c xindxab.

<sup>71</sup> Rëb Jesús zian por Judas Iscariote, xi'n Simón, din Judas guin naj bën bayü laaman, majsi tijb gajc xbejnman najman.

## 7

### *Ad rliladxt ree bijch Jesús laaman*

<sup>1</sup> Chi gudëd gojc zian, wej Jesús loj ree guiedx riga' niz Galilea. Ad guyëntaman niejman niz Judea, guial cayguiil ree bën Judea guin laaman din gugüjt reeman laaman. <sup>2</sup> Per guial ma zidyob lanij ni rüjn ree bën Israel, chi rbej reeman lën ranch, <sup>3</sup> rëb ree bijch Jesús lojman:

—Brii, wej niz Judea, din në ree xbejnl bën riga' ree niz ni guguaa milagr rüjnl. <sup>4</sup> Din chi chu rën gagbee bejn ni rüjnman, ad rayalt güünman laan ralan. Yan zi'c rüjnl milagr ree, beenan loj gra ree bejn.

<sup>5</sup> Gunee ree bijch Jesús zian, guial ni'qui laa reeman ad rliladxt laaman. <sup>6</sup> Dxel rëb Jesús loj reeman:

—Ad wadxint da horan, per par lëjt xhietëez horan naj zagdxe. <sup>7</sup> Ad zajct guidxe'ch bénguidxliuj lëjt, sa'n naj rdxe'ch reeman naj guial rën loj reeman ad laat naj ni rüjn reeman. <sup>8</sup> Gol wej lanij guin, sa'n naj ad zazaagajtan, din ad wadxint hor ni gazaan.

<sup>9</sup> Chi gulox rëbaman loj reeman zian, baya'nman Galilea.

### *Wej Jesús xlanij ree bën Israel*

<sup>10</sup> Chi ma zë ree bijch Jesús, dxel nëman zë lanij guin, per ralanzi zëman chitëe chu gagbee. <sup>11</sup> Per yu' ree bën Israel raguiil laaman loj lanij guin, rëb reeman:

—¿Con bën guin ya'n?

<sup>12</sup> Loj gra ree benzien we lanij guin, zienloj ni rniee reeman Jesús. Yu' reeman rëb: “Benza'can”, yu'za reeman rëb: “Ad benza'ctan, rusquieeman bejn ree.”

<sup>13</sup> Per achutczi ruza't laaman loj gra bejn, guial rdxeb reeman guxtis Israel ree.

<sup>14</sup> Chi gurol xuman ni cayajc lanij guin, guyu Jesús lën yadooro' Jerusalén, abi' guzuloj culüüman bejn ree. <sup>15</sup> Guiáad ree bën Israel badxaloj reeman, rëb reeman:

—¿Chexc ya'n contzi gra ragbeex, awa ni'quid basiiditix?

<sup>16-17</sup> Dxel rëb Jesús loj reeman:



—Ad guictan carii ni culün lëjt, zëëdan por Dios, bën guxhaal naj. Bal chu rën güün zi'c rënman, zignia'man bal ni carii guicanan culün lëjt o zëëdan por Dios ya. <sup>18</sup> Bën rulüü ganaxzi ni rbëëgujcaman, rüjnman laan din guilies ree bejn xvaloraman. Per bën rüjn mazri din guilies bejn xvalor Dios, bën guxhaal laaman, laaman rniee ni diidxli, ad rusquieetaman bejn.

<sup>19</sup> Yan, majsi basa'nnë Moisejs lëjt ley, per ni'qui tijbidi ad rüjnt zi'c rëb ley guin. ¿Chexquiza zeel rëndi gugüjtidi naj?

<sup>20</sup> Badxi' ree bën guinan, rëb reeman:

—Xindxab yu' luxdool. ¿Chuczi rën gugüjt lüj?

<sup>21</sup> Abi' rëb Jesús loj reeman:

—Por tijbzi milagr ni benan radxalojdi. <sup>22</sup> Abi' lëjt gunabee Moisejs lëjt guial gra ree xinguaaw chu' sen, (majsi ad por Moisejst ru bejn sen guin, mal rüjn ree dux bengol gulal ree zian), abi' lëjt rgu'di bejn ree sen, majsi dxej raziiladx bejn. <sup>23</sup> Yan, bal chitëë gusaglojdi ley ni basa'nnë Moisejs lëjt, rgu'di sen bejn ree majsi dxej raziiladx bejn. ¿Chexquiza zeel ralendi guial bayünan tijb bënragxuu dxej raziiladx bejn? <sup>24</sup> Ad rüjndi xgabmal por ni ruguiaazidi rüjn bejn, yaloj xgaj gol gogbee zagdxe xhie cayüjnman.

### *Rëb Jesús ban zaman*

<sup>25</sup> Yu' ree bën Jerusalén guzuloj rniabdiidx loj lasa' reeman, rëb reeman:

—¿Nid bën guinan cayguiil reeman ya din gugüjt reeman laaman? <sup>26</sup> Abi' yan laaman canee niz loj ree bejn, abi' ni'qui chut xhie rëb lojman. ¿Ni ma bililadx ree guxtis ya'n guial laaman naj Cristo? <sup>27</sup> Per dunuj ree rayagbee chaaw ban zaman, guiáad chi gui't Cristo, achut gagbee ban saman.

<sup>28</sup> Chi biguiejn Jesús zian, la'tgaj culüüman bejn ree lën yadooro' Jerusalén, dxel guneeman rejs rëbaman:

—Lëjt rëb nünbeedi naj abi' ragbeedi ban guzaan! Per ad zialtan por naj gajc, zialan por quijb bën rniabee bën ad nünbeetidi. <sup>29</sup> Per naj nünbee laaman guial zialan diizd lod za'man, laa tëëman guxhaal naj.

<sup>30</sup> Chi biguiejn reeman zian, guyën reeman niniaaz reeman laaman, per achut gunaaz laaman, guial gad hor gal guiniaazaman. <sup>31</sup> Loj ree bénguixiuj za' yagaj zien reeman bililadx laaman, abi' rëb reeman:

—Chi gui't Cristo, ¿wen mazri zien ree milagr güünman guial loj bën guin ya?

### *Guyën reeman niniaaz reeman Jesús*

<sup>32</sup> Biguiejn ree bënfarisew ni rniee ree bejn Jesús. Abi' laa reeman con ree bixhioz rniabee, guxhaal reeman bën rajp ree ro' yadooro' Jerusalén din guiniaaz reeman Jesús.

<sup>33</sup> Dxel rëb Jesús:

—Ad xchejtri gazunë'n lëjt, dxel yaya'n lod za' bën guxhaal naj. <sup>34</sup> Yaguilidi naj, per ad zadxejltidi naj, din ad zile't gui'tidi lod gazun.

<sup>35</sup> Abi' ree bën Israel guin guzuloj rniabdiidx loj lasa' reeman, rëb reeman:

—¿Banczi zajc che bën guin din ad zadxejltaman? ¿Ni zejman lod zojb ree bën Israel loj ree benzit ya, chiglüüman laa reeman në ree bën ad najt bën Israel? <sup>36</sup> ¿Xhie rën guiëb guial naman: “Yaguilidi naj per ad zadxejltan, din ad zile't gui'tidi lod gazun”?

### *Nijs runee guialnaban*

<sup>37</sup> Dxej rliox lanij guin naj mazri dxej zojbloj, dxejzii guzuli Jesús guneeman rejs, rëbaman:

—Bal chu lëjt re'c nijs, gol guda lon din guië'dan. <sup>38</sup> Din bën rliiladx naj zi'c ca loj xtiidx Dios, lën luxdooan gach nijs runee guialnaban.

<sup>39</sup> Chi guneë Jesús zian, rën guiëb xtiidxaman guial gra ree bën chililadx laaman zabajnnë reeman xSprijt Dios. Din nadxel ad wayi'tt xSprijt Dios guial ad waguiajt Jesús lod canabeeman.

*Gula' lasa' ree bejn*

<sup>40</sup> Yu' ree bén no'ch loj ree benzien guin, chi bacaagdiajg reeman ni gunee Jesús, rëb reeman:

—Walican, bén guin naj gui't guidgadëë xtiidx Dios loj ree bejn.

<sup>41</sup> Yu'za reeman rëb:

—Bén guin naj bén bacaabee Dios.

Per yu' reeman rëb:

—Ad laataman naj Cristo, din ad niz Galileat naj griiman. <sup>42</sup> Loj xtiidx Dios ca guial loj xdiaa rey Davi grii Cristo, abi' Belén galaman ladx gajc rey Davi.

<sup>43</sup> Zian gojc dxel gula' lasa' reeman por Jesús. <sup>44</sup> Zien reeman guyën niniaaz laaman, per achut bayax niniaaz laaman.

*Ad bililadxt ree guxtis Jesús*

<sup>45</sup> Chi bayejc ree bén rajp ro' yadoo guin lod za' ree bénfarisew guin con ree bixhioz rniabee guin. Rëb reeman loj reeman:

—¿Chexc zeel ad bidnëtidi laax?

<sup>46</sup> Dxel rëb ree bén rajp ro' yadoo guin:

—¡Ad goct wayu bén guiniee zi'c rnieex!

<sup>47</sup> Abi' rëb ree bénfarisew guin:

—¿Në lëjt ma cwëjb basquieex lëjt ya? <sup>48</sup> ¿Wen yu' ree dux guxtis ree, o bénfarisew ree ma bililadx laax ya? <sup>49</sup> ¿Nid ragbeedi ya guial zien ree bén guin banijt loj Dios guial ad nünbeet reeman ley?

<sup>50</sup> Per bénfarisew la Nicodemo bén bignaj Jesús tijb guxhin, rëbaman loj reeman:

<sup>51</sup> —Loj dux ley ree ca guial ad zile't yaguie'ch ree xhie casti rayal tijb bejn, chi gad dunuj ree yacaagdiajg xtiidxaman, din chile' yayagbee ree xhie beenman.

<sup>52</sup> Badxi' reeman laan rëb reeman:

—¿Wen në lüj za'në ree bén Galilea ya? Basiid zagdxe loj xtiidx Dios din gagbeel ad goct warii bén rudëë xtiidx Dios loj ree bejn niz Galilea.

<sup>53</sup> Dxel bare'ch reeman zia lidx lidx reeman.

**8***Béngunaa banaaznë xinguaaw ren*

<sup>1</sup> Per Jesús zëman ruguia' Olivos. <sup>2</sup> Chi bareguiaal, rsil badxinman lën yadooro' Jerusalén stijb. Zien ree bejn bido'p lod za'man, dxel gurejman guzuloj culüüman laa reeman. <sup>3</sup> Abi' mextr rulüü ree ley con ree bénfarisew bidxinnë tijb béngunaa banaaznë tijb xinguaaw, dxel bazuj reeman laaman galay ree bén guin, <sup>4</sup> zianz rëb reeman loj Jesús:

—Mextr, banaaz béngunaa guie loj mer hor ni yu'nëman xinguaaw ren. <sup>5</sup> Abi' loj ley basa'nnë Moisejs dunuj ree ca guial lasa' béngunaa guie rayal guiëtaman con guiaj. ¿Laadx lüj xhie nal?

<sup>6</sup> Gunabdiidx reeman zian din guidoon xhie guiëbaman din gac gutedia' reeman laaman. Per con basajb lojman abi' guzulojman cucaaman luyuj con xbacwënman. <sup>7</sup> Per guial laa reeman canabdiidxzi canabdiidx reeman lojman, abi' babejliman, rëbaman loj reeman:

—Chutëëz bén ad wayüjnt dol, yaloj laaman gucaaguaiaj béngunaa guie.

<sup>8</sup> Dxel basajb lojman stijb, basnuu bacaaman luyuj guin. <sup>9</sup> Chi biguiejn reeman ni gunee man, guzuloj cayza tijbgaj reeman, diizd mazri bengol xt bara reeman baza. Tijbzi béngunaa guin baya'n con Jesús loj ree bén riga' yagaj. <sup>10</sup> Dxel babejliman, rëbaman loj béngunaa guin:

—¿Con ree bén bidnë lüj? ¿Ni'qui tijb reeman achut xhie been lüj ya?

<sup>11</sup> Dxel rëb béngunaa guin:

—Dad, ni'qui tijbaman.

Abi' rëb Jesús:

—Ni'qui naj achet günan lüj. Baguiyaj yan, ad güünril dol.

*Jesús naj bajl par bénguidxliuj*

<sup>12</sup> Dxel gunee Jesús stijb, rëbaman loj ree bën riga' yagaj:

—Naj naj bajl rusni bénguidxliuj. Abi' bën guzoob da diidxan, zani xquiarguejnman xhienaag gapaman guialnaban tiblayaa con Dios, ad yu' tëet dxej guicajy xquiarguejnman.

<sup>13</sup> Abi' ree bënfarisew rëb reeman lojman:

—Lüj gajc ruza't lüj, abi' achet lasajc xtiidxil.

<sup>14</sup> Dxel rëb Jesús loj reeman:

—Lasajc da diidxan, majsi naj gajc cane por naj, din naj ragbee ban zialan ban tëe gan, sa'n lëjt ad ragbeetidi ban zialan ban tëe gan. <sup>15</sup> Lëjt rnieedi bejn zi'ctizi naj xixgabidi, sa'n naj achut ruzatan. <sup>16</sup> Abi' bal guzatan bejn, ganen diidxli, din ad zanetan zi'c naj da xgaban, në da Dadan bën guxhaal naj ragbee guial diidxli naj ni ganen. <sup>17</sup> Abi' loj xleydi ca guial chi yu' tio'p bën rniee tiblojzi, diidxliqui naj ni rniee reeman. <sup>18</sup> Yan, naj gajc naj tijb bën rniee por naj, abi' da Dadan bën guxhaal naj, naj stijb bën rniee por naj.

<sup>19</sup> Gunabdiidx reeman lojman rëb reeman:

—¿Con xdadil?

Badxi'man laan rëbaman:

—Lëjt ad nünbeetidi naj, ad nünbee tëetidi da Dadan, din bal nünbeedi naj, ziangajc nünbeedi da Dadan.

<sup>20</sup> Zian gunee Jesús la'tgaj rulüüman bejn ree lën yadooro' Jerusalén, niz lod za' ree ni rgu' reeman gon. Per achut gunaaz laaman, din ad wadxint hor guiniaazaman.

*Lod gan ad zile't gui'tidi*

<sup>21</sup> Gunee Jesús stijb, rëbaman:

—Chi ma gan, zaguilidi naj, per zëjtnë xtolidi, din lod gan ad zile't gui'tidi.

<sup>22</sup> Dxel rëb ree bën Israel guin:

—¿Wen ni laagajcaman gugüjt laaman ya, zeel naman guial ad zajct yo' ree lod cheman?

<sup>23</sup> Abi' rëb Jesús loj reeman:

—Lëjt naj bën ladguiajt guie, sa'n naj ladya ni zialan. Lëjt naj bénguidxliuj, sa'n naj ad bénguidxliujt naj. <sup>24</sup> Zeel rnin, zëjtnë xtolidi. Din bal id zaliladxidi guial naj naj bën najn, zëjtnë xtolidi.

<sup>25</sup> Dxel gunabdiidx reeman lojman, rëb reeman:

—¿Chuza lüj?

Badxi'man laan rëbaman:

—Ma rnin lojdi diizd yaloj. <sup>26</sup> Zien ni ra'pan gulün lëjt ni ganenë' tëen lëjt. Per naj, ni canen loj bénguidxliuj naj ni rucagdiagan rniee bën guxhaal naj, abi' ni rnieeman naj diidxli.

<sup>27</sup> Per laa reeman ad gogbeet guial Diosan ruza'taman. <sup>28</sup> Zeel rëbaman loj reeman:

—Chi ma beendi zi'ctizi rëndi con Bén guxhaal Dios, dxel gagbeedi najcan, gagbee tëedi guial achetczi rünan por da xgabzan, naj rnie ni ma balüü da Dadan naj. <sup>29</sup> Din laaman guxhaal naj, laaman za' con naj, abi' ad yu't dxej cwëeladxaman naj, guial zianczi rünan ni rayuladxaman.

<sup>30</sup> Chi rëb Jesús zian, zien ree bejn bililadx laaman.

*Bën wali naj xbejn Dios*

<sup>31</sup> Rëb Jesús loj ree bën Israel bililadx laaman:

—Bal gusnuu guzoobidi da diidxan, waliqui najdi da bejnan, <sup>32</sup> abi' zünbeedi conin naj diidxli, abi' por diidxli guin zalaadi.

<sup>33</sup> Badxi' reeman laan rëb reeman:

—Dunujn zio'p loj xdiaa Abraham, abi' ad yu't dxej wayajcan zi'c bën nado'. ¿Chexquiza zeel nal du lojn, guial por diidxli zalaan?

<sup>34</sup> Dxel rëbaman loj reeman:

—Diidxli rnin lojdi, guial graczi bën rüjn ganaxzi dol, laa reeman naj zi'c bën nado' loj dol. <sup>35</sup> Abi' tijb bën nado' loj bejn, ad zile't guiëbaman xfamilaman naj xpatronman, sa'n xi'n patron guin zile' guiëbix xfamilixan. <sup>36</sup> Zeel bal Xi'nman guslaa lëjt, ad najtridi zi'c bën nado'. <sup>37</sup> Ma qui ragbeen guial loj xdiaa Abraham zëedidi, per lëjt rën gugüjt naj guial ad rayuladxtidi da diidxan. <sup>38</sup> Naj rni ni ma balüü da Dadan naj, sa'n lëjt rüjndi zi'c na xDadidi güüdi.

<sup>39</sup> Badxi' reeman rëb reeman:

—Dux Dadan naj Abraham.

Dxel rëb Jesús loj reeman:

—Bal niajquidi xi'n Abraham, züjndi zi'c beenman. <sup>40</sup> Per yan, majsi ma rnin lëjt diidxli zi'c balüü Dios naj, lëjt rëndi gugüjtidi naj. ¡Abi' Abraham ad yu't dxej nünman zian! <sup>41</sup> Sa'n lëjt rüjndi zi'cgajc rüjn xDadidi.

Abi' rëb reeman loj Jesús:

—Dunujn achut mazri xi'n nayajcan. Tijbzi Dios naj dux Dadan.

<sup>42</sup> Dxel rëb Jesús loj reeman:

—Bal walidi Dios naj xDadidi, guiëndi naj, din por laaman zialan loj guidxliuj. Ad zialtan por naj gajc, zialan por Dios bën guxhaal naj. <sup>43</sup> Abi' ad rignia'tidi ni rnin, guial ad rëntidi gucaagdiajquidi da diidxan. <sup>44</sup> XDadidi naj xinxab, abi' rüjndi zi'c rën x güüdi, din diidz yaloj ruladx xinxab guin gugüjtix bejn. Ad yu't dxej chinalix ni naj diidxli, din ad rnieetix diidxli. Chi rnieex diidx rusquiee, achet naladxix, din laax naj xin rusquiee naj tëëx xdad guialrusquiee. <sup>45</sup> Per guial naj rni lëjt ganax diidxli, ad rliladxtidi naj. <sup>46</sup> ¿Chu lëjt zajc na guial yu' xhie dol ma benan? Abi' bal diidxli naj ni canen, ¿chexquiza zeel ad rliladxtidi naj? <sup>47</sup> Bën naj xbejn Dios rucaagdiajgaman xtiidxaman, per lëjt ad xbejntaman najdi, zeel ad rucaagdiajgtidi xtiidxaman.

### *Mal yu' Jesús chi gad Abraham gal*

<sup>48</sup> Dxel rëb ree bën Israel guin loj Jesús:

—Waliqni ni ranan guial xinxab yu' luxdool naj tëël bën Samaria.

<sup>49</sup> Badxi'man laan rëbaman:

—Achut xinxab yu' luxdon, naj cuzob xtiidx da Dadan, per lëjt ganax diidxguijdx rnieedi naj. <sup>50</sup> Naj ad raguiltan guilies ree bejn da valoran, majsi yu' bën rën güün bejn zian, abi' laaman rüjn xguialguxtis. <sup>51</sup> Diidxli rnin lëjt, bën guzoob da diidxan, ad yu't dxej guiëtaman.

<sup>52</sup> Dxel rëb ree bën Israel guin lojman:

—Yanri ma rayagbeechaawan guial xinxabqui yu' luxdool. Abraham në gra ree bën badëë xtiidx Dios loj ree bejn, güjt reeman, guiáad lüj nal: “Bën guzoob da diidxan, ad yu't dxej guiëtaman.” <sup>53</sup> ¿Wen mazri lasajquil ya guial loj dux bëngulal ree Abraham? Güjtaman, güjt tëë ree bën badëë xtiidx Dios loj ree bejn. ¿Laadx lüj chu naladxil najl?

<sup>54</sup> Abi' rëb Jesús loj reeman:

—Bal naj gajc gales da valoran, achet lasajc ni ganen por naj. Per bën rlies da valoran naj da Dadan, bën nagajquidi naj xDiosidi. <sup>55</sup> Lëjt ad nünbeetidi laaman, sa'n naj nünbeen laaman. Abi' bal ganin ad nünbeetan laaman, nëgajc naj ma naj bën rusquiee zi'cgajc lëjt. Per nünbeen laaman abi' ruzoban xtiidxaman. <sup>56</sup> Xbëngulalidi Abraham, babaaman guial guguaaman dxej ni guialan. Abi' chi baguaaaman dxej guin, mazri babaaman.

<sup>57</sup> Dxel rëb ree bën Israel guin lojman:

—Ni'qui gadil chu' tü'pchii ijz, ¿guiáad lüj ya nal baguaaal Abraham?

<sup>58</sup> Abi' gunee Jesús rëbaman:

—Diidxli rnin lojdi, mal nabanan chi gad Abraham chu'.

<sup>59</sup> Dxel gules reeman guiaj din nucaa reeman laan Jesús. Per laa guzëëb gajcaman galay ree bejn, abi' gudëdaman galay reeman bariiman lën yadoo guin, laa zia gajcaman.

## 9

### *Rayüjn Jesús tijb xin ad ranit loj*

<sup>1</sup> Chi cadëd Jesús tiblajt, baguiaaman tijb xin ad ranit loj diizd chi golix. <sup>2</sup> Dxel gunabdiidx ree xbejnman lojman, rëb reeman:

—Mextr, ¿chexc zeel ad ranit loj bën guin diizd chi golaman? ¿Por xtol ree xDadaman ya, o por xtol gajcaman?

<sup>3</sup> Badxi' Jesúsán, rëbaman:

—Najman zian ad por xtoltaman ad por xtol tëët ree xDadaman. Gojlaman zian din chi yayajcaman, guguaa ree bejn xguialrniabee narooob Dios. <sup>4</sup> Yan, la'tgaj yu' tiamp, rüjn naguiejn yaguieen ree ni na bën guxhaal naj, din ma yayaaloj tiamp ni achetri zajc gac. <sup>5</sup> Abi' la'tgaj za'n loj guidxliuj guie, naj naj bajl rusni bénguidxliuj.

<sup>6</sup> Chi gulox guneeman zian, guxhie' xhiejnman luyuj, abi' beennëman laan bajn, persi gudëëbaman laan guiaaloj xin guin. <sup>7</sup> Abi' rëbaman lojx:

—Bitiib lojl ro' tanc Siloé —Siloé rën guiëb ni guxhaalaman.

Dxel bitiib lojx, abi' chi bayejquix, ma rani lojx. <sup>8</sup> Dxel bën zojb ree gajxh lod zojbix con ree bën ragbee guial laax rniab carda, rëb reeman:

—¿Nid xin guinan rbej rniab carda ya?

<sup>9</sup> Yu' reeman rëb:

—Laaquixan.

Yu'za reeman rëb:

—Ad laatixan, rguienzix zian.

Per laax rëb:

—Najcan.

<sup>10</sup> Dxel gunabdiidx reeman lojx, rëb reeman:

—¿Xhieza naag gojc bani lojl?

<sup>11</sup> Badxi'xan, rëbix:

—Bën la Jesús been bajn, gudëëbaman guiaalon abi' naman: “Wej bitiib lojl ro' tanc Siloé.” Dxel wan, chi gulox gudiib lon, max bani lon.

<sup>12</sup> Abi' rëb reeman lojx:

—¿Conzaman yan?

Zeel rëbix:

—Ad ragbeetan.

### *Gunabdiidx ree bënfarisew loj xin guin xhienaag guzuloj rani lojx*

<sup>13</sup> Loj hor zii binë reeman xin bayajc guiaaloj guin loj ree bënfarisew, <sup>14</sup> din dxej been Jesús bajn persi bayüjnman guiaaloj xin guin, dxej guin raziiladx ree bejn. <sup>15</sup> Dxel gunabdiidx ree bënfarisew guin lojx xhienaag guzuloj rani lojx. Abi' rëbix loj reeman:

—Jesús gudëëb bajn guiaalon, dxel bitiib lon, yan ma ranin.

<sup>16</sup> Yu' ree bënfarisew guin rëb:

—Bën bayüjn guiaalojl ad xbejnt Diosan, din ad rajptaman respejt dxej raziiladx bejn.

Per yu'za reeman rëb:

—¿Xhienaag güünman milagr guie ree, bal najman bëndol?

Garent garen rëb reeman. <sup>17</sup> Abi' gunabdiidx reeman loj xin bayajc guin zatijb, rëb reeman:

—¿Laadx lüj xhie nal chu naj bën bayüjn guiaalojl?

Badxi'xan rëbix:

—Naj rni guial laaman naj bën rudëë xtiidx Dios loj ree bejn.

<sup>18</sup> Per b́en Israel guin ree ad rliadxt reeman, din ad banit lojx abi' yan ma ranin, dxel gurejdx reeman xdadix con xníaa, <sup>19</sup> abi' gunabdiidx reeman loj reeman, rēb reeman:  
—¿Xin guien naj xi'ndi ya, xin rēbidi ad ranit loj diizd gojlix? Yan, ¿xhienaag gojc zeel ma ruguíaax?

<sup>20</sup> Badxi' reeman laan rēb reeman:

—Dunujn rayagbee guial du xi'nanan, rayagbee tēen guial diizd chi golix ad ranit lojx. <sup>21</sup> Per ad rayagbeetan xhienaag gojc zeel rani lojx, ad rayagbee tēetan chu bayüjn guíalojx. Gol gunabdiidx lojx, ma najx xingol, ma zajc na laagajquix lojdi xhienaag gojc.

<sup>22</sup> Rēb ree xdadix zian guial rdxeb reeman xguxtis ree b́en Israel, din ma baya'n reeman diidx, chutēez b́en guiēb guial Jesús naj Cristo, ad zatiējbtri reeman chu'man lēn yadoo. <sup>23</sup> Zianan zeel rēb reeman: “Gol gunabdiidx lojx, ma najx xingol.”

<sup>24</sup> Dxel gurejdx reeman laax zatijb, abi' rēb reeman:

—Laa Dios ruguía, guna diidxli, din dunujn rayagbee guial b́endol naj b́en bayüjn lüj.

<sup>25</sup> Badxi'xan rēbix:

—Ad ragbeetan bal b́endolan o ad b́endoltan ya. Tijbzi ni ragbeen naj guial ad banit lon, abi' yan ma ruguían.

<sup>26</sup> Dxel gunabdiidx reeman lojx stijb, rēb reeman:

—¿Xhienaag beennēman lüj? ¿Xhienaag beenman persi rani lojl?

<sup>27</sup> Badxi'xan rēbix:

—Ma rnin lojdi, abi' lējt ad rliadxtidi naj. ¿Chexc zeel rēndi ganin zatijb xhienaag beenman? ¿Wen nē lējt rēn gac xbejnman ya?

<sup>28</sup> Dxel gudilē reeman laax rēb reeman:

—Lüj bal najl xbejnman, sa'n dunujn xbejn Moisejs nayajcan. <sup>29</sup> Din dunujn rayagbee Dios gunee Moisejs, per b́en guin ni'quid rayagbeetan ban zaman.

<sup>30</sup> Badxi'xan rēbix:

—¿Xhiechalnín zeel ad ragbeetidi ban zaman! Guíaad naj por laaman ma rani lon.

<sup>31</sup> Dunuj ree rayagbee chaaw guial ad ridxga't Dios xtiidx ree b́endol, ridxga'man xtiidx ree b́en ruzoob xtiidxaman rüjn tēē reeman zi'c rēnman. <sup>32</sup> Ad goct wacaagdiajg ree guial chu' b́en yayüjn loj b́en ad ranit loj diizd gojlaman. <sup>33</sup> Yan, bal id por Dios zēēd b́en guin, achetczi nile' nūjnman.

<sup>34</sup> Dxel rēb reeman lojx:

—Lüj gojl con dol, ¿wed lüj gulüü dunujn?

Abi' babēē reeman laax yagaj.

### *Bililadx xin bayajc guin Jesús*

<sup>35</sup> Gogbee Jesús ni guzac xin bayüjnman, dxel chi badxaagaman laax, rēbaman lojx:

—¿Rliadxil b́en guxhaal Dios loj guidxliuj ya?

<sup>36</sup> Badxi'xan rēbix:

—Dad, guna chunin, din chililadxan laaman.

<sup>37</sup> Dxel rēbaman lojx:

—Ma baguíaal laaman, laaman naj b́en caneenēl.

<sup>38</sup> Abi' bazuxib xin guin lojman, rēbix:

—Rliadxan lüj, Dad.

<sup>39</sup> Zianz rēb Jesús:

—Bialan loj guidxliuj guie din günan guialguxtis, din por naj yani loj ree b́en ad ranit loj, guíaad ree b́en rani loj, ad zanit loj reeman.

<sup>40</sup> Yu' ree b́en farisew za'nē laaman. Chi biguiejn reeman rēbaman zian, rēb reeman:

—¿Wen nē dunujn ad ranit duloj ya?

<sup>41</sup> Dxel rēb Jesús loj reeman:

—Bal id rani lojdi, achet dol rajpidi. Per guial nadi rani lojdi, rajpidi dol por ree xtolidi.

## 10

### *Bén rniaj xiil*

<sup>1</sup> Rëb tëë Jesús:

—Diidxliczi rnin lojdi, bén ad rut niz ro' xgurajl ree xiil, bén ru niz lood ren, laaman naj béngubaan. <sup>2</sup> Per bén ru niz ro' xgurajl reeb, laaman naj bén rniaj laa reeb. <sup>3</sup> Abi' rxhial bén rajp ro' xgurajl reeb persi ru bén rniaj laa reeb, abi' chi rbejdxaman tijbgaj reeb, rayünbee reeb cha'man. Zianz rbëëman laa reeb lën gurajl guin. <sup>4</sup> Abi' chi ma brii gra reeb, dxel rniedaman loj reeb, guiáad laa reeb rnal laaman, guial nünbee reeb cha'man. <sup>5</sup> Per ad rnalt reeb tijb bén ad nünbeet reeb, ruxüünl reeb lojman, guial ad nünbeet reeb cha'man.

<sup>6</sup> Chi gulox gunee Jesús zian, ad bignia't ree bén riga' yagaj xhie rën guiëb ni guneeman.

### *Jesús naj zi'c bén rniaj xiil ree zagdxe*

<sup>7</sup> Rëb Jesús loj reeman zatijb:

—Diidxliczi rnin, naj naj zi'c ro' xgurajl ree xiil, lod ru reeb. <sup>8</sup> Gra ree bén bi't chi gad naj guial naj reeman zi'c béngubaan, rban reeman rusagzi tëë reeman. Per ree bén naj da bejnan ad bidxga't reeman laa reeman. <sup>9</sup> Naj naj ro' port, abi' bén ru ro' port guie zajpaman perdon, dxel ma zile' chu'man yarii tëëman zi'cgajczi tijb xiil abi' zian rdxejl ni rawib.

<sup>10</sup> 'Béngubaan ri'tzaman din cwanman, gugüjtaman gunijt tëëman, sa'n naj zialan din gapidi guialnaban, gap tëëdi zro' da'tan. <sup>11</sup> Naj naj zi'c tijb bén rniaj xiil ree zagdxe. Abi' bén rniaj xiil ree zagdxe xt xguialnabanman rudëëman por laa reeb. <sup>12</sup> Per bén rniaj laa reeb por milia, chi ruguiaaman zëed cuyojt, laa ruxüün gajcaman, rbëëladxaman xiil guin ree guial ad najt reeb xi xiilaman në guial ad najtaman bén rniaj ree xiil, dxel rniaaz cuyojt guin laa reeb abi' rtie'chib laa reeb. <sup>13</sup> Laaman rbëëladx laa reeb, din por miliazi rniajman laa reeb abi' achet naladxaman por laa reeb.

<sup>14-15</sup> 'Naj naj zi'c bén rniaj xiil ree zagdxe. Abi' zi'c nünbee da Dadan naj, zian nünbeen laaman, ziangajc nünbee ree da xiilan, guiáad laa reeb nünbee naj. Abi' xt da guialnaban gudëdan por laa reeb. <sup>16</sup> Ra'p tëën stibcwaa ree xiil ad yu't lën gurajl guie. Në laa reeb ryaadx chigxin, laa reeb guzoob da diidxan, yadxaag grop cwaa reeb gac reeb tijbzi, abi' tijbzi bejn gap laa reeb.

<sup>17</sup> 'Da Dadan Dios rënman naj guial naj gajc rudë naj guiëtan par yabanan stijb. <sup>18</sup> Achut zajc gugüjt naj bal id naj gatiëëb. Naj ra'p guialrniabee par gatiëëban guiëtan në par yabanan stijb, din laan naj guialrniabee ni banee da Dadan lon.

<sup>19</sup> Chi biguiejn ree bén Israel guin ni rëbaman, gojc reeman tio'p lala' stijb. <sup>20</sup> Zien reeman rëb:

—¿Chexc zeel ridxga'di laaman? Awa xindxab yu' luxdooan rajc tëë guijcaman.

<sup>21</sup> Per yu' reeman rëb:

—Ni'qui tijb bén yu' xindxab luxdoo ad rnieet zian. ¿Wen zajc yaxhal xindxab guiaaloj ree bén ad ranit loj ya?

### *Jesús con xDadaman Dios naj reeman tijbzi*

<sup>22</sup> Tiamp nayaag, chi cayüjn ree bén Israel lanij ni rüjn reeman gazobijz par yadooro' Jerusalén. <sup>23</sup> Wej Jesús lën yadoo guin. Chi cazaman niz ro' curdur ni rniee reeman xcurdur Salomón. <sup>24</sup> Dxel biyaw ree bén Israel laaman, rëb reeman lojman:

—¿Xt goc naga'loj cu'nawëëguil dunujn? Guna du lojn bal lüj naj Cristo.

<sup>25</sup> Badxi' Jesúsán rëbaman:

—Ma rnin lojdi, per lëjt ad rliladxtidi naj. Abi' ree ni rünan con xguialrniabee da Dadan Dios, laa reen rulüü chu najn. <sup>26</sup> Per ad rliladxtidi, guial ad najtidi da bejnan. <sup>27</sup> Bén naj ree da bejnan, nünbee reeman cha'n, guiáad naj nünbeen laa reeman, abi' laa reeman rzanal naj. <sup>28</sup> Naj rudë guialnaban tiblayaa loj reeman, ad yu't dxej nit reeman.

Abi' achut zajc chiquied laa reeman lon. <sup>29</sup> Din da Dadan, bèn banee laa reeman lon, rajpaman mazri guialrniabee guial loj gra. Achut zajc chiquied laa reeman lojman. <sup>30</sup> Da Dadan con naj, nayajcan tijbzi.

<sup>31</sup> Dxel cwa' ree bèn Israel guin guiaj din gucaaguaiaj reeman Jesús. <sup>32</sup> Per rëbaman loj reeman:

—Por xguialrniabee da Dadan, zien ni zagdxé ma benan niz lojdi. ¿Con pornin gucaaguaiajdi naj?

<sup>33</sup> Badxi' reeman laan rëb reeman:

—Ad por ree ni zagdxé ni beentilan yacaaguaiajn lüj, yacaaguaiajn lüj guial ad rajptil Dios respejt, din bénguidxliuji lüj, abi' rüjn lüj gajc zi'c Dios.

<sup>34</sup> Dxel rëb Jesús:

—Loj xleydi rëb: “Naj rni guial lëjt naj dios.” <sup>35</sup> Dunuj ree rayagbee guial ad ni rusquieet naj ni ca loj xtiidx Dios. Abi' laaman gulëëlaaj dios bèn basa'nnë ree xtiidxaman, bèn gojp ree guialrniabee loj ree bèn Israel. <sup>36</sup> Yan, bal da Dadan Dios gulëëca naj persi guxhaalaman naj loj guidxliuj, ¿chexquiza zeel nadi ad ra'ptan laaman respejt guial rnin, xi'nman naj? <sup>37</sup> Bal id cayünan zi'c na da Dadan, ad chililadxidi naj. <sup>38</sup> Per bal cayünan zi'c naman, majsi ad zaliladxtidi naj, per gol bililadx guial por laaman zëéd ni rünan din gagbeedi guial da Dadan za'në naj, guiáad naj za'në'n laaman.

<sup>39</sup> Dxel guyën reeman niniaaz reeman Jesús, per gulaaman loj reeman.

<sup>40</sup> Abi' zëman zatiblad ro' guiiw Jordán, lod baroobnijs Waj bejn ree yaløj, yagaj baya'nman. <sup>41</sup> Abi' zien ree bèn bidxin yagaj rëb:

—Walin, majsi achet milagr been Waj, per gra ni guneeaman xcwent bèn guie naj diidxli.

<sup>42</sup> Dád zien reeman bililadx Jesús yagaj.

## 11

### *Güjt Lazr*

<sup>1</sup> Guyu tijb bënragxuu, brii lajman Lazr. Laaman con re bizanman Li con Mart, naj ladx reeman Betania. <sup>2</sup> Abi' Li bizan Lazr, laam baroob perfum guia' Jesús abi' bacwiidximin con guidxguijquim. <sup>3</sup> Dxel grop bël reem guxhaal ruson loj Jesús, rëb reem:

—Dad, ragxuu xmiwil Lazr.

<sup>4</sup> Chi biguiejn Jesús zian, rëbaman:

—Guialguijdx guin ad zëédtan par gugüjtan, zëédan din gac guguaiaa bejn xguialrniabee Dios në par guguaiaa reeman xguialrniabee Xi'n Dios.

<sup>5</sup> Majsi rën da't Jesús Mart con Li në Lazr, <sup>6</sup> per chi cwa'man ruson ragxuu Lazr, sta goglaaman zatio'p dxej lod za'man. <sup>7</sup> Dxel rëbaman loj ree xbejnman:

—Yo' ree niz Judea zatijb.

<sup>8</sup> Abi' rëb reeman lojman:

—Mextr, ad wayajct xchej guyën ree bèn zojb niz ni nucaaguaiaj reeman lüj. ¿Abi' chel ni zatijb ya?

<sup>9</sup> Dxel rëb Jesús:

—Lëjt ragbee guial chiptio'p hor yu' tibdxej. Abi' bèn rza radxe, achet rirejl guia'man, din yu' bajl rusni loj guidxliuj guie. <sup>10</sup> Per bèn rza guxhin, yu' ni rirejl guia'man, din achet bajl guin rajpaman.

<sup>11</sup> Rëb tëë Jesús loj reeman:

—Ma naga'yëjs dux miw ree Lazr, per chicwëënan laax.

<sup>12</sup> Dxel rëb ree xbejnman:

—Dad, bal naayëjsix, rën guiëban yayajquix.

<sup>13</sup> Per ni rëb Jesús rën guiëban guial ma güjt Lazr, guiáad ree xbejnman gunaladx reeman rëbaman naga'yëjsizix. <sup>14</sup> Dxel bagojn Jesús laa reeman, rëbaman:



—Ma güjt Lazr. <sup>15</sup> Rabaan por lëjt guial ad guzutan ni din chililadxidi naj. Yan, yo' ree yugnaj reex.

<sup>16</sup> Dxel Tumajs, bén rniee reeman cwajch, rëbaman loj los demazri xbejn Jesús:  
—Yo' ree yunë' reeman, din lod guiëtaman, yayëjtnë' reeman.

### *Jesús naj bén rusban bejn runee tëëman guialnaban*

<sup>17</sup> Chi bidxin Jesús Betania, ma gojc tajp dxej biguie'ch Lazr. <sup>18</sup> Betania guin raya'nan gajxh Jerusalén, zi'ct choon kilometro. <sup>19</sup> Abi' zien ree bén Israel bignaj Mart con Li din yagu' reeman luxdoo reem guial güjt bizan reem. <sup>20</sup> Chi gogbee Mart ma zëëd Jesús gajxh, briim bigchaaglojm laaman, guiáad Li baya'nm lënü. <sup>21</sup> Dxel rëb Mart loj Jesús:

—Dad, bal nizujl guie, ad ziant niëjt da zanan. <sup>22</sup> Per naj ragbee guial ni'qui yan zunee Dios ni guiniabil lojman.

<sup>23</sup> Dxel rëb Jesús:

—Naj rni yaban bizanl.

<sup>24</sup> Badxi'min rëbim:

—Ma qui ragbeen, yabanm dxej yaban gra ree bengüt. Chi guidxin dxej güün xguialguxtis Dios.

<sup>25</sup> Abi' rëb Jesús:

—Naj naj bén rusban ree bengüt rudë tëën guialnaban loj ree bejn. Bén chililadx naj, majsí guiëtaman, per zajpaman guialnaban loj Dios. <sup>26</sup> Guiáad gra bén naban rliladx tëë naj, zajpaman guialnaban loj Dios. ¿Rliladxil ni canin lüj ya?

<sup>27</sup> Dxel rëbim lojman:

—Rliladxanan Dad. Rliladxan lüj naj Cristo, Xi'n Dios, bén naj gui't loj guidxliuj.

### *Biin Jesús ro' xbaa Lazr*

<sup>28</sup> Chi gulox rëb Mart zian, dxel bignee xbëlim Li, rëbim ralan:

—Ma bi't Jesús, abi' caneeman lüj.

<sup>29</sup> Biguiejnzi Li zian, laa bisugajquim bigchaaglojm Jesús. <sup>30</sup> Abi' Jesús gadzaman chu' luguiedx guin, sta za'man lod bigchaagloj Mart laaman. <sup>31</sup> Guiáad ree bén Israel zojbnë Li ragu' reeman luxdoo, chi baguiaa reeman cari da't bisum zëm, binal reeman laam. Gunaladx reeman ro' xbaa Lazr ziguiaanm.

<sup>32</sup> Chi bidxinm lod za' Jesús, bazuxibim lojman rëbim:

—Dad, bal nizujl guie, ad ziant niëjt da zanan.

<sup>33</sup> Chi baguiaaman roon Li con ree bén Israel nal laam, dád gognaa luxdooan guyu naya tëëman. <sup>34</sup> Dxel gunabdiidxaman rëbaman:

—¿Ban biquie'chidi laax?

Abi' rëb reeman:

—Dad, guda nial din guguiaal.

<sup>35</sup> Dxel biinman. <sup>36</sup> Abi' rëb ree bén Israel guin:

—Gol baguiaa nial dád guyënman laax.

<sup>37</sup> Per yu' reeman rëb:

—Bén guinan baxhal guiaaloj tijb bén ad ranit loj. Yan, ¿niche niajc nüjnman ya'n chitëë niëjt Lazr?

### *Basban Jesús Lazr*

<sup>38</sup> Dád guyu naya luxdoo Jesús stijb, chi gubigaman ro' xbaa Lazr. Najn tijb guiajbiliaa, nada'cw tijb guiaj ro'n. <sup>39</sup> Dxel rëbaman:

—Gol biquied guiaj guin.

Per Mart, bizan xingüt guin, rëbim:

—Dad, ma rliaam nadxuudx, din ma gojc tajp dxej ni gütim.

<sup>40</sup> Badxi' Jesúsán rëbaman:

—¿Nid rnin ya, bal rliladxil, guguiaal xguialrniabee Dios?

<sup>41</sup> Dxel bisüd reeman guiaj guin. Zianz gules loj Jesús xanyabaa rëbaman:

—Dad, quixtëe lüj guial ma bacaagdiajguil ni rnin. <sup>42</sup> Naj ragbeechaaw guial zianczi rucaagdiajguil ni rnin. Per rnin zian por ree bën riga' guie, din chililadx reeman guial lüj guxhaal naj.

<sup>43</sup> Chi gulox rëbaman zian, dxel guridxa'man rëbaman:

—¡Lazr, barri yagaj!

<sup>44</sup> Dxel barri Lazr lën baa guin nalüüb vend yaax con guia'x, guiáad lojx nayaaw lajd. Dxel rëb Jesús loj reeman:

—Gol baxhiequix, gol baslaax yaguaiajx.

*Baya'n reeman diidx xhienaag guiniaaz Jesús*

(Mt. 26:1-5; Mr. 14:1-2; Lc. 22:1-2)

<sup>45</sup> Dád zien ree bën binal Li bililadx Jesús, guial baguiaa reeman milagr beenman.

<sup>46</sup> Per yu' reeman bicojn bënfarisew ree ni been Jesús. <sup>47</sup> Dxel bënfarisew ree në ree bixhioz rniabee, bachajg lasa' reeman con los demazri ree guxtis, rëb reeman:

—¿Xhienaag yaguieen ree ya'n, din dád zien milagr cayüjn xin guin? <sup>48</sup> Bal yadëed ree mod, graczi bejn guililadx laax, dxel guxtis Rom ree guidganijt reeman dux yadoo ree në dux nacion ree.

<sup>49</sup> Per loj reeman yu' bën la Caifás, bixhioz zojbloj rniabee loj ijzsi, rëbaman loj reeman:

—¿Nid ragbeedi ya, <sup>50</sup> nid rignia' tëedi ya, zagdxë naj guiët tijbzi bejn por gra bën Israel, luar nit dux nacion ree?

<sup>51</sup> Per Caifás guin ad ni naladxtzaman rëbaman. Guial najman bixhioz zojbloj rniabee loj ijzsi, zeel badëed Dios ni guneeman, guial guiët Jesús por gra ree bën Israel. <sup>52</sup> Abi' ad por laatzi reeman, par gac reeman tijbzi con gra ree xbejn Dios, bën riga' ree guidib guidxliuj. <sup>53</sup> Zeel diizd dxejzii baya'n reeman diidx gugüjt reeman Jesús.

<sup>54</sup> Zianan zeel ad contzi rulüülojtraman loj ree bën Israel, bazaman yagaj ziaman guiedx la Efraín, najn gajxh yujbidx, yagaj guzunë ree xbejnman.

<sup>55</sup> Dxejzii ree ma zidyob pascw, lanij rüjn ree bën Israel, dád zien ree bën guiedx ree zë Jerusalén din güün reeman zi'c naj xcostumbr reeman par gac reeman naya loj Dios chi gad pascw gal. <sup>56</sup> Dxel raguiil reeman Jesús, abi' rniabdiidx loj lasa' reeman lën yadooro' Jerusalén, rëb reeman:

—¿Xhie nadi? ¿Zi'taman lanij ya o ad zi'ttaman?

<sup>57</sup> Bënfarisew ree con ree bixhioz rniabee, gunabee reeman bal chutëez bën ragbee ban za' Jesús, gugojnman din chile' guiniaaz reeman laaman.

## 12

*Baroob Li perfum guia' Jesús*

(Mt. 26:6-13; Mr. 14:3-9)

<sup>1</sup> Za xho'p dxej riaadx gal pascw, chi we Jesús Betania, lod zojb Lazr, xin basbanman.

<sup>2</sup> Ni been reeman tijb guialraw par xche ni gudawnë reeman Jesús. Mart gule'c guialraw guin, guiáad Lazr naj tijb bën gurenë laa reeman xan mex. <sup>3</sup> Dxel cwa' Li cost garol lijtr perfum ni lasajc wayëjx, najcchaawnën ganax nardo, baroobimin guia' Jesús abi' bacwiidxnë guidxguijquimin. Guidibczi lënu guin baree nejxh. <sup>4</sup> Dxel Judas Iscariote, xin naj tijb ree xbejn Jesús, xin bayü laaman, rëbix:

<sup>5</sup> —¿Chexc ad gudo't perfum guin? Zagdxeli nido'n zi'ct rüjn tijb bejn gan tib ijz, din nüjnan yudar bënprob ree.

<sup>6</sup> Ad guial yu'tix xgab bënprob guin ree zeel rëbix zian, rëbix zian guial najx xin gubaan. Abi' guial laax naaz bols yu' milia, rbanx ni rudëe reeman rgu'chaawix. <sup>7</sup> Dxel rëb Jesús lojx:

—Guzujr biinan. Ma badxe'xgajm naj perfum guin par chi guidxin dxej guiguie'chan.

<sup>8</sup> Din bënprob guin ree zianczi za'në reeman lëjt, per naj ad ziantczi gazunë'n lëjt.

*Baya'n reeman diidx gugüjt reeman Lazr*

<sup>9</sup> Bén guixiuj bén Israel gogbee za' Jesús Betania, abi' wej reeman yagaj, ad par guguaatzi reeman Jesús, nè par guguaa reeman Lazr, xin basbanman. <sup>10</sup> Zeel baya'n ree bixhioz rniabee diidx guial nè Lazr gugüjt reeman. <sup>11</sup> Din por laax dád zien ree bejn cayrii loj reeman, abi' caliladx reeman Jesús.

*Bagajpdioz ree bejn Jesús zi'c rey  
(Mt. 21:1-11; Mr. 11:1-11; Lc. 19:28-40)*

<sup>12</sup> Chi bareguiaal, zien da't ree bén zè lanij pascw Jerusalén gogbee guidxin Jesús yagaj, <sup>13</sup> dxel cwa' reeman zijn, brie reeman bigchaagloj reeman laaman, rbidxa' reeman rëb reeman:

—¡Benza'c bendxoon naj Dios! ¡Nüjnle'man Bén guxhaalaman! ¡Nüjnle'man bén naj rey Israel!

<sup>14</sup> Bidxaagloj Jesús tijb burdoo, abi' gudxibaman laab, persi gojc zi'c ca loj xtiidx Dios lod rëb:

<sup>15</sup> Bén Sión, ad rdxebidi.  
Gol baguiaa, laa xreydi zëed,  
dxiibaman tijb burdoo.

<sup>16</sup> Yaløj ad bignia't ree xbejn Jesús ni cayajc. Per chi ma bayë'paman xanyabaa, dxel bignia' reeman guial zian ca loj xtiidx Dios xcwentaman, zeel gojc zian.

<sup>17</sup> Bén guzu ree con Jesús chi guredxaman Lazr din yariix lën baa, basban tëëman laax loj ree bengüt, rusnuu rü reeman diidx loj ree bejn ni baguiaa reeman. <sup>18</sup> Zeel zien ree bejn brie bigchaagloj laaman, guial gogbee reeman milagr beenman. <sup>19</sup> Dxel rëb loj lasa' ree bénfarisew:

—Gol baguiaa nial graczi bejn zinal laax, achetri zajc yaguieen ree.

*Yu' ree bén grieg raguiil Jesús*

<sup>20</sup> Loj gra ree bén we lanij bignajchi' reeman Dios Jerusalén, no'ch bëlzi ree bén grieg, <sup>21</sup> gubig reeman loj Felip, bén za guiedx Betsaida, ni riga' niz Galilea, guzajc reeman liaadx rëb reeman:

—Dad, rayënan yaneenë'n Jesús.

<sup>22</sup> Abi' wej Felip biguiedxaman loj Andrejs, dxel wej grop reeman bicojn reeman Jesús. <sup>23</sup> Badxi' Jesúsán rëbaman:

—Ma bidxin hor par Bén guxhaal Dios, guiëtaman abi' yabanman. <sup>24</sup> Diidxliczi rnin, zi'c tijb xob bal idan chu' luyuj najz najn tijbzi, per bal chu'n luyuj zajcxhiejn. <sup>25</sup> Bén ru mazri xgab naabzi por guialnaban yu' loj guidxliuj guie, yu' dxej gunijtaman laan, per bén ru mazri xgab güünman zi'c rën Dios, xhietëez sacaman, zajpaman guialnaban tiblayaa con laaman. <sup>26</sup> Bal chu rën güün ni rënan guidnalaman naj, lod gazun, nëgajcaman su. Bén güün ni rënan, guiën da Dadan laaman.

*Rugojn Jesús guial guiëtaman*

<sup>27</sup> Rëb tëë Jesús:

—Dád yu'n xgab. ¿Xhie guiën? ¿Zën ya: “Dad, babëë naj loj ni gazaagdiajn”? Per ad zëtan zian, din par zian zialan. <sup>28</sup> Dad, balüü xguialrniabeel.

Dxel biguien cha' bejn xanyabaa rëbaman:

—¡Ma balü da guialrniabeen, per gulünan stijb!

<sup>29</sup> Riguiëjn ree bén riga' yagaj, zeel rëb reeman:

—Guziaawan guridxa'.

Per yu' reeman rëb:

—Tijb anjlan gunee laaman.

<sup>30</sup> Dxel rëb Jesús:

—Ad por najtan biguien cha' bejn, por lëjtan. <sup>31</sup> Ma bidxin dxej gac guialguxtis loj guidxliuj, yan yarii bën rniabee lojn. <sup>32</sup> Per chi guilies reeman naj ya loj guidxliuj guie, dxel gui't graløj bejn lon.

<sup>33</sup> Zian basignia'man xhienaag guiëtaman. <sup>34</sup> Badxi' ree bën guinan rëb reeman:

—Dunujn rayagbee rëb loj ley, Cristo guiban tiblayaa. ¿Chexc zeel nal, rayal guilies reeman Bén zëed xanyabaa? ¿Chunin naj Bén zëed xanyabaa?

<sup>35</sup> Rëb Jesús loj reeman:

—Ad zien dxejtri sunë bajl guie lëjt. Gol guza la'tgaj za'nëdi bajl guie, chitëë guiniaaz guaial lëjt. Din bën rza loj xcay, ad ragbeetaman ban cheman. <sup>36</sup> Gol bililadx bajl guie, la'tgaj za'nëdan, din gaquidi xbejnan.

Chi gulox gunee Jesús zian, dxel baquie'chlojman loj reeman.

### *Ad bililadxt ree bejn Jesús*

<sup>37</sup> Majsii been Jesús zien da't milagr baguiaa reeman, ad bililadxt reeman. <sup>38</sup> Zian gojc cumplid ni bacaa Isaías bën badëë xtiidx Dios loj ree bejn, rëban:

Dad, ¿chu ma bililadx rusion radëëdan?

¿Chu loj ma balüü Dios xguialrniabeeman?

<sup>39</sup> Zianan zeel ad gojct nililadx reeman, din në ze bacaa Isaías:

<sup>40</sup> Dios basiaaw guaialoj reeman,

bascajy tëëman xquiarguejñ reeman,

chitëë guguaa reeman chignia' tëë reeman,

chitëë yadxi' loj reeman lon, abi' ad zayüntan laa reeman.

<sup>41</sup> Rëb Isaías zian guial baguiaaman xbiani Jesús, zeel baza'taman laaman.

<sup>42</sup> Per ni'czi zian, dád zien ree bën zøjbloj bililadx Jesús. Per ad rëbt reeman loj ree bejn zian, guial rdxeb reeman yabëë ree bënfarisew laa reeman lod ricaagdiajg reeman xtiidx Dios, <sup>43</sup> din mazri rën reeman guiën ree bejn laa reeman, guial guiën Dios laa reeman.

### *Rniee Jesús zi'c rniabee xDadaman*

<sup>44</sup> Gunee Jesús rejs rëbaman:

—Bën rliladx naj, ad najtzan rliladxaman, në da Dadan bën guxhaal naj. <sup>45</sup> Bén ruguaa naj, në bën guxhaal naj ruguaaman. <sup>46</sup> Naj naj bajl, bialan loj guidxliuj guie, chitëë yaya'n ree bën rliladx naj loj xcay. <sup>47</sup> Bal chu guien da diidxan abi' ad zuzoobtaman laan, ad najt gudëd laaman casti, din ad bialtan din gudëdan casti, bialan din yabën laa reeman loj dol. <sup>48</sup> Bén ad rënt naj ad rucaagdiajg tëëtaman da diidxan, mal yu' ni gudëed laaman casti: diidx ni rën, laan gudëed laaman casti chi guidxin dxej.

<sup>49</sup> Din ad ni rbëguictan rnien. Da Dadan, Bén guxhaal naj rniabee ni ganen ni gulü tëën,

<sup>50</sup> zeel ragbeen, ni rniabee da Dadan runee guialnaban tiblayaa. Zianan zeel ni rnin rulünan zi'c rniabeeman.

## 13

### *Gudiib Jesús guia' ree xbejñman*

<sup>1</sup> Guixiezi gal lanij pascw. Ma ragbee Jesús guial ma bidxin hor gusa'nman guidxliuj guie din yaguaaj loj xDadaman. Zianczi guyën ree xbejñman, bën riga' ree loj guidxliuj, rënman laa reeman goctëëz. <sup>2-4</sup> Chi gad reeman gaw xche, mal badxe' xindxab ni mal luxdoo Judas, xi'n Simón Iscariote, ma rüjnx xgab yayüx Jesús loj ree bën gugüjt laaman. Ragbee Jesús guial badëed xDadaman gra guialrniabee lojman, laa tëëman guxhaal laaman, zeel yaguaajman lod za'man. La'tgaj cayaw reeman, bisuman xan mex, gulëëman tijb lajd najcwaman luya, dxel cwa'man tijb tuay guxhii xizaman. <sup>5</sup> Abi' badxe'man nijs loj tijb xijg, guzulojman caguiibaman guia' ree xbejñman, cucwiidx tëëman laan con tuay naxii xizaman. <sup>6</sup> Chi bayal quiibaman guia' Simón, bën rniee reeman Bëd, rëbaman loj Jesús:

—Dad, ¿luj quiib guia'n ya?

<sup>7</sup> Badxi'man laan rëbaman:

—Ad rignia'til ni cayünan yan, per qui chignia'rilan.

<sup>8</sup> Zeel rëb Bëd lojman:

—Ad zatiëëbtan quiibil guia'n.

Abi' rëb Jesús:

—Bal id zaguiiban guia'l, ad zile'tri gaquil da bejnan.

<sup>9</sup> Zeel rëb Bëd lojman:

—Dad, ad bal guia'zan quiibil, gudiib në yan con guican.

<sup>10</sup> Badxi'man laan rëbaman:

Bén goznejz guia'zaman riaadx chëd, din guidibaman naya. Abi' lëjt ma nayadi, majsi ad gratidi.

<sup>11</sup> Ma ragbeeman chu yayü laaman, zeel rëbaman: “Ad gratidi naya.”

<sup>12</sup> Chi gulox gudiibaman guia' reeman, bayajcw xabaman, gurejman xan mex guin zatijb, dxel rëbaman:

—¿Bignia'di ni benan ya? <sup>13</sup> Rnieedi naj Mextr në Dad, waliquidi najn. <sup>14</sup> Bal najn Mextr në Dad, gudiiban guia'di, ziangajc quiib guia' lasa'di. <sup>15</sup> Ma balün lëjt, din güündi zi'c benan. <sup>16</sup> Diidxliczi ganin, achut mojs naj mazri guial loj Bén rniabee laaman, achut Bén ri't naj mazri guial loj Bén rxhiaal laaman. <sup>17</sup> Bal rignia'di nine güün tëëdan, yabaanë Dios lëjt.

<sup>18</sup> Ad gratidi ruzatan ragbeen chu reenin gulen. Per rayal gac cumplid ni ca loj xtiidx Dios, rëban: “Bén rawnë'n tijbzi, bayejcaman contr naj.” <sup>19</sup> Ma rugojnan lëjt din gagbeedi chi gac zian, din chililadxidi chu najn. <sup>20</sup> Diidxliczi ganin, Bén rucaagdiajg ni rëb Bén rxhialan, najn rucaagdiajgaman, guiáad Bén rucaagdiajg da diidxan, xtiidx Bén guxhaal najn rucaagdiajgaman.

### *Bagojn Jesús chu yayü laaman*

*(Mt. 26:20-25; Mr. 14:17-21; Lc. 22:21-23)*

<sup>21</sup> Chi gulox gunee Jesús zian, dád guyunayaman, dxel rëbaman loj reeman zagdx:

—Diidxliczi ganin, tijb lëjt yayü naj loj ree Bén gugüjt naj.

<sup>22</sup> Dxel guzuloj ree xbejnman ruguiaa loj lasa' reeman, ni'quid ragbeet reeman chunin ruza'taman. <sup>23</sup> Tijb Bén guyën da'taman zojb cwë'man, hor zii chi cayaw reeman xche, <sup>24</sup> dxel been Bëd sen lojman din guiniabdiidxaman chunin ruza't Jesús. <sup>25</sup> Zeel mazri gubigaman cwë' Jesús gunabdiidxaman, rëbaman:

—Dad, ¿chunin?

<sup>26</sup> Badxi' Jesús rëbaman:

—Gugajdxan ta'n guiadxtil, din loj xin gudëdanan, laaxan yayü naj.

Dxel bagajdxaman ta'n guiadxtil badëëman laan loj Judas, xi'n Simón Iscariote. <sup>27</sup> Chi gudawixan, laa guyu gajc xindxab luxdoox. Zeel rëb Jesús lojx:

—Ni güünl, cari beenan.

<sup>28</sup> Per achutzzi ree Bén zojb xan mex guin bignia' chexc zeel rëbaman zian. <sup>29</sup> Guial ca' Judas bols ni yu' milia, zeel naladx garol reeman rëb Jesús lojx din chisiix ni gaw reeman lanij guin o gudëëdix ta'n nan loj ree Bén rzagdiaj ya. <sup>30</sup> Chi ma gudawix guiadxtil guin, dxel briix, ma guxhin.

### *Gunabee Jesús tijb nicüb*

<sup>31</sup> Chi ma brii Judas, rëb Jesús loj ree xbejnman:

—Yan guien xguialrniabee Bén guxhaal Dios din gagbee ree bejn xhienaag naj guialrniabee gudëë Dios lojman. <sup>32</sup> Din bal gulüü Bén guxhaal Dios xguialrniabee Dios, ziangajc gulüü Dios xguialrniabeeman, zeel ma gudëëdaman laan. <sup>33</sup> Xi'n, ad zien dxejtri gazunë'n lëjt, yaguilidi naj, per zi'cgajc rën loj ree bejn, ziangajc ganin lojdi yan: Ad

zajct chedi lod gan. <sup>34</sup> Ganin tijb nicüb ganabeen: Gol guyën lasa'di zi'c rënan lëjt. <sup>35</sup> Bal guiën lasa'di, zian gagbee gra bejn guial najdi da bejnan.

*Guiëb Bëd ad nünbeetaman Jesús*

(Mt. 26:31-35; Mr. 14:27-31; Lc. 22:31-34)

<sup>36</sup> Gunabdiidx Bëd loj Jesús rëbaman:

—Dad, ¿ban chel?

Zeel rëb Jesús:

—Ad zajct guidnalil naj lod gan yan, per zadxin dxej guidnalil naj.

<sup>37</sup> Zeel rëb Bëd:

—Dad, ¿chexc zeel ad zajct guidnaalan lüj yan? Xt zajc guiëtan por lüj.

<sup>38</sup> Badxi' Jesúsán rëbaman:

—¿Walil ya rënl guiëtil por naj? Diidxliczi ganin, chi gad guïd cwidxa', mal rëbil choon volt, ad nünbeetil naj.

## 14

*Jesús naj nejz guidxinnë bejn loj Dios*

<sup>1</sup> Rëb tëë Jesús:

—Ad rudi xgab. Gol bililadx Dios, gol bililadx tëë naj. <sup>2</sup> Lidx da Dadan dád zien luar lod guiban bejn yu'. Bal iche yu', ad ziant ganin lojdi, chiguienchaawan xluaridi. <sup>3</sup> Chi ma benchaawan luar guin, dxel yaguialan guidgaxin lëjt din sudi lod gazun. <sup>4</sup> Ma nünbeedi nejz zë lod gan.

<sup>5</sup> Zeel rëb Tumajs lojman:

—Dad, ad rayagbeetan ban chel, ¿xhienaag yaguieenbeen nejz guin?

<sup>6</sup> Badxi'man laan rëbaman:

—Naj naj nejz, najn diidxli, naj tëën guialnaban. Tijbzi naj zajc chinë' bejn ree loj da Dadan. <sup>7</sup> Bal nünbeedi naj, në da Dadan güünbeedi. Per ma nünbeedi laaman diizd yan, din ma baguiaadi laaman.

<sup>8</sup> Dxel rëb Felip:

—Dad, banee mod majsi yaguiaazan bën naj xDadil.

<sup>9</sup> Badxi'man laan rëbaman:

—Felip, ma gojc xchej za'në'n lëjt. ¿Nid wayünbeel naj ya? Din bën ruguiaa naj, da Dadanan ruguiaaman. ¿Chexc zeel nal gunen mod guguiaal da Dadan? <sup>10</sup> ¿Nid rliladxil ya, naj za'në' da Dadan, guiáad laaman za'në naj? Ni rnin lojdi, ad rbëguictanan. Da Dadan, bën nabannë'n, laaman rüjn dxiin guin. <sup>11</sup> Gol bililadx naj za'në' da Dadan, guiáad laaman za'në naj. Balgui majsi ni rünzan gol bililadx. <sup>12</sup> Diidxliczi ganin: Bén rliladx naj, nëgajcaman güün ni rünan, güünman ni mazri narooob, din naj yaya' lod za' da Dadan. <sup>13</sup> Graczi ni guiniabidi lojman por naj, günanan din gulün xguialrniabeeman.

<sup>14</sup> Günan xhietëez ni guiniabidi.

*Guixhiaal Jesús xSprijtaman*

<sup>15</sup> 'Bal rëndi naj, gucaagdiajguidi ni balün. <sup>16</sup> Din guië loj da Dadan guixhiaalaman Sprijt sunë lëjt, <sup>17</sup> Sprijt gulüü diidxli, din zianczi sunëman lëjt. Bén ad rliladxt ree Dios ad zajct tia' reeman Sprijt guin, din ad ruguiaat reeman ad nünbee tëët reeman laaman. Per lëjt nünbee laaman, din sunëman lëjt yaya'n tëëman luxdoodi tiblyaa. <sup>18</sup> Ad zusa'ntan xtijbidi, yaguialan stijb guidganan lëjt. <sup>19</sup> Sta'nz riaadx ad zuguiaatri ree bénguidxliuj naj, per lëjt guguiaadi naj, guibandi din naban. <sup>20</sup> Dxej zii ree, gagbeedi za'në' da Dadan, lëjt za'në naj, guiáad naj za'në'n lëjt zianczi. <sup>21</sup> Bén rucaagdiajg ni rniabeen rüjn tëëman laan, walicaman rënman naj. Guiën da Dadan bën rën naj, në naj guiën laaman din güünbeeman naj.

<sup>22</sup> Gunabdiidx Judas (ad bën bayüt Jesús) rëbaman:

—Dad, ¿chexc zeel dunujzan yayagbee chu lüj, guiáad ree bénguidxliuj ad zagbeet reeman?

<sup>23</sup> Badxi' Jesúsán rëbaman:

—Bén guiën naj guzoobaman da diidxan, guiën da Dadan laaman, guiáad naj guidnë' da Dadan din yabajnnë'n laaman. <sup>24</sup> Bén ad zënt naj ad zuzoobtaman da diidxan, din diidx cucaagdiajguidi yan ad da diidxtanan, xtiidx da Dadanan bén guxhaal naj.

<sup>25</sup> 'Canin lojdi gra nine, la'tgaj za'në'n lëjt. <sup>26</sup> Per xSprijt Dios, bén sunë lëjt zianczi, bén guixhiaal da Dadan por naj, graczi gulüüman lëjt din gusaaladxidi ni canin.

<sup>27</sup> 'Chi yaya'n, yabecdxen luxdoodi, gunen guialnaza'c lojdi, ad zi'c runeet ree bénguidxliujn, ad bal ru nayadi ad rdxeb tëedi. <sup>28</sup> Ma rnin lojdi, yaya'n, dxel yagualan zatijb. Bal walidi rëndi naj, chu' luxdoodi zagdxë, guial gagbeedi yaya' loj da Dadan, din mazri zobjlojman guial lon. <sup>29</sup> Ma rugojnan lëjt, din chi gac zian, chililadxidi.

<sup>30</sup> 'Ad zro'tri ganenë'n lëjt, din ma zëed xin rniabee guidxliuj, majsi ad nët naj rniabeex. <sup>31</sup> Per zian gac din gagbee ree bénguidxliuj, rënan da Dadan, zeel rünan ni rniabeeman. Gol bisu, yo' ree yan.

## 15

### *Rën Jesús yadxu'në' reeman zianczi*

<sup>1</sup> Basnuu rëb Jesús:

—Naj naj zi'c yag rtia ni nejxh zagdxë, guiáad da Dadan naj zi'c bén rxübin laan. <sup>2</sup> Da bejn reen naj zi'c ree xidx yag guin. Bal id rtia reen gutüüg da Dadan laa reen. Per bal rtia reen, gusiaman laa reen din tia reen mazri. <sup>3</sup> Lëjt ma nayadi, guial basia diidx rnin lëjt. <sup>4</sup> Gol gubajnnë naj zi'c nabannë'n lëjt. Ad zajct tia xidx yag, bal id najnën yag guin tijbzi. Ziangajc lëjt ad zajct güüнди ni rën Dios bal id za'nëdi naj.

<sup>5</sup> 'Naj naj zi'c yag rtia ni nejxh, guiáad lëjt naj zi'c xidxan. Bén sunë naj zianczi nuchajgaman naj, guiáad naj nuchagan laaman, zeel rüjnman ni rën Dios. Din bal ichu naj, achet zajc güüнди. <sup>6</sup> Bén ad zazujnët naj guizëëbaman zi'c yagbidx ruto'p reeman, din che'can.

Rëb tëë Jesús:

<sup>7</sup> —Bal za'nëdi naj tijbzi ruzoob tëedi da diidxan, gol gunab ni rëntzidi, din tia'dan. <sup>8</sup> Bal güüнди ni rën da Dadan, gaquidi quijb da bejnan, din guza't ree bejn laaman zagdxë. <sup>9</sup> Rënan lëjt zi'c rën da Dadan naj, gol basaaladx rënan lëjt. <sup>10</sup> Bal guzoobidi da diidxan, gusaaladxidi rënan lëjt, zi'cgajc ruzoban xtiidx da Dadan, ragbeen rënman naj.

<sup>11</sup> 'Rnin lojdi zian din chu' luxdoodi zagdxë zi'c yu' luxdon zagdxë, zagdxë da't chu' luxdoodi. <sup>12</sup> Gol guyën lasa'di zi'c rënan lëjt, laan rniabeen güüнди. <sup>13</sup> Achut rën xmiw mazri guial loj bén rëjt por laa reeman. <sup>14</sup> Lëjt naj da miwan bal güüнди ni rënan. <sup>15</sup> Ad zanetran lëjt mojs, din mojs ad ragbeetaman xhie rüjn bén rniabee laaman. Ganen lëjt miw, din balün lëjt graczi ni na da Dadan lon. <sup>16</sup> Ad lëjtt gule naj, naj gule lëjt. Zeel rnin lojdi, chedi chiglüüdi bejn ree ni rën da Dadan, din gusnuu güün reeman ni rënman, din guneeman graczi ni guiniabidi por naj. <sup>17</sup> Rniabeen: Guiën lasa'di.

### *Ralen ree bejn Jesús con ree xbejnman*

<sup>18</sup> Rëb tëë Jesús:

—Bal ralen ree bénguidxliuj lëjt, gol basaaladx, yaloj naj balen reeman. <sup>19</sup> Bal niajquidi bénguidxliuj, niën reeman lëjt zi'c rën lasa' reeman. Per naj gule lëjt loj reeman, zeel ralen reeman guial ad najtidi bénguidxliuj. <sup>20</sup> Gol basaaladx ni rnin: “Achut mojs naj mazri guial loj bén rniabee laaman.” Bal basagzi reeman naj, ziangajc gusagzi reeman lëjt, bal bazoob reeman da diidxan, ziangajc guzoob reeman xtiidxidi. <sup>21</sup> Graczi nine güünnë reeman lëjt por naj, din ad nünbeet reeman bén guxhaal naj.

<sup>22</sup> 'Achet xtol reeman niu, bal idan nial ninienë'n laa reeman, per yan yu' xtol reeman. <sup>23</sup> Bén ralen naj, nêgajc da Dadan ralenman. <sup>24</sup> Achet xtol reeman niu, bal idan nün ree ni benan loj reeman ni achutczi wayüjn, per ma baguiaa reeman laa reen, majsi zian ralen gajc reeman naj nê da Dadan. <sup>25</sup> Per rajc zian din gac cumplid ni ca loj xley reeman, rëban: "Achet rünan ralen reeman naj."

<sup>26</sup> 'Per chi gui't Sprijt gaxhalan din sunëman lëjt gulüü tēëman diidxli, Sprijt zëëd loj da Dadan, laaman gü da diidxan. <sup>27</sup> Nêgajc lëjt gü laan, din diidz yaloj za'nëdi naj.

## 16

<sup>1</sup> 'Rnin zian, din ad zabëjzt chililadxidi naj. <sup>2</sup> Yabëë reeman lëjt lod ricaagdiajg reeman xtiidx Dios, zadxin dxej, chutëëz bén gugüjt lëjt naladx reeman Dios cayüjn reeman wen. <sup>3</sup> Güün reeman zian din ad nünbeet reeman naj ni'qui da Dadan. <sup>4</sup> Per ma rnin lëjt, din chi guidxin dxej guin gusaaladxidi guial ma bagojnan lëjt.

### *Ni rüjn xSprijt Dios*

'Ad rnitán lojdi zian diidz yaloj, din naj guzunë' lëjt. <sup>5</sup> Per yan yaya'n loj bén guxhaal naj. Achutczidi rniabdiidx ban gan, <sup>6</sup> aal yu'nayadi guial canin zian. <sup>7</sup> Per diidxliczi rnin: zagdxe najn yaya'n. Din bal idan yaya', ad zi'tt xSprijt Dios sunë lëjt, per bal yaya'n, naj gaxhal laaman. <sup>8</sup> Chi gui'taman, laaman gulüü ree bénguidxliuj ni naj dol, ni naj ni zagdxe, nê xguialguxtis Dios. <sup>9</sup> Gagbee reeman yu' xtol reeman, guial ad rliladxt reeman naj. <sup>10</sup> Ni zagdxe guin naj guial yaya' loj da Dadan din ad zuguaatrídi naj. <sup>11</sup> Guiáad Dios ma been xguialguxtisaman con xindxab rniabee guidxliuj.

<sup>12</sup> 'Yu'ri ni rënan ganin, per dád zien gacan par lëjt. <sup>13</sup> Chi gui't Sprijt gulüü lëjt diidxli, din ad züt xtiidx gajcamán, guinieeman graczi ni guienman, laaman gulüü lëjt ni gac. <sup>14</sup> Guza'taman naj zagdxe, din naj gudëd ni gulüüman lëjt. <sup>15</sup> Graczi ni rajp da Dadan naj par naj, zeel rnin, Sprijt guin tia' ni gudëdan din gulüüman laan lëjt.

### *Guguaa ree xbejn Jesús laaman zatijb*

<sup>16</sup> 'Ma guidxin dxej ad zuguaatrídi naj, per ad zajct xchej, guguaadi naj stijb.

<sup>17</sup> Chi rëb Jesús zian, dxel guzuloj ree xbejnman canabdiidx loj lasa' reeman, rëb reeman:

—¿Chexc zeel naman, ma guidxin dxej ad zuguaatri reeman, per ad zajct xchej, yaguaa reeman stijb, din yaguaaj loj xDadaman? <sup>18</sup> ¿Chexc zeel naman: "Ad zajct xchej"? Ad rayignia't ree ni caneeman.

<sup>19</sup> Gogbee Jesús guial rën reeman guiniabdiidx reeman, zeel rëbaman:

—Ma rnin lojdi, ma guidxin dxej ad zuguaatrídi naj, per ad zajct xchej, guguaadi naj stijb. ¿Ni nen canabdiidxidi ya? <sup>20</sup> Diidxli ganin, goondi chu' tēë luxdoodi naya, guiáad ree bénguidxliuj yabaa reeman. Per majsi chu' luxdoodi naya, guidxin dxej yabaadi. <sup>21</sup> Chi gal xi'n béngunaa, rdëdaman tarbajw, din ma bidxin hor guin. Per chi ma gojl xi'nman, dxel rayanladxaman tarbajw guin, ru luxdoodi zagdxe, guial ma gojl xi'nman. <sup>22</sup> Ziangajc lëjt cadëdidi tarbajw yan, per chi guguan lëjt zatijb, chu' luxdoodi zagdxe, achutczi zajc yabëë laan luxdoodi.

<sup>23</sup> 'Dxel achetri guiniabdiidxidi lon. Diidxliczi ganin, graczi ni guiniabidi loj da Dadan por naj, guneeman. <sup>24</sup> Guiáad yan achet wanabidi por naj, gol gunaban din tia'dan, din chu' luxdoodi zagdxe tiblayaa.

### *Yaguaaj Jesús lod guzaman*

<sup>25</sup> Rëb tēë Jesús:

—Rnin nine ree zi'c cwent, per zadxin dxej ad zulütran zian, gusignia'n lëjt zagdxe xcwent da Dadan. <sup>26</sup> Dxej zii ree guiniabidi loj da Dadan por naj, ad rüjnt naguiejn ganaaban por lëjt lojman, <sup>27</sup> din rënman lëjt, rënman lëjt guial rëndi naj rliladx tēëdi



guial laaman guxhaal naj. <sup>28</sup> Briin lod za' da Dadan persi bialan loj guidxliuj guie, yan gusa'n nan laan din yaya'n lojman.

<sup>29</sup> Dxel rëb ree xbejnman:

—Yanri ma cusignia'l zagdxe. <sup>30</sup> Rayagbeen rajquil graczi, ad rüjnt naguiejn chu guiniabdiidx lojl. Zianan zeel raliduladxan guxhaal Dios lüj.

<sup>31</sup> Badxi' Jesús laan rëbaman:

—¿Ma riladxidi yan ya? <sup>32</sup> Gol gogbee, ma bidxin hor yare'chidi, tijb gajdi yaguiaj lidx, gusa'ndi da xtijban. Per ad za't da xtijban, da Dadan za'në naj. <sup>33</sup> Rnin gra nine din cwedi zagdxe guial nuchajguidi naj. Loj guidxliuj sagdiajdi, per ad guidxebidi, din ma benan gan loj guidxliuj.

## 17

### *Gurejdx gunab Jesús xDadaman por ree xbejnman*

<sup>1</sup> Chi gulox rëb Jesús zian loj ree xbejnman, dxel baguiaaman xanyabaa rëbaman:

—Dad, ma bidxin hor, balüü da guialrniabeen din gulün xguialrniabeel. <sup>2</sup> Baneel guialrniabee lon din ganabeen gra bejn gudëd tëen guialnaban tiblayaa loj gra bën baneel. <sup>3</sup> Guiban reeman tiblayaa bal güünbee reeman lüj, tijbzi lüj naj quijb Dios, güünbee tëe reeman najn guxhaalil.

<sup>4</sup> 'Naj bazat lüj zagdxe loj guidxliuj; yan ma gulox benan ni nal. <sup>5</sup> Yan, Dad, yaguialan lojl, din yaneel guialrniabee ca'n gocli, diizd chi gad guidxliuj gacchaaw.

<sup>6</sup> Rëb tëe Jesús:

—Bën gulel loj guidxliuj baneel lon, ma balün laa reeman chu lüj. Gojc reeman xbejnl, per baneel laa reeman lon, ma bazoob reeman xtiidxil. <sup>7</sup> Yan ma gogbee reeman guial gra ni benan gra tëe ni balün naj xieenl. <sup>8</sup> Gunen xtiidxil ni baneel, zeel bacaagdiajg reeman laan, gogbee reeman, walican lojl guzaan, bililadx tëe reeman lüj guxhaal naj.

<sup>9</sup> 'Rbedx rniaaban lüj por laa reeman, guial naj reeman xbejnl baneel tëel laa reeman lon, ad rbedx rniaabtan por ree bénguidxliuj. <sup>10</sup> Gra ni ca'n naj xieenl, guiáad gra ni ca'l naj da xieenan, ma rguien da guialrniabeen por ree bën baneel.

<sup>11</sup> 'Ad zazutran loj guidxliuj, per laa reeman suri reeman guie, guiáad naj yazaan din yaguialan lod za'l. Dad, lüj naj bën naya nali, gunaj reeman con gra guialrniabee ca'l ni baneel tëel lon, din gac reeman tijbzi zi'c nayajc. <sup>12</sup> Chi guzunë'n laa reeman loj guidxliuj, gunan laa reeman con xguialrniabeel ni baneel. Achut reeman bizëeb, tijbzi xin ma naj diidx bizëeb, din gac cumplid ni ca loj xtiidxil.

<sup>13</sup> 'Yan yaguialan lod za'l, per canen zian la'tgaj za'n loj guidxliuj guie, din chu' luxdoo reeman zagdxe, zi'c yu' luxdon zagdxe. <sup>14</sup> Ma balün laa reeman xtiidxil, zeel ralen ree bénguidxliuj laa reeman guial ad najt reeman bénguidxliuj, zi'cgajc ad najtan bénguidxliuj. <sup>15</sup> Ad rniaabtan yabëel laa reeman loj guidxliuj, rënan guinial laa reeman, chitëe güün reeman ni mal. <sup>16</sup> Ad najt reeman bénguidxliuj, zi'cgajc naj. <sup>17</sup> Basia reeman con xtiidxil, din laan naj ni diidxli. <sup>18</sup> Zi'c guxhaalil naj loj ree bénguidxliuj, ziangajc rixhial ree da bejnan loj reeman. <sup>19</sup> Por laa reeman rudëd da guialnabanan din gac reeman xbejnl diidxliczi.

<sup>20</sup> Basnuu Jesús, rëbaman:

—Ad por laatzi reeman rbedx rniaaban lüj, në por ree bën chililadx chi gucaagdiajg reeman ni guinee reeman. <sup>21</sup> Rniaaban lojl din guchajg lasa' reeman din yayajcnë' reeman tijbzi, Dad, zi'c za'në' naj ziangajc za'në'n lüj, ziangajc sunë lasa' reeman. Din chililadx ree bejn lüj guxhaal naj. <sup>22</sup> Badëdan guialrniabee baneel loj reeman, din gac reeman tijbzi zi'c nayajc, <sup>23</sup> naj za'në' laa reeman, guiáad lüj za'në' naj. Zeel gac reeman tijbzi din gagbee ree bejn, lüj guxhaal naj rën tëel laa reeman zi'c rën' naj.

<sup>24</sup> 'Dad, lüj baneel laa reeman lon, zeel rënan su reeman lod gazun din guguaa reeman biani baneel lon, din guyën' naj diizd chi gad guidxliuj gacchaaw. <sup>25</sup> Dad, lüj rüjn

guialguxtis zagdxe. Ad nünbeet ree bénguidxliuj lüj, sa'n naj nünbeen lüj, në ree da bejnan ragbee lüj guxhaal naj. <sup>26</sup> Balün laa reeman chu najl, gulüran laa reeman mazri, din gagbee reeman rēnl laa reeman zi'c rēnl naj, gazunē' tēen laa reeman.

## 18

### *Bayü Judas Jesús*

(Mt. 26:47-56; Mr. 14:43-50; Lc. 22:47-53)

<sup>1</sup> Chi gulox gunee Jesús zian, dxel briinē ree xbejnman, zē reeman stiblad ro' guiiw la Cedrón, bidxin reeman lod yu' ree yag. <sup>2</sup> Nē Judas, xin yayü laaman, nünbee yagaj, guial zien volt binēman laa reeman ni. <sup>3</sup> Zeel bidxinnēx tibcwaa ree suldad në ree bēn rajp ro' yadoo, guxhaal quijb ree bixhioz laa reeman në ree bēnfarisew, ca' reeman bajl rusni ree, në ree espad con ree lans. <sup>4</sup> Per ma ragbee Jesús gra ni gac, briiman gunabdiidxaman loj reeman, rēbaman:

—¿Chu raguilidi?

<sup>5</sup> Badxi' reeman laan rēb reeman:

—Jesús bēn Nazaret.

Abi' rēbaman loj reeman:

—Najn.

Judas xin bayü laaman bidxinnē laa reeman. <sup>6</sup> Chi rēbaman loj reeman: “Najn”, dxel baguiadruxan reeman biajb reeman luyuj. <sup>7</sup> Gunabdiidxaman zatijb rēbaman:

—¿Chu raguilidi?

Rēb reeman:

—Jesús bēn Nazaret.

<sup>8</sup> Zeel rēbaman:

—Ma rnin, najn. Bal naj raguilidi, gol baslaa ree bēn guie yaguiaj reeman.

<sup>9</sup> Zian gojc cumplid ni rēb loj xDadaman: “Achut ree bēn baneel lon bizēeb.” <sup>10</sup> Dxel gulēē Bēd espad, gutü'man guidiajg ladbee xin la Malco, najx xmojs quijb bixhioz zojbloj. <sup>11</sup> Dxel rēb Jesús loj Bēd:

—Bagu'chaaw espad zii. Bal rēn da Dadan gazaagdiajn zian, gaza'canan.

### *Biniaaz Jesús*

(Mt. 26:57-58; Mr. 14:53-54; Lc. 22:54)

<sup>12</sup> Suldad guin ree con xin rniabee laa reex con ree bēn rajp ro' yadoo gunaaz reeman Jesús, guxhii reeman laaman. <sup>13</sup> Dxel binē reeman laaman yaloj lidx bēn la Anás, din laaman naj xdadsuegr Caifás quijb bixhioz zojbloj loj ijz zii. <sup>14</sup> Laagajcaman rēb loj gabilt, mazri zagdxe guiēt tijbzi bejn por gra ree bēn Israel.

### *Rēb Bēd ad najtaman xbejn Jesús*

(Mt. 26:69-70; Mr. 14:66-68; Lc. 22:55-57)

<sup>15</sup> Tio'p ree xbejn Jesús binal laaman. Tijbaman la Simón, bēn rniee reeman Bēd, stijbaman naj bēn nünbee quijb bixhioz zojbloj, zeel gyunēman Jesús lēnü guin, <sup>16</sup> guiáad Bēd baya'nman lule'. Zeel barii bēn nünbee bēn rniabee ree bixhioz, guneenēman biin rajp ro' port guin, persi guyu Bēd lēnü. <sup>17</sup> Gunabdiidxim lojman rēbim:

—¿Nid lüjn naj tijb xbejn bēn guin ya?

Badxi'man laan rēbaman:

—Ad najtan.

<sup>18</sup> Per guial dád nayaag, zeel bēn naj ree mojs con ree bēn rajp ro' yadoo nabe'c reeman guij rucha' reeman. Nēgajc Bēd cucha'nē reeman rudēj guin.

### *Gunabdiidx Anás loj Jesús*

(Mt. 26:59-66; Mr. 14:55-64; Lc. 22:66-71)

<sup>19</sup> Guzuloj b́en la Anás canabdiidxaman loj Jesús xcwent ree xbejnman nē xcwent ni rulüüman. <sup>20</sup> Zeel rēb Jesús:

—Gunen loj gra ree bejn. Zianczi balün lod rucaagdiajg ree xtiidx Dios nē lēn dux yadooro' ree, lod rado'p dugra ree. Achet ni gunen ralan. <sup>21</sup> ¿Chexc zeel rniabdiidxil lon? Gunabdiidx loj ree b́en bacaagdiajg ni rēn, laa reeman na xhie gunen, laa reeman ragbee.

<sup>22</sup> Chi rēbaman zian, tijb b́en rajp ro' yadoo guin wēēz ro'man, rēbaman:

—¿Zian yadxi'l xtiidx b́en rniabee guin ya?

<sup>23</sup> Badxi' Jesús laan rēbaman:

—Bal xhie ni mal rēn, guna xhienin. Per bal gunen zagdxē, ¿chexc zeel rguinl naj?

<sup>24</sup> Dxel guidib naxiiman guxhaal Anás laaman loj Caifás, b́en naj quijb bixhioz zojbloj.

*Rēb Bēd stijb ad nünbeetaman Jesús*

(Mt. 26:71-75; Mr. 14:69-72; Lc. 22:58-62)

<sup>25</sup> Per Bēd sta za'man cucha'man rudēj guin. Abi' gunabdiidx reeman lojman, rēb reeman:

—¿Nid nē lūj naj tijb ree xbejn b́en guin ya?

Badxi' Bēd laan rēbaman:

—A'n, ad xbejntaman naj.

<sup>26</sup> Dxel tijb xmojs bixhioz zojbloj guin, b́en naj lasa' b́en gutü' Bēd guidiajg, rēbaman loj Bēd:

—¿Nid lūjn baguian ya za'nēl laaman guia' ree yag olivos?

<sup>27</sup> Rēb Bēd stijb guial ad nünbeetaman Jesús, loj hor zii gajc guridxa' tijb guid.

*Binē reeman Jesús loj Pilato*

(Mt. 27:1-2, 11-14; Mr. 15:1-5; Lc. 23:1-5)

<sup>28</sup> Chi bani luyuj, bazanē reeman Jesús lidx Caifás, zinē reeman laaman lēn xpalas gobernador Pilato. Per ree b́en Israel guin ad guyut reeman lēn palas guin, din par laa reeman bal niu reeman, ad nayatri reeman loj Dios, abi' ad nile't niajw reeman xche guialraw ni raw reeman pascw. <sup>29</sup> Zeel brii Pilato persi guneenēman laa reeman, rēbaman:

—¿Xhie been xin guie zeel zidnēdi laax guie?

<sup>30</sup> Badxi' reeman laan rēb reeman:

—Bal najman benza'c, ad ziant nudnē'n laaman lojl.

<sup>31</sup> Dxel rēb Pilato:

—Gol bignēx, gol been guialguxtis zi'c naj xleydi.

Abi' rēb reeman:

—Per ad naca'tan guialrniabee yanabeen guiēt bejn.

<sup>32</sup> Zian gojc cumplid xtiidx Jesús chi bagojnman xhienaag guiētaman. <sup>33</sup> Bayu Pilato lēn palas guin, dxel gurejdxaman Jesús, gunabdiidxaman lojman rēbaman:

—¿Lūj naj xrey ree b́en Israel ya?

<sup>34</sup> Badxi' Jesús rēbaman:

—¿Lūjczi rniabdiidx lon ya o yu' ree ben ren na lojl zian?

<sup>35</sup> Badxi' Pilato laan, rēbaman:

—¿Wen b́en Israel naj ya? B́en ladx gajc reel con ree bixhioz rniabee bidnē lūj lon. ¿Xhie beenl?

<sup>36</sup> Badxi' Jesús rēbaman:

—Guialrniabee ni ra'pan ad lojt guidxliuj zan, din bal loj guidxliuj zan, nia'pan b́en nidijl ree chitēē niniaaz ree ben Israel naj. Per yan ad lojt guidxliuj guie za da guialrniabeen.

<sup>37</sup> Dxel rēb Pilato lojman:

—¿Zē loj diidxan ya rey najl?

Badxi' Jesús laan rēbaman:

—Reyqui naj, zi'c nal. Par zian goolan par zian tëë zialan loj guidxliuj guie zidgaguien ni naj diidxli, graczi ree bèn zinal ni diidxli rucaagdiajg reeman ni rnien.

<sup>38</sup> Dxel rëb Pilato:

—¿Xhiezanin naj diidxli?

*Gunabee reeman guiët Jesús*

*(Mt. 27:15-31; Mr. 15:6-20; Lc. 23:13-25)*

Chi gulox rëb Pilato zian, dxel briiman bigneenëman bèn Israel ree stijb, rëbaman:

—Achet xguialquia xin guin radxejlan. <sup>39</sup> Per lëjt, xcostumbridi naj guial loj lanij pascw laa tijb bèn yu' ladxguiib. Yan, ¿rëndi ya guslaan xreydi?

<sup>40</sup> Dxel gurixdiaj ree bèn Israel guin, rëb reeman:

—¡Ad laataman guslaal! ¡Zagdxeli baslaa Barrabás!

Abi'za Barrabás guin béngubaanan.

## 19

<sup>1</sup> Dxel gunabee Pilato gudijn ree suldad Jesús. <sup>2</sup> Abi' beenchaaw reeman coron guiëjch, badxe' reeman laan guijcaman, bascajcw reeman laaman tijb lajd xniaya's. <sup>3</sup> Dxel gubig reeman lojman, rëbgaj reeman:

—¡Guibanri xrey ree bèn Israel!

Dxel rëëzgaj reeman lojman.

<sup>4</sup> Brii Pilato stijb, abi' rëbaman loj ree bèn Israel guin:

—Gol baguiaa, gabën laax din gagbeedi, achet xguialquiaux radxejlan.

<sup>5</sup> Dxel brii Jesús, yu' coron guiëjch guin guijcaman, najcw tëëman lajd xnia guin. Abi' rëb Pilato:

—Laax guie.

<sup>6</sup> Dxel bixhioz rniabee ree në ree bèn rajp ro' yadooro' Jerusalén, chi baguiaa reeman laaman, guzuloj rbixdiaj reeman, rëb reeman:

—¡Bacaax loj crüjz! ¡Bacaax loj crüjz!

Rëb Pilato loj reeman:

—Gol chinëx, lëjt gol bacaax loj crüjz, achet xtolix radxejlan.

<sup>7</sup> Badxi' reeman laan rëb reeman:

—Laa tijb dux leyan yu', rëb lojn rayal guiëtix, guial nax najx Xi'n Dios.

<sup>8</sup> Chi biguienman ni rëb reeman, mazri bidxebaman. <sup>9</sup> Bayuman lën palas guin zatijb, gunabdiidxaman loj Jesús rëbaman:

—¿Ban xin lüj?

Per ad badxi't Jesús laan. <sup>10</sup> Zeel rëb Pilato:

—¿Nid zadxi'l ni rnin ya? ¿Nid ragbeel ya ca'n guialrniabee din gucan lüj loj crüjz o guslaan lüj ya?

<sup>11</sup> Dxel rëb Jesús:

—Achetczi guialrniabee nitia'l bal id Dios nunee laan. Zianan zeel mazri zien xtol bèn bidnë naj guie yu' guial lojl.

<sup>12</sup> Diizd hor zii gajc raguuil Pilato mod, xhienaag guslaaman Jesús, per rbidxa' ree bèn riga' yagaj, rëb reeman:

—¡Bal guslaal laax, ad najtil xmiw bèn naj César! ¡Din chutëëz bèn rajc rey rzuj contr César!

<sup>13</sup> Chi biguien Pilato rëb reeman zian, gunabeeman babëë reeman Jesús, dxel gurej lod rniabeeman, lod la Gabata con diidx hebreo, rën guiëban Lod yu' ree guiaj. <sup>14</sup> Chi guixiez gal lanij pascw, cost garol dxej rëb Pilato loj ree bèn Israel:

—¡Laa xreydi guie!

<sup>15</sup> Per rbidxa' reeman rëb reeman:

—¡Guiëtix! ¡Guiëtix! ¡Bacaax loj crüjz!

Gunabdiidx Pilato loj reeman, rëbaman:

—¿Wen gucan xreydi loj crüjz ya?

Badxi' ree bixhioz rniabee laan, rëb reeman:

—Achut dux reyan yu', tijbzi César.

<sup>16</sup> Dxel bayü Pilato Jesús loj ree suldad din gucaa reex laaman loj crüjz, dxel zinë reex laaman.

### *Cwa Jesús loj crüjz*

*(Mt. 27:32-44; Mr. 15:21-32; Lc. 23:26-43)*

<sup>17</sup> Briinë reex Jesús, nüüman crüjz, binë reex laaman lod la Calaver, diidx hebreo lan Gólgota. <sup>18</sup> Ni bacaa reex laaman loj crüjz con zatio'p ree bejn, tijb gaj reeman ca cwë'man. <sup>19</sup> Gunabee Pilato cwa lejtr guiyc crüjz guin, rëban: “Jesús bën Nazaret, xrey ree bën Israel.” <sup>20</sup> Dád zien ree bën Israel biil lejtr guin, guial naj luar zii gajxh loj ciuda, guiáad lejtr guin can con diidx hebreo, diidx latin në diidx grieg. <sup>21</sup> Rëb ree bixhioz rniabee ree bixhioz loj Pilato:

—Ad rucaal: “Xrey ree bën Israel”, bacaa: “Bën rëb naj xrey ree bën Israel.”

<sup>22</sup> Badxi' Pilato laan rëbaman:

—Ni ma bacan yaya'n nan zian.

<sup>23</sup> Chi gulox bacaa ree suldad guin Jesús loj crüjz, baca' reex xabaman, gudixya' reexan tajp la', dxel cwa' reex tib la' gajn. Në stijb xabaman cwa' reex, ad nadiibtan, najcchaaw diidz yëjnan xt guia'n, najn tijbzi lajd. <sup>24</sup> Zeel rëb loj lasa' reex:

—Ad zarooxt reen, yadxi't ree suert din guidoon chu yayal laan.

Zian gojc cumplid ni ca loj xtiidx Dios, rëban: “Bala' reeman da xaban, gudxijt tëë reeman suert guijcan.” Zeel been ree xinsuldad guin zian.

<sup>25</sup> Gajxh cwë' crüjz ca Jesús za' xniaaman con xbël xniaaman con Li xbéngunaa Cleofas con Li bën guneë reeman Magdalena. <sup>26</sup> Chi baguiaa Jesús xniaaman, za' tijb ree xbejnman cwë'man, bën rën da'taman, rëb loj xniaaman:

—Na, laa xi'nl yagaj.

<sup>27</sup> Dxel rëb loj xbejnman:

—Laa xniaal yagaj.

Diidz dxej zii bignëman xniaa Jesús lidxaman.

### *Güjt Jesús*

*(Mt. 27:45-56; Mr. 15:33-41; Lc. 23:44-49)*

<sup>28</sup> Chi gulox rëb Jesús zian, gogbeeman ma gojc gran cumplid. Per din gac cumplid ni ca loj xtiidx Dios, rëbaman:

—Re'can nijs.

<sup>29</sup> Yagaj za' tijb re yu'n vin no'chan vinagr, zeel bagajdx reex tijb xiil loj vin guin, bacaa reexan loj tijb yag, dxel badxig reexan ro'man. <sup>30</sup> Chi ma gu'man laan, dxel rëbaman:

—Ma gojc gran cumplid.

Dxel basajb lojman luyuj, güjtaman.

### *Guliiz tijb suldad guiib cwë'lën Jesús*

<sup>31</sup> Ma cayüjn ree bën Israel porvinid din guixiez gal lanij pascw. Zeel ad guyënt reeman naya'n ree cuerp guin loj crüjz dxej raziiladx reeman, din dád rajp reeman dxej guin respejt. Zeel biguiedx reeman loj Pilato din nabeeman qui'ch ree suldad guin xdxijt ree bën ca loj crüjz din guiët reeman yalet tëë reex laa reeman. <sup>32</sup> Zeel wej reex. Yaløj gudi'ch reex xdxijt bën ca cwë' Jesús, dxel gudi'ch reex xdxijt bën ca stiblad cwë'man. <sup>33</sup> Chi gubig reex lod ca Jesús, baguiaa reex ma güjtaman, zeel ad gudi'cht reex xdxijtaman.

<sup>34</sup> Per tijb suldad guin guxhal ladaman con guiib ca'x, dxel briin rejn con nijs. <sup>35</sup> Bën rü diidx guie baguiaaman, zeel ragbeeman najn diidxli, rüman laan din në lëjt chililadx.

<sup>36</sup> Gra nine gojc din gac cumplid ni ca loj xtiidx Dios, rëban: “Ad rayalt gach xdxijt xiildoo.” <sup>37</sup> Stibljat rëb: “Guguiaa reeman bën guxhálnë reeman guiib lad.”

*Biguie'ch Jesús**(Mt. 27:57-61; Mr. 15:42-47; Lc. 23:50-56)*

<sup>38</sup> Chi gulox gojc zian, wej Xiëb, bén zëed guiedx la Arimatea, bignabaman diidxbee loj Pilato din yaletaman xcuerp Jesús din chiquie'chaman laaman. Në bén la Xiëb bililadx Jesús, per ralanzi, guial bidxebaman bejn ree. Badëed Pilato diidxbee, zeel wej Xiëb bigxiiman xcuerp Jesús. <sup>39</sup> Në Nicodemo wej, bén bigneenë Jesús tijb guxhin, bidxinnëman cost gajlbichii quil ni la mirra, no'chan aloe, rureen nejxh. <sup>40</sup> Bagajdxnë reeman laan lajd batüüb reeman laaman, zi'c rüjn ree bén Israel chi ruquie'ch reeman bengüt. <sup>41</sup> Lod cwa Jesús loj crüjz naga' tijb guidxliuj lod yu' ree yag. Yagaj naj tijb baa cüb lod achutczu waguie'ch. <sup>42</sup> Yagaj gudixh reeman xcuerpaman, guial najn gajxh, guial ma suloj tää dxej raziiladx reeman.

**20***Achetri xcuerp Jesús badxejl**(Mt. 28:1-10; Mr. 16:1-8; Lc. 24:1-12)*

<sup>1</sup> Chidumingw chi sta nacayri, wej María Magdalena ro' xbaa Jesús, abi' baguiaaman ma bisüd guiaj nayaaw ro' baa guin. <sup>2</sup> Dxel ruxüünman wejman lod za' Simón Béd con zatijb xbejn Jesús, bén rën da'taman, abi' rëbaman loj reeman:

—Ma zinë reeman xcuerp Dad Jesús, banczi bigsa'n reeman laaman, achutri laaman yu' lën baa guin.

<sup>3</sup> Abi' brii Béd con bén guin, zë reeman ro' baa guin. <sup>4</sup> Grop reeman ruxüün zë reeman. Per bén guin mazri ruxüünman guial loj Béd, abi' yaloj laaman bidxin ro' baa guin. <sup>5</sup> Dxel gudixlojman baguiaaman vend bidüüb Jesús, per ad guyutaman. <sup>6</sup> Dxelri bidxin Simón Béd, abi' guyuman lën baa guin. Nëgajcaman baguiaa vend guin <sup>7</sup> Baguiaa tääman lajd bidüüb guijc Jesús, nadüüban naga'n lood ren, ad naga'tan tijbzi con vend guin. <sup>8</sup> Dxel guyu bén bidxin ro' baa guin yaloj, baguiaaman ni goc, zianz bililadxaman, <sup>9</sup> guial gocli ad bignia't reeman ni ca loj xtiidx Dios guial yaban Jesús loj ree bengüt. <sup>10</sup> Dxel zia ree xbejn Jesús lidx reeman.

*Balüüloj Jesús loj María Magdalena**(Mr. 16:9-11)*

<sup>11</sup> Per Li baya'nman ro' baa guin cayoonman. La'tgaj cayoonman gudixlojman lën baa guin, <sup>12</sup> abi' baguiaaman tio'p ree anjl, najcw reeman lajd naquich, zojb reeman lod go't xcuerp Jesús, tijbaman lod go't guijcaman, zatijbaman lod go't guia'man. <sup>13</sup> Dxel gunabdiidx ree anjl guin lojman, rëb reeman:

—Na, ¿chexc zeel roonl?

Badxi'man laan rëbaman:

—Guial zinë reeman xcuerp Dad Jesús, abi' banczi guin bigsa'n reeman laaman.

<sup>14</sup> Guloxzi rëbaman zian, badxi' lojman baguiaaman za' Jesús yagaj, per ad bayünbeetaman laaman. <sup>15</sup> Dxel gunabdiidx Jesús lojman, rëbaman:

—Na, ¿chexc zeel roonl? ¿Chu raguuilil?

Gunaladx Li, bén rajp lod yu' ree yagnejxh guinan, abi' rëbaman:

—Dad, bal lüj binë xcuerpaman, guna ban bigsa'n laaman din chigxin laaman.

<sup>16</sup> Zianz rëb Jesús lojman:

—¡Li!

Dxel badxi' loj Li, rëbaman lojman con diidx hebreo:

¡Rabuni! —rën guiëban Mextr.

<sup>17</sup> Rëb Jesús lojman:

—Ad guqui'l naj, din gadan yaya' loj da Dadan. Per baguiaj biguiedx loj ree da bejnan guial yaya' loj da Dadan bén naj gajc xDadidi, loj da Diosan bén naj gajc xDiosidi.

<sup>18</sup> Dxel wej María Magdalena bicojnman xbejn ree Dad Jesús guial baguiaaman laaman, bagojn tēeman laa reeman gra ni rēbaman lojman.

*Balüüloj Jesús loj ree xbejnman*

(Mt. 28:16-20; Mr. 16:14-18; Lc. 24:36-49)

<sup>19</sup> Chidumingw zii gajc chi ma caxhin, bado'p ree xbejn Jesús, nayaaw ro' port yu' reeman guial rdxeb reeman guxtis Israel ree. Dxel balüüloj Jesús galay reeman, rēbaman loj reeman:

—Yabe'cdxe Dios luxdoodi.

<sup>20</sup> Chi ma gulox rēbaman zian, balüü yaaman loj reeman nē cwē'lēnman, abi' laa reeman dád babaa reeman baguiaa reeman Dad Jesús. <sup>21</sup> Dxel rēbaman loj reeman zatijb:

—Yabe'cdxe Dios luxdoodi. Zi'c guxhaalaman naj, ziangajc rxhialan lējt.

<sup>22</sup> Dxel balüjbaman guijc reeman, rēbaman:

—Gol gubajnnē xSprijt Dios. <sup>23</sup> Bén güüнди perdon xtol, chiquied xtol reeman, guiáad bén ad züjntidi perdon xtol, yaya'nnē xtol reeman.

*Baguiaa Tumajs Jesús*

<sup>24</sup> Tumajs, bén rníee reeman Cwajch, achut laaman za' chi balüüloj Jesús loj ree xbejnman. <sup>25</sup> Chi rēb reeman loj Tumajs:

—Ma baguiaan Dad Jesús.

Dxel rēbaman:

—Bal id zuguian yaaman lod wēez clav, abi' bal id zagu' da bacwēnan lod wēez clav guin, bal id zagu' tēe yan cwē'lēnman lod bidxeelguijdx, ad zaliladxtan.

<sup>26</sup> Chi goc xhujn dxej, badxajg lasa' ree xbejn Jesús zatijb, per dxel nē Tumajs za'nē laa reeman, nayaaw ruyu yu' reeman. Per balüüloj Jesús galay reeman, rēbaman loj reeman:

—Yabe'cdxe Dios luxdoodi.

<sup>27</sup> Dxel rēbaman loj Tumajs:

—Badxe' xbacwēnl guie, baguiaa ree yan, banee yaal guie badxe'n cwē' lēnan. Ad runawēēgril, bililadx.

<sup>28</sup> Dxel rēb Tumajs lojman:

—¡Da Dadan, da Diosan!

<sup>29</sup> Abi' rēb Jesús lojman:

—Rliladxil guial ma baguiaal naj. Xiquilbaa ree bén rliladx, majs ad waguiaat reeman naj.

*Chexc zeel cwa gui'ch guie*

<sup>30</sup> Zienri ree milagr been Jesús loj ree xbejnman, ni ad cwat ree loj gui'ch guie. <sup>31</sup> Sa'n nine ree cwa reen dín chililadxidi guial Jesús naj Cristo, Xi'n Dios, abi' guial chililadxidi laaman guibandi tiblayaa con Dios.

## 21

*Balüüloj Jesús loj ree xbejnman ro' nijs*

<sup>1</sup> Chi gudēd gojc zian, balüüloj Jesús loj ree xbejnman zatijb, ro' nijs naj gajxh guiedx Tiberias. Ze balüülojman: <sup>2</sup> Chi nadxag lasa' ree Simón Bēd con Tumajs bén rníee reeman Cwajch, nē Natanael bén za Caná guiedx riga' niz Galilea, con ree xi'n Zebedeo, nētēē zatio'p xbejn Jesús, <sup>3</sup> dxel rēb Bēd loj reeman:

—Gan chignaazan bējl.

Badxi' reeman laan rēb reeman:

—Nē dunujn yadxo.

Abi' wē'p reeman loj barcw zē reeman, per guxhin zii achutczi bējl gunaaz reeman.

<sup>4</sup> Chi ma cayreguiaal, bidxin Jesús ro' nijs guin, per ad bayünbeet reeman laaman. <sup>5</sup> Dxel gunabdiidxaman loj reeman rēbaman:

—Xi'n, ¿nid chu bëjl wanaazidi ya?

Badxi' reeman laan rëb reeman:

—Achutczi.

<sup>6</sup>Abi' rëb Jesús loj reeman:

—Gol bazaal xguijxhidi xladbee barcw guin din guiniaazidi bëjl.

Zian been reeman, abi' ad rajctri rabëë reeman guijxh guin, guial dád zien bëjl yu' lojn. <sup>7</sup>Dxel xbejn Jesús, bën rën da'taman, rëbaman loj Bëd:

—¡Dad Jesúsán!

Biguiejnzi Simón Bëd zian, laa got gajc xabaman ni gulëëman, abi' gutiajsaman lojnijs guin. <sup>8</sup>Guiáad zaxho'p xbejn Jesús loj barcw guin badxin reeman ro' nijs guin, coobyuj reeman guijxh guin, guidxan bëjl, guial zi'ctzi tibgayuu mejtr ryaadx yadxin reeman ro' nijs guin. <sup>9</sup>Chi baguiajt reeman, baguiaa reeman laa guij ma riga', dxiib tijb bëjl lojn, në guidahtil riga' yagaj. <sup>10</sup>Dxel rëb Jesús loj reeman:

—Gol tanë tio'p choon bëjl gunaaz nejzidi.

<sup>11</sup>Dxel wë'p Bëd loj barcw guin, guxoobyujman guijxh guin guidxan bëjl narooob ree, xt ro' nijs guin. Tibgayuu tü'pchiibichoon bëjl yu' lojn. Abi' majsi zienb, per ad goxya'tan.

<sup>12</sup>Zianz rëb Jesús loj reeman:

—Gol guda din gawidi rsiil.

Abi' ni'qui tijb reeman ad rayaxt guiniabdiidx chu bënan, guial ragbee reeman Dad Jesúsán. <sup>13</sup>Dxel gubigaman cwa'man guidahtil badëëman loj reeman, ziangajc beenman con bëjl guin. <sup>14</sup>Ni ne bayon volt balüüloj Jesús loj ree xbejnman chi babanman loj ree bengüt.

### *Guneenë Jesús Bëd*

<sup>15</sup>Chi gulox gudaw Jesús con ree xbejnman, gunabdiidxaman loj Simón Bëd, rëbaman:

—Simón, xi'n Waj, ¿walil ya rënl naj mazri guial loj ree bën guie?

Badxi' Bëdan rëbaman:

—Dad, ragbeequil rënan lüj.

Zeel rëb Jesús:

—Gunaj ree da xiildoon.

<sup>16</sup>Abi' rëb Jesús zatijb:

—Simón, xi'n Waj, ¿walil ya rënl naj?

Badxi' Bëdan rëbaman:

—Dad, ragbeequil rënan lüj.

Zeel rëb Jesús:

—Gunaj ree da xiilan.

<sup>17</sup>Bayon volt gunabdiidx Jesús rëbaman:

—Simón, xi'n Waj, ¿rënl naj ya?

Dád guyunaya Bëd, guial ma gojc choon volt gunabdiidx Jesús bal rënman laaman. Zianz rëb Bëd:

—Dad, lüj ragbee graczi, ragbeel rënan lüj.

Zeel rëb Jesús:

—Gunaj ree da xiilan. <sup>18</sup>Diidxliczi ganin, chi goquil xinguiag, rajcw xabil persi rejil lod rënl. Per chi ma najl bengol, gusli xu'quil din guscajcw ben ren xabil din chinë reeman lüj lod ad rëntil chel.

<sup>19</sup>Rëb Jesús zian guial basignia'man xhienaag guiët Bëd, din güünbee ree bejn Dios. Dxel rëb Jesús:

—Tanal naj.

### *Ni ne bacaa xbejn Jesús bën guyën da'taman*



<sup>20</sup> Chi badxi' loj Béd, baguiaaman laa Bén rën da't Jesús zinal laa reeman. Laaman gure cwë' Jesús chi gudaw reeman xche, gunabdiidx tēëman loj Jesús rëbaman: “Dad, ¿chu yayü lüj?” <sup>21</sup> Chi baguiaa Béd laaman, gunabdiidxaman loj Jesús rëbaman:

—Dad, laadxza xin guin, ¿xhie saquix?

<sup>22</sup> Badxi' Jesúsán rëbaman:

—Bal rënan guibanx xt yaguialan, ¿xhie güünl? Lüj tanal naj.

<sup>23</sup> Zianan zeel bire'ch diidx loj ree xbejnman guial ad zëjtt Bén guin. Per ad ziantan rëb Jesús, rëbaman: “Bal rënan guibanx xt yaguialan, ¿xhie güünl?”

<sup>24</sup> Bén guin gajcan rü diidx xcwent ree nine, laa tēëman bacaa laan, rayagbee tēë ree rüman diidxli. <sup>25</sup> Dád zien ree ni been Jesús, bal nitia tijb gajn, wed ad zadaant loj guidxliuj niu ree libr ni niajc.

## Ni been ree xi Apóstoles Jesucrist

<sup>1</sup> Rugajpdiozan lüj dad Teófilo: Loj da gui'ch yalojn rnin graczi ni been Jesús ni balüü tēeman chi guzuloj xchiinman <sup>2</sup> xt chi ziaman xanyabaa. Chi gadaman yaguij, gunabeeman bēn naj ree apóstoles, bēn guleman, ni rayal güün reeman, zi'c rēb xSprijt Dios lojman. <sup>3</sup> Chi mal guzagdiaj da'taman loj xgualgüjtaman, babanman loj ree bengüt. Loj tiuu dxej balüülojman zien volt loj bēn naj ree apóstoles, persi gogbee reeman nabancaman. Dxej zii ree guneenēman laa reeman xcwent xgualrniabee Dios.

<sup>4</sup> Chi ziz za'nēman laa reeman, guneenēman laa reeman ad yaza reeman Jerusalén, rēbaman:

—Gol gulējz gac cumplid ni na da Dadan zi'c ma rnin lojdi. <sup>5</sup> Walican baroobnijs Waj con nijs, per ma zidyob dxej gui't xSprijt Dios guibannē lējt, laan gac zi'c gualrirobnijs par lējt.

### *Zia Jesús xanyabaa*

<sup>6</sup> Lēn ree dxej zii chi badxaag lasa' reeman con Jesús, gunabdiidx reeman lojman rēb reeman:

—Dad, ¿yanan yayül gualrniabee loj ree bēn Israel ya?

<sup>7</sup> Badxi' Jesús rēbaman:

—Ad lējtít rayal gagbee xhie dxejn o xhie horan gac zian. Tijbzi da Dadan ragbee laan din laaman ca' gualrniabee. <sup>8</sup> Per chi ma nabannēdi xSprijt Dios, tia'di gualrniabee. Dxel griidi chiguiedi diidx loj ree bēn Jerusalén chu najn, nē gra ree guiedx riga' niz Judea nē niz Samaria, xt ree guiedx ren ni riga' ree zijt da't.

<sup>9</sup> Gulox guneeaman, ruguiaa reeman laaman dxejlczi wajsaman ziaman xanyabaa, abi' biguiajt tijb bēj bata'cwan laaman, dxel ad baguiaatri reeman laaman. <sup>10</sup> La'tgaj ruguiaa reeman ziaman xanyabaa, gulentie tio'p ree bēn najcw lajd naquich lod za' reeman, <sup>11</sup> abi' rēb reeman loj ree apóstoles guin:

—Bēn Galilea, ¿chexc zeel sta ruguiaadi xanyabaa? Jesús, bēn baguiaadi zia xanyabaa, laagajcaman yaguiaad stijb, zi'cgajc baguiaadi ziaman.

<sup>12</sup> Chi baza ree xi apóstoles Jesús ruguia' la Olivos, guza reeman zi'ct rza reeman dxej raziiladx reeman, persi badxin reeman Jerusalén. <sup>13</sup> Chi badxin reeman, wē'p reeman lēnü ladya lod zojb reeman. Brii laj reeman Bēd, Waj, Jacob, Andrejs, Felip, Tumajs, Tol, Matew, Jacob xi'n Alfeo, Simón (bēn guzunē ree bēn cananistas), nē Judas xi'n Jacob.

<sup>14</sup> Gra reeman rüjn tijbzi xgab, radxaag lasa' reeman din cwedx guiniab reeman Dios, con ree bijch Jesús con Li xniaaman, con ree bēngunaa ren.

### *Gulej reeman bēn baya'n xluar Judas*

<sup>15</sup> Lēn ree dxej zii bado'p ree bēn rliladx Jesús, naj reeman cost tibgayuu gajl bejn, dxel guzuli Bēd galay reeman, rēbaman loj reeman:

<sup>16</sup> —Compniar raliduladx ree Jesucrist, ganin lojdi, gojc cumplid ni bacaa rey Davi loj xtiidx Dios por xSprijtaman xcwent Judas, xin balüü Jesús loj ree bēn gunaaz laaman, <sup>17</sup> gojquix tijb dux compniaran, nē laax been lasa' dxiin raguieenan. <sup>18</sup> Per con milia ni gudix reeman laax por ni mal beenx, bio' guidxliuj lod gudidya'x, bazuj guiiquix, goxya'x abi' brii gra xziix. <sup>19</sup> Chi gogbee gra ree bēn Jerusalén ni goc, gunee reeman guidxliuj zii Acéldama, rēn guiēban guidxliuj rejn. <sup>20</sup> Din rēb loj libr la Salmos:

Yaya'n dējch lidxix,  
achutziri cwe lēnan.  
Rēb tēē lojn:  
Yayu ben ren guia'x.

<sup>21</sup> Zeel loj gra ree bén za'në dunuj ree guidib tiamp ni guzunë Jesús dunuj ree, <sup>22</sup> diizd chi baroobnijs Waj laaman xt chi ziaman xanyabaa. Loj gra reeman rayal grii tijbaman din güünman dunuj ree yudar yaguie'ch ree loj ree bejn guial walican babanman loj ree bengüt.

<sup>23</sup> Dxel gulej reeman tio'p reeman: tijb bén la Xiëb (rniee reeman laaman Barsabás, rniee tëë reeman laaman Justo), gulej tëë reeman bén la Matías. <sup>24</sup> Dxel gurejdx gunab reeman Dios, rëb reeman:

—Dad, lüj nünbee luxdoo gra ree bejn. Balüü chu loj grop reeman gulejl <sup>25</sup> din gacaman apóstol luar Judas, din banijtix delant lojl por dol ni beenx abi' ziax luar ni rayalix.

<sup>26</sup> Dxel baguiaa reeman chu yayal suert guin, abi' bayal Matías laan. Loj hor zii gajc bayuman loj zachibtib ree apóstoles.

## 2

### *Biguiajt xSprijt Dios diizd xanyabaa*

<sup>1</sup> Chi bidxin dxej gojl lanij la Pentecostés, gra ree bén rliladx Jesucrist bado'p tijbzi luar. <sup>2</sup> Dxejlczi gojc naquie' xanyabaa zi'c bidoxh xt bayu bi lënü lod riga' reeman, <sup>3</sup> abi' gulentie zi'c bajl dobëz ree, biguiajt reen guijc tijb gaj reeman. <sup>4</sup> Zianz guyu xSprijt Dios luxdoo graczi reeman, dxel guzuloj canee reeman diidx ren ree zi'c cusnee Sprijt guin laa reeman.

<sup>5</sup> Lën ree dxej zii za' zien ree bén Israel Jerusalén, baza reeman gra ladczi din cwedx guiniab reeman Dios. <sup>6</sup> Chi biguiejn reeman cayajc naquie', bado'p reeman persi biquiaa reeman. Dxel chi biguiejn reeman rniee gra ree bén rliladx Jesús xtiidx tijb gaj reeman, ad badxejlt xgab nüjn reeman. <sup>7</sup> Dád badxa loj reeman xt ni'quid badxejlt xhie nüjn reeman, abi' gunabdiidx loj lasa' reeman rëb reeman:

—¿Nid bén Galilea gra ree bén canee guin ya? <sup>8</sup> ¿Chexc zeel raguiejn ree rniee reeman dux tiidx ree? <sup>9</sup> Du loj ree no'ch ree bén zëed guiedx riga' ree niz Partia, Media, Elam, Mesopotamia, Judea, Capadocia, Ponto, Asia Menor, <sup>10</sup> bén zëed tëë ree guiedx riga' ree niz Frigia, Panfilia, Egipto, në ree guiedx nulen Libia ni riga' ree gajxh Cirene, në ree bén zëed Rom, yu' reeman gojl Israel per naban reeman Rom, yu' tëë reeman naj quijb ben Rom per rliladx reeman ni rliladx ree bén Israel. <sup>11</sup> Në ree bén zëed niz Creta nëtëë ree bén zëed guiedx riga' ree niz Arabia no'ch du loj ree. ¡Per dugraczi ree caycaagdiajg con dux tiidx ree niza'cdxoon rüjn Dios!

<sup>12</sup> Graczi reeman badxa da't loj xt ni'quid badxejlt xgab nüjn reeman, abi' guzuloj canabdiidx loj lasa' reeman rëb reeman:

—¿Xhie rën guiëb gra ni guie?

<sup>13</sup> Per garol reeman baze' laa reeman, rëb reeman:

—Rë' reeman.

### *Ni rëb Bëd loj ree bejn*

<sup>14</sup> Dxel guzuli Bëd con zachibtib ree apóstoles guin, gunee man rejs rëbaman:

—Lëjt bén Judea në graczi ree bén zojb Jerusalén, gol bacaagdiajg gol bignia' tëë ni ganin. <sup>15</sup> Ad rë't ree bén guin zi'c naladxidi, din qui gojlri raca gaa rsil. <sup>16</sup> Guie cayajc cumplid ni gunee bén brii laj Joel, bén badëë xtiidx Dios loj ree bejn, chi rëbaman:

<sup>17</sup> Na Dios,

guidxin dxej gaxhal da Sprijtan luxdoo gra ree bejn,  
abi' xi'ndi xinguaaw con biingunaa gudëed reex da diidxan,  
zien ree ni gulüüloj loj ree xinguiag,  
guiáad ree bengol zien ree ni guinie'xchaal reeman.

<sup>18</sup> Dxej zii ree gaxhal da Sprijtan luxdoo ree bén rüjn da dxiinan,  
xinguaaw ree në ree béngunaa,  
abi' gudëed reeman da diidxan.

<sup>19</sup> Gulün sen ree xanyabaa ni yadxa lojdi,  
guiáad loj guidxliuj gulün sen ree  
zi'c rejn në bajl nètée go'xh.

<sup>20</sup> Guicajy loj gubijdx, guiáad bëew yayajcan zi'c rejn.  
Chi ma gojc zian, dxel guidxin quijb dxej guin,  
dxej za'cdxoon gui't Dios bèn rniabee,  
dxej guiguien guidib xbianiman.

<sup>21</sup> Abi' graczi ree bèn cwedx guiniab laaman  
güünman laa reeman perdon.

<sup>22</sup> Rëb tée Béd loj reeman:

—Yan, gol bacaagdiajg ni ganin lèjt bèn Israel: Lèjt ragbee guial Jesús bèn Nazaret najman bèn guxhaal Dios, been tée man milagr ree në ree ni radxa loj ree bejn zi'c sen din gagbeedi guial Dios guxhaal laaman. <sup>23</sup> Diizd gocli mal nünj Dios xgab guial zian güünnedi Jesús, gunaazidi laaman bayüdi laaman loj ree benmal, din gugüjt reeman laaman loj crüzj. <sup>24</sup> Per basban Dios laaman stijb, babëeman laaman loj guialgüjt, din ad gojct nutée guialgüjt guin laaman. <sup>25</sup> Chi gunee rey Davi xcwent Jesús, rëbaman: Zianczi baguian dux Dad ree Dios za'nëman naj.

Za'man da ladbeen, achetzi zajc guchejb naj.

<sup>26</sup> Zeel yu' luxdon nix, ruzat tēn Dios zagdx.  
majsi guiētan ad rdxebtan,

<sup>27</sup> din ad zusa'ntil naj lēn baa,  
ad zatiējbtıl xhin xcuerp xi'nl bèn naya nali.

<sup>28</sup> Balüül naj nejz runee guialnaban,  
chu' tēe luxdon zagdx guial guibannēl naj.

<sup>29</sup> Basnuu gunee Béd, rëbaman:

—Ganin loj gradi compniar, diidxiczi dux bēngulal ree Davi güjtaman biguie'ch tēeman, abi' laa xbaaman sta raguiaa ree yan. <sup>30</sup> Per gojcaman bèn badëe xtiidx Dios loj ree bejn, abi' gogbeeman been Dios promejs guial loj xdiaaman grii Cristo bèn nabee. <sup>31</sup> Rulüü ma cuguiaaman gra ni gac, rëbaman guial yaban Cristo loj ree bengüt, ad zaya'ntaman lēn baa ad zaxin tēet xcuerpaman. <sup>32</sup> Yan ma basban Dios Jesús, dugran nayajc testiw guial walican babanman. <sup>33</sup> Zia tēeman xanyabaa zisobaman xladbee Dios, persi badëe xSprijt Dios lojman zi'c ma rëbaman, yan ma guxhaal Jesús Sprijt guin loj guidxliuj, por laaman cayajc ni cuguiaadi caguiejn tēedi. <sup>34</sup> Ad Davitan zia xanyabaa, din laagajcaman rëb:

Rëb dux Dad ree Dios loj bèn rniabee naj:

“Gurej da ladbeen,

<sup>35</sup> xt gabecan xin rdxe'ch ree lüj guia'l.”

<sup>36</sup> 'Gradi bèn Israel gol gogbee guial Jesús bèn bacaadi loj crüzj, Dios bacaabee laaman din gacaman Dad, bèn nabee dunuj ree.

### *Bachajg zien ree bejn bèn rliladx ree Jesús*

<sup>37</sup> Chi biguiejn ree bèn riga' yagaj ni rëb Béd, dád guyu naya luxdoo reeman. Abi' gunabdiidx reeman lojman në loj los demazri ree apóstoles guin, rëb reeman:

—Dad, gol guna, ¿xhie rayal yaguieenan?

<sup>38</sup> Dxel rëb Béd loj reeman:

—Gol bayagbee xtolidi, gol badxi' tēe lojdi loj Dios, gol gurobnijs por xguialrniabee Jesucrist din gac xtolidi perdon, zian chu' xSprijtaman luxdoodi. <sup>39</sup> Din promejs guin naj par lèjt në par ree xi'ndi në par gra ree bèn riga' zijt, par gra ree bèn cwe Dios par laaman.

<sup>40</sup> Con ree diidx guie në mazri ree diidx ren guneenē Béd laa reeman, rëbaman:

—¡Gol bariica loj ree bèn rünj ni mal!

<sup>41</sup> Zian gojc, graczi bén bazoob diidx ni rëbaman gurobnijs. Dxej zii gajc bachajg cost choon mil bejn bën rililadx ree Jesús. <sup>42</sup> Graczi reeman binal ni balüü ree xi apóstoles Jesús laa reeman, gubajnnë lasa' reeman zagdxe, gurejdx gunab reeman Dios abi' rado'p reeman persi raw reeman guiadxtil tijbzi zi'c gunabee Jesucrist güün reeman.

### *Ze gubajn ree bën bililadx Jesús yaloj*

<sup>43</sup> Graczi ree bejn radxa da't loj milagr në los demazri ree ni been ree apóstoles guin. <sup>44</sup> Graczi ree bën bililadx Jesucrist gubajnnë lasa' zagdxe, rgui's tëë ni rajp reeman loj lasa' reeman. <sup>45</sup> Ruto' xguidxliuj reeman në gra ni rajp reeman, persi rgui's reeman milia guin loj lasa' reeman zi'ctzi naj ni riaadx tijb gaj reeman. <sup>46</sup> Guixie guixie rado'p reeman lën yadooro' Jerusalén, dxel raguij reeman lidx xcompniar reeman rtaw reeman, dád nix yu' luxdoo reeman rën tëë lasa' reeman, <sup>47</sup> ruza't reeman Dios zagdxe, guiáad gra bejn guyën laa reeman. Guixie guixie ragnë Dios din gacxhiey mazri bën rililadx Jesucrist, persi gojc xtol reeman perdon.

## 3

### *Bayajc tijb bën ad rajct rza*

<sup>1</sup> Tijb dxej zë ree Bëd con Waj lën yadooro' Jerusalén raca choon wadxe, hor zii naj hor ni rbejdx rniab reeman Dios. <sup>2</sup> Ro' xport yadoo guin zojb tijb bën ad rajct rza diizd gojlaman. Zianczi rbe'c reeman laaman ro' port guin, ni la Port Za'cdxoon, din guiniabaman carda loj ree bën ru lën yadoo guin. <sup>3</sup> Chi baguiaaman Bëd con Waj ma chu' reeman lën yadoo guin, gunabaman carda loj reeman. <sup>4</sup> Baguiaa reeman lojman, dxel rëb Bëd lojman:

—Baguiaa du lojn.

<sup>5</sup> Chi biguiejnman rëb Bëd zian, dxel baguiaaman loj reeman, naladxaman milia nudëed reeman lojman. <sup>6</sup> Per rëb Bëd:

—Ad ra'ptan plajt ni'qui or par gunen lojl, per ni zajc günan por lüj günanan: Por xgualrniabee Jesucrist bën Nazaret, guzuli, guza.

<sup>7</sup> Dxel gunaazaman yaaman ladbee, bazuliman laaman. Loj hor zii gajc guyu ree guia'man gojl, <sup>8</sup> abi' gutiajsaman, guzuliman guzuloj cazaman. Dxel gyunëman laa reeman lën yadoo guin, cazaman, catiajsaman cuza't tëëman Dios zagdxe. <sup>9</sup> Graczi ree bën cuguaiaa laaman cazaman cuza't tëëman Dios zagdxe, <sup>10</sup> dád badxa loj reeman bidxeb tëë reeman guial gojc zian guial nünbee reeman bën guin, ragbee tëë reeman laaman rbej ro' xport yadoo guin ni la Port Za'cdxoon, rniabaman carda.

### *Gunee Bëd loj ree bejn lod la xcurdur Salomón*

<sup>11</sup> Ad riro'nladxt bën bayajc guin Bëd con Waj. Dád badxa loj ree bejn, abi' baxüün reeman wej reeman lod la xcurdur Salomón lod za' ree Bëd con Waj. <sup>12</sup> Chi baguiaa Bëd zian, rëbaman loj reeman:

—Bën Israel, ¿chexc zeel radxa lojdi ni goc? Ad naladxidi por dunujn rza bën guie guial naca'n guialrniabee o guial nayajcan naya delant loj Dios ya. <sup>13</sup> XDios dux bëngulal ree Abraham, Isaac në Jacob, laaman badëë guialrniabee loj Jesús, bën bayüdi loj guxtis. Abi' chi guyën Pilato nuslaaman laaman, ad cwëjbtidi. <sup>14</sup> Luar niniabidi nuslaa Pilato bën naya nali, bën rüjn zi'c rayal, gunabidi baslaaman tijb xin bagüjt bejn. <sup>15</sup> Zian bagüjtidi bën runee guialnaban. Per basban Dios laaman stijb, abi' dunujn nayajc testiw guial babanman. <sup>16</sup> Bën guie, bën ruguiaadi nünbee tëëdi, guyu gojl guia'man por xgualrniabee Jesucrist, bayajcaman guial baliduladxan, zi'c ruguiaa graczidi.

<sup>17</sup> Ganin lëjt compniar, ragbeen guial lëjt con ree bën rniabee lëjt ni'quid gogbeetidi xhienin beendi chi bagüjtidi Jesús. <sup>18</sup> Per zian been Dios persi gojc cumplid ni rëbaman loj ree bën badëë xtiidxaman loj ree bejn diizd gocli guial sagdiaj Cristo. <sup>19</sup> Zeel gol bayagbee xtolidi gol badxi' tëë lojdi loj Dios din güünman xtolidi perdon. Dxel yayaalyuj

luxdoodi, <sup>20</sup> guixhiaal tēēman Jesús stijb, bēn naj Cristo diizd gocli par lējt, <sup>21</sup> majsi yan rayalri suman xanyabaa, xt ma bazuxnejz Dios gra, zi'c rēbaman loj ree bēn badēē xtiidxaman loj ree bejn diizd gocli, bēn gubajn ree naya delant lojman. <sup>22</sup> Abi' rēb Moisejs loj ree dux bēngulal ree: “Loj xdiaadi cwēē Dios tijb bēn gudēē xtiidxaman loj ree bejn zi'c naj, gol bazoob xtiidxaman graczi ni naman lojdi, <sup>23</sup> din graczi ree bēn ad zuzoobt xtiidxaman nit reeman, ad zajc tēētri reeman cwent zi'c xbejn Dios.”

<sup>24</sup> 'Gra ree bēn badēēd xtiidx Dios loj ree bejn, diizd Samuel con los demazri ree bēn badēē xtiidx Dios diizd gulal, mal bagojn reeman ni cayajc ree lēn ree dxej guie. <sup>25</sup> Lējt naj xdiaa reeman, lojdi gac cumplid ni cwēb Dios loj ree dux bēngulal ree chi rēbaman loj Abraham: “Por xdiaal gūnle'n gra ree bēnguidxliuj.” <sup>26</sup> Abi' chi basban Dios xi'nman Jesucrist, yaløj lojdi guxhaalaman laaman din gūnle'man lējt din yabēēcaman gradi loj ni mal rūjndi.

## 4

### *Bazuj reeman Bēd con Waj loj ree guxtis*

<sup>1</sup> Sta canee ree Bēd con Waj loj ree bejn, chi bidxin ree xbixhioz ree bēn Israel nē suldad rniabee suldad rniaj ree ro' yadooro' Jerusalén, nētēē ree bēnsaducew. <sup>2</sup> Dád ralen reeman guial culüü ree Bēd con Waj bejn ree, rēb reeman guial yaban ree bejn loj ree bengüt, din laan ma baguiaa reeman chi baban Jesucrist. <sup>3</sup> Zeel gunaaz reeman laa reeman, per guial ma gudxe, zeel badxe' reeman laa reeman ladxguiib la'tgaj rareguiaa. <sup>4</sup> Per dád zien ree bēn bacaagdiajg ni rēb ree Bēd con Waj bililadx xtiidx Dios, gojc reeman cost gaay mil xinguaaaw xcwentqui ree bēngunaa.

<sup>5</sup> Chi bareguiaa, guxtis Jerusalén nē ree bengol nē ree mextr rulüü ley, bado'p reeman loj ciuda guin. <sup>6</sup> Nē Anás bidxin yagaj, bēn naj bixhioz mazri zojbloj rniabee graczi ree bixhioz, bidxin tēē bixhioz la Caifás nē Waj nē Lejandr, nētēē gra ree bēn naj lasa' ree bixhioz rniabee guin. <sup>7</sup> Gunabee reeman bica' reeman Bēd con Waj, abi' bazuj reeman laa reeman galay lod riga' reeman, dxel gunabdiidx reeman loj reeman, rēb reeman:

—¿Chu banee diidxbee o chu por rūjndi ni guin?

<sup>8</sup> Per guial yu' xSprijt Dios luxdoo Bēd dád gognēman laaman, zeel rēbaman:

—Gol bacaagdiajg ni ganin lējt bengol nē lējt guxtis, <sup>9</sup> rniabdiidxidi dunujn xhienaag baguieenan bēngogxuu guin yudar, xhie tēē naag gojc zeel bayajcaman. <sup>10</sup> Yanan lojdi din gagbeedi gagbee tēē gra bēn Israel xhienaag bayajc bēn za' lojdi. Bayajcaman por xguialrniabee Jesucrist bēn Nazaret, bēn bacaadi loj crūjz abi' basban Dios laaman stijb.

<sup>11</sup> Beennēdi laaman zi'c rūjn ree bēn rūjn yu chi rbēēgo'n reeman tijb guiaj, dxel qui ragbeeri reeman guial guiaj guin naj ni mazri lasajc par gacnē yu guin. <sup>12</sup> Achut ben ren rūjn dux tol ree perdon, tijbzi Jesús, din achut mazri guxhaal Dios loj guidxliuj din gūnman dunuj ree perdon.

<sup>13</sup> Chi baguiaa ree guxtis guin ad rdxebt ree Bēd con Waj guial rniee reeman, abi' gogbee reeman ad bēn basiidt ree mazran achu tēēt naj reeman, badxa loj reeman bayünbee tēē reeman laa reeman guial bēn binal ree Jesús. <sup>14</sup> Abi' yagaj gajc za' bēn bayajc guin, zeel ad bile'tri xhie niējb reeman contr laa reeman. <sup>15</sup> Dxel gunabee ree guxtis guin barii ree Bēd con Waj din yaya'n laaz reeman din gü reeman diidx. <sup>16</sup> Rēb reeman:

—¿Xhienaag yaguieennē' ree xin guin ree? Graczi ree bēn Jerusalén ma ragbee milagr been reex. Abi' ad zajct yarexuu ree. <sup>17</sup> Per chitēē guire'ch xtiidx Jesús, yachejb reex din diizd yan achutziri loj guza't reex laax.

<sup>18</sup> Dxel gurejdx reeman laa reeman gunabee reeman chitēē churi loj guza't reeman Jesús, ad gulüü tēēri reeman xtiidxaman. <sup>19</sup> Per badxi' Bēd con Waj laan, rēb reeman:

—Lējt gajc gol been xgab: ¿Zagdxē naj yazooban xtiidxidi luar yazooban xtiidx Dios ya? <sup>20</sup> Per ad zajct yacwēēz yaguie'chan gra ni baguiaa baguiejn tēēn.

<sup>21</sup> Dxel bachejb ree guxtis guin laa reeman stijb, dxelri baslaa reeman laa reeman zia reeman guial ad badxejlt xhienaag nudëed reeman laa reeman casti, din graczi ree bejn ruza't Dios zagdxe por ni goc. <sup>22</sup> Nadëd tiuu ijz yu' bën bayajc guin.

### *Rbejdx ree bën rliladx Jesús Dios*

<sup>23</sup> Chi baslaa ree guxtis guin Bëd con Waj, baguiaj reeman lod riga' xcompniar reeman bën rliladx ree Jesucrist, abi' be reeman diidx ni rëb ree bixhioz rniabee ree bixhioz në ree bengol rniabee. <sup>24</sup> Chi gulox bacaagdiajg reeman diidx ni be reeman, graczi reeman guzuloj cabejdx canab Dios, rëb reeman:

—Dad lüj rniabee gra, lüj naj bën been xanyabaa në guidxliuj nëtëe nijsdoo con gra ni yu' loj reen. <sup>25</sup> Por xSprijt tëel gunee rey Davi diidx guie ree, chi rëbaman:

¿Chexc zeel ridxe'chnë ree bénguidxliuj Dios?

¿Chexc zeel rüjn reeman xgab ni ad rüjnt wen?

<sup>26</sup> Bado'p ree rey në gra ree guxtis

din su reeman contr dux Dad ree Dios në contr Cristo.

<sup>27</sup> 'Abi' zian ma gojc, Herodes con Poncio Pilato con ree bën Israel nëtëe ree bën ad najt bën Israel, badxajg lasa' reeman luguiedx guie persi guzuj reeman contr xi'nl Jesús, bën naya nali, bën bacaabeel. <sup>28</sup> Zian gojc, been reeman zi'c ma beenl xgab diidx gocli. <sup>29</sup> Abi' yan Dad, baguiaa yan ruchejb reeman dunujn. Gognë dunujn nayajcan xbejnl din gac yatie'chan xtiidxil sin guialrdxeb, <sup>30</sup> në con xguialrniabeel yasiajcan bënragxuu ree, yaguieen tëen milagr ree por xguialrniabee xi'nl Jesús, bën naya nali.

<sup>31</sup> Chi gulox gurejdx gunab reeman Dios, guzuloj canij luar lod riga' reeman, dxel guyu xSprijt Dios luxdoo gra reeman, abi' guzuloj catie'ch reeman xtiidx Dios sin guialrdxeb.

### *Ragnë lasa' ree bën rliladx Jesús*

<sup>32</sup> Graczi ree bën rliladx Jesucrist bidxajg gubajn reeman, rüjn reeman tijbzi xgab, ni'qui tijb reeman ad rëbt guial xieenzi reeman naj ni rajp reeman, din najn par gra reeman. <sup>33</sup> Gognë Dios apóstoles guin ree persi basnuu be reeman diidxli guial baban Dad Jesús loj ree bengüt. Dád beenle' Dios laa reeman. <sup>34</sup> Ni'czi tijb reeman ad biaadxt xhienin, din graczi ree bën rajp guidxliuj o bën rajp yu ya ruto' reeman laan, abi' milia guin <sup>35</sup> rayü reeman loj ree apóstoles guin, persi laa reeman rgui's laan loj gra reeman zi'ctzi naj ni riaadx tijb gaj reeman. <sup>36</sup> Loj reeman no'ch tijb bën brii laj Xiëb, najman xdiaa bën brii laj Leví, zëedaman yuj la Chipre ni riga' loj nijsdoo. Gunee ree apóstoles guin laaman Bernabé, rën guiëban Bén ragu' luxdoo ree bejn zagdxe. <sup>37</sup> Gojpaman tijb guidxliuj, abi' bato'man laan persi badëëman milia guin loj ree apóstoles guin din qui's reeman laan.

## 5

### *Dol ni been ree Ananías con Safira*

<sup>1</sup> Per guyu stijb bën brii laj Ananías, xbéngunaaman brii laj Safira. Bato' tijb xguidxliuj reeman, <sup>2</sup> per baya'nnë xbéngunaaman diidx persi baya'nnëman ta'n milia guin. Sta'nan badëëman loj ree apóstoles guin, rëbaman laan naj gran. <sup>3</sup> Abi' rëb Bëd lojman:

—Ananías, ¿chexc zeel cwëjbil gunabee xindxab lüj? ¿Chexc zeel guyënl nusquieel loj xSprijt Dios, din naya'nnë ta'n milia ni bato' xguidxliujl? <sup>4</sup> ¿Wen nid xguidxliujl gojcan ya? Abi' chi bato'lan, ¿nid xmilialan ya? ¿Chexc zeel balabladxil beenl zian? Loj Diosan nuyënl nusquieel, ad lojt bejnan.

<sup>5</sup> Chi biguiejn Ananías ni rëbaman, biajbaman abi' güjtaman. Graczi ree bën gogbee ni guzacaman dád bidxeb reeman. <sup>6</sup> Dxel bibig bëlzi ree xinguiag, batüüb reex laaman lajd persi biquie'ch reex laaman.

<sup>7</sup> Chi gudëd cost choon hor, dxel bidxin xbéngunaa Ananías, ad ragbeetaman ni goc.

<sup>8</sup> Dxel gunabdiidx Bëd lojman rëbaman:

—Guna, ¿bato' xguidxliujdi zi'c na lacheelil ya?

Abi' rëbaman:

—An, zianqui bato'nan.

<sup>9</sup> Dxel rëb Bëd lojman:

—¿Chexc zeel baya'ndi diidx persi nuyëndi nusquieedi xSprijt Dios? Laa ree xin biquie'ch lacheelil ziaad ni, yan nëgajc lüj chiquie'ch reex.

<sup>10</sup> Loj hor zii gajc biajb Safira lod za' Bëd, abi' güjtaman. Chi bayu ree xin guin baguiaa reex ma güjtaman, dxel bales reex laaman biquie'ch reex laaman cwë' lacheelaman.

<sup>11</sup> Graczi ree bën rliadx Jesucrist në gra ree bën gogbee ni goc, dád bidxeb reeman.

### *Zien ree milagr been ree apóstoles*

<sup>12</sup> Zien ree milagr narooob been ree apóstoles guin loj ree bejn. Graczi ree bën rliadx Jesucrist radxajg lasa' ro' curdur lod rniee reeman xcurdur Salomón. <sup>13</sup> Zagdxë ruza't ree bën luguiedx guin laa reeman, per ad rayaxt reeman guchajg reeman laa reeman.

<sup>14</sup> Abi' guixie guixie cayajcxhiey ree bën rliadx Dad Jesús, zi'c xinguaaaw zi'c béngunaa.

<sup>15</sup> Xt rbëë reeman bënragxuu ree lunejz, rguijxh reeman laa reeman loj ree loon në loj ree da, din chi téd Bëd, majsi xbalazaman téd guijc reeman. <sup>16</sup> Në ree bën zojb guiedx riga' ree gajxh Jerusalén, zien reeman bidxin Jerusalén, bidxinnë reeman bënragxuu ree në ree bën yu' xindxab luxdoo, abi' graczi reeman bayajc.

### *Gunaaz ree guxtis Bëd con Waj*

<sup>17</sup> Bixhioz mazri zojbloj rniabee graczi ree bixhioz në ree bénsaducew za'në laaman, guyu guialnadëdloj luxdoo reeman, <sup>18</sup> abi' gunabee reeman biniaaz ree apóstoles guin persi badxe' reeman laa reeman ladxguiib. <sup>19</sup> Per guxhin zii tijb xi anjl Dios guxhal ro' ree xport ladxguiib guin, abi' babëëman laa reeman, rëbaman:

<sup>20</sup> —Gol chej lën yadooro', gol biguiedx loj ree bejn xhie naag gap reeman guialnaban tiblayaa con Dios.

<sup>21</sup> Chi biguiejn reeman ni rëb anjl guin, bareguiaal rsildoo wej reeman lën yadoo guin, guzuloj culüü reeman bejn ree xtiidx Dios.

Guiáad bixhioz zojbloj guin con ree bën za'në laaman, bato'p reeman guxtis con gra ree bengol Israel. Abi' gunabee reeman suldad ree din chica' reex apóstoles guin ree lën ladxguiib guin. <sup>22</sup> Per chi bidxin reex ro' ladxguiib guin, achutri ree apóstoles guin ree yu'. Dxel bicojn reex guxtis guin ree, <sup>23</sup> rëb reex:

—Chi badxinan, baguiaan nayaaw ro' ladxguiib guin zagdxë, laa ree suldad rajp ro' ladxguiib guin za', per chi baxhalan, achutczu yu' lënan.

<sup>24</sup> Dxel bixhioz zojbloj guin con suldad rniabee ree suldad rniaj ro' yadoo guin, con ree bixhioz rniabee ree bixhioz, chi biguiejn reeman zian, guzuloj rëb loj lasa' reeman, ¿ban xt guin chigdiblagaa ree ni guie?

<sup>25</sup> Loj hor zii gajc bidxin tijb xin rëb loj reeman:

—Laa ree bën badxe'di ladxguiib yu' lën yadoo culüü reeman bejn ree.

<sup>26</sup> Dxel wej suldad rniabee guin con ree xsuldadix bica' reex apóstoles guin ree, per ad beennaat reex laa reeman guial rdxeb reex gucaaguaaj ree bejn laa reex. <sup>27</sup> Chi bidxinnë reex laa reeman, bayü reex laa reeman loj guxtis. Dxel rëb bixhioz zojbloj guin loj reeman:

<sup>28</sup> —¿Nid ranan ya guial ad zajctri gulüüdi bejn ree xtiidx Jesús? Abi' yan graczi loj ree bën Jerusalén ma gutie'chidi xtiidxix, nëtëë yan rëndi gudxiibidi du guijcan guial dunujn bagüjt laax.

<sup>29</sup> Abi' badxi' Bëdan në gra ree apóstoles guin, rëb reeman:

—Rayal yazooban xtiidx Dios luar yazooban xtiidx ree bénguidxliuj. <sup>30</sup> XDios dux béngulal ree basban Jesús, bën bacaadi loj crüzj. <sup>31</sup> Abi' nüjn Dios laaman bën zojbloj, nabe'caman laaman xladbeeman, laaman naj bën rniabee rabëë tëëman bejn ree loj xtol



reeman, abi' zian guxhalaman nejz par ree bén Israel din cwëeladx xtol reeman yadxi' tää loj reeman loj Dios din güünman laa reeman perdon. <sup>32</sup> Dunujn në xSprijt Dios bén rudëeman loj ree bén ruzoob xtiidxaman, rayagbeen guial gra ree ni guin naj diidxli.

<sup>33</sup> Chi biguiejn ree guxtis guin ni rëb reeman, dád balen reeman abi' guyën reeman nugüjt reeman laa reeman. <sup>34</sup> Per loj ree guxtis guin no'ch tijb bénfarisew laman Gamaliel, najman mextr rulüü ley abi' graczi ree bejn rajp laaman respejt. Guzuliman abi' gunabeeman barii ree apóstoles guin xchu tibrajt. <sup>35</sup> Dxel rëbaman loj ree guxtis guin:

—Bén Israel, gol been xgab xhienin güünnëdi bén guin ree. <sup>36</sup> Gol basaaladx, guyu tijb xin brii laj Teudas, rëbix yu' chu najx abi' cost tajp gayuu ree bejn binal laax. Per chi bagüjt ree bejn laax, bire'ch gra ree bén binal laax, yagaj gulox gra ni beenx. <sup>37</sup> Abi' tää lën ree dxej gunabee gobiarn biab ree bejn, guyu tijb xin brii laj Judas, gojquix xin Galilea, ziangajc dád zien ree bejn binal laax. Per chi bagüjt ree bejn laax, gra ree bén binal laax bire'ch. <sup>38</sup> Zeel rnin lojdi, ad bal chu'ridi con ree bén guin, gol baslaa reeman. Din bal bénguidxliuj rniabee ni rüjn reeman, zadxin dxej loxan. <sup>39</sup> Per bal por Dios cayüjn reeman ni guin ree, ad zajct gutëedi loj ni cayüjn reeman. Gol gojp cudad ad niad chi gagbeedi contr Diosan za'di.

<sup>40</sup> Beencwent ree guxtis guin xtiidx Gamaliel, dxel gurejdx reeman apóstoles guin ree, gudijn reeman laa reeman abi' rëb reeman loj reeman ad guitie'chri reeman xtiidx Jesús, dxel baslaa reeman laa reeman zia reeman. <sup>41</sup> Per laa reeman dád nix yu' luxdoo reeman barii reeman lod za' ree guxtis guin guial baslaa Dios guzagdiaj reeman por Jesús. <sup>42</sup> Abi' ad rucwëzt rulüü reeman rniee tää reeman xtiidx Jesús, gra dxejczu rulüü reeman lën yadooro' Jerusalén nëtëe lidx lidx ree bejn.

## 6

### *Bibee gajdx ree bén güün yudar*

<sup>1</sup> Lën ree dxej zii chi canuu cayajcxhiey ree bén rliladx Jesús, guzuloj cabe'c ree bén rniee diidx grieg xguialquia ree bén rniee diidx hebreo, rëb reeman guial gra dxejczu chi rië's ni raw ree béngunaa bizëjb, ta'ndoon rtia' ree bén rniee diidx grieg guial loj ree bén rniee diidx hebreo.

<sup>2</sup> Dxel guidxibtio'p ree apóstoles guin bato'p reeman graczi ree bén rliladx Jesucrist, abi' rëb reeman:

—Ad zagdxet naj guial yacwëöz yalüün xtiidx Dios par yadi'san ni gaw ree bejn. <sup>3</sup> Zeel yanan lëjt compniar raliduladx ree Jesucrist, gol gudiil entr lojdi gajdx ree bén ragbeedi naban zi'c rayal, bén yu' xSprijt Dios luxdoo, bén yu' tää ree xquiarguiejn, din yazuj reeman güün reeman dxiin guin. <sup>4</sup> Guiáad dunujn yasnuu yarejdx yanaaban Dios, yalüü tää xtiidxaman.

<sup>5</sup> Graczi reeman cwëjb ni rëb reeman, abi' gulej reeman bén la Esteban, laaman rliladx Jesucrist guidib luxdooman, rniabee tää xSprijt Dios luxdooman guidiblagaa. Gulej tää reeman Felip, Prócoro, Nicanor, Timón, Parmenas në Nicolás bén zëed Antioquía, nëman bililadx ni rliladx ree bén Israel chi gadaman chililadx Jesucrist. <sup>6</sup> Dxel binë reeman laa reeman loj ree apóstoles guin, persi gurejdx gunab reeman Dios por laa reeman badxiib tää yaa reeman guijc reeman.

<sup>7</sup> Canuu care'ch xtiidx Dios, abi' Jerusalén cayajcxhiey ree bén rliladx Jesucrist, në zien ree bixhioz Israel bililadx laaman.

### *Biniaaz Esteban*

<sup>8</sup> Dád gognë Dios Esteban badëe tääman guialrniabee persi rüjnman zien loj milagr delant loj ree bejn. <sup>9</sup> Abi' bëlzi ree bén yadoo ni la Libertados në ree bén Cirene con ree bén Alejandría con ree bén niz Cilicia nëtëe ree bén zëed niz Asia, guzuloj cadildiidxnë reeman Esteban, <sup>10</sup> per ad gojct nadxi' reeman xtiidxaman guial cayagnë xSprijt Dios laaman. <sup>11</sup> Dxel gudijx reeman bëlzi ree bejn din guiëb reeman, bacaagdiaj reeman

rniee Esteban contr Dios në contr Moisejs. <sup>12</sup> Zian been reeman persi bidxe'ch ree bén luguiedx guin, në ree bengol në ree mextr rulüü ley. Dxel gunaaz reeman Esteban, binë reeman laaman loj guxtis. <sup>13</sup> Gudiil tëë reeman bén basquiee ree persi rëb reeman loj ree guxtis guin:

—Ad rucwëëzt rnieeguidx xin guie xley Moisejs në xyadoo Dios. <sup>14</sup> Dunujn ma ba-caagdiajg rëbix guial Jesús xin Nazaret guse'nx dux yadooro' ree, guchaa tëëx costumbr basa'n Moisejs du loj ree.

<sup>15</sup> Abi' guxtis guin ree në gra ree bén riga' yagaj, chi baguiaa reeman loj Esteban, baguiaa reeman najn zi'c tijb loj anjl.

## 7

### *Ni rëb Esteban loj ree guxtis*

<sup>1</sup> Dxel bixhioz mazri zojbloj rniabee graczi ree bixhioz, gunabdiidxaman loj Esteban, rëbaman:

—¿Walin ya rëbil zian?

<sup>2</sup> Badxi' Esteban laan, rëbaman:

—Dad guxtis, në lëjt compniar, gol bacaagdiajg ni ganin. Dios bén yu' xanyabaa balüüloj loj dux béngulal ree Abraham, chi gureman niz Mesopotamia chi gadaman chisob guiedx Harán. <sup>3</sup> Abi' rëb Dios lojman: “Basa'n ladxil në gra ree lasa'l, wej loj yuj ni gulün lüj.” <sup>4</sup> Dxel brii Abraham ladx ree bén Caldea bisobaman Harán. Chi güt xDadaman, dxel bidnë Dios Abraham loj guidxliuj guie lod nadxu' ree yan. <sup>5</sup> Per chi bi't Abraham guie, achetzi guidxliuj badëëd Dios lojman, ni'czi tibda'n nan ad badëëtaman. Per beenman promejs loj Abraham guial gudëëman guidxliuj guie lojman, dxel chi guiëtaman tia' ree xdiaaman laan, majsi chi rëb Dios zian, ad wayut xi'n Abraham. <sup>6</sup> Rëb tëë Dios lojman guial xdiaaman chisob zi'c ree benzit nacion ren, lod gugüjn da't reeman laa reeman dxiin gusagzi tëë reeman laa reeman loj tajp gayuu ijz. <sup>7</sup> Per rëb tëë Dios lojman: “Gudëdan gra ree bén gusagzi laa reeman casti, gac xchej yarii reeman yagaj abi' guie güün reeman sirv lon zi'c rayal.” <sup>8</sup> Chi guneenë Dios Abraham, baya'n reeman diidx guial rayal chu' gra ree xinguaaw sen. Zeel chi gol Isaac xi'n Abraham, gojc xhujn dxej, dxel badxe'man laax sen. Ziangajc beennë Isaac xi'nman Jacob, ziangajc beennë Jacob guidxiptio'p ree xi'nman, bén goc ree dux béngulal ree.

<sup>9</sup> Bén goc ree dux béngulal ree gudëdloj reeman Xiëb bén naj bijch reeman, abi' bato' reeman laaman loj ree bén zë Egipto, per ad guro'nladxt Dios laaman, <sup>10</sup> gognëman laaman loj ni guzagdiajman badëë tëëman xquiarguejnman, gognë tëëman laaman persi biajb rey guin laaman zagdxë, abi' beenman laaman gobernador Egipto, bazuj tëëman laaman din nabeeman gra ni rajp rey guin.

<sup>11</sup> Chi guyu gubijn guidibczi Egipto në niz Canaán, dxel guzagdiaj da't ree dux béngulal ree guial achet ni gaw reeman. <sup>12</sup> Per chi gogbee Jacob guial yu' trigo Egipto, guxhaal ree xi'nman bén naj dux béngulal ree, dxel wej reeman Egipto. <sup>13</sup> Chi barojp volt wej reeman, rëb Xiëb guial laaman naj bijch reeman, dxel gogbee rey Egipto xhie diaa zëëdaman. <sup>14</sup> Dxel rëb Xiëb loj ree bijchaman din chigxii reeman xDadaman në gra ree lasa'man din chisob reeman Egipto. Gojc reeman gayojnchiin bejn. <sup>15</sup> Zianan zeel bisob Jacob Egipto, ni gütaman ni gajc güt ree xi'nman, dux béngulal ree. <sup>16</sup> Gojc xchej dxel bignë reeman xdxijt ree dux béngulal ree guiedx Siquem, persi biguie'ch reen lën baa guzii Abraham loj ree xi'n Hamor.

<sup>17</sup> Chi ma zidyob tiamp gac ni rëb Dios loj Abraham, zien ree bén Israel ma gojcxhieja Egipto. <sup>18</sup> Abi' guzuloj gunabee rey ren Egipto, bén ad beenbeet Xiëb. <sup>19</sup> Rey zii basagzi bén du ladx ree, gunabeeman chigsëëb reeman xindo niguaaw golnejz ree din guiët reex. <sup>20</sup> Abi' tiamp zii gojl Moisejs, tijb xindo bayuladx Dios. Gunaj ree xdadix laax choon bëëw. <sup>21</sup> Chi bidxin dxej bigsa'n reeman laax lod bigsëëb reeman laax, xi'n gajc

rey guin baca' laax, persi baslaaman laax zi'c xi'nman. <sup>22</sup> Basiid Moisejs gra ni rajc ree b́en Egipto, abi' lasajc ni guneex ni been t́eex.

<sup>23</sup> 'Chi guyu Moisejs tiuu ijz, bidyajb guijcaman bignaj lasa' b́en Israelaman. <sup>24</sup> Abi' chi baguiaaman caguin tijb b́en Egipto tijb b́en Israel, balajman laaman, bagüjtaman b́en Egipto guin. <sup>25</sup> Naladx Moisejs niagbee ree b́en Israel guial por laaman yabëe Dios laa reeman loj ree b́en Egipto, per ad gogbeet reeman. <sup>26</sup> Chi bareguiaal, bidxaagloj Moisejs tio'p ree b́en Israel caga'p reeman, abi' guyënman nabe'cdxeman laa reeman, rëbaman: "¿Chexc zeel rdilidi? Awa b́en Israel naj gropidi." <sup>27</sup> Abi' b́en caguin b́en zatijb guin bacadxaaman Moisejs, rëbaman: "¿Chu bazuj lüj din nabeel dunujn, din na t́eël ni rayal yaguieenan? <sup>28</sup> ¿Wen rënl ya gugüjtil naj zi'c bagüjtil b́en Egipto ni nieey?" <sup>29</sup> Chi biguiejn Moisejs ni rëb b́en guin, baxüünman wejman niz Madián. Ni gureman zi'c benzit, abi' cwa'man béngunaa, zianz guyu tio'p ree xi'ngaanman.

<sup>30</sup> 'Chi gudéd tiuu ijz, dxel balüüloj tijb xi anjl Dios loj Moisejs loj xbajl tijb yag ni cayazbajl lod naj yujbidx, gajxh guia' la Sinaí. <sup>31</sup> Dád badxa loj Moisejs guial baguiaaman bajl guin. Abi' chi bibigaman din guguiaaman laan mazri zagdxe, biguiejnman cha' Dios rëbaman lojman: <sup>32</sup> "Naj naj xDios xbéngulal reel, Abraham, Isaac nê Jacob." Dxel guzuloj canij Moisejs guial bidxebaman, ad bayaxtaman nuguiaaman bajl guin. <sup>33</sup> Dxel rëb Dios lojman: "Gulëe xgurëchil, din nagle' lod za'l. <sup>34</sup> Naj cuguia xhienaag cazagdiaj ree da bejnan Egipto, rigujenman roon reeman zeel biguia'tan din yabën laa reeman. Yan, guda din gaxhalan lüj Egipto."

<sup>35</sup> 'Abi' majsi ad guyënt ree b́en Israel nuzoob reeman xtiidx Moisejs yaløj, rëb reeman lojman: "¿Chu bazuj lüj din nabeel dunujn na t́eël ni yaguieenan?" Per por anjl balüüloj loj bajl guin, badëed Dios guialrniabee lojman, abi' guxhaalaman laaman din güünman laa reeman yudar yarii reeman Egipto, zi'c rëb anjl balüüloj lojman loj yag caye'c. <sup>36</sup> Moisejs guin naj b́en babëe dux béngulal ree Egipto, been t́eëman milagr ree niz Egipto, nê niz ro' nijsdoo ni la Nijs Xnia, nê loj yujbidx lod guzu reeman tiuu ijz. <sup>37</sup> Laagajc t́eëman rëb loj ree b́en Israel: "Loj gajquidi cwe Dios tijb b́en gudëed xtiidxaman loj ree bejn zi'c guleman naj. Gol bazoob xtiidxaman." <sup>38</sup> Dxel chi guzunë Moisejs dux béngulal ree niz loj yujbidx, laaman naj b́en guneenë xi anjl Dios ruguia' la Sinaí, persi badëeman xtiidx Dios loj reeman, abi' diidx guin ree naj ni basa'n reeman duløj ree yan.

<sup>39</sup> 'Per dux béngulal ree ad bazoobt reeman xtiidx Moisejs. Ad guyënt reeman niniabeeman laa reeman, tib guyuguijczy reeman nayejc reeman Egipto. <sup>40</sup> Dxel rëb reeman loj Aarón: "Been dios ree, din ned reeman du loj ree, din ad rayagbeet ree gonczy Moisejs b́en babëe dunuj ree Egipto." <sup>41</sup> Dxel been reeman tijb go'ndobëz din gaquib xdios reeman. Bagüjt reeman be ree persi badëed reeman laa reeb zi'c gon loj ni been reeman, been reeman lanij guial babaanë reeman ni been gajc reeman. <sup>42</sup> Dxel guro'nladx Dios laa reeman, baslaaman guyën reeman gubijdx con bëew con bajl yu' ree xanyabaa. Din zian ca loj xtiidx Dios ni bacaa ree b́en badëed xtiidxaman loj ree bejn, lod rëb:

B́en Israel, loj tiuu ijz ni guzudi loj yujbidx,

¿wen bagüjtidi be ree ya din guneedi laa reeb lon zi'c gon?

<sup>43</sup> Per mazri guyëndi xdxandi Moloc biao t́eëdi lidxan,

nê xbajl dxan Refán, dxan been gajquidi din guzuxibidi loj reen.

Zeel gaxhalan lëjt mazri zijt guial Babilonia.

<sup>44</sup> 'Abi' chi guzu ree dux béngulal ree loj yujbidx, gojp reeman tijb yu been laa reeman sirv zi'c yadoo, lod guyu chaaw ree guiaj ni ca xley Dios. Been reeman yadoo guin zi'c gunabee Dios Moisejs, chi rëbaman lojman guial güünman laan zi'c ma baguiaaman. <sup>45</sup> Chi güt Moisejs, baya'nnë ree dux béngulal ree yadoo guin. Chi baya'n Josué xluar Moisejs, dxel bidnë reeman yadoo guin chi gudil reeman guijc guidxliuj con ree b́en ren, abi' gognë Dios laa reeman persi been reeman gan baya'nnë reeman guidxliuj guin ree.

Zian guzunë reeman yadoo guin xt bidxin dxej guzuloj gunabee rey Davi. <sup>46</sup> Guyën Dios rey Davi, abi' laaman guyënman nünman tijb yadoo par Dios, bén naj dux Dios ree nayajc ree bén Israel. <sup>47</sup> Per rey Salomón naj bén been laan, <sup>48</sup> majsi Dios bén yu' xanyabaa ad rbejtaman lën yadoo ni rün ree bejn, zi'c rëb bén badëed xtiidx Dios loj ree bejn diizd gocli, chi rëbaman:

<sup>49-50</sup> Xanyabaa naj lod zooban par ganabeen, guiáad loj guidxliuj naj lod ruzu guía'n.  
¿Xhienaag gac yu güüندی par naj?  
¿O xhienaag naj lod yaziiladxan?  
¿Id naj ben graczi ree ni guie ya?, rëb Dios.

<sup>51</sup> 'Per lëjt —rëb Esteban —dád nadidi, ad rëntidi guzoobidi xtiidx Dios, ad rën tëtidi chignia'di, zianczi za'di contr xSprijt Dios, zi'cgajc been ree xbéngulalidi. <sup>52</sup> ¿Chu bén badëed xtiidx Dios loj ree bejn ad beennaat ree xbéngulalidi? Xt bagüjt reeman bén badëed ree xtiidx Dios bén rëb ree guial gui't tijb bén naya nali. Abi' yan ma bi'taman, bayüdi laaman loj ree bén rniabee, gunabee tëedi güjtaman. <sup>53</sup> Majsi cwa'di xley Dios loj ree xi anjlaman, per ad rüjntidi zi'c rëb loj ley guin.

### *Bagüjt reeman Esteban*

<sup>54</sup> Chi biguiejn reeman ni rëb Esteban, xt raw lay reeman tant balen reeman laaman. <sup>55</sup> Per guial yu' xSprijt Dios luxdoo Esteban, chi gules lojman xanyabaa, dxel baguiaa-man xbiani Dios baguiaa tëeman Jesús za'man xladbee Dios. <sup>56</sup> Dxel rëb Esteban: —¡Gol baguiaa! Ruguian naxal xanyabaa, ruguia tëen Bén guxhaal Dios za'man xladbee Dios.

<sup>57</sup> Per chi biguiejn reeman zian, bata'cw guidiajg reeman, dxel gurixdiaj reeman zignaaaz reeman Esteban, <sup>58</sup> babëë reeman laaman loj ciuda guin, bicüjt reeman laaman con guiaj, guiáad xab reeman basa'nsii reeman loj xinguiag la Saulo persi canajxan. <sup>59</sup> La'tgaj cucaaguaiaj reeman Esteban, rëbaman:

—Dad Jesús, baca' da sprijtan.

<sup>60</sup> Dxel bazuxibaman guridxa'man rejs, rëbaman:

—Dad Jesús, ad güüncwentil dol cayün ree bén guin yan.

Naabczi gulox rëbaman zian, laa güt gajcaman.

## 8

### *Guzunal Saulo bén rliladx ree Jesucrist*

<sup>1</sup> Baya'n Saulo conform guial bagüjt reeman Esteban. Abi' dxej zii gajc guzuloj rzunal reeman bén Jerusalén ree bén rliladx ree Jesucrist, dxel bire'ch reeman guidib niz Judea në niz Samaria, bén najzi ree apóstoles baya'n. <sup>2</sup> Guyu bëlzi ree xinza'c, laa reex biquie'ch Esteban, abi' dád biin reex guijcaman. <sup>3</sup> Guiáad Saulo rzunalaman bén rliladx ree Jesucrist, ruman yu yu din cwëë naguiejnman laa reeman, zi'c xinguaaaw zi'c béngunaa, persi rgu'man laa reeman ladxguuib.

### *Bacaagdiajg ree bén Samaria xtiidx Dios*

<sup>4</sup> Per bén brii ree Jerusalén, lod zëtzi reeman rtie'ch reeman xtiidx Dios. <sup>5</sup> Zi'c been Felip, wejman guiedx Samaria, guzuloj caneeman xtiidx Jesucrist loj ree bejn. <sup>6</sup> Dád zien ree bejn rdo'p, graczi reeman rucaagdiajg chaaw ni rëb Felip, ruguiaa tëë reeman milagr ree ni rünman. <sup>7</sup> Zien ree bén nëjt tib lajt xcuerp bayün Felip, në ree bén ad rzat zagdxe, bayün tëëman bén yu' ree xinxab luxdoo abi' rbixdiaj reex rarii reex. <sup>8</sup> Zianan zeel babaa da't ree bén luguiedx zii.

<sup>9</sup> Per luguiedx zii guyu tijb bén brii laj Simón, diizd gocli rünman guialbidxaa persi rusquieeman bén Samaria ree, rünman bén lasajc. <sup>10</sup> Graczi reeman rucaagdiajg chaaw ni rëbaman, diizd mazri ree xinguiag xt mazri ree bengol, abi' rëb reeman:

—Naroob naj xguialrniabee Dios ni rajp b́en guie.

<sup>11</sup> Bidxga' reeman laaman guial ma gojc xchej cusquieeman laa reeman con guial-bidxaa ni rúnman. <sup>12</sup> Per chi bililadx reeman ni rēb Felip xcwent xguialrniabee Dios nē xcwent Jesucrist, zi'c ree xinguaaw zi'c ree béngunaa gurobnijs reeman. <sup>13</sup> Xt nē Simón bililadx gurobnijs tēēman, abi' ad riro'nladxtaman Felip radxa tēē lojman graloj ree milagr ruguaaman rún Felip.

<sup>14</sup> Chi gogbee ree apóstoles riga' Jerusalén guial ma bililadx ree b́en Samaria xtiidx Dios, dxel guxhaal reeman Béd con Waj ni. <sup>15</sup> Chi bidxin reeman, gurejdx gunab reeman Dios por ree b́en Samaria b́en ma rliladx ree xtiidx Dios din chu' xSprijt Dios luxdoo reeman, <sup>16</sup> din ni'qui tijb reeman ad wayut Sprijt guin luxdoo, gurobnijsi reeman por Dad Jesús. <sup>17</sup> Dxel guxhoob yaa ree Béd con Waj guijc reeman, abi' guyu xSprijt Dios luxdoo reeman.

<sup>18</sup> Chi baguiaa Simón cayu xSprijt Dios luxdoo ree b́en guin guial caxhoob yaa ree apóstoles guin guijc reeman, dxel guyēnman nudēēman milia loj reeman, <sup>19</sup> rēbaman:

—Nē lon gol banee guialrniabee guin din chi gaxhob yan chutēēz guijc b́enan, nē luxdoo chu' xSprijt Dios.

<sup>20</sup> Dxel badxi' Béd xtiidxaman rēbaman:

—Nitol con guidib xmilia, din rúnjl xgab guial zajc siil guialrniabee razaladx Dios.

<sup>21</sup> Ad rayalt ad zajc tēēt güünl zi'c raguieenan, din ni'quid zinaltil xnejz Dios. <sup>22</sup> Bayünj xgab por ni mal beenl, gurejdx gunab tēē Dios, rupent güünman lüj perdon por ree xixgabmalil, <sup>23</sup> din ragbeen ganax guialralen yu' luxdool, abi' dol guin naj ni rniabee lüj.

<sup>24</sup> Dxel badxi' Simón xtiidxaman, rēbaman:

—Gol gurejdx gunab Dios por naj, chitēē gaza'can ni'qui tijb ni ma nadi.

<sup>25</sup> Chi gulox gunee ree apóstoles guin xtiidx Dios loj ree b́en guin, dxel badxin reeman Jerusalén, abi' graczi ree guiedx riga' niz Samaria lod gudēd reeman gutie'ch reeman xtiidxza'c Jesucrist.

### *Felip con b́en Etiopía*

<sup>26</sup> Chi ma gudēd gojc zian, gunee tijb xi anjl Dios Felip rēbaman:

—Wej niz sur nejz ni zē Jerusalén xt lod la Gaza, niz lod naj ganax yujbidx.

<sup>27</sup> Dxel brii Felip zēman. Runejz guin banaazaman tijb b́en Etiopía, najman b́en zojbloj guial laaman rgu'chaaw xmilia Candace, b́en naj reina Etiopía. Wejman Jerusalén big-najchi'man Dios, <sup>28</sup> abi' ma bayunejzaman zia ladxaman, zojb lēn xcarrejt zagdxeman, roolaman loj gui'ch ni bacaa Isaías, b́en badēēd xtiidx Dios loj ree bejn. <sup>29</sup> Dxel rēb xSprijt Dios loj Felip:

—Bibig gajxh cwē' carrejt guin.

<sup>30</sup> Chi bibigaman, biguiejnman cayool b́en guin loj gui'ch bacaa Isaías. Dxel gunabdi-idxaman lojman rēbaman:

—Dad, ¿rignia'l ni cayoolil ya?

<sup>31</sup> Badxi' b́en guinan rēbaman:

—¿Xoza chignia'nán? Awa achut gusignia' naj.

Dxel rēbaman loj Felip din chē'paman loj carrejt guin, cweman cwē'man.

<sup>32</sup> Loj xtiidx Dios lod cayool b́en guin rēban:

Zi'c rinē reeman tijb xiil,  
binē reeman laaman lod gugüjt reeman laaman.

Abi' achet rēbaman,  
zi'c tijb xiil ma za' loj ree b́en gugaj guidxladib.

<sup>33</sup> Chi beennē reeman laaman zi'ctzi rēn reeman,  
achut been guialguxtis por laaman.

Yan achut guza't xdiaaman,

din ma bisüd reeman laaman loj guidxliuj.

<sup>34</sup> Rëb bën guin loj Felip:

—Guna sii, ¿chu xcwent rniee bën bacaa diidx guie ree? ¿Xcwent gajcaman ya o xcwent ben renan?

<sup>35</sup> Dxel guzuloj Felip cusignia'man laaman xtiidx Dios ni cayoolaman, zian beman xtiidxza'c Jesucrist lojman. <sup>36</sup> Abi' chi gudëd reeman lod yu' nijs, dxel rëb bën guin loj Felip:

—Guie yu' nijs. ¿Nid zajc garobnijsan guie ya?

<sup>37</sup> Zeel rëb Felip lojman:

—Bal rliladxil guidib luxdool, zajcan.

Badxi' bën guinan rëbaman:

—Rliladxan guial Jesucrist naj Xi'n Dios.

<sup>38</sup> Dxel gunabeeman guzudxe xcarrejtaman. Abi' baguiajt grop reeman, dxel guyu reeman lojnijs guin persi baroobnijs Felip laaman. <sup>39</sup> Chi barii reeman lojnijs guin, loj hor zii gajc gunidloj Felip binë xSprijt Dios laaman, abi' ad baguiaatri bën guin laaman, per dád rabaaman zinal xnejzaman. <sup>40</sup> Chi gogbee Felip, ma za'man xt guiedx Azoto, dxel zëman guiedx zigtie'chaman xtiidxza'c Jesucrist xt bidxinman Cesarea.

## 9

### *Bililadx Saulo Dad Jesucrist*

*(Hch. 22:6-16; 26:12-18)*

<sup>1</sup> Guiáad Saulo ad rucwëëzt rdxe'chaman bën rliladx ree Jesucrist, rëbaman gugüjtaman laa reeman. Zeel wejman bigneenëman bixhioz mazri zobjbloj rniabee graczi ree bixhioz, <sup>2</sup> din gac tijb gui'ch din gac cheman lën ree yadoo Damasco chigdiilaman bën rliladx ree Jesucrist, zi'c ree xinguaaw zi'c ree béngunaa, din chignëman laa reeman ladxguuib Jerusalén. <sup>3</sup> Per chi ma cadxinman gajxh guiedx Damasco, dxejlczi brii tijb guij xanyabaa balaan bacha' lod zëman. <sup>4</sup> Abi' bireeyujman, chi naga'man luyuj guin biguiejnman cha' bën rëb:

—Saulo, Saulo, ¿chexc zeel rzunalil naj?

<sup>5</sup> Abi' gunabdiidxaman rëbaman:

—¿Chu lüj, Dad?

Badxi'man laan rëbaman:

—Naj naj Jesús bën rzunalil. Per ganin lüj, lüj gajc rguuil xguialnaal zi'c rüjn tijb go'n rudxeguaia' loj yag ni rulaagnë reeman laab.

<sup>6</sup> Rnij Saulo guial tant bidxebaman, abi' rëbaman:

—Dad, ¿xhie rënl günan?

Dxel rëb Dad Jesucrist lojman:

—Bixche, wej guiedx Damasco, ni na reeman ni rayal güünl.

<sup>7</sup> Abi' ree bën në Saulo dád bidxeb reeman guial biguiejn reeman cha' bejn, per achutczi baguiaa reeman. <sup>8</sup> Chi bixchewan luyuj guin, baxhal lojman, ad rajctri ruguiaaman. Dxel gunaaz reeman yaaman bignë reeman laaman Damasco. <sup>9</sup> Ni guzuman choon dxej, ad rajct ruguiaaman, achetczi rawaman ache tëëtctzi rë'man.

<sup>10</sup> Damasco gure tijb bën rliladx Dad Jesucrist, brii lajman Ananías. Balüüloj Jesucrist lojman, rëbaman:

—¡Ananías!

Badxi'man laan rëbaman:

—Laa naj guie Dad.

<sup>11</sup> Dxel rëb Jesucrist lojman:

—Bisu, wej call ni la nali. Chi guidxinl lidx Judas, gunabdiidx por tijb xin zëed Tarso, lax Saulo. Din laax cabejdx canab naj, <sup>12</sup> abi' zi'c rulüü cane'xhchaalix, baguiaax guyu tijb bën la Ananías guxhoob yaaman guijquix persi baguiaax stijb.

<sup>13</sup> Chi biguien Ananías zian, dxel rëbaman:

—Dad, zien da't ree bejn ruza't xin zii, në ree ni mal rüjnnëx bën rliladx ree lüj Jerusalén. <sup>14</sup> Yan zëedix guie con xguialrniabee ree bixhioz rniabee ree bixhioz, din guiniaazix gra ree bën rliladx lüj.

<sup>15</sup> Dxel rëb Jesucrist lojman:

—Wej, din naj gule laax din chiguiex da diidxan loj ree bën ad najt bën Israel, në loj ree rey, con nëgajc loj ree bën Israel. <sup>16</sup> Guiën lojx guial sagdiaj da'tix guial najx da bejnan.

<sup>17</sup> Dxel zë Ananías lënü lod za' Saulo. Chi guyuman, guxhoob yaaman gujcaman, rëbaman:

—Bijch Saulo, Dad Jesús bën balüüloj lojl runejz lod zëedil, laaman guxhaal naj din yaguaaal, chu' tëë xSprijt Dios luxdool.

<sup>18</sup> Loj hor gajc zi'c rulüü yu' xhie biquied guiaalojman abi' baguiaaman stijb. Dxel guzuliman gurobnij saman, <sup>19</sup> gudaw tëëman persi bayuman gojl. Dxel guzujman Damasco tio'p choon dxej con ree bën rliladx Jesucrist.

### *Gunee Saulo xtiidx Dios Damasco*

<sup>20</sup> Dxel guzuloj gunee Saulo xtiidx Dios lën ree yadoo, rëbaman guial Jesucrist naj Xi'n Dios. <sup>21</sup> Graczi ree bën biguien ni rëbaman badxa loj reeman abi' rëb reeman:

—¿Nid bën guien rzunal bën rliladx ree Jesucrist Jerusalén ya? ¿Nid laagajcaman zëed guie ya, din guiniaazaman bën rliladx ree Jesucrist chignë tëëman laa reeman loj ree bixhioz rniabee ree bixhioz?

<sup>22</sup> Per Saulo guixie guixie mazri cariiman guialrdxeb rnieeman xtiidx Dios, rulüüman guial Jesús naj Cristo, din yabëëman bejn ree loj dol. Xt ragdxa ree bën Israel zojb ree Damasco chi rucaagdiajg reeman ni rëbaman.

### *Baxüün Saulo guiedx Damasco*

<sup>23</sup> Ad xchejt gojc, baya'n ree bën Israel diidx din nugüjt reeman Saulo, <sup>24</sup> per laa gogbee gajcaman ni rën reeman güün reeman. Dxej guiaal rbëz reeman laaman ro' ree port ni rarii ro' ciuda guin din nugüjt reeman laaman. <sup>25</sup> Per ree bën rliladx Jesucrist, guxhin badxe' reeman laaman lën dxüm narooob, abi' gulet reeman laaman niz xijch ze' nusiaaw ciuda guin, zian baxüünman Damasco.

### *Badxin Saulo Jerusalén*

<sup>26</sup> Chi badxin Saulo Jerusalén, guyënman nuchajgaman bën rliladx ree Jesucrist, per graczi reeman bidxeb laaman guial ad rliladxt reeman nëman ma rliladx Jesucrist.

<sup>27</sup> Dxel binë Bernabé laaman loj ree apóstoles guin, bagojnman guial baguiaa Saulo dux Dad ree Jesucrist, guneenë tëëman laaman chi zëman Damasco, bagojn tëëman guial Damasco gunee Saulo xtiidx Jesucrist sin guialrdxeb. <sup>28</sup> Zian baya'n Saulo Jerusalén abi' nayuman laa reeman. <sup>29</sup> Ad rdxebtaman ruza'taman Dad Jesús, abi' xt gudijldiidxnëman bën Israel rniee ree diidx grieg, per guyën reeman nugüjt reeman laaman. <sup>30</sup> Chi gogbee ree bën rliladx Jesucrist zian, binë reeman laaman guiedx Cesarea. Yagaj baxhaal reeman laaman guiedx Tarso.

<sup>31</sup> Dxel babedxe luxdoo ree bën rliladx Jesucrist, bën zojb ree niz Judea në niz Galilea nëtëë niz Samaria, chigagaj beenbee reeman mazri xhienaag naj xnejz Dios, bazoob tëë reeman xtiidxaman, abi' cayagnë xSprijt Dios cayajcxhieje reeman.

### *Bayajc Eneas*

<sup>32</sup> Chi biza Bëd bitixlojman bën rliladx ree Jesucrist, dxel wej gajcaman bitixlojman bën rliladx ree Jesucrist guiedx Lida. <sup>33</sup> Ni bidxaaglojman tijb xinguaaw la Eneas. Ma gojc xhujn ijz naga'x, ragxuux, ad rajct rzax. <sup>34</sup> Abi' rëb Bëd lojx:

—Eneas, ma bayüjn Jesucrist lüj. Bixche, bales ni go'til loj.

Loj hor zii gajc bixchex. <sup>35</sup> Chi baguiaa gra ree bën zojb guiedx Lida nē ree bën zojb niz Sarón guial ma bayajc Eneas, dxel nē reeman bililadx Jesucrist.

### *Baban Dorcas*

<sup>36</sup> Loj tiamp zii guyu tijb béngunaa rliladx Jesucrist luguiedx Jope, laman Tabita, diidx grieg laman Dorcas. Laaman been ni za'c ree, been tēēman yudar bēnprob ree. <sup>37</sup> Lēn ree dxej zii gogxuu Dorcas abi' güjtaman. Chi gulox bagajz reeman laaman, dxel bitixh reeman laaman lēnü ladya. <sup>38</sup> Abi' gajxh guiedx Jope raya'n guiedx Lida lod za' Bēd. Chi gogbee ree bēn rliladx Jesucrist guial za'man ni, guxhaal reeman tio'p ree xinguaaw bisajc reex Bēd liaadx, rēb reex:

—Been wen yo' ree Jope yan gajczi.

<sup>39</sup> Laa zinē gajcaman laa reex. Chi bidxinman, binē reeman laaman lēnü lod naga' xcuerp Dorcas. Ni riga' zien ree béngunaa bizējb roon reeman, abi' bibig reeman loj Bēd culüü reeman gra lajd ni been Dorcas chi sta nabanman. <sup>40</sup> Dxel gunabee Bēd barii gra reeman, abi' bazuxibaman gurejdx gunabaman Dios. Dxel baguiaaman bengüt guin, rēbaman:

—¡Tabita, bixche!

Laa guxhal gajc lojman. Chi baguiaaman Bēd, gureliman, <sup>41</sup> dxel gunaaz Bēd yaaman persi guzuliman. Abi' gurejdxaman bēn rliladx ree Jesucrist con ree bēn bizējb guin, persi baguiaa reeman guial ma baban Dorcas. <sup>42</sup> Guidibczi guiedx Jope gogbee reeman ni goc, abi' zien da't reeman bililadx Jesucrist por zian. <sup>43</sup> Guiáad Bēd baya'nman mazri dxej luguiedx guin, lidx Simón bēn rüjnchaaw guid.

## 10

### *Wej Bēd lidx Cornel*

<sup>1</sup> Luguiedx Cesarea gurej tijb bēn brii laj Cornel. Laaman goc suldad gunabee tibcwaa ree suldad brii laj Italiano. <sup>2</sup> Gojcaman benza'c, laaman nē gra ree bēn zojb lidxaman guyēn reeman Dios, abi' dád beenman yudar bēn Israel ree, bēn naj ree bēnprob, nē zianczi rbejdx rniabaman Dios. <sup>3</sup> Tijb dxej cost raca choon wadxe, guzajcaman zi'c rulüü cane'xhchaalaman. Zagdxeczi baguiaaman guyu tijb xi anjl Dios lēnü lod za'man, abi' rēb anjl guin lojman:

—¡Cornel!

<sup>4</sup> Baguiaaman loj anjl guin, abi' dád bidxebaman, rēbaman:

—¿Xhienin, Dad?

Abi' rēb anjl guin:

—Ma biguiejn Dios xtiidxil ma baguiaa tēēman xhienaag rüjnl yudar bēnprob ree.

<sup>5</sup> Guxhaal ree bēn che luguiedx Jope din chica' reeman Simón, bēn la gajc Bēd.

<sup>6</sup> Zojbaman lidx tijb bēn la gajc Simón, bēn rüjnchaaw guid, bēn zojb gajxh ro' nijsdoo. Bēd guin na ni rayal güünl.

<sup>7</sup> Chi zia anjl guneē Cornel, gurejdxaman tio'p ree xmojsaman, zatijb suldad rajpaman confians rliladx tēēman Dios. <sup>8</sup> Gulox beman diidx loj reeman ni guzacaman, dxel guxhaalaman laa reeman Jope.

<sup>9</sup> Chi bareguiaa, la'tgaj cadxin reeman gajxh Jope, cost garol dxej wē'p Bēd guiyc yu lod zojbaman din cwedx guiniabaman Dios. <sup>10</sup> Dád gulaanman, guyēnman niajwaman, per la'tgaj cayüjn reeman ni gawaman guzajcaman zi'c rulüü cane'xhchaalaman.

<sup>11</sup> Baguiaaman bixal xanyabaa abi' caguaajt zi'c tijb lajd narooob xt lod za'man, naxii guidap xquinan. <sup>12</sup> Loj lajd guin yu' gra loj ree be yu' tajp guia', nē ree bēēl, nētēē ree be rzuj. <sup>13</sup> Dxel biguiejnman cha' bēn rēb:

—Bēd, bisu, bagüjt be gawil.

<sup>14</sup> Per badxi' Bēd laan rēbaman:



—Yajqui, Dad. Ad wayawtczan nidxuudx ni ad rayalt gaw bejn.

<sup>15</sup> Abi' rëb cha' bën guin zatijb:

—Ni ma basia Dios ad rnieelan nidxuudx.

<sup>16</sup> Choon volt gojc zian, dxel bayë'p lajd guin xanyabaa stijb. <sup>17</sup> La'tgaj cayüjn Bëd xgab xhie rën guiëb ni baguiaaman, loj hor zii gajc bidxin ree bën guxhaal Cornel rulidx Simón, guial ma gunabdiidx reeman banguin naj lidxaman. <sup>18</sup> Chi bidxin reeman, gunabdiidx reeman bal ni zojb Simón bën la gajc Bëd.

<sup>19</sup> Guiáad Bëd sta cayüjnman xgab ni baguiaaman, chi rëb xSprijt Dios lojman:

—Laa choon ree xinguaaw raguuil lüj. <sup>20</sup> Bisu, biguiajt binë reex, ad chu' luxdool tio'p, din naj guxhal laa reex.

<sup>21</sup> Dxel baguiajt Bëd lod za' ree bën guxhaal Cornel, abi' rëbaman loj reeman:

—Naj naj bën raguuilidi, ¿chexquiza zeel raguuilidi naj?

<sup>22</sup> Dxel badxi' reeman laan rëb reeman:

—Guxhaal bën la Cornel dunujn, bën rniabee tibcwaa ree suldad, najman benza'c, rdxebaman Dios, abi' graczi ree bën Israel rën laaman. Tijb xi anjl Dios rëb lojman, guial rayal guixhiaalaman dunujn yudca'n lüj din yo' ree lidxaman, din gucaagdiajgaman ni rayal guiëbil.

<sup>23</sup> Dxel badxe' Bëd laa reeman lënü, ni gudëd reeman guiaal. Chi bareguiaal, binëman laa reeman. Në bëlzi ree bën zojb Jope bën rliladx ree Jesucrist binë laaman.

<sup>24</sup> Chi bareguiaal bidxin reeman Cesarea lod zojb Cornel. Abi' bato'p Cornel gra ree lasa'man në ree xmiwaman, din cwëz reeman guidxin reeman. <sup>25</sup> Chi bidxin Bëd lidx Cornel, laa brii gajc Cornel bigchaaglojman laaman, dxel bazuxibaman loj Bëd persi gojpaman laaman respejt. <sup>26</sup> Per bazuli Bëd laaman, rëbaman:

—Guzuli, din lasa' bejn gajcan lüj.

<sup>27</sup> La'tgaj cadxin reeman ruyu guin cayü reeman diidx. Abi' chi guyu reeman, baguiaa Bëd zien da't ree bejn riga' ni. <sup>28</sup> Dxel rëb Bëd loj reeman:

—Ma qui ragbeedi xhienaag naj xley ree bën Israel, guial ad zajct go'ch reeman loj ree bën ad najt bën Israel o chu' reeman lidx reeman. Per ma balüü Dios naj guial achutczi rayal ganen bendxuudx, bën nabixhladx. <sup>29</sup> Zeel chi bidca' reeman naj, laa bial gajcan achet guijc badxiban. Yan rënan gagbeen, ¿chexquiza zeel gurejdxidi naj?

<sup>30</sup> Badxi' Cornelan rëbaman:

—Ma gojc tajp dxej cost hor guie gajc, chi zoob lidxan, raca choon wadxe, cabedx canaaban Dios, loj hor zii balüüloj tijb bejn lon najcwaman lajd nayni. <sup>31</sup> Abi' naman lon: “Cornel, ma biguiejn Dios xtiidxil, yu'guijc tēëman xhienaag rüjnl yudar bënprob ree. <sup>32</sup> Zeel guxhaal ree xin che luguiedx la Jope din chica' reex Simón, bën la gajc Bëd. Zojbaman lidx tijb bën la gajc Simón, bën rüjnchaaw guid, bën zojb gajxh ro'nijsdoo. Bëd guin na ni rayal güünl.” <sup>33</sup> Zianan zeel laa guxhal gajcan xin bidgadiil ree lüj. Zagdxe beenl bi'til. Abi' yan dugraczan nadxu' delant loj Dios yu' xanyabaa, din yacaagdiajgan gra ni gunabee Dios lüj nal du lojn.

### *Ni gunee Bëd lidx Cornel*

<sup>34</sup> Dxel guzuloj canee Bëd, rëbaman:

—Ma ragbeen yan guial tiblojzi ruguiaa Dios bejn. <sup>35</sup> Din Dios, chutëëz bénguidxliuj ridxga' laaman rüjn tēëman zi'c rayal, nëgajc Dios ridxga' laaman. <sup>36</sup> Dios ma gunee bën Israel ree, ma bagojnman guial por Jesucrist rabadxe luxdoo bejn, bën naj Dad par gra ree bénguidxliuj. <sup>37</sup> Lëjt ragbee xhienaag baza't reeman Jesús diizd niz Galilea xt guidib niz Judea, chi gulox bagojn Waj bejn ree xcwent guialrirobnijs. <sup>38</sup> Ragbee tēëdi guial ma badëë Dios xSprijtaman con xguialrniabeeman loj Jesús bën Nazaret, abi' bizaman biguieenman ni zagdxe, bayüjnman gra ree bën cazagdiaj por xindxab. Gojc beenman zian guial za'në Dios laaman. <sup>39</sup> Abi' dunujn baguiaa gra ni been Jesús guidib niz Judea, në niz Jerusalén. Dxelri bagüjt reeman laaman, bacaa reeman laaman loj

crüjz. <sup>40</sup> Per Dios bashan laaman ni bayon dxej, abi' cwëjb Dios bidgalüülojman du lojn. <sup>41</sup> Ad balüülojtaman loj gra ree bejn, tijbzi du lojn nayajcan bën gule Dios diizd yaloj din yaguaan graczi ni beenman. Abi' dunujn badaawnë' laaman badü'në' tēen laaman chi babanman stijb. <sup>42</sup> Dxelri guxhaal Jesús dunujn din yatie'chan xtiidxaman loj ree bejn, guial Dios ma gulej laaman din güünman guialguxtis chi guidxin dxej yadëed gra ree bejn cwent loj Dios, zi'c ree bën naban zi'c ree bën ma güjt. <sup>43</sup> Nëtëë diizd gocli graczi ree bën badëed xtiidx Dios loj ree bejn, gunee reeman xcwent Jesús, rëb reeman guial graczi ree bën chililadx laaman, gac xtol reeman perdon.

### *Guyu xSprijt Dios luxdoo ree bën ad najt bën Israel*

<sup>44</sup> Sta canee Bëd, chi guyu xSprijt Dios luxdoo gra ree bën cucaagdiajg ni cayëbaman. <sup>45</sup> Dxel bën Israel rliladx ree Jesucrist, bën binë ree Bëd, dád badxa loj reeman guial nē ree bën ad najt ree bën Israel guyu xSprijt Dios luxdoo, <sup>46</sup> guial riguejñ reeman ma rniee ree bën guin graloj ree diidx, abi' ruza't reeman Dios zagdxe. <sup>47</sup> Dxel rëb Bëd loj reeman: —¿Chu zajc gudxoon tiobnijs ree bën guie, bal ma yu' xSprijt Dios luxdoo reeman zi'cgajc dunuj ree?

<sup>48</sup> Abi' gunabeeman tiobnijs reeman por Jesucrist. Dxelri guzajc reeman liaadx loj Bëd din sunëman laa reeman za tio'p choon dxej mazri.

## 11

### *Guyu xSprijt Dios luxdoo ree bën ad najt bën Israel*

<sup>1</sup> Bën naj ree xi apóstoles Jesús con ree bën Judea, bën rliladx ree laaman, gogbee reeman guial nē ree bën ad najt bën Israel bililadx xtiidx Dios. <sup>2</sup> Abi' chi badxin Bëd Jerusalén, bën Israel ma rliladx ree Jesucrist, bën sta zinal ree ley, gudilë reeman Bëd. <sup>3</sup> Rëb reeman lojman:

—¿Chexc zeel bichu'l lidx ree bën ad najt bën Israel abi' gudawnël laa reeman?

<sup>4</sup> Dxel guzuloj cayü Bëd diidx diizd guia'xchej xhienaag gojc zeel wejman lidx ree bën guin abi' rëbaman loj reeman:

<sup>5</sup> —Chi za'n luguiedx Jope, la'tgaj cabedx canaaban Dios, guza'can zi'c rulüü cane'xhchalan. Baguian zi'c tijb lajd narooob naxii guidap xquinan caguiajtan diizd xanyabaa xt lod za'n. <sup>6</sup> Chi baguian zagdxe xhie yu' loj lajd guin, baguian bedoxh ree nē ree be yu' tajp guia' nē ree bëël con ree be rzuj. <sup>7</sup> Dxel biguejñan cha' bejn, naman: “Bëd, guzuli, bagüjt be gawil.” <sup>8</sup> Per badxi'nän rën: “Yajqui, Dad, din ad goctczi wayawan nidxuudx, ni ad rayalt gaw bejn.” <sup>9</sup> Abi' guneeman diizd xanyabaa stijb, naman: “Ni ma basia Dios, ad rnieelan nidxuudx.” <sup>10</sup> Choon volt gojc zian, dxel bayë'p gra ni guin xanyabaa. <sup>11</sup> Loj hor zii gajc bi't choon ree xinguaaaw lod guren, zëed reex diizd Cesarea, cayguiil reex naj. <sup>12</sup> Abi' na xSprijt Dios lon guial chinë'n laa reex, ad chu' luxdon tio'p. Nē guixo'p ree bën guie bën naj dux compniar ree binë'n. Abi' dugraczan badxu' lidx bën guin. <sup>13</sup> Dxel beman diidx du lojn xhienaag balüüloj tijb xi anjl Dios lojman lidxaman, rëb anjl guin lojman: “Guxhaal ree bën che luguiedx Jope din chica' reeman Simón, bën la gajc Bëd, <sup>14</sup> laaman na xhienaag gac ree xtolil perdon, con gra ree bën zojb lidxil.” <sup>15</sup> Chi guzuloj canenë'n laa reeman, guyu xSprijt Dios luxdoo reeman zi'cgajc guyuman du luxdoo ree yaloj. <sup>16</sup> Dxel basaaladxan xtiidx Dad Jesucrist chi naman: “Walican baroobnijs Waj con nijs, per lëjt chu' xSprijt Dios luxdoodi.” <sup>17</sup> Abi' yan bal ma guxhaal Dios xSprijtaman par laa reeman zi'cgajc guxhaalaman laaman du loj ree chi baliladx ree Dad Jesucrist, ¿chu najn din gudxonan ni rüjn Dios?

<sup>18</sup> Chi biguejñ ree bën guin ni rëb Bëd, dxel achetri rëb reeman lojman abi' baza't reeman Dios zagdxe, rëb reeman:

—¡Ma rayagbee ree yan guial në ree bén ad najt bén Israel ma balüü Dios guial rayal yayüjn xgab por xtol reeman yadxi' tää loj reeman lojman din gap reeman guialnaban tiblayaa delant lojman!

### *Bililadx ree bén Antioquía Jesucrist*

<sup>19</sup> Chi mal bagüjt ree bejn Esteban, dxel guzuloj rzunal reeman bén rlliladx ree Jesucrist persi bire'ch gra ree bén rlliladx guin niz Fenicia, niz Chipre në Antioquía. Abi' gutie'ch reeman xtiidxza'c Jesucrist, per ganaxzi loj ree bén Israel. <sup>20</sup> Per loj reeman no'ch bëlzi ree bén Chipre në ree bén Cirene. Laa reeman we luguiedx Antioquía abi' gutie'ch reeman xtiidx Dad Jesucrist loj ree bén ad najt bén Israel. <sup>21</sup> Gognë Dios laa reeman, dád zien ree bejn bililadx ni rëb reeman abi' bililadx reeman Jesucrist.

<sup>22</sup> Chi gogbee ree bén Jerusalén rlliladx Jesucrist ni goc, guxhaal reeman Bernabé xt guiedx Antioquía. <sup>23</sup> Chi bidxinman ni, dád babaaman chi baguiaaman xhienaag cayagnë Dios bén guin ree. Dxel guneenëman gra reeman din con guidib luxdoo reeman gusnuu chinal reeman xtiidx Jesucrist. <sup>24</sup> Benza'c gojc Bernabé, dád gognë xSprijt Dios laaman abi' bililadxaman Jesucrist con guidib luxdooman. Zeel dád zien ree bejn bililadx Jesucrist.

<sup>25</sup> Dxelri wej Bernabé guiedx Tarso bigdiilaman Saulo. <sup>26</sup> Chi badxejlaman laaman, dxel binëman laaman xt Antioquía. Ni guzunë reeman bén rlliladx ree Jesucrist tibijz, dád zien ree bejn balüü reeman. Abi' luguiedx Antioquía naj lod gulëëljaj reeman bén rlliladx ree Jesucrist, cristian.

<sup>27</sup> Lën ree dxej zii bëlzi ree bén badëë xtiidx Dios loj ree bejn, guza Jerusalén wej reeman Antioquía. <sup>28</sup> Tijb reeman la Agabo, laaman guzuli loj ree bejn abi' por xSprijt Dios bagojnman guial chu' gubijn guidibczi guidxliuj. Laan gojc loj tiamp gunabee rey Claudio. <sup>29</sup> Abi' ree bén rlliladx Jesucrist luguiedx Antioquía, baya'n reeman diidx din guido'p reeman zi'ctzi ni galguzuj gudëëd tijb gaj reeman, din gagnë lasa' reeman, bén rlliladx ree Jesucrist, bén zobj ree niz Judea. <sup>30</sup> Abi' zian been reeman. Dxel guxhaalnë reeman laan Saulo con Bernabé din gudëëd reeman laan loj ree bén rniabee ree bén rlliladx Jesucrist niz Judea.

## 12

### *Guyu Bëd ladxguiib*

<sup>1</sup> Lën ree dxej zii guzuloj rey Herodes cusagziman bëlzi ree bén rlliladx Jesucrist. <sup>2</sup> Abi' gunabeeman bagüjt reeman Jacob bijch Waj, con espad. <sup>3</sup> Chi baguiaaman bayuladx ree bén Israel ni beenman, dxel gunabeeman gunaaz reeman Bëd. Ni ne goc lën ree dxej lanij pascw chi raw reeman guiadxtil ad yu't lewadur. <sup>4</sup> Chi gunaaz reeman Bëd, badxe' reeman laaman ladxguiib abi' gunabee rey Herodes tajp cwaa ree suldad din guinia reeman ro' ladxguiib guin, tib cwaa gaj reeman naj tajp suldad. Din beenman xgab nuzujman Bëd loj ree bén guiedx guin chi nidëd pascw. <sup>5</sup> Zian guyu Bëd ladxguiib, gojp da't reeman laaman. Per gra ree bén rlliladx Jesucrist ad rucwëëzt rbejdx rniab reeman Dios por laaman.

### *Babëë Dios Bëd ladxguiib*

<sup>6</sup> Guxhin zii gajc chi yareguiaal cwëë Herodes Bëd loj ree bén guiedx guin, naga'yëjs Bëd galay tio'p ree suldad, naxiiman con tio'p ree caden, guiáad los demazri ree suldad guin cayajp ro' ladxguiib guin. <sup>7</sup> Dxejczu bidxin tijb xi anjl Dios abi' basni tijb gui lën ladxguiib guin, dxel baqui' anjl guin cwë'lën Bëd persi bacwëënman laaman, rëbaman lojman:

—¡Cari bixche!

Loj hor zii gajc biajb ree caden naxii yaa Bëd, <sup>8</sup> abi' rëb anjl guin lojman:

—Guxhiidxi'ch lënl balëë tää xgurëchil.

Chi ma been Béd zian dxel rëb anjl guin:

—¡Gojt xcajpil, tanal naj!

<sup>9</sup> Laa barii gajc Béd nalaman anjl guin, per ad ragbeetaman bal diidxli naj ni cayüjn anjl guin, gunaladxaman cane'xhchaalzaman. <sup>10</sup> Abi' gudëd reeman loj tibcwaa ree suldad guin, dxel gudëd reeman loj stibcwaa reeman. Chi bidxin reeman ro' portguiib ni rarii runejz guin, dxel xtijbzan bixal abi' barii reeman. Abi' chi bidxin reeman tijb xquin, yagaj basa'n anjl guin Béd. <sup>11</sup> Dxel gogbee Béd guial ni diidxliqui naj ni cazajcaman, abi' rëbaman:

—Yanri ma ragbeen guial guxhaal xi anjl Dios persi babëëman naj loj Herodes, con loj gra ni nüjmnë ree bën Israel naj.

<sup>12</sup> Chi bayagbee Béd ni guzacaman, dxel baguijman lidx Li, xniaa Waj, bën la gajc Marcw, lod riga' zien ree bejn cabejdx canab reeman Dios. <sup>13</sup> Chi gulajw Béd ro' port, dxel brii tijb biin la Rode ziquiaam chunin. <sup>14</sup> Per chi bayünbeem cha' Béd, dád babaam, dxel luar nixhialim ro' port guin, baxüünm bicojnm guial za' Béd ro' port guin. <sup>15</sup> Abi' rëb reeman lojm:

—¡Rajc guijquil!

Per za'dxi'chczim guial waliqui ni rëbim. Dxel rëb reeman lojm:

—Ad laataman, wed xi anjlaman.

<sup>16</sup> Per Béd cabajwzi cabajwaman ro' port guin. Dxel chi guxhal reeman dád bidxeb reeman baguiaa reeman laaman. <sup>17</sup> Abi' been Béd sen loj reeman din yacwëëz ro' reeman, dxel beman diidx xhienaag babëë Dios laaman ladxguiib. Abi' rëbaman loj reeman:

—Gol be ni guie loj Jacob në loj gra ree bën rliladx Jesucrist.

Dxelri briiman yagaj zëman lood ren.

<sup>18</sup> Chi bareguiaal, ad radxejlt xhie güün ree suldad guin guial ad ragbeet reeman xhienaag barii Béd ladxguiib guin. <sup>19</sup> Dxel gunabee Herodes chigdiil reeman Béd, per ad badxejlt reeman laaman. Abi' chi gulox gunabdiidx Herodes loj ree suldad guin xhienaag gojc, gunabeeman gugüjt reeman laa reeman. Dxel brii Herodes Judea abi' bisobaman luguiedx Cesarea.

### *Güjt rey Herodes*

<sup>20</sup> Balen Herodes bën Tiro në ree bën Sidón, per baya'n ree bën guin diidx din chigdeenë reeman laaman. Chi been reeman gan guneenë reeman bën brii laj Blasto zagdxe, tijb bën naj xbejn rey Herodes, dxel gunee Blasto por laa reeman loj rey guin din lox til reeman, din guidibczi lod rniabee rey guin zëëd ni raw reeman. <sup>21</sup> Bazuj Herodes xhie dxej guinieenëman laa reeman abi' dxej zii gojt xab zagdxeman, gurej loj xyagxhilaman lod rniabeeman, zianz guzuloj guneenëman laa reeman. <sup>22</sup> Dxel guzuloj gurixdiaj ree bën guin, rëb reeman:

—¡Ad bejntan canee, tijb diosan!

<sup>23</sup> Loj hor zii gajc badëë tijb xi anjl Dios tijb guialguijdx loj Herodes. Gudaw bizog laaman abi' güjtaman guial bayuladxaman baza't ree bejn laaman zagdxe luar nuzat' reeman Dios zagdxe.

<sup>24</sup> Per xtiidx Dios care'chzi care'chan gra ladczi abi' gra ladczi cayajcxhie ree bën rliladx laaman.

<sup>25</sup> Chi ma badëëd ree Bernabé con Saulo ni guxhaal ree bën Antioquía, dxel baza reeman Jerusalén, binë reeman Waj, bën la gajc Marcw.

## 13

### *Guzuloj Bernabé con Saulo bigtie'ch reeman xtiidx Dios*

<sup>1</sup> Loj ree bën rliladx Jesucrist, bën zojb ree Antioquía, no'ch ree bën rudëëd xtiidx Dios loj ree bejn në ree bën rulüü xtiidxaman. La reeman Bernabé, Simón bën rniee reeman

Benya's, Lucio b́en Cirene, Saulo con Manaén b́en guni'snë Herodes tijbzi, b́en gunabee Galilea. <sup>2</sup> Tijb dxej chi naba'n reeman, la'tgaj cabejdx canab reeman cuza't tēē reeman Dios zagdx, rēb xSprijt Dios loj reeman:

—Gol bacaabee Bernabé nē Saulo din güün reeman dxiin rēnan güün reeman.

<sup>3</sup> Chi gulox guba'n reeman gurejdx tēē reeman Dios, dxel guxhoob yaa reeman guiic Bernabé con Saulo din gagnē Dios laa reeman abi' bazaadiidxnē reeman laa reeman.

### *Bernabé con Saulo wej reeman Chipre*

<sup>4</sup> XSprijt Dios naj b́en guxhaal Bernabé con Saulo, zē reeman Seleucia, ni guyu reeman loj barcw, zē reeman yuj la Chipre, ni riga' loj nijsdoo. <sup>5</sup> Chi bidxin reeman niz Chipre, dxel luguiedx Salamina guzuloj gutie'ch reeman xtiidx Dios lēn ree xyadoo ree b́en Israel. Nē Waj binē reeman din güünman laa reeman yudar. <sup>6</sup> Chi biza reeman guidib niz Chipre, dxel bidxin reeman Pafos. Ni bidxaagloj reeman tijb b́en Israel laman Barjesús, rajcaman guialbidxaa, rusquieeman bejn ree, rēbaman guial laaman naj b́en rudēēd xtiidx Dios loj ree bejn. <sup>7</sup> Barjesús guin rnieenēman Sergio Paulo zagdx, b́en naj gobernador Chipre, rignia' da'taman. Gurejdx gobernador guin Bernabé con Saulo guial rēnman gucaagdiajgaman xtiidx Dios. <sup>8</sup> Per b́enbidxaa guin (con diidx grieg laman Elimas) guyēnman nudxoonman guial nililadx Sergio Paulo xtiidx Dios. <sup>9</sup> Abi' Saulo, b́en la gajc Pab, rniabee xSprijt Dios luxdooan guidiblagaa, baguiaadxijchaman loj b́enbidxaa guin, <sup>10</sup> rēbaman:

—¡Xi'n xindxab lüj, ganax rusquieel, ganax niguijdx rüjnl, ad rēntczil ni zagdx! ¿Xt goc gudēēl mod chinal ree bejn xnejz nali Dios? <sup>11</sup> Yan gudēēd Dios lüj casti: ad zanit lojl abi' xchej ad zuguaatil xbacha' gubijdx.

Loj hor zii gajc gurexajy Elimas abi' ad gojctri nuguaaman, dxel raguuilaman chu guiniaaz yaaman guial ad rajctri ruguaaman. <sup>12</sup> Chi baguiaa gobernador guin zian, dxel bililadxaman abi' dád badxa lojman ni balüü reeman xcwent Dad Jesús.

### *Bidxin Pab con Bernabé niz Pisidia*

<sup>13</sup> Chi ma gudēd gojc zian, guyu Pab con ree xcompniaraman loj barcw luguiedx Pafos abi' zē reeman luguiedx Perge ni riga' niz Panfilia. Ni basa'n Waj laa reeman bayejcaman Jerusalén. <sup>14</sup> Dxel barii reeman guiedx Perge, zē reeman luguiedx Antioquía ni riga' niz Pisidia. Abi' dxej raziiladx ree b́en Israel, guyu reeman lēn xyadoo ree b́en Israel zianz gurej reeman. <sup>15</sup> Dxel chi gulox biil b́en biil tib lajt loj libr bacaa Moisejs nē loj libr bacaa ree b́en badēē xtiidx Dios loj ree bejn, gunee ree b́en rniabee lēn yadoo guin, rēb reeman loj Pab con Bernabé:

—Bal xhie guiēbidi loj ree b́en riga' guie din gudēēdi consejw loj reeman, zajc guiēbidan yan.

<sup>16</sup> Dxel guzuli Pab, beenman sen loj reeman din yacwēēz ro' reeman, dxel rēbaman:

—B́en Israel, nē gra ree b́en rdxeb Dios, gol bacaagdiajg: <sup>17</sup> Dux Dios ree, nayajc ree b́en Israel, gulejman dux b́engulal ree abi' laaman been persi gojcxhie reeman, chi sta zojb reeman zi'c benzit niz Egipto. Dxel con xguialrniabeeman babēēman laa reeman Egipto. <sup>18</sup> Abi' baslejnguijcaman laa reeman loj tiuu ijz ni guzu reeman niz lod naj ganax yujbidx, <sup>19</sup> banijt tēēman gajdx ree nacion ni gure Canaán persi badēēman guidxliuj guin ree loj dux b́engulal ree. <sup>20</sup> Zian gojc loj tajp gayuu garol ijz, dxelri bacaabee Dios juejs ree persi gunabee reeman laa reeman. Abi' Samuel b́en badēēd xtiidx Dios loj ree bejn gojc xjuejs bigra reeman. <sup>21</sup> Dxel gunab reeman din chu' tijb rey nabee laa reeman, abi' bazuj Dios rey Saúl xi'n Cis, b́en zēēd loj xdiaa Benjamín persi gunabeeman laa reeman tiuu ijz. <sup>22</sup> Chi bisüd Dios rey Saúl, dxel bazujman rey Davi. Abi' rēbaman: “Ma baguian guial Davi xi'n Isaí, nabanx zi'c rēnan, güün tēēx cumplid da diidxan guial güünx gra zi'c rēnan.” <sup>23</sup> Abi' yan zi'c gajczi rēb Dios, loj gajc xdiaa rey Davi, brier Jesús b́en guxhaalaman din yabēēman b́en Israel ree loj dol. <sup>24</sup> Chi gad Jesús gui't, Waj b́en baroobnijs bejn ree,

bagojnman gra ree bèn Israel guial rayal yayüjn reeman xgab por xtol reeman tiobnijs tée reeman. <sup>25</sup> Chi ma zidyob yadiblagaa xguialnaban Waj, dxel rëbaman: “Ad najtan bèn naladxidi, qui gui'traman, laaman mazri lasajc guial lon, ni'quid rayalt gaxhiecan xgurëchaman.”

<sup>26</sup> 'Yan, dugra ree nayajc ree xdiaa Abraham në gra los demazri ree bèn rdxeb Dios, par dunuj ree naj xtiidxaman ni rugojn reeman dunuj ree, xhienaag rabëë Jesucrist dunuj ree loj dol. <sup>27</sup> Per ree bèn Jerusalén con ree xguxtis reeman ad bayagbeet reeman Jesús. Ad gogbee tëët reeman xhie rën guiëb xtiidx Dios ni bacaa ree bèn badëëd ree xtiidxaman loj ree bejn, ni rool reeman lën yadoo dxej raziiladx ree bejn, dxel laagajc reeman bagüjt Jesús, zian gojc cumplid ni ca loj xtiidx Dios. <sup>28</sup> Abi' majsi achetdzi xtol Jesús guyu, per ni'czi zian rëb gajc reeman loj Pilato guial nabeeman guiëtaman. <sup>29</sup> Chi gulox been reeman gra zi'c ca loj xtiidx Dios xcwent Jesús, balet reeman laaman loj crüjz abi' baquie'ch reeman laaman. <sup>30</sup> Per Dios basban laaman, <sup>31</sup> dxel loj zien dxej balüülojman loj ree bèn binë laaman chi briiman niz Galilea zëman Jerusalén, abi' yan laa reeman naj bèn rniee por laaman loj ree bejn.

<sup>32</sup> 'Zeel caygojnman lëjt diidxza'c guin ree, guial promejs been Dios loj ree dux béngulal ree, <sup>33</sup> ma beenman laan cumplid con dunuj ree guial zio'p ree loj xdiaa reeman. Beenman cumplid xtiidxaman chi basbanman Jesús zi'c ca loj Salmo barojp, lod rëb: “Lüj naj da xi'nän abi' diizd yan ma rajpil guialrniabee zi'cgajc naj.” <sup>34</sup> Dios rëb guial yasbanman Jesús abi' ad zaxint xcuerpaman zi'c gajdzi ca loj xtiidx Dios lod rëb: “Naj günle' lëjt zi'c benan promejs loj Davi.” <sup>35</sup> Abi' rëb tée stib lajt loj xtiidxaman: “Ad zatiëjbtli xhin xcuerp xi'nl, bèn naya nali.” <sup>36</sup> Yan diidxliczi diidx guin ree ad rnieet reen xcwent Davi, din chi gulox gunabeeman bejn ree xtiampaman zi'c rëb Dios nabeeman, dxel güjtaman, biguie'chaman abi' guxin xcuerpaman. <sup>37</sup> Per xcuerp Jesús bèn basban Dios, ad guxintan. <sup>38</sup> Zeel caygojnman lëjt compniar din gagbeedi guial por laaman ma yu' perdon par dux tol ree. <sup>39</sup> Graczi bèn riladx Jesucrist ma gojc perdon gra xtol reeman ni ad gojct niajc perdon por ley badëë Dios loj Moisejs. <sup>40</sup> Zeel gol gojp cudad chitëë saquidi zi'c bacaa ree bèn badëë xtiidx Dios loj ree bejn, lod rëb:

<sup>41</sup> Gol bacaagdiajg, lëjt bèn ruze' ree da diidxan,

gol badxalojdi gol gunidloj tée.

Din loj ree dxej nabandi gün reen ni xt ni'quid zaliladxtidi,

majsi chu na laa reen lojdi.

<sup>42</sup> Chi barii Pab con Bernabé lën xyadoo ree bèn Israel guin, gunab reeman favor loj Pab, din chi guidxin stijb dxej raziiladx ree bejn chiguieman mazri diidx loj reeman xcwent ni beman dxej zii. <sup>43</sup> Chi barii ree bèn guin lën yado guin, zien da't reeman binal Pab con Bernabé, zi'c ree bèn Israel zi'c ree bèn ad najt bèn Israel, bèn rën ree Dios zi'cgajc ree bèn Israel. Abi' rëb Pab con Bernabé loj reeman din sudxi'ch reeman loj nejz zagdx guredx Dios laa reeman guial rënman laa reeman.

<sup>44</sup> Chi bidxin dxej ni raziiladx ree bejn, gra bèn luguiedx guin bado'p din gucaagdiajg reeman xtiidx Dios. <sup>45</sup> Per chi baguiaa ree bèn Israel zien da't ree bejn riga' yagaj, dxel guyu guialnadëdloj luxdoo reeman abi' guzuloj caneeguijdx reeman canee tée reeman diidxguijdx loj Pab. <sup>46</sup> Dxel sin guialrdxeb badxi' Paban con Bernabé loj reeman, rëb reeman:

—Yaloj lëjt rayal yagojnman xtiidxza'c Dios, lëjt najdi bèn Israel, per yan ad rëntidi gucaagdiajguidi laan, dxel lëjt gajc culüü guial ad zajct yayalidi guialnaban tiblyyaa con Dios. Yan ma yugtie'chan diidxza'c guin ree loj ree bèn ad najt bèn Israel. <sup>47</sup> Din zian gunabee dux Dad ree Dios dunujn, chi rëbaman tib lajt loj xtiidxaman:

Nuzun lüj zi'c guij par gra ree nacion,

din chel guidibchicniaa loj guidxliuj chicojnl

xhienaag gac ree bejn perdon.

<sup>48</sup> Chi biguiejn ree bén ad najt bén Israel zian, dxel babaa reeman, guzuloj rëb reeman guial zagdxé naj xtiidx Dios, abi' graczi bén ma naj yayal guialnaban tiblayaa con Dios, bililadx reeman xtiidxaman. <sup>49</sup> Zianan zeel bire'ch xtiidxza'c Dios guidib niz ni. <sup>50</sup> Per ree bén Israel batiaalguiiw reeman béngunaa rej ree laydoo zianczi naj tée reeman bén zobjloj luguiedx zii, në ree xinguaaw naj gajc xin zobjloj, din sunal reeman Pab con Bernabé xt yabëe reeman laa reeman ni. <sup>51</sup> Dxel Pab con Bernabé gudxiij guxyuj guia' reeman zi'c tijb sen guial ad bazoobt ree bén guin diidx, dxel zë reeman Iconio. <sup>52</sup> Per ree bén bililadx Jesús niz ni, ma rniabee xSprijt Dios luxdoo reeman guidiblagaa abi' dád rabaa reeman.

## 14

### *Bidxin Pab con Bernabé Iconio*

<sup>1</sup> Luguiedx Iconio, Pab con Bernabé guyu reeman lën xyadoo ree bén Israel. Abi' zi'c balüü reeman xtiidxza'c Jesucrist, zien da't reeman bililadx, zi'c ree bén Israel zi'c ree bén ad najt bén Israel. <sup>2</sup> Per ree bén Israel ad bililadxt batiaalguiiw reeman bén ad najt ree bén Israel persi guzuloj been reeman xgab mal por ree bén rililadx Jesucrist. <sup>3</sup> Per ni'czi zian, xchej da't guzuj ree apóstoles guin ni, abi' sin guialrdxeb gunee reeman xtiidx Dios guial rililadx reeman Jesucrist, laaman badëed guialrniabee loj reeman persi been reeman zien da't ree milagr në mazri ree ni ren, persi balüü Jesucrist guial diidxli naj ni rëb reeman xcwent Dios. <sup>4</sup> Per ree bén luguiedx zii gojc reeman tio'p lala', garol reeman guzunë ree bén Israel zagarol reeman guzunë apóstoles guin ree. <sup>5</sup> Dxel zi'c ree bén Israel zi'c ree bén ad najt bén Israel, baya'n reeman diidx con ree guxtis din tilë reeman Pab con Bernabé gucaaguij tée reeman laa reeman. <sup>6</sup> Abi' chi gogbee Pab con Bernabé zian, laa zia gajc reeman Listra con Derbe, guiedx riga' ree niz Licaonia, në gra ree guiedx riga' niz ni, <sup>7</sup> gunee reeman xtiidxza'c Jesucrist.

### *Bacaaguij reeman Pab Listra*

<sup>8</sup> Luguiedx Listra guyu tijb xinguaaw ad rajct rza, ad guzatzcix guial naxin guia'x diidz chi golix abi' zobjix <sup>9</sup> cucaagdiajguix ni rëb Pab. Chi baguiaa Pab laax, gogbeeman guial rililadxix par yayajquix. <sup>10</sup> Abi' gunee reeman rejs, rëbaman:

—jBisu, guzuli zagdxé!

Loj hor zii gajc gutiajs xin guin, guzulix abi' guzuloj cazax. <sup>11</sup> Chi baguiaa ree bejn ni been Pab, guzuloj canee reeman rejs diidx Licaonia, rëb reeman:

—Dios naj ree zi'c bejn ma biguiajt lod nadxu' ree.

<sup>12</sup> Abi' rëb reeman guial Bernabé naj dios Júpiter, guiáad Pab naj dios Mercurio guial laaman naj bén rniee loj reeman. <sup>13</sup> Abi' ro' guiedx guin niz lod ru bejn naj xyadoo Júpiter, dxel bixhioz yu' lën yadoo guin binëman go'n ree con ree guiaa, abi' laaman con ree bén guin guyën reeman nugüjt reeman go'n guin ree din niën reeman apóstoles guin ree zi'c xdios reeman. <sup>14</sup> Per chi gogbee Pab con Bernabé zian, gudixya' xab reeman, guzëeb reeman lad ree bén guin, rbixdiaj reeman rëb reeman:

<sup>15</sup> —Gol bacaagdiajg, ¿chexquiza zeel rüjndi zian, awa bejn gajc dunujn zi'cgajc lëjt? Awa par zianclan zio'pan din yanan lojdi din yasa'ndi ni rüjndi, din achetczi lasajc reen. Mejorli gol binal xnejz Dios naban, bén been xanyabaa në guidxliuj nëtëe nijsdoo con gra ni yu' loj reen. <sup>16</sup> Tiamp gulal Dios baslaa been ree bejn ni guyëntzi reeman. <sup>17</sup> Per ni'czi zian, zianczi balüüman chu najman por ree ni zagdxé ni rüjnman. Din laaman naj bén razaladx guia con guialnaza'c abi' razaladxaman ni radaaw ree din chu' du luxdoo ree zagdxé. <sup>18</sup> Chi rëb Pab con Bernabé zian, con ree diidx guin penz been reeman gan badxoon reeman guial nugüjt ree bén guin go'n guin ree din niën reeman laa reeman zi'c xdios reeman.

<sup>19</sup> Per bëlzi ree bén Israel zobj Antioquía në Iconio, chi bidxin reeman luguiedx Listra been reeman gan batiaalguiiw reeman bén luguiedx guin ree. Dxel bacaaguij reeman

Pab abi' gunaladx reeman ma güjtaman abi' guxoobyuj reeman laaman, babëe reeman laaman luguiedx guin. <sup>20</sup> Per chi bido'p ree bën rliladx Jesucrist gadëd lod naga'man, dxel bixcheman, bayuman luguiedx guin stijb. Chi bareguiaal briinëman Bernabé zë reeman luguiedx Derbe.

<sup>21</sup> Chi gulox gutie'ch reeman xtiidxza'c Jesucrist luguiedx Derbe lod been reeman gan bililadx zien ree bejn laan, dxel bayejc reeman luguiedx Listra në Iconio nëtëe Antioquía. <sup>22</sup> Luguiedx zii ree badxe' reeman luxdoo ree bën rliladx Jesucrist. Rëb reeman loj reeman din sudxi'ch reeman loj ni rliladx reeman laaman, din dád sagdiaj reeman din yayu reeman lod rniabee Dios. <sup>23</sup> Abi' tëtëe loj tijb gaj ree guiedx guin bacaabee reeman bengol nabee ree loj ree bën rliladx Jesucrist. Zianz chi gulox guba'n reeman gurejdx tëtëe reeman Dios, dxel basa'n reeman laa reeman con Dad Jesús bën ma bililadx reeman.

### *Badxin ree Pab con Bernabé Antioquía ni riga' niz Siria*

<sup>24</sup> Chi baza ree Pab con Bernabé niz Pisidia, bidxin reeman niz Panflia. <sup>25</sup> Abi' gunee reeman xtiidx Dios luguiedx Perge, dxel zë reeman guiedx Atalia. <sup>26</sup> Ni guyu reeman loj barcw zë reeman Antioquía, luguiedx lod basa'n ree los demazri ree bën rliladx Jesucrist laa reeman con Dios din gagnëman Pab con Bernabé din gutie'ch reeman xtiidxaman. Abi' dxiin guin naj ni ma baloox reeman. <sup>27</sup> Dxel chi bidxin reeman Antioquía, bato'p reeman bën rliladx ree Jesucrist, persi be reeman diidx loj reeman gra ni been Dios con laa reeman, xhie tëtëe naag guxhalaman nejz din chililadx ree bën ad najt bën Israel Jesucrist. <sup>28</sup> Ni guzu Pab con Bernabé xchej, guzunë reeman bën Antioquía rliladx ree Jesucrist.

## 15

### *Guyu gabilt Jerusalén*

<sup>1</sup> Lën ree dxej zii bidxin bëlzi ree bën Judea luguiedx Antioquía. Abi' guzuloj rëb reeman loj ree bën rliladx Jesucrist, guial bal id zu reeman sen zi'c gunabee Moisejs, ad zajct güün Dios xtol reeman perdon. <sup>2</sup> Dxel Pab con Bernabé dád zro' gudijldiidx reeman con ree bën guin. Dxel bacaabee ree bën rliladx Jesús Pab në Bernabé, në ree ben ren din che reeman Jerusalén chigneenë reeman apóstoles guin ree, con ree bengol rniabee loj ree bën rliladx Jesucrist din guguaa reeman xhienaag güün reeman xcwent sen guin.

<sup>3</sup> Abi' badxe'nejz ree bën Antioquía rliladx ree Jesucrist laa reeman persi zë reeman. Chi zë reeman gudëd reeman niz Fenicia në niz Samaria abi' bagojn reeman bën rliladx ree Jesucrist, bën zojb ree niz ni guial ma rliladx ree bën ad najt ree bën Israel xtiidx Dios. Abi' graczi bën ma rliladx Jesucrist niz ni, dád babaa reeman chi biguejn reeman zian.

<sup>4</sup> Chi bidxin Pab con Bernabé Jerusalén, dxel baca' ree bën rliladx Jesucrist laa reeman, con ree apóstoles, con ree bengol rniabee loj ree bën rliladx Jesucrist. Abi' be ree Pab diidx con Bernabé gra ni been Dios con laa reeman. <sup>5</sup> Per yu' ree bënfarisew ma rliladx Jesucrist, guzuli reeman abi' rëb reeman:

—Bën ad najt ree bën Israel abi' ma rliladx reeman Jesucrist, rüjn naguiejn chu' reeman sen ru ree bën Israel, gagbee tëtëe reeman guial rayal chinal reeman xley Moisejs.

<sup>6</sup> Dxel bado'p ree xi apóstoles Jesús con ree bengol rniabee loj ree bën rliladx Jesucrist din guidoon xhienaag güün reeman. <sup>7</sup> Guial tant canee reeman por zian, dxel guzuli Bëd, rëbaman loj reeman:

—Gradi compniar raliduladx ree Jesucrist, lëjt ragbee guial diizd gocli gulej Dios naj lojdi din chignen xtiidxza'c Jesucrist loj ree bën ad najt bën Israel din chililadx reeman laaman. <sup>8</sup> Abi' Dios bën nünbee luxdoo graczi ree bejn, balüüman guial naj reeman xbejnman guial ma badëed xSprijtaman loj reeman zi'cgajc baneeman du loj ree. <sup>9</sup> Zi'c ruguaa Dios dunuj ree ziangajc ruguaaman laa reeman, din zi'c basiaman du luxdoo



ree ziangajc basiaman luxdoo reeman guial ma rliladx reeman Jesucrist. <sup>10</sup> Yan, ¿chexc zeel ad ridxga'tidi ni ma been Dios abi'za rniabeedi chinal ree b́en rliladx Jesucrist ley ni ni'qui dunuj ree ni'qui dux b́engulal ree ad gojct naguieen ree zi'c rniabee ley guin? <sup>11</sup> Dunuj ree rayagbee guial por ni zagdxe ni been Dad Jesucrist, been Dios dux tol ree perdon zi'cgajc laa reeman.

<sup>12</sup> Dxel bacwëez ro' gra reeman abi' bacaagdiajg reeman ni cayü ree Bernabé con Pab, xcwent gra ree xmilagr Dios ni been reeman loj ree b́en ad najt b́en Israel. <sup>13</sup> Chi gulox gunee reeman, dxel nëgajc Jacob rëb:

—Gradi compniar raliduladx ree Jesucrist, gol bacaagdiajg: <sup>14</sup> Simón Béd be diidx duloj ree xhienaag guzuloj gulej Dios b́en ad najt ree b́en Israel din gac reeman xbejnman. <sup>15</sup> Gra ni ma gojc naj zi'c ni bacaa ree b́en badëë xtiidx Dios loj ree bejn loj xtiidxaman lod rëb:

<sup>16</sup> Chi ma gojc zian,

yayünxhiey ree da bejnan mazri zi'c goc chi naban Davi,

gacxhiey reeman por ree b́en sta naban,

zi'c guban ree bejn xtiamp Davi

abi' por laa reeman yayajcxhiey ree da bejnan.

<sup>17</sup> Din yaguiil ree los demazri ree bejn guial guiën reeman naj,

gra ree b́en nacion ren, yaguiil guial guiën reeman naj,

b́en ma gule reen din gac reeman da bejnan,

b́en guiguiejn ree guza't ree bejn naj.

<sup>18</sup> Zian na Dios, b́en cugojn bejn ree gra ree nine diizd tiamp gulal.

<sup>19</sup> 'Zeel naladxan ad rayalt chu güün naguiejn b́en ad najt ree b́en Israel par chinal reeman ley, laa reeman guial ma basa'n xcostumbr reeman par chinal reeman xnejz Dios. <sup>20</sup> Yan con yaxhaal ree tijb gui'ch loj reeman guial ad rayalt gaw reeman ni ragle' loj ni naj xdios reeman, ad rayal tëët sunë reeman ben ren b́en ad najt lacheel reeman, ad rayalt gaw reeman bëël rberejn ni'qui rejn. <sup>21</sup> Zian yaguie'ch ree loj reeman, din diizd tiamp gulal tijb gaj guiedx yu' b́en rulüü laa reeman xhie rën guiëb xley Moisejs ni rool reeman lën ree yadoo dxej raziiladx ree bejn.

<sup>22</sup> Dxel apóstoles guin ree con ree bengol rniabee loj ree b́en rliladx Jesucrist, con los demazri ree b́en rliladx Jesucrist, rëb reeman gucaabee reeman b́en guixhiaalnë reeman Pab con Bernabé din che reeman Antioquía. Abi' bacaabee reeman Judas, b́en la gajc Barsabás, në Silas, laa reeman rajp guialrniabee loj ree b́en rliladx Jesucrist. <sup>23</sup> Abi' guxhaalnë reeman laa reeman tijb gui'ch ni rëb:

“Dunujn nayajcan xi apóstoles Jesús, con ree bengol rniabee loj ree b́en rliladx laaman, në los demazri ree b́en rliladx laaman. Ragajpdiozan lëjt b́en ad najt ree b́en Israel, per nayajc ree compniar raliduladx ree Jesucrist, lëjt zojbidi Antioquía, në los demazri ree b́en zojb ree niz Siria nëtëë niz Cilicia. <sup>24</sup> Ma bayagbeen guial yu' ree b́en duladxan brii sin dux tiidxbeen, abi' cagu'nawëëg reeman lëjt con xtiidx reeman persi ad radxejlt xhie güüнди guial na reeman lojdi rayal chu'di sen ni ru ree b́en Israel güün tëëdi zi'c rniabee xley Moisejs, per ad dunujtan baxhaal laa reeman. <sup>25</sup> Zeel bado'pan abi' raguie'chan guial zagdxe naj yacaabee bëlzi dux compniaran din guidganaj reeman lëjt, guidnë tëë reeman tio'p dux compniaran, Bernabé con Pab, b́en rayën da'tan. <sup>26</sup> Zien ree ni guijdx cuchaagloj reeman guial cayüjn reeman sirv loj Dad Jesucrist. <sup>27</sup> Dxel cayxhaalnë'n laa reeman Judas con Silas, laa reeman na lojdi gra con quiyb xtiidx reeman. <sup>28</sup> Abi' zi'c naj xgab bazaladx xSprijt Dios du lojn, dxel achetri naguiejn rüjn yanabeen lëjt ni güüнди, ni rayalzi cu'guijquidi naj guial, <sup>29</sup> ad gawidi xbëël ree be ni rbe'c ree bejn loj ni naj xdios reeman, ad gaw tëëdi bëël rberejn, ni'qui rejn, ad sunëdi ben ren b́en ad najt lacheelidi. Bal gapidi cudad ad züjntidi gra ree nine, zagdxequi güüнди. Gagnë Dios lëjt.”

<sup>30</sup> Zian gojcan, gui'ch guin naj ni guxhaalnē reeman guidap ree bēn guin par luguiedx Antioquía. Ni bato'p reeman bēn rliladx ree Jesucrist abi' bayü reeman gui'ch guin loj reeman. <sup>31</sup> Chi biil reeman laan, dád nix guyu luxdoo reeman por ree diidx zagdxe ni zēed lojn. <sup>32</sup> Abi' Judas con Silas guial nēgajc reeman rajp quiarguejn par gudēed reeman xtiidx Dios, dxel zien naj ni guneenē reeman bēn rliladx ree Jesucrist, bagu' reeman luxdoo reeman con xtiidx reeman. <sup>33</sup> Chi ma gudēd zien dxej za' ree Judas con Silas ni, bazaadiidxnē ree bēn rliladx Jesucrist laa reeman din yaguiaj reeman lod za' ree bēn guxhaal laa reeman, rēb reeman loj reeman: “Chignē Dios lējt zagdxe.” <sup>34</sup> Per Silas beenman xgab baya'nman ni mazri. <sup>35</sup> Abi' Pab con Bernabé baya'n reeman Antioquía mazri, laa reeman con ree ben ren basnuu balüü reeman gutie'ch tēē reeman xtiidxza'c Jesucrist loj ree bejn ni.

*Ni barojp volt brii Pab biglūüman xtiidx Dios guiedx ren ree*

<sup>36</sup> Chi gudēd tio'p choon dxej, dxel rēb Pab loj Bernabé:

—Yo' stijb yugnaj dux compniar ree bēn rliladx ree Jesucrist, graczi ree luguiedx lod ma bugtie'ch xtiidx Dios, din yuquiaa xhienaag za' reeman.

<sup>37</sup> Bernabé guyēn ninē reeman Waj, bēn la gajc Marcw. <sup>38</sup> Per Pab ad cwējbt ninē reeman laaman, din chi we reeman niz Panfilia guro'nladxaman laa reeman, ad binētraman laa reeman. <sup>39</sup> Abi' ni'qui tijbaman ni'qui zatijbaman ad baya'nt conform, zianz gula' lasa' reeman. Dxel binē Bernabé Marcw, guyu reeman loj barcw zē reeman yuj la Chipre ni riga' loj nijsdoo, <sup>40</sup> dxel gulej Pab Silas din chinēman laaman abi' rēb los demazri ree bēn rliladx Jesucrist loj reeman guial chinē Dios laa reeman zagdxe. <sup>41</sup> Zianz gudēd reeman niz Siria nē niz Cilicia, ragu' reeman luxdoo ree bēn rliladx Jesucrist niz ni.

## 16

*Bine ree Pab con Silas Timoteo*

<sup>1</sup> Chi bidxin Pab con Silas guiedx Derbe nē guiedx Litra abi' Litra bidxaagloj reeman tijb bēn rliladx Jesucrist, laman Timoteo, xniaaman naj bēn Israel, nēman rliladx Jesucrist guíaad xdadaman naj bēn grieg. <sup>2</sup> Graczi ree bēn rliladx Jesucrist, bēn zojb ree guiedx Litra nē Iconio ruza't laaman zagdxe. <sup>3</sup> Dxel rēb Pab chinēman Timoteo, per yaløj badxe'man laaman sen ni ru ree bēn Israel, chitēē xhie guiēb ree bēn Israel riga' niz ni, din gra reeman ragbee guial naj xDadaman bēn grieg. <sup>4</sup> Graczi ree guiedx ni gudēd reeman bagojn reeman bēn rliladx ree Jesucrist ni rayal güün reeman zi'c ma rēb ree apóstoles, con ree bengol rniabee loj ree bēn rliladx laaman Jerusalén. <sup>5</sup> Zianan zeel guzudxi'ch ree bēn niz ni loj guialrliladx reeman Jesucrist, abi' guixie guixie gojcxhie j mazri ree bēn rliladx laaman.

*Balüüloj tijb bēn Macedonia loj Pab*

<sup>6</sup> Chi ma gojc zian ad baslaat xSprijt Jesús nignee reeman xtiidx Dios niz Asia. Dxel gudēdzinejz reeman niz Frigia nē niz Galacia <sup>7</sup> abi' bidxin reeman niz Misia. Ni been reeman xgab niej reeman niz Bitinia, per ad cwējb gajct xSprijt Dios niej reeman niz ni. <sup>8</sup> Dxelri gudēdzinejz reeman niz Misia, bidxin reeman guiedx Troas. <sup>9</sup> Yagaj, guxhinzii guzajc Pab zi'c rulüü cane'xhchaalaman. Baguiaaman tijb xinguaaaw zēed niz Macedonia, za'lix rzajquix liaadx loj Pab, rēbix:

—Guda niz Macedonia, taguieen dunujn yudar.

<sup>10</sup> Guloxzi baguiaa Pab zian, laa baguieen gajcan porvinid din yo'n niz Macedonia guial bayagbeen Diosan naj bēn cabejdx dunujn niz ni par yatie'chan xtiidxza'c Jesucrist.

*Bidxin ree Pab con Silas Filipos*

<sup>11</sup> Badxu'n loj barcw luguiedx Troas abi' bio'n naliduu Samotracia. Chi bareguiaal badxinan guiedx Neápolis. <sup>12</sup> Yagaj badxoon bio'n Filipos, guiedx mazri zojbloj niz Macedonia, per Rom rniabee guiedx zii, ni badxu'n bēlzi ree dxej. <sup>13</sup> Abi' tijb dxej raziiladx ree bejn, bariin luguiedx guin bio'n tijb ruguiiwro', lod rayagbeen rado'p ree bēn Israel par cwedx reeman Dios. Abi' badxu'n baneen xtiidxza'c Jesucrist loj ree bēngunaa bado'p yagaj. <sup>14</sup> Tijb ree bēngunaa guin la Lidia, najman bēn Tiatira, ruto'man lajd zagdx ni culor murad. Diidxli rdxebaman Dios abi' cucaagdiajgaman. Dios guxhal xquiarguejnman din gucaagdiajgaman zagdx gra ni rēb Pab. <sup>15</sup> Abi' gurobnijsaman con gra xfamilaman. Dxel gunabaman favor du lojn, naman:

—Bal walidi rliladxidi guial ma rliladxan Jesucrist, gol baya'n lidxan.

Dxel beenman naguiejn baya'nan lidxaman.

<sup>16</sup> Dxel tib volt, chi zio'n lod rej ree bejn par cwedx guiniab reeman Dios, badxaaglojn tijb biingunaa, yu' xindxab luxdoom, abi' por xguialrniabee xindxab guin rnieeya'm guiáad ree bēn guzii laam dád zro' milia rüjn reeman gan por dxiin guin. <sup>17</sup> Dxel bidnalim Pab con dunujn, rbidxa'm rēbim:

—Bēn guie ree rüjn xchiin Dios yu' xanyabaa, laa reeman gugojn lējt xhienaag gaquidi perdon.

<sup>18</sup> Zien dxej da't beenm zian, xt chi balenya' Pab, dxel bayejcaman rēbaman loj xindxab yu' luxdoom:

—Por xguialrniabee Jesucrist, rniabeen lüj din yariil luxdoo biin guie.

Loj hor zii gajc barii xindxab guin luxdoom.

<sup>19</sup> Per chi gogbee ree bēn guzii laam guial ad zajctri güünm gan milia par laa reeman, dxel gunaaz reeman Pab con Silas, binē reeman laa reeman roylay loj guxtis. <sup>20</sup> Chi bayü reeman laa reeman loj ree guxtis guin, rēb reeman:

—Xin Israel guie ree rbēē reex wadijl du ladx ree, <sup>21</sup> abi' ruluü reex costumbr ree ni ad zatiēēbt ree yaguieen ree ad zajc tēēt yaguieen ree, din ben Rom dunuj ree.

<sup>22</sup> Dxel wajs gra ree bēn guin contr laa reeman, abi' gunabee ree guxtis guin gulēē xab Pab con Silas din quin reeman laa reeman con var. <sup>23</sup> Chi gulox gudijn da't reeman laa reeman, dxel bilu' reeman laa reeman ladxguiib abi' gunabee reeman bēn rajp ro' ladxguiib guin din gapdxi'chaman laa reeman. <sup>24</sup> Chi biguiejn bēn rajp ro' ladxguiib guin zian, dxel bilu'man laa reeman xt lēn quart bigra yu' lēn ladxguiib guin, guxhiiman guia' reeman loj tabl naal con caden.

<sup>25</sup> Per garol guiaal, la'tgaj cabejdx canab Pab con Silas Dios, cayool tēē reeman cant par laaman, dxel cucaagdiajg los demazri ree bēn yu' ladxguiib guin. <sup>26</sup> Dxel tijbzi golp guzuloj xudoxh, niz ni niz guie rurliá xcimiant ladxguiib guin. Loj hor zii gajc bixal gra ree xportan abi' baxiec ree caden naxii gra ree bēn yu' lēnan. <sup>27</sup> Chi baban bēn rajp ro' ladxguiib guin abi' baguiaaman zojbyal gra ree xportan, gulēē xi espadaman din nugüjt laagajcaman guial gunaladxaman gra ree bēn yu' ladxguiib guin ma baxüün. <sup>28</sup> Dxel gurixdiaj Pab, rēbaman lojman:

—Ad güünnaa lüj gajc, laa dugran nadxu' guie.

<sup>29</sup> Laa gunab gajc bēn guin tijb guij, dxel ruxüünman guyuman, rnijman guial rdxebaman, bigzuxibaman loj Pab nē loj Silas. <sup>30</sup> Dxel babēēman laa reeman, gunabdiidxaman loj reeman, rēbaman:

—Dad, gol guna, ¿xhie rayal günan din güün Dios naj perdon?

<sup>31</sup> Badxi' reeman laan, rēb reeman:

—Bililadx Dad Jesucrist, zian gaquil perdon con xfamilil.

<sup>32</sup> Abi' be reeman xtiidx Dios lojman con loj gra ree bēn zojb lidxaman. <sup>33</sup> Zianz guxhin zii gajc gudiiibaman lod nadxeelguijdx reeman, dxel gurobnijsaman con gra xfamilaman. <sup>34</sup> Abi' bignēman laa reeman lidxaman, dxel badēēman ni gudaw reeman.

Guiáad laaman dád nix yu' luxdooan con gra xfamilaman Guial ma rliladx reeman Dios.

<sup>35</sup> Chi bareguiaal, guxhaal ree guxtis guin suldad ree persi biguiedx reeman loj b́en rajp ro' ladxguiib guin guial guslaaman Pab con Silas. <sup>36</sup> Abi' ŕeb b́en rajp ro' ladxguiib guin loj Pab:

—Ma na ree guxtis guial guslaan ĺejt. Yan ma zajc yaguiajdi ad chu'di xgab.

<sup>37</sup> Per ŕeb Pab loj ree suldad guin:

—Nayajcan quijb ben Rom abi' gudijn reeman dunujn delant loj ree b́en guiedx, ni'quid baneet reeman mod nad́eedan cwent loj reeman con badxe' reeman dunujn ladxguiib. Abi' yan, ¿guslaa reeman dunujn ralan ya? ¡Ad zajctan zian! Gui't quijb laa reeman guidgalé́e reeman dunujn.

<sup>38</sup> Abi' bicojn ree suldad guin guxtis guin ree zian, dxel dád bidxeb reeman chi biguiejn reeman guial ben Rom naj Pab con Silas. <sup>39</sup> Dxel wej reeman bignab reeman perdon loj Pab con Silas babé́e té́e reeman laa reeman, ŕeb reeman loj reeman din yaza reeman luguiedx guin. <sup>40</sup> Chi barii reeman ladxguiib, wej reeman lidx Lidia. Zianz chi gulox guneené́ reeman los demazri ree b́en rliladx ree Jesucrist din chu' luxdoo reeman sudxi'ch reeman loj ni rliladx reeman, dxel baza reeman.

## 17

### *Bidxin ree Pab con Silas Tesalónica*

<sup>1</sup> Chi zé́ Pab con Silas, gudéd reeman niz Anf́ipolis né́ niz Apolonia zianz bidxin reeman luguiedx Tesalónica lod yu' tijb xyadoo ree b́en Israel. <sup>2</sup> Abi' zi'c goc xcostumbr Pab, wejman ĺen yadoo guin, choon dxej raziiladx ree bejn. Wejman bigneenémaan laa reeman xtiidx Dios. <sup>3</sup> Bagojnman balǘü té́émaan laa reeman loj xtiidx Dios lod ŕeb guial naj sagdiaj Cristo, abi' chi ma güjtaman yabanman stijb. Ŕebaman loj reeman:

—Jesús ruzat gajcan lojdi, laagajcaman naj Cristo din yabé́émaan dunuj ree loj dol.

<sup>4</sup> Yu' ree b́en Israel guin bililadx abi' bachajg reeman Pab con Silas. Né́ zien ree b́en grieg ŕen Dios bililadx, nété́e zien ree béngunaa zojbloj bililadx Jesús. <sup>5</sup> Per ree b́en Israel ad bililadxt Jesucrist, gudédloj reeman abi' bato'p reeman benmal ziza ree lunejz persi gulé́e reeman wadijl luguiedx guin, abi' guyu reeman lidx Jasón, raguiil reeman Pab con Silas din cwé́e reeman laa reeman guzuj reeman laa reeman loj ree b́en guiedx guin. <sup>6</sup> Per guial ad badxejlt reeman laa reeman yagaj, dxel guxoobyuj reeman Jasón né́ ree ben ren b́en rliladx Jesucrist, biné́ reeman laa reeman loj guxtis, rbixdiaj reeman, ŕeb reeman:

—Tio'p ree xin cabé́e wadijl guidib guidxliuj, ma bi't reex guie, <sup>7</sup> abi' lidx Jasón zojb reex. Laa reex con gra ree b́en nuchajg laa reex, ad cayüjnt reex zi'c rniabee xley rey César, din ŕeb reex guial yu' zatijb rey la Jesús.

<sup>8</sup> Chi biguiejn ree guxtis guin zian con ree bejn, gra loj xgab been reeman. <sup>9</sup> Per Jasón con los demazri ree b́en guyu ladxguiib guin gudijx reeman loj ree guxtis guin, dxel baslaa reeman laa reeman.

### *Bidxin Pab con Silas Berea*

<sup>10</sup> Guxhinzii gajc, guxhaal ree b́en rliladx Jesucrist Pab con Silas luguiedx Berea. Chi bidxin reeman ni, wej reeman ĺen xyadoo ree b́en Israel. <sup>11</sup> Mazri benza'c naj ree b́en Israel guin guial loj ree b́en Israel zojb Tesalónica. Con gan bacaagdiajg reeman ni ŕeb Pab. Abi' guixie guixie rusiid reeman xtiidx Dios, din gagbee reeman waliqui ni ŕeb Pab ya. <sup>12</sup> Zeel dád zien reeman bililadx Jesucrist, nété́e zien b́en grieg bililadx laaman zi'c ree xinguaaw zi'c ree béngunaa zojbloj niz ni. <sup>13</sup> Chi gogbee ree b́en Israel zojb Tesalónica guial catie'ch Pab xtiidx Dios luguiedx Berea, dxel wej reeman ni bigtiaalguiiw reeman bejn ree din guidxe'ch reeman Pab. <sup>14</sup> Per ree b́en rliladx Jesucrist ad goglaat reeman, laa guxhaal gajc reeman Pab niz ro' nijsdoo. Guiáad Silas con Timoteo baya'n reeman

mazri Berea. <sup>15</sup> Abi' ree bën biglu'nejz Pab, xt Atenas binë reeman laaman. Chi baza reeman ni, bignë reeman xruson Pab din diob che Silas con Timoteo chinal reeman laaman.

### *Bidxin Pab Atenas*

<sup>16</sup> La'tgaj cabëz Pab guidxin Silas con Timoteo luguiedx Atenas, gyunayaman guial baguiaaman zien da't ni rajp ree bejn niz ni zi'c dios. <sup>17</sup> Zeel wejman lën xyadoo ree bën Israel bigneenëman laa reeman në los demazri ree bën rën Dios zi'c ree bën Israel, guixie guixie rnieenëman chutëez bën rdxaglojman niz galay guiedx guin. <sup>18</sup> Guneenë tëëman garol ree bën zinal ni balüü bën brii laj epicureo, në za garol ree bën estoicos. Abi' yu' reeman rëb:

—¿Xhienin rniee xin guin zeel rniee da'tix?

Yu' tëë reeman rëb:

—Rulüü xtiidx dios ren ree bën ad naguieenbeet ree catie'chix.

Rëb reeman zian guial caneenë Pab laa reeman xtiidxza'c Jesucrist në xcwent guial babanman stijb. <sup>19</sup> Dxel binë reeman Pab tijb luar la Areópago, lod rado'p reeman. Abi' gunabdiidx reeman lojman, rëb reeman:

—¿Zajc nal ya xhie ree nicüb guin zidgalüül niz guie? <sup>20</sup> Din rül diidx du lojn ni ad rayagbeetan, zeel rayënan yayagbeen xhie rën guiëban.

<sup>21</sup> Graczi ree bën Atenas, con los demazri ree benzit zojb ni, zianczi za' reeman zian. Ruladx reeman téd reeman dxej, gucaagdiajg reeman o gü reeman ni naj ree nicüb.

<sup>22</sup> Dxel guzuli Pab galay reeman lod la Areópago, rëbaman:

—Bën Atenas, por graczi ni ma baguian, ma gogbeen guial dád zien ree xdiosidi. <sup>23</sup> Abi' chi zizaan ziquian luar lod rbejdxidi xdiosidi, badxejlan tijb luar lod ca ree diidx ni rëb: “Par Dios ad naguieenbeet ree.” Yan, Dios rbejdxidi sin guial ad nünbeetidi laaman, xtiidxaman naj ni zidguien lojdi.

<sup>24</sup> 'Dios guin been guidxliuj con graczi ni yu' lojn, laaman rniabee xanyabaa në loj guidxliuj. Ad za'taman lën yadoo ni rüjn ree bejn. <sup>25</sup> Ad riaadx tëtaman chu güün xhienin par laaman, din laaman naj bën razaladx bi nabajnnë' ree, laaman razaladx guialnaban duloj ree në ree ni rayaadx ree.

<sup>26</sup> 'Por tijb bejn been Dios din chu' zienloj bejn loj guidxliuj din cwe reeman guidib loj guidxliuj. Abi' ma naj xhie tiamp guiban reeman ban tëë cwe reeman. <sup>27</sup> Din yaguüil reeman Dios majsi zi'c chi rgan bejn chi raguüilaman xhienin, zian güün reeman din yadxejlaman. Majsi diidxliczi ad zijtt za'man par gra bejn. <sup>28</sup> Din por Dios nabajn ree, por laaman raniib ree radxoo tëë ree, por laaman nadxu' ree loj guidxliuj. Zi'c rëb tëë ree xbénrignia'di, chi rëb reeman: “Dunuj ree nayajc xi'n Dios.” <sup>29</sup> Zeel bal nayajc ree xi'n Dios, ad rayalt yaguieen ree xgab guial Dios najnë or, o plajt, o guiaj ya zi'c naj ni rüjn ree bejn zi'c naj xixgab reeman. <sup>30</sup> Tiamp gulal cwëjb Dios been ree bejn zi'c naladx reeman guial achetczi ragbee reeman, per yan gra ladczi canabeeman gra ree bejn din yayüjn reeman xgab por xtol reeman. <sup>31</sup> Din Dios ma gulej tijb dxej ni yadëed ree bejn cwent lojman, dxej ni güün xguialguxtisaman. Ma gulej tëëman Jesucrist din güünman guialguxtis guin, abi' din guiguien guial gulejman laaman par zian, basbanman laaman chi gütaman.

<sup>32</sup> Chi biguiejn reeman rëb Pab guial baban Jesucrist loj ree bengüt, yu' reeman baze' laaman, yu' tëë reeman rëb:

—¿Zatijb dxej yasnuu yacaagdiajgan ni canal!

<sup>33</sup> Dxel baza Pab lod za' reeman. <sup>34</sup> Per yu' reeman bachajg laaman, abi' bililadx reeman xtiidx Dios. Loj reeman no'ch tijb bën zojbloj lën Areópago laman Dionisio, në stijb béngunaa la Dámaris në ree ben ren.

## 18

### *Bidxin Pab Corinto*

<sup>1</sup> Dxel brii Pab Atenas zëman Corinto. <sup>2</sup> Yagaj bidxaaglojman tijb bën Ponto laman Aquila, zëedaman diaa Israel. Aquila con xbéngunaaman Priscila qui bazari reeman niz Italia guial gunabee rey Claudio yarii gra ree bën Israel Rom. Dxel wej Pab bitixlojman laa reeman. <sup>3</sup> Abi' guial lasa'gajc dxiin ni rüjnman rüjn reeman, rüjnchaaw reeman guid ni rajc ree carp, dxel baya'nnëman laa reeman persi been reeman dxiin guin. <sup>4</sup> Abi' beegaj dxej raziiladx ree bën Israel, rej Pab rigneeman xtiidx Dios lën xyadoo ree bën Israel, zi'c ree bën naj ree bën Israel zi'c ree bën ad najt bën Israel raguuilaman mod din chililadx reeman ni rëbaman.

<sup>5</sup> Chi baza ree Silas con Timoteo niz Macedonia, bidxin reeman Corinto, dxel achetri ni ren been Pab, ganaxzi xtiidx Dios guneeman loj ree bejn, balüü tëëman bën Israel ree guial Jesús naj Cristo bën cabëz reeman. <sup>6</sup> Per guzuloj bidxe'ch reeman Pab abi' gunee reeman diidxguijdx contr laaman. Dxel gudxijp xabaman zi'c tijb sen guial ad ruzoobt reeman diidx, abi' rëbaman loj reeman:

—Lëjt gajc rajp dol guial guizëëbidi delant loj Dios, ad najt ra'p dol. Diizd yan chiguien xtiidx Dios loj ree bën ad najt bën Israel.

<sup>7</sup> Dxel bariiman lën yadoo guin wejman lidx bën la Justo, rën bën zii Dios, gajxh gajc yadoo guin naj lidxaman. <sup>8</sup> Abi' Crispo, tijb bën rniabee lën xyadoo ree bën Israel, bililadxaman Dad Jesucrist con gra xfamilaman. Në zien ree bën Corinto bililadx chi biguiejn reeman xtiidx Jesucrist abi' gurobnijs reeman. <sup>9</sup> Tijb guxhin balüüloj Dios loj Pab, rëbaman lojman:

—Ad rdxebil, basnuu gunee da diidxan, ad gucwëëzil, <sup>10</sup> naj za'në' lüj, achutdzi zajc güün lüj xhienin, din luguiedx guie zien da't bejn naj par naj.

<sup>11</sup> Zianan zeel baya'n Pab Corinto tibijz garol, balüüman bën guin ree xtiidx Dios.

<sup>12</sup> Per chi goc Galión gobernador Acaya, bën Israel ree bachajg lasa' reeman persi gunaaz reeman Pab binë reeman laaman loj gobernador guin, <sup>13</sup> rëb reeman loj gobernador guin:

—Xin guie ziza cayüjnx gan bejn ree guial guiën reeman Dios zi'c tijb mod ni ad najt loj ley.

<sup>14</sup> Ma niniee Pab, chi gunee Galión rëbaman loj ree bën Israel guin:

—Bal niajcan tijb falt o tijb guialquia narooob beenman zeel zidnëdi laaman, züncwentan lëjt. <sup>15</sup> Per najn por ree diidx në por laj ree bejn nëtëë por xleydi, zeel lëjt gajc gol gunaj xhienaag güündi, ad rëntan gūnan guialguxtis xcwent ree ni guin.

<sup>16</sup> Abi' laa babëë gajcaman laa reeman roylay guin. <sup>17</sup> Dxel yagaj gajc gunaaz gra reeman Sóstenes, bën rniabee lën xyadoo ree bën Israel abi' gudijn reeman laaman, per ni'quid beencwentt gobernador guin laa reeman.

### *Badxin Pab Antioquía*

<sup>18</sup> Zienri ree dxej baya'n Pab Corinto. Dxel bazaadiidx nëman los demazri ree bën rliladx Jesucrist, abi' bazanëman Priscila con Aquila, guyu reeman loj barcw zë reeman niz Siria. Per chi gad reeman grii Cencrea bagaj guiic Pab, por tijb promejs ni beenman.

<sup>19</sup> Chi bidxin reeman Éfeso, ni basa'n Pab Priscila con Aquila, abi' wejman lën xyadoo ree bën Israel zojb ree ni, bigneenëman bën Israel rado'p ree lën yadoo guin. <sup>20</sup> Abi' guyën reeman niaglaa Pab ni mazri, per ad cwëjbtaman. <sup>21</sup> Rëbaman loj reeman:

—Ma yaya'n, bal gagnë Dios naj, guidganan lëjt stijb.

Dxel guyuman loj barcw bazaman Éfeso. <sup>22</sup> Chi bidxinman Cesarea, dxel wejman Jerusalén bicajpdiozaman bën rliladx ree Jesucrist, dxelri zëman Antioquía. <sup>23</sup> Chi ma gojc xchej za'man Antioquía, dxel briiman zatijb. Wejman tijb gaj ree guiedx riga' niz Galacia në niz Frigia, ragu'man luxdoo gra ree bën rliladx Jesucrist.

### *Gutie'ch Apolos xtiidx Dios Éfeso*

<sup>24</sup> Tiamp zii bidxin tijb b́en Israel luguiedx Éfeso, laman Apolos, gojlaman Alejandría. Dád radxejlaman diidx par guinieeman abi' dád rajcaman xtiidx Dios. <sup>25</sup> Basiidaman xtiidx Dios, dxel con gan balüüman bejn ree, zagdxe tēē rüman xtiidx Jesús loj reeman, majsi ad ragbeetaman par xhieri mazri rirobnijs bejn, tijbzi xcwent xguial waroobnijs Waj ragbeeman. <sup>26</sup> Abi' Apolos, sin guialrdxeb guzuloj caneeman xtiidx Dios loj ree b́en Israel lēn xyadoo reeman, zianz chi biguiejn Priscila con Aquila ni rēbaman, dxel bignē reeman laaman lidx reeman. Ni balüü reeman laaman persi basnuu basiidaman mazri xtiidx Dios. <sup>27</sup> Chi been Apolos xgab cheman niz Acaya, gra ree b́en rliladx Jesucrist b́en za'nē laaman, badxe' reeman luxdooan din cheman, abi' guxhaal reeman tijb gui'ch loj ree b́en rliladx Jesucrist b́en zojb ree niz Acaya din yaca' reeman laaman zagdxe chi guidxinman niz ni. Chi bidxinman niz Acaya dád beenman yudar b́en ma rliladx ree Jesucrist guial gognē Dios laa reeman. <sup>28</sup> Din delant loj gra ree bejn rēbaman guial ad laat zē ree b́en Israel, abi' achutczy gojc nadxi' xtiidxaman guial graczi ni rēbaman naj diidxli, balüü tēēman loj xtiidx Dios gra luar lod rēb guial Jesús naj Cristo b́en gulējz reeman.

## 19

### *Bidxin Pab Éfeso*

<sup>1</sup> La'tgaj za' Apolos Corinto, wej Pab guiedx riga' ree niz ruguia', abi' bidxinman Éfeso, yagaj bidxaaglojman bēlzi ree b́en rliladx Jesucrist. <sup>2</sup> Abi' gunabdiidxaman loj reeman rēbaman:

—¿Guyu xSprijt Dios luxdoodi ya chi bililadxidi?

Badxi' reeman laan rēb reeman:

—Ni'quid waguiejntan guial yu' xSprijt Dios.

<sup>3</sup> Dxel rēb Pab loj reeman:

—¿Xhieza naag gurobnijsidi?

Badxi' reeman laan rēb reeman:

—Barobnijsan zi'c balüü Waj bejn ree.

<sup>4</sup> Dxel rēb Pab loj reeman:

—Walican baroobnijs Waj bejn, b́en bayüjn ree xgab por xtol reeman. Per rēbaman guial rayal chililadx reeman b́en zēēd xijchaman abi' laaman naj Jesús, b́en naj gajc Cristo.

<sup>5</sup> Chi biguiejn reeman zian, dxel gurobnijs reeman por Dad Jesús. <sup>6</sup> Abi' chi guxhoob yaa Pab guiyc reeman, dxel guyu xSprijt Dios luxdoo reeman, zianz guzuloj canee reeman diidx ren ree. Dxel guzuloj cudēēd reeman xtiidx Dios loj ree bejn. <sup>7</sup> Loj gra reeman naj cost chiptio'p xinguaaw.

<sup>8</sup> Choon bēēw wej Pab lēn xyadoo ree b́en Israel zojb ni. Sin guialrdxeb guneenēman laa reeman xtiidx Dios, guneenēman laa reeman abi' beenman naguiejn din güünman gan chililadx reeman xhienaag naj xguialrniabee Dios. <sup>9</sup> Per garol reeman gojc nad ad guyēnt reeman nililadx reeman, al guzuloj gunee reeman diidxguijdx por xtiidx Jesucrist delant loj ree bejn. Dxel bariica Pab loj reeman con ree b́en ma rliladx Jesucrist, binēman laa reeman lēn tijb xzcuel b́en la Tiranno. Ni balüüman laa reeman guixie guixie, <sup>10</sup> loj tio'p ijz beenman zian. Abi' graczi ree b́en zojb niz Asia, zi'c ree b́en Israel zi'c ree b́en ad najt b́en Israel, bacaagdiajg reeman xtiidx Dad Jesucrist. <sup>11</sup> Abi' por xguialrniabee Dios been Pab milagr narooob ree, <sup>12</sup> xt ree xbay Pab nē ree lajd rtia lojman zi'c lantar rignē reeman loj ree b́enragxuu, abi' rayajc reeman guialguijdx ni rajc reeman, rarii tēē ree xindxab yu' luxdoo reeman.

<sup>13</sup> Per guyu bēlzi ree b́en Israel ziza rabēē reeman xindxab luxdoo ree bejn, abi' guyēn reeman nūjnnē reeman dxiin laj Dad Jesucrist dxel rēb reeman loj ree xindxab guin:

—¡Por Jesús b́en ruza't Pab, rniabeen lējt, gol barii!

<sup>14</sup> Zian naj ni been gajdx ree xi'ngaan tijb b́en Israel la Esceva, b́en goc tijb bixhioz rniabee ree bixhioz. <sup>15</sup> Per tib volt tijb ree xindxab guin badxi' xtiidx reeman ŕebaman:

—Núnbeen Jesús ragbee t́een chunin naj Pab, per ĺejt ni'quid núnbeetan ĺejt.

<sup>16</sup> Abi' b́en yu' xindxab guin luxdoo guzuloj caguinman laa reeman, con gojl ni yu'man beenman laa reeman gan. Dád gudijnman laa reeman abi' baxüün reeman barii reeman ĺenü guin, ziladzi reeman nadxeelguijdx t́ee reeman. <sup>17</sup> Graczi ree b́en zojb Éfeso, zi'c ree b́en Israel zi'c ree b́en ad najt b́en Israel, gogbee reeman gojc zian, dxel dád bidxeb reeman abi' baza't reeman Dad Jesús zagdx.

<sup>18</sup> Nē zien ree b́en rliladx Jesucrist bidxin abi' delant loj gra ree bejn baneero' reeman gra ni mal ma been reeman. <sup>19</sup> Nētēe zien ree b́en been guialbidxaa bidxinnē xlibr reeman abi' baze'c reeman laa reen delant loj gra ree bejn. Chi babēe reeman cwent plac lasajc ree libr guin dxel cost tü'pchii mil milia plajt lasajc reen. <sup>20</sup> Abi' zian bire'ch xtiidx Jesucrist biguien t́ee xguialrniabeeman.

<sup>21</sup> Chi ma gudēd gojc zian, been Pab xgab cheman niz Macedonia nē niz Acaya xt yadxinman Jerusalén. Rēb t́eēman guial chi ma wejman Jerusalén dxelri cheman nē Rom. <sup>22</sup> Abi' guxhaalaman tio'p b́en rüjn laaman yudar, Timoteo con Erasto, persi wej reeman niz Macedonia la'tgaj baya'nman mazri niz Asia.

### *Gojc nadxeb Éfeso*

<sup>23</sup> Lén ree dxej zii been ree b́en Éfeso nadxeb por xtiidx Jesús. <sup>24</sup> Din Demetrio, b́en rüjn ree ni plajt, rüjnman figur plajt ni naj ree form xyadoo dios la Diana, ragbeeman guial dád rüjnman gan con ree b́en rüjnnēman dxiin. <sup>25</sup> Dxel bato'paman laa reeman con ree ben ren b́en rüjn gajc ree lasa' dxiin guin, abi' ŕebaman loj reeman:

—Gol bacaagdiajg, ĺejt ragbee guial loj dxiin guie raguieen ree gan milia ro'. <sup>26</sup> Per yan ĺejt ruguiaa riguiejn t́eedi, Pab ziza cayēbix guial dios ni rüjn ree bejn ad diost reen. Abi' zian cayujnx gan caliladx zien ree bejn laax, ad tijbtizi luguiedx guie, nē guidib niz Asia. <sup>27</sup> Dxel nadxeb yasēeb dux chiin ree, abi' ad tijbtizi dux chiin ree, nē xyadoo dios Diana ad zayagbeetri ree bejn laan zi'c núnbee reeman laan yan abi' achutri guidxga' xguialrniabee dios Diana, b́en rēn ree bejn guidib niz Asia nē guidib loj guidxliuj.

<sup>28</sup> Chi biguiejn reeman zian, bidxe'ch reeman abi' gurixdiaj reeman ŕeb reeman:

—¡B́en zojbloj naj Diana, xdios ree b́en Éfeso!

<sup>29</sup> Abi' gurixdiaj ree b́en guiedx guin wajs reeman, gunaaz reeman tio'p ree b́en Macedonia, Gayo nē Aristarco, b́en rzanē ree Pab. Dxel guxoobyuj reeman laa reeman, binē reeman laa reeman lod rajc xgabilt ree b́en guiedx. <sup>30</sup> Guyēn Pab niuman yagaj din ninieenēman bejn ree, per ad cwējbt ree xcompniaraman, b́en ma rliladx ree Jesucrist. <sup>31</sup> Nētēe loj ree guxtis Asia guin no'ch bēlzi ree xmiw Pab, laa reeman guxhaal ruson lojman guial mejorli ad chu'man ni. <sup>32</sup> Zianz gurixdiaj ree b́en guin ŕeb reeman ni rent ni ren, been reeman nadxeb abi' zien reeman ni'quid ragbeet par xhie bado'p reeman yagaj. <sup>33</sup> Dxel galay ben zien guin babēe ree b́en Israel tijb xcompniar reeman b́en la Lejandr din guinieenēman b́en guin ree. Dxel beenman sen loj ree b́en guin din yacwēez ro' reeman din guinieeman por ree b́en Israel delant loj ree b́en guiedx guin. <sup>34</sup> Per chi gogbee reeman guial najman b́en Israel, tiblazujzi gurixdiaj reeman cost tio'p hor, ŕeb reeman:

—¡B́en zojbloj naj Diana, xdios ree b́en Éfeso!

<sup>35</sup> Dxel chi been squiarban luguiedx guin gan bacwēez ro' reeman, dxel ŕebaman:

—B́en Éfeso, gra b́enguidxliuj ragbee guial luguiedx guie zianczi rniaj ree bejn xyadoo dios Diana abi' rēn t́ee ree bejn dios Diana biajb xanyabaa. <sup>36</sup> Ĺejt ragbee guial laan naj ni diidxli, zeel ad rayalt güündi zian, ad gontzi güündi xhienin sin xgab. <sup>37</sup> Din b́en bidxnēdi achet ni mal been reeman yadoo guin, ad wanee t́eēt reeman diidxguijdx dux dios ree.

<sup>38</sup> Bal Demetrio con ree xcompniaraman b́en rüjnnēman dxiin rajp reeman wadijl con



ree ben ren, laa roylay naj, laa ree guxtis yu', ni che reeman chitawquia reeman. <sup>39</sup> Per bal xhieri mazri rëndi, chi gac xgabilt bën guiedx dxel gacan reglad. <sup>40</sup> Yan, por ni ma gojc, nadxeb na gobiarn guial dunuj ree caylu' ree bejn diidx din güün reeman wadijl guin, ¿abi' xhieza yaguie'ch ree loj reeman bal guiniabdiidx reeman duloj ree xcwent ree ni cayajc?

<sup>41</sup> Chi gulox rëbaman zian, dxel bare'ch reeman.

## 20

### *Wej Pab Macedonia në Grecia*

<sup>1</sup> Chi babedxe ree bën Éfeso, gurejdx Pab bën rliladx ree Jesucrist persi bagu'man luxdoo reeman. Dxelri bazaadiidxnëman laa reeman abi' zëman niz Macedonia. <sup>2</sup> Bitixlojman bën rliladx ree Jesucrist guidib niz ni, dád bagu'man luxdoo reeman con xtiidxaman, dxelri bidxinman Grecia <sup>3</sup> lod guzuman choon bëëw. Ma niuman loj barcw din niejman Siria, chi gogbeeman guial nuyën ree bën Israel nüjn reeman laaman xhienin. Dxel mejorli beenman xgab bayejcaman niz Macedonia. <sup>4</sup> Binëman Sópater, bën Berea, xi'ngaan Pirro, në Aristarco con Segundo, bën Tesalónica ree, nètëë Gayo, bën Derbe, con Timoteo, në Tíquico con Trófimo, bën niz Asia ree. <sup>5</sup> Gra reeman guned abi' gulëjz reeman Pab con naj Lujc guiedx Troas. <sup>6</sup> Guiáad dunujn chi gudëd lanij ni raw ree bën Israel guiadxtil ni ad yu't levadur, dxel badxu'n loj barcw badxoon Filipos, abi' ni goc gaay dxej badxinan guiedx Troas lod za' reeman. Ni badxu'n gajdx dxej.

### *Basban Pab Eutico*

<sup>7</sup> Chi bidxin chidumingw, badxajg du lasa'n din yadaawan guiadxtil tijbzi, abi' guial mal been Pab xgab guial yareguiaal griiman, chi bidxin garol guiaal sta caneenëman bejn ree, <sup>8</sup> guiáad lënü ladya lod rado'pan dád zien ree guij re'c. <sup>9</sup> Tijb xinguiag zobj ro' ventan lax Eutico. Guial xchej da't guneenë Pab laa reeman, dxel xt garej gunaaz bacaal xin guin, abi' gudidya'x diizd yu bayon guin xt luyuj, ma güjtix chi bales reeman laax. <sup>10</sup> Dxel biguiajt Pab lod naga'x, bazuxibaman abi' gudiidxaman laax, dxel rëbaman loj reeman:

—Ad rdxebidi, nabanquix.

<sup>11</sup> Dxel bayë'p Pab zatijb, gula'man guiadxtil abi' gudaw reeman, dxel basnuu guneenëman laa reeman xt bareguiaal. Chi bareguiaal bayunejzaman ziaman. <sup>12</sup> Abi' xin gudidya' ro' ventan guin, nabanx zignë reeman laax, dxel dád nix yu' luxdoo reeman.

### *Wej Pab Mileto*

<sup>13</sup> Dxel dunujn badxu'n loj barcw baneedan bio'n par luguiedx Asón, lod baya'nan diidx yaca'n Pab, din beenman xgab niej guia'man ni. <sup>14</sup> Chi badxajg du lasa'n con laaman luguiedx Asón, dxel badxu'në'n laaman loj barcw bio'n lod la Mitilene. <sup>15</sup> Ni badxoon, chi bareguiaal badüüdan niz lod la Quío. Chi bareguiaal stijb badxinan lod la Samos. Dxel chi bareguiaal stijb badxinan Mileto, per chi gad yagaj guidxin badxu'dxen lod la Trogilio. <sup>16</sup> Been Pab xgab ad zejtaman Éfeso, ad guyëntaman niaglaaman niz Asia guial nuyënman diob nadxinman Jerusalén, din xixgabaman naj guial bal zajc yadxinman lanij Pentecostés.

### *Bazaadiidxnë Pab bejn ree Mileto*

<sup>17</sup> Chi nadxu'n Mileto, gunabee Pab bi't ree bën rniabee loj ree bën rliladx Jesucrist, bën zobj ree Éfeso. <sup>18</sup> Chi bidxin reeman dxel rëbaman loj reeman:

—Diizd dxej yaloj ni bialan niz Asia xt yan, lëjt ragbee xhienaag cayünan. <sup>19</sup> Loj guidib tiamp ni za'në'n lëjt cayünan sirv Jesucrist con pasens, majsi xt ronan abi' gra loj gualzi ma gudëëdan por ni rën ree bën Israel güünnë reeman naj. <sup>20</sup> Per majsi zian ad bacwëëzt rnin lojdi ni naj ni zagdx par lëjt, tant delant loj ree bejn në lidxidi balün lëjt. <sup>21</sup> Abi'

zi'c ree bèn Israel nè ree bèn ad najt bèn Israel, ma rën loj reeman din yayüjn reeman xgab por xtol reeman yadxi' tée loj reeman loj Dios chililadx tée reeman Dad Jesucrist. <sup>22</sup> Yan ma yaya'n Jerusalén lod caxhaal xSprijt Dios naj, ad ragbeetan xhie cabèz naj ni. <sup>23</sup> Tijbzi ni ragbeen naj guial guidib lod ran rugojn xSprijt Dios naj guial ladxguiib nè zro' da't guialzi naj ni cabèz naj. <sup>24</sup> Per par naj achet güünan por zian, majsi guiètan per con nix yu' luxdon cayünan ni rayal günan xt lod gactizan, günn tée mandad ni banee Dad Jesús naj guial gatiechan xtiidxza'caman xhienaag rën Dios dunuj ree.

<sup>25</sup> Yan naj ragbee guial ni'qui tijbidi bèn ma ben diidx loj xhienaag naj xguialrniabee Dios, ad zuguaatrudi naj. <sup>26</sup> Zeel ganin lojdi yan guial ad achetri dol ra'pan bal id nabandi xnejz. <sup>27</sup> Din ma bagojnan lèjt gra xhienaag naj xixgab Dios achetcki baquiechan. <sup>28</sup> Yan, gol gojp lèjt gajc, gol gojp tée ree bèn rliladx Jesucrist, bèn ma banee xSprijt Dios lojdi din guiniadi laa reeman zi'c tijb bèn rajp xiil ree, din Jesucrist con xrejman ma gudixaman por xtol reeman. <sup>29</sup> Naj ragbee guial chi yazaan gui't ree ben ren zi'c gajcki rtie'ch cuyojt xiil ree, zian naj xixgab reeman günnè reeman bèn rliladx ree Jesucrist. <sup>30</sup> Loj gajquidi grii ree bèn gulüü ganax ni rusquiee, din günn reeman gan güncwent ree bèn rliladx Jesucrist xtiidx reeman luar güncwent reeman xtiidx Dios. <sup>31</sup> Zeel gol guzujsin, gol gojp cudad, gol basaaladx, loj choon ijz ad bacwèzt gunenè'n lèjt xt ronan banen lèjt consejw.

<sup>32</sup> Yan, compniar raliduladx ree Jesucrist, gusa'nan lèjt con Dios con xtiidxza'caman. Laan rajp guialrniabee par gagnèn lèjt, din gusnuu gagbeedi xhienaag rënman guibandi gunee tée man lojdi ni ma rëbaman gudëedaman loj ree bèn ma naj xbejman. <sup>33</sup> Achut xmilia achu tée xab rzëëbladaxan. <sup>34</sup> Lèjt ragbee zagdx guial con quijb yan benan dxiin persi gudawnè'n bèn guzu ree con naj. <sup>35</sup> Abi' balün lèjt guial zian rayal günn bejn dxiin din günnman yudar bèn ryaadx ree xhienin. Gol basaaladx xtiidx Dad Jesús chi rëbaman: “Mazri nix yu' luxdoo bèn razaladx guial loj bèn rtia'.”

<sup>36</sup> Chi gulox rëb Pab zian, dxel bazuxibaman gurejdx gunabaman Dios con gra reeman. <sup>37</sup> Gra reeman biin, gudiidx reeman Pab abi' gudaw reeman laaman xid. <sup>38</sup> Dád guyunaya reeman por ni rëbaman loj reeman guial ad zuguaatri reeman laaman. Dxel biglu'nejz reeman laaman xt lod za' barcw.

## 21

### *Wej Pab Jerusalén*

<sup>1</sup> Ni basa'nan laa reeman, abi' badxu'n loj barcw bio'n tibli niz Cos, yuj riga' loj nijsdoo. Chi bareguiaal badxinan niz Rodas nëgajcan riga' loj nijsdoo, abi' ni badxoon bio'n guiedx Pátara. <sup>2</sup> Ni badxaaglojn tijb barcw ni ma che niz Fenicia zianz badxu'n lojn. <sup>3</sup> Chi zio'n dxel dux lad ruvejsan baguiaan lod la Chipre, basnuu bio'n niz Siria. Abi' guial naj lat barcw guin luguiedx Tiro dxel badxu'n luguiedx guin. <sup>4</sup> Ni badxaaglojn bèn rliladx ree Jesucrist abi' badxu'nè'n laa reeman gajdx dxej. Bèn guin ree por xSprijt Dios rëb reeman loj Pab guial ad bal cheman Jerusalén. <sup>5</sup> Per chi baza' gajdx dxej guin, dxel badxoon luguiedx guin, dxel gra reeman con xbéngunaa reeman con xi'n reeman, biglu'nejz reeman dunujn xt ro' nijsdoo. Ro' nijs guin badxu'xiban barejdx banaaban Dios. <sup>6</sup> Dxel bazaadiidxnè'n laa reeman abi' badxè'pan loj barcw guiáad laa reeman zia lidx reeman.

<sup>7</sup> Chi badxoon luguiedx Tiro bio'n luguiedx Tolemaida, ni gulox dux viajn loj barcw, bio' tée bugneenè'n bèn zobj ree ni, bèn rliladx ree Jesucrist abi' baya'nan con laa reeman tib dxej. <sup>8</sup> Chi bareguiaal, dunujn con Pab badxoon Tolemaida bio'n Cesarea lod bio'n lidx Felip, bèn rtie'ch xtiidx Jesucrist. Felip guin naj tijb ree bèn gajdx cwabee din qui's reeman ni rayal tia' ree bènprob abi' baya'nan lidxaman. <sup>9</sup> Yu' tajp xi'ndxa'paman biinxtijb ree abi' laa reem rudëed xtiidx Dios loj ree bejn. <sup>10</sup> Ma gojc zien dxej nadxu'n lidx Felip, chi bi't tijb bèn la Agabo nëgajcaman rudëed xtiidx Dios loj ree bejn, zëedaman

niz Judea. <sup>11</sup> Chi bi'taman cwa'man xcinch Pab guxhii guia' gajcaman con yaaman, abi' naman:

—XSprijt Dios na guial Jerusalén ze guixhii ree bén Israel bén naj xcinch ni guie, abi' yayü reeman laaman loj ree bén ad najt bén Israel.

<sup>12</sup> Chi baguiejnan zian, dunujn con ree bén rlliladx Jesucrist luguiedx guin baguieenan naguiejn loj Pab ad cheman Jerusalén. <sup>13</sup> Per badxi'man laan, naman:

—¿Chexc zeel roondi abi' rgu' nayadi naj? Par naj achet güünan majsi guixiin o majsi guiëtan Jerusalén por Dad Jesús.

<sup>14</sup> Chi bayagbeen guial ad zaguieentan gan yadxoonan laaman chitëë cheman, achetri baguie'chan lojman, tijbzi ni raguie'chan lojman:

—Gac zi'c rniabee Dios.

<sup>15</sup> Chi gudëd ree dxej guin dxel baguieenan purvinid bio'n Jerusalén. <sup>16</sup> Bunë'n bëlzi ree bén Cesarea rlliladx ree Jesucrist, laa reeman binë dunujn lod baya'nan lidx tijb bén Chipre, ma gojc xchej rlliladxaman Jesucrist, laman Mnasón.

### *Bignaj Pab Jacob*

<sup>17</sup> Abi' ree bén Jerusalén rlliladx Jesucrist dád nix guyu luxdoo reeman baca' reeman dunujn. <sup>18</sup> Chi bareguiaal bunë'n Pab bugnajn Jacob, ni riga' gra ree bén rniabee loj ree bén rlliladx Jesucrist. <sup>19</sup> Chi gulox bagajpdiozan laa reeman, dxel bagojn Pab laa reeman tijb gaj ni beenman por xguialrniabee Dios delant loj ree bén ad najt bén Israel. <sup>20</sup> Chi biguiejn reeman zian, baza't reeman Dios zagdxë, zianz rëb reeman loj Pab:

—Lüj ragbee guial entr loj ree bén Israel zien da't reeman ma bililadx Jesucrist, abi' gra reeman rëb guial rüjn naguiejn güün bejn zi'c rniabee xley Moisejs. <sup>21</sup> Ma biguiejn tëë reeman guial lüj culüü bén Israel ree, bén ad zojbt ree loj nacion Israel guial ad züjncwëntt reeman xley Moisejs, rëb tëël loj reeman guial ad rüjnt naguiejn chu' xi'n reeman sen ru ree bén Israel ad zinal tëët reeman dux costumbr ree. <sup>22</sup> Yan, ¿xhienaag gac? Laa reeman guchajgczl lasa' reeman chi gagbee reeman guial ma bi'til. <sup>23</sup> Zeel mejorli güünl ze: Yu' tajp ree xin no'ch du lojn xin rayal ree güün cumplid ni cwëb reex loj Dios. <sup>24</sup> Binë reex, gol been zi'c rëb loj ley din gaquidi naya, gudijx tëë por laa reex din gac ya guijc reex. Zian gagbee gra bejn guial rüjnquil zi'c rniabee ley, guial ad wali tëët ni biguiejn reeman xcwëntil. <sup>25</sup> Abi' por ree bén ad najt bén Israel, bén ma bililadx ree Jesucrist, ma baxhaalan tijb gui'ch loj reeman zi'c baguieenan xgab guial ad rayalt chu' reeman xgab por xley Moisejs. Per ad rayalt gaw reeman ni rbej loj ni naj ree xdios reeman, ad gaw tëë reeman rejn ni'qui bëël rberejn, ad sunë tëë reeman ben ren bén ad najt lacheel reeman.

### *Gunaaz ree bén Israel Pab*

<sup>26</sup> Dxel binë Pab guidap ree bén guin, abi' chi bareguiaal been reeman zi'c rniabee ley par gac reeman naya. Dxel guyu reeman lën yadooro' Jerusalén din gugojn reeman goc yayaaloj dxej güün reeman zi'c rniabee ley, dxej rayal chinë tijb gaj reeman tijb be guiët zi'c tijb gon par Dios.

<sup>27</sup> Chi ma yayaaloj gajdx dxej ni naj güün reeman zi'c rniabee ley, yu' ree bén Israel zëed niz Asia, baguiaa reeman Pab lën yadooro' Jerusalén abi' gurixdiaj reeman wajs reeman, gunaaz reeman laaman, <sup>28</sup> rëb reeman:

—¡Bén Israel, gol been yudar! Xin guie naj xin ziza gra lad caneeguijdxix bén Israel ree në dux yadoo ree, rëb tëëx loj ree bejn guial ad güün reeman zi'c rniabee dux ley ree. Abi' ad tijbtzi laan, në ma badxe'x bén ad najt ree bén Israel lën dux yadoo ree ni naj ni nada par dunuj ree ma beenx laan zi'c tijb luar ad rüjnt sirv.

<sup>29</sup> Rëb reeman zian guial baguiaa reeman Pab zizaman ni con tijb bén Éfeso bén la Trófimo, zeel gunaladx reeman binë Pab laaman lën yadooro' Jerusalén.

<sup>30</sup> Dxel been reeman nadxeb guidib luguiedx guin, ruxüün ree bejn bidxin reeman. Abi' gunaaz reeman Pab, guxoobyuj reeman laaman babëë reeman laaman lën yadoo

guin laa basiaaw gajc reeman port guin ree. <sup>31</sup> Za mer nugüjt reeman laaman, chi bidxin ruson guin loj suldad rniabee ree suldad guial gra ree bén Jerusalén cayün nadxeb. <sup>32</sup> Laa bato'p gajc suldad rniabee guin xsuldadix në za tio'p choon ree suldad rniabee, baxüün reex wej reex lod riga' ree bén guin. Chi baguiaa ree bén guin bidxin suldad rniabee guin con ree xsuldadix, dxel bacwëez gudijn reeman Pab. <sup>33</sup> Dxel gubig suldad rniabee guin, gunaazix Pab gunabeex guxhii reex laaman con tio'p caden. Abi' gunabdiidix chu laaman xhie tëe beenman. <sup>34</sup> Per gurixdiaj reeman rëb reeman garent garen, guial rbixdiaj da't reeman achet gojc niagbeex, dxel gunabeex bignë reex Pab lod yu' ree suldad. <sup>35</sup> Chi bidxin reex loj ree sclar lod yu' ree suldad guin, gulejn reex Pab guial dád nadoxh rüjn ree bén zien nal laa reex, <sup>36</sup> abi' gra reeman rbixdiaj, rëb reeman: —¡Gol bagüjtix!

### *Gunee Pab loj ree bejn*

<sup>37</sup> Chi ma chu'në reex Pab lod yu' ree suldad guin, gunabdiidxaman loj suldad rniabee guin, rëbaman:

—¿Zajc ganenë'n lüj ya?

Badxi' suldad guinan rëbix:

—¿Rajc rnieel diidx grieg ya? <sup>38</sup> ¿Nid lüj naj xin Egipto guzu contr gobiarn ya, abi' laa bigxüün gajquil niz loj yujbidx con tajp mil ree xbejn, bén bagüjt ree bejn?

<sup>39</sup> Dxel rëb Pab lojx:

—Bén Israel naj. Goolan luguiedx Tarso tijb ree guiedx zobjloj ni riga' niz Cilicia. Baneesii mod ganenë'n bén guie ree.

<sup>40</sup> Dxel cwëjb suldad guin, abi' guzuli Pab loj ree sclar guin beenman sen loj ree bén guin con yaaman din yacwëez ro' reeman. Chi bacwëez reeman, dxel guneenëman laa reeman diidx hebreo, rëbaman:

## 22

<sup>1</sup> —Lëjt bengol në los demazridi, gol bacaagdiajg ni ganin por naj.

<sup>2</sup> Chi biguiejn reeman caneenëman laa reeman diidx hebreo, mazri bacwëez reeman. Abi' basnuuman rëbaman loj reeman:

<sup>3</sup> —Bén Israel naj. Goolan luguiedx Tarso tijb guiedx riga' niz Cilicia, per Jerusalén guie guni'san. Abi' mextr Gamaliel balüü naj gra zi'c naj xley dux bén gulal ree. Guiáad naj guidib luxdon benan xgab güünan sirv Dios zi'cgajc lëjt yan. <sup>4</sup> Dxel guzunaalan bén rililadx ree Jesucrist, xt bagüjtan laa reeman abi' zi'c ree bëngunaa zi'c ree xinguaaaw gunaazan badxe'n ladxguib. <sup>5</sup> Bixhioz mazri zobjloj rniabee graczi ree bixhioz në gra ree guxtis Israel ragbee guial najn ni wali. Din laa reeman banee tijb gui'ch par gulün loj du lasa' bén Israel ree, bén zobj ree luguiedx Damasco din chile' yaguilan bén rililadx ree Jesucrist luguiedx guin, ganaaz tëen laa reeman guidnë'n laa reeman Jerusalén din téd reeman casti.

### *Be Pab diidx xhienaag bililadxaman Jesucrist (Hch. 9:1-19; 26:12-18)*

<sup>6</sup> Per chi za'n lunejz par Damasco, chi ma cadxinan ni cost garol dxej, dxejczy brii tijb guij xanyabaa balaan bacha' guidibczy lod cazaan, <sup>7</sup> abi' breeyujn. Dxel biguiejnan cha' bén na: “Saulo, Saulo, ¿chexquiza zeel rzunalil naj?” <sup>8</sup> Abi' gunabdiidxan rën: “¿Chu lüj Dad?” badxi'man laan naman: “Naj naj Jesús, bén Nazaret, bén rzunalil.” <sup>9</sup> Bén zinë' reen baguiaa reeman bacha' guin abi' bidxeb reeman, per ad bignia't reeman ni na cha' bén gunee naj. <sup>10</sup> Dxel gunabdiidxan rën: “¿Xhie rayal günan Dad?” Abi' na Dad Jesucrist lon: “Bixche, basnuu xnejzil wej Damasco. Ni na reeman gra ni rayal güünl.” <sup>11</sup> Abi' guial bascajy bacha' guin lon, dxel bén zinë' reen gunaaz reeman yan, binë reeman naj luguiedx Damasco.

<sup>12</sup> 'Ni zojb tijb b́en la Ananías, rýjnman cumplid gra zi'c rniabee xley Moisejs. Abi' gra ree b́en Israel zojb luguiedx Damasco núnbee laaman guial nabanman xnejz. <sup>13</sup> Ananías guin bidganaj naj, chi bi'taman naman lon: “Saulo, ma zajc yaguaal stijb.” Loj hor guin gajc baguian stijb abi' baguian laaman. <sup>14</sup> Dxel naman lon: “XDios dux béngulal ree ma bacaabee lúj din gagbeel xhie ŕenman güünl, abi' guguiaal Jesucrist guien téel cha'man, b́en rýjn zi'c rayal. <sup>15</sup> Din chigneel xtiidxaman loj gra ree bénguidxliuj, gü téel diidx loj reeman ni baguiaal ni biguiejn téel. <sup>16</sup> Yan, ad rb́ezil mazri, guzuli gurobnijs téé gurejdx gaj Dad Jesucrist din chisúdaman xtóilil.”

### *Be Pab diidx xhienaag wejman loj ree b́en ad najt b́en Israel*

<sup>17</sup> 'Chi baguialan Jerusalén, wan lén yadooro' persi guredx gunaaban Dios, abi' guza'can zi'c rulüü cane'xhchalan. <sup>18</sup> Baguian Dad Jesús naman: “Baquiejn. Cari barii Jerusalén, din ad zýjncwentt reeman ni guiébil por naj.” <sup>19</sup> Abi' ŕen lojman: “Dad, laa reeman ragbee guial naj wa gra lén ree yadoo gunaazan b́en rliladx ree lúj, badxe'n laa reeman ladxguib gudin téen laa reeman. <sup>20</sup> Nè chi bagüjt reeman Esteban, b́en guneé xtiidxil, laagajc naj za' ni ŕen zagdxe naj guiétaman abi' xt gunan xab ree b́en bagüjt laaman.” <sup>21</sup> Per na Dad Jesús lon: “Wej, naj gaxhal lúj zijt loj ree b́en ad najt b́en Israel.”

### *Badxe' reeman Pab lod yu' ree suldad*

<sup>22</sup> Xt guintzi naga'loj bacaagdiajg reeman ni ŕeb Pab dxel guzuloj gurixdiaj reeman ŕeb reeman:

—¡Ad rayalt guiban xin guin! ¡Gol bagüjtix!

<sup>23</sup> Abi' guial cabixdiajz cabixdiaj reeman, ruzaal xab reeman niz ladia ruzaal téé reeman yuj niz ladia. <sup>24</sup> Dxel gunabee suldad rniabee guin cu' reeman Pab lod yu' ree suldad abi' gunabeex qui'n reex laaman din yaneero'man chexc zeel rbixdiaj ree b́en guin zian contr laaman. <sup>25</sup> Per chi guxhii reex Pab din quin reex laaman, ŕebaman loj tijb ree suldad rniabee za' ni:

—¿Zajc quindi tijb b́en Rom ya, chi gadidi gagbee xhie beenman?

<sup>26</sup> Chi biguiejn suldad rniabee guin zian, dxel bicojnx suldad rniabee ree suldad guin, ŕebix lojx:

—Gojp cudad ni güünnél xin guin, din xin Roman.

<sup>27</sup> Dxel wej suldad rniabee guin lod za' Pab, abi' gunabdiidxix lojman ŕebix:

—¿Walin ya xin Rom lúj?

Badxi' Paban ŕebaman:

—Walican.

<sup>28</sup> Abi' ŕeb suldad rniabee guin lojman:

—Naj zro' milia gudixan par gacan xin Rom.

Abi' badxi' Paban ŕebaman:

—Per naj diizd goolan najn b́en Rom.

<sup>29</sup> Chi biguiejn ree suldad niguin Pab, guial b́en Rom najman, laa bisúd gajc reex. Xt nè suldad rniabee guin bidxeb chi gogbeex guial ben Rom naj Pab guial gunabeex guxhii reex laaman.

### *Bazuj reeman Pab loj ree guxtis*

<sup>30</sup> Chi bareguiaal, guyén suldad rniabee guin niagbeechaawix chexc zeel za' ree b́en Israel contr Pab. Abi' baxhiequix Pab, dxel gunabeex bado'p ree bixhioz rniabee ree bixhioz nè ree guxtis. Abi' babéëx Pab bazujx laaman loj gra reeman.

## 23

<sup>1</sup> Baguiaa Pab loj ree guxtis guin, abi' ŕebaman:

—Compniar Israel, loj guidib ni nabanán xt yan, achet naladxan delant loj Dios din naj ragbee xhienaag nabanán.

<sup>2</sup> Dxel Ananías, bixhioz mazri zojbloj rniabee graczi ree bixhioz, gunabeeman bén za' ree gajxh cwè' Pab din ca'p reeman ro'man. <sup>3</sup> Per badxi' Paban rëbaman loj bixhioz guin:

—¿Ziangajc ca'p Dios ro'l, bén rusquiee! ¿Id zojbil yagaj ya par güünl guialguxtis zi'c rniabee ley? Abi' ¿chexquiza zeel rüjnl zi'c ad rniabeet ley, rniabeel ca'p reeman ro'n?

<sup>4</sup> Abi' ree bén za' yagaj rëb reeman lojman:

—¿Zian rusaglojl xbixhioz zojbloj Dios ya?

<sup>5</sup> Dxel rëb Pab:

—Gol been perdon, ad gogbeetan guial laaman naj bixhioz mazri zojbloj. Din loj xtiidx Dios rëb: “Ad gusaglojl bén rniabee ladxil.”

<sup>6</sup> Chi gogbee Pab guial garol reeman naj bénsaducew za garol reeman naj bénfarisew, dxel guneeaman rejs rëbaman:

—Naj naj bénfarisew, xi'n bénfarisew naj. Abi' guial rliadxan yaban ree bengüt zeel za' ree bejn contr naj.

<sup>7</sup> Chi rëbaman zian, guzuloj cadildiidx ree bénfarisew con ree bénsaducew abi' gojc reeman tio'p lala'. <sup>8</sup> Din bénsaducew ree ad rliadx reeman guial yaban ree bengüt, ad rliadx tēet reeman guial yu' ree anjl nē ree sprijt, per ree bénfarisew rliadx reeman gra ree ni guin. <sup>9</sup> Abi' been reeman naquie' yagaj. Dxel guzuli bëlzi ree bénfarisew naj mextr rulüü ley, rëb reeman:

—Achet ni mal wayüjn bén guie. Wed tijb sprijt o tijb anjl gunee laaman, gol gojp cudad ad niad contr Diosan nadxu' ree.

<sup>10</sup> Chi baguiaa suldad rniabee guin mazri cadildiidx reeman, dxel bidxebix nuroox reeman Pab. Abi' gunabeex bi't ree suldad din yabëe reex laaman galay ree bén guin, chinë tēe reex laaman lod yu' ree suldad stijb.

<sup>11</sup> Chi gure guiaal stijb, balüüloj Jesucrist loj Pab, rëbaman lojman:

—Bagu' luxdool Pab, din zi'c guneel por naj luguiedx Jerusalén guie, ziangajc guinieel por naj luguiedx Rom.

### *Been reeman xgab gugüjt reeman Pab*

<sup>12</sup> Chi bareguiaa, garol ree bén Israel baya'n reeman diidx din gugüjt reeman Pab, rëb tēe reeman guial achet gaw reeman achet tēet guië' reeman xt gugüjt reeman laaman.

<sup>13</sup> Nadëd tiuu naj ree bén rëb zian. <sup>14</sup> Abi' wej reeman bigneenë reeman bixhioz ree bén rniabee ree bixhioz nē ree xbengol ree bén Israel, rëb reeman loj reeman:

—Dunujn ma raguie'ch guial achetczi yadaawan xt chi ma bagüjtan Pab. <sup>15</sup> Yan lëjt con gra ree guxtis, gol gunab loj suldad rniabee guin din guidnëx laax lojdi guixie, con gol badxiib guiyc guial rëndi gagbeechaawidi xhienaag naj xcwentix. Abi' dunujn ma yadxu'sinan din yagüjtan laax chi gadix gui't guie.

<sup>16</sup> Per xi'ngaan bizan Pab biguiejnx guial cayëb reeman zian, dxel wejx lod yu' ree suldad bicojnx Pab. <sup>17</sup> Zianz gunee Pab tijb ree suldad rniabee guin, rëbaman lojx:

—Binësii xin guie loj suldad rniabee din gudëex tijb ruson lojman.

<sup>18</sup> Binë xin suldad guin laax loj suldad rniabee guin, rëbix lojx:

—Pab, xin yu' ladxguiib guredx naj abi' gunabix guidnë'n xin guie lojl din gunee tijb ruson lojl.

<sup>19</sup> Abi' suldad rniabee guin gunaazix yaa xin guin, binëx laax tiblax, gunabdiidxix lojx rëbix:

—¿Xhie rënl nal lon?

<sup>20</sup> Abi' rëb xin guin lojx:

—Bén Israel ree ma baya'n reeman diidx din guiniab reeman lojl guixie din chinël Pab loj ree guxtis, con gudxiib reeman guiyc guial rën reeman gagbeechaaw reeman xhienaag naj xcwentaman. <sup>21</sup> Per ad bal chililadxil laa reeman, din nadëd tiuu naj ree bén cwëz laaman guquie'chloj reeman lunejz, abi' ma rëb reeman guial achet gaw

reeman ache tēēt guiē! reeman xt gugüjt reeman laaman. Yan za'sin reeman cabēz reeman ni guiēbil.

<sup>22</sup> Dxel rēb suldad guin loj xin guin:

—Baguiaj. Achu loj guiēbil ni ma nal lon.

### *Guxhaal reeman Pab loj gobernador Félix*

<sup>23</sup> Dxel gunee suldad rniabee guin tio'p ree xsuldadix, abi' gunabeex laa reex din güün reex porvinid tio'p gayuu suldad che guia', nē za gayojnchii ree suldad cwib way, zatio'p gayuu ree suldad tia' lans din che reex Cesarea raca gaa guxhin. <sup>24</sup> Abi' gunabee tēēx güün reex porvinid way cwib Pab, rēbix loj reex guial guinia reex Pab din guidxinman zagdxe loj gobernador Félix. <sup>25</sup> Abi' guxhaalnēx laa reex tijb gui'ch ni rēb:

<sup>26</sup> “Naj Claudio Lisias, rugajpdiozan lūj gobernador Félix, lūj guial najl bēn zojbloj.

<sup>27</sup> Bēn Israel ree gunaaz xin guie ma nugüjt reeman laax. Per chi gogbeen guial xin Roman, dxel wan con ree da suldadan buglēen laax loj reeman. <sup>28</sup> Abi' guial rēnan gagbeen xhie rüjnx zeel rdxe'ch reeman laax, dxel bazun laax loj ree guxtis Israel.

<sup>29</sup> Dxel gogbeen guial por xcwent xley reeman zeel rdxe'ch reeman laax, per ad najtan ni rayal guiētix ni'qui guial chu'x ladxguib. <sup>30</sup> Nē guial ma gogbeen guial xixgab ree bēn Israel naj gugüjt reeman laax, zeel cayxhalan laax lojl. Abi' ma rēn loj ree bēn rdxe'ch laax guial con lūj güün reeman reglad ni rajp reeman contr laax. Laanan rugojnan lūj.”

<sup>31</sup> Been ree suldad guin zi'c gunabee suldad rniabee guin abi' guxhin binē reex Pab luguiedx Antípatris. <sup>32</sup> Chi bareguiaal suldad zē ree guia' bayejc reex lod yu' ree suldad, guiáad ree suldad dxiiib way zinē reex laaman luguiedx Cesarea. <sup>33</sup> Chi bidxin reex Cesarea, badēd reex gui'ch guin loj gobernador guin, bayü tēē reex Pab lojman. <sup>34</sup> Chi gulox biil gobernador guin gui'ch guin, gunabdiidxaman loj Pab ban zaman. Dxel chi gogbeeman guial Cilicia zēēdaman, <sup>35</sup> dxel rēbaman lojman:

—Chi gui't ree bēn za' ree contr lūj, dxel gucagdiagan ni nal.

Abi' gunabeeman gap reex Pab lēn xpalas Herodes.

## 24

### *Ni gunee Pab loj gobernador Félix*

<sup>1</sup> Chi goc gaay dxej, Ananías, bixhioz mazri zojbloj rniabee graczi ree bixhioz, bidxinman Cesarea con tio'p choon ree guxtis Israel nē tijb licenciad laman Tértulo. Abi' wej reeman loj gobernador guin din cwe'c reeman xguialquia Pab. <sup>2</sup> Chi bidxinnē reex Pab, guzuloj Tértulo caneeman contr laaman, rēbaman loj gobernador guin:

—Quixtēē lūj dad gobernador, por lūj nadxu'dxen, nē por xguialrajquil zien ree ni rüjn sirv cayajc du ladxan. <sup>3</sup> Gra ladczi za' ree bejn conform por gra ni cayüjnl dad gobernador Félix, lūj naj bēn zojbloj, quixtēēczi lūj. <sup>4</sup> Per chitēē günlaan lūj mazri, rniaaban lojl din gucaagdiajguil ni yanan lojl tibrajtoczi. <sup>5</sup> Dunujn bayagbeen xin guie naj zi'c tijb guialguijdx loj ree bēn Israel, guidibczi guidxliuj zizax rustijlix laa reeman abi' laax rniabee loj tib cwaa ree bēn rniee reeman nazaren. <sup>6</sup> Abi' guyēn tēēx nūjnx dux yadooro'n zi'c tijb luar ad rüjnt sirv, zeel banaazan laax bayēnan nagueenan guialguxtis zi'c naj dux leyan. <sup>7</sup> Per laa bi't gajc suldad Lisias con ree xsuldadix, babēēxuu reex laax du lojn. <sup>8</sup> Abi' rēb suldad rniabee guin guial lojl gui't ree bēn rbe'c xguialquia Pab, yan lūj gajc zajc guiniabdiidx lojx din gagbeel zagdxe guial walican ni ranan xcwentix.

<sup>9</sup> Abi' ree bēn Israel za' ni rēb reeman guial waliqui gra ni guin. <sup>10</sup> Dxel been gobernador guin sen loj Pab din guinieeman, abi' rēb Pab:

—Guial ragbeen diizd gocli rniabeel nacion Israel, zeel ad yu'nawēēgtan yadxi'n ni rudxiib reeman guican. <sup>11</sup> Abi' lūj gajc zajc cwe'quil ruson din gagbeel guial qui gojcri chiptio'p dxej badxinan Jerusalén din ganajchi'n Dios. <sup>12</sup> Abi' achut banaaznē reeman naj cadildiidxnē'n, ni'qui guial gabēn wadijl lēn yadooro' Jerusalén, ni'qui lēn yadoo ren

ree ni yu' ree ni, ni'qui luguedx guin. <sup>13</sup> Bén guie ree ad zajct na reeman lojl guial ni diidxli naj ni rudxiib reeman guican. <sup>14</sup> Per ni naj diidxli naj guial rliladxan Jesucrist, nejzcüb guin naj ni zinaalan, cayünan sirv loj xDios dux béngulalan, abi' na ree bén guie guial ad xnejzt Diosan, per cayünan zian guial rliladxan gra ni zëed loj ley në ni bacaa ree bén badëed xtiidx Dios loj ree bejn. <sup>15</sup> Abi' zi'cgajc rliladx ree bén guie Dios, ziangajc rliladxan laaman guial yaban ree bengüt stijb, zi'c ree bén goc benza'c në ree bén goc benmal. <sup>16</sup> Zeel rünan naguiejn gabajnan zagdx chitëe xhie ganaladxan delant loj Dios ni'qui delant loj ree bejn.

<sup>17</sup> Ma gojc zien ijz nariin, xt yan baye'c ladxan bidganë'n ni baxhaal ree bejn par ree bénprob, bidganë' tëen gon ni rayal gudëdan loj Dios. <sup>18</sup> Laan naj ni cayünan lën yadooro' Jerusalén chi bi't ree bén Israel za niz Asia baguiaa reeman naj, per mal benan zi'c rniabee ley din gacan naya. Abi' ad zient bejn riga', ad cabë tëetan wadijl. <sup>19</sup> Yan, bén gunaaz ree naj, laa reeman naj bén rayal su guie din na reeman xhie rünan xhie pornin rdxe'ch reeman naj. <sup>20</sup> O balguiza, bén za' ree guie na reeman xhie da dolan badxejl reeman chi guzun loj gra ree guxtis Israel. <sup>21</sup> Tijbzi ni benan chi za'n galay reeman gurixdiajn rën: “Guial rliladxan yaban ree bengüt, zeel za' ree bejn contr naj yan.”

<sup>22</sup> Chi biguiejn gobernador Félix zian, abi' guial ragbeeman xhienaag naj xnejz cüb Jesucrist, dxel basa'nman gualquia guin par stijb dxej, rëbaman loj reeman:

—Chi gui't suldad Lisias, dxel gagbeen zagdx xhienaag naj xcwentidi.

<sup>23</sup> Dxel gunabee gobernador guin tijb ree suldad rniabee guin din gusnuu guinia reex Pab, per guslaa reex güünman ni rënman ad gudxoon tëe reex chignaj ree xmiwaman laaman.

<sup>24</sup> Chi goc tio'p choon dxej, bidxin gobernador Félix stijb con lacheelaman Drusila, laaman naj bén Israel. Dxel gunabee gobernador guin bidxin Pab, abi' bacaagdiajg reeman ni rëbaman xcwent guialrliladx bejn Jesucrist. <sup>25</sup> Per chi guzuloj cayëbaman guial rayal guiban ree bejn xnejz, gucwëez tëe xixgab mal reeman, guial guidxin tëe dxej yadëed ree bejn cwent loj Dios, dxel dád bidxeb gobernador guin abi' rëbaman loj Pab:

—Baguiaj. Ganetan lüj chi chu'n luar stijb.

<sup>26</sup> Per Félix në milian rbëzaman gudëed Pab lojman din guslaaman laaman, zeel gurejdxaman laaman zien volt din guinieenëman laaman. <sup>27</sup> Zian gudëd tio'p ijz abi' barii Félix guial gobernador, dxel bayu Porcio Festo xluaraman. Abi' guial guyën Félix naya'nman zagdx loj ree bén Israel, zeel basa'nman Pab ladxguiib.

## 25

### *Gunee Pab loj Festo*

<sup>1</sup> Chi goc choon dxej ni bidxin Festo Cesarea par chu'man guial gobernador, dxel wejman Jerusalén. <sup>2</sup> Yagaj, bixhioz rniabee ree bixhioz con ree bén Israel mazri zojbloj, wej reeman lojman bile'c reeman xgualquia Pab, <sup>3</sup> abi' gunab reeman lojman din guixhiaalaman Pab Jerusalén. Zian guyën reeman din xixgab reeman naj gugüjt reeman Pab runejz. <sup>4</sup> Per badxi' Festo xtiidx reeman rëbaman guial Cesarea nayaaw Pab guiáad laaman nayob yaguaajman ni, <sup>5</sup> abi' rëbaman loj reeman:

—Bén rajp ree gualrniabee lojdi, laa reeman sa Cesarea, abi' bal xhie ni mal been xin guin, ni na reeman xhienin beenx.

<sup>6</sup> Cost xhujn o chii dxej guzuj Festo Jerusalén, dxelri ziaman Cesarea. Chi bareguiaal, gurej loj xyagxhilaman lod rniabeeman, abi' gunabeeman chica' reex Pab. <sup>7</sup> Chi bidxinnë reex laaman, bén Israel guza ree Jerusalén, gubig reeman abi' zien ree niguijdx badxiib reeman guijcaman, majsi ni'qui tijb ni rëb reeman ad gojct nulüü reeman guial najn ni wali. <sup>8</sup> Dxel badxi' Pab xtiidx reeman, rëbaman:

—Naj, achet ni mal wayünan xley ree bén Israel, ni'qui yadooro' Jerusalén, ni'qui rey César.



<sup>9</sup> Per Festo guyënman naya'nman zagdxé loj ree bën Israel, dxel gunabdiidxaman loj Pab, rëbaman:

—¿Rënl ya chel Jerusalén? Ni yanajn bal rajpil dol o ad rajptil dol ya ni rudxiib reeman guijquil.

<sup>10</sup> Badxi' Paban rëbaman:

—Loj ree guxtis Roman za'n, lod rayal gac reglad xhienin benan. Lÿj ragbee zagdxé guial achet ni mal wayünan bën Israel ree. <sup>11</sup> Bal xhie tijb ni mal benan ni rayal guiëtan, ad zabexuutan guiëtan. Per bal id wali ni na reeman benan, achut rajp derejch yayü naj loj reeman. Zagdxeli naj gadëëdan loj rey César.

<sup>12</sup> Dxel chi gulox guneenë Festo bën naj ree xbejnman, bën rëb ree ni rayal gac, rëbaman loj Pab:

—Lÿj na tëdil loj rey César, yan lojman tëdil.

### *Za' Pab loj rey Agripa*

<sup>13</sup> Chi gudëd tio'p choon dxej, rey Agripa con xbéngunaaman Berenice bidxin reeman Cesarea bitixloj reeman gobernador Festo. <sup>14</sup> Abi' guial zien dxej da't guzuj reeman ni, dxel be Festo diidx loj rey Agripa xcwent Pab, rëbaman:

—Guie yu' tijb xin basa'n Félix ladxguuib. <sup>15</sup> Chi wan Jerusalén, bixhioz rniabee ree bixhioz con ree bën rniabee loj ree bën Israel gule'c reeman xguialquiax, gunab reeman ganabeen guiëtix. <sup>16</sup> Per naj rën loj reeman guial guxtis Rom ree ad najt xcostumbr reeman nabee reeman guiët tijb bejn chi gadaman su loj ree bën cabe'c xguialquiaman din guiëbaman walin ya o ad walitan ni rudxiib reeman guijcaman. <sup>17</sup> Zeel chi bi't ree bën Israel guin guie, achet guial niaglaan, bareguiaal gajc gure loj da yagxhilan, abi' gunabeen bidnë reex xin guin. <sup>18</sup> Per ree bën bi't gule'c xguialquiax, achet ni nadxeb na reeman zi'c gunaladxan ninia reeman por laax. <sup>19</sup> Tijbzi xguialquiax ni gule'c reeman naj por xcostumbr reeman në por tijb bën la Jesús, bën ma güjt, per Pab rëb naban Jesús guin. <sup>20</sup> Abi' guial ad ragbeetan xhie gūnan por zian, dxel gunabdiidxan loj Pab bal rën chex Jerusalén din gac reglad ni guin ree ni. <sup>21</sup> Per laax gunab tëd loj rey César din gac reglad ni rëb reeman por laax, zeel gunabeen yaawsiix xt chile' yaxhalan laax loj rey César.

<sup>22</sup> Dxel rëb rey Agripa loj Festo:

—Bal zian chile'n, nëgajc naj rën gucagdiag laax.

Abi' badxi' Festo laan rëbaman:

—Guixie gucaagdiajguil laax.

<sup>23</sup> Chi bareguiaal, dád zagdxé ca' xab rey Agripa con Berenice bidxin reeman con ree bën rniabee suldad con los demazri ree bën zobjbloj luguiedx guin, bidxin reeman guyu reeman lënü lod gucaagdiajg reeman ni guiëb Pab. Dxel gunabee Festo bica' reex Pab.

<sup>24</sup> Abi' rëb Festo:

—Rey Agripa në los demazridi dad za'nëdi dunujn guie. Bën ruguiaadi guie, gra bën Israel, zi'c Jerusalén zi'cgajc guie ma bi't reeman bidganaj reeman naj rniab reeman guiëtix. <sup>25</sup> Naj, achet xfaltix radxejlan guial rayal guiëtix. Guiáad laax gunab tëd loj César Augusto lod gac reglad xcwentix, abi' ma benan xgab yaxhalan laax. <sup>26</sup> Per ad radxejltan ni gucan por laax loj gui'ch ni gaxhalan loj rey César, bën rniabee naj. Zeel nuzun laax lojdi zi'c naj quijb lojl rey Agripa, din chi ma gulox gunabdiidxidi ni rayal guiniabdiidxidi lojx dxel ma yu' ni gucan por laax. <sup>27</sup> Din naj rulüü ad xnejzt naj yaxhalan tijb bën yu' ladxguuib loj rey César abi' ad zëtan xhie beenman.

## 26

### *Ni gunee Pab loj rey Agripa*

<sup>1</sup> Dxel rëb rey Agripa loj Pab:

—Ma zajc guinieel por lÿj.

Abi' gules yaa Pab guzuloj rëbaman:

<sup>2</sup>—Dád nix yu' luxdon guial bile' za'n lojl yan rey Agripa, par ganen lojl yadxi' tëën gra ni rudxiib ree bën Israel guican. <sup>3</sup> Din lüj ragbee zagdxe gra xcostumbr ree bën Israel, në conin rüjn persi rdildiidx reeman. Zeel rniaaban lojl gapil pasens gucaagdiajguil ni ganin.

### *Zi'c guban Pab gocli*

<sup>4</sup> 'Gra ree bën Israel ragbee xhienaag gubajnan con laa reeman zi'c ladxan zi'c Jerusalén, diizd xindoon. <sup>5</sup> Ragbee tëë reeman abi' zajc na reeman laan bal rën reeman, guial diizd xindoon najn bënfarisew, abi' ree bënfarisew naj bën mazri zinal xley ree bën Israel. <sup>6</sup> Abi' yan za'n guie, badëed reeman naj loj ree guxtis guial rliladxan yasban Dios bengüt ree zi'c beenman promejs loj ree dux béngulal ree. <sup>7</sup> Gra guidxiptio'p cwa' ree bën Israel cabëz dxej güün Dios zian, zeel rën reeman laaman rüjn tëë reeman sirv lojman dxej guiaal. Abi' yan guial rliladxan laan zeel rbe'c ree bën Israel da guialquian, rey Agripa. <sup>8</sup> ¿O naladxidi ya nawëëg yasban Dios bengüt ree?

### *Be Pab diidx xhienaag guzunalaman bën rliladx ree Jesucrist*

<sup>9</sup> 'Guia'xchej benan xgab rayal günan xhienin bën rliladx ree Jesús, bën Nazaret, <sup>10</sup> abi' zian benan Jerusalén. Con xtiidx ree bixhioz rniabee ree bixhioz, zien ree bën rliladx Jesucrist badxe'n ladxguiib. Abi' chi rugüjt reeman laa reeman, në naj rë guiëtri reeman. <sup>11</sup> Zien volt benan laa reeman xhienin din günan naguiejn gusa'n reeman guialrliladx reeman Jesucrist. Zian benan lën gra ree yadoo, abi' guial tant rdxe'chan laa reeman dxel guzunaalan laa reeman xt luguiedx ren ree.

### *Be Pab diidx stijb xhienaag bililadxaman Jesucrist (Hch. 9:1-19; 22:6-16)*

<sup>12</sup> 'Abi' par zian za'n Damasco, con quijb xtiidx ree bixhioz rniabee ree bixhioz. <sup>13</sup> Per ganin lüj rey Agripa, lunejz baguian tijb xbacha' xanyabaa zi'c garol dxej, per mazri naynin guial loj ni rusni gubijdx, abi' basnin guidib lod za'n con ree bën zinë'n. <sup>14</sup> Abi' dugraczan bareeyuj, dxel biguejnan cha' bën gunee naj con diidx hebreo, naman: “Saulo, Saulo, ¿chexc zeel rzunalil naj? Lüj gajc rguuil xguialnaal zi'c go'n rudxeguaia' loj yag rulaagnë reeman laab.” <sup>15</sup> Dxel rën: “¿Chu lüj Dad?” Badxi'man laan naman: “Naj naj Jesús bën rzunalil. <sup>16</sup> Per bixche, guzuli, din balülön lojl par güünl naj sirv gü tëël diidx ni baguiaal yan në ni gulün lojl. <sup>17</sup> Naj gaxhal lüj loj ree bën Israel në loj ree bën ad najt bën Israel, abi' naj gagnë' lüj chitëë xhie güün reeman lüj. <sup>18</sup> Gaxhalan lüj loj reeman din guixhialil loj reeman gusa'n reeman nejj mal, chinal reeman nejj zagdxe. Ad tiëbri reeman nabee xindxab laa reeman, chinal tëë reeman xnejz Dios. Abi' chililadx reeman naj din gac xtol reeman perdon yayal tëë reeman ni rayal gra ree xbejn Dios, bën ma naya ree delant lojman.”

### *Bazoob Pab diidx ni balüüloj lojman*

<sup>19</sup> 'Zian gojc, rey Agripa, bazoban diidx benan ni na Jesucrist lon chi gunee man naj diizd xanyabaa. <sup>20</sup> Yaloj luguiedx Damasco gutiechan xtiidxaman, dxelri Jerusalén në guidib niz Judea në loj ree bën ad najt bën Israel. Rën loj reeman din yayüjn reeman xgab por xtol reeman, yadxi' loj reeman loj Dios güün tëë reeman ni rayal güün reeman din guiguien guial ma bidxaa mod naban reeman. <sup>21</sup> Abi' por zian, gunaaz ree bën Israel naj lën yadooro' Jerusalén, guyën reeman nugüjt reeman naj. <sup>22</sup> Per con xyudar Dios laa naj guie xt yan cusnuu cayün xtiidxaman loj gra ree bejn, zi'c ree bën zojbloj zi'c ree bën ad zojblojt. Abi' gra ni rën loj reeman naj ganax ni bacaa ree bën badëë xtiidx Dios loj ree bejn në ni bacaa Moisejs xhienaag naj ni gac, <sup>23</sup> guial Cristo naj guial tédaman guialzi, guiëtaman. Per chi ma güjtaman yaloj laaman naj bën yaban loj ree bengüt, abi' gugojnman bën Israel ree në ree bën ad najt bën Israel xhienaag gap reeman perdon.

*Nuyën Pab nililadx Agripa Jesucrist*

<sup>24</sup> Chi cayëb Pab zian, dxel gudidxa' Festo rëbaman:

—¡Rajcguijquil Pab! guial tant rusiidil ma rajc guijquil.

<sup>25</sup> Per badxi' Pab laan rëbaman:

—Ad guictan rajc, gobernador Festo. Ni canin najn xnejz në diidxli. <sup>26</sup> Laa rey Agripa za' guie, laaman ragbee ni canin, zeel sin guialrdxeb canen delant lojman. Naj ragbeechaaw guial laaman ragbee gra ni canin, din ad canitan ni goc ralan lod achut zajc gagbee laan. <sup>27</sup> ¿Rliladxil ni rëb ree bën badëed xtiidx Dios loj ree bejn ya, rey Agripa? Naj ragbee guial rliladxil.

<sup>28</sup> Dxel badxi' rey Agripa laan rëbaman:

—Sta'nczi nüjnl naj gan nililadxan Jesús.

<sup>29</sup> Abi' rëb Pab:

—Majsi sta'nz o majsi ryaadxri, na Dios guial ad tijbtzi lüj, në gra ree bën cucaagdiajg ni canin yan, guidxin dxej chililadxidi Jesús zi'c naj, majsi ad nët ree caden guie.

<sup>30</sup> Dxel bisu rey Agripa con gobernador Festo con Berenice në gra ree bën zojbnë laa reeman ni. <sup>31</sup> Chi bariica reeman tiblax guzuloj cayünë lasa' reeman diidx, rëb reeman:

—Achet wayüjn xin guie ni rayal guiëtix, o chu'x ladxguiib.

<sup>32</sup> Dxel rëb rey Agripa loj Festo:

—Zile' naslaa reex, balidix niniab tëdix loj rey César.

**27***Baxhaal reeman Pab Rom*

<sup>1</sup> Chi rëb reeman ma yaxhaal reeman dunujn Italia, dxel bayü reeman Pab con sta'n ree bën yu' ladxguiib loj tijb suldad rniabee la Julio, laax rniabee tib cwaa ree suldad la Augusto. <sup>2</sup> Abi' Cesarea badxu'n loj tijb xbarcw ree bën Adramitio, barcw ni ma grii chen guiedx riga' ree niz Asia. Në Aristarco bunë'n, bën Tesalónica, guiedx riga' niz Macedonia. <sup>3</sup> Chi bareguiaal, badxinan Sidón, lod goc Julio xinza'c da't con Pab, cwëjbix bitixloj ree xmiw Pab luguiedx guin abi' badëed reeman ni ryaadxaman. <sup>4</sup> Chi badxoon Sidón badiaawan Chipre yuj riga' loj nijsdoo, basa'nanan dux ladruvejsan chitëe yachaaglojn zro' bi, din niz du lojn rliaj bi guin. <sup>5</sup> Badüüdan loj nijsdoo gajxh Cilicia në Panfilia abi' badxinan Mira, tijb guiedx nulen Licia.

<sup>6</sup> Ni bidxaagloj suldad rniabee guin tijb barcw Alejandría ni che Italia, zianz nax yadxu'n lojn. <sup>7</sup> Loj zien dxej bio'n chaawladx, con guidib tarbajw badxinan niz lod la Gnido. Abi' guial sta rliaj bi niz du lojn, dxel zagdxeli badüüdan niz Salmón, badiaawan lod la Creta yuj riga' loj nijsdoo. <sup>8</sup> Gadëd ro' yuj guin zio'n loj nijsdoo, per con guidib tarbajw, xt badxinan tijb luar la Buenos Puertos, gajxh niz lod naj guiedx la Lasea.

<sup>9</sup> Abi' zi'ct ma bayaglaan, ma naj nadxeb yasnuu yo'n loj nijsdoo, din ma zidyob tiamp nayaag. Zeel gunee Pab, <sup>10</sup> rëbaman loj reeman:

—Dad, ad zagdxet yo' ree bal yasnuu yo' ree, din nadxeb guize'n barcw guin abi' guire'ch gra ni yu' lojn loj nijs guin, xt në dunuj ree nadxeb yayëjt ree.

<sup>11</sup> Per suldad rniabee guin mazri beencwentix bën rusa barcw guin në bën naj xbarcw laan, guial loj ni rëb Pab. <sup>12</sup> Abi' guial ad zagdxeli tët naj yagaj par yadüüdan tiamp nayaag, dxel mazri zien reeman been xgab zagdxeli naj yariin yagaj, yaguieenan naguiejn yadxinan Fenice, tijb guiedx nulen Creta lod ad rbi' tët bi, ni yadüüdan tiamp nayaag.

*Gubi' tijb bidoxh loj nijsdoo*

<sup>13</sup> Dxel guzuloj cabi' tijb bi chaawladx ni zëed lad sur, abi' gunaladx reeman ma bile' zi'c naj xixgab reeman, zeel bariin bio'n loj nijsdoo gadëd ro' yuj Creta. <sup>14</sup> Per ad wayajct xchej zio'n chi birii tijb bidoxh la Euroclidón loj nijs guin. <sup>15</sup> Abi' guzuloj bi guin culadxaan barcw guin. Në guial niz du lojn zëed bi guin dxel ad gojctri nusnuu

barcw guin niejn niz lod rayal niejn, abi' baslaa reeman binë barcw guin dunujn niz lod cucadxaa bi guin laan. <sup>16</sup> Dxel badüüdan xijch tijb yujdobëz la Clauda riga'n loj nijs, lod ad rbi'tri bidoxh guin, abi' canu naxii xan barcw guin con guidib tarbajw balë'panan loj barcw guin. <sup>17</sup> Dxel chi gulox balë'pan canu guin loj barcw guin, batiejl reeman duu lad barcw guin chitëë yaze'nan. Abi' guial rdxeb reeman chëëztiej barcw guin lën üx la Sirte, dxel gulet reeman xlon ree barcw guin din cwentzi chinë barcw guin dunujn niz lod rucadxaa bi guin laan. <sup>18</sup> Chi bareguiaal, ziangajc rbi' bidoxh loj nijs guin, zianz guzuloj cuzaal reeman ni nüü barcw guin loj nijs guin. <sup>19</sup> Ni bayon dxej, cwa' reeman gra ree ni rüjnnë barcw guin dxiin bazaal reeman loj nijs guin. <sup>20</sup> Zien dxej ad biguient gubijdx ni'qui ree bajl xanyabaa por bidoxh gubi' loj nijs guin, dxel dunujn ad nagueientri du luxdoon yalaan loj nijs guin.

<sup>21</sup> Abi' guial ma gojc zien dxej ni achetci wadaawan, dxel guzuli Pab galay reeman, rëbaman:

—Dad, zagdxeli nucaagdiajguidi da diidxan ad nariit ree Creta, zian ad nadüüdt ree tarbajw guie achet tëët nasëëb ree. <sup>22</sup> Per achet güünan, ad rdxebidi din ni'qui tijbidi ad zëjtt, tijbzi barcw guin yaze'n. <sup>23</sup> Din Dios rniabee naj, bën cayünan sirv guxhaal tijb xi anjlaman balüüloj lon yan guiaal. <sup>24</sup> Abi' na anjl guin lon: “Pab, ad rdxebil, din rayal sul loj rey César, abi' por lüj ni'qui tijb ree bën zëëd loj barcw guie ad zuslaat Dios guiët reeman.” <sup>25</sup> Zeel yan dad, gol badxe' luxdoodi zagdxe, din naj riladxaan Dios, ragbee tëën zagdxe guial gac zi'c na anjl guin lon. <sup>26</sup> Per gag barcw guie niz ro' tijb yuj riga' loj nijsdoo.

<sup>27</sup> Chi goc chiin gubijdx ni zio'n loj nijs guin, guxhinzii badxinan niz loj nijsdoo la Adriatico, niz ni niz guie zë barcw guin loj nijs guin por bi guin. Abi' ree bën nulen barcw guin, guxhinzii zi'ct garol guiaal gogbee reeman guial zamer yadxinan loj yuj. <sup>28</sup> Dxel bare'xh reeman plact naxhit nijs guin, najn zi'ctiubitib mejtr naxhit. Mazri delant bare'xh reeman laan zatijb ma najn gajlbiadx mejtr naxhit. <sup>29</sup> Abi' bidxeb reeman laro' barcw guin guiaj ree, dxel niz xijch barcw guin bazaal reeman tajp ganch guiib loj nijs guin din chile' sudxe barcw guin, abi' ma rën nejzdoo reeman yareguiaal. <sup>30</sup> Bën nulen ree barcw guin, been reeman bën sta cuzaal ree ganch guiib guin loj nijs guin niz loj barcw guin, naabzi par calet reeman canu chu' reeman par guxüün reeman. <sup>31</sup> Per bagojn Pab suldad rniabee con ree xsuldadix, rëbaman loj reex:

—Bal id ree bën guin yaya'n loj barcw guie, ad zalaatrudi.

<sup>32</sup> Dxel batüüg ree suldad guin ni naxii canu guin persi zinë nijs canu guin. <sup>33</sup> Chi ma cayni luyuj, rëb Pab loj reeman din gaw reeman, rëbaman loj reeman:

—Ma gojc chiin gubijdx ni ad raayëjstidi achet tëët wayawidi. <sup>34</sup> Naj rni lëjt, gol gudaw din guibandì, din gradi ni'qui tijb guidxguijquidi ad zusëëbtidi.

<sup>35</sup> Chi rëb Pab zian, cwa'man tijb guiadxtil, abi' badëëman quixtëë loj Dios niz loj gra reeman, dxel gula'man guiadxtil guin guzuloj cayawaman. <sup>36</sup> Dxel bayu luxdoo gra reeman, guzuloj nëgajc laa reeman cayaw. <sup>37</sup> Tio'pgayuu gayojnchiibixho'p nayajc dugran zio'pan loj barcw guin. <sup>38</sup> Chi gulox gudaw reeman xt bixienladx reeman, dxel bazaal reeman trigo loj nijs guin persi bacha barcw guin.

### *Bize'n barcw loj nijsdoo*

<sup>39</sup> Chi bareguiaal, bën nulen ree barcw guin, ad bayünbeet reeman yuj badxin reeman. Per baguiaa reeman tibda'n nijsdoo guin riga' üx gadëëd ro'n, abi' been reeman xgab badxig reeman barcw guin yagaj. <sup>40</sup> Dxel batüüg reeman ni naxiinë ree ganch guiib guin ni rüjn yudar par sudxe barcw guin loj nijs, basa'n reeman ganch guin ree loj nijs guin, abi' baxhiec reeman yag ni rüjn yudar par sa barcw guin din suloj san. Dxel gules reeman lon ni naj niz lucwaj barcw guin din guiniaazan bi, zianz guzuloj cayriica barcw guin niz ro' nijs guin. <sup>41</sup> Per wëëztiejn loj üx zien lod bigagan. Niz guijcan wëëz lën üx abi'

ni'quid rniibtan, guiáad niz xan guin guzuloj cayze'nan con gojl rliaj nijs guin ladan. <sup>42</sup> Dxel nuyën ree suldad guin nugüjt reex bén prejs guin ree, chitëë nixoobnijs reeman abi' nuxüün reeman. <sup>43</sup> Per suldad rniabee guin ad cwëjbtix niajc zian guial ad rëntix niëjt Pab, dxel gunabeex guial bén rajc rxoobnijs ree, yaloj laa reeman chu' loj nijs guin güün reeman naguejn yarii reeman ro' nijs guin. <sup>44</sup> Dxelri ma guidnal gra reeman loj ree tabl o loj ree yag ni baze'n barcw guin. Zian balaan, dugran badxin ro' nijs guin.

## 28

### *Bidxin Pab Malta*

<sup>1</sup> Chi gulox barii dugran lon nijs guin, dxel bayagbeen yuj lod badxinan lan Malta riga'n galay nijs. <sup>2</sup> Bén naj ree bén ni, dád benza'c gojc reeman con dunujn. Been reeman tijb bajl guial nayaag nëtëë guial cayal guia, abi' na reeman du lojn din yubiigan cwë' bajl guin. <sup>3</sup> Dxel bato'p Pab ta'n yagbidx, zianz chi cudxe'man laan loj bajl guin briyaal tijb bëël lën yag guin por xi xliaa bajl guin, abi' gudawya'b yaa Pab nalbëztib yaaman. <sup>4</sup> Chi baguiaa ree bén Malta guin nalbëz bëël guin yaa Pab, dxel rëb loj lasa' reeman:

—Xin guie bejn bagüjtix, zeel majsi gulaax loj nijsdoo, per guiëtczix por ni beenx.

<sup>5</sup> Per gudxijp yaa Pab abi' biajb bëël guin loj bajl guin, guiáad laaman achet gocaman.

<sup>6</sup> Gra reeman cabëz saaguïy yaaman, o dxejlczi yabaman guiëtaman. Per chi gojc xchej, chi baguiaa reeman achet gocaman, bachaa xixgab reeman abi' guzuloj rëb reeman guial tijb dios najman.

<sup>7</sup> Gajxh lod badxu'n naga' ree xguidxliuj tijb bén zojbloj loj yuj riga' loj nijs guin, laman Publio. Naman du lojn yo'n lidxaman, ni badxu'n choon dxej, dád benza'c tëë gojcaman con dunujn. <sup>8</sup> Nadxel naga' xdadaman, ragxuuman, yu'man xliaa rajc tëëman yoobrejn. Abi' guyu Pab lod naga'man, zianz chi gulox gurejdx gunabaman Dios por laaman, dxel guxhoob yaaman guijcaman abi' bayajcaman. <sup>9</sup> Chi gogbee ree bénragxuu zojb ni ni goc, bi't reeman lod za' Pab persi bayüjnman laa reeman. <sup>10</sup> Dxel dád zien ni bazaladx reeman du lojn por zian. Abi' chi badxu'n loj barcw par yadxoön yagaj, banee reeman gra ni rayaadxan lunejz.

### *Bidxin Pab Rom*

<sup>11</sup> Choon bëëw badxu'n loj yuj zii, dxelri badxu'n loj tijb barcw Alejandría, ni bitëd ni tiamp nayaag. Niz lucwaj barcw guin ca tio'p ree dxan bén la ree Cástor në Pólux. <sup>12</sup> Dxel badxinan tijb guiedx la Siracusa, yagaj badxu'n choon dxej. <sup>13</sup> Abi' yagaj badxoon bio'n gadëd ro' nijsdoo xt badxinan guiedx la Regio. Chi bareguiaal, chi badxoon yagaj, brii tijb bi lad sur dxel ni barojp dxej badxinan luguiedx la Puteoli. <sup>14</sup> Yagaj badxaagan tio'p choon ree bén naj ree bén ni në reeman rililadx Jesucrist, dxel na reeman du lojn yaya'nnë'n laa reeman abi' baya'nnë'n laa reeman toxman. Zian gojc, dxelri zio'n Rom. <sup>15</sup> Guiáad ree dux compniaran bén rililadx ree Jesucrist, bén zojb ree Rom, ma ragbee reeman guial yadxinan yagaj. Dxel brii reeman bidgachaagloj reeman dunujn xt lod la Foro de Apio në luguiedx la Tres Tabernas. Chi baguiaa Pab laa reeman, babaaman abi' badëëman quixtëë loj Dios. <sup>16</sup> Chi badxinan Rom, dxel bayü suldad rniabee guin bén prejs guin ree loj tijb ree suldad rniabee ni. Per cwëjb reeman gurej Pab stijb yu ren lod gojp tijb suldad laaman.

### *Gunee Pab xtiidx Jesucrist Rom*

<sup>17</sup> Chi goc choon dxej badxinan Rom, gurejdx Pab bén Israel zojbloj ree ni. Chi badxajg lasa' reeman, dxel rëbaman loj reeman:

—Compniar Israel, achet wayünan contr ree bén Israel ni'qui contr xcostumbr ree dux béngulal ree. Guiáad laa reeman gunaaz reeman naj Jerusalén, bayü reeman naj loj ree guxtis Rom. <sup>18</sup> Abi' ree bén Rom guin chi gulox badëdan cwent loj reeman, dxel nuyën reeman nuslaa reeman naj, guial gogbee reeman achet benan par guiëtan. <sup>19</sup> Per ree

bén Israel guin badxoon reeman abi' zagdxeli gunaaban gadëedan loj rey César, per ad guial ra'ptan xhienin contr ree bén Israel. <sup>20</sup> Zeel guredxan lëjt, din guidganajdi naj din ganin lojdi guial por ni rliladxan guial yaban ree bengüt zi'cgajc rliladx gra ree du lasa' bén Israel ree, zeel naxiin con ree caden guie.

<sup>21</sup> Dxel rëb reeman lojman:

—Dunujn ni'qui tijb xtiidx ree bén Judea ad waca'tan lod na reeman xcwentil, në ni'qui tijb bén duladx ree bén raza ree Judea achet wana reeman du lojn contr lüj. <sup>22</sup> Per rayënan yaguiejn nan xhienaag naj xixgabil, din dunujn rayagbee guial gra ladcz rniee reeman contr religion cüb guin.

<sup>23</sup> Dxel bazuj reeman tijb dxej ni yadxajg lasa' reeman. Chi bidxin dxej guin, dád zien bejn bido'p lod zojb Pab. Abi' diizd rsil xt wadx guneenëman laa reeman xhienaag naj xguialrniabee Dios. Beenman naguiejn chililadx reeman Jesús, baza't tëëman lod rniee xcwent Jesús loj xlibr ley Moisejs në ni bacaa ree bén badëë xtiidx Dios loj ree bejn. <sup>24</sup> Yu' reeman bililadx ni rëb Pab, per yu' reeman ad bililadxt. <sup>25</sup> Abi' guial ad rdxaagt gü reeman diidx, guzuloj bare'ch reeman. Dxel rëb Pab loj reeman:

—Waliqni ni rëb Isaías bén badëëd xtiidx Dios loj ree dux béngulal ree guial rëb xSprijt Dios:

<sup>26</sup> Wej, güjdx loj ree bén guin:

Majsi riguejn reeman, per achetczi chignia' reeman,  
abi' majsi ruguiaa reeman, per rulüü ad ruguiaat reeman.

<sup>27</sup> Din been luxdoo reeman gojl,

abi' rüjn reeman zi'c rulüü ad ruguiaat reeman,  
ad riguejn tëët reeman, chitëë guguiaa reeman,  
abi' guien reeman chignia' tëë reeman.

Din ad rënt reeman gui't reeman con naj,  
abi' günan laa reeman perdon.

<sup>28</sup> Zeel gol gogbee guial diizd yan, loj ree bén ad najt bén Israel guire'ch diidx xhienaag gap reeman xperdon Dios, abi' laa reeman zaliladx reeman diidx guin ree.

<sup>29</sup> Chi gulox rëb Pab zian, dxel zia ree bén Israel guin, cadildiidxnë lasa' reeman.

<sup>30</sup> Tio'p ijz gurej Pab ni, yu lod gudixaman. Ni rnieenëman gra ree bén rtixloj laaman.

<sup>31</sup> Sin guialrdxeb rëbaman loj reeman xhienaag naj xguialrniabee Dios, abi' guneeman xtiidx Dad Jesucrist loj reeman sin guial chu nudxoon.

## Gui'ch ni guxhaal San Pabl loj ree bén Rom rliladx Jesucrist

### *Rxhiaal San Pabl xtiidx Dios*

<sup>1</sup> Naj Pab, cayünan sirv loj Jesucrist, Dios gule naj din gacan xi apóstol Jesucrist, din gatiechan xtiidxza'caman.

<sup>2</sup> Diizd gocli mal rëb Dios diidxza'c guin ree, ni zëed loj xtiidxaman zi'c bacaa ree bén badëe xtiidx Dios loj ree bejn, <sup>3</sup> diidx guin ree ruza't, dux Dad ree Jesucrist guial zi'c bi'taman loj guidxliuj zi'c bénguidxliuj, loj xdiaa rey Davi zaman. <sup>4</sup> Per por xSprijt Dios laaman naj Xi'n Dios guial babanman loj ree bengüt, abi' guidiblagaa rajpaman guialrniabee. <sup>5</sup> Abi' par yaza't reeman, zeel bacaabeeman naj din gacan apóstol din guidiblagaa guidxliuj chu' bén chililadx laaman, bén guzooob tée xtiidxaman. <sup>6</sup> Abi' në lëjt ma nayab loj ree bén gule Dios din gaquidi xbejn Jesucrist.

<sup>7</sup> Zeel caxhalan gui'ch guie lojdi bén rën ree Dios, bén zobj ree Rom, lëjt ma gulej Dios din gaquidi xbejnman. Dux Dad ree Dios në Dad Jesucrist güünle' lëjt yabe'cdxe tée reeman luxdoodi.

### *Rën Pab cheman Rom*

<sup>8</sup> Yalojxgaj por Jesucrist rudën quixtëe loj Dios por gradi, guial guidibczi ruza't reeman lëjt xhienaag rliladxidi Jesucrist. <sup>9</sup> Abi' zi'c cayünan sirv loj Dios, guidib guic guidib ladxan catiechan xtiidxza'c Xi'nman Jesucrist, abi' laaman ragbee guial ad rucwëezt rbedx rniaaban laaman por lëjt. <sup>10</sup> Ad rucwëez tëet rbedx rniaaban Dios din guneeman mod guidganan lëjt, zi'c naj da xgaban diizd gocli. <sup>11</sup> Din yu'czan gan guidganan lëjt din günan lëjt yudar con xtiidx Dios din sudxi'chidi lojn. <sup>12</sup> Din güün tëedi naj yudar zian yaguieen du lasa' ree yudar loj guialrliladx ni raya'p ree, din chile' yalu' du luxdoo du lasa' ree.

<sup>13</sup> Compniar raliduladx ree Jesucrist, rënan gagbeedi guial zien volti da't ma benan xgab guidganan lëjt, din gacxhiey ree bén chililadx xtiidx Dios, zi'c ma gojc zien ree luar ni ma wan, per xt yan ad wayajct gan guidganan lëjt. <sup>14</sup> Par naj naladxan da cwentan naj guial gulün chutëez benan xtiidx Dios, bal najman bén ciuda o najman bén guiedxdoo ya, bal rignia'man o ad rignia'taman. <sup>15</sup> Zeel rënnejzdoon guidganan lëjt din gatiechan xtiidx Dios Rom.

### *Xguialrniabee xtiidxza'c Dios*

<sup>16</sup> Ad ratunë'tan xtiidxza'c Jesucrist. Din por diidxza'c guin ree zëed xguialrniabee Dios, din gra ree bén chililadx laan laa reeman loj dol, zi'c ree bén Israel zi'c ree bén ad najt bén Israel. <sup>17</sup> Din por xtiidxza'c Jesucrist ragbee ree bejn guial por guialrliladx reeman laaman ma naj reeman cwent sin dol: achet por stijb ni ren tijbzi por guialrliladx. Zian ca loj xtiidx Dios lod rëb: "Bén naban zi'c rën Dios, guidib tiamp ni nabanman rliladxaman laaman."

### *Dol ni rajp bejn*

<sup>18</sup> Dunuj ree rayagbee guial diizd xanyabaa zëed xcastiro' Dios par ree bén ad ridxga't laaman, bén ad rüjnt ree zi'c rayal, abi' zi'c naban reeman ruquie'ch reeman xtiidxli Dios. <sup>19</sup> Din ragbeechaaw reeman guial yu' Dios, abi' laagajcaman balüü bejn ree guial yu'caman. <sup>20</sup> Majsı ad ruguiaat bejn Dios, per diizd chi go'tchaaw guidxliuj raguiaa ree ni beenman, abi' por ni ma beenman rayagbee ree guial ad yu't dxej lox xguialrniabeeman abi' laa tëeman naj Dios. Zeel ad zajct xhie gudxiib bejn guiyc guial achet ragbeeman xcwent Dios. <sup>21</sup> Din majsı yu' ree bejn ragbee guial yu' Dios, per ad rajpt reeman laaman respejt zi'c rayal, ad rudëe tëet reeman quixtëe lojman, aal xgab

ren ree rüjn reeman ni ad rüjnt sirv abi' gaz ragdxa reeman. <sup>22</sup> Rëb reeman guial rajc da't reeman abi' mazri na tont reeman. <sup>23</sup> Din luar guiën reeman Dios ni ad yu't dxej guiët, rën reeman ni nit ree yu' dxej, rën reeman ni naj ree zi'c bejn, ni naj ree zi'c biguijn, zi'c ree be yu' tajp guia' nè ree bëël.

<sup>24</sup> Zeel ma gulëëladx Dios laa reeman loj xixgab mal reeman, abi' rüjn reeman ni natu ree con ree ben ren. <sup>25</sup> Luar chinal reeman xdiidxli Dios, zinal reeman ni rusquiee ree. Abi' rën reeman rajp tëë reeman respejt ni been Dios, luar guiën reeman laaman guial beenman laa reen, abi' laaman rayal gap ree bejn respejt zianczi. Amén.

<sup>26</sup> Zeel gulëëladx Dios laa reeman loj ree ni dxuudx rüjn reeman. Abi' zien ree béngunaa ad nabantri ree xnejz, rën lasa' béngunaa gajc reeman. <sup>27</sup> Ziangajc zien ree xinguaaaw ad nabantri xnejz, rën gajc lasa' xinguaaaw reex, xinguaaaw con xinguaaaw rüjn reex ni dxuudx, ni natu. Abi' laagajc reex rguuil xcasti reex.

<sup>28</sup> Abi' guial ad ridxga't reeman Dios, zeel gulëëladx Dios laa reeman loj xixgab mal reeman, din güün reeman ganax ni ad rayalt güün reeman. <sup>29</sup> Ganax ni ad rayalt güün reeman rüjn reeman, za'në reeman xinguaaaw ren o béngunaa ren, zien ree ni mal rüjn reeman, rzëëbladx reeman gap reeman ni rajp ree ben ren. Dád nadëdloj reeman, rugüjt reeman bejn, rguuil reeman wadijl, rusquiee reeman bejn, ganaxczi ni mal yu'guijc reeman abi' rbëë reeman xtiidxguijdx bejn. <sup>30</sup> Rnieeguijdx tëë reeman bejn, ralen reeman Dios, ad rajpt reeman bejn respejt, rlies xvalor gajc reeman, rüjn reeman benro'. Abi' rbëëguijc reeman ni mal ree, ad ruzoob tëët xtiidx xdad xniaa reeman. <sup>31</sup> Dád nad reeman, ad rüjnt cumplid xtiidx reeman, ad rënt lasa' reeman, ad raya tëët lasa' reeman. <sup>32</sup> Ragbeecheaaw reeman rëb Dios guial chi guiët ree bejn, dxel gra ree bén rüjn gra ree ni guin yayal casti. Per majsi zian, rusnuu gajc rüjn reeman ni mal guin ree abi' xt rabaa reeman chi rüjn ree ben ren zian.

## 2

### *Xguialguxtis Dios*

<sup>1</sup> Zeel chutëëz lüj guial rëbil xhie casti rayal bejn, ad rajptil derejch guiëbil zian, din lüj gajc rayal casti guin guial cayüjnl zi'cgajc rüjn reeman. <sup>2</sup> Per dunuj ree rayagbee guial Dios rüjn guialguxtis zi'c rayal, chi rudëëdaman casti bén rüjn ree ni mal guin. <sup>3</sup> Abi' lüj guial rëbil xhie casti rayal bejn abi' nëgajquiza lüj rüjn zi'c rüjn reeman, ad naladxil laal loj xcasti Dios. <sup>4</sup> Ad rëntil guialnaza'c Dios con lüj, ad rëntil guial rdaanman lüj rajp tëëman lüj pacens, ni'quid ragbeetil guial pacens guin rüjn lüj yudar din gapil tiamp par yayüjnl xgab por xtolil. <sup>5</sup> Per guial dád nadil, ad rëntil yayejqul loj Dios, zeel lüj gajc cayüjnxhie xtolil par dxej ni gudëëd Dios casti, dxej ni güünman guialguxtis zi'c rayal. <sup>6</sup> Par gudëëman ni rayal tijbgaj bejn bal gonin beenman. <sup>7</sup> Gudëëdaman guialnaban tiblyaa loj ree bén ad radxagt rüjn naguiejn guiban zagdxe guial rüjn reeman naguiejn yayal reeman guialnaza'c yu' xanyabaa, rüjn tëë reeman naguiejn yaya'n reeman zagdxe loj Dios din gap reeman cuerp ni ad yu't dxej nit. <sup>8</sup> Per ree bén ad ruzoobt diidx, rdxe'ch Dios laa reeman abi' gudëëdaman laa reeman casti, din luar chinal reeman xtiidxliman, zinal reeman nejl mal. <sup>9</sup> Gra ree bén zinal nejl mal, naya sac reeman sagdiaj reeman, yaloj ree bén Israel dxel bén ad najt ree bén Israel. <sup>10</sup> Guiáad ree bén zë loj nejl zagdxe, guilies Dios xvalor reeman, yabaanëman laa reeman, yabe'cdxe tëëman luxdoo reeman, yaloj xgaj ree bén Israel dxelri bén ad najt ree bén Israel.

<sup>11</sup> Din Dios tiblojzi rüjnman guialguxtis con gra bejn. <sup>12</sup> Gra ree bén cayüjn dol sin guial ad nünbeet reeman ley badëëd Dios loj Moisejs, tëd reeman casti sin ley guin. Guiáad ree bén cayüjn dol majsi ragbee reeman ley guin, laa reeman tëd casti zi'c rniabee ley guin. <sup>13</sup> Din ad guial guientzi bejn ley guin ma nayaman loj Dios, bén rüjn ree zi'c rniabee ley guin laa reeman naj bén naya loj Dios. <sup>14</sup> Per chi ad najt bejn bén Israel, abi' cayüjnman ni zagdxe sin guial güünbeeman ley guin, dxel ma cayüjnman zi'c rniabee ley guin majsi



ad nünbeetaman laan, guialzi nünbeeman conin naj ni zagdxé con téë nin naj ni mal, abi' guijc gajc reeman zëéd xley reeman. <sup>15</sup> Din zi'c naban reeman, rguien guial guijc reeman zëéd conin rayal güün reeman con téë nin ad rayalt güün reeman luar gap reeman ley guin. Abi' laagajc reeman ragbee chi ma been reeman ni zagdxé o chi ma been reeman ni mal. <sup>16</sup> Zian gac chi güün Dios guialguxtis por gra ree ni naguie'ch ni rüjn bénguidxliuj. Abi' zi'c culün bejn ree guidibczi, laaman güün guialguxtis por Jesucrist.

### *Bén Israel ree në xley Moisejs*

<sup>17</sup> Yan, lüj guial najl bén Israel yu'guijquil guial rajquil ley badëë Dios loj Moisejs, abi' rüjnl nabë guial najl xbejn Dios, <sup>18</sup> rëbil guial ragbeel xhienaag rën Dios guibanl, abi' por xleyaman ragbeel conin naj zagdxé güünl. <sup>19</sup> Abi' naladxil zile' guzuxnejzil bén ad nünbeet ree ley guin në ree bén ad nünbeet xnejz Dios, <sup>20</sup> naladxil zile' gulüül bén ad rajct ree në ree bén rajc ta'nzi, guial por ley guin ragbeel gra, ragbee tëël conin naj diidxli. <sup>21</sup> Per zi'c nabanl, ¿chexc zeel ad rulüüt lüj gajc luar gulüül ben ren? Din lüj rëb guial ad laat cwan bejn, abi', ¿chexquiza zeel rbanl? <sup>22</sup> Rëbil guial ad laat sunë bejn bén ad najt lacheelaman, abi' lüj, ¿chexquiza zeel rüjnl zian? Rëb tëël guial rdxe'chil ni naladx bejn naj dios, abi', ¿chexquiza zeel rbanl lën yadoo lod yu' ree Dios guin? <sup>23</sup> Dád nabë rüjnl guial nünbeel ley, per rusa'nxtul Dios guial ad rüjntil ni rniabee ley guin. <sup>24</sup> Ze'cli rëb loj xtiidx Dios: “Bén ad najt ree bén Israel rniee reeman Dios diidxguijdx por lëjt.”

<sup>25</sup> Diidxli rüjnqui sirv guial ru xcuerp bejn sen ni ru ree bén Israel, bal rüjnman zi'c rniabee xley Dios. Per bal id rüjnman zi'c rniabee ley guin, achet sirvan guial yu'man sen guin. <sup>26</sup> Per bal tijb bén ad yu't sen guin nabanman zi'cgajc tijb bén rajc xley Dios majsi ad nünbeetaman laan, dxel ma nayabaman zi'c tijb bén yu' sen, majsi ad yu'taman sen guin. <sup>27</sup> Bén rüjn zi'c naj xley Dios, majsi ad nünbeetaman ley ad yu' tëëtaman sen, gusa'nxtu'man lüj guial nünbeel ley guin yu' tëël sen guin, abi' ad rüjntil zi'c rniabee ley guin. <sup>28</sup> Din ad guial rajlt bejn loj nacion Israel, ad guial yu' tëëtaman sen ni ru ree bén Israel ma najman bén Israel loj Dios, <sup>29</sup> bén wali naj bén Israel loj Dios, guidib luxdooman zinalaman xnejz Dios, ad por guial yu'taman sen ru ree bén Israel, ad por xcostumbr tëët reeman, por guial naban reeman con xSprijt Dios. Abi' bén naban zian, Dios rlies xvaloraman sa'n ad bénguidxliujt.

## 3

<sup>1</sup> Zeel zanadi lon xhieczi gan naj bejn bén Israel o xhieczi gan chu'man sen ru ree bén Israel. <sup>2</sup> Per naj gani lojdi guial gadxagayaa mod lasajc guial naj bejn bén Israel, din yalojxgaj loj ree bén Israel badëëd Dios xtiidxaman. <sup>3</sup> Yan ad nalaxidi por guial yu' ree bén ad zinalt xnejz Dios, ad züjntraman cumplid ni rëbaman din xo güün Dios ni rëbaman güünman con ree bén zinal xnejzaman. <sup>4</sup> Din laaman ad yu't dxej guchaa xtiidxaman, majsi gra bénguidxliuj naj bén rusquiee, per Dios ad nëtaman rusquiee, zi'c rëb tiblajt loj xtiidxaman lod rëb:

Gra bejn güünbee lüj guial rüjn cumplid xtiidxil,  
abi' achet zajc gudxiib reeman guijquil.

<sup>5</sup> (Per yu' bejn rüjn xgab) guial bal por dol ni cayguieen ree rulüü guial benza'c naj Dios, ¿chexquiza zeel najman benmal rudëëdaman bejn casti? <sup>6</sup> Per naj rni lojdi guial ad najt Dios benmal, din bal najman benmal xoza güün xguialguxtisaman con bénguidxliuj.

<sup>7</sup> Din bal yaguie'ch ree guial ad rucaagdiajgt xtiidx Dios, laan naj ni rüjn yudar xtiidxli Dios din gap bejn laaman mazri respejt, dxel ad zajctri guiëb Dios naj bejn bëndol. <sup>8</sup> Abi' mazri ma yaguieen ree ni mal din gui't ni zagdxé, zi'c rëb ree bejn culün bejn ree, per Dios gudëëd casti bén rëb ree zian.

### *Graczi bejn ma been dol*

<sup>9</sup> Zeel zi'c ma rnin por ree bén Israel, në por ree bén ad najt bén Israel, abi' ma ragbeedi guial ad zajct guiëbidi guial mazri benza'c naj ree bén Israel guial loj ree bén ad najt bén Israel, din tiblojzi nayajc ree béndol. <sup>10</sup> Zi'c ca tiblajt loj xtiidx Dios lod rëb:

Achutczi naj benza'c,  
per ni'qui tijb bejn.

<sup>11</sup> Achutczi rignia'.

Achutczi raguuil Dios.

<sup>12</sup> Gra reeman ma basa'n xnejz Dios.

Gra reeman ma zinal nejz mal.

Achutczi cayüjn ni zagdx,  
per ni'czi tijb bejn.

<sup>13</sup> Zi'cgajczi tijb baa ni zojbyal,  
zian ganax ni dxuudx ririi ro' reeman.

Ganax diidx rusquiee rniee reeman.

Abi' xtiidx reeman naj zi'c xvenen bëel.

<sup>14</sup> Ganax diidx mal ririi ro' reeman,  
diidxguijdx ni rüjnnaa lasa' reeman.

<sup>15</sup> Za'sin reeman din gugüjt reeman bejn.

<sup>16</sup> Bantëez guin zë reeman, rüjn reeman ni dxuudx ree.

Abi' rusagzi reeman bejn ree.

<sup>17</sup> Ad nünbee tëet reeman xhienaag naj guialrbajn bejn zagdx.

<sup>18</sup> Ad yu'guijct reeman guial rayal guidxeb reeman Dios.

<sup>19</sup> Dunuj ree rayagbee guial gra ni zëed loj xley Dios, naj par ree bén zinal ley guin, chitëe chu guiëb guial achut ragbee xhienin naj dol, laan naj par gagbee bejn guial najman béndol loj Dios. <sup>20</sup> Din ad guial güünt bejn gra ni rniabee ley guin ma nayaman loj Dios, ley guin rulüü din gagbee bejn guial najman béndol.

### *Por guialrliladx ma naya bejn loj Dios*

<sup>21</sup> Per yan Dios ma balüü dunuj ree tijb nejz guial xhienaag yayajc ree naya lojman. Ad guial yaguieentzi ree zi'c rniabee ley guin, por ley guin në por ni bacaa ree bén badëe xtiidx Dios loj ree bejn. <sup>22</sup> Rayagbee ree guial rüjn Dios bejn cwent zi'c bén ad yu't xtol por guialrliladxaman Jesucrist, din par Dios tiblojzi naj bejn. <sup>23</sup> Din gra bejn ma been dol, achutczi naya niz loj Dios. <sup>24</sup> Per guial najman benza'c, ma beenman perdon dux tol ree sin guial yadijx ree, ma nayajc ree perdon por Jesucrist, bén gudix por dux tol ree chi gütaman loj crüjz. <sup>25</sup> Dios guxhaal Jesucrist, din por xrejnman chu' perdon par bénguidxliuj. Abi' perdon guin naj par ree bén rliladx Jesucrist. Zian rguien guial graczi rüjn Dios xnejz, abi' bal guia'xchej ad beent xguialguxtisaman por dol ni been ree bejn, laan naj por pacens ni rajpaman con bejn, <sup>26</sup> guial ma ragbeeman goc güün xguialguxtisaman. Zian rusnuu rulüüman guial graczi rüjnman xnejz, zeel rüjnman perdon xtol ree bén rliladx Jesucrist.

<sup>27</sup> Yan, ¿xhienaag yaguieen ree nabë? Achet yaguieennë' ree nabë, din ad guial yaguieent ree ley guin cumplid ma nayajc ree perdon, yayajc ree perdon por guial yaliduladx ree Jesucrist. <sup>28</sup> Zeel rayagbee chaaw ree guial Dios rüjn perdon xtol ree bejn guial rliladx reeman Jesucrist, ad guial rüjnt bejn naguiejn güünman gra ni rniabee ley guin.

<sup>29</sup> ¿Wen xDiosi ree bén Israel naj Dios ya, ad nët ree bén ad najt bén Israel naj xDios laaman ya? Naj rni lojdi guial Dios naj par gra bejn, <sup>30</sup> din tijbzi Dios yu', laaman rüjn perdon xtol ree bén rliladx Jesucrist, yu'man o ad yu'taman sen ni rniabee ley chu' ree bén Israel. <sup>31</sup> Ad naladxidi cayguieen ree ley guin tiblad guial raliduladx ree Jesucrist, din ad ziantan, guial raliduladx ree laaman rguien guial nadxu'guijct ree ley guin.

## 4

### *Xgualrliladx Abraham*

<sup>1</sup> Yan, ¿xhie zajc yaguie'ch ree xcwent dux béngulal ree Abraham? <sup>2</sup> Bal niyab Abraham zi'c tijb bèn gad güün dol por ree ni beenman, guyu mod nünman nabë loj ree bejn, per ad lojt Dios. <sup>3</sup> Din rëb loj xtiidx Dios: “Guial bililadx Abraham Dios, zeel been Dios laaman cwent zi'c tijb bèn ad beent dol.” <sup>4</sup> Chi rün bejn dxiin, milia ni rajxaman ad ni razaladxt reeman, rtia'man laan por dxiin ni rünman. <sup>5</sup> Per guial gac bejn perdon loj Dios, ad zajct guiëb bejn guial rayalaman perdon guin por ni beenman, din achut naya loj Dios. Perdon guin zëedan guial rliladx bejn Jesucrist, zeel rün Dios bejn cwent zi'c bèn ad yu't xtol. <sup>6</sup> Zi'c gunee rey Davi guial xiquilbaa ree bèn been Dios cwent sin dol sin guial güün reeman xhienin par yaya reeman perdon guin. <sup>7</sup> Rëbaman: Xiquilbaa ree bèn been Dios perdon xtol, bèn ma badxi'caman xtol.

<sup>8</sup> Xiquilbaa ree bèn ma been Dios cwent sin dol.

<sup>9</sup> Ad guneet Davi diidx guie ree naabzi par bèn yu' ree sen ni ru ree bèn Israel, guneeman diidx guin ree par gra ree bejn. Din zi'c ma raguie'ch ree, Dios been Abraham cwent zi'c bèn ad yu't xtol guial bililadxaman laaman. <sup>10</sup> Abi' chi biyabaman zi'c bèn ad yu't xtol, ni'qui gadaman chu' sen ni ru ree bèn Israel, chi gad Abraham chu' sen guin mal nün Dios laaman cwent zi'c bèn ad yu't xtol. <sup>11</sup> Chi biabaman zi'c bèn ad yu't xtol, dxel guyuman sen guin din sen guin naj guial ma nün Dios laaman cwent zi'c bèn ad yu't xtol guial bililadxaman laaman. Zeel naj Abraham dad par ree bèn rliladx Dios, majsi ad yu't reeman sen ni ru ree bèn Israel, per por gualrliladx guin nün Dios laa reeman cwent zi'c bèn ad yu't xtol. <sup>12</sup> Naj tëë Abraham dad par ree bèn majsi yu' sen guin per rliladx reeman zi'c bililadx Abraham Dios diizd chi gadaman chu' sen guin.

### *Promejs ni been Dios loj Abraham*

<sup>13</sup> Chi been Dios promejs loj Abraham në loj ree xdiaaman, guial gudëedaman guidib guidxliuj loj reeman zi'c tijb ni bayal reeman, ad beent Dios promejs guin loj Abraham guial beenman zi'c rniabee ley, beenman promejs guin guial bililadxaman laaman, zeel beenman laaman cwent zi'c tijb bèn ad yu't xtol. <sup>14</sup> Yan bal ganaxzi ree bèn zinal ley guin tia' ni gudëë Dios, achet cwent naj gualrliladx ree bejn laaman, ache tëët cwent naj promejs ni been Dios loj Abraham. <sup>15</sup> Din ley guin najn par castizi, per lod ad yu't ley, ad yu't mod chu guiëb guial ad cayüjnt bejn ley guin cumplid.

<sup>16</sup> Zeel chi been Dios promejs loj Abraham guial gudëedaman ni rëbaman par gra ree xdiaaman, beenman promejs guin lojman guial bililadx Abraham guin laaman, din guiguien guial najman benza'c abi' ad parzi ree bèn zinalt ley guin naj promejs guin, nëgajc par ree bèn rliladx Dios zi'c bililadx Abraham majsi ad rajpt reeman ley guin. Zeel naj Abraham dad par dugra ree. <sup>17</sup> Zi'c ca loj xtiidx Dios lod rëbaman loj Abraham: “Lüj gac dad par zien ree bénguidxliuj.” Zian naj promejs ni been Dios loj Abraham, Dios bèn rusban ree bengüt abi' rnieeman xcwent ree ni gad chu' loj guidxliuj guie zi'c rulüü ma yu' reen.

<sup>18</sup> Majsi ragbeechaaw Abraham guial ad zajctaman famil, per chi rëb Dios lojman zian, bililadxaman ni rëb Dios, bililadxaman guial gac gra ni rëbaman lojman. Zianan zeel najman dad par gra ree bèn rliladx Dios zi'cgajc laaman. Zi'c rëb Dios lojman, chi rëbaman: “Zian gaquil famil, dád famil narooob gaquil.” <sup>19</sup> Cost tibgayuu ijz ma yu' Abraham nadxel, ragbeeman guial ma naj reeman bengol në xbéngunaaman Sara guial chu' xi'n reeman, per ad guyunawëegtaman, bililadxaman ni rëb Dios lojman. <sup>20</sup> Ad yu't dxej ad bililadxtaman ni rëb Dios. Diidxli bililadxaman laaman abi' rudëëman quixtëë lojman, <sup>21</sup> din guidiblagaa bililadxaman guial rajp Dios gualrniabee güünman zi'c ma rëbaman. <sup>22</sup> Zeel been Dios cwent Abraham zi'c tijb bèn ad yu't xtol.

<sup>23</sup> Abi' lod rëb guial been Dios laaman cwent zi'c bén ad yu't xtol guial bililadxaman laaman, ad tijbtzi Abraham ruza't yagaj, <sup>24</sup> nëgajc dunuj ree din ma raliduladx ree Dios. Abi' në dunuj ree ma nünman cwent zi'c bén ad yu't xtol, Dios bén basban Dad Jesucrist loj guialgüjt, <sup>25</sup> Dad Jesucrist bén güt por dux tol ree, dxel babanman abi' por laaman ma naya ree loj Dios.

## 5

### *Chi ma naya bejn loj Dios*

<sup>1</sup> Ma nün Dios dunuj ree cwent zi'c bén ad yu't xtol guial raliduladx ree laaman, zeel ma nadxu' ree zagdxe con laaman por xguialgüjt Dad Jesucrist. <sup>2</sup> Din guial raliduladx ree Jesucrist ma zajc yadxin ree loj Dios abi' nadxu'guijc ree ni ma beenman por dunuj ree, zeel dá d nix yu' du luxdoo ree din ralëéz ree yayal ree xanyabaa lod za'man. <sup>3</sup> Abi' ad ziantzi, në guial yu' du luxdoo ree zagdxe por guialrzagdiaj ni radüüd ree, din rayagbee ree por guialrzagdiaj guin yasiid ree yaya'p ree pasens. <sup>4</sup> Abi' por pacens guin yasiid ree yadaan ree ni gui'tzi, abi' guial yadaan ree ma zajc yadxin ree loj Dios. <sup>5</sup> Ni ralëéz ree por Dios, ad zasa'nxtutan dunuj ree, din rayagbee ree guial rën da'taman dunuj ree por xSprijtaman bén ma baneeman duloj ree.

<sup>6</sup> Gocli babajn ree ad bile't nagueien ree xhienin din güün Dios dunuj ree perdon. Per chi bidxin dxej bi't Cristo güjtaman por dunuj ree nayajc ree béndol. <sup>7</sup> Dunuj ree rayagbee guial nawëég naj chu' bén tiëb guiët por zatijb bejn. Ni'czi por tijb bén naban xnejz, o wed yu' bén tiëb guiët por tijb benza'c da't. <sup>8</sup> Per Dios ma balüüman guial rënman dunuj ree, zeel güjt Jesucrist por dunuj ree majsi nayajc ree béndol. <sup>9</sup> Per yan ma naya ree loj Dios por xguialgüjt Jesucrist, abi' ad ziantzi, në ad zayaltri ree xcasti Dios chi guidxin dxej. <sup>10</sup> Din chi ad bile't nadxin ree loj Dios, laaman guxhal nejz guin por xguialgüjt Xi'nman Jesucrist, diidxgui yan ad züjntaman dunuj ree perdon ya, guial ma nabajnnë' ree Jesucrist, bén guxhal nejz par loj Dios. <sup>11</sup> Abi' ad laatzan, në guial yu' du luxdoo ree nix radëéd ree quixtëé loj Dios por Dad Jesucrist, din por laaman ma nadxu' ree zagdxe con Dios.

### *Adán në Cristo*

<sup>12</sup> Por tijb xinguaaaw guzuloj guyu dol loj guidxliuj, abi' por dol guin guzuloj guyu guialgüjt, gra ree bejn bayal guialgüjt guin guial been reeman dol. <sup>13</sup> Diidz chi gad ley ni badëéd Dios loj Moisejs chu' mal yu' dol, per guial achet ley guyu nadxel, achut zajc guiëb guial cayün bejn dol. <sup>14</sup> Per majsi zian, bidxinczi dxej ni güt reeman, diidz xtiamp Adán xt xtiamp Moisejs, majsi ad beent reeman lasa' dol ni been Adán. Abi' tiampzii Adán gojc tijb sen par tijb bén naj gui't.

<sup>15</sup> Din garen naj dol ni been Adán guial loj perdon ni zëéd por Dios. Por xtol tijb bejn guzuloj guyu guialgüjt par gra bejn, per por tijb bejn zëéd xperdon Dios, abi' laaman naj Jesucrist. Por Jesucrist rün Dios dunuj ree perdon, abi' ni been Jesucrist naj ni mazri lasajc, në ni mazri zagdxe par zien ree bejn. <sup>16</sup> Din garen naj dol ni been Adán guial loj perdon ni runee Dios. Por tijb dol bi't xcasti Dios, per por Jesucrist ma zile' gac bejn perdon, majsi ma beenman zien dol. <sup>17</sup> Por dol ni been Adán bi't guialgüjt par gra ree bejn. Per por ni been Jesucrist bi't perdon par gra ree bén rliladx guial por Cristo ma naj bejn naya guidiblagaa loj Dios, abi' gap reeman guialnaban tiblayaa con laaman.

<sup>18</sup> Abi' guial bi't guialgüjt zi'c tijb casti par gra ree bejn por dol ni been Adán, ziangajc por ni zagdxe ni been Jesucrist ma zajc gap ree bejn perdon në guialnaban loj Dios. <sup>19</sup> Din por tijb bén ad bazoobt diidx gra bejn naj béndol. Per ziangajc por tijb bén bazoob diidx ma zajc gap bejn perdon loj Dios.

<sup>20</sup> Abi' Dios badëé ley loj Moisejs, din por ley guin gagbee ree bejn guial cayün reeman dol. Abi' chi ragbee bejn guial cayünman zien dol loj Dios, ziangajc mazri benza'c naj Dios par güünman laaman perdon. <sup>21</sup> Guia'xchej gunabee dol bejn ree, abi' por dol guin

guzuloj guyu guialgüjt. Per yan mazri nadxu'guijc ree guial rën Dios dunuj ree, din guial rënman dunuj ree nünman dunuj ree cwent sin dol, abi' yaya'p ree guialnaban con laaman por dux Dad ree Jesucrist.

## 6

### *Ma bayëjt ree par dol per nabajnnë' ree Jesucrist*

<sup>1</sup> Ad naladxidi canin lojdi guial yaguieen ree dol mazri din guiën Dios dunuj ree mazri. <sup>2</sup> Din ad ziantan, ma bayëjt ree par dol ad rayaltri yaguieenz yaguieen ree dol. <sup>3</sup> Din gol bignia' guial chi barobnijs ree por Jesucrist, laan naj zi'c rulüü guial në dunuj ree ma bayëjt con laaman. <sup>4</sup> Chi barobnijs ree rën guiëban guial ma baxa'tyuj ree con Cristo, ma bayëjt ree con laaman din ziangajc zi'c babanman por xguialrniabee Dios ziangajc zajc guidxaa mod ni nabajn ree, yabajn ree zi'c rën Dios.

<sup>5</sup> Abi' bal chi barobnijs ree ma nayajc ree tijbzi con Jesucrist loj xguialgüjtaman, zi'c babanman ziangajc yaban ree. <sup>6</sup> Din dunuj ree rayagbee guial chi güt Jesucrist loj crüzj, güjtaman por gra ni baguieen ree yaloj chi gad ree yaguieenbee laaman, abi' yagaj gunijt zi'c babajn ree yaloj, din ma naj nawëëg güün dol dunuj ree gan din ad rniabeetri dol guin dunuj ree. <sup>7</sup> Din bén ma güjt por dol, ad rniabeetri dol guin laaman. <sup>8</sup> Abi' guial güjt Jesucrist por dux tol ree, zeel ma bayëjt ree par dol guin, yabajn tëë ree con laaman. <sup>9</sup> Din dunuj ree rayagbee guial chi baban Jesucrist ad yu'tri dxej guiëtaman din ad rniabeet guialgüjt laaman. <sup>10</sup> Con tivoltizi güjt Jesucrist por xtol ree bejn, yan ma nabanman par Dios. <sup>11</sup> Ziangajc lëjt gol been cwent guial ma güjtidi par dol, abi' ma nabandi par Dios guial ma najdi tijbzi con Dad Jesucrist.

<sup>12</sup> Zeel la'tgaj nabandi loj guidxliuj guie ad tiëbidi nabee dol lëjt, ad tiëb tëëdi güün ree xgabdxuudx lëjt gan. <sup>13</sup> Ad cwëëladx lëjt gajc loj dol par güündi ni mal, zagdxeli gol cwëëb nabee Dios lëjt, zi'c tijb bén ma güjt, abi' yabandi par laaman. Gol cwëëb nabeeman lëjt par güündi ni zagdxe. <sup>14</sup> Zian ad zanabeetri dol lëjt, per ad por guial yu'guijctidi ni rëb ley ad güündi, ad zanabeetri dol guin lëjt por guial zinalidi guial rën Dios lëjt.

### *Ma gulaa ree loj dol*

<sup>15</sup> Ad canitan por guial ma zunaal ree guial rën Dios dunuj ree yan, zeel ma zajc yaguieen ree dol guial ad zunaaltri ree ley, din ad ziantan. <sup>16</sup> Lëjt ragbee bal yu' chu rniabee dunuj ree, yazoob ree xtiidx bén rniabee dunuj ree. Yan bal dol guin rniabee lëjt yayalidi casti, per bal ruzoobidi xtiidx Dios dxel ma rayalidi perdon. <sup>17</sup> Per quixtëë Dios guial majsi guia'xchej gunabee dol lëjt, per yan con guidib luxdoodi ma zinalidi xtiidx Dios zi'c ma basiididi. <sup>18</sup> Abi' yan guial ad rniabeetri dol lëjt, ma nabandi din güündi zi'c rën Dios. <sup>19</sup> (Canenë'n lëjt con ganax diidx ni zajc chignia'di xhie rën guiëb ni canin, din ragbeen guial nawëëg naj chignia'di ni guin ree.) Zi'c gunabee dol lëjt guia'xchej persi beendi ni dxuudx ree në graloj ree ni mal, ziangajc yan guidiblagaa gol cwëëb nabee Dios lëjt din gac güündi ni zagdxe guiban tëëdi zi'c rënman.

<sup>20</sup> Chi gunabee dol lëjt ni'quid guyutidi xgab nibajndi zi'c rën Dios. <sup>21</sup> Per, ¿xhieza gan beendi por ni mal ni beendi nadxel, ni mal ni ratunëdi yan guial ma ragbeedi por laan zëëd xcasti Dios? <sup>22</sup> Per yan guial ad rniabeetri dol lëjt ma zinalidi xnejz Dios, abi' laan naj ni zagdxe din por zian ma zajc guibandi zi'c rën Dios gap tëëdi guialnaban tiblayaa con laaman. <sup>23</sup> Din ni rüjn bejn gan por dol laan naj casti, per ni razaladx Dios naj guialnaban tiblayaa par ree bén ma naj tijbzi con dux Dad ree Jesucrist.

## 7

### *Ni naj zi'c guialruxhliaa*

<sup>1</sup> Compniar raliduladx ree Jesucrist, lëjt ragbee xhienaag naj tijb ley. Ley guin naj ni rniabee bejn la'tgaj nabanman. <sup>2</sup> Laan naj zi'c chi ruxhliaa bejn, ad zajct guxhliaanëman

ben ren la'tgaj naban lacheelaman. Per bal guiët lacheelaman dxel ad yu't ley ni gudxoon guial guxhliaanëman ben ren. <sup>3</sup> Zeel bal naban lacheelaman abi' guchajgaman ben ren, dolan cayünman. Per bal ma güjt lacheelaman dxel achet ley gudxoon guial guxhliaanëman ben ren ad cayün tēëtaman dol.

<sup>4</sup> Ziangajcan lējt compniar raliduladx ree Jesucrist, por xguialgüjt Jesucrist ma güjtidi par xley Moisejs. Yan ma najdi xbejn Cristo bén baban zatijb, abi' zian ma zajc yaguieen ree zi'c rën Dios yaguieen ree. <sup>5</sup> Din chi babajn ree zi'ctzi bayën ree, mazri baguieen ree ni rudxoon ley guin yaguieen ree abi' bunaal ree ni mal ni rayal casti. <sup>6</sup> Per yan guial ma bayëjt ree par ley guin, yan guial ad rniabeetri ley guin dunuj ree guial ma bidxaa tēë mod ni nabajn ree, ma zajc yaguieen ree zi'c rën Dios por xSprijtaman bén nabajnnë' ree, ad guial nadxu'guijct ree ley guin.

### *Ley con dol*

<sup>7</sup> Ad canitan lojdi guial ni mal naj ley guin, din ad ziantan. Din bal id ley guin ad zagbeetan conin naj dol, ad zagbee tēëtan guial dol naj guialrzëëbladx, bal id rëb loj ley guin: "Ad sëëbladxil." <sup>8</sup> Per chi gogbeen guial ni mal naj guialrzëëbladx, mazri gojcxhiey da dolan por gra ni guzëëbladxan. Bal id yu' ley, ad zagbeet bejn xhienin naj dol. <sup>9</sup> Chi gadan günbee ley guin, par naj zagdxe naban. Per chi benbeen ley guin, gogbeen guial cayünan dol abi' por dol guin rayalan casti. <sup>10</sup> Bi't ley guin din gagbee bejn xhienaag guibanman, per par naj bi'tzan par gudëëdan naj casti. <sup>11</sup> Din basquiee dol guin naj guial zile' günan gra ni rniabee ley, per por ley guin gajc gogbeen guial castizi rayalan.

<sup>12</sup> Zeel ad ni malt naj ley guin din loj Dios zëëdan abi' gra ni zëëd loj ley guin loj Dios zëëdan, abi' zagdxe xnejz tēë naj ni rëb loj ley guin. <sup>13</sup> Ad ley guint rajp dol guial rayalan casti, dol guinan naj ni basquiee naj din günan ni rayal casti. Abi' por ley guin gogbeen guial ni dxuudx da't naj guial güün bejn dol.

<sup>14</sup> Dunuj ree rayagbee guial por Dios zëëd ley guin, per guial najn bénguidxliuj zeel zianczi rüjn dol guin naj gan. <sup>15</sup> Ad rignia'tan xhienin rajcan, din ad rüntan ni rënan, aal ni ad rëntan rünan. <sup>16</sup> Abi' chi rünan ni ad rëntan günan, zian ragbeen guial ni zagdxequi naj ley guin, din por ley guin ragbeen xhienin cayünan. <sup>17</sup> Zeel ad najtczi rün guial rünan ni ad rëntan, rünan laan guial najn béndol, abi' zianczi rüjn dol guin naj gan. <sup>18</sup> Din guial najn bénguidxliuj, ragbeen guial ni'czi ta'n ad najtan benza'c, majsi rënan günan ganax ni zagdxe, per ad rajctan. <sup>19</sup> Ad rüntan ganax ni zagdxe ni rënan günan, aal ganax ni mal rünan ni ad rëntan günan. <sup>20</sup> Yan bal rünan ni ad rëntan günan, ad najtczi rün par günan laan, rünan laan guial najn béndol abi' zianczi rüjn dol naj gan.

<sup>21</sup> Ragbeen guial majsi rënan günan ganax ni zagdxe, per laa za' gajc dol guin par güünan naj gan. <sup>22</sup> Dád ruladxan gra zi'c rniabee Dios günan, <sup>23</sup> per yu' ni rudxoon günan laan, abi' ni rudxoon guin naj dol, guial sta naban dol guin luxdon abi' zianczi rüjn naj gan.

<sup>24</sup> ¡Prob naj! ¿Chu zajc yabëë naj loj casti rayalan por dol ni rünan guial naj naj bénguidxliuj? <sup>25</sup> Per quixtëë Dios guial por dux Dad ree Jesucrist ma gulaan loj casti guin. Diidxliczi da xgaban naj guial günan ganax ni rniabee Dios, per guial najn bénguidxliuj zeel zianczi rüjn dol guin naj gan.

## 8

### *Guialnaban runee xSprijt Dios*

<sup>1</sup> Gra ree bén riladx Jesucrist ad rayaltri reeman xcasti Dios, bén ad nabantri ree zi'ctzi rën reeman, laa reeman ma rüjn reeman naguiejn naban reeman zi'c rniabee xSprijt Dios. <sup>2</sup> Din por xguialrniabee xSprijt Dios, bén runee guialnaban duloj ree guial ma nayajc ree tijbzi con Jesucrist, ad rniabeetri dol dunuj ree ad zayal tēëtri ree xcasti Dios. <sup>3</sup> Guial nayajc ree bénguidxliuj ad bile't nünj ley dunuj ree yudar, ley ni badëëd

Dios loj Moisejs. Per yan ma been Dios ni ad bile't nüjn ley guin. Laaman guxhaal Xi'n loj guidxliuj zi'cgajczi tijb bénguidxliuj persi güjtaman por dux tol ree chitëe nabeeri dol dunuj ree. <sup>4</sup> Laaman been zian, din yaguieen ree zi'c rënman zi'cgajc tijb bén cayüjn zi'c rniabee ley guial ad nabantri ree zi'ctzi rayën ree, ma nabajn ree zi'c rniabee xSprijt Dios.

<sup>5</sup> Bén naban ree zi'ctzi naj xixgab reeman, mazri yu'guijc reeman güün reeman zi'ctzi rën reeman. Per ree bén naban zi'c rniabee xSprijt Dios, mazri yu'guijc reeman güün reeman zi'c rniabee Sprijt guin. <sup>6</sup> Guial yu'guijc bejn güünman zi'ctzi naj xixgabaman zeel zëed casti. Per bén yu'guijc güün zi'c rniabee xSprijt Dios, zajpaman guialnaban con Dios yabe'cdxe tëe Dios luxdooan. <sup>7</sup> Bén yu'guijc ree guiban zi'ctzi naj xixgab reeman, rdxe'ch Dios laa reeman din ad rënt reeman guzoob reeman xtiidxaman ad rile' tëët güün reeman zi'c rënman. <sup>8</sup> Zeel bén naban ree zi'ctzi naj xixgab reeman, ad ruladxt Dios ni rüjn reeman.

<sup>9</sup> Per lëjt ad nabantridi zi'ctzi naj xixgabidi, ma nabandi zi'c rniabee xSprijt Dios, bal wali ma nabannëdi xSprijt Dios. Din bén ad nabannët xSprijt Dios, ad najtaman xbejn Cristo. <sup>10</sup> Per bal ma nabannëdi Cristo, rën guiëban guial ma güjtidi par dol, ma nabannëdi xSprijt Dios din ma nüjn Dios lëjt cwent sin dol. <sup>11</sup> Abi' bal ma nabannëdi xSprijt Dios, bén basban Jesucrist loj ree bengüt. Majsì guiëtidi per zasban Dios lëjt din tia'di zatijb guialnaban por xSprijt Dios bén nabannëdi.

<sup>12</sup> Zeel yan compniar raliduladx ree Jesucrist, ad rayaltri yabajn ree zi'ctzi naj dux xgab ree. <sup>13</sup> Din bal nabandi zi'ctzi naj xixgabidi, dxel yayalidi casti, per bal por xSprijt Dios bén nabannëdi ma basa'ndi dol tiblax dxel ma gapidi guialnaban tiblayaa con Dios.

<sup>14</sup> Gra ree bén rtiëjb rniabee xSprijt Dios laa reeman, laa reeman naj xi'n Dios. <sup>15</sup> Din ad nabannët reeman xSprijt Dios par guidxeb reeman, zi'c rdxeb tijb bejn xpatronman, por Sprijt guin ma naj reeman xi'n Dios. Abi' por Sprijt guin raguie'ch ree loj Dios: “¡Dad!” <sup>16</sup> Din xSprijt Dios rusni dunuj ree persi rayagbee ree guial ma nayajc ree xi'n Dios. <sup>17</sup> Abi' guial nayajc ree xi'n Dios dxel ma rayal ree ni guneeman zi'cgajc Jesucrist, bal wali yadaan ree guialzi zi'c laaman din yayal ree xanyabaa lod zojbaman.

<sup>18</sup> Ma benan xgab guial achet lasajc guialrzagdiaj ni caydüüd ree yan guial loj guialnaza'c ni yaca' ree xanyabaa. <sup>19</sup> Abi' xt gra ree ni badxe' Dios loj guidxliuj, ma rën nejzdoon reen guidxin dxej guiguien chu ree nin naj xi'n Dios. <sup>20</sup> Din guidxliuj ma guxinan, per ad laatan rajp dol, Dios basa'n gac zian. Yan cabësi guidxliuj guin <sup>21</sup> yariin loj ree ni dxuudx ni yu', din yayajc nix da't zi'c goc chi gurechaawan, zi'cgajc laa ree xi'n Dios loj ree nidxuudx yu' loj guidxliuj guie. <sup>22</sup> Per la'tgaj cabëz guidxliuj guin guidxin dxej guin, dunuj ree rayagbee guial dád naya cazagdiajn zi'c rzagdiaj tijb béngunaa chi ma gal xi'nman. <sup>23</sup> Abi' ad tijbtizi guidxliuj guin cazajc zian, nëgajc dunuj ree guial nabajnnë' ree xSprijt Dios zi'c tijb sen por ni guneee Dios duloj ree. Abi' cayzaagdiaj ree la'tgaj caylëjz ree guidxin dxej ni guiguien guial nayajc ree xi'n Dios, dxej ni guidxaa dux cuerp ree chi yaya'p ree cuerp cüb. <sup>24</sup> Dunuj ree rayagbee guial gac zian, laan naj ni ralëjz ree guialraliduladx ree ma nayajc ree perdon. Lëjt ragbee bal ni ralëjz ree ma gojcan, ad zalëeztri reen din ad zajctri cwëz bejn ni ma gojc. <sup>25</sup> Per bal gad ni caylëjz ree gac, ad rayalt yadxag ree yalëez ree gacan.

<sup>26</sup> Abi' xSprijt Dios ragnë dunuj ree chi ad rayagbeet ree xhie yaguieen ree, din yu' dxej loj hor guin ad rile't yarejdx yanaab ree Dios zi'c rayal. Abi' chi ad rayagbeet ree xhienaag yaguie'ch ree loj Dios, xSprijt Dios mal ragbee dux quiarguejn ree, dxel laaman rbejdx rniab Dios por dunuj ree. <sup>27</sup> Abi' Dios, bén nünbee luxdoo gra ree bejn ragbeeman xhienin canab Sprijt guin lojman por dunuj ree. Din chi rniab Sprijt guin por ree xbejn Dios, laaman rniab por ree bejn zi'c rën Dios.

*Achet zajc güün dunuj ree gan*

<sup>28</sup> Dunuj ree rayagbee guial gra ni cayza'c ree loj guidxliuj guie naj ni güün sirv par dunuj ree guial rayèn ree Dios, dunuj ree guial bazooob ree xtiidxaman par yaguieen ree zi'c rënman. <sup>29</sup> Abi' diizd guia'xchej ma ragbee Dios chu ree nin chililadx laaman abi' gulejman laa reeman din guiban reeman zi'c Xi'nman Jesucrist, din Jesucrist naj bén nabee loj gra ree bén naj Xi'n Dios. <sup>30</sup> Gra ree bén ragbee Dios guial chililadx reeman laaman, rbejdxaman laa reeman din gac reeman xbejnman, rüjnman laa reeman cwent sin dol abi' rudëëman xanyabaa loj reeman lod zojbaman.

<sup>31</sup> Yan, guial ma rayagbee ree gra ree ni guie, achet güünan chutëëz güün xcontr dunuj ree, dunuj ree rayagbee guial Dios gagnë dunuj ree. <sup>32</sup> Ad gurexuut Dios nudëë Xi'nman din guiëtaman por dunuj ree. Yan nacli Xi'nman baneeman persi güjtaman por dunuj ree, ¿diidxgui ree ni ren ree nid zuneeman duloj ree ya? <sup>33</sup> ¿Chu zajc cwe'c dux guialquia ree nayajc ree bén ma gulej Dios? Din Dios ma nüjn dunuj ree cwent sin dol. <sup>34</sup> Achut zajc na guial rayal ree casti, din Jesucrist güjt persi gudijxaman por dunuj ree. Abi' ad ziantzi, babanman abi' yan za'man xladbee Dios lod rnieeman por dunuj ree. <sup>35</sup> Zi'c rën Cristo dunuj ree, achut zajc yala' dunuj ree con laaman. Ni'qui por guialyu'naya, o por guialzi, o por ni rüjn bejn dunuj ree, o por guialrliaan, o por guialryaadx du xab ree, o por tijb ni nadxeb, o guial yayëjt ree, achet zajc yala' dunuj ree con laaman. <sup>36</sup> Zi'c rëb loj xtiidx Dios:

Guial nayajcan xbejnl, zianczi nadxu'n loj guialgüjt.

Rüjnnë reeman dunujn zi'c ree xiil ma naj guiët.

<sup>37</sup> Per ni'qui tijb ni guin ad züjnt dunuj ree gan guial ragnë Cristo dunuj ree, bén rën dunuj ree. <sup>38</sup> Ragbeechaawan guial ni'qui guialgüjt, ni'qui guialnaban, ni'qui ree anjl, o xindxab ree, o gra ree ni rajp guialrniabee, o ni cayajc, o ni zëed gac, <sup>39</sup> o ni zëed xanyabaa, o lën liuj, ni'qui tijb ni been Dios, achetczi achut tëet zajc chiquied guialrën Dios dunuj ree por dux Dad ree Jesucrist.

## 9

### *Dios gulej bén Israel ree*

<sup>1</sup> Lëjt ragbee guial naj naj xbejn Cristo, canin lëjt diidxli ad canitan lëjt ni rusquiee. Abi' naj ragbee guial xSprijt Dios ragbee guial diidxli naj ni canin lëjt, <sup>2</sup> guial guixie guixie dád yu'naya luxdoon, xt ni'quid radxejlt xhie günan. <sup>3</sup> Balzianclaa majsi ad zayaltan perdon, majsi güün Cristo naj tiblax, per bal zian chile' günan yudar bén ladx reen chitëë yayal reeman casti. <sup>4</sup> Laa reeman naj bén Israel, abi' laa reeman naj bén gule Dios din gac reeman xbejnman. Abi' guzujman con laa reeman zi'c form tijb zaj, baya'nnëman laa reeman diidx conin güünman con tëënin güün reeman, badëë tëë xleyaman loj reeman. Rëbaman loj reeman xhienaag guiën reeman laaman, been tëëman promejs loj reeman. <sup>5</sup> Zëed reeman loj xdiaa ree been ree sirv loj Dios gulal, loj gajc ree bén zëed Cristo chi bi'taman loj guidxliuj, laaman naj bén nagle' zianczi rajp tëëman guialrniabee loj gra ni yu'. Amén.

<sup>6</sup> Ad canitan guial ad züjntri Dios xpromejsaman cumplid, ni canin naj guial ad grat ree bén Israel naj xbejn Dios. <sup>7</sup> Ad guial zëedt reeman loj xdiaa Abraham din gac reeman xdiaaman, din rëb Dios loj Abraham: “Diizd xi'n Isaac suloj xdiaal.” <sup>8</sup> Laan rulüü dunuj ree guial ad por guial najt bejn bén Israel, ma najman xbejn Dios, xbejn Dios naj ree bén naj cwent loj xdiaa Abraham guial rliladx reeman xtiidx Dios zi'c Abraham. <sup>9</sup> Din Abraham bililadxaman Dios chi rëb Dios lojman: “Zatib ijz tiamp guie gajc guialan abi' dxej zii ree ma ca' Sar tijb xindobëz.”

<sup>10</sup> Abi' ad laatzan. Grop ree xi'n Rebeca gojc xdad reex Isaac, bén goc dux béngulal ree, <sup>11-13</sup> per chi gad reex gal, chi ad wayüjn tëet reex ni zagdxe ni'qui ni mal, rëb Dios loj Rebeca: “Xin yaløj guin laax güün sirv loj xinguiag guin.” Zi'c rëb loj xtiidx Dios lod rëb:



“Guy nan Jacob, per bidxe'chan Esa .” Zian rguien guial ma ragbee Dios chu rbeman ad por ni r jnt bejn, laaman ma ragbee chu rucaabeeman.

<sup>14</sup> Yan,  por zian yaguie'ch ree ya, ad r jnt xguialguxtis Dios zi'c rayal?  Per ad ziantan!

<sup>15</sup> Din Dios r b loj Moisejs: “Yayan b n r nan yayan abi' b n rayal ree casti, bal r nan ad zud edt n laa reeman casti.” <sup>16</sup> Zeel ad zile't yaya Dios bejn por xixgabzaman o por ni r jnman, laaman mal ragbee chu r nman yayaman. <sup>17</sup> Loj xtiidx Dios r b guial r baman loj rey Egipto: “Naj ben l j rey din guiguien da guialrniabeen din g nbee gra b nguidxliuj naj.” <sup>18</sup> Zeel rnin lojdi guial ma ragbee Dios chu yayaman chu t e g nman luxdoo gojl.

<sup>19</sup> Per wed por zian nadi: “Bal zianan,  chexquiza zeel rdxe'ch Dios guial nayajc ree zi'c nayajc ree awa ad zajct yadxon ree zi'c naj xixgabaman?” <sup>20</sup> Per,  chu naj b nguidxliuj din guinieeman Dios zian? Wen zajc gui b tijb guiajs loj b n been laan ya: “ Chexc zeel beenl naj zian?” <sup>21</sup>  Nid b n r jn guiajs guin r jnn  bajn guin zi'ctzi r nman ya? Laaman ruguiaa xhie g nn man bajn guin, bal g nman guiajs g n dxiin guixie guixie o g nman guiajs g n dxiin dxej zojblojzi ree.

<sup>22</sup> Yan, ziangajc Dios ma ragbeeman chu rayal casti, abi' xt zajc laa nud ed gajcaman casti din guiguien xguialrniabeeman. Per gudaanman gojp t eman pacens b n ad ruzoobt ree diidx, b n rayal ree nit. <sup>23</sup> Gudaanman laa reeman din guiguien guial laaman guinia xhienaag g nman, guial laaman naj b n ca' guialrniabee abi' bayaman b n ragbeeman diizd guia'xchej guial yayal reeman xanyabaa. <sup>24</sup> Abi' laa reeman naj dunuj ree b n ma gurejdx Dios, loj ree b n Israel n  loj ree b n ad najt b n Israel. <sup>25</sup> Zi'c ca loj libr ni bacaa Oseas b n bad e xtiidx Dios loj ree bejn, lod r b:

B n ad najt ree da bejnan,  
gui n loj reeman guial naj reeman da bejnan,  
abi' ree b n ad yu't b n r n laa reeman,  
naj gui n laa reeman.

<sup>26</sup> Abi' lod r b Dios loj ree bejn: “Ad da bejntan l jt”.

Yagaj gac reeman xbejnman, laaman guial najman b n naban.

<sup>27</sup> Gui ad Isa as b n bad e xtiidx Dios loj ree bejn, r baman por ree b n Israel: “Majsi zien da't naj ree b n Israel zi'c  x riga' ro' nijsdoo, per ta'nz naj ree b n laa loj casti, <sup>28</sup> din Dios nayob g n cumplid xtiidxaman loj guidxliuj guie zi'c ma r baman.” <sup>29</sup> Abi' diizd gocli r b Isa as loj ree bejn:

Bal niti jb dux Dad ree Dios  
b n rajp gra guialrniabee  
ninijt gra ree dux b ngulal ree,  
diizd gocli mal gunijt dux diaa ree  
zi'c gunit ree b n Sodoma n  ree b n Gomorra.

### *B n ad najt ree b n Israel ma naj reeman perdon loj Dios*

<sup>30</sup> Yan,  xhie yaguie'ch ree? B n ad najt ree b n Israel ni'quid guyut reeman xgab xhienaag gac reeman perdon loj Dios, per yan ma naj reeman perdon guial rliladx reeman Jesucrist. <sup>31</sup> Abi' ree b n Israel majsi d d been reeman naguiejn guiban reeman zi'c rniabee ley din gac reeman perdon loj Dios, per ad gojctan. <sup>32</sup>  Chexc zeel ad bile't niajc reeman perdon zian? Guial mazri been reeman naguiejn nibajn reeman zi'c rniabee ley luar nililadx reeman Dios zi'c rayal chililadx reeman din gac reeman perdon. Zian gojc Cristo par laa reeman zi'c tijb “guiaj ni rliadx guia' bejn” <sup>33</sup> zi'c ca loj xtiidx Dios lod r b:

Ma gulen tijb bejn luguiedx Si n, b n gac zi'c tijb guiaj  
ni ladx guia' ree bejn abi' gusajban laa reeman.  
Abi' b n chililadx laaman ad yu't dxej yaya'nxtuman.

## 10

<sup>1</sup> Compniar raliduladx ree Jesucrist, ni rēnan rniaab tēen loj Dios naj guial gac ree bén Israel perdon. <sup>2</sup> Din naj ragbee guial dád cayüjn reeman naguiejn cayüjn reeman sirv loj Dios, per diidxli ad rignia't reeman zagdxe xhienaag rēn Dios güün reeman. <sup>3</sup> Din ad rtiējbt reeman chililadx reeman xhienaag rayal güün reeman din gac reeman perdon loj Dios, al zinal reeman zi'c naladx reeman gac reeman perdon, luar güün reeman zi'c rēn Dios din gac reeman perdon. <sup>4</sup> Din por Jesucrist bayaaloj zi'c rniabee ley güün bejn, yan bén rliladx ree laaman, ma naya reeman loj Dios.

<sup>5</sup> Bén rēn gac naya loj Dios guial zinalaman ley, rēb Moisejs guial bén güün zi'c tal rēb ley, zajpaman guialnaban la'tgaj cayüjnman zi'c rniabee ley guin. <sup>6</sup> Per guial rajc bejn naya loj Dios por guial rliladxaman Jesucrist, naj guial ad züjntaman xgab: “¿Chuczi zajc chē'p xanyabaa?” (Din rēn guiēban guial ad rliladxtaman, abi' rēnman guguaaman guiat Cristo loj guidxliuj.) <sup>7</sup> Ad guiēb tēēman: “¿Chu zajc che lod za' ree bengüt?” (Din rēn guiēban guial ad rliladxtaman, abi' rēnman guguaaman yaban Cristo loj ree bengüt.) <sup>8</sup> Per loj xtiidx Dios rēb: “Gajxh za' xtiidx Dios con lüj, ryaadxzi güünl xgab guiēb tēēl bal chililadxil laan.” Din guialrliladx ni ratie'ch ree naj ze. <sup>9</sup> Bal yaneero'l guial Jesús naj Dad par lüj abi' guidib luxdool chililadxil guial basban Dios laaman loj ree bengüt, dxel ma najl perdon. <sup>10</sup> Din chi chililadx bejn Jesucrist con guidib luxdooman, diizd loj hor zii ma najman cwent sin dol. Abi' chi yaneero'man guial Jesucrist naj Dad par laaman, dxel ma najman perdon.

<sup>11</sup> Abi' loj xtiidx Dios rēb: “Gra ree bén chililadx laaman ad yu't dxej yaya'nxtu reeman.” <sup>12</sup> Laan rēn guiēb guial loj Dios tiblojzi naj bejn, achet güünan chutēēz najman, bal najman bén Israel o ad najtaman bén Israel. Din tijbzi Dios naj Dad par dugra ree, abi' dád benza'can con gra ree bén rbejdx rniab laaman. <sup>13</sup> Din loj xtiidx Dios rēb: “Gra bén yanab perdon loj Dios, gacaman perdon.” <sup>14</sup> Per, ¿xhieza naag cwedx guiniab reeman laaman awa ad waliladxt reeman laaman? ¿Abi' xhieza naag chililadx reeman laaman awa ad wacaagdiajgt reeman xcwentaman? ¿Xhienaag guiguiejn reeman xcwentaman awa achut bén guiniee xtiidxaman loj reeman? <sup>15</sup> ¿Xhienaag chu' bén guitie'ch xtiidxaman awa achut guixhiaal laa reeman? Loj xtiidx Dios rēb: “¡Ni za'cdxoon naj chi rdxin bén zinē ruson zagdxe!”

<sup>16</sup> Per ad grat bejn ridxga' xtiidxza'c Dios. Zi'c rēb Isaías: “Dad, ¿chu ma rliladx ni ranen por lüj?” <sup>17</sup> Zeel guialrliladx zēēd por ni rigueiejn bejn, abi' ni rigueiejn bejn naj xtiidxza'c Jesucrist.

<sup>18</sup> ¿Wen nid waguiejn ree bejn laan ya? ¡Per naj rni guial ma bacaagdiajg reeman laan! Din loj xtiidx Dios rēb:

Guidib guidxliuj ma bire'ch xtiidx Dios  
abi' xt luar bigra lod naguie'ch ma biguiejn reeman xtiidxaman.

<sup>19</sup> Yan rünan xgab: ¿Wen id rignia' ree bén Israel xtiidx Dios ya? Per diizd guia'xchej bacaa Moisejs ni rēb Dios por laa reeman chi rēbaman:

Naj güün din tēdlojdi por ni güünan  
con ree bén ad najt bén Israel.

Nē por ni güünan con laa reeman,  
majsi ad ragbeet reeman, abi' zadxe'chidi.

<sup>20</sup> Abi' sin guialrdxeb bacaa Isaías ni rēb Dios por ree bén Israel, chi rēbaman:

Bén naj ree bén Israel, majsi ad baguiilt reeman naj,  
per badxejl reeman naj.

Abi' ma balūlon loj reeman,

majsi ad gunabdiidxt reeman por naj.

<sup>21</sup> Bacaa tēē Isaías ni rēb Dios por ree bén Israel, chi rēbaman: “Dēchej za'n rbedxan bejn ree abi' ad rēnt reeman guzoob reeman diidx al rusagloj reeman naj.”

# 11

## *Xixgab Dios*

<sup>1</sup> Ad canitan lojdi guial ma gulëladx Dios bén Israel ree, din ad ziantan. Lëjt ragbee guial bén Israel naj abi' loj xdiaa Abraham zialan, guial zialan loj xdiaa Benjamín. <sup>2</sup> Diizd guia'xchej, gulej Dios bén Israel ree din gac reeman xbejnman, zeel ad rbëeladxtaman laa reeman. ¿Nid rusaaladxidi tiblajt loj xtiidx Dios ya lod zëed chi gule'c Elías bén badëë xtiidx Dios loj ree bejn xguialquia ree bén Israel loj Dios? Chi rëbaman: <sup>3</sup> “Dad, ma bagüjt reeman gra ree bén badëë xtiidxil loj ree bejn ma bachijl tëë reeman xialtar reel, najzi baya'n abi' nëgajc naj rën reeman gugüjt reeman.” <sup>4</sup> Per badxi' Dios xtiidxaman rëbaman: “Ma gulëcan gajdx mil bejn par naj, bén ad wazuxibtctzi ree loj dios la Baal.” <sup>5</sup> Yan ziangajc yu' ta'n bén Israel, por guial rayaman laa reeman gulejman laa reeman par laaman. <sup>6</sup> Abi' bal guial rayaman laa reeman gulejman laa reeman, ad por ni cayüjnt reeman, din bal nibejman laa reeman por ni cayüjn reeman dxel ad por guial rayatraman laa reeman.

<sup>7</sup> Zian gojc, bén Israel bén gule Dios, badxejl reeman laaman guial rliladx reeman laaman. Per ree bén Israel ren gad reeman yadxejl laaman, din raguiil reeman laaman zi'c naladx reeman, ad raguiilt reeman laaman zi'c rënman zeel beenman luxdoo reeman gojl, <sup>8</sup> zi'c rëb loj xtiidx Dios lod rëb: “Basiaaw Dios xquiarguejn reeman, abi' naj reeman zian xt yandxej, majsi ruguiaa reeman per rulüü ad ruguiaat reeman, abi' majsi riguejn reeman per rulüü ad riguejnt reeman.” <sup>9</sup> Rëb tëë Davi:

Xguialraw zagdxe reeman con gra xguialnaza'c reeman

laan gusquiee laa reeman guial zëqui reeman zagdxe.

Laan gusquiee laa reeman din téd reeman casti ni rayal reeman.

<sup>10</sup> Yaya'n reeman zi'c tijb bén ad ruguiaat, abi' sac reeman zi'c tijb bén ca bëw xijch.

## *Gac ree bén ad najt bén Israel perdon*

<sup>11</sup> Ad canitan lojdi por guial ad rtiëjbt ree bén Israel güün reeman zi'c rën Dios zeel ma gunijt reeman loj Dios, din ad ziantan. Guzajc reeman zian din chu' mod gac ree bén ad najt ree bén Israel perdon, din chile' sëëbladx ree bén Israel gap reeman perdon guin.

<sup>12</sup> Yan bal guial ad bazoobt ree bén Israel diidx, beenan sirv par din yayal los demazri ree bénguidxliuj xguialnaza'c Dios, bén ad najt ree bén Israel. Yan, ¿rjñdi xgab ya xhienaag güünle' Dios bejn ree chi tiëb ree bén Israel güün reeman zi'c rën Dios?

<sup>13</sup> Yu' ni rënan ganin lëjt bén ad najt ree bén Israel, lëjt ragbee guial Dios guxhaal naj din gün xtiidxaman lojdi abi' dád cayünan naguiejn günan zi'c rayal. <sup>14</sup> Rënan guial ree bén ladx reen bén Israel ree sëëbladx zi'c rjñdi din güün reeman zian din chile' gac reeman perdon. <sup>15</sup> Walican guial chi ad bazoobt ree bén Israel xtiidx Dios, guyu mod gojc los demazri ree bejn perdon. ¡Per xi nix chi chililadx reeman xtiidx Dios! Laan naj zi'c chi yaban tijb bengüt zatijb. <sup>16</sup> Abi' zi'c chi beenle' Dios bén Israel ree gulal laan naj tijb sen guial güünle'man los demazri ree bén Israel, ziangajc bal güünle' Dios xliuj tijb yag guidib yag guin ma nagle'.

<sup>17</sup> Bén Israel ree naj reeman zi'c tijb yag olivo, per yu' reeman naj zi'c xidx yag olivo guin ni ma gurug. Abi' lüj guial ad najtil bén Israel najl zi'c tijb xidx yag olivo ni yu' dajn ni rguiid lod biru' xidx yag olivo guin, zeel rajpil guialnaban por xliuj yag guin. <sup>18</sup> Zeel ad naladxil guial mazri zagdxe najl guial loj yag oliv ni rnin naj ree bén Israel. Per bal rjñl xgab zian, basaaladx guial ad lüjt cudëë guialnaban loj xliuj yag guin, xliuj yag guin cunee guialnaban lojl.

<sup>19</sup> Wed zanal: “Walican, per gurug xidx yag olivo guin persi guyu'n xluaran din gacan tijbzi con yag olivo guin.” <sup>20</sup> Waliquil, per xidx yag olivo ni canin naj ree bén Israel, gurug reen guial ad bililadxt reen abi' lüj guyul xluar reen guial rliladxil. Zeel ad rjñl nabë,

zagdxeli gojp cudad. <sup>21</sup> Din bal bén Israel ni canin naj ree xidx yag guin, ad bayat Dios laa reeman, ziangajc zajc saquil. <sup>22</sup> Gogbee guial benza'c naj Dios, per ziangajc diidxli rüjn xguialguxtisaman. Ma been xguialguxtisaman con ree bén ad bazoobt xtiidxaman, abi' ma beenman ni zagdx con lüj. Per rayal guibanl zi'c rënman, bal id züjnl zian züjn xguialguxtisaman con lüj. <sup>23</sup> Abi' bal yayejc ree bén Israel con Dios, abi' chililadx reeman perdon ni zëed por laaman, züjnman laa reeman cwent con los demazri ree bén Israel rililadx. Din laaman rajp guialrniabee par yayüjnman laa reeman tijbzi con los demazri ree bén Israel. <sup>24</sup> Din lüj guial ad najtil bén Israel, lüj guial canin najl zi'c tijb yag olivo ni yu' dajn, zile' niajqul tijbzi con yag olivo zagdx ni rnin naj ree bén Israel, ¡diixgui ree bén Israel ni ad ruzoobt ree xtiidx Dios, nid zayajc reeman tijbzi ya con los demazri ree bén Israel bal guzoob reeman xtiidx Dios!

### *Gac ree bén Israel perdon*

<sup>25</sup> Compniar raliduladx ree Jesucrist, yu' ni ad ragbeetidi abi' rënan gagbeedan, chitëë güündi nabë. Bén Israel rüjn ree nad par guzoob reeman xtiidx Dios, cayajc zian xt chi ma bayaaloy bililadx ree bén ad najt ree bén Israel, bén ma naj ree par chililadx xtiidx Dios. <sup>26</sup> Chi ma gojc zian, dxel graczi ree bén Israel ma güüncwent xtiidx Dios. Zian gac reeman perdon, zi'c rëb loj xtiidx Dios lod rëb:

Luguedx Sión za bén gagnë ree bén zëed loj xdiaa Jacob.

Din yariica reeman loj nejz mal zinal reeman.

<sup>27</sup> Dxel gac cumplid da diidxan,

Zi'c ma rën loj reeman guial günan perdon xtol reeman.

<sup>28</sup> Per yan guial dád nad ree bén Israel par chililadx reeman xtiidxza'c Jesucrist, zian yu' mod persi rililadxidi guial ad najtidi bén Israel. Abi' majsi zian, rën gajc Dios laa reeman zi'c beenman promejs loj ree xbéngulal reeman. <sup>29</sup> Din Dios ad ruchaat xixgabaman, ni ma bazaladxaman loj bejn, ad rquiedtaman laan, ad rbëeladx tëetaman bén ma gulejman par laaman. <sup>30</sup> Gocli ad binaltidi xnejz Dios, per yan por ree bén Israel ad ruzoobt xtiidx Dios, ma balüüman lëjt guial rayaman lëjt. <sup>31</sup> Abi' bal yan ad ruzoobt ree bén Israel xtiidx Dios, cayajc zian din yayaman lëjt, per chi guidxin dxej ziangajc yayaman laa reeman. <sup>32</sup> Cwëjb Dios guial zi'c ree bén Israel në ree bén ad najt bén Israel ad zuzoobt reeman xtiidxaman, din gac yayaman gra reeman tiblojzi.

<sup>33</sup> ¡Dád zro' naj xguialrignia' Dios, në xguialrajcaman con xguialnaza'caman! Achut zajc gagbeechaaw xhienaag naj xixgab Dios o ni cayüjnman. <sup>34</sup> Zi'c ca loj xtiidxaman lod rëb: “¿Chu zajc gagbeechaaw xhienaag naj xixgab dux Dad ree Dios? ¿Chu mazri rajc din guiëb lojman xhienaag güünman? <sup>35</sup> ¿O chu ma badëë xhienin lojman din cwëzaman quixaman laaman?” <sup>36</sup> Xieenman naj gra ni yu', laaman been laa reen abi' par laaman naj gran. Zeel rayal gap bejn laaman respejt zianczi. Amén.

## 12

### *Guialnaban cüb*

<sup>1</sup> Zeel compniar raliduladx ree Jesucrist, rniaaban lojdi, zi'c ma baya Dios dunuj ree, gol basa'n lëjt loj Dios zi'c tijb gon ni ma nagle' ni yayuladx tëëman, din guibandi zi'c rënman, abi' zian guiëndi laaman. <sup>2</sup> Ad guibanridi zi'c naban los demazri ree bén yu' ree yan, zagdxeli gol bachaa xixgabidi din gac guidxaa zi'c nabandi abi' zian gagbeedi xhienaag rën Dios guibandi. Zian gagbeedi conin naj zagdx, conin ruladxaman, con tëënin naj xnejz.

<sup>3</sup> Guial naj Dios benza'c baneeman dxiin guie lon din guialan ganen xtiidxaman lojdi. Zeel rnin lojdi ni'qui tijbidi ad rayalt güün nabë guial mazri lasajquidi loj ree bejn. Zagdxeli gol been xgab por lëjt zi'c rayal, segun naj quiarguejn ni banee Dios loj tijbgajdi. <sup>4</sup> Din zi'c xcuerp bejn zien la' najn, per ad tijbtzi ni rüjnman. <sup>5</sup> Ziangajc dunuj

ree guial raliduladx ree Jesucrist, majsi zien nayajc ree, per por guialraliduladx ree zeel nayajc ree tijbzi con Cristo, per tijbgaj dunuj ree con ni rayal yaguieen ree din yaguieen yudar du lasa' ree.

<sup>6</sup> Din tijbgaj dunuj ree garent garen naj quiargueijn ni baca' ree, zi'c naj ni guyën Dios baneeman dunuj ree. Zeel bal ma baneeman quiargueijn du loj ree par yanee ree xtiidxaman, rayal yanee ree laan loj ree bejn, rayal yanee ree laan por guialraliduladx ree. <sup>7</sup> O bal baneeman quiargueijn par yaguieen ree sirv ben ren ree, rayal yaguieen reen zi'c rayal. Bén cwa' quiargueijn par gulüüman bejn ree xtiidx Dios, rayal gulüüman bejn ree. <sup>8</sup> O bén cwa' quiargueijn par gudëëman consejw loj ree bejn, rayal gudëëman consejw. Guiáad bén cwa' quiargueijn par yazaladxaman xhienin loj ree bejn, rayal yazaladxaman con guidib luxdoodan. Abi' bén cwa' quiargueijn par nabeeman, rayal gapaman cudad nabeeman zi'c rayal, o bén cwa' quiargueijn par güünman yudar bén cazagdiaj ree, rayal chu' luxdoodan zagdxe güünman laa reeman yudar.

### *Ni rayal güün ree bén rliladx Jesús*

<sup>9</sup> Gol guyën lasa'di con guidib luxdoodi, gol basa'n ree ni mal tiblax, gol binal ni zagdxe. <sup>10</sup> Gol guyën gra ree bejn zi'c tijb bijchidi, ad rüjn lëjt gajc benro', gol gojp respekt lasa'di.

<sup>11</sup> Ad gaquidi bén ploj par güündi ni rayal güündi, con guidib luxdoodi gol been sirv loj Dios.

<sup>12</sup> Gol badxe' luxdoodi zagdxe por ni cabëzidi tia'di, gol gudaan tée loj ni rzagdiajdi, ad gucwëëz cwedx guiniabidi Dios.

<sup>13</sup> Chi xhie ryaadx xcompniaridi, bén rliladx ree Jesucrist, gol been reeman yudar. Gol gojc benza'c con ree bén ri't lidixidi.

<sup>14</sup> Gol gurejdx Dios por ree bén rzunal lëjt par güün reeman lëjt ni mal, ad guzaalidi diidxmal guijc reeman, gol gurejdx Dios guial gagnëman laa reeman.

<sup>15</sup> Gol badxe' luxdoodi nix con ree bén yu' luxdoo nix, per con ree bén yu' luxdoo naya, gol been naguiejn din gagbee reeman guial za'quidi con laa reeman.

<sup>16</sup> Gol gubajn zagdxe con ree lasa'di, ad güündi nabë, gol gojc bén naxanlax. Ad nalaxidi mazri rajquidi guial loj ree ben ren.

<sup>17</sup> Ad güündi ni mal bén rüjn lëjt ni mal, gol been naguiejn güündi ni zagdxe loj gra ree bejn. <sup>18</sup> Gol been naguiejn da't din cwenëdi bejn ree zagdxe. <sup>19</sup> Compniar raliduladx ree Jesucrist, ad rgu' guialxyajn luxdoodi con ree bén rüjn lëjt xhienin, gol basa'n loj Dios, laaman güün xguialguxtis, zi'c rëb loj xtiidxaman, lod rëb: "Naj naj bén rayal güün xguialguxtis, gudë tëen ni rayal bejn. Zian rëb dux Dad ree Dios." <sup>20</sup> Rëb tëëman: "Bal rliaan bén rdxe'ch lüj, badëed ni gawaman, o bal re'caman nijs, badëed ni guië'man, zian guguaal yatuman." <sup>21</sup> Ad bal tiëbil güün ni mal lüj gan, been ni zagdxe din güünl ni mal guin gan.

## 13

### *Royal yaya'p ree guxtis respekt*

<sup>1</sup> Gra bejn rayal gucaagdiajg xtiidx gobiarn në xtiidx gra ree guxtis. Din por Dios yu' ree gobiarn në gra ree guxtis, por laaman zëed guialrniabee ni rajp reeman. <sup>2</sup> Zeel bén ad ruzoobt xtiidx ree bén rniabee guin, rën guiëban guial ad rënt reeman güün reeman zi'c rniabee Dios. Abi' ree bén rüjn zian laagajc reeman rguuil xcasti, <sup>3</sup> din bén rajp ree guialrniabee ad za't reeman par guchejb reeman bén rüjn ree ni zagdxe, za' reeman par guchejb reeman bén rüjn ree ni mal. Yan bal rën'l guibanl guial ad zadxebtil bén ca' ree guialrniabee, gubajn zagdxe din yaya'nl zagdxe loj reeman. <sup>4</sup> Din laa reeman cayüjn reeman sirv loj Dios din yalaj reeman lüj. Per bal cayüjnl ni mal, zadxebil bén ca' ree guialrniabee, din ad ca' xlia'tzi reeman guialrniabee guin, laa reeman cayüjn sirv loj Dios din gudëed reeman casti bén rüjn ree ni mal. <sup>5</sup> Zeel rayal guzoobidi xtiidx ree bén

ca' ree guialrniabee, ad güündi zian naabzi par ad zayaltidi casti, gol been zian guial ragbeedi zian rayal güündi. <sup>6</sup> Gol gudijx tää impuest, din gusnuu nabee ree bén ca' ree guialrniabee, din laan naj mandad bayal reeman par güün reeman sirv loj Dios.

<sup>7</sup> Zeel gol badëed ni rayal gudëedidi, bal rayal cwe'quidi milia, gol gule'can o bal rayal quixidi impuest, gol gudijxan. Gol bazoob xtiidx bén rayal guzoobidi xtiidx, gol gojp respejt bén rayal respejt. <sup>8</sup> Gol been naguiejn gol baguijx ni ralidi loj ree bejn, abi' ad rayalt gucwëez guiëndi bejn ree. Din bén rën bejn ree, ma cayünman cumplid gra ni rniabee xley Dios. <sup>9</sup> Xmandamient Dios rëban: “Ad sunël bén ren bén ad najt lacheelil, ad gugüjtil bejn, ad cwanl, ad sëëbladxil ni rajp ben ren”, per mandamient guie ree, con ree xmandamient ren Dios rajc cumplid con tijb mandamient rëb: “Guyën ben ren ree zi'c rën lüj gajc.” <sup>10</sup> Din bén rën bejn ree ad zajct güünman laa reeman ni mal guial rënman laa reeman. Zeel con guial rën lasa' bejn rayaaloj rünman gra ni rëb loj xley Dios.

<sup>11</sup> Gol gogbee xhie tiamp nadxu' ree yan, gol gogbee guial ma gojl yatie'ch dux bacaal ree. Din yan ma zidyob dxej gui't Jesucrist guial loj chi guzuloj qui baliduladxri ree xtiidxza'caman. <sup>12</sup> Mazri caydop tiamp guin, abi' mazri cabig dxej gui'taman, zeel rayal yasa'n ree ni rinë dunuj ree loj nejz mal, abi' yaguieen ree naguiejn yaguieen ree ganax ni zagdxe din yunaal ree nejz zagdxe. <sup>13</sup> Rayal yabajn ree zagdxe zi'c rayal, ad yaguieen ree ni natu. Ad yazüdx ree, o ad rayalt yaguieen ree lanij naabzi par chu' mod yaguieen ree ni dxuudx. Ad rayalt sunë bejn ben ren bén ad najt lacheelaman, o guial gapaman graloj vijs, o guialrdil o guialrdëdloj. <sup>14</sup> Gol basa'n lëjt gajc loj dux Dad ree Jesucrist, ad rayalt guibandi zi'ctzi rëndi.

## 14

### *Ad gusa'nxtudi bén qui rliladxri xtiidx Dios*

<sup>1</sup> Zagdxe gol guneenë bén qui rliladxri Jesucrist ad gusa'nxtudi laaman guial mazri rajquidi guial lojman. <sup>2</sup> Din yu' ree bén rliladx Jesucrist naladx reeman zajc gaw reeman xhietëez nin, per yu' ree bén qui rliladxri naladx reeman guial zagdxeli naj ad zajwt reeman bëel. <sup>3</sup> Bén rün xgab guial zajc gawaman xhietëez nin, ad rayalt güünman tiblad bén naladx yu' ni ad zajct gaw bejn. Guiáad bén rün xgab guial yu' ni ad zajct gaw bejn, ad rayalt guze'man bén naladx zajc gaw bejn xhietëez nin. Din niz loj Dios tiblojzi ma naj reeman xbejnman. <sup>4</sup> Zeel, ¿chu naj bejn din guze' xcompniaraman bén rliladx Jesucrist por niguinzi ree? Diosqui ragbee bal cayünman ni zagdxe o cayünman ni mal. Abi' bal ad wayignia'taman xhienaag güünman, dxel dux Dad ree Jesucrist rajp guialrniabee par gagnëman laaman güünman zi'c rayal.

<sup>5</sup> Ziangajc yu' ree dux compniar ree bén raliduladxnë' ree Jesucrist naladx reeman guial yu' dxej zojbloj, yu'za ree bén naladx guial tiblojzi naj gra dxej, per achet güünan, tijbgaj bejn con ni naladxaman naj zagdxe par laaman. <sup>6</sup> Din bén rün xgab guial yu' dxej zojbloj, rünman zian persi rënman Dios. Guiáad bén naladx guial tiblojzi naj gra dxej, rünman zian persi rënman Dios. Abi' bén raw graloj, rawaman guial yu'guijcaman guial por Dios zëedan abi' rudëëman quixtëe lojman. Guiáad bén naladx guial yu' ni ad zajct gaw bejn, rünman zian guial naladxaman zian cayajpaman Dios respejt abi' rudëëman quixtëe lojman.

<sup>7</sup> Ni'qui du tijb ree ad nabant ree por dux xgabzi ree, o ad zayëjtt ree por dux xgabzi ree. <sup>8</sup> Bal nabajn ree por dux Dad ree Jesucrist par laa tääman nabajn ree. Abi' bal yayëjt ree por laaman par laa tääman yayëjt ree. Zeel bal nabajn ree o yayëjt ree, par dux Dad ree Jesucrist ma nayajc ree. <sup>9</sup> Din par zian güjtaman abi' babanman, din gacaman Dad loj ree bén naban në loj ree bén ma güjt.

<sup>10</sup> ¿Chexquiza din guze' lasa'l bén rliladx Jesucrist o güün lasa'l tiblad ya? Awa dugra ree rayal yadxu' loj Dios din yadëed ree cwent lojman. <sup>11</sup> Zi'c ca loj xtiidxaman lod rëb: Naj naj Dios naban,

abi' diidxli rnin lojdi guial gra ree bejn guzuxib lon.

Abi' gra ree bejn guiëb guial naj naj Dios.

<sup>12</sup> Abi' tijbgaj dunuj ree rayal yadëed ree cwent loj Dios, per por dunuj gajc ree.

### *Ad gusajbidi bejn loj dol*

<sup>13</sup> Zeel ad rayalt yaneeguidx du lasa' ree bén rlliladx ree Jesucrist, zagdxeli yaguieen ree naguiejn yaya'p ree cudad chitëe por dunuj ree güün reeman dol. <sup>14</sup> Naj najn xbejn Jesús, ragbeen guial ad dolt naj gaw bejn xhietëëznin. Per par bén naladx guial ad zajct gawaman xhietëëznin, par laaman dolan cayüjnman bal gawaman xhietëëznin. <sup>15</sup> Yan bal por ni rawil naladx tijb xcompniaril bén rlliladx Jesucrist guial dolan cayüjnl, abi' bal id ridxga'l laaman rën guiëban guial ad rëntil laaman. Gojp cudad chitëe por ni rawzil güün xcompniaril dol, din nëgajc por laaman güjt Jesucrist loj crüjz. <sup>16</sup> Ad güünl tijb ni guinieeguidx ree xcompniaril lüj, majsi lüj ragbee guial ad ni malt naj ni cayüjnl. <sup>17</sup> Niz loj Dios ad ni rawt bejn o ad ni rë'taman naj ni lasajc, ni lasajc par laaman naj guial guiban bejn xnejz, yabedxe luxdoo bejn, chu' tëe luxdoo man nix por xSprijt Dios. <sup>18</sup> Abi' bén naban zian guial zinalaman Jesucrist, cayüjnman zi'c rën Dios, zi'c ruladx tëe bejn.

<sup>19</sup> Zeel rayal yaguieen ree naguiejn yabajnnë' du lasa' ree zagdxë yabedxe tëe du luxdoo ree, din yasnuu yayagbee ree xhienaag yunaal ree xnejz Dios. <sup>20</sup> Gol gojp cudad chitëe por ni rawzidi gunijtidi tijb xbejn Dios. Walican graczi zajc gaw bejn. Per ni mal guin naj bal par xcompniaril dolan cayüjnl. <sup>21</sup> Zeel zagdxeli naj guial ad zajwtil bëel ad zë' tëetil vin o xhie stijb nin bal por laan güün xcompniaril dol. <sup>22</sup> Majsi lüj ragbee guial achet güünan gaw bejn xhietëëznin, per zagdxeli lüjzi con Dios. Naj rni guial, ¡xiquilbaa bén ad yu'nawëëgt luxdoo rawaman xhietëëznin! <sup>23</sup> Per bén yu'nawëëg luxdoo par gawaman xhienin, abi' gawaman laan laagajcaman ma cayüjn dol guial ad cayawtraman guidib ladxaman. Bal naladx bejn ad laat naj ni cayüjnman, dxel laagajcaman cayüjn dol.

## 15

### *Royal yaguieen ree ni naladx bejn naj zagdxë*

<sup>1</sup> Yan, dunuj ree guial ma nadxu'dxi'ch ree loj ni raliduladx ree Jesucrist, rayal yaguieen ree yudar bén ad wazudxi'cht loj guialrliladx Jesucrist luar yaguieen ree ni rayentzi ree, <sup>2</sup> dugra ree rayal yaguieen ree naguiejn din chu' luxdoo dux compniar ree zagdxë con dunuj ree. Abi' rayal yaguieen ree ni naladx reeman naj zagdxë, din chile' gusnuu güünbee reeman xnejz Dios. <sup>3</sup> Din ni'qui Jesucrist ad beent zi'c naj xixgabaman, gojc zi'c ca loj xtiidx Dios lod rëb: "Naj bayal gra ree diidx mal ni ninia reeman lojl." <sup>4</sup> Gra ni ca loj xtiidx Dios, can din yayagbee ree xhienaag yabajn ree, abi' por xtiidx Dios zëed pacens në guialragnë chitëe yalenya' ree yalëjz ree ni ralëjz ree yaca' ree. <sup>5</sup> Dios, bén razaladx pacens në guialragnë chitëe yalenya' ree, laaman gagnë lëjt din guibandi nadxag con gra ree xcompniaridi zi'c naj xixgab Jesucrist. <sup>6</sup> Din tiblojzi guilies reeman xvalor Dios, xdad dux Dad ree Jesucrist.

### *Bire'ch xtiidx Dios loj ree bén ad najt bén Israel.*

<sup>7</sup> Zeel, zi'c baca' Jesucrist lëjt par gaquidi xbejnman, ziangajc gol guneenë ree xcompniaridi zagdxë, bén rlliladx ree laaman par guiliesidi xvalor Dios. <sup>8</sup> Gol basaaladx guial bi't Cristo loj guidxliuj par gulüüman bén Israel ree xtiidx Dios, zian bidgaguieenman sirv loj reeman, persi gojc cumplid promejs ni been Dios loj ree xbéngulal reeman, abi' zian biguien guial rüjnqui Dios cumplid xtiidxaman. <sup>9</sup> Bi't tëe Cristo loj guidxliuj din por laaman, bén ad najt ree bén Israel guilies reeman xvalor Dios guial rayaman laa reeman, zi'c ca loj xtiidxaman lod rëb:

Xt loj ree bén ad najt bén Israel guzatan lüj guial najl benza'c.

Gol tëën cant ree par lüj.

<sup>10</sup> Ziangajc rëb zatibljajt loj xtiidx Dios:

Lëjt bén ad najt ree bén Israel,  
gol babaa zi'c rabaa ree bén Israel.

<sup>11</sup> Zatibljajt loj xtiidx Dios rëb:

Gra ree bén ad najt bén Israel.  
Në los demazri ree bejn, gol gules xvalor Dios.

<sup>12</sup> Rëb tëë Isaías:

Loj xdiaa Isai, grii tijb bén nabee bénguidxliuj ree,  
xt ree bén ad najt bén Israel, chililadx laaman.

<sup>13</sup> Dios bén ragnë dunuj ree ralëjz ree ni caylëjz ree, laaman yagu' luxdoodi zagdxë yabe'cdxë tëëman luxdoodi guial rliladxidi laaman, din cwëz da'tidi ni guneeman por xSprijt Dios.

<sup>14</sup> Compniar raliduladx ree Jesucrist, naj ragbeechaaw guial zagdxë nabandi con ree xcompniaridi, ma ragbee tëëdi zagdxë xhiënaag chinalidi xnejz Dios, xt rajc rudëëdidi consejw rulüü tëë xcompniaridi. <sup>15</sup> Per majsi zian, tio'p choon lajt loj gui'ch guie bacan diidx naa, din yasaaladxidi xhiënaag guibandï. Rünan zian por gualrniabee ni ma banee Dios naj, <sup>16</sup> din günan sirv loj Jesucrist. Din da dxiinan naj gulün bén ad najt ree bén Israel xtiidxza'c Dios din guiban reeman zi'c rën Dios, din gac reeman naya niz lojman por xSprijtaman. <sup>17</sup> Ra'pan xhie günnë'n nabë, guial ragnë Jesucrist naj por ree dxiin cayünan por Dios. <sup>18</sup> Per achetczi zajc guiën bal id zën guial por Cristo cayünan laan, din laaman cayagnë naj persi cayünan yudar bén ad najt ree bén Israel din gac chililadx reeman guzoob tëë reeman xtiidx Dios. Yan ma rliladx reeman laaman por ni rën loj reeman në por guial ruguiaa reeman xhiënaag nabanen, <sup>19</sup> në guial ma baguiaa reeman sen ree con ree milagr ni ma gojc por xgualrniabee xSprijt Dios. Zian ma gutiechan xtiidxza'c Jesucrist guidibczi, diizd Jerusalén xt guidib niz Ilírico. <sup>20</sup> Din zian naj da xgaban günan, gatie'chan xtiidxza'c Jesucrist. Per ad lod ma guzulojt ben ren con dxiin guie, gatiechanan lod ad waguiejntczi reeman xcwent Cristo, <sup>21</sup> zi'c ca loj xtiidx Dios lod rëb:

Bén ad waguiejnt ree xcwentaman,

güünbee reeman laaman.

Guiáad ree bén ad wayagbeet xcwentaman,  
gagbee reeman laan.

### *Rüjn Pab xgab cheman Roma*

<sup>22</sup> Abi' guial wan guidibczi lod ma rnin lojdi, zeel ad wayajct gan guidganan lëjt, majsi zianczi guyënan nidganan lëjt. <sup>23</sup> Per yan guial ma gulox gutiechan xtiidx Dios guidib niz guie, abi' guial ma gojc zien ijz ni rënan guidganan lëjt, <sup>24</sup> zeel rünan xgab guidganan lëjt chi gan España. Abi' chi gadëëdan guguien lëjt, chi ma gojc tio'p choon dxej yu' luxdoon zagdxë guial za'n con lëjt, dxel ma güündi naj yudar din gan España. <sup>25</sup> Per yan yaløj gan Jerusalén chigsa'nän tijb yudar par ree dux compniar ree bén rliladx ree Jesucrist. <sup>26</sup> Din bén Macedonia ree con ree bén Acaya bén rliladx gajc ree Jesucrist, been reeman xgab guto'p reeman yudar guin par ree bénprob zojb ree Jerusalén, bén rliladx ree Jesucrist. <sup>27</sup> Abi' por xixgab reeman guixhiaal reeman yudar guin, per zagdxë naj ni cayüjn reeman din mal nuzëëb reeman loj reeman. Din por ree bén Israel bidxin xtiidx Dios loj reeman, dxel yan laa reeman guial ad najt reeman bén Israel, zagdxen guial güün reeman yudar bén Israel ree zi'ctzi gac reeman. <sup>28</sup> Zeel chi ma balooxan dxiin guie, chi ma bayün yudar guin, dxel gan España, abi' chi gadëëdan ladxidi dxel guidganan lëjt.

<sup>29</sup> Naj ragbee guial chi guidganan lëjt, zien da't ni guneë Dad Jesucrist par ganin lëjt.

<sup>30</sup> Yan por dux Dad ree Jesucrist në guial rën xSprijt Dios dunuj ree, rniaaban lojdi din güündi naj yudar yarejdx yanaab ree Dios por naj. <sup>31</sup> Gol gurejdx gunab Dios din



gagnëman naj loj ree bën Judea, bën ad rlliladxt ree Jesucrist, gol gurejdx tëë Dios por dux compniar ree bën rlliladx ree Jesucrist, bën zojb ree Jerusalén din tiëb reeman tia' reeman yudar ni chigsa'nan par laa reeman. <sup>32</sup> Dxel bal gagnë Dios ma chu' luxdon zagdxe guidganan lëjt dxel ma zajc yaziiladxan la'tgaj za'n con lëjt. <sup>33</sup> Dux Dad ree Dios bën rabe'cdxe du luxdoo ree, laaman gagnë gradi. Amén.

## 16

### *Rugajpdioz Pab bejn ree*

<sup>1</sup> Yan ni gui't Febe ladxidi, béngunaa ni naj dux compniar ree guial raliduladx ree Jesucrist, bën cayüjn tëë sirv lën yadoo ni zojb guiedx Cencrea. <sup>2</sup> Gol baca'man zagdxe por Dad Jesucrist, zi'c rayal yaguieennë' ree dux compniar ree bën rlliladx ree Jesucrist. Gol beenman yudar bal xhienin ryaadxaman, din dád zien ree bejn ma beenman yudar nëgajc naj ma beenman yudar.

<sup>3</sup> Gol bagajpdioz Aquila con xbéngunaaman Priscila, bën cayüjn ree naj yudar cayguieenan sirv loj Jesucrist. <sup>4</sup> Abi' laa reeman xt guzuj reeman loj guialgüjt por naj, zeel rudën quixtëë loj reeman. Abi' ad najtzi rudë quixtëë loj reeman në ree dux compniar ree bën rlliladx ree Jesucrist bën ad najt ree bën Israel rudëë quixtëë loj reeman. <sup>5</sup> Gol bagajpdioz ree bën rlliladx Jesucrist, bën rado'p ree lidx Priscila con Aquila. Gol bagajpdioz da miwan Epeneto, bën goc bën yaloj bililadx xtiidx Jesucrist niz Acaya. <sup>6</sup> Gol bagajpdioz Li, bën ma been da't lëjt yudar. <sup>7</sup> Gol bagajpdioz ree bën ladxan Adrónico con Junias, bën guyu'në' reen ladxguiib. Abi' ree xi apóstoles Jesús dád rën reeman laa reeman, abi' yaloj laa reeman bililadx Jesucrist guial lon.

<sup>8</sup> Gol bagajpdioz Amplias, da miwan bën rën da'tan guial nayajcan xbejn Jesucrist. <sup>9</sup> Gol bagajpdioz Urbano, bën cayüjn naj yudar cayguieenan sirv loj Jesucrist. Gol bagajpdioz tëë da miwan Estaquis. <sup>10</sup> Gol bagajpdioz Apeles, bën ma balüü guial diidxliczi rlliladxaman Jesucrist, gol bagajpdioz tëë xfamil Aristóbulo. <sup>11</sup> Gol bagajpdioz tëë Herodión ben ladxan, në ree xfamil Narciso, bën ma rlliladx Jesucrist. <sup>12</sup> Gol bagajpdioz Trifena në Trifosa, bën cayüjn ree sirv loj Jesucrist. Gol bagajpdioz tëë Pérsida, bën naguieenbee ree guial dád cayüjnman sirv loj Jesucrist. <sup>13</sup> Gol bagajpdioz Rufo, bën diidxliczi zinal xnejz Dios, gol bagajpdioz tëë xniaaman, bën rënan zi'c da nan. <sup>14</sup> Gol bagajpdioz Asíncrito, Flegonte, Hermas, Patrobas, Hermes në gra ree bën za' con laa reeman, bën ma rlliladx ree Jesucrist. <sup>15</sup> Gol bagajpdioz Filólogo, Julia, në Nereo con bizanman, në Olimpas con gra ree bën rlliladx Jesucrist bën za' ree con laa reeman.

<sup>16</sup> Gol bagajpdioz lasa'di zi'c rayal. Dux compniar ree bën raliduladx ree Jesucrist bën za' ree guie, rugajpdioz reeman lëjt.

<sup>17</sup> Compniar raliduladx ree Jesucrist, rniaaban lojdi din gapidi cudad con ree bën rlia' lasa' ree bejn, bën rusquiee ree bejn guial rulüü reeman ni ren ree guial loj ni ma basiididi. Ad guidxga'di laa reeman, <sup>18</sup> din ad lojt Jesucrist cayüjn reeman sirv, rüjn reeman ni rëntzi reeman, abi' con diidxnagüüdx ne con diidxza'c rüjn reeman gan bën ad ragbeetczi ree o bën ad ragbeezact ree xtiidx Dios. <sup>19</sup> Per lëjt, guidibczi ma ragbee ree bejn guial ruzoobquidi diidx zinalidi xtiidx Dios, dád nix yu' luxdon abi' rënan susindi par güündi ni zagdxe ad par güüntidi ni mal. <sup>20</sup> Dios, bën rabe'cdxe luxdoo bejn, laaman gagnë lëjt nayob chitëë güünri xindxab lëjt gan. Dux Dad ree Jesucrist gagnë lëjt.

<sup>21</sup> Rugajpdioz Timoteo lëjt, bën cayüjn naj yudar con xchiin Dios ni cayünan, në ree bën ladxan bën la ree Lucio, Jasón, në Sosípater, rugajpdioz reeman lëjt.

<sup>22</sup> Në Tercio, bën cayüjn gui'ch guie rugajpdioz lëjt por dux Dad ree Jesucrist.

<sup>23</sup> Nëtëë Gayo rugajpdioz lëjt, lidxaman za'n, runee tëë lidxaman rado'p ree dux compniar ree bën rlliladx ree Jesucrist. Në Erasto, bën naj tesorerer luguiedx guie në bën la Cuarto ben rlliladx Jesucrist, rugajpdioz reeman lëjt.

<sup>24</sup> Dux Dad ree Jesucrist güünle' gradi. Amén.

*Diidx bigra bacaa Pab loj gui'ch guie*

<sup>25</sup> Radëen quixtëe loj Dios din laaman zile' gagnë lëjt din gusnuu gagbeedi sudxi'ch tēedi loj xtiidxza'c Jesucrist, zi'c ma balüün lëjt xhienaag din gaquidi perdon. Din zian naj xixgab Dios diizd chi gad guidxliuj gacchaaw, xgab ni ad gogbeet ree bejn diizd guia'xchej. <sup>26</sup> Per yan ma rayagbee ree xhienaag naj xixgab Dios, ma rayagbee ree por ree gui'ch ni bacaa ree bén badëe xtiidx Dios loj ree bejn zi'c gunabee Dios laa reeman, bén naban goctëez. Abi' guidibczi care'ch xtiidx Dios din chililadx ree bejn Jesucrist guzoob tēe reeman xtiidxaman.

<sup>27</sup> ¡Tijbzi Dios, bén rajc gradooczi, rayal yaya'p reeman respejt zianczi por Dad Jesucrist! Amén.

## Gui'ch yaløj ni guxhaal San Pabl loj ree bèn Corinto rliladx Jesucrist

### *Rxhiaal Pab xtiidx Dios*

<sup>1</sup> Naj Pab, Dios bacaabee naj gacan tijb xi apóstol Jesucrist. Za' Sóstenes guie con naj, bèn rliladx Jesucrist. <sup>2</sup> Caxhalan gui'ch guie par lèjt najdi bèn rliladx xtiidx Dios luguiedx Corinto, lèjt guial ma nayadi delant loj Dios por Jesucrist, abi' ma bacaabee Dios lèjt gaquidi xbejnman bacaabee tèëman gra ree bèn gra lad bèn rliladx ree Jesucrist, bèn naj Dad par dunuj ree nè par laa reeman. <sup>3</sup> Dux Dad ree Dios nè Dad Jesucrist güünle' lèjt, yabe'cdxe tèë reeman luxdoodi.

### *Rudëed Pab quixtëe loj Dios*

<sup>4</sup> Gra dxejczy rudëdan quixtëe loj Dios por lèjt zi'c ma gognëman lèjt guial rliladxidi Jesucrist. <sup>5</sup> Nè guial najdi tijbzi con Jesucrist dád ma gognë Dios lèjt, baneeman lèjt quiarguiejn din guinieedi chignia' tèedi xtiidxaman. <sup>6</sup> Zian rguien guial diidxli naj ni ma biguiejndi por Cristo diizd chi guzuløj bililadxidi laaman. <sup>7</sup> Abi' zianczy rajpidi xyudar Dios la'tgaj rbëzidi dxej ni gui't Jesucrist zatijb. <sup>8</sup> Abi' Dios gagnë lèjt din sudxi'chidi guidiblagaa loj ni rliladxidi laaman, chitëe xhie xtolidi chu' dxej ni gui't dux Dad ree Jesucrist zatijb. <sup>9</sup> Din Dios diidxli rüjn xtiidxaman cumplid, abi' laaman naj bèn gule lèjt din gaquidi tijbzi con dux Dad ree Jesucrist.

### *Ad rayalt la' lasa' ree xbejn Jesucrist*

<sup>10</sup> Compniar raliduladx ree Jesucrist, rniaaban lojdi por Jesucrist din guidxag cwedi, ad gaquidi tio'p lala', tijbzi gol gojc, tijbzi xgab gol been. <sup>11</sup> Rnin lojdi zian compniar raliduladx ree Jesucrist, din ma gogbeen guial yu' wadijl entr lèjt, zian bagojn ree xfamil Cloé naj. <sup>12</sup> Guial garent garen rëb ree bejn, yu' reeman rëb: “Naj naj xbejn Pab”, yu' tèë reeman rëb: “Naj naj xbejn Apolos”, yu' reeman rëb: “Naj naj xbejn Bëd”, yu' tèë reeman rëb: “Naj naj xbejn Cristo.” <sup>13</sup> Per naj rni lojdi guial Cristo tijbzi najman, din ad najt güt loj crüjz por lèjt, ad gurobnijs tèëtidi par gaquidi da bejnan. <sup>14</sup> Quixtëe Dios chi wan ladxidi achut mazri barobnijsan, Crispozi nè Gayo. <sup>15</sup> Chitëe guiëbidi guial gurobnijsidi par gaquidi da bejnan. <sup>16</sup> Barobnijs tèën xfamil Estéfanas, per ad rusaaladxtran chu mazri barobnijsan. <sup>17</sup> Din ad guxhaalt Cristo naj par gurobnijsan bejn ree, guxhaalaman naj par gatie'chan diidx xhienaag gap bejn perdon loj Dios. Ad cane tèëtan con diidx ni yadxaløj ree bejn naj luar cu'guijc reeman par xhie güjt Cristo loj crüjz.

### *Xguialrniabee Dios nè xquiarguiejnman*

<sup>18</sup> Gra ni raguie'ch ree guial por xhie güjt Cristo loj crüjz, achet lasajcan par ree bèn zë loj nejz mal. Per par dunuj ree guial ma raya'p ree perdon, dád lasajc xguialgüjtaman din zian rayagbee ree xhienaag naj xguialrniabee Dios. <sup>19</sup> Abi' loj xtiidx Dios rëb: Guniytan xquiarguiejn ree bèn ni rëb guial rajc da't reeman, abi' guscayyan xquiarguiejn ree bèn ni rëb guial rignia' da't reeman.

<sup>20</sup> Yan, ¿con ree bèn rëb guial rajc da't reeman? ¿Con ree mextr rajc ley? ¿Con ree bèn rëb guial rajc da't reeman xcwent ree ni yu' loj guidxliuj? Par Dios achet lasajc xquiarguiejn bénguidxliuj. <sup>21</sup> Abi' por xquiarguiejn Dios ragbeechaawaman guial ad zayünbeet bénguidxliuj laaman por xquiarguiejn reeman, zeel beenman xgab yabëëman bejn loj casti por xtiidxaman ni caylüün bejn ree. Abi' ree bèn yarii loj casti guin laa reeman naj bèn rliladx laaman, majsi par ree ben ren achet lasajc ni canin por Cristo.

<sup>22</sup> Din bèn Israel ree rën reeman guguaa reeman milagr din chililadx reeman, abi' ree bèn ad najt bèn Israel rën reeman guien reeman ni mazri nawëëg din chililadx reeman.

<sup>23</sup> Per dunujn ni caylüün bejn ree naj par xhie güjt Cristo loj crüjz, abi' ree bén Israel rdxe'ch reeman, guiáad par ree bén ad najt bén Israel achet sirv rüjn ni caylüün. <sup>24</sup> Per par ree bén ma bacaabee Dios, zi'c ree bén Israel zi'c ree bén ad najt bén Israel, por Cristo rguien xguialrniabee Dios në xquiarguejnman. <sup>25</sup> Din ni rulüü achet lasajc guial ni rüjn Dios, laan naj ni mazri lasajc loj xguialrajc bénguidxliuj. Abi' xt ni bigra xguialrniabee Dios laan naj ni mazri lasajc loj xguialrniabee bénguidxliuj. <sup>26</sup> Gol gogbee compniar raliduladx ree Jesucrist guial ta'nzi ree bén rliladx laaman naj bén rignia' zi'c naladx ree bénguidxliuj, ta'nzi ree bén rliladx laaman rajp guialrniabee loj guidxliuj guie, abi' ta'nzi ree bén rliladx laaman naj ree bén za loj ree famil ni naj bén zojbloj. <sup>27</sup> Abi' Dios gulej ree bén ni naladx ree bejn ad rajcza'ct din yaya'nxtu ree bén rajc da't, gulej tēēman bén ad ca't ree guialrniabee din yaya'nxtu ree bén ca' guialrniabee. <sup>28</sup> Dios gule ree bén ni naladx ree bejn guial achet sirv laa reeman, bén ni naladx ree bejn guial achet lasajc reeman, bén ni achut naj loj guidxliuj guie din chiquiedaman xguialdxal ree bén naj ree chunin loj guidxliuj guie. <sup>29</sup> Zianan zeel achut zajc güün benro' delant loj Dios. <sup>30</sup> Yan por Dios ma najdi tijbzi con Jesucrist, dxel por laaman rtia'di xguialrajc Dios. Abi' guial raliduladx ree Jesucrist ad zayaltri ree casti, por laaman ma naya ree, nayajc tēē ree par laaman abi' ma raya'p ree perdon loj Dios. <sup>31</sup> Zianan din gac zi'c rēb loj xtiidx Dios lod rēb: “Bal yu' bén rēn guilies xvalor gajc, luar güündi zian gol gules xvalor dux Dad ree Jesucrist.”

## 2

### *Xtiidx Jesucrist bén cwa loj crüjz*

<sup>1</sup> Compniar raliduladx ree Jesucrist lējt ragbee guial chi wan ladxidi, chi gunen xtiidx Dios lojdi, ad gunetan lojdi con ree diidx nabee o con ree diidx nawēēg par chignia'di. <sup>2</sup> La'tgaj guzun con lējt ad gunetan diidx ren ree lojdi, tijbzi xcwent Jesucrist bén cwa loj crüjz. <sup>3</sup> Abi' chi wan ladxidi zi'c tijb bén ni ad yu't gojl, rnijczan guial rdxeban bialan lojdi. <sup>4</sup> Në chi gunenē'n lējt, chi gunen xtiidx Dios lojdi, ad gunenē'tan lējt con ree diidx ni günan lējt gan por da diidxan, benan gan rliladxidi Jesucrist por xyudar xSprijt Dios në xguialrniabeeman. <sup>5</sup> Din guiguien guial ni rliladxidi Jesucrist zēēdan por xguialrniabee Dios ad por xguialrajc bénguidxliuj.

### *Por xSprijt Dios nünbee bejn laaman*

<sup>6</sup> Majsi chi ralüün bén ni ma rajc ree mazri xtiidx Dios, ralüün laa reeman por guialrajc. Per ad por guialrajc ni yu' loj guidxliuj guie, lasa' guialrajc ni rajp ree bén rniabee, guialrajc ni yu' dxej nit. <sup>7</sup> Ralüün laa reeman por guialrajc ni zēēd por Dios, din yanee ree zi'c naj xixgab Dios, xgab ni goc ni naguie'ch par ree bénguidxliuj, abi' xgab guin naj guial chililadx reeman Jesucrist, diizd chi gad guidxliuj gacchaaw been Dios xgab guin din gac yayal ree xanyabaa. <sup>8</sup> Laan naj tijb ni ad gogbeet ree bén rniabee loj guidxliuj guie, din bal niagbee reeman dxel ad nucaat reeman dux Dad ree Jesucrist loj crüjz, bén ca' guialrniabee. <sup>9</sup> Per loj xtiidx Dios rēb:

Achut waguiaa, achu tēēt waguiejn

abi' ni'quid wayüjnt bénguidxliuj xgab

por ni nagu'chaaw Dios par ree bén rēn laaman.

<sup>10</sup> Per dunuj ree ma balüü Diosan duloj ree por xSprijtaman bén naban con dunuj ree, din xSprijt Dios gran ragbeeman, xt ni mazri naguie'ch ni zēēd por Dios.

<sup>11</sup> Achut ragbee xhie xgab cayüjn tijb bejn. Xsprijtsaman ragbee xhie xgab cayüjnman. Ziangajc xSprijt Dios tijbzi laaman ragbee xhienaag naj xixgab Dios. <sup>12</sup> Abi' dunuj ree guial ma zunaal ree xnejz Dios, ad nabajnt ree con tijb sprijt ni zēēd loj guidxliuj guie, ma nabajn ree con Sprijt zēēd loj Dios, din por xSprijt Dios yayagbee ree gra ni ma bazaladx Dios duloj ree guial najman benza'c. <sup>13</sup> Abi' laa reen naj ni caylüün bejn ree, per ad

por dux quiarguejntan, xSprijt Dios culüü dunujn xhienaag yanen. Zian ralüün xcwent Dios bèn ma nabannë xSprijtaman.

<sup>14</sup> Per bèn ad nabannët xSprijt Dios ad rlliladxtaman ni zëed ree por Dios ni rulüü xSprijt Dios dunuj ree, din par laaman najn tijb ni ad rüjnt sirv. Zeel ad zajct chignia'man xcwent Dios din con xSprijtzi Dios zajc chignia' bejn ni rën guiëban. <sup>15</sup> Per bèn ma nabannë xSprijt Dios por Sprijt guin rignia'man ni naj xcwent Dios, abi' ni'qui tijb ree bèn ad nabannët xSprijt Dios ad rignia't chexc zeel rignia'man ni guin ree. <sup>16</sup> Loj xtiidx Dios rëb: “¿Chu ma bignia' xixgab Dios? ¿Chu zajc gulüü Dios ni güünman?” Per dunuj ree, naj dux xgab ree zi'c xixgab Cristo.

### 3

#### *Compniar rüjn ree sirv loj Dios*

<sup>1</sup> Compniar raliduladx ree Jesucrist, chi guzun con lëjt ad gunenë'tan lëjt zi'c ree bèn ma nabannë xSprijt Dios, gunenë'n lëjt zi'c ree bèn ad nabannët xSprijt Dios, zi'c ree bèn qui guzulojri rlliladx Jesucrist. <sup>2</sup> Diidx ad nawëëgt ree gunenë'n lëjt zi'c rudëë bejn lejch loj tijb xindobëz guial xo gawix ni raw bengol, zian gunenë'n lëjt diidx ad nawëëgt ree. Abi' ni'qui yan ad zile't ganenë'n lëjt zi'c ree bèn ma rignia' mazri xtiidx Dios. <sup>3</sup> Din sta nabandi zi'c naban gra ree bénguidxliuj. Nadëdloj lasa'di rdil tëedi, zian rguien guial sta nabandi zi'c gra ree bénguidxliuj bèn ad zinalt ree xnejz Dios. <sup>4</sup> Din chi rëbidi: “Naj naj xbejn Pab”, o chi rëbidi ya: “Naj naj xbejn Apolos”, zian rguien guial sta cayüjndi zi'cgajc chutëëz bénguidxliuj.

<sup>5</sup> Per naj rni lëjt: ¿Chu naj Pab o chu naj Apolos? Gol gogbee guial nayajczan tio'p ree bèn cayüjn sirv loj Dios persi bile' bililadxidi tijb gajc dunujn cayguieen dxiin ni banee Dios dunujn. <sup>6</sup> Yaguie'ch ree guial naj naj zi'c bèn rxübin abi' Apolos naj bèn rguuil, per por Dios cayagbeedi mazri xtiidxaman zi'c rusni'saman tijb cwaandoo. <sup>7</sup> Abi' zi'c bèn rxübin zi'c bèn caguuil mandadzi cayüjn reeman, Diosan naj bèn ni rusni's ni rxübin reeman. <sup>8</sup> Yan ziangajc naj con Apolos tijbzi mandad cayguieenan, rayagbeen guial zunee Dios dunujn ni rayalan bal xhienaag yaguieenan mandad ni baneeman yaguieen tijb gajc dunujn. <sup>9</sup> Zeel naj con Apolos nayajcan compniar cayguieenan xmandad Dios.

Yaguie'ch ree lëjt naj xguiniaa Dios lod cayguieenan dxiin o lëjt naj zi'c tijb yu ni cayüjn Dios. <sup>10</sup> Abi' naj guial catiechan xtiidxaman najn zi'c tijb albanil bèn ni rajp da't cudad din grii xchiinman zagdxë guial bacaabeeman naj günan xcimiant yu guin. Abi' ree bèn ni cusnuu culüü xtiidx Dios, laa reeman naj zi'c bèn cusnuu cayüjn yu guin. Per rayal gap reeman cudad xhienaag cales reeman yu guin, <sup>11</sup> din achut zajc guchaa cimiant ni ma benan, abi' cimiant guin naj guial rlliladx Jesucrist. <sup>12</sup> Abi' ree bèn ni cayguie'ch ree naj ree bèn ni cusnuu cales yu loj cimiant ni cayguie'ch ree naj guialrlliladx Jesucrist, bal cayüjn reeman laan con or o con plajt o con ree guiaj zagdxë o con yag o con biqui o con balagya'. <sup>13</sup> Per chi guidxin dxej ni güün Dios xguialguxtisaman, dxel guiguien xhienaag naj xchiin reeman. Din dxej guin gac zi'c chi rajc prueb xhienin loj guij din guiguien xchiin tijb gajc bejn. <sup>14</sup> Abi' bal rüjn sirv ni beenman zi'c tijb bèn ni ruzoob tijb yu ni ad re'ct, zaca'man ni rayalaman por ni beenman. <sup>15</sup> Per bal che'c ni beenman, sacaman zi'c tijb bèn ni re'c lidx abi' penz rliaaman loj bajl, din zajcaman perdon per gusëëbaman gra.

<sup>16</sup> Zeel gol gogbee guial lëjt naj zi'c tijb xyadoo Dios guial nabandi con xSprijt Dios. <sup>17</sup> Abi' bal chu bèn guitie'chdojn bèn rlliladx ree Jesucrist, zunidloj Dios laaman guial ruse'nman xyadoo nagle'man ni canin naj lëjt guial najdi xbejnman.

<sup>18</sup> Ad gusquiee lëjt gajc. Bal yu' tijbidi naladx guial rajc da'tidi guial loj ree bejn, zagdxeli gol been naya din gaquidi diidxli bënrajc da't. <sup>19</sup> Din delant loj Dios achet lasajc guialrajc bénguidxliuj, tib lajt loj xtiidxaman rëb: “Ad rudëët Dios mod grii zagdxë ni naj xixgab ree bèn naladx guial dád nasin reeman par güün reeman tijb ni ad najt

xnejz.” <sup>20</sup> R b t   loj xtiidxaman: “Dios ragbeechaaw guial xixgab ree b n rajc da't achet lasajcan.” <sup>21</sup> Zeel ad rayalt chu guilies xvalor gajc guial najman xbejn tijb bejn o stijb bejn. Din xieendi ma naj gra. <sup>22</sup> Ma nulendi dunujn, naj Pab, Apolos n  B d. Xieendi naj guidxliuj, guialnaban, guialg jt, ni yu', n  ni qui chu'ri, xieendi naj gra. <sup>23</sup> Abi' l jt ma najdi xbejn Cristo abi' Cristo naj Xi'n Dios.

## 4

### *Dxiin ni been ree b n naj ree xi ap stoles Jes s*

<sup>1</sup> Gol baguiaa dunujn zi'ctzi xmojs Cristo par yasiidan bejn ree xhienaag naj xixgab Dios, xgab ni naguie'ch par bejn. <sup>2</sup> Per l jt ragbee guial tijb mojs naj par g nman gra ni rayal g nman din gap reeman laaman confianz. <sup>3</sup> Zeel ad rutan xgab bal xhienaag ruguiaadi naj o bal xhienaag ruguiaa ree guxtis naj, din ni'qui naj ad zajct ganin xhienaag najn. <sup>4</sup> Din majsi bal naladxan guial achet ni mal way nan per ad por ziant ma ganin guial achet da faltan niz loj Dios, tijbzi dux Dad ree Jesucrist ragbee xhienaag cay nan. <sup>5</sup> Zeel ad rayalt yadxa lojdi chu cay jn zagdxe o chu ad cay jnt zagdxe, gol basa'n ree ni guin par dxej ni gui't Dad Jesucrist. Laaman gusguien conin naj diidxli, o bal wali ree baguieen ree xmandadaman guidib du luxdoo ree, dxej guin yayagbee ree xhie diidzxa'c guiniee Dios por tijb gaj dunuj ree.

<sup>6</sup> Compniar raliduladx ree Jesucrist, gra ree ni canin l jt wen par l jtan. Abi' Apolos con naj nayajcan tijb ejempl par l jt, din por dunujn gusiididi ad t dlaj guiliesidi xvalor bejn chit   por zian gusa'ndi trajs stijb bejn. <sup>7</sup> Din ni'qui tijb bejn ad lasajct mazri loj stijb bejn.  O xhie rajpidi ni ad baneet Dios lojdi? Abi' bal por laaman rajpidi ni rajpidi,  chexc zeel rlies xvalorgajquidi zi'c rul   ad por Diost rajpidi laan?

<sup>8</sup> L jt naladxidi achet ryaadxidi, guial ma bayaaloj rignia'di abi' ad ryaadxtridi dunujn. Abi' naladxidi najdi zi'c ree rey.  Per xinix niajquidi rey din nanabeen con l jt! <sup>9</sup> Yu' dxej naladxan guial dunujn nayajcan xi ap stoles Jes s, Dios basial dunujn yayajcan zi'c ree b n ad lasajct, zi'c ree benmal ni rayal guialg jt, abi' radxaloj ree anjl n  ree b nguidxliuj dunujn. <sup>10</sup> Abi' la'tgaj nayajcan zi'c ree b n ad yu't xquiarguejn par b nguidxliuj guial ratie'chan xtiidzxa'c Cristo, l jt rlies xvaloridi guial rignia' da'tidi guial rliladxidi laaman. Dunujn nayajc zi'c b n ad yu't gojl gui ad l jt naladxidi yu' da'tidi gojl abi' rajp ree bejn l jt respejt gui ad dunujn ad r nt reeman dunujn. <sup>11</sup> Xt yandxej sta cayzaagdiajn por guialrliaan, guial re'c nijs n  guial ryaadx du xaban. Zienloj ni r jnn  ree bejn dunujn, achet du lidxan. <sup>12</sup> Abi' d d radxagan raguieenan dxiin din guidxel ni yadaawan. Chi ruzaal ree bejn diidxmal du guiican radxi'nan con diidzxa'c, abi' radaanan ni r jnn tzi reeman dunujn. <sup>13</sup> Abi' chi rnieeguijdx reeman dunujn, raneeza'cn 'n laa reeman. Xt yan nayajcan zi'c tijb guix par b nguidxliuj, nayajcan zi'c tijb ni ad r jnt sirv par laa reeman. <sup>14</sup> Ad cucatan gui'ch guie par gusa'nxtun l jt, cucan laan din gunen l jt consejw zi'cgajc da xi'n reen guial r nan l jt. <sup>15</sup> Din majsi gapidi zi'c chii mil ree b n gusiid l jt, per najzi naj zi'c tijb Dad par l jt. Din por naj guzuloj rliladxidi Jesucrist chi basidan l jt xtiidzxa'caman. <sup>16</sup> Zeel rniaaban lojdi din guibandi zi'c naban.

<sup>17</sup> Din par zian rxhialan Timoteo guitixlojman l jt, b n r nan zi'c da xi'nan laaman diidxli rliladxaman Jesucrist. Laaman gusaaladx l jt xhienaag naban guial rliladxan Jesucrist, din zi'c naban naj ni cusidan b n rliladx ree Jesucrist gra lod ran. <sup>18</sup> Yu' ree xcompniaridi naladx guial ad zitixlotran l jt abi' rlies xvalor reeman guial naban reeman zagdxe. <sup>19</sup> Per Dios gunee permis din diob guitixlon l jt dxel gagbeen wali reeman ya naban reeman zi'c rniee reeman o rnieez reeman. <sup>20</sup> Din guial guiban zi'c rniabee Dios ad najtan diidzxi, rayal g n bejn zi'c rniabee Dios con xguialrniabeeman. <sup>21</sup> Yan,  conin r ndi g nan chi guitixlon l jt, gadil 'n l jt ya o gui nan l jt ganen 'n l jt diidzxa'c?

## 5

*Xhienaag gac con bèn rüjn tijb dol*

<sup>1</sup> Ma bacagdiagan guial tijb lëjt bèn rliladx ree Jesucrist nabannë xnarojpidi zi'c lacheelidi, ni'quiza ree bèn ad nünbeet Dios ad rüjnt lasa' dol guin. <sup>2</sup> Abi' lëjt rüjndi benro', luar rüjndi benro' gol guyunaya gol babëë tëë bèn guin lojdi. <sup>3</sup> Majsì ad za'tan con lëjt, per rünan xgab por lëjt zi'cgajc rulüü za'n con lëjt, abi' ma bënchaawan xgab xhie rayal bèn rüjn dol guin. <sup>4</sup> Zi'c guialrniabee ni banee Jesucrist naj, naj rni lëjt: "Gol bachajg lasa'di." Dxel gol gunaladx guial za'n con lëjt abi' por xguialrniabee Dad Jesucrist, <sup>5</sup> gol been bèn guin tibläd, gol basa'nman loj xinxab din gagnaaman o sagdiajman por ni cayüjnman din gacaman perdon dxej ni gui't dux Dad ree Jesucrist.

<sup>6</sup> Ad nixtan guial rlies xvalorgajquidi abi' rtiëjbidi rajc lasa' ree dol guin. Gol gogbee guial zi'c rüjn levadur cob par guiadxtil ziangajc con tijb bèn güün dol ma zë gajcan zian con gra ree lasa'di. <sup>7</sup> Zeel gol been nagueijn din gaquidi naya zi'c cob harin ni ad yu't levadur guijc. Din zi'c bagüjt ree bejn tijb xiil lanij pascw din yaya xtol reeman, ziangajc dunuj ree por xguialgüjt Jesucrist ma naya ree loj Dios. <sup>8</sup> Abi' guial yabaa ree por zian naj guial yabajn ree guidib du luxdoo ree zi'c rayal, zi'c guiadxtil ni ad no'cht levadur, luar yabajn ree con ree ni mal në ree dol zi'c babajn ree yaløj.

<sup>9</sup> Abi' zi'c ma rnin lojdi loj stijb gui'ch ni ma guxhalan lojdi, ad guchajquidi bèn naban ree nadxuudx. <sup>10</sup> Ad canenë'tan lëjt zian por ree bèn ad rliladxt Dios, bèn naban ree nadxuudx o rzëëbladx reeman ni ruguiaa'tzi reeman o naj reeman gubaan o rën reeman ni ren luar guiën reeman Dios, din bal zianan dxel ryaadx yariidi loj guidxliuj guie. <sup>11</sup> Bèn ni canin lëjt naj ree bèn ni rëb naj ree xcompniaridi, bèn rliladx ree Jesucrist abi' naban reeman nadxuudx, o rzëëbladx reeman ni ruguiaatzì reeman, o rën reeman ni ren ree luar guiën reeman Dios, o rbëë reeman xtiidx bejn, o naj reeman bengü', o bëngubaan. Xcompniaridi bèn naban ree zian ni'quid rayalt gawnëdi laa reeman. <sup>12-13</sup> Ad da cwenttan naj ganen por ree bèn ni ad najt dux compniar ree loj ni raliduladx ree Jesucrist bal rajp reeman dol o ad rajpt reeman dol, Dios naj bèn güün guialguxtis con laa reeman, per dux cwent ree naj guial yazuxnejz ree bèn naj ree dux compniar ree bèn rliladx ree Jesucrist. Zeel gol babëë bèn cayüjn dol entr lojdi.

## 6

*Chi yu' wadij entr ree bèn rliladx Jesucrist*

<sup>1</sup> Zi'c chi xhie rzajcnë tijb xcompniaridi bèn rliladx Jesucrist, ¿chexc zeel rëjdi loj guxtis din yabëëxnejzaman ni rzajquidi luar chedi loj ree xcompniaridi bèn rliladx ree Jesucrist? <sup>2</sup> ¿Id rliladxidi ya guial yu' dxej bèn rliladx ree Jesucrist laa reeman naj bèn güün xguialguxtis loj ree bënguidxliuj? Abi' bal yu' dxej güün xguialguxtis reeman loj bënguidxliuj, ¿chexquiza zeel ni ad nawëëgt ni rzajc ree xcompniaridi ad rajct rabëëxnejzidi? <sup>3</sup> ¿Id ragbeedi ya guial xt loj ree xianjl Dios yu' dxej yaya'p ree guialrniabee? ¿Abi' xt mazri zile' yalëëxnejz ree ni cayza'c ree loj guidxliuj guie! <sup>4</sup> Zeel zi'c chi xhie rzajcnë lasa'di, ¿chexc zeel zëdi loj ree bèn ad najt xbejn Cristo din yabëëxnejz reeman ni rzajquidi? <sup>5</sup> Canin lëjt ni guin ree din yatu lojdi. ¿Wen nid yu'czi tijb lëjt zajc yabëëxnejz ni rzajc lasa'di ya? <sup>6</sup> Per lëjt luar güündi zian aal rudëed lasa'di loj ree bèn ni ad rliladxt Dios.

<sup>7</sup> Abi' natun guial gudëed xcompniaridi loj guxtis guial cadilidi, mejorli gol gudaan ni rüjnnë reeman lëjt. Mejorli tiëbidi cuan reeman xieendi. <sup>8</sup> Per luar güündi zian, lëjtli cayüjn ree ni mal guin con ree xcompniaridi bèn rliladx ree Jesucrist. Rtiä'di xieen reeman abi' rüjnnëdi laa reeman ni ad rayalt güünnëdi laa reeman.

<sup>9</sup> ¿Id ragbeedi ya guial bèn naj ree benmal ad zut reeman loj xguialrniabee Dios? Gol gogbee guial loj xguialrniabee Dios ad zut ree bèn ni naban ree nadxuudx, në ree bèn

rèn ree ni ad najt ree Dios, nè ree bèn za'nè bèn ad najt lacheel reeman, nè ree xinguaaw rüjn zi'c béngunaa nè ree xin rën lasa' xinguaaw zi'c béngunaa. <sup>10</sup> Nè ree béngubaan, nè ree bèn rzëëbladx ni ruguiaatzu reeman, nè ree bengui' con ree bèn rnieeguijdx bejn, nè ree bèn raguiil xhienaag chiquied reeman xieen bejn, ad zut reeman loj xguialrniabee Dios. <sup>11</sup> Yu'di gubajn zian guia'xchej, per yan ma nayadi delant loj Dios, ma najdi par Dios, abi' ma nayabidi zi'c tijb bèn ni ad wayüjnt dol por xguialrniabee Dad Jesucrist nè por xSprijt Dios bèn ma nabannëdi.

### *Dux cuerp ree naj par Dios*

<sup>12</sup> Walican zajc yaguieen ree zi'ctzi rayën ree, per ad gratan naj zagdx par güün bejn. Zajc güünan zi'ctzi rënan, per ad zatiëëbtan xhie nabee naj. <sup>13</sup> Yu' ree bejn rëb: "Guialraw naj par lën bejn, abi' lën bejn naj par guialraw." Walican, per gunidloj Dios grop ree ni guin. Per ad walitan guial xcuerp bejn naj par güünman ni dxuudx ree con bèn ad najt lacheelaman. Din dux cuerp ree naj par Dios, abi' laaman rniabee dux cuerp ree. <sup>14</sup> Dxel zi'c basban Dios dux Dad ree Jesucrist, ziangajc yasbanman dunuj ree por xguialrniabeeman.

<sup>15</sup> Gol gogbee guial ma najdi tijbzi con Cristo, guial dux cuerp ree ma naj tiblia' xcuerpaman. ¿Wen yaca' ree xcuerp Cristo ya ni cayguie'ch ree naj dux cuerp ree par yunë' ree tijb béngunaa dxuudx? ¿Ad rayalt gac zian! <sup>16</sup> ¿Nid ragbeedi ya guial chi runë bejn tijb bèn ni ad najt lacheelaman, dxel ma najman tijbzi con bendxuudx guin? Lëjt ragbee guial loj xtiidx Dios rëb: "Grop reeman ma naj tijbzi." <sup>17</sup> Per bèn ni ma naj tijbzi con dux Dad ree Jesucrist, najman tijbzi con laaman por xSprijt Dios.

<sup>18</sup> Gol gojpp da't cudad ad güündi ni dxuudx ree con bèn ad najt lacheelidi. Xhietëëz dol ren ad ruxhiintan xcuerp bejn zi'c rxin xcuerpaman chi rüjnman ni dxuudx con bèn ad najt lacheelaman. <sup>19</sup> Din gol gogbee guial lëjt naj xyadoo xSprijt Dios bèn ma baneeman lojdi, dxel zian zi'c ma nabandi con xSprijt Dios ad rniabeetri lëjt gajc. <sup>20</sup> Din par zian gudijx Jesucrist por dunuj ree chi gütaman loj crüjz. Zeel gol beennë xcuerpidi dxiin par güündi Dios bèn zojbloj, din laaman naj bèn rniabee lëjt.

## 7

### *Consejw xcwent guialruxhliaa*

<sup>1</sup> Yan, yadxi'n diidx xcwent ni gunabdiidxidi naj loj gui'ch ni guxhaalidi lon. Naj rni zagdx naj guial ad zuxhliaat bejn. <sup>2</sup> Per chitëë güün bejn dol con stijb bejn, zagdxen guial tijb gaj xinguaaw chu' lacheel o tijb gaj béngunaa chu' lacheel, <sup>3</sup> din gudëë xinguaaw guin gust lacheelix abi' béngunaa guin gudëëzaman gust lacheelaman. <sup>4</sup> Din chi ma baxhliaa tijb béngunaa ad laatraman rniabee xcuerp, xinguaaw guin naj xin rniabee laan. Ziangajc chi ma baxhliaa xinguaaw, ad rniabeetri xcuerpax, béngunaa guin ma rniabee laan. <sup>5</sup> Zeel xinguaaw nè béngunaa ad rayalt gudxoon xcuerpidi loj lacheelidi. Per bal ma bedi diidx con lacheelidi guial ad zugaalt lasa'di tio'p choon dxej din cwedx guiniabidi Dios, zagdxen. Per chi ma gudëd ree dxej guin, gol bachajg lasa'di stijb chitëë güün xindxab lëjt gan con ree xixgabidi.

<sup>6</sup> Ad canitan lojdi guial najczi guxhliaa bejn, per ad ni maltan guial guxhliaadi. <sup>7</sup> Da xgaben naj guial xi nix gra ree bejn gac zi'c naj, per tijb gaj bejn ma bazaladx Dios xquiarguejnman guial xhienaag guibanman, bal guxhliaaman o bal id zuxhliaaman.

<sup>8</sup> Par ree bèn xtijb nè par ree béngunaa bizëjb, naj rni guial zagdxeli yaya'n reeman zi'c naj. <sup>9</sup> Per bal id zadaan reeman guial ad zuxhliaat reeman, dxel zagdxeli guxhliaa reeman luar gudëd xcuerp reeman casti guial taan reeman.

<sup>10</sup> Guiáad ree bèn ma baxhliaa, ad da diidxtanan ganin lojdi, xtiidx dux Dad ree Jesucristan guial ad zaro'nt béngunaa lacheelaman. <sup>11</sup> Per bal tio'n lacheelaman ad rayalt



guxhliaanëman xin ren, zagdxeli naj yachajg lasa' reeman stijb. Ziangajc xinguaaaw ad najt yala' lacheelix.

<sup>12</sup> Yan, ni ganin ad ni guneeet dux Dad ree Jesucristan, per naj rni lojdi: Bal yu' xinguaaaw rliladx Jesucrist abi' lacheelix ad rliladxt, abi' bal par béngunaa guin achet güünan, dxel ad najt yala' lasa' reex. <sup>13</sup> Ziangajc bal rliladx béngunaa guin abi' lacheelaman ad rliladxt, abi' bal par xinguaaaw guin achet güünan, dxel ziangajc ad rayalt yala' reeman. <sup>14</sup> Din xinguaaaw ni ad rliladxt Jesucrist, züjnle' Dios laax guial rliladx lacheelix. Guiáad béngunaa ni ad rliladxt Jesucrist züjnle' Dios laaman guial rliladx lacheelaman, zian güünle' Dios xi'n reex. Din bal id naj zian, ad nayabt xi'n reex loj Dios zi'c tijb bén ni ad wayüjnt dol. <sup>15</sup> Per bal xinguaaaw o béngunaa ni ad rliladxt Jesucrist rënman yala' lacheelaman guial rliladx lacheelaman Jesucrist, yala'ri reeman. Bén rliladx ad zajct güünman naguiejn guibannë lacheelaman laaman din ad gurejdx Dios dunuj ree par yabajn ree con wadijl. <sup>16</sup> Din béngunaa guin ad ragbeetaman bal güünman gan chililadx lacheelaman, o bal xinguaaaw guin ma rliladx dxel ni'qui laax ad ragbeet bal güünx gan chililadx lacheelix.

<sup>17</sup> Naj rni guial tijbgaj ree bén ni ma rliladx Jesucrist rayal guiban reeman loj guidxliuj guie zi'c ma bacaabee Dios laa reeman, yaya'n reeman zi'ctzi naj reeman chi guzuloj rliladx reeman Jesucrist. Zianan naj ni cayën loj ree dux compniar ree bén rliladx ree Jesucrist güün reeman. <sup>18</sup> Bal tijb bejn chi guzuloj rliladxaman Jesucrist mal yu'man sen ni ru ree bén Israel, yaya'nraman zian. O bal id yu'man sen guin chi guzuloj bililadxaman Jesucrist, ad najt chu'man sen guin. <sup>19</sup> Din achet güünan bal yu' bejn sen guin o ad yu'taman sen guin, ni mazri lasajc naj guial güünman zi'c rniabee Dios. <sup>20</sup> Zeel gol baya'n zi'c najdi chi guzuloj bililadxidi Jesucrist. <sup>21</sup> Bal najl zi'c bén nado' chi guzuloj bililadxil laaman, ad najtan ni chu'l xgab xhienaag güünl. Per bal zile' ad zajc tril zi'c bén nado', mazri zagdxë barii loj ni najl zi'c bén nado' guin. <sup>22</sup> Bén ni naj zi'c bén nado' chi guzuloj bililadxaman Cristo ma najman zi'cgajc bén ni ad najt zi'c bén nado' par güünman sirv loj Cristo. Abi' bén ni ad najt zi'c bén nado' chi guzuloj bililadxaman Cristo, dxel Cristo ma rniabee laaman. <sup>23</sup> Lëjt ragbee guial ma gudijx Jesucrist zro' por lëjt, yan ma najdi par Dios. Ad rayalt tiëbidi nabee ree bénguidxliuj lëjt con ree ni rusquiee. <sup>24</sup> Zeel rnin lojdi compniar raliduladx ree Jesucrist, gol baya'n zi'c najdi chi guzuloj bililadxidi Jesucrist.

<sup>25</sup> Yan lëjt bén ad waxhliaat ree, dux Dad ree Jesucrist achet rëbaman por zian. Per naj zajc gunen lëjt consejw xhienaag güündi, abi' da xgaban naj guial zaliladxidi ni ganin lojdi din guial raya Dios naj bacaabeeman naj cayünan mandad ni cayünan. <sup>26</sup> Zeel naladxan guial zi'c naj tarbajw ni caydüüd ree yan, zagdxeli naj guial ad zuxhliaatidi. <sup>27</sup> Bén ni ma baxhliaa ad najt gusa'n lacheelaman. Guiáad bén ni ad waxhliaat ad rayalt güünman naguiejn guxhliaaman. <sup>28</sup> Per bal rüjnl xgab guxhliaal, ad dolt naj guxhliaal. Ziangajc ree biinxdüb ni rën guxhliaa, ad dolt naj guxhliaa reem. Per rugojnan lëjt guial zienloj naj ni rzajc bén ruxhliaa, abi' laan ad rëntan saquidi.

<sup>29</sup> Ni rënan gagbeedi naj guial ma caydop ree dxex ni zio'p ree loj guidxliuj guie par yaguieen ree xmandad Dios. Zeel bén ni ma baxhliaa ree gol been sirv Dios xt lod guneeetzan lëjt zi'cgajc ree bén ni ad waxhliaat. <sup>30</sup> Ni'qui guialrabaa, ni'qui guialrunaya, ni'qui guial rajp bejn xhienin loj guidxliuj guie achet zajc gudxoon guial güün bejn xmandad Dios. <sup>31</sup> Bén ni ad ryaadxt ree xhienin loj guidxliuj guie, gol gunaladx guial achet rajpidi, din gra ni yu' loj guidxliuj guie najn ni rdëd.

<sup>32</sup> Ni rënan naj guial ad zutidi xgab por ree ni yu' loj guidxliuj guie. Tijb xinguaaaw xtijb mazri rüjnx xgab por xmandad Dios, mazri rüjnx naguiejn güünx zi'c ruladx Dios. <sup>33</sup> Per tijb xinguaaaw ni ma baxhliaa mazri rüjnx xgab por ree ni yu' loj guidxliuj guie, par laax mazri rüjn naguiejn yabaanë lacheelix laax. <sup>34</sup> Dxel tio'p ma naj xixgabix, por Cristo në por xbéngunaax. Ziangajc tijb béngunaa ni ad waxhliaat mazri rüjnman xgab por

ree xmandad Dios guidiblagaa rüjnman sirv loj Dios par güünman zi'c ruladxaman. Per tijb béngunaa ni ma baxhliaa mazri rüjnman xgab por ree ni yu' loj guidxliuj guie, mazri rüjnman naguiejn yabaanë lacheelaman laaman.

<sup>35</sup> Gra ni canin lojdi, canin laan par günan læjt yudar ad par gudxontan guxhliaadi, caninan din guibandi zi'c rayal xnejz dxel gol been gol gubajn tää zi'c rën dux Dad ree Jesucrist sin guial gudxoon xhienin læjt.

<sup>36</sup> Chutääz xinguaaaw rüjn xgab guxhliaanë biin rnieenëx abi' bal ma yu' biingunaa guin ijz par guxhliaam, güünri reex ni naladx reex naj zagdxe par laa reex. Bal guxhliaa reex, guxhliari reex. Ad doltan guial guxhliaa bejn. <sup>37</sup> Ziangajc chutääz bèn ni ad rüjnt xgab guxhliaa, ad rayalt güünman xgab guial rüjn naguiejn guxhliaaman bal ma beenman xgab zagdxe guial ad zuxhliaataman. Din zagdxe gajcan bal id zuxhliaa bejn. <sup>38</sup> Zeel rnin lojdi zagdxen guial chu guxhliaa, per mazri zagdxe bal id zuxhliaa bejn.

<sup>39</sup> Tijb béngunaa chi ma baxhliaaman, ad rayalt sunëman xinguaaaw ren chi nabannë lacheelaman. Per bal guiët lacheelaman ma zajc tia' xin ren laaman per con tijb ree xcompniaraman xin rliladx Jesucrist. <sup>40</sup> Per naladxan guial mazri zagdxe guibanman bal id zuxhliaaman stijb. Zian rünan xgab guial nabannë'n xSprijt Dios zi'cgajc læjt.

## 8

### *Guialraw ni rbe'c ree bejn loj ni naladx reeman naj Dios*

<sup>1</sup> Yan, ganin lojdi xcwent ree guialraw ni rbe'c ree bejn loj ree ni naladx reeman naj Dios. Dunuj ree rayagbee guial dugra ree rayignia' xhienaag yaguieen ree por ree ni guin, per yu' dxej por guialrignia' rlies bejn xvalor gajcaman. Per guialrën lasa' bejn lasajc mazri din por guial rën lasa' bejn zile' yaguieen yudar du lasa' ree din yasnuu yayignia' ree xhienaag rayal yabajn ree. <sup>2</sup> Bal yu' bèn naladx guial ma bayaaløj rignia'man gra, cusquiee laagajcaman din ryaadx da'tri chignia'man. <sup>3</sup> Per bèn ni rën Dios, Dios nünbee laaman.

<sup>4</sup> Yan por guial raw bejn guialraw ni ma gule'c reeman loj ree ni naladx reeman naj Dios, dunuj ree rayagbee guial achet guialrniabee rajp ree dios guin loj guidxliuj guie, din tijbzi Dios yu'. <sup>5</sup> Majsi yu' ree bejn naladx guial yu' zien ree dios bèn rniabee xanyabaa në loj guidxliuj, <sup>6</sup> per dunuj ree rayagbee guial tijbzi dux Dad ree Dios yu' abi' por laaman yu' gra ni yu' por laa tääman nadxu' ree loj guidxliuj guie. Tijbzi Jesucrist naj Dad par dunuj ree abi' por laaman yu' gra por laaman tää raya'p ree guialnaban.

<sup>7</sup> Per ad grat ree bejn rüjn xgab zian. Din yu' ree bèn ni guyën graløj ni naladx reeman naj Dios, abi' yan guial qui bililadxri reeman Jesucrist naladx reeman guial dolan gaw tijb bejn guialraw ni ma gurej loj ree dios guin. <sup>8</sup> Dunuj ree rayagbee guial ad ni rawt bejn rüjn guiban bejn mazri zagdxe loj Dios, lasa'gajcanan bal yadaaw ree o ad zadaawt ree lasa' ree guialraw guin. <sup>9</sup> Per majsi læjt ragbee guial zajc gawidi xhietääznin, rayal gapidi cudad ad güündi guial ree bèn qui rliladxri Jesucrist güün reeman dol. <sup>10</sup> Din bal lüj guial achet naladxil rawil xhietääznin, zojbil cayawil guialraw ni ma gurej loj ree ni ad najt dios. Dxel guguaa tijb ree bèn qui rliladxri Jesucrist lüj abi' nëgajcaman sëëbladx gaw guialraw guin majsi lën luxdooman naladxaman guial ad zagdxet naj ni cayüjnman. <sup>11</sup> Dxel por xguialrajquil cayüjnl guial güünman dol guial ad nixt yu' luxdooman cayawaman ni guin ree, per badxe'guijc guial në por laaman güjt Jesucrist loj crüjz. <sup>12</sup> Zeel bal rüjnl tijb ni naj ni mal par ree bèn qui rliladxri ree Jesucrist abi' rüjn reeman dol por lüj, dolan cayüjnl delant loj Cristo. <sup>13</sup> Bal por tijb ni rawan rüjn ree da compniaran dol, mejorli ad zawtran laan chitää güünman dol por naj.

## 9

### *Ni zajc güün tijb apóstol*

<sup>1</sup> Lëjt ragbee guial zajc gūnan ni rēnan por guialrniabee ni ra'pan guial najn apóstol. Ma baguiaan dux Dad ree Jesucrist abi' lëjt naj ree bèn ni ma benan gan par laaman guial ma bililadxidi laaman. <sup>2</sup> Bal yu' ree bèn ni ad nūnbeet naj zi'c apóstol, per lëjt ragbee guial apóstol najn. Din zi'c ma rililadxidi Jesucrist dxel ma rguien guial diidxli najn apóstol.

<sup>3</sup> Abi' par ree bèn ad rililadxt guial najn apóstol, ze naj ni rēn loj reeman: <sup>4</sup> Ra'pan derejch gunee reeman ni gawan nē ni guiē'n. <sup>5</sup> Abi' zajc tēē guxhlian con tijb bēngunaa naj dulasa' raliduladx ree Jesucrist din chinē'n laaman bantēēz guin gan, zi'c rūjn los demazri ree apóstoles con ree bijch Dad Jesucrist nē Bēd. <sup>6</sup> ¿O najzi con Bernabé bayal yaguieenan xmandad Dios dux cwentan ya? <sup>7</sup> Per ni'qui tijb suldad ad rejt loj wadijl xcwentaman, yu'czi bèn rguijx xgaxtaman. Ziangajc bèn rxūbin uv, ¿wen id zajc gawaman laan ya? Laadx bèn ni rajp vag ree, ¿wen id zajc guiē'man xlejch reeb ya? <sup>8</sup> Abi' ad xixgabtzi bēnguidxliujn canin lojdi, nē loj ley ni badēē Dios loj Moisejs rēb zian. <sup>9</sup> Din loj ley guin rēb: “Ad gudxe'di guijxh ro' ree be gui'xh la'tgaj cayūjn reeb dxiin.” Ad rēbt Dios zian guialzi yu'man laa reeb xgab, <sup>10</sup> rēbaman zian por dunuj ree. Din zi'c bèn rlia' yuj zi'c bèn rusia trigo, grop reeman yu'guijc guial yu' ni yaca' reeman. <sup>11</sup> Yan ma balūn lëjt xhienaag chinalidi xnejz Dios, ¿wen zro' da't yanaaban lojdi ya bal gūūndi dunujn yudar din gusnuu dux guialnabanan? <sup>12</sup> Bal stijb ree bèn ni rusiid lëjt rila' rtia' reeman ni rayal gudēēdidi loj reeman, dxel ziangajc dunujn raya'pan mazri derejch gūūndi dunujn yudar.

Per majsi zian dunujn achet wanaaban lojdi zi'c naj derejch ni raya'pan, caydaanzan ni raza'can chitēē xhie cwib guijc guial ad zucaagdiajgtri ree bejn xtiidxza'c Jesucrist. <sup>13</sup> Lëjt ragbee guial gra ree bixhioz ni rūjn sirv lēn xyadoo Dios, rtia' reeman tibda'n ni rinē ree bèn Israel loj Dios persi rila' rbajn reeman. Ziangajc gra ree bixhioz ni rūjn ree sirv lule' yadoo guin lod rinē ree bejn be ree par Dios, nē reeman rtia' ta'n ni rinē ree bejn persi rila' rbajn reeman. <sup>14</sup> Yan laagajcan rēb dux Dad ree Jesucrist por ree bèn ni rulūū xtiidxza'caman, guial por ree bèn ni rulūū reeman rayal guiban reeman. <sup>15</sup> Per naj achet caca'n, ad caxhal tēētan gui'ch guie lojdi din guneedi xhienin. Din par naj zagdxeli naj guiētan luar chu' bèn chiquied guialrabaa guin luxdon guial cusidan bejn ree xtiidxza'c Jesucrist.

<sup>16</sup> Ad rayalt gales da valor gajcan guial cusidan bejn ree xtiidxza'c Jesucrist, din mandad guin naj ni bayalan. ¡Prob naj bal idan gusid bejn ree diidxza'c guin! <sup>17</sup> Zeel bal cayūnan mandad guin guial ruladxan gūnan laan, dxel yu' ni gaca'n. Per ni'qui bal id ruladxan gūnan mandad guin, laan bayal gūnan. <sup>18</sup> Abi' ni rūnan gan naj guialrabaa ni yu' luxdon majsi ad naxtan, majsi ad caca'tan ni rayal tia' bèn ni rulūū xtiidxza'c Jesucrist, per cusnuu culūn diidxza'c guin ree bejn ree.

<sup>19</sup> Abi' majsi ad yu't bèn rniabee naj por mandad guin, per laa naj guie par gra ree bejn din gac gūnan sirv xbejn Cristo. <sup>20</sup> Abi' chi za'n con ree bèn Israel, rūnan naguiejn persi yu'guijc reeman guial nayajcan bèn Israel din gūnan gan gac reeman xbejn Cristo. Chi za'n con ree bèn Israel bèn rūjn ree naguiejn chinal xley Moisejs dxel rūnan zi'c bèn zinal ley guin, din gūnan gan gac reeman xbejn Cristo, majsi ragbeen guial ad rniabeet ley guin naj. <sup>21</sup> Abi' chi za'n con ree bèn ad najt bèn Israel, bèn ad zinalt ree ley guin dxel majsi ragbeen guial Dios naj bèn rniabee naj guial nabanan zi'c rniabee Cristo, per rūnan naguiejn din guguaaa reeman naj zi'cgajc tijb lasa' reeman din gac gūnan gan gac reeman xbejn Cristo. <sup>22</sup> Chi za'n con ree bèn yu'nawēēg par gūūn reeman o gaw reeman xhienin, dxel rūnan naguiejn din su reeman zagdxē con naj din gūnan laa reeman yudar gac reeman xbejn Cristo. Bantēēz lod ran rūnan naguiejn din guguaaa reeman naj zi'cgajc tijb lasa' reeman, din gūnczan gan majsi ta'nzi reeman gūnan gan gap reeman perdon por Cristo.

<sup>23</sup> Gra ree ni guie cayūnan guial rēnan xtiidxza'c Jesucrist, din tiblojzi gūūnle' Dios naj con gra ree bèn rililadx diidxza'c guin ree.

<sup>24</sup> Lëjt ragbee guial chi yu' tijb carrer zien bejn ruxüün, per tijbzaman naj bén rtia' prem. Ziangajc lëjt gol been naguiejn tia'di ni gunee Dios. <sup>25</sup> Bén ni ruxüün ree rajp laagajc reeman cudad chitëe xhie gudxoon guxüün reeman. Rünj reeman zian din güün reeman gan, abi' ni rünj reeman gan naj tijbzi coron balag ni rigool cari. Per dunuj ree ni cayguieen ree naguiejn cayca' ree najn tijb prem ni ad yu't dxej nit. <sup>26</sup> Abi' ragbeechaawan xhienin cayünan, ad cayüntan zi'c tijb bén ni ruxüün sin guial gagbeen chexc, ad rüntan zi'c tijb bén ni rga'p sin guial gagbeeman ban ca'paman. <sup>27</sup> Zeel cusagdiaj naj gajc din gac ganabee naj gajc günan zi'c rayal günan, chitëe guial culün bejn ree xtiidxa'c Jesucrist achet yayalan delant loj Dios.

## 10

### *Guial rën ni ad najt ree Dios*

<sup>1</sup> Compniar raliduladx ree Jesucrist, gol basaaladx guial dux bengol gulal ree bén binal ree Moisejs, gra reeman guza xan zaj ni guxhaal Dios abi' gra reeman gudëd loj nijsdoo ni la nijsdoo xnia. <sup>2</sup> Zian biguien guial xbejn Moisejs naj reeman din gra reeman guzanë laaman xan zaj guin, abi' gudëd reeman con laaman loj nijsdoo guin. Zian gurobnijs reeman loj zaj guin në loj nijsdoo guin. <sup>3</sup> Gra tëe reeman gudaw guialraw ni bi't diizd xanyabaa. <sup>4</sup> Gra tëe reeman gu' nijs ni bazaladx Dios loj reeman, nijs brii lad tijb guiaj. Rën guiëban guial diizd nadxel mal naban Cristo con laa reeman lod zëtzi reeman. <sup>5</sup> Per zien reeman ad beent zi'c ruladx Dios, abi' güjt reeman niz loj yujbidx niz lod guza reeman.

<sup>6</sup> Gra nine gojc din yayagbee ree guial ad laat yaguieen ree lasa' ree ni mal ni been reeman. <sup>7</sup> Ad rayalt yayën ree ni rëb ree bejn naj ree Dios zi'c been zien ree dux bengol gulal ree, din rëb loj xtiidx Dios xcwent reeman: “Gurej reeman, gudaw reeman dxel bisu reeman been reeman ni dxuudx ree.” <sup>8</sup> Ad rayal tëet güün bejn ni dxuudx con bén ad najt lacheelaman, zi'c been zien ree dux bengol gulal ree abi' tijb dxej güjt gajlbichoon mil reeman. <sup>9</sup> Ad zaneeguijdx tëet ree Dios zi'c been zien ree bén guin, abi' gudaw bëel laa reeman persi güjt reeman. <sup>10</sup> Ad rayal tëet yaguie'ch ree guial ad cayüjnt Dios zi'c rayal, din zian been zien ree dux bengol gulal ree abi' guxhaal Dios tijb anjl bagüjt laa reeman.

<sup>11</sup> Gra ni guzac reeman cwan loj xtiidx Dios din yayagbee ree guial ad laat yaguieen ree zi'c been reeman, dunuj ree guial nabajn ree yan guial ma caydop dxej ni yadëed ree bejn cwent loj Dios. <sup>12</sup> Zeel bén ni naladx za'dxi'ch loj xnejz Dios, mejorli gapaman cudad chitëe güün dol laaman gan. <sup>13</sup> Gra ni cazajquidi ad najtan ni ad rzajct bejn, din Dios ad zaro'nladxtaman lëjt. Ad zuslaat Dios saquidi tijb ni ad zadaantidi, abi' laaman güün lëjt yudar din gagbeedi xhienaag laadi loj ni cayajc.

<sup>14</sup> Zeel compniar raliduladx ree Jesucrist, zi'c rënan lëjt rnin lojdi gapidi cudad ad goc guiëndi ni naladx ree bejn naj dios. <sup>15</sup> Naj ragbee guial najdi ganax bén rignia', zeel lëjt gajc gol been xgab bal zagdx naj ni canin lojdi. <sup>16</sup> Chi raguieen ree zi'c been dux Dad ree Jesucrist chi gudaw reeman guxhin bigra, dxel chi radü' ree vin ni ma gogle' rasaaduladx ree rejn ni ma guxhie'man chi gütaman por dux tol ree. Abi' chi radaaw ree guiadxtil zi'c beenman, laan naj tijb sen guial ma nayajc ree tijbzi con laaman. <sup>17</sup> Din majszi zien nayajc ree, per zi'c rlia' tijbzi guiadxtil par dugra ree, zian rguien guial ma nayajc ree tijbzi con Cristo.

<sup>18</sup> Lëjt ragbee xhienaag rünj ree bén Israel chi rinë reeman tijb gon par Dios, abi' zi'c raw reeman tibia' gon guin yu'guijc reeman guial ma naj reeman tijbzi con Dios. <sup>19</sup> Ad canitan lojdi por ree ni naladx ree bejn naj dios guial lasajc reen o guial lasajc guialraw ni gurej loj ree dios guin. <sup>20</sup> Din bén rünj ree zian ad lojt Diosan rbe'c reeman guialraw guin ree, loj xindxaban rbe'c reeman laa reen. Abi' ad rëntan gaquidi tijbzi con ree xindxab guin. <sup>21</sup> Ad zacjt güündi zian par guiguien guial ma najdi tijbzi con ree xindxab

guin, abi' gaw tēedi guiadxtil con vin din guiguien guial ma najdi tijbzi con Cristo. <sup>22</sup> ¿O rēndi ya yache'ch ree Dios? ¿Wen mazri raya'p ree gualrniabee guial lojman ya?

### *Xhie zajc güün ree xbejn Dios*

<sup>23</sup> Graczi zajc güün bejn, per ad gratan naj zagdxē guial güünman. Majsi gra zile' güün bejn, per ad gratan rüjn sirv par güün lasa'man yudar chinalaman xnejz Dios. <sup>24</sup> Din ad rayalt yaguieen ree xgab por dunujzi ree, rayal yaguieen ree xgab por ree dux compniar ree.

<sup>25</sup> Zi'c chi rziidi bēel lugua', ad guiniabdiidxidi bal ma gurejn loj xdios reeman, chitēē xhie guinialadxidi chi gawidi laan. <sup>26</sup> Din xieen dux Dad ree Dios naj guidxliuj con gra ni yu' lojn.

<sup>27</sup> Bal tijb bén ad waliladxt xtiidx Dios na lojdi guial chitawidi lidxaman, abi' bal rēndi chedi gol chej. Gol gudaw gra ni gunee reeman lojdi ad xhie guiniabdiidxidi chitēē xhie naladxidi. <sup>28</sup> Per bal yu' xcompniaridi na guial ni cunee bén guin cayawidi ma gurejn loj xdiosaman, ad gawidi laan por bén bagojn lējt chitēē güünman xgab mal guial ad laat cayüjndi, majsi lējt ragbee guial xieen dux Dad ree Dios naj guidxliuj nē ni yu' loj guidxliuj guin. <sup>29</sup> Ad canitan lējt xcwent guial xhie naladxidi, ni canin lējt naj por ree xgab ni zajc güün stijb xcompniaridi por lējt.

Per wed yu'di rüjn xgab: “Per, ¿chexc zeel ad züntan gra ni ragbeen ad najt ni mal por xixgabzi stijb bejn? <sup>30</sup> Wed rēb tēedi: Naj ragbee guial rudēn quixtēē loj Dios por gra ni rawan, ¿chexquiza zeel güün reeman xgab mal por naj?” <sup>31</sup> Per naj rni lojdi gra ree ni guin rayal gudxe'guijquidi din zi'c ni rawidi zi'c ni rē'di nē gra ree ni rüjndi rayal güündi laan par güündi Dios bén zøjbloj. <sup>32</sup> Gol gojp cudad xhienaag nabandi din zi'c ree bén Israel zi'c ree bén ni ad najt bén Israel con ree xcompniaridi bén rililadx ree Jesucrist ad züjnt reeman xgab mal por lējt. <sup>33</sup> Din zian rünan, rünan naguiejn chitēē xhie naladx bejn con naj. Ad rüntan ni rüjnzi naj yudar, rünan naguiejn din günan ni rüjn yudar zien ree bejn din gac gap reeman perdon loj Dios.

## 11

<sup>1</sup> Zeel gol binal zi'c rünan, zi'c zinaalan zi'c been Cristo.

### *Xhie rayal güün ree bejn chi rbejdx rniab reeman Dios*

<sup>2</sup> Naj dád rabaanē'n lējt guial rusaaladxidi naj, guial yu'guijquidi rüjn tēedi zi'c balün lējt. <sup>3</sup> Rēn tēen gusaaladxidi guial Dios rniabee Cristo abi' Cristo rniabee xinguaaw abi' xinguaaw rniabee béngunaa. <sup>4</sup> Tijb xinguaaw chi rgu' xhienin guijqix par cwedx guiniabix Dios o gulüüx xtiidx Dios, natu naj ni cayüjnx. <sup>5</sup> Ziangajc chutēēz béngunaa cabejdx canab Dios o culüüman bejn ree xtiidx Dios, abi' achet xoob guijsaman, natu gajc naj ni rüjnman. Güünman cwent guial najman zi'c tijb béngunaa ni biaj guijs xt garej. <sup>6</sup> Zeel bal tijb béngunaa ad rēntaman guixhioob xhienin guijsaman, gugajli guijsaman. Per bal ragbeeman, guial natun guijsaman xt garej, mejorli guixhioob xhienin guijsaman. <sup>7</sup> Per xinguaaw achet zajc chu' guijqix din Dios beenman laax zi'cgajczi laaman, zian rulüüx respejt ni rajpix Dios. Abi' béngunaa guial rxhioob xhienin guijsaman, zian rulüüman respejt ni rajpaman xinguaaw. <sup>8</sup> Din ad gojct xinguaaw con guxtil lad béngunaa, béngunaa guin gojc con guxtil lad xinguaaw. <sup>9</sup> Ad gojct xinguaaw par béngunaa, béngunaa guin gojc par xinguaaw. <sup>10</sup> Zeel béngunaa rayal guixhioob xhienin guijsaman din guiguien guial xinguaaw rniabee laaman zi'c rulüü ree anjl chu rniabee laa reeman. <sup>11</sup> Majsi delant loj Dios tiblojzi naj bejn, din bal id béngunaa niu achut xinguaaw niu, abi' bal id chu xinguaaw niu achut béngunaa niu. <sup>12</sup> Walican, guial con guxtil lad xinguaaw gojc béngunaa, per yan por béngunaa ri't xinguaaw loj guidxliuj, zeel zi'c xinguaaw con béngunaa por Dios yu' reeman loj guidxliuj.

<sup>13</sup> Naj rni lèjt, lèjt gajc gol been xgab bal zagdxen cwedx guiniab tijb béngunaa Dios abi' achet naxhoob guijcaman. <sup>14</sup> Bejn gajc ragbee guial natun bal id zugaj guijc xinguaaw. <sup>15</sup> Per par béngunaa mazri zagdxen rguienman bal guyool guidxguijcaman, din rajpaman laan par gusiaawan guijcaman. <sup>16</sup> Bal chu ad za't conform por ni canin lojdi, per naj rugojn lèjt guial achet stijb costumbr raya'p ree, zian naj dux costumbr ree con los demazri ree bèn rliladx xtiidx Dios.

### *Ruxhiin reeman zi'c basa'n Dad Jesucrist gac*

<sup>17</sup> Yan xcwent ni ma ganin lèjt, ad zile't ganin guial zagdxen naj ni cayüjndi din chi radxaag lasa'di par cwedx guiniabidi Dios, al ni ad rayalt güüнди рүjndi. <sup>18</sup> Yaløj rnin lojdi biguejnan guial chi radxaag lasa'di par cwedx guiniabidi Dios ad raya'ntidi diidx, abi' tiblax rliladxanan. <sup>19</sup> Din nawëg najn guial ad zajct zian, abi' zian rguien chu diidxli zinal xnejz Dios. <sup>20</sup> Per por zianzi, achetri sirv rüjn guial radxajg lasa'di par gawidi xche zi'c been dux Dad ree Jesucrist. <sup>21</sup> Din tijbgajdi rüjn naguiejn diob gawidi, ad rbëjzt xcompniaridi. Abi' la'tgaj yu' ree bejn rliaan, yu'di raw da't abi' xt rzüdxidi guial rë'di zi'ctzi rëndi. <sup>22</sup> ¿Id yu' lidxidi ya lod gawidi guië' tëedi zi'ctzi rëndi?, ¿o ad rëntidi xcompniaridi bèn rliladx ree xtiidx Dios ya, zeel rusa'nxtudi bënprob ree bèn achet rajp? Yan, ¿rëndi ya chu' luxdon zagdxen con lèjt por zian? ¿Per zian zi'c cayüjndi, ad zajct ganin lojdi guial zagdxen naj ni cayüjndi!

### *Ni bigra gudaw Jesucrist xche*

*(Mt. 26:26-29; Mr. 14:22-25; Lc. 22:14-20)*

<sup>23</sup> Abi' ni balün lèjt, basidan laan por dux Dad ree Jesucrist guial guxhin ni bayü reeman laaman chi bigra gudawaman xche, cwa'man tijb guiadxtil. <sup>24</sup> Abi' chi gulox badëeman quixtëe loj Dios dxel gula'man guiadxtil guin, rëb gajman: “Guiadxtil guie naj da cuerpan ni ma bayün par guiëtan por lèjt. Abi' chi güüнди zian, gol beenan guial gusaaladxidi naj.” <sup>25</sup> Ziangajc beennëman cojp ni yu' vin chi gulox gudaw reeman xche, dxel rëbaman: “Vin guie naj da rejnan ni gaxhie'n chi guiëtan par gaxhalan tijb nejz cüb guial xhienaag gac ree bejn perdon loj Dios. Abi' chi güüнди zian, gol been zian guial rusaaladxidi naj.” <sup>26</sup> Zeel, beegaj chi radxaag lasa'di par gawidi xche zi'c been dux Dad ree Jesucrist, chi rawidi guiadxtil rë' tëedi vin, zian rulüüdi guial güjtaman por lèjt, gol been zian xt chi gui'taman loj guidxliuj guie zatijb.

### *Xhienaag rayal gac xche*

<sup>27</sup> Yan bal yu' bèn raw guiadxtil rë' tëeman vin xche guin, abi' ad yu' guijctaman ni rën guiëb ni cayüjnman, dolan cayüjnman guial ad yu' guijctaman ni rën guiëb xcuerp në xrejndux Dad ree Jesucrist. <sup>28</sup> Zeel rayal güün bejn xgab xhienaag nabanman delant loj Dios dxel ma zajc gawaman guiadxtil guië' tëeman vin xche guin. <sup>29</sup> Din bèn raw guiadxtil guin con vin guin abi' ad yu' guijctaman ni rën guiëb xcuerp Jesucrist. Laagajcaman caguüil xcasti. <sup>30</sup> Din guial rüjn ree bejn zian zeel dád ziendi ragxuu, zien tëedi ad yu't gojl abi' zien reeman ma güjt. <sup>31</sup> Per bal yaløjxgaj yaguieen ree xgab xhienaag nabajn ree loj Dios dxel ma zajc yadaaw ree xche guin, achetri xcasti Dios yayal ree. <sup>32</sup> Per ziangajc bal yu' xcasti Dios ni yayal ree, laan naj par guzuxnejzaman dunuj ree chitëe yaguieen ree dol, chitëe yayal ree casti ni rayal ree bèn ad rliladxt xtiidxaman.

<sup>33</sup> Zeel compniar raliduladx ree Jesucrist, chi radxaag lasa'di par gawidi, gol gulëjz ree xcompniaridi din gawidi tijbzi. <sup>34</sup> Per bal yu'di ad zajct cwëz guial ma rliaandi, zagdxeli gaw lidxidi chitëe yayalidi xcasti Dios guial ad züjntidi zi'c rayal. Gra ni rayal ganin lojdi, chi guialan guidganan lèjt dxel yanee ree.

## 12

*Quiarguejn ni runee xSprijt Dios*

<sup>1</sup> Yan ganin lèjt, quiarguiejn ni runee Dios loj tijb gaj bejn por xyudar xSprijt Dios, din ad rëntan guibandí sin guial gagbeedi ni guin ree.

<sup>2</sup> Lèjt ragbee guial chi gadidi güünbee Dios dxel gogdxadi, bidxga'di ni na ree bejn lojdi naj ree dios abi'za ni'quid rnieet reen. <sup>3</sup> Zeel gol gogbee, chutëez bèn rnieeguijdx Jesucrist, rën guiëban guial ad nabannëtaman xSprijt Dios. Achu tëtë bejn zajc guiëb: “Jesucrist naj bèn rniabee naj!”, bal id nabanman con xSprijt Dios.

<sup>4</sup> Quiarguiejn rent quiarguiejn ren runee Dios dunuj ree, per Sprijt guin gajc naj bèn ragnë dugra ree. <sup>5</sup> Majsi ni rent ni ren naj xmandad Dios ni cayguieen ree, per laagajcaman naj bèn ni cayguieen ree sirv. <sup>6</sup> Abi' majsi garent garen cayüjn tijbgaj bejn, Dios gajc naj bèn ni cayüjn yudar tiblojzi. <sup>7</sup> Tijbgaj dunuj ree rulüü Dios ni rayal yaguieen ree con xyudar xSprijt Dios din yaguieen ree yudar dux compniar ree. <sup>8</sup> Din con xyudar xSprijt Dios yu' ree bèn ma ca' quiarguiejn par guinee reeman, yu' tëtë ree bèn ma ca' quiarguiejn par chignia' reeman diidxli xcwent Dios. <sup>9</sup> Abi' por xyudar xSprijt Dios yu' ree bèn ma cwa' guialrliladx ni guidiblagaa. Yu' tëtë ree bèn ma cwa' guialrniabee par yayüjn reeman bënragxuu ree. <sup>10</sup> Yu' tëtë ree bèn ma cwa' guialrniabee par güün reeman gadxagayaa ree milagr. Yu' ree bèn ma ca' quiarguiejn par gudëed reeman xtiidx Dios loj ree bejn. Yu' tëtë ree bèn ma cwa' ree quiarguiejn par gagbee reeman bal wali o ad walit ni canee bèn rëb guial caneeman xtiidx Dios. Yu' tëtë reeman ma ca' quiarguiejn par guinee reeman gadxagayaa ree diidx, abi' yu' reeman ma ca' quiarguiejn par yadëed reeman tijb diidx par stijb diidx. <sup>11</sup> Per por xyudar gajc xSprijt Dios rüjn bejn ni guin ree, laaman ma ragbee conin rudëeman güün tijb gaj bejn ni naladxaman naj zagdxe.

### *Tijbzi cuerp nayajc dugra ree*

<sup>12</sup> Din zi'c dux cuerp ree majsi zien la' najn, per tijbzi nayajc ree. Ziangajc dunuj ree guial raliduladx ree Jesucrist majsi zien nayajc ree per tijbzi nayajc ree con laaman. <sup>13</sup> Din dugra ree barobnijs por tijbzi xSprijt Dios par yayajc ree tijbzi con gra ree dux compniar ree majsi nayajc ree bèn Israel o ad nayajct ree bèn Israel, bal nayajc ree zi'c bèn nado' o ad nayajct ree zi'c bèn nado', per tijbzi ma nayajc ree din dugra ree tiblojzi nabajn ree con xSprijt Dios.

<sup>14</sup> Lèjt ragbee guial ad tibia'tzi naj xcuerp bejn, zien la' naj xcuerp bejn. <sup>15</sup> Yan bal guiëb guia' bejn: “Ad najtan tibia' xcuerp bejn din ad najtan yaa bejn.” Per ad por ziant ad najt guia' bejn tibia'man. <sup>16</sup> Ziangajc majsi guiëb guidiajg bejn: “Ad najtan tibia' xcuerp bejn din ad najtan guiaaløjman”, ad por ziant ad najtri guidiajgaman tibia' xcuerpaman. <sup>17</sup> Din bal guidib xcuerp bejn niajc guiaaløjman, ¿xhieza naag niguiejnman?, o bal guidib xcuerp bejn niajc guidiajgaman, ¿xhieza naag niuxi'man? <sup>18</sup> Per Dios ma ragbeeman banguin rayal guzoobaman tibia'gaj ni naj xcuerp bejn din gacaman zi'c rënman. <sup>19</sup> Din bal niajc xcuerp bejn tiblojzi, dxel ad najtran cuerp. <sup>20</sup> Per zi'c ma rnin lèjt majsi zien la' naj xcuerp tijb bejn per tijbzi naj guidiban.

<sup>21</sup> Ad zajct guiëb guiaaløj bejn loj yaaman: “Ad ryaadxtan lüj.” Ad zajct tëtë guiëb guijc bejn loj guia'man: “Ad ryaadxtan lèjt.” <sup>22</sup> Din luar lod rulüü ad rüjnza'ct sirv, laa reen naj ni mazri rüjn sirv. <sup>23</sup> Abi' ree luar lod ad rguient zagdxe, raguieen ree naguiejn din guiguien reen zagdxe. Guiáad ree luar naguie'ch, mazri raya'p ree cudad luar guin ree rata'cw reen din guiguien reen zagdxe. <sup>24</sup> Ad zro't radxu' ree xgab por ree luar ni rguien, mazri raya'p ree cudad luar naguie'ch ree zeel radojt ree xhienin din guiguien zagdxe dux cuerp ree. Zianan been Dios xcuerp bejn <sup>25</sup> din chitëe yaguieen ree xgab guial yu' lod ad rüjnt sirv, guidib dux cuerp ree rüjn yudar lasa'. <sup>26</sup> Chi rdoob tiblajt xcuerp bejn guidib xcuerp bejn rdoob, abi' bal nix yu' tiblajt xcuerp bejn guidib xcuerp bejn yu' nix.

<sup>27</sup> Yan ziangajc guial nayajc ree tijbzi con Cristo dugra ree nayajc ree zi'c tijbzi cuerp par laaman, tijb gaj dunuj ree nayajc ree tibia' cuerp guin. <sup>28</sup> Abi' entr gra dux compniar ree bèn rliladx Jesucrist. Dios yaløj bacaabeeman bèn naj ree xi apóstoles Jesús, ni

barojp bacaabeeman bèn gudëed ree xtiidxaman loj ree bejn, bayon bacaabeeman bèn gulüü ree xtiidxaman bejn ree, dxel bacaabeeman bèn gap ree guialrniabee par yayüjn reeman bènragxuu ree. Bacaabee tēeman bèn güün ree gadxagayaa milagr. Bacaabee tēeman bèn ni güün ree yudar bejn ree. Bacaabee tēeman bèn ni nabee ree loj ree bèn rililadx xtiidxaman abi' bacaabeeman bèn ni rniece ree zien ree diidx. <sup>29</sup> Ad grat ree bejn naj apóstoles ad gra tēet ree bejn zajc gudëed xtiidx Dios loj ree bejn, ad grat ree bejn zajc gulüü xtiidx Dios bejn ree. Ad grat ree bejn zajc güün milagr, <sup>30</sup> ad gra tēet ree bejn zajc yayüjn ree bènragxuu, abi' ad grat bejn zajc guinee zienloj diidx ad gra tēet bejn zajc yayüjn tijb diidx zatijb diidx. <sup>31</sup> Per gol been naguiejn din gunee Dios lējt quiarguiejn zagdx ree, abi' naj ganin lējt conin naj nejz mazri zagdx chinalidi.

## 13

### *Xcwent guial rēn bejn ree*

<sup>1</sup> Din bal rajc rnien zienloj diidx ni rniece bénguidxliuj nē xtiidx ree anjl yu' xanyabaa, per bal id rēnan bejn najzan zi'c tijb guiib rzijdx o zi'c tijb plati ni yu' cha'. <sup>2</sup> O bal nayalan nudēdan xtiidx Dios loj ree bejn, o nia'pan quiarguiejn par niagbeen gra ni zēed por Dios ni gad gagbee bejn, o nia'pan zienloj guialrignia' o nia'pan tijb guialrliladx Dios ni xt zile' guchan xliajt ree guia', per bal id rēnan bejn ree achet lasajcan. <sup>3</sup> Ziangajc majsi gagui'san gra ni ra'pan loj ree bèn ni ryaadx laan abi' yayü da cuerpan din che'can, per bal id rēnan bejn ree achet lasajc ni cayünan.

<sup>4</sup> Guial rēn lasa' naj gap pacens lasa' bejn, gac bejn benza'c con lasa'man, ad zadēdlojt lasa' bejn, ad züjnt bejn nabē, ad züjnt bejn benro' loj lasa'man. <sup>5</sup> Guial rēn lasa' naj gap respejt lasa' bejn, ad gac bejn naxhien, ad yalenyaman, ad chu'xyajn tēē lasa' bejn, <sup>6</sup> ad rayalt yabaa bejn por ni mal ni cayüjn bejn o ni cazajcaman, rayal yabaaman chi zē bejn xnejz. <sup>7</sup> Guial rēn lasa' naj güün bejn perdon lasa'man ni güünnētzi reeman laaman, abi' chililadx lasa'man, ad zadxag tēētaman cwēzaman ni cabēzaman, taan tēeman ni rüjnnētzi reeman laaman. <sup>8</sup> Guial rēn lasa' ad yu't dxej loxan, per guialrajc yu' dxej loxan, ad zu tēetri bèn ni rudēed ree xtiidx Dios loj ree bejn ni'qui ree bèn rniece zienloj diidx. <sup>9</sup> Din yan bal rayignia' ree, tibda'nzi naj ni rayignia' ree abi' bal radēed ree xtiidx Dios loj ree bejn, tibda'nzi rayagbee ree xcwentaman. <sup>10</sup> Per chi guidxin dxej yayignia' ree gran, dxel achetri lasajc ni rayagbee ree yan.

<sup>11</sup> Chi gocan xindoo gunen zi'c xindoo, benan xgab zi'c xindoo, go'pan xquiarguiejn xindoo. Per chi bidxin dxej gojcan bengol basa'nan gra guial xindoo tiblax. <sup>12</sup> Ziangajc yan ad rayignia't ree gra zi'cgajc chi ad rguient zagdx loj tijb guiaawajn, per chi guidxin dxej yadxin ree lod zojb Dios dxel yayignia' ree gra. Yan yu'zi ni rignia'n per chi guidxin dxej guidxinan lod zojb Dios dxel günbeen gra zi'c nünbeeman naj.

<sup>13</sup> Choon naj ree ni ad yu't dxej lox, guialrliladx Dios, guialrbēz ni gunee Dios, nē guial rēn Dios dunuj ree. Per loj guiyon ree ni guin mazri lasajc guial rēn Dios dunuj ree.

## 14

### *Guialrniece stijb diidx*

<sup>1</sup> Gol been naguiejn gol guyēn ree bejn, gol gurejdx gunab tēē Dios din gunee man xquiarguiejndi din güündi xmandadaman, per mazri rüjn naguiejn gapidi quiarguiejn par gudëedi xtiidx Dios loj ree bejn. <sup>2</sup> Bèn rniece tijb diidx ni ad rignia't gra bejn, güünman cwent guial achut caneenēman. Tijbzi Dios caneenēman guial achut rignia' xtiidxaman, tijbzi laaman ragbee ni canee man per bejn ree ad ragbeet reeman ni rēn guiēb ni canee man. <sup>3</sup> Per tijb bèn rulüü xtiidx Dios bejn ree cayüjnman yudar xhienaag chinal bejn xtiidx Dios, cudēedaman consejw loj ree bejn ragu' tēeman luxdoo reeman. <sup>4</sup> Abi' bèn rniece tijb diidx ni ad rignia't gra ree bejn, par tijbzi laaman naj ni canee man, per



bèn rniee xtiidx Dios cayünman yudar gra ree xbejn Dios din gusnuu chinal reeman xnejzaman.

<sup>5</sup> Bal zianclaa gradi niajc niniee zienloj ree diidx, per mejorlan bal zajc gulüüdi bejn ree xtiidx Dios. Din mazri lasajc guial guiniee bejn xtiidx Dios guial loj guial guinieeman zienloj ree diidx, o bajtëe bal zile' guiëbaman loj ree bejn xhie rën guiëb ni rnieeman din güün sirv ni rnieeman gra ree bejn. <sup>6</sup> Din zi'c naj bal guitixlon lëjt compniar raliduladx ree Jesucrist, abi' ganen lojdi tijb diidx ni ad zignia'tidi, ¿xhieza sirv güünan lëjt bal id canin lojdi zagdxe ni balüü Dios naj o ni ragbeen o bal id canen xtiidx Dios lojdi zagdxe o xhietëez zatijb ni rayal gusiididi?

<sup>7</sup> Zi'c tijb ni rucwejdx reeman, zi'c tijb bidxa o tijb arp bal id zucwejdx bejn laan zagdxe ad zignia't ree bejn xhienin cucwejdxaman. <sup>8</sup> Ziangajc bal id zucwejdx reeman zagdxe trompejt loj wadijl, ¿xhieza naag chignia' reeman guial ma rayal suchaaw reeman par til reeman con ree bèn rayal tilnë reeman? <sup>9</sup> Yan ziangajc bal guinieenëdi bejn ree con tijb diidx ni ad rignia't reeman, ¿xhieza naag chignia' reeman ni rëbidi! Xlia'zi caneedi achut rignia' ni rnieedi. <sup>10</sup> Lëjt ragbee guial zienloj diidx yu' loj guidxliuj guie, per graczan yu' ni rëban par bèn rignia' laan. <sup>11</sup> Per bal chu guinieenë naj con tijb diidx ni ad rignia'tan dxel benzit najman par naj abi' za naj benzit najn par laaman. <sup>12</sup> Zeel zi'c rëndi gapidi quiarguejn por xyudar xSprijt Dios par güündi xhietëez ni naj xchiin Dios, gol gunab loj Dios din yazaladxaman quiarguejn lojdi din gac güündi ni rünj sirv par gra ree xbejn Cristo.

<sup>13</sup> Zeel bèn ni rniee tijb diidx ni ad rignia't gra ree bejn, rayal guiniabaman loj Dios din gagnëman laaman din gac gusignia'man bejn ree ni rëbaman. <sup>14</sup> Din zi'c naj bal gabedx ganaaban Dios con tijb diidx ni ad rignia'tan dxel tijbzi da sprijtan ragbee ni canen, per naj ni'quid ragbeetan xhienin canen. <sup>15</sup> Zeel ni rayal günan naj, gabedx ganaaban loj Dios con da sprijtan abi' gagbeen xhie rën guiëb ni canen. Ziangajc chi rolan cant ree par Dios rayal gagbeen chignia' tëen xhie rën guiëb ni cayolan. <sup>16</sup> Din bal rnieel diidx zagdxe ree loj Dios con diidx ni ad rignia't ni'qui lüj. Dxel bèn za' con lüj, ad zajct guiëbaman “Amén” chi ma gulox badëedil quixtëe loj Dios guial ad rignia'taman ni rnieel. <sup>17</sup> Majsi nix da't badëedil quixtëe loj Dios, per achetczi yudar beenl bèn za' con lüj par gagbeeman xhienaag chinalaman xnejz Dios guial ad bignia'taman ni rëbil. <sup>18</sup> Quixtëe Dios naj mazri rajc zien loj diidx guial loj gradi. <sup>19</sup> Per majsi zian chi za'n lod rado'p ree dux compniar ree bèn rliladx ree Jesucrist par ganenë'n laa reeman, par naj mejorli naj ganenë'n laa reeman con gaay diidx per diidx ni chignia' reeman në ni güün laa reeman sirv din gulüü reeman ben ren ree luar ganenë'n laa reeman con chiimil diidx ni ad rignia't reeman.

<sup>20</sup> Compniar raliduladx ree Jesucrist, ad bal rünjridi xgab zi'c xindobëz. Gol gojc zi'c xindobëz per guial ad züjntidi ni mal, per par güündi xgab gol been xgab zi'c bengol. <sup>21</sup> Loj xtiidx Dios rëb: “Gaxhalan bèn rniee ree diidx ren, bèn ad najt ree bèn niz guie din guinieenë reeman bèn guie ree. Per ni'qui zian ad zuzoobt reeman da diidxan, rëb dux Dad ree Dios.” <sup>22</sup> Zeel guial rniee zienloj diidx, najn tijb sen par ree bèn ad rliladxt xtiidx Dios din chililadx reeman. Per guial rulüü bejn ree ni rën Dios gagbee reeman, laan naj ni güün sirv par ree bèn ma rliladx ad par bèn ad rliladxt. <sup>23</sup> Per ni'qui zian chi radxaag lasa'di par gucaagdiajgudi xtiidx Dios, abi' bal suløj guiniee tijb gajdi gadxagayaa diidx ni achut rignia' abi' chu' ree bèn qui bililadxri xtiidx Dios o bèn ad waliladxt ree xtiidxaman, ¿wen id zanaladx reeman ya guial guijquidi rajc? <sup>24</sup> Per bal chu' bèn qui bililadxri o bèn ad waliladxt abi' caneedi xtiidx Dios, dxel chi guiguiejnman ni caneedi, gagbeeman xhie dol cayün reeman, laagajcaman gagbee chu najman. <sup>25</sup> Zian gagbeeman xhienaag nabanman dxel guzuxibaman cwedx guiniabaman Dios, abi' guiëbaman guial diidxli za' Dios con lëjt.

*Gol been gra xnejz*

<sup>26</sup> Gra ni canin lojdi compniar raliduladx ree Jesucrist, caninan din gagbeedi guial chi rado'pidi par gucaagdiajguidi xtiidx Dios, gradi zajc güün ni chile' güündi, bèn ni gool cant par Dios, bèn ni gulüü ree bejn, bèn gugojn bejn ree conin balüü Dios lojman, bèn guinee diidx ren ni ad rignia't gra bejn nē bèn gudēēd xtiidxaman loj ree bejn. Per gra ni güündi güün sirv par güünan yudar los demazri ree xcompniaridi din gusnuu sudxi'ch reeman loj ni rliladx reeman xtiidx Dios. <sup>27</sup> Bal yu' bèn rniee tijb diidx ni ad rnieet gra bejn, tio'pzaman o choonzaman guinee diidx ni rajcaman, abi' tijb gaj tijb gaj reeman guinee, chu' tēē bèn ni guiēb loj ree bejn xhie rēn guiēb ni rēb reeman. <sup>28</sup> Per bal id yu' bèn zajc gugojn bejn ree xhienin rēb reeman con diidx ni rajc reeman, mejorli achet guiēb reeman delant loj ree bejn. Zagdxeli laazi reeman cwedx Dios lēn luxdoo reeman. <sup>29</sup> Abi' ree bèn gugojn delant loj gra ree bejn conin balüü Dios laa reeman, tio'pzi reeman o choon reeman guinee. Abi' los demazri reeman gucaagdiajg bal zagdxequi naj ni canee reeman. <sup>30</sup> Per bal tijb bèn zojb cucaagdiajg loj hor guin gulüü Dios laaman xhienin, rayal yacwēēz bèn canee din gac gugojn bèn guin bejn ree xhie nin balüü Dios lojman loj hor guin. <sup>31</sup> Gra ree bèn ni bayal gudēēd xtiidx Dios loj ree bejn, gradi zajc gugojn bejn ree xhienin balüü Dios lējt, per tijb gajdi chi yayalidi din gra ree bèn cucaagdiajg gusiid reeman chu' tēē luxdoo reeman. <sup>32</sup> Gol badxe'guijc guial ree bèn rudēē xtiidx Dios loj ree bejn laagajc reeman rniabee laa reeman din guinee reeman chi rayal guinee reeman. <sup>33</sup> Din Dios ad rēntaman tijb ni ad najt xnejz, rēnman tijb ni naj xnejz din yabedxe luxdoodi con ree xcompniaridi.

Yan, zi'c rajc gra ree luar lod rado'p ree xbejn Cristo, <sup>34</sup> loj hor ni ma cucaagdiajg reeman xtiidx Dios ad yu't permis guinee ree bēngunaa rayal guzoob reeman xtiidx xixinguaaw reeman zi'c rēb Dios güün reeman diizd gulal. <sup>35</sup> Bal xhie rēn reeman gagbee reeman, mejorli lidx reeman guiniabdiidx loj lacheel reeman, din natun guinee tijb bēngunaa loj hor ni cucaagdiajg reeman xtiidx Dios.

<sup>36</sup> Gol basaaladx guial ad lējtij naj bèn yaløj cwa' xtiidx Dios ad tijb tēētzi lējt ragbee xtiidx Dios din güündi zi'c naj xixgabidi. <sup>37</sup> Bal chu bèn naladx guial ma cwa'man quiarguejn par gudēēman xtiidx Dios loj ree bejn o por xSprijt Dios ma cwa'man xhie stijb quiarguejn, dxel laa gagbee gajcaman guial ni cucan loj gui'ch guie najn zi'c rniabee dux Dad ree Dios. <sup>38</sup> Per bal id rliladxaman ni canin lojdi loj gui'ch guie, ziangajc ad chililadxidi xtiidxaman.

<sup>39</sup> Yan zi'c ma rnin lojdi compniar raliduladx ree Jesucrist, gol been naguiejn din gapidi quiarguejn din gudēēdi xtiidxaman loj ree bejn, ad bal gudxoondi guinee tijb ree xcompniaridi bèn rniee tijb diidx ni ad rignia'tidi. <sup>40</sup> Per gra ni rüjndi gol beenan xnejz, gol beenan zi'c rayal.

## 15

### *Baban Jesucrist loj ree bengüt*

<sup>1</sup> Compniar raliduladx ree Jesucrist, rēn tēēn gusaaladxidi xtiidxza'c Jesucrist ni ma rnin lojd, diidxza'c ni ma bililadxidi loj ni za'dxi'chidi. <sup>2</sup> Gol basaaladx guial por ree diidxza'c guin ma rajpidi perdon por xtolidi bal walidi zinalidi laan, per bal id zinalidi laan bililadx xlia'zidi laan.

<sup>3</sup> Yaløjxgaj balün lējt ni basidan yaløj. Rnin lojdi guial Cristo güt por dux tol ree zi'c rēb loj xtiidx Dios. <sup>4</sup> Abi' biguie'chaman dxel ni goc choon dxej babanman zi'cgajc rēb loj xtiidx Dios. <sup>5</sup> Chi ma babanman, dxel balüülojman loj Bēd dxel loj los demazri ree apóstoles. <sup>6</sup> Zianz balüülojman nē loj ree tijb cwaa ree bèn rliladx laaman, gojc reeman mazri de gaay gayuu bejn. Yu' reeman ma güjt, per mazri zien reeman sta naban. <sup>7</sup> Balüü loj tēēman loj Santiaaw dxelri loj ree apóstoles. <sup>8</sup> Ni bigra balüülojman lon, naj najn zi'c tijb xindo ni rajl chi ma gudēd tiamp ni rayal galix. <sup>9</sup> Din naj ta'nzi lasajcan loj los demazri ree apóstoles, abi' ad rayalt guirii lan apóstol guial basagzin bèn rliladx

ree Jesucrist. <sup>10</sup> Per guial naj Dios benza'c zeel najn ni najn, abi' ad bayaxlia'tzaman naj din naj mazri ma benan xmandadaman guial loj los demazri ree xbejn Jesús, majsi diidxiczi ad da xtiibt naj cayünan ni cayünan, nē con xyudar Dios cayünan laan. <sup>11</sup> Zeel achet güünan bal por chunin biguejndi xtiidx Dios bal por naj o por stijb ree xbejn Jesús, ni mazri lasajc naj guial ma biguejndan abi' ma bililadxidan.

### *Yaban ree bengüt*

<sup>12</sup> Yan zi'c ma balüün lējt xtiidx Dios guial baban Cristo, ¿chexquiza zeel yu'di rēb ad zabant ree bengüt? <sup>13</sup> Bal id zaban ree bengüt, rēn guiēban guial ad babant Cristo. <sup>14</sup> Abi' bal id baban Cristo dxel achet sirv ni caylüün lējt, ache tēet sirv ni rililadxidi laaman. <sup>15</sup> Dxel bal zianan, ganax diidx rusquieen caynan por Dios guial ma ranan ma baban Jesucrist. Abi' bal id walin guial yaban ree bengüt, dxel ad walitan guial baban Jesucrist. <sup>16</sup> Din bal id zaban ree bengüt, dxel ni'qui Jesucrist ad babantri. <sup>17</sup> Abi' bal id babanman, achet sirv guial rililadxidi laaman ache tēet perdon yu' por xtolidi. <sup>18</sup> Bal naj zian, xt ree bèn ma güjt achet xperdon reeman majsi bililadx reeman Jesucrist. <sup>19</sup> Bal lojzi guidxliuj guie güün sirv ni bililadx ree Jesucrist dxel dunujzi ree nayajc ree bèn naban mazri naya guial loj chutēez bēnan.

<sup>20</sup> Per diidxiczi Jesucrist naj bèn baban, abi' laaman naj quijb bèn yaløj baban. <sup>21</sup> Abi' zi'c bidoonloj guialgüjt loj guidxliuj guie por tijb bejn, ziangajc por tijb bejn yaban ree bengüt. <sup>22</sup> Zi'c bidoonloj guialgüjt par gra ree bejn por Adán, ziangajc yan por Jesucrist ma yu' stijb guialnaban par ree bèn rililadx laaman. <sup>23</sup> Per gra gac zi'c rayal: Yaløj Jesucrist naj bèn baban, dxel chi gui'taman stijb dxel ma yaban ree bengüt bèn bililadx ree laaman. <sup>24</sup> Abi' chi ma beenman gan gunabeeman gra ree bèn rdxe'ch laaman, zi'c ree bèn rajp guialguxtis nē ree bèn rajp galoj guial rniabee, dxel ma yayü xguialrniabeeman loj dux Dad ree Dios. <sup>25</sup> Din rayal nabee Cristo xt chi ma beeman gan canabeeman gra ree bèn rdxe'ch laaman. <sup>26</sup> Abi' ni chigra gunidlojman naj guialgüjt. <sup>27</sup> Loj xtiidx Dios rēb guial Dios badēe guialrniabee loj Jesucrist din nabeeman gra, per ad rēnt guiēban guial nē Dios rniabeeman din Dios badēed guialrniabee lojman. <sup>28</sup> Abi' dxej ni ma rniabee Jesucrist loj gra dxel yayüman guialrniabee ni badēed Dios lojman din ma nabee tijbzi Dios gra.

<sup>29</sup> Yan bal id zaban ree bengüt, ¿chexquiza zeel yu' ree bèn rirobnijs xcwent ree bèn ma güjt, abi'za bal id zaban ree bengüt?

<sup>30</sup> Achet sirv guial nadxu'n loj ni nadxeb gra hor. <sup>31</sup> Din rugojnan lējt, gra dxej za'n loj guialgüjt, laan naj ni diidxli ni rnin lējt zi'cgajc walin guial dad nix yu' luxdon con lējt guial najdi xbejn Cristo. <sup>32</sup> Yan bal naabzi loj guidxliuj guie güün sirv ni cayünan dxel achet sirv ni basajc ree bèn Éfeso naj, naj reeman bendoxh zi'c ree bedoxh. Din bal id zaban ree bengüt mejorli yaguieen ree zi'c rēb ree bèn rēb: “Yadaaw ree yadü' tēe ree din guixie ma bayējt ree.”

<sup>33</sup> Per naj rni lējt ad tiēbidi gusquiee reeman lējt. Din guial ridxga' xtiidx ree bèn ni ad zēt xnejz, najzan par guxhiinan zi'c nabandi. <sup>34</sup> Zeel gol been xgab zi'c rayal ad bal rüjn tēeridi dol din yu'di ni'quid nünbeetidi Dios, zeel canin lojdi zian din yaya'nxtudi.

### *Xhienaag yaban ree bengüt*

<sup>35</sup> Per wed yu'di rüjn xgab: “¿Xhieza naag yaban ree bengüt? ¿Xhienaag naj cuerp ni gap reeman?” <sup>36</sup> Per xgab guin xgab tontzan. Din lējt ragbee guial chi rxübin bejn tijb xhaj xhienin, chi rliejnan dxel rnijt xhaj ni guxübinman. <sup>37</sup> Ad cwaan ni rliejn guint rxübin bejn, xhajnan rxübinman, zi'c rüjn bejn con trigo o xhietēez stijb xhaj nin. <sup>38</sup> Per chi rliejnan ma najn cwaandoo zi'c rniabee Dios gacan, xhietēez xhaj nin ni rxübin bejn ma yu' cwaando ni guilienan. <sup>39</sup> Zi'c nadxaa xcuerp bejn con xcuerp ree be, nadxaa tēe bëjl con xcuerp ree biguijn. <sup>40</sup> Nadxaa tēe ree ni yu' xanyabaa con ree ni yu' guidxliuj, nadxaa naj guialza'cdxoon ree ni yu' xanyabaa con ree ni yu' loj guidxliuj.

<sup>41</sup> Nadxaa xbacha' gubijdx guial loj bëew nadxaa tëë xbacha' ree bajl xanyabaa, xt ree bajl xanyabaa garent garen naj xbacha' reen.

<sup>42</sup> Yan ziangajc gac con guial yaban ree bengüt. Cuerp ni rguie'ch rodxan, per cuerp ni gap bejn stijb ad yu't dxej godxan. <sup>43</sup> Cuerp ni rguie'ch rxinan, per chi yaban bejn stijb ma gapaman tijb cuerp za'cdxoon ni achet gac. Cuerp ni rguie'ch guin achet gojl yu'n, per chi yaban bejn stijb ma gapaman cuerp ni yu' gojl. <sup>44</sup> Rguie'ch cuerp ni rajp bejn loj guidxliuj guie, per chi yaban bejn stijb ma gapaman tijb cuerp ni güün sirv par xanyabaa. Din zi'c yu' cuerp par loj guidxliuj guie ziangajc yu' cuerp par xanyabaa.

<sup>45</sup> Loj xtiidx Dios rëb guial yaløj Adán gojp guialnaban loj guidxliuj guie. Dxel bi't Jesucrist, bén razaladx guialnaban loj ree bejn. <sup>46</sup> Ad yalojt rajp bejn guialnaban ni gapaman xanyabaa, yalojxgaj rajpaman guialnaban loj guidxliuj guie dxel guialnaban xanyabaa. <sup>47</sup> Adán gojcaman con yuj zeel najman bénguidxliuj, per Jesucrist xanyabaa zëédaman. <sup>48</sup> Gra ree bénguidxliuj naj xcuerp reeman zi'c goc xcuerp Adán loj guidxliuj guie, per chi guidxin dxej dxel gap ree bejn tijb cuerp lasa' cuerp ni rajp Jesucrist xanyabaa. <sup>49</sup> Din zi'c nayajc ree zi'c goc Adán loj guidxliuj guie, ziangajc yayajc ree zi'c naj Jesucrist xanyabaa.

<sup>50</sup> Abi' rugojnan lëjt compniar raliduladx ree Jesucrist, cuerp ni raya'p ree loj guidxliuj guie ad zajct yayun xanyabaa lod canabee Dios. Din ni rodx ad zajct chu'n lod yu' ni ad rodx. <sup>51</sup> Per rënan gagbeedi tijb ni achutczu wayagbee xt yan guial ad dugrat ree yayëjt, per dugra ree guidxaa zi'c nayajc ree, yaya'p ree cuerp ren. <sup>52</sup> Laan gac chi yaguiejn ree trompejt ni gugojn dunuj ree guial ma bidxin tiamp ni yarii ree loj guidxliuj guie, dxel tibrajtzi zi'ctzi chi ruchip guiaaløj bejn zian guidxaa zi'c nayajc ree. Chi guibejdx trompejt guin yaban ree bengüt dxel ad yu'tri dxej guiët reeman abi' hor zii ma bidxaa zi'c nayajc ree yan. <sup>53</sup> Din rüjn naguiejn guidxaa cuerp ni rodx por stijb cuerp ni ad yu't dxej godx guidxaa tëë cuerp ni rëjt por stijb cuerp ni ad yu't dxej guiët. <sup>54</sup> Abi' chi ma bidxaa cuerp ni rodx por stijb cuerp ni ad yu't dxej godx guidxaa tëë cuerp ni rëjt por stijb cuerp ni ad yu't dxej guiët, dxejzii naj dxej ni ma gojc cumplid ni rëb loj xtiidx Dios lod rëb: "Xt guin ma bayaaløj gojc gan loj guialgüjt." <sup>55</sup> Nadxel tëë ma gojc cumplid zi'c rëb loj xtiidx Dios lod rëb: "Guialgüjt, ¿conza guial rüjn gan? ¿Conza guial rusagzil bejn?" <sup>56</sup> Guialrusagzi guialgüjt naj por dol, abi' por ley ragbee bejn guial dol guin naj ni rniabee laaman. <sup>57</sup> Per quixtëe dux Dad ree Dios, bén rüjn dunuj ree yudar par yaguieen ree gan por xguialgüjt Dad Jesucrist.

<sup>58</sup> Zeel compniar raliduladx ree Jesucrist zi'c rënan lëjt rnin lojdi, gol guzudxi'ch ad chu' tëë luxdoodi tio'p. Guixie guixie gol been naguiejn güündi mazri xmandad Dios, din lëjt ragbee guial ad ni xlia'tzi gra ni cayüjndi par Dad Jesucrist.

## 16

### *Milia ni rdo'p par ree xbejn Dios*

<sup>1</sup> Yan por milia ni naj guto'pidi par güündi yudar stijb ree dux compniar ree bén raliduladx ree Jesucrist, gol been zi'c gunabeen güün ree bén rililadx ree Jesucrist niz Galacia. <sup>2</sup> Gazob dumingw tijb gajdi gol gule'c cintabl zi'ctzi beendi gan lën toxman, din chi guialan ad rüjntri naguiejn guido'pidi milia guin. <sup>3</sup> Abi' chi guialan, bén ni gucaabeedi par gaxhalan laa reeman chigsa'n gon guin Jerusalén gaxhalan laa reeman con gui'ch ni guiëb chu naj reeman. <sup>4</sup> Abi' bal guguijan guial rüjn naguiejn gan dxel chinë'n laa reeman.

### *Xhienaag naj xixgab Pab*

<sup>5</sup> Yaløj gadëedan niz Macedonia dxel guialan Corinto guidganan lëjt. <sup>6</sup> Wed xchej gazun con lëjt. Wed guidib tiamp nayaag gazun con lëjt, dxel güündi naj yudar din gan lod naj gan. <sup>7</sup> Ad rëntan gadëedzi nejzan gaguixlon lëjt, rënan gaglaan con lëjt bal gunee Dios

permis. <sup>8</sup> Per yan naj yaya'nan Éfeso xt lanij pentecostés, <sup>9</sup> din guie merczi yan catiëjb ree bejn cucaagdiajg reeman xtiidx Dios, abi' ruluü zien reeman chililadx laan, majsi zien gajc reeman rdxe'ch naj por zian.

<sup>10</sup> Chi gui't Timoteo, gol been naguiejn din suman zagdx con lëjt, din lasa'gajc xmandad Dios ni cayünan cayüjnman. <sup>11</sup> Zeel achu lëjt guiniajgaa lojman, gol beenman yudar din gusnuu xnejzaman sin guial chu'man xgab, din gui'taman guie lod cabëëzan laaman con los demazri ree dux compniar ree.

<sup>12</sup> Abi' Apolos, naj guza'c laaman liaadx din nidnëman laa reeman nitixloj reeman lëjt, per ad guyëntaman ni'taman yan, per zi'tcaman guitixlojman lëjt chi guneen laaman tiamp.

*Diidx bigra ni bacaa Pab loj gui'ch guie*

<sup>13</sup> Gol guzujsin gol guzujdxi'ch tää loj ni rliladxidi Jesucrist. Gol gudaan ni gui'tzi gol guzujdxi'ch tää. <sup>14</sup> Gra ni güündi gol beenan guial rëndi bejn ree.

<sup>15</sup> Compniar raliduladx ree Jesucrist, lëjt ragbee guial Estéfanas con xfamilaman laa reeman naj bèn yaløj bililadx Jesucrist niz Acaya, ragbee täädi xhienaag cayüjn reeman yudar dux compniar ree bèn rliladx ree Jesucrist. Zeel rnin lojdi: <sup>16</sup> Lasa' ree bèn guin gol bazoob xtiidx reeman con gra ree bèn cayüjn xmandad Dios në ree bèn cayüjn yudar cayajc mandad guin.

<sup>17</sup> Dád nix guyu luxdon chi baguiaad Estéfanas guie, në Fortunato në Acaico. Din por laa reeman guza'can zi'cgajc chi za'n con gradi. <sup>18</sup> Laa reeman bagu' luxdon niz guie zi'c ragu' reeman luxdoodi, abi' lasa' ree bèn guin gol gojp reeman respejt.

<sup>19</sup> Gra ree compniar rliladx Jesucrist niz Asia guie rugajpdioz reeman lëjt. Abi' Aquila con lacheelaman Priscila con gra ree xbejn Cristo bèn rado'p ree lidx reeman, rugajpdioz reeman lëjt, nayajc ree xbejn Cristo. <sup>20</sup> Gra ree dux compniar ree bèn rliladx ree Cristo rugajpdioz reeman lëjt, gol bagajpdioz tää lasa'di zi'c rayal.

<sup>21</sup> Naj Pab, quijb naj cuca lëjtr guie ree par gugajpdiozan lëjt.

<sup>22</sup> Bal yu' bèn ad rënt dux Dad ree Jesucrist, laaman ma rayal xcasti Dios. ¡Dux Dad ree Jesucrist nayob gui'taman!

<sup>23</sup> Abi' dux Dad ree Jesucrist güünle' gradi. <sup>24</sup> Zi'c nayajc ree xbejn Cristo tiblojzi rënan gradi. Amén.

## Gui'ch barojp ni guxhaal San Pabl loj ree bèn Corinto rliadx Jesucrist

### *Rugajpdioz Pab bèn Corinto rliadx ree Jesucrist*

<sup>1</sup> Naj Pab, Dios bacaabee naj gacan xi apóstol Jesucrist, nè dux compniar ree Timoteo za' con naj. Naj cuca gui'ch guie par lèjt guial ma rliadxidi xtiidx Dios luguiedx Corinto nè los demazri ree bèn riga' niz Acaya. <sup>2</sup> Dux Dad ree Dios con Dad Jesucrist güünle' lèjt yabe'cdxe tëë reeman luxdoodi.

### *Tarbajw ni gudëd Pab*

<sup>3</sup> Quixtëë Dios xDad Dad Jesucrist, bèn naj Dad bèn raya dunuj ree naj tëëman Dios bèn ragu' du luxdoo ree. <sup>4</sup> Laaman ragu' du luxdoo ree loj xhietëëz guialrzagdiaj ni radüüd ree din gac yalu' ree luxdoo ree bèn cadëd xhietëëz guialzi, yalu' ree luxdoo reeman zi'c ragu' Dios du luxdoo ree. <sup>5</sup> Din majsi cayzaagdiaj da't ree guial nayajc ree xbejn Cristo, ziangajc dád ragu'man du luxdoo ree. <sup>6</sup> Abi' bal cayzaagdiajn, cayzaagdiajn din yaguieenan lèjt yudar din chu' luxdoodi din laa tëëdi loj dol. Abi' bal cu'man du luxdoon, rgu'man du luxdoon din chu' luxdoodi din gac taandi lasa' ree guialzi ni caydüüdan. <sup>7</sup> Ad yu' nawëëgt du luxdoon con lèjt, din zi'cgajc cazagdiajdi ziangajc cayzaagdiajn dxel ziangajc yagu' Dios luxdoodi zi'cgajc ragu'man du luxdoon.

<sup>8</sup> Compniar raliduladx ree Jesucrist, rayënan gagbeedi guial dád zro' naj ni baza'can niz Asia. Naya baza'can niz ni, par dunujn ad zadaantran, ad naguieentran nejt guial yabajnran mazri, <sup>9</sup> baguieenan xgab guial ma bayëjtan. Per baza'can zian din yadxë'guijcan guial achet zajc yaguieen dunujzan sin xyudar Dios, bèn rasban ree bengüt. <sup>10</sup> Laaman babëë dunujn loj guialgüjt guin abi' gagnëman dunujn loj lasa' ree ni nadxeb guin. Dunuj ree rayagbee guial gusnuu güünman dunujn yudar, <sup>11</sup> mazri bal güüнди yudar cwedx guiniabidi Dios por dunujn. Abi' bal zien ree bejn cabejdx canab Dios por dunujn dxel zien gajc reeman gudëd quixtëë lojman zi'c cayagnëman dunujn.

### *Chexc ad wejt Pab Corinto*

<sup>12</sup> Abi' ni rabaan rnin lojdi guial achetczi naduladxan guial rayagbeen nabajnan naya delant lojdi nè delant loj ree bénguidxliuj, abi' diidxli cayguieenan ni rayal yaguieenan. Per ad cayguieentan zian por dux quiarguiejnzan, cayguieenan zian por xyudar Dios.

<sup>13</sup> Loj dux gui'chan ad racaatan ni ad zajct goolidi o ni ad zajct chignia'di. Balzianclaa chignia'di gra ni canin lojdi. <sup>14</sup> Zi'cgajc ta'ngaj cayagbeedi guial chi gui't Dad Jesucrist zatijb lèjt yabaadi con dunujn guiáad dunujn yabaan con lèjt.

<sup>15</sup> Laan naj ni yu'guican, zeel yaloj benan xgab nidganan lèjt din nabaadi guial ma barojp volt bidganan lèjt. <sup>16</sup> Benan xgab nidganan lèjt chi nialan niz Macedonia, abi' chi nazaan Macedonia nialan nidganan lèjt stijb, dxel nagu'nejzidi naj par Judea. <sup>17</sup> Ad güüнди xgab guial chi rnin guidganan lèjt rnizan zian. Ad güüнди xgab guial rünan zi'c rüjn gra ree bénguidxliuj, ganin guialan abi' ragbeen guial ad zialtan. <sup>18</sup> Dios ragbee guial ad raguie'chtan yaguieenan ni rayagbeen ad zaguieentan. <sup>19</sup> Din Jesucrist Xi'n Dios, bèn ni ma baguien xtiidx lojdi, naj con Silvano con Timoteo, ad najt Jesucrist bèn na güünman ni ragbeeman ad züjntaman, laaman ganax diidxli rnieeman. <sup>20</sup> Din por laaman rajc cumplid gra ree xpromejs Dios. Zeel por laaman raguie'ch ree “Amén” chi radëed ree quixtëë loj Dios. <sup>21</sup> Abi' Dios laaman cayüjn dunuj ree yudar con lèjt din yadxu'dxi'ch ree loj ni nayajc ree tijbzi con Cristo, Dios bacaabee dunuj ree din yayajc ree par laaman. <sup>22</sup> Laaman gule dunuj ree par laaman, abi' guxhaal xSprijtaman bèn nabajnnë' ree zi'c tijb sen guial yaca' ree ni yaca' ree.

<sup>23</sup> Yan bal gadan ga Corinto zi'c benan xgab, Dios ragbee guial gadan ga guial ad rëntan gadilë'n lëjt, abi' Dios gudëed naj casti bal id wali ni canin. <sup>24</sup> Ad cayguieentan naguiejn yanabeen lëjt xhienaag chililadxidi Jesucrist, din dunujn rayagbee guial diidxli za'dxi'chidi loj ni rliladxidi Jesucrist, ni cayguieenan naj guial yaguieenan lëjt yudar din chu' luxdoodi nix guibandi.

## 2

<sup>1</sup> Zeel benan xgab ad zidganatan lëjt yan, chitëe chu'naya luxdoodi. <sup>2</sup> Din bal gagu'nayan luxdoodi, ¿chuza cu' luxdon nix bal ma badxe'nayan luxdoodi lëjt ragu' luxdon? <sup>3</sup> Zeel bacan zi'c bacan loj gui'ch ni guxhalan lojdi, din chi guialan ad cu'di luxdon naya luar cu'di luxdon nix. Abi' naj ragbee bal yu' luxdon zagdxe gradi yu' luxdoo zagdxe por zian. <sup>4</sup> Chi bacan gui'ch guie dád guyun xgab abi' guyunayan xt ronan bacan diidxnaa ni bacan loj gui'ch guie, per ad bacatan gui'ch guin par gagu'nayan lëjt, bacanan par gagbeedi guial rën da'tan lëjt.

### *Yu' perdon par bén badxe' falt*

<sup>5</sup> Bal yu' tijbidi ma badxe'naya naj, per ad najtzi guyunaya nëgajc lëjt guyunaya. Rnin në lëjt chitëe gadëedlajn guial ganin graczi di guyunaya por zian. <sup>6</sup> Per naj rni lojdi compniar raliduladx ree Jesucrist, ma gojczy yan con casti ni ma badëedidi loj bén guin. <sup>7</sup> Yan gol beenman perdon gol bagu' tëe luxdoo man chitëe chu'naya luxdoo man xt ad zadxejlt xhie güünman. <sup>8</sup> Zeel rniaaban lojdi, gol been naguiejn din gagbeeman guial rëndi laaman zi'cgajc guyëndi laaman guia'xchej. <sup>9</sup> Gui'ch ni guxhalan lojdi gocli, guxhalanan din gagbeen bal ruzoobidi da diidxan guial güündi gra ni ganin lojdi. <sup>10</sup> Yan chutëez bén güündi perdon, nëgajc naj gün laaman perdon. Abi' bén ma benan perdon, bal yu' ni güünan perdon, benan laaman perdon delant loj Cristo por lëjt <sup>11</sup> chitëe güün xindxab dunuj ree gan, din dunuj ree rayagbee xhienaag naj xguialrusquiee xindxab.

### *Ad nixt guyu luxdoo Pab guzujman Troas*

<sup>12</sup> Chi bidxinan guiedx Troas par ganen xtiidxza'c Jesucrist, dád gognë Dios naj par güünan mandad guin ni. <sup>13</sup> Per ad nixt guza'can guial ad bidxaaglojtan dux compniar ree Tito. Zeel basa'nan bén guin ree abi' wan Macedonia.

### *Ragnë Jesucrist dunujn zianczi*

<sup>14</sup> Per quixtëe Dios guial por Jesucrist guixie guixie cayagnëman dunujn chitëe xhie güün dunujn gan abi' por dunujn cayagbee ree bejn xtiidxza'c Jesucrist, diidxza'c guin ree naj zi'c tijb ni rliaa nejxh ni rire'ch cha' guidibczi. <sup>15</sup> Abi' por Jesucrist dunujn nayajc zi'c tijb go'xh ni rliaa nejxh delant loj Dios, go'xh ni rdxin loj ree bén rliladx Jesucrist në loj ree bén ad rliladxt. <sup>16</sup> Par ree bén ad rliladxt laaman, dunujn nayajc zi'c tijb go'xh ni rugüjt, per par ree bén rliladx laaman dunujn nayajc zi'c tijb go'xh ni runee guialnaban. Per, ¿chu zajc güün ree ni guin sin xyudar Dios? <sup>17</sup> Dunujn ad cayguieentan negojs con xtiidx Dios zi'c rüjn garol ree bejn, dunujn raguieenan zi'c rayal, zi'c ma bacaabee Dios dunujn yaguieenan. Abi' Dios ragbee guial por guial nayajcan xbejn Cristo zeel raneen xtiidxaman.

## 3

### *Nejz cüb ni yu' par yadxin ree loj Dios*

<sup>1</sup> Chi ranan zian, ad naladxidi guial dunujn gajcan cayles dux valoran. Lëjt ragbee guial ad rüjnt naguiejn yalüün tijb gui'ch lojdi par gagbeedi chu dunujn o yanaaban gui'ch lojdi ni güün dunujn yudar par gagbee ree bejn chu nayajcan zi'c rüjn ree ben ren. <sup>2</sup> Din lëjt gajc naj tijb gui'ch par dunujn, gui'ch ni yu' du luxdoo ni rool ree bejn ni nünbee tëe reeman. <sup>3</sup> Zi'c rulüü yaguie'ch ree lëjt naj tijb xtiidx Cristo ni bacaan, per ad bacaatanan

con tint, bacaanan con xSprijt Dios bén naban, tijb ni ad cwat loj tijb guiaj nata', cwan luxdoo ree bejn.

<sup>4</sup> Dunujn raya'p Dios confianz por Jesucrist, <sup>5</sup> abi' ad raguieentan xgab guial yu' ni raguieen dunujzan, din gra ni raguieenan, raguieenan laan con xyudar Dios. <sup>6</sup> Dios naj bén razaladx dunujn quiarguejn par yagojnan bejn ree xcwent nejj cüb ni ma yu' par yadxin ree loj Dios, nejj cüb ni ad ryaadxt chinal bejn tijb ley ni zëed loj gui'ch, per rüjn naguiejn chinalaman ni zëed por xSprijt Dios. Din ley castizi naj ni zidnën, per xSprijt Dios guialnaban naj ni rudëëman loj ree bejn.

<sup>7</sup> Abi' majsi castizi naj ni zidnë ley ni badëë Dios loj Moisejs loj tijb guiaj nata', per dád bidiin bacha' loj Moisejs chi cwa'man ley guin, xt ad gojct nuguaiaa ree bén Israel lojman por bacha' guin, bacha' ni ta'ngaj ta'ngaj gunidlojn. <sup>8</sup> Bal chi bi't ley guin gojc zian, yan, jmazri ni za'cdxoon naj guial gucaagdiajg ree bejn xcwent nejj cüb ni rulüü xSprijt Dios ni ma rajp bejn con Dios! <sup>9</sup> Din chi bi't ley ni ridnë casti par ree bejn, con bacha' bi'tan, yan, jmazri ni za'cdxoon naj guial guien ree bejn xhienaag gac reeman naya delant loj Dios! <sup>10</sup> Abi' bal ni za'cdxoon gojc chi bi't xley Dios loj guidxliuj guie, yan achetzi lasajc guialza'cdxoon guin par guialza'cdxoon ni naj por nejj cüb ni ma rajp ree bejn con Dios. <sup>11</sup> Abi' bal ni ad rüjnt sirv par gra tiamp, bi'tan con tijb ni za'cdxoon, yan mazri ni za'cdxoon naj ni ad yu't dxej nit.

<sup>12</sup> Abi' guial yu'guijc ree zian, zeel sin guialrdxeb caylүүnan bejn ree. <sup>13</sup> Ad raguieentan zi'c been Moisejs, basiaaw lajd lojman chitëë gagbee ree bén Israel guial ziquied guialrulaa bacha' lojman, bacha' ni laa gunit gajc. <sup>14</sup> Per ad lojtzi Moisejs biaaw, ne gajc xquiarguejn ree bejn biaaw. Din xt yandxej chi rool reeman loj xtiidx Dios ni bacaa Moisejs, achet rignia' reeman, tijbzi por Jesucrist zajc chignia' reeman laan. <sup>15</sup> Per xt yandxej chi rool reeman ni bacaa Moisejs ad rignia't reeman guial sta nayaaw xquiarguejn reeman. <sup>16</sup> Per bén rililadx Jesucrist, laaman rxhial xquiarguejnman. <sup>17</sup> Din tijbzi naj Jesucrist con xSprijt Dios, abi' lod ma naban bejn con xSprijt Dios achetri rniabee laaman. <sup>18</sup> Zeel achetri nayaaw duloj ree zi'c been Moisejs, din dunuj ree nayajc ree zi'c guiaawajn lod rguien xbacha' Jesucrist abi' chaawladx cayajc ree zi'c rënman yayajc ree, abi' guixie guixie cusniman dunuj ree por xSprijtaman.

## 4

<sup>1</sup> Zeel zi'c ma baya Dios dunujn abi' gulejman dunujn par yaneen xtiidxaman, ad zadxagtan yaguieenan mandad guin. <sup>2</sup> Dunujn achet raquie'chan, achet ni ad rüjnt sirv cayguieenan, ad caysquieetan bejn ree ad caychaa tëëtan xtiidx Dios. Dunujn cayneen ni naj xtiidxli Dios, abi' bejn gajc ree zajc gagbee guial cayguieenan xnejz delant loj Dios. <sup>3</sup> Per bal yu' bén ni ad rignia't xtiidxza'c Jesucrist ni cayneen, ad rignia'taman laan guial ad zëtaman loj xnejz Dios. <sup>4</sup> Abi' xinxab rniabee loj guidxliuj guie ma bascajyix xquiarguejn reeman, guial ad rënt reeman chililadx reeman, chitëë gusni xtiidxza'c Jesucrist laa reeman abi' ad zajct guguaiaa reeman xguialrniabeeman, laaman guial najman zi'c gajczi Dios. <sup>5</sup> Ad caytie'chtan dux tiidx gajcan, ni caytie'chan naj xtiidxza'c Jesucrist, bén naj Dad par dunuj ree. Abi' ni ranazan lojdi guial cayguieenan sirv lëjt por guial rayënan Jesucrist. <sup>6</sup> Abi' laagajc Dios ni gunabee persi bani loj guidxliuj guie chi gule'cchaawaman laan, laagajcaman basni dux quiarguejnan, guxhalaman dux quiarguejnan din yayignia'n xhienaag naj xguialrniabeeman, guialrniabee raguiaa ree por Jesucrist.

### *Yabajn ree por guialrliladx*

<sup>7</sup> Gulejman dunujn par yaguieenan ni cayguieenan, majsi nayajczan zi'c guiajs bajn din guiguien guial gra guialrniabee zëed por Dios ad por dunujtan. <sup>8</sup> Majsi graloj guialzi caydüüdan per ad ralenya'tan. Majsi rulüü achetri zajc yaguieenan, per radxejl gajc xhienaag yaguieenan. <sup>9</sup> Majsi xhietëez rüjnnë bejn dunujn, per ad roo'nladxt Dios



dunujn. Rguin reeman dunujn per ad runidlojt reeman dunujn. <sup>10</sup> Bantëez guin zio'n nadxu'n loj guialgüjt zi'cgajc guzajc Jesucrist, per zian ralüün guial raya'pan xguialnabanman. <sup>11</sup> Dxel la'tgaj nabanman, guixie guixie nadxu'n loj guialgüjt guial nayajcan xbejn Jesucrist, per zian ralüün guial raya'pan xguialnabanman, majsi guidxin dxej nit dux cuerpan. <sup>12</sup> Nadxu'n loj guialgüjt guial caytie'chan xtiidx Jesucrist, per por zian ma rajpidi guialnaban delant loj Dios.

<sup>13</sup> Loj xtiidx Dios rëb: “Guial bililadxan, zeel gunen ni gunen.” Yan ziangajc guial raliduladxan xtiidx Dios zeel cayneen laan. <sup>14</sup> Din dunujn rayagbee guial Dios, bén basban dux Dad ree Jesucrist loj guialgüjt, ziangajc yasbanman dunuj ree guial ma nayajcan tijbzi con Jesucrist dxel lëjt con dunujn tijbzi chignëman dunuj ree lod zojbaman. <sup>15</sup> Din gra ni cayguieenan në gra ni cayza'can, cayza'can zian din yaguieenan lëjt yudar din gusnuu gacxhiey ni riladxidi Jesucrist. Zian ma gac ree bejn mazri zien gudëed reeman quixtëe loj Dios, guza't tëe reeman laaman zagdx.

<sup>16</sup> Zeel ad ralenya'tan. Din majsi cayo'xh dux cuerpan por mandad guin, per dux sprijtan guixie guixie caycüb Dios laan. <sup>17</sup> Achetczi lasajc ree guialzi ni caydüüdan loj guidxliuj guie din najn ni rdëd, per por guialzi guin ree rayalan xguialnaza'c Dios, guialnaza'c ni lasajc mazri abi' ad yu't dxej nitan. <sup>18</sup> Din dunuj ree ad cayguieent ree naguiejn yaya'p ree ni raguaiaa ree loj guidxliuj guie, cayguieen ree naguiejn din yaya'p ree ni ad raguaiaa ree. Din ni raguaiaa ree loj guidxliuj guie yu' dxej nit reen, per ni ad raguaiaa ree yan ad yu't dxej nit reen.

## 5

<sup>1</sup> Dunuj ree rayagbee guial dux cuerp ree naj zi'c tijb yu cenci par dux sprijt ree loj guidxliuj guie, yu ni yu' dxej nit. Per rayagbee ree guial xanyabaa Dios gunee dunuj ree stijb cuerp, cuerp ni ad gojct por bénguidxliuj zi'c rajc tijb yu, abi' cuerp guin yaya'p ree par tiblayaa. <sup>2</sup> La'tgaj raya'p ree cuerp guie loj guidxliuj ralu' ree guialquia, par dunuj ree xi nix diob guidxin dxej yaya'p ree cuerp ni yaya'p ree xanyabaa. <sup>3</sup> Din ad ganaxtizi Sprijt yayajc ree xanyabaa, nëgajc cuerp yaya'p ree. <sup>4</sup> La'tgaj raya'p ree cuerp ni raya'p ree loj guidxliuj guie, cayzaagdiajn nadxu'n xgab por ni cayza'can. Ad ranatan guial rayënan yayëjtan, ni rayënan naj guial yaya'pan cuerp cüb ni yaya'pan par tiblayaa din nit dux cuerpan ni rayal nit. <sup>5</sup> Dios been dunuj ree zi'c nayajc ree abi' banee xSprijtaman duloj ree zi'c tijb sen guial gac zi'c naman gac.

<sup>6</sup> Zeel zianczi raya'p ree confians, abi' dunuj ree rayagbee guial la'tgaj nabajn ree loj guidxliuj guie, zijt nadxu' ree guial lod zojb dux Dad ree Jesucrist. <sup>7</sup> Per dunuj ree zunaal reeman guial raliduladx ree laaman ad guial raguaiaa ree xhienaag gac. <sup>8</sup> Zeel raya'p ree confians guin, abi' ma rayën ree yasa'n ree cuerp ni raya'p ree loj guidxliuj guie din yo' ree yuchu' ree con Jesucrist. <sup>9</sup> Zeel achet güünan bal loj guidxliuj guie o bal xanyabaa, per ni rayën ree naj guial yaguieen ree zi'c rën Cristo. <sup>10</sup> Din dugra ree rayal yadxin lojman lod güünman guialguxtis din tijbgaj dunuj ree yaca' ni rayal ree, por ni zagdx o por ni mal ni baguieen ree loj guidxliuj guie.

### *Xhienaag gap bejn nejz par guidxinman loj Dios*

<sup>11</sup> Zeel por respejt ni raya'p ree Jesucrist, cayguieen ree naguiejn guidxga' ree bejn xtiidxaman. Abi' Dios ragbee guial dunuj ree cayguieen ree zi'c rayal, balzianclaa në lëjt güünbee dunujn guial dunujn cayguieencan xnejz. <sup>12</sup> Ad caylest dux valoran, ni rayënan naj guial yabaadi guial gagbeedi ni naj diidxli por dunujn, din gac yadxi'di diidx loj ree bén rüjn naguiejn yaya'n reeman zagdx delant loj ree bejn luar güün reeman xgab xhienaag naban reeman delant loj Dios. <sup>13</sup> Yan bal par bejn rajc duguijcan por ni cayguieenan, per cayguieenan laan por Dios. Abi' bal par lëjt nadëdguieenan zeel cayguieenan mandad guie, cayguieenan laan par yaguieenan lëjt yudar. <sup>14</sup> Guial rën Cristo dunujn zeel cayguieenan ni cayguieenan, din dunujn rayagbee guial Cristo güjt

par gra bejn abi' gra ree bejn ma naj zi'c beng t par dol. <sup>15</sup> Abi' Jesucrist g jtaman por gra bejn din b n chililadx ree laaman ad zabajntri reeman zi'ctzi r n reeman, ma guiban reeman zi'c r nman, laaman guial g jtaman por laa reeman abi' babanman stijb. <sup>16</sup> Zeel bal guia'xchej baguieen ree xgab guial naj Cristo tijbzi b nguidxliuj, per ad najtri dux xgab ree zian por laaman. Abi' ad rayidxga'tri ree guial chu naj bejn, <sup>17</sup> din chut  z b n ma naj tijbzi con Cristo, ma bidxaa mod ni nabanman. Ma nabanman garen guial loj ni gubanman guia'xchej.

<sup>18</sup> Per gra nine naj por xyudar Dios, laaman been persi raya'p ree nejz par yadxin ree lojman por Jesucrist, abi' laaman gule dunujn din yagojnan bejn ree xhienaag din gap reeman nejz par guidxin reeman lojman. <sup>19</sup> Din tijbzi naj Dios con Jesucrist abi' por Jesucrist r jn Dios naguiejn gap ree bejn nejz par guidxin reeman lojman, por Jesucrist ma nayab ree bejn sin dol delant loj Dios, zianan naj ni bacaabeeman dunujn yagojnan bejn ree. <sup>20</sup> Zeel dunujn nayajc b n canee por Cristo, cayd edan xtiidx Dios din gagbee ree bejn xhie rniab Dios g  n reeman. Abi' por Jesucrist ranaaban lojdi: Gol guzuj zagdx con Dios. <sup>21</sup> Din Jesucrist achetzi dol beenman, per por dux tol ree baslaa Dios g jtaman zi'c tijb b ndol din por laaman, cuguiaa Dios dunuj ree zi'c tijb b n ni ad way jnt dol.

## 6

<sup>1</sup> Zeel zi'c cayguieenan xmandad Dios, dunujn ranaab lojdi: Ad g  nbee xlia'di guial r n Dios l jt. <sup>2</sup> Din loj xtiidxaman r b:

Chi bidxin dxej guidxga'n l j,

bidxga'n l j

abi' chi bidxin dxej gapil perdon

dxel beenan l j yudar.

Abi' dunujn rana lojdi guial ma bidxin dxej guin par l jt, ma bidxin dxej guidxga' Dios l jt n  dxej g  nman l jt perdon.

<sup>3</sup> Dunujn ad cayguieentan tijb ni g  n guial ad zaliladxtri ree bejn Jesucrist, ad cayguieentan tijb ni gui b ree bejn guial ad cayguieentan zi'c bal  n bejn ree. <sup>4</sup> Par gra cayl  n bejn ree guial dunujn nayajc b n cay jn sirv Dios caydaan t en xhiet  z ni raza'can, zi'c guialzi, tarbajw, ni naya, <sup>5</sup> n  guial naa ni r jn ree bejn dunujn. N  guial rgu' reeman dunujn ladxguib, rgu' t e reeman dunujn loj wadij, ni radxagan guial tant zien ni raguieenan, ni ral en bacaal, ne guialrliaan ni rad  dan. <sup>6</sup> Cayl   t en bejn ree chu nayajcan guial nabajnan zi'c rayal, guial rayagbeen conin naj diidxli, guial raya'pan pacens nayajc t en benza'c con ree bejn, guial nabajnan con xSprijt Dios, guial diidxli ray nan ben ren ree, <sup>7</sup> guial ranen ni naj diidxli, guial cay jn Dios dunujn yudar, n  guial rad en consejw loj ree bejn o radxi'n xtiidx ree bejn con xtiidx Dios. <sup>8</sup> Yu' dxej rajp ree bejn dunujn respejt, yu' t e dxej rnieeguidx reeman dunujn. Yu' dxej rniee reeman diidxza'c ree por dunujn, yu' t e dxej rniee reeman dunujn diidxguidx. R jnn  reeman dunujn zi'c b n rusquiee majsi diidxli naj ni raneen. <sup>9</sup> Yu' dxej r jn reeman zi'c b n ad n nbeet dunujn, majsi n nbee reeman dunujn. Majsi rul   ma yay jtan per ad ray jttan, abi' majsi xhiet  z r jnn  reeman dunujn per ad rug jtt reeman dunujn. <sup>10</sup> Majsi yu' naya du luxdoon, per raguieenan naguiejn din guiguien guial yu' du luxdoon nix. Majsi b nprob dunujn per por dunujn zien ree b n ma naj rijcw niz loj Dios guial ma ragbee reeman xtiidxaman. Majsi achet raya'pan loj guidxliuj guie, per achet rayaadxan.

<sup>11</sup> B n Corinto, dunujn ma ranan gra por dunujn, achet ni naguie'ch par dunujn guial diidxli ray nan l jt. <sup>12</sup> Dunujn ad rlioxt ray nan l jt, l jt bal id r nriddi dunujn. <sup>13</sup> Per naj rnien ' l jt zi'c rnieen  tijb dad gra xi'nman: Gol g y n dunujn zi'c ray nan l jt.

*Nayajc ree zi'c xyadoo Dios naban*

<sup>14</sup> Gol gojp cudad xhie ree compromis güündi con ree bén ad rliladxt Dios, din garen naj xixgab ree bén ma zinal ree xnejz Dios guial loj xixgab ree bén contzi naban. Garen naj xixgab ree bén ridxga' xtiidx Dios guial loj xixgab ree bén ad ridxga't laan. <sup>15</sup> Lëjt ragbee guial ad zajct gac Cristo tijbzi con xindxab, ziangajc garen naj bén rliladx Cristo guial loj bén ad rliladxt laaman. <sup>16</sup> Garen naj ree bén rliladx dux Dad ree Dios guial loj ree bén rliladx ni naladx reeman naj dios. Din dunuj ree guial raliduladx ree Dios naban, dunuj ree nayajc xyadoodan zi'c rëb tiblajt loj xtiidxaman lod rëb:

Naj gabajnné' laa reeman gazu tëen con laa reeman bantëez guin che reeman.

Naj gac xDios reeman

abi' laa reeman gac da bejnan.

<sup>17</sup> Rëb tëe loj xtiidx Dios:

Gol barii loj ree ben mal, gol been tiblax.

Ad güündi ni dxuudx din yaca'n lëjt,

<sup>18</sup> abi' naj gac tijb Dad par lëjt

guiáad lëjt gaquidi da xi'ngaanan në daxi'ndxa'pan.

Zian rëb dux Dad ree Dios bén ca' gra guialrniabee.

## 7

<sup>1</sup> Ni guin ree naj ree promejs ni ma been Dios con dunuj ree nayajc ree bén rliladx ree Jesucrist. Zeel rayal yaguieen ree naguiejn yabajn ree naya. Yasa'n ree tiblax dol, xgab mal, në gra ree ni dxuudx. Abi' guixie guixie yaguieen ree naguiejn yabajn ree zi'c rën Dios por respejt ni raya'p reeman.

### *Rabaa Pab guial bayüjn ree bén Corinto xgab por xtol reeman*

<sup>2</sup> ¡Gol gojc benza'c con dunujn! Dunujn achet waguieenan lëjt, achet ni mal waguieenan lëjt ad wasquiee tëetan lëjt. <sup>3</sup> Ad nalaxidi caneguijdxan lëjt, din zi'c ma rnin lojdi diizd guia'xchej guial dunujn rayënan lëjt, abi' majsi yayëjtan o majsi yabajnan per tijbzi nayajcan con lëjt. <sup>4</sup> Dád ra'pan lëjt confianz abi' dád rabaanë'n lëjt. Majsi xhietëez guialzi caydüüdan, per zi'c rgu'di du luxdoon nix zeel dád rabaan, majsi xhietëez cayza'can

<sup>5</sup> Din diizd chi badxinan niz Macedonia achetzi guial yaziiduladxan por gra ni cayza'can, zi'c ni rüjnnë ree bejn dunujn në guialnadxeb ni caydüüdan. <sup>6</sup> Per Dios bén ragu' luxdoo ree bén yu'naya luxdoo, laaman bagu' du luxdoon chi bi't Tito guie. <sup>7</sup> Abi' ad guialzi bi'ttaman bayu du luxdoon nix, në guial bagu'di luxdooman zeel bayu du luxdoon. Naman du lojn guial dád rëndi guguaadi naj, yu' tëedi xgab yu'naya tëedi por naj. Laan naj ni rabaanë'n guial yu'quidi xgab por naj.

<sup>8</sup> Majsi naya guyu luxdoodi por gui'ch ni guxhalan lojdi, per achet naladxan. Majsi dád naya guyu luxdon chi guxhalanan guial ragbeen zunayadi tiblax, <sup>9</sup> per yan nix yu' luxdon, ad guial guyu nayatidi, yu' luxdoon nix din por guialguyunaya guin ma bayüjndi xgab zëdi loj xnejz Dios. Guyunayadi abi' gudaandi zi'c rën Dios, abi' achet ni mal waguieenan lëjt. <sup>10</sup> Din chi runaya luxdoo bejn zi'c rën Dios, guialrunaya guin rüjn yudar persi rayüjn bejn xgab por xtolaman, zian rarii bejn loj casti, abi' ad yu't dxej yayüjn bejn xgab guial gulaaman loj casti guin. Per guial runaya luxdoo bejn abi' ad rüjntaman naguiejn chu'man loj xnejz Dios, dxel ad zajct gapaman guialnaban delant loj Dios. <sup>11</sup> Per lëjt gol baguiaa zi'c ma been yudar guial guyunayadi abi' gudaandi zi'c rën Dios. Por guial guyunayadi nayob beendi naguiejn bazuxnejzidi ni ma rnin cayüjn tijb lëjt, abi' balendi bidxeb tëedi por ni cayüjnx. Dxel ma rënejzdoodi gazun con lëjt, badëe tëedi laax casti zi'c rayal. Por gra ni beendi zian biguien guial achet dol rajpidi por zian. <sup>12</sup> Gui'ch ni guxhalan lojdi, ad guxhaltanan guialzi rünan xgab por bén cayüjn dol guin o guial rünan xgab por bén cazagdiaj por xtol bén guin. Guxhalan gui'ch guin lojdi din

gulüüdi loj Dios guial yu'guijcquidi dunujn. <sup>13</sup> Laan naj ni rabaanë'n guial beenquidi zian.

Abi' yan mazri rabaan guial raguiaan Tito yu' luxdooman zagdxe baguiaadaman guial dád naza'c gojqquidi con laaman. <sup>14</sup> Zeel ad basa'nxtutidi naj por gra zi'c bazatan lëjt lojman. Din gra ni rën por lëjt naj diidxli zi'c ragbeedi guial dunujn ganax diidxli raneen, abi' tëë diidxli naj ni raguie'chan loj Tito por lëjt. <sup>15</sup> Yan dad rusaaladxaman lëjt guial rusaaladxaman xhienaag bazoobidi xtiidxaman në gra respejt ni gopidi laaman chi guzuman con lëjt. <sup>16</sup> Dád nix yu' luxdon guial ra'pan lëjt confianz par gra.

## 8

### *Guial rudëed gon con guidib luxdoo*

<sup>1</sup> Yan compniar raliduladx ree Jesucrist, rayënan gagbeedi xhienaag cayagnë Dios bén rlliladx ree Jesucrist niz Macedonia. <sup>2</sup> Majsi xhietëez cazajc reeman, per ad rucwëëzt rguien guial dád rabaa reeman. Majsi dád bénprob reen, per dad rabaa reeman rudëed reeman cintabl par gagnë reeman bejn ree. <sup>3</sup> Naj ragbee guial diidxli been reeman yudar bejn ree xt lod baneetzan laa reeman. Laa reeman been yudar mazri guial loj ni baguieenan xgab, sin guial chu güün laa reeman naguiejn. <sup>4</sup> Dád been reeman naguiejn du lojn din yatiëjban guial në laa reeman güün yudar bén rlliladx ree Jesucrist, <sup>5</sup> abi' been reeman yudar mazri guial loj ni baguieenan xgab, laan naj guial diidxli ma basa'n laagajc reeman loj Dios, laan naj ni been reeman yaloj. Zeel yan ma za' reeman par güün reeman ni yaguie'chan loj reeman guial rën reeman güün reeman zi'c rën Dios. <sup>6</sup> Zeel yan zi'c ma guzuloj Tito cuto'paman yudar guin, raguie'chan lojman din gulox guto'paman laan entr lëjt. <sup>7</sup> Dunujn rayagbee guial par gra zagdxe zëdi: Diidxli rlliladxidi Jesucrist, ragbeedi xcwentaman, achet ryaadxidi par guinieedi xtiidxaman, za'sindi par güündi laaman sirv rën tëëdi dunujn, yan gol been naguiejn din guiguien guial najdi benza'c par güündi yudar con ni ranan lojdi. <sup>8</sup> Ad rüntan lëjt naguiejn guial gudëedi ni rdo'p, per rugojnan lëjt zi'c rabaa ree ben ren guial rüjn reeman yudar, din bal rëndi gulüüdi guial diidxli rëndi xcompniaridi. <sup>9</sup> Din lëjt ragbee zi'c naza'c Dad Jesucrist, bén basa'n gra guialnaza'c xanyabaa, abi' bi'taman loj guidxliuj zi'c tijb bén ni achet rajp din por laaman yayal në lëjt xguialnaza'c Dios.

<sup>10</sup> Zeel rnin lojdi guial zagdxen gulooxidi ni guzulojdi gudibijz. Yaloj lëjt been xgabza'c guial güündi yudar, abi' laa guzuloj gajquidi. <sup>11</sup> Yan zi'cgajc yu' luxdoodi nix guzulojdi, ziangajc gol babaa gusnuudi gudëedi ni rdo'p zi'ctzi galguzujdi. <sup>12</sup> Din chi diidxli rën bejn güünman yudar, xhietëez naag zajc güünman yudar. Ad rayalt gudëedaman xt ni ad rajptaman.

<sup>13</sup> Ad canitan lojdi guial tëdidi tarbajw cwe'quidi xt ni ad rajptidi par güündi yudar bén ryaadx ree xhienin chitëë xhie guiyaadx reeman, ni rayënan naj guial tibloj yaguieen dulasa' ree yudar. <sup>14</sup> Yan lëjt zajc güündi yudar bén ryaadx ree xhienin, dxel despuejs güün reeman lëjt yudar con ni ryaadxidi. Zian tibloj yaguieen du lasa' ree yudar. <sup>15</sup> Loj xtiidx Dios rëb: “Bén bato'p zro' achet been sobr, abi' bén bato'p ta'nzi achet biaadxaman.”

### *Tito con ree xcompniaraman*

<sup>16</sup> Quixtëë Dios badëëman loj Tito lasa'gajc xgab rünan por lëjt. <sup>17</sup> Yan chi raguie'chan lojman guidganajman lëjt, laa cwëb gajcaman guial ma rënman guguiaaman lëjt, ad beent naguiejn chu niniabee ni'taman.

<sup>18</sup> Abi' con laaman cayxhaalan stijb dux compniaran bén ma nünbee ree dux compniar ree bén rlliladx ree Jesucrist guidibczi, guial rulüüman bejn ree xtiidxza'c Dios zagdxe. <sup>19</sup> Ma bacaabee tëë ree dux compniar raliduladx ree Jesucrist laaman din saman con dunujn din güünman dunujn yudar yune'n ni cado'p. Abi' yudar guin cado'pan din guiguien guial rayënan yaguieenan yudar stijb ree dux compniar ree, abi' por yudar

guin guza't reeman Dad Jesucrist zagdxe. <sup>20</sup> Zeel cwabee bén guie din saman con dunujn chitëe xhie gucaagua reeman dunujn por gra yudar ni cado'p ni naca'n par yugsa'nan. <sup>21</sup> Din dunujn rayënan yaguieenan gra zi'c rayal, ad naabtizi loj Dad Jesucrist, në loj ree bejn.

<sup>22</sup> Yan cayxhaalan Tito con bén guin cayxhaalnë'n laa reeman stijb dux compniaran bén ma balu'been zien volt guial diidxli rënman güünman yudar, abi' mazri yan guial dád rajpaman lëjt confians. <sup>23</sup> Bal chu guiniabdiidx por Tito, gol güjdx guial da compniaran najman, laaman cayüjn naj yudar par günan lëjt yudar chinalidi xnejz Dios. Guiáad za' tio'p dux compniaran bén zë ree con laaman, dux compniar ree bén rliladx ree Jesucrist guxhaal laa reeman, abi' ruza't reeman Jesucrist zagdxe. <sup>24</sup> Yan gol balüü loj reeman guial diidxli rëndi bejn ree, din por laa reeman gagbee ree los demazri ree compniar rliladx Jesucrist xcwentidi, din guguaa tëe reeman guial ni diidxli naj ni ma rën loj reeman xcwentidi.

## 9

### *Yudar par ree xbejn Jesucrist.*

<sup>1</sup> Yan por yudar ni rayal yale'can par yaguieenan yudar dux compniar ree bén rliladx ree Jesucrist, ad ryaadxt ganin mazri xcwentan, <sup>2</sup> din naj ragbee guial ruladxidi güündi yudar. Abi' xt nix yu' luxdon rën loj ree bén Macedonia guial lëjt bén Acaya diizd gudibijz cayüjn di nagueijn cayüjn di yudar, abi' gra ree bén Macedonia been nagueijn güün yudar chi bigueijn reeman zian. <sup>3</sup> Zeel caxhalan Tito con za tio'p ree dux compniar ree din guiguien guial waliqui ni ma gunen por lëjt xcwent yudar guin, din güündi nagueijn güündi yudar zi'c ma rën por lëjt. <sup>4</sup> Din bal guidnë'n tio'p choon ree bén Macedonia ad yadxaaglojn lëjt ad za'tidi porvinid, abi' natun par naj chitëe ganin natun par lëjt por confians ni ra'pan lëjt. <sup>5</sup> Zeel benan xgab rën loj Tito con za tio'p dux compniar ree guial mejorli ned gaj reeman guidganaj reeman lëjt, din güün tëe reeman yudar guloox guto'p reeman yudar ni ma nadi din ma najn purvinid chi guialan. Zian guiguien guial diidxli rëndi yazaladxidi ad guialzi canabeetan lëjt.

<sup>6</sup> Naj rni lojdi bén rxübin ta'n, ta'n gajc raca'man, guiáad bén rxübin zro', zro' gajc raca'man. <sup>7</sup> Tijbgaj lëjt gol badëe zi'c naj xixgabidi gudëedi, ad mal gant ad nagueijn tëet, din Dios rënman bén razaladx guidib luxdoo. <sup>8</sup> Abi' Dios rajpaman gra guialrniabee par güünman lëjt yudar gapidi gra ni ryaadxidi chitëe xhie guiyaadxidi din güündi yudar zi'c rayal. <sup>9</sup> Loj xtiidx Dios rëb:

Bén ni rgui's ni rajpaman abi'  
rudëeman laan loj ree bénprob,  
ad yu't dxej yayanladx reeman  
ni zagdxe ni rüjnman.

<sup>10</sup> Yan Dios bén razaladx bin rxübin bejn, bén razaladx guialraw par ree bejn, laaman gulüü lëjt xhie güündi din gapidi gra ni rayal gapidi, din gac güündi yudar mazri bén ryaadx ree xhienin. <sup>11</sup> Zian mazri naj ni gunee Dios lojdi din gusnuu güündi yudar yazaladxidi. Abi' por yudar ni guixhiaalnëdi dunujn par ree compniar rliladx ree Jesucrist, laa reeman gudëed quixtëe loj Dios. <sup>12</sup> Abi' yudar guin ad züjntan sirv naabzi par loj ni ryaadx reeman laan, güünan sirv në par gudëed reeman mazri quixtëe loj Dios. <sup>13</sup> Por yudar guin gagbee reeman guial cuzoobquidi xtiidxza'c Jesucrist zi'c rliladxidi laan abi' guza't reeman Dios zagdxe por zian, në guial najdi benza'c rgui'sidi ni rajpidi par laa reeman në par gra ree bén ryaadx laan. <sup>14</sup> Abi' zën reeman lëjt, cwedx tëe reeman Dios por lëjt por xgab za'c ni banee Dios lojdi guial güündi yudar. <sup>15</sup> Quixtëe Dios por ni ma bazaladxaman duloj ree por xi'nman, xt ni'quid radxejlt xhie yaguie'ch ree por zian!

## 10

### *Guialrniabee ni rajp Pab guial najman xi apóstol Jesucrist*

<sup>1</sup> Naj Pab, yu' ree bén na guial benza'c naj chi za'n con lëjt, abi' chi za'n zijt sin guial rdxeb rdiilë'n lëjt. Per zi'cgajc ninieenë Cristo lëjt con respejt në con diidxza'c, rniaaban lojdi guial <sup>2</sup> xi nix chi guialan guidganan lëjt ad rüjnt naguiejn gadilë'n bén rëb ree por da xgabzan cayünan ni cayünan, din ad rdxebtan ganenë'n laa reeman. <sup>3</sup> Walican nayajcan bênguidxliuj, per ad raguieentan naguiejn yaguieenan gan por dux xgabzan zi'c rüjn ree bén ad zinalt xnejz Dios. <sup>4</sup> Ad raguieentan naguiejn yaguieenan bejn ree gan por dux xgabzan, dunujn raguieenan gan por xguialrniabee Dios, guialrniabee ni zajc guse'n xhietëez ni mal. <sup>5</sup> Por guialrniabee guin baguieenan gan loj ni rudxiib ree bejn duguijcan, abi' baguieen tëen gan loj guial nadxal reeman ni rudxoon güünbee reeman Dios. Zianan rase'n nan xhietëez xgab din chile' gucaagdiajg reeman xtiidx Jesucrist. <sup>6</sup> Abi' lëjt chi ma cuzoobidi xtiidx Dios diidxli, dxel dunujn ma nadxu'n par yazuxnejzan gra ree bén ad wazoobt diidx zagdxe.

<sup>7</sup> Lëjt mazri ridxga'di zi'c ruguiaadi bejn. Bal yu' bén rüjn xgab guial diidxli najman xbejn Cristo, rayal cu'guijcaman guial nayajc ree xbejn Cristo zi'cgajc laaman. <sup>8</sup> Abi' majsi ganin lojdi mazri xcwent guialrniabee ni banee Dios lon, ad ratutan din laaman banee guialrniabee par günan lëjt yudar chignia'di mazri xcwent xnejzaman ad par gunijttan lëjt. <sup>9</sup> Ad naladxidi guial rënzhan gucheban lëjt con ree da gui'chan. <sup>10</sup> Din yu' ree bén ni rëb guial diidx naa abi' sin guialrdxeb rnienë'n lëjt loj ree da gui'chan, abi' chi za'n con lëjt ni'quid rulüüt lasajcan par lëjt, ni'quid radxat loj ree bejn ni rnien. <sup>11</sup> Per naj rnin lojdi guial bén rëb ree zian rayal gagbee reeman guial zi'cgajc raneenë'n lëjt loj dux gui'chan chi nadxu'n zijt, ziangajc zajc yaguieenan chi nadxu'n con lëjt.

<sup>12</sup> Din dunujn ad raguieentan zi'c rüjn ree bén rlies xvalor gajc, per ni'czi ta'n ad raguieentan xgab yaguieenan zian. Din nitontzi rüjn reeman chi rlies xvalor gajc reeman, ruguiaa laagajc reeman xhienaag naj reeman par ree stijb xcompniar reeman. <sup>13</sup> Per dunujn ad ralest dux valor gajcan mazri guial loj ni rayal, din dunujn ranazan ni naj diidxli zi'c gulej Dios dunujn yaguieenan, yan ma cwëjbaman badxinan ladxidi. <sup>14</sup> Zeel ad güündi xgab guial cadëdtë caynabeen lëjt, din yaloj dunujn bio'p ladxidi par yasiidan lëjt xtiidxza'c Jesucrist. <sup>15</sup> Dunujn ad ralest dux valor gajcan por tijb ni been stijb bejn. Per ralëezan guial ni's xguialrliladxidi, din yasnuu yaguieenan lëjt yudar gusnuu güünbeedi ni rayal gagbeedi xhienaag rayal yaguieen ree. <sup>16</sup> Zian ma zile' yo'n mazri delant ladxidi par yatie'chan xtiidxza'c Jesucrist, per lod achut wazuloj chitëe yales dux valor gajcan con ni ma been ben ren.

<sup>17</sup> Bal yu' bén rën guilies xvalor gajc, mejorli guiliesaman xvalor dux Dad ree Dios. <sup>18</sup> Din ad bén rliest xvalor gajc naj bén raya'n zagdxe loj Dios, bén raya'n zagdxe naj bén rlies xvalor Dios.

## 11

### *Pab con ree apóstoles bén rusquiee ree*

<sup>1</sup> Yan, ¡Xi nix taandi naj con tio'p choon ree da xgab tontan! Per naj rni lojdi gol gudaan naj. <sup>2</sup> Naj rënan lëjt zi'cgajc rën Dios lëjt. Zi'cgajc tijb dad rajp xi'ndxa'p biin ni ma naj guxhliaa din chile' guidxinm naya loj xin tia' laam, zian rënan guidxinë'n lëjt loj Cristo naya sin dol. <sup>3</sup> Per rdxeban chu' bén gusquiee lëjt zi'c basquiee bëel Eva, abi' ad züjntridi xgab guidib luxdoodi xcwent Jesucrist. <sup>4</sup> Din chi ri't ben ren rüman diidx lojdi xcwent Cristo, per garen guial zi'c ma balüün lëjt, o chi ri't bén ren rüman diidx lojdi xcwent Sprijt, per ad lasa't xSprijt Dios bén ma nabannëdi, o chi ri't ben ren lojdi naman xhienaag din gapidi perdon, per garen guial loj ni ma ranan lojdi, lëjt laa ridxga' gajquidi laa reeman. <sup>5</sup> Per naj rulüü achet ryaadxan delant loj ree bén rëb laa reeman naj quijb

xi apóstoles Jesús. <sup>6</sup> Din majsi achet sirv naj par ganen, per ad ryaadxtan guialrignia' abi' lëjt ragbee guial diidxlin por gra ni ma baguiaadi baguieenan.

<sup>7</sup> Per, ¿chuj ni ni malan benan ya guial ad bentan benro' lojdi persi benan gan gojquidi xbejn Cristo, në guial ad baquijxtan lëjt chi basidan lëjt xtiidx Dios? <sup>8</sup> Ben renli ree bén naj ree xbejn Cristo cwa'n xmilia reeman persi beenan naj yudar la'tgaj guzun con lëjt persi basidan lëjt xtiidx Dios. <sup>9</sup> Abi' chi guzun con lëjt, chi biaadxan xhienin ad gunaabtan lojdi güündi naj yudar, bén Macedonia ree bén rililadx ree Jesucrist laa reeman bidnë ni biaadxan nadxel. Ad goct wanin lojdi guneedi xhienin par naj, ad yu' tëet dxej ganin guial rüjn naguiejn güündi naj yudar. <sup>10</sup> Zi'c najn xbejn Cristo rnin lojdi ni naj diidxli, guial niz Acaya Achutczzi zajc gudxoon guial chu' luxdon zagdxë guial guiën ni benan con lëjt. <sup>11</sup> Abi' ¿chexc zeel benan zian con lëjt? ¿Guial ad rëntan lëjt ya? Per Dios ragbee guial dád rënan lëjt.

<sup>12</sup> Abi' gusnuu günan zi'c cayünan xt yandxej guial ad zanaabtczan lojdi güündi naj yudar, din chitëë xhie guiniee ree bén ruladx guilies xvalor gajc guial naj reeman xbejn Jesús guial zi'cgajc cayguieenan cayüjn reeman. <sup>13</sup> Din laa reeman rëbzi reeman guial naj reeman xi apóstoles Jesús, rusquieezi reeman bejn ree rüjnzi reeman zi'c rulüü naj reeman xi apóstoles Jesús. <sup>14</sup> Per xt ni'quid radxat loj bejn por zian, din xt xindxab zile' gulüüloj loj bejn zi'c tijb xianjl Dios. <sup>15</sup> Dxel xt ni'quid radxat loj bejn guial bén ni cayüjn ree xmandad xindxab rëb reeman guial laa reeman cayüjn xmandad Dios. Per laa reeman zayal reeman casti ni rayal reeman por ni cayüjn reeman.

### *Tarbajw ni gudëd Pab guial najman xi apóstol Jesucrist*

<sup>16</sup> Yan canin lëjt stijb: Ad naladxidi guial ad nadëdguientan, per bal rüjnndi xgab zian gol basa'n za naj ganen zi'c tijb bén ad nadëdguient din nëgajc naj gales da valoran majsi tibda'nzi. <sup>17</sup> Ad nat Dios guial gales da valoran zi'c cayünan, per gales da valoran zi'c tijb bén ad nadëdguient. <sup>18</sup> Zi'c yu' zien ree bén rlies xvalor gajc por ni rüjn reeman loj guidxliuj guie, yan ziangajc naj gales da valor gajcan. <sup>19</sup> Din guial najdi bén rignia' ad nawëëgt naj taandi bén ad nadëdguient ree. <sup>20</sup> Rdaandi bén rniabee ree lëjt rüjn reeman zi'ctzi rën reeman, rdaandi bén rtia' ree ni rajpidi, bén rusquiee ree lëjt, o rniee reeman lojdi ganax ree diidx nabë abi' xt rtiëjbidi rëëz reeman ro'di. <sup>21</sup> Majsi natu'n par naj, per naj rni lojdi guial ad baya'ptan valor guial naguieennë'n lëjt zian.

Per bal rlies xvalor reeman por xhiedxitzinin, nëgajc naj zajc gales da valoran. Canen lojdi zi'c tijb bén ad nadëdguient, din ad xnejztan. <sup>22</sup> Per bal na reeman guial naj reeman bén Hebreo, nëgajc naj naj bén Hebreo. Bal na reeman guial naj reeman bén Israel, ziangajc naj bén Israel gajc naj. Bal na reeman guial loj xdiaa Abraham zëed reeman, nëgajc naj zial loj xdiaa Abraham. <sup>23</sup> Abi' bal na reeman guial xmandad Cristo cayüjn reeman, naj mazri cayünan xmandadaman. Majsi zi'c rniee bén ad nadëdguient rnien chi rnin zian, per diidxli guial naj mazri ma benan xmandad Cristo guial loj reeman. Abi' por zian mazri ma guyun ladxguiib guial loj reeman, mazri ma gudijn ree bejn naj guial loj reeman abi' mazri zien volt ma guzun loj guialgüjt. <sup>24</sup> Gaay volt ma gudijn ree bén Israel naj, abi' beegaj gudijn reeman naj zi'ctiubitap volt rugaz reeman duu ladan. <sup>25</sup> Choon volt gudijn reeman naj con yag, abi' tib volt bacaaguiaj reeman naj. Choon volt ma wej barcw lod za'n xan nijsdoo, abi' tibdxëj tibguiaal baya'n nan loj nijsdoo. <sup>26</sup> Guidibczzi lod ma wan, gudëëdan loj ree ni nadxeb chi gudëëdan loj ree guiw, loj ree béngubaan, loj ree bén ladxan bén Israel ree në loj ree bén ad najt bén Israel. Ma gudëëd tëen loj ree ni nadxeb luguiedx ree, dajn ree, loj nijsdoo, në loj ree bén rusquiee na reeman guial naj reeman xbejn Cristo. <sup>27</sup> Dád ma guzaagdiajn. Dád zien volt ma gulën bacaal, ma gulaanan, ma we'can nijs, abi' ma guyu dxej ni achetczzi gudawan. Ma gognajlan, ma biaadx tëë da xaban.

<sup>28</sup> Abi' ad laatzanan ma guza'can, zien ree ni ma guza'can. Abi' guixie guixie rünan xgab por ree xbejn Cristo bén zojb ree niz lod ma wan. <sup>29</sup> Bal xhie cazajc tijb ree bén rililadx Jesucrist, cayünan xgab por laaman. Abi' bal cusquiee reeman tijb ree bén rililadx Jesucrist par güünman dol, dád ralenan yu' tēen laaman xgab. <sup>30</sup> Bal rüjn naguiejn gales da valor gajcan, tijbzi ni ganin por naj, naj por guialrzagdiaj ni ma gudēedan. <sup>31</sup> Abi' Dios xDad Dad Jesucrist, laaman bén rayal respejt guidib tiamp, laaman ragbee guial diidxli naj ni canen. <sup>32</sup> Tiamp chi canabee rey Aretas, wan luguiedx Damasco dxel gunabee gobernador luguiedx guin biaaw nejt par guiniaaz reeman naj. <sup>33</sup> Per guyu ree bén ni badxe' naj lēn tijb dxüm abi' gulet reeman naj niz ro' ventan ni naj ro' ze' ni nayaw guiedx guin, zian gulaan loj gobernador guin.

## 12

### *Ni balüüloj lon*

<sup>1</sup> Achet rüjn bejn gan guial guilies xvalor gajcaman, per rayal ganin lojdi por ree ni balüüloj lon nē ree ni balüü Dad Jesucrist naj. <sup>2</sup> Naj nünbee tijb xinguaaaw rililadx Jesucrist, ma gojc chidaj ijz wejx xanyabaa lod zojb Dios. Ad ragbeetan bal binē xcuerpix o xsprijtzix wej, ad ragbeetan, tijbzi Dios ragbee. <sup>3</sup> Bal binē xcuerpix o xsprijtzix wej, ad ragbeetan, tijbzi Dios ragbee. Per naj ragbee <sup>4</sup> guial wejx lod zojb Dios, lod biguiejnx diidx ni xt ni'quid radxejlt xhienaag ninieex laan guial ad rayalt gagbee gra bejn laan. <sup>5</sup> Bén zii zajc galesan xvalor, per ad rliestan da valor gajcan, ni rnizan por naj por ree guialrzagdiaj ni ma gudēedan. <sup>6</sup> Abi' majsi gales da valoran, ad cayüntan zi'c tijb bén ad nadēdguient din ganax ni diidxli naj ni ganin. Per ad rüntan zian chitēē yadxaloj bejn naj mazri guial loj ni rayal por ni ruguiaa reeman rünan, o por ni rigujiejn reeman rnien.

<sup>7</sup> Nē par chitēē gales da valoran zro' por gra ni ma balüü Dios naj, cadēedan tijb guialzi ni naj zi'cgajc zi'c chi yu' tijb guiējch tiblajt bejn. Laan naj xchiin xindxab par güünnaax naj chitēē gales da valoran. <sup>8</sup> Choon volt ma canaaban loj Dios din chiquiedaman guialzi ni cadēedan, <sup>9</sup> per laaman na lon: “Zi'c rēnan lüj achet gac, din mazri rguien da guialrniabeen chi cazagdiaj bejn.” Zeel rabaan por ree guialrzagdiaj ni cadēedan din guiguien guial nabanen con xguialrniabee Cristo. <sup>10</sup> Rabaan por xhietēēz guialrzagdiaj ni cadēedan, o nē chi rnieeguijdx bejn naj, o chi ryaadxan xhienin, o chi xhie rüjn bejn naj, nē gra ree tarbajw ni cadēedan, guial cadēedan laan guial rēnan Cristo. Din chi cazaagdiajn dxel mazri ra'pan xyudar Cristo.

### *Yu' Pab xgab por ree bén rililadx Cristo luguiedx Corinto*

<sup>11</sup> Gunenē'n lējt por naj gajc zi'c tijb bén ad nadēdguient, per lējt rajp dol guial benan zian. Din lējt naj bén rayal guilies da valoran delant loj ree bén ni rēb guial laa reeman naj quijb xi apóstoles Jesucrist. Din majsi tijbzi bén ad rüjnt sirv naj, per achet ryaadxan delant loj reeman. <sup>12</sup> Chi guzun con lējt ad balenya'tan guial günan milagr ree nē gra los demazri ree ni badxalojdi ni benan nē graloj ree ni benan ni been sirv zi'c sen guial diidxli najn xi apóstol Jesucrist. <sup>13</sup> Gra zi'c ma benan con gra ree compniar rililadx Jesucrist lod ma wan, ma benan laan con lējt. Tijbzi ni ad bentan con lējt naj guial ad rnitan lojdi guial güündi naj yudar con gra ni ryaadxan la'tgaj guzun con lējt, per bal guneguijdxan lējt por zian ¡Gol been naj perdon!

<sup>14</sup> Yan ma cayünan xgab guidganan lējt stijb, laan naj ni yayon volt guidganan lējt. Abi' ni'qui yan ad zanitan lojdi guial güündi naj yudar, ad ni rajptidi rēnan, lējt naj bén rēnan. Din ad xi'nt bejn rguuil xhienaag guibanman, dad guin ree rguuil xhienaag guiban ree xi'n reeman. <sup>15</sup> Abi' majsi gra ni ra'pan günan gaxt, o majsi yadib da cuerpan par günan lējt yudar, per achet güünan. Majsi rulüü chi mazri rēnan lējt, ta'nzi rēndi naj.

<sup>16</sup> Walican guial ad gunaabtan lojdi niagnēdi naj nuneedi xhienin, per yu' ree bén rēb guial benan zian din nasinan par gusquien lējt. <sup>17</sup> ¿Wen basquieen lējt ya chi guxhalan



bén bidganaj ree lèjt? <sup>18</sup> Nè chi rën loj Tito guial gui'taman guidganajman lèjt abi' guxhalan laaman con stijb dux compniar ree bén rliladx Jesucrist, ¿wen yu' ni basquiee Tito lojdi ya? ¿Nid zi'c laaman zi'c naj tiblojzi naj xgab raguieenan ya abi' zi'cgajc rünan rüjnman?

<sup>19</sup> Por gra ni ma ranan lojdi, ad naladxidi guial caylaj dunuj gajcan, din achet waguieenan lèjt. Dios ragbee guial zi'c nayajcan xbejn Cristo cayneenë'n lèjt, abi' gra ni caynan lojdi najn par yaguieenan lèjt yudar chinalidi xnejz Dios guial rayënan lèjt. <sup>20</sup> Din rdxeban guial chi guialan guidganajman lèjt ad zadxaaglojtan lèjt zi'c rënan, abi' lèjt ad zuguaatidi naj zi'c rëndi guguaaadi naj. Rdxeban gadxaaglojn lèjt con wadijl, guialnadëdloj, guialrdxe'ch, guialrlies xvalor gajc, guialrniee guijdx lasa', guial ruza't bejn, guial rüjn benro' nè guial ad nadxagtri lasa'di. <sup>21</sup> Rdxeb tëen guial chi guidganajman lèjt stijb abi' yaya'nxtun por lèjt delant loj Dios. Abi' dád chu' naya luxdon por zien ree lasa'di bén ad rbëzt ree rüjn dol, bén ad rayüjnt ree xgab zi'c naban reeman. Ad rucwëëzt rzunë reeman bén ad najt lacheel reeman, ad rucwëëz tëët reeman vijs ni rajp reeman o stijb ree ni ad rüjnt sirv ni rüjn reeman.

## 13

### *Diidx bigra bacaa Pab loj gui'ch guie*

<sup>1</sup> Yan ni yayon volt guidganajman lèjt. Chi guialan, gra ni nadi por stijb ree xcompniaridi, rayal chu' tio'p o choon testiw din guiguien guial diidxli naj ni canadi. <sup>2</sup> Abi' zi'c rën loj ree bén ni cayüjn dol chi bialan bidganajman lèjt ni barojp volt zi'cgajc ma rnin loj gradi, laagajcan canin lojdi yan za'n zijt guial chi guialan guidganajman lèjt stijb, achetzi ni téd zezi par ree bén ni cayüjn dol. <sup>3</sup> Zian gagbeedi ni rëndi gagbeedi guial Jesucrist cunee diidx ni rayal ganin lojdi. Abi' Jesucrist achet ryaadxaman par güünman zi'c rayal güünman con lèjt abi' con lèjt culüü xguialrniabeeman ni rajpaman. <sup>4</sup> Walican güjt Jesucrist loj crüzj zi'c tijb bén ad rajpt guialrniabee, per yan nabanman por xguialrniabee Dios. Abi' zi'c güjtaman zi'c tijb bén ad rajpt guialrniabee ziangajc dunuj ree rulüü ad raya'pt ree guialrniabee, per zi'c nayajcan xbejn Cristo raya'pan xguialrniabee Dios par yaguieenan ni rayal yaguieenan con lèjt.

<sup>5</sup> Lèjt gajc gol been xgab bal walidi rliladxidi Jesucrist. Lèjt gajc gol been xgab xhienaag nabandi. Gol gogbee guial ma nabandi con Jesucrist, bal id rnieezidi guial rliladxidi laaman. <sup>6</sup> Balzianclaa gagbeedi guial dunuj diidxli raliduladxan laaman. <sup>7</sup> Abi' rarejdxan Dios por lèjt chitëë güündi ni mal, ad par yaya'ntan zagdxe delant loj ree bejn, cayguieenan zian par güündi ni naj zagdxe, majsi par ree bejn ad cayguieentan zi'c rayal. <sup>8</sup> Per ad zajct yaguieenan tiblad ni naj diidxli, dunuj caynazan ni naj diidxli. <sup>9</sup> Zeel yu' du luxdoon nix achet güünan ni cayza'ctzan din chile' sudxi'chidi loj ni rliladxidi. Abi' rarejdxan Dios din gagbeedi guidiblagaa xhienaag guibandi xnejz. <sup>10</sup> Abi' caxhalan gui'ch guie lojdi dxelri guidganajman lèjt, din chi guialan guidganajman lèjt ad ryaadxt gadilë'n lèjt por guialrniabee ni bane Dad Jesucrist lon, guialrniabee ni baneeman lon par güünan lèjt yudar chignia'di mazri zagdxe xnejz Dios, ad par gunijttan lèjt.

<sup>11</sup> Yan compniar raliduladx ree Jesucrist par guloxan gui'ch guie, naj rni lèjt: Gol badxe' luxdoodi zagdxe, gol been naguiejn gol gubajn zi'c rayal, gol bagu' luxdoodi gol gubajn tëë zagdxe, gol babe'cdxe luxdoodi con ree xcompniaridi. Abi' Dios bén rën dunuj ree rabe'cdxe tëëman du luxdoo ree laaman gagnë lèjt. <sup>12</sup> Xhietëëz hor ni radxaag ree xcompniaridi, gol bagajpdioz lasa'di zi'c rayal. <sup>13</sup> Gra ree dux compniar ree bén rliladx ree Jesucrist niz guie rugajpdioz reeman lèjt.

<sup>14</sup> Dad Jesucrist güünle' gradi, guial rën Dios lèjt abi' xSprijtaman gagnë lèjt zianczi. Amén.

## Gui'ch ni guxhaal San Pabl loj ree b n Galacia rliladx Jesucrist

### *Rugajpdioz San Pabl b n rliladx ree Jesucrist*

<sup>1</sup> Naj Pab najn ap stol, per ad b nguidxliujt bacaabee naj ad laa t et reeman guxhaal naj, najn ap stol por Jesucrist n  por dux Dad ree Dios b n basban laaman loj guialg jt. <sup>2</sup> Gra ree dux compniar ree b n za' ree guie con naj ragajpdiozan l jt najdi b n rliladx Jesucrist niz Galacia. <sup>3</sup> Dux Dad ree Dios n  Dad Jesucrist g  nle' l jt yabe'cdxe t e reeman luxdoodi. <sup>4</sup> Jesucrist g jt por dux tol ree persi bab eman dunuj ree loj gra ree ni mal ni yu' loj guidxliuj guie zi'c goc xixgab dux Dad ree Dios. <sup>5</sup> Zeel rayalczi yaya'p reeman respejt zianczi. Am n

### *Achetri diidx ren ni zajc yab e dunuj ree loj dol*

<sup>6</sup> D d radxalon guial d d cari cab eladxidi xtiidx Dios, abi' laaman guial r n Jesucrist l jt zeel gurejdxaman l jt. Per l jt diidx ren ma ridxga'di <sup>7</sup> abi' ni'quid xtiidx Diosan. Diidxliczi yu' ree b n r n gagdxadi abi' r n reeman guxhaal reeman zi'c naj xtiidx Cristo. <sup>8</sup> Per bal yu' b n rul   l jt diidx ren ree guial loj ree diidx ni ma bal n l jt par gaquidi perdon, laaman ma rayal xcasti Dios, majsi chut eznin majsi naj gajc o majsi tijb xi anjl Dios. <sup>9</sup> Zi'c ma rnin l jt abi' yan ma rninan zatijb: Bal chu rul   l jt diidx ren ree guial loj xtiidx Cristo ni ma bililadxidi, laaman ma rayal xcasti Dios.

<sup>10</sup> Ad raguiltan mod guial yaya'nan zagdxre loj ree b nguidxliuj, r nan naguiejn din yaya'nan zagdxre loj Dios. Din bal g nan naguiejn yaya'nan zagdxre loj ree b nguidxliuj dxel ad cuzobtran xtiidx Cristo.

### *Xhienaag gojc zeel gojc Pab ap stol*

<sup>11</sup> Compniar raliduladx ree Jesucrist, r nan gagbeedi guial xtiidx Cristo ni ma bal n l jt ad b nguidxliujt gul eguijc laan. <sup>12</sup> Abi' ad cwa'tanan ad basid t etan laan por b nguidxliuj, Jesucrist gajc naj b n bal   laan naj.

<sup>13</sup> L jt ma biguiejn guial chi guyu'n loj xreligion ree b n Israel, guzunaalan b n rliladx ree xtiidx Dios din g nan laa reeman ni mal abi' benan naguiejn din gusa'n ni rliladx reeman. <sup>14</sup> Abi' naj mazri guzudxi'chan loj religion guin guial loj ree lasa' zidn 'n tijbzi guial benan naguiejn benan gra ree xcostumbr ree dux b ngulalan. <sup>15</sup> Per guial r n Dios naj, diizd chi gadan guial loj guidxliuj mal gulejman naj. Dxel chi beenman xgab. <sup>16</sup> Bal  loj xi'nman lon din gatiechan xtiidxza'caman loj ree b n ad najt b n Israel. Abi' chi goc zian achut loj bignabdiidxan, <sup>17</sup> ad watan Jerusal n nignan b n ma naj ree xi ap stoles Jes s gocli diizd chi gadan gac xi ap stol Jes s, laa wa gajcan niz Arabia dxel baye'can niz Damasco stijb.

<sup>18</sup> Chi goc choon ijz dxel wan Jerusal n persi benbeen B d abi' guzun con laaman chiin gubijdx. <sup>19</sup> Per achut ap stol ren baguiaan tijbzi Jacob bijch Dad Jesucrist. <sup>20</sup> Gra ni canin l jt naj diidxli abi' Dios ragbeechaaw guial ad rusquieetan.

<sup>21</sup> Dxelri wan niz Siria n  niz Silicia. <sup>22</sup> Per ree b n rliladx Cristo, b n zojb ree niz Judea ad way nbeet reeman naj nadxel. <sup>23</sup> Rguiejnzi reeman r b ree bejn: "B n guzunal dunuj ree yaloz par g nman dunuj ree ni mal yan ma catie'chaman xtiidx Jesucrist, majsi yaloz beenman naguiejn din yasa'n ree ni raliduladx ree Jesucrist." <sup>24</sup> Abi' rud e reeman quixt e loj Dios guial n  naj ma rliladx Cristo.

## 2

### *Bachajg Pab b n naj ree ap stoles*

<sup>1</sup> Chi goc chidaj ijz, dxel wan Jerusalén zatijb. Binë'n Bernabé con Tito, <sup>2</sup> din Dios na guial gan ni. Abi' Jerusalén guin badxaag dulasa'n tijb luar con ganax ree bén rniabee loj ree xbejn Cristo persi benë'n laa reeman diidx por xtiidx Jesucrist ni culün bén ad najt ree bén Israel. Benan zian din ad rëntan guial ni ma benan o ni cayünan gacan dxiin xlia'. <sup>3</sup> Per ni'qui Tito bén guzu ni con naj, majsi najman bén grieg ad beent reeman laaman naguiejn chu'man sen ni ru ree bén Israel. <sup>4</sup> Din guyu tio'p choon ree bén Israel been reeman zi'c rulüü naj reeman dux compniaran persi gojc bachajg reeman dunujn par gula'ch reeman conin ad raguieentran guial ma raliduladxan Jesucrist din gac nabee reeman dunujn yaguieenan zi'c rniabee ley. <sup>5</sup> Per ni'czi tabda'n ad batiëjbtan nüjn reeman dunujn gan, din ad rayëntan cwëëladxidi xtiidxli Jesucrist ni ma zinalidi.

<sup>6</sup> Abi' ree bén rniabee loj ree xbejn Jesucrist achetri na reeman lon guial rayal günan, majsi chutëez naj reeman din delant loj Dios tiblojzi naj bejn. <sup>7</sup> Luar ninia reeman xhie mazri nünan, laa gogbee gajc reeman guial Dios gulej naj din gatiechan xtiidxza'c Jesucrist loj ree bén ad najt bén Israel, zi'cgajc gulejman Bëd din guitie'chaman diidxza'c guin ree loj ree bén Israel. <sup>8</sup> Abi' Dios bén bacaabee gajc Bëd din gacaman apóstol loj ree bén Israel, laagajcaman bacaabee naj din gacan apóstol loj ree bén ad najt bén Israel.

<sup>9</sup> Zeel Jacob, Bëd con Waj bén rniabee ree mazri loj ree bén rliladx Jesucrist, gogbee gajc reeman guial Dios naj bén banee naj guialrniabee guin. Abi' banee yaa reeman zi'c tijb sen guial ma nayajcan compniar guial ma za' tëë reeman conform guial naj con Bernabé yuglüün bén ad najt ree bén Israel, guiáad laa reeman gulüü reeman bén Israel ree. <sup>10</sup> Ni gunabzi reeman du lojn din yaguieenan yudar bénprob ree, abi' laan naj ni ruladxan günan.

### *Gudilë Pab Bëd*

<sup>11</sup> Per chi we Bëd guiedx Antioquía, dxel gudilë'n laaman guial ad cayüjntaman zi'c rayal. <sup>12</sup> Guial yaloj gudawnëman bén ad najt ree bén Israel. Per chi bidxin ree bén guxhaal Jacob guiedx Antioquía, dxel ad bachajgtraman bén ad najt ree bén Israel guial bidxebaman xhie niëjb ree bén zinal ley. <sup>13</sup> Në los demazri ree bén Israel bén rliladx ree Jesucrist bén zojb ree ni në reeman been zi'c been Bëd abi' xt në Bernabé been zian. <sup>14</sup> Zeel chi baguian guial ad cayüjnt reeman zi'c rëb loj xtiidxza'c Jesucrist, dxel rën loj Bëd delant loj gra reeman: “Lüj najl bén Israel abi' ad nabantil zi'c laa reeman, ¿chexc zeel rüjnl naguiejn guiban ree bén ad najt ree bén Israel zi'c naban ree bén Israel?”

### *Guialrliladx Jesús rabëë bejn loj dol*

<sup>15</sup> 'Dunuj ree nayajc ree bén Israel diizd chi bayajl ree abi' ad yu't dxej babajn ree sin xley Dios zi'c ree bén ad najt bén Israel. <sup>16</sup> Per dunuj ree rayagbee guial achut zajc gac naya niz loj Dios por guial zinal bejn ley, gacaman naya guial rliladxaman Jesucrist. Zeel në dunuj ree ma raliduladx Jesucrist din yayajc ree naya delant lojman guial raliduladx reeman, ad guial cayguieent ree zi'c rniabee ley. Din achut zajc gac naya delant loj Dios guial zinalaman ley.

<sup>17</sup> 'Yan bal cayguieen ree naguiejn yayajc ree naya delant loj Dios, laan rulüü dunuj ree guial nayajcqui ree béndol, ¿wen mazri béndol cayüjn Cristo dunuj ree ya? ;Dunuj ree rayagbee guial ad ziantan! <sup>18</sup> Din bal ma basa'nan xley Moisejs, abi' yaye'can con ley guin zatijb dxel naj gajc cayün naj béndol. <sup>19</sup> Zeel ma basa'nan ley guin din gabajnan par Dios. <sup>20</sup> Abi' rünan cwent guial në naj güjt chi güt Cristo loj crüzj dxel ad nabantri da xtijban, ma nabannë'n Cristo. Abi' yan zi'c naban, ma naban zi'c rliladxan Xi'n Dios, bén rën naj güjt tëëman por naj. <sup>21</sup> Abi' ad rüntan tiblad guial rën Dios dunuj ree, din bal nile' niajc bejn naya niz loj Dios guial rüjn bejn zi'c rniabee xley Moisejs dxel achetri lasajc guial güjt Cristo.”

### 3

#### *Guialrliladx Jesucrist rquied dol*

<sup>1</sup> ¡Bén Galacia, chexc zeel ad radëdguientidi! ¿Chu bascajy xquiarguejndi? Awa chi balün lëjt, delant loj gradi bagojnan lëjt par xhie güjt Cristo loj crüzj. <sup>2</sup> Yan rënzán gagbeen: ¿Nabannëdi xSprijt Dios ya guial rüjndi zi'c rniabee xley Moisejs o por guial rliladxidi xtiidx Jesucrist ni ma bacaagdiajguidi? <sup>3</sup> Xipxi nadidi zeel awa ma nabannëdi xSprijt Dios abi' yan naladxidi guial din yayaaloy gaquidi zi'c rën Dios rayal chinalidi ley. <sup>4</sup> ¿Wen achet lasajc guialrzagdiaj ni gudëdidi ya, o guzagdiaj xlia'zidi ya? <sup>5</sup> Chi runee Dios xSprijtaman lojdi abi' rüjnman milagr ree delant lojdi, ¿wen rüjnman zian ya por guial zinalidi xley Moisejs o por guial ma bililadxidi xtiidx Jesucrist ni ma bacaagdiajguidi?

<sup>6</sup> Gol basaaladx guial Abraham por guial bililadxaman Dios, been Dios laaman cwent zi'c tijb bén ad wayüjnt dol. <sup>7</sup> Zeel gol gogbee guial gra ree bén rliladx Dios, laa reeman naj zi'c xi'n Abraham. <sup>8</sup> Diizd gocli mal ragbee Dios guial majsi loj ree bén ad najt bén Israel yu' ree bén güünman cwent zi'c bén ad wayüjnt dol guial rliladx reeman laaman. Din tiblajt loj xtiidxaman rëb guial rëbaman loj Abraham: “Günle'n gra ree bénguidxliuj por lüj.” <sup>9</sup> Zeel rüjnle' Dios gra ree bén rliladx laaman zi'cgajc beenle'man Abraham guial bililadxaman laaman.

<sup>10</sup> Gra ree bén zinal xley Moisejs yu' casti par laa reeman din loj gajc libr ley guin rëb: “Bén ad zinalt güün gra zi'cgajczi rëb loj ley guin, yayalaman casti.” <sup>11</sup> Zeel rayagbee ree ad zile't gac bejn naya loj Dios por guial rüjnman zi'c rniabee ley. Din loj xtiidx Dios rëb: “Bén rliladx Dios rajpaman guialnaban delant lojman guial ma nünman laaman cwent sin dol.” <sup>12</sup> Per ley guin ad rniabtan chililadx bejn laan, loj libr ley guin rëb: “Bén güün zi'c gajczi rniabee ley, zajpaman guialnaban.”

<sup>13</sup> Jesucrist badxi'ca dunuj ree loj xmaldicion ley din laaman bayal casti ni rayal ree por ley guin, din loj libr ley guin rëb: “Ma zë maldicion guiyc bén rëjt loj crüzj.”

<sup>14</sup> Zian guzajc Jesucrist par chile' güünle' Dios bén ad najt ree bén Israel, zi'c beenle'man Abraham. Abi' guial rliladx reeman Jesucrist zeel ma naban reeman con xSprijt Dios zi'c tal rëb Dios diizd guia'xchej.

#### *Xley Moisejs në xpromejs Dios*

<sup>15</sup> Yan compniar raliduladx ree Jesucrist ganin lëjt xhienaag rüjn ree bénguidxliuj: Chi rajs tijb gui'ch abi' rgu' bejn laan firm, dxel achut zajc guse'n laan o gucaa guiyc ree diidx ni ca loj gui'ch guin. <sup>16</sup> Ziangajc gol gogbee, chi been Dios promejs guial güünle'man Abraham con xdiaaman, ad rëbt loj xtiidx Dios guial güünle'man “bén zëed ree” loj xdiaa Abraham. Ad rëbtan zien bejn, rëban tijbzi bejn, din laaman rëb günle'n “Bén zëed” loj xdiaaman. Abi' bén zëed loj xdiaaman laaman naj Cristo. <sup>17</sup> Abi' ni canin lëjt naj guial xley Moisejs bi'tan tajpgayuu gajlbichii ijz despuejs ni been Dios promejs con Abraham, zeel ad zajct guse'n ley guin promejs ni ma been Dios. <sup>18</sup> Din bal par yaca' ree ni rëb Dios loj Abraham rayal yaguieen ree zi'c rniabee ley, dxel ad promejstran. Per Dios bazaladx loj Abraham ni rëbaman por promejs ni beenman lojman.

<sup>19</sup> Wed zanabdiidxidi lon, ¿par xhieza rüjn ley guin sirv? Badëe Dios ley guin din gagbee bejn guial najman bëndol, abi' been ley guin sirv xt dxej ni bi't bén zëed loj xdiaa Abraham zi'c tal been Dios promejs con laaman diizd guia'xchej. Bén naj ree xianjl Dios badëe ley guin loj Moisejs, abi' Moisejs badëed laan loj ree bejn. <sup>20</sup> Per chi been Dios promejs con Abraham achutczi badëed xtiidxaman, quijb laaman guneenë Abraham.

#### *Xhie sirv rüjn ley*

<sup>21</sup> Ad naladxidi canin guial ley guin za' contr xpromejs Dios. Canin bal por ley guin zajc gap bejn guialnaban delant loj Dios, dxel ma ragbee bejn guial ma nayaman loj Dios guial zinalaman ley. Per ad ziantan <sup>22</sup> din loj xtiidx Dios rëb guial dol rniabee gra bejn din gra ree bén chililadx Jesucrist tia' reeman gra ni rëb Dios.

<sup>23</sup> Chi gad guialrliladx Jesucrist guidoonloj, gunabee ley dunuj ree, zi'c chi nayaaw bejn balëez ree guidoonloj guialrliladx Jesucrist. <sup>24</sup> Zeel par dunuj ree ley guin naj ni balüü dunuj ree xhienaag yabajn ree abi' gunabeen dunuj ree xt dxej ni baguieenbee ree Jesucrist din güünman dunuj ree cwent zi'c tijb bén ni ad wayüjnt dol guial raliduladx ree laaman. <sup>25</sup> Per yan guial ma raliduladx ree Jesucrist ad rüjntri naguiejn gulüü ley guin dunuj ree.

<sup>26</sup> Din guial raliduladx ree Jesucrist ma nayajc ree xi'n Dios. <sup>27</sup> Abi' guial barobnijs ree por Jesucrist zeel ma nayajc ree tijbzi con laaman din ma nabajnnë' reeman. <sup>28</sup> Abi' zi'c bén Israel zi'c bén ad najt bén Israel, zi'c bén naj zi'c bén nado' zi'c bén ad najt zi'c bén nado', zi'c xinguaaw zi'c béngunaa, par Cristo tiblojzi nayajc ree din ma nayajc ree tijbzi con laaman. <sup>29</sup> Zeel bal ma nayajc ree xbejn Cristo dxel ma nayajc ree zi'cgajc xi'n Abraham abi' yajal ree ni rëb Dios loj Abraham diisd gulal.

## 4

<sup>1</sup> Ni canin naj: Zi'c tijb xindo rayal ni rajp xdadix, la'tgaj najx xindoo achet guialrniabee rajpix, zi'cgajc tijb mojs, majsi xieenx naj gra ni rajp xdadix. <sup>2</sup> Abi' yu' ree bén rajp laax yu' tëë ree bén rniabee laax në ree ni rajpix, xt chi guidxin dxej ni rëb xdadix tia'x ni rayalix. <sup>3</sup> Ziangajc dunuj ree, zi'c tijb xindoo bayajc ree yaløj guial bunaalx'i'ch ree gra ree xcostumbr ree bénguidxliuj. <sup>4</sup> Abi' chi bidxin dxej gojc zi'c rëb Dios gac, guxhaal xi'nman Jesucrist loj guidxliuj guie, tijb bénguidxliuj gojc xniaaman. Abi' gubajnman zi'c rniabee ley ni basa'n Moisejs duloj ree <sup>5</sup> persi bile' babëëman dunuj ree loj ley guin bile' tëë nayajc ree Xi'n Dios.

<sup>6</sup> Abi' guial nayajc ree xi'n Dios, guxhaalaman xSprijt Jesucrist persi nabajnnë' reeman, abi' por Sprijt guin raguie'ch ree: “¡Dux Dad ree Dios!” <sup>7</sup> Zeel ad nayajctri ree zi'c mojs, ma nayajc ree xi'n Dios, ma rayal ree ni gunee Dios por Cristo.

### *Yu' Pab xgab por ree bén rliladx Jesucrist*

<sup>8</sup> Yaløj chi gadidi güünbee quijb Dios, beendi sirv loj ree ni naladxidi naj Dios, per diidxli ad Diost reen. <sup>9</sup> Per yan guial ma nünbeedi Dios o guial ma nünbeeman lëjt, ¿chexc zeel rëndi yabi'di güündi graløj ni ad rüjnt sirv ni beendi yaløj? ¿Chexc zeel rëndi gaquidi zi'c bén nado' loj ree ni guin ree zatijb? <sup>10</sup> Abi' yan guial sta zinëdi cwent xhie dxej o xhie bëëw o xhie tiamp o xhie ijz naj ni zojbloj par lëjt par güündi xhienin zi'c goc xcostumbridi. <sup>11</sup> Dád rdxeban por lëjt, doolgui basid xlia'zan lëjt.

<sup>12</sup> Zeel rniaaban lojdi compniar raliduladx ree Jesucrist, gol gubajn zi'c nabanen, zi'c benan persi gogbeedi guial tiblojzi nayajc ree. Ad canitan lojdi guial xhie ni mal ma beendi naj <sup>13</sup> din lëjt ragbee guial yaløj chi basidan lëjt xtiidxza'c Jesucrist, ragxuun nadxel. <sup>14</sup> Per majsi zian, gudaandi naj. Ad beentidi naj tiblad ad gulëëladx tëëtidi naj, bidxga'di naj zi'c tijb xianjl Dios o zi'cgajc Jesucrist. <sup>15</sup> Naj ragbee guial bal zile'n xt guiallojdi zajc cwëëdi par guneedan lon. Laadx yan, ¿conzan guial rabaanëdi naj? <sup>16</sup> ¿O al rdxel'chidi naj ya guial rnin ni naj diidxli lojdi?

<sup>17</sup> Rnin lojdi guial ree bén cayüjn naguiejn guial guidxga'di xtiidx reeman, ad zagdxet rën reeman lëjt, xixgab reeman naj din gusa'ndi ni basidan lëjt abi' mazri guidxga'di xtiidx reeman. <sup>18</sup> Ad ni malt naj guial guiën bejn lasa' bejnman, per par ni zagdxë në zianczi, ad chi za'tzan con lëjt. <sup>19</sup> Par naj lëjt naj zi'c da xi'nan. Abi' cazaagdiajn por lëjt zatijb, zi'c rzagdiaj tijb béngunaa chi rajl xi'nman. Abi' gusnuu gazaagdiajn xt chi ma zinalidi Jesucrist diidxli zi'c rayal. <sup>20</sup> ¡Bal zianclaa za'n con lëjt din ganenë'n quijb lëjt, per yan ad ragbeetan xhienaag günnë'n lëjt!

### *Agar con Sara*

<sup>21</sup> Per gol guna, lëjt bén rën ree guiban zi'c rniabee ley. ¿Wen id wayignia'di ni rëb loj ley ya? <sup>22</sup> Loj ley rëb guial guyu tio'p xi'n Abraham: Guyu xi'nman con tijb béngunaa brii

laj Agar bèn goc xmojsaman, guyu tëë stijb xi'nman con quijb xbéngunaaman bèn brii laj Sara. <sup>23</sup> Xi'n Abraham con béngunaa goc xmojsaman, guyux guial bagaal Abraham laaman. Per xi'nman xin guyu con quijb xbéngunaaman guyux ad por guial bagaaltzi Abraham xbéngunaaman, në par gac cumplid promejs ni been Dios lojman. <sup>24</sup> Yan, Sara në Agar laa reeman naj ejempl por tio'p nejs ni yu' par chinal bejn. Tijb nejs guin naj guial chinal bejn ley ni badëed Dios loj Moisejs ruguia' Sinaí, abi' bèn zinal ree ley guin naj reeman zi'c bèn nado' loj ley guin zi'c goc Agar loj Abraham. <sup>25</sup> Lëjt ragbee guial niz Arabia naj guia' Sinaí, abi' ree bèn niz ni rníee reeman guia' guin Agar. Per yan Jerusalén naj zi'c guia' guin, din gra ree bèn zëed niz Jerusalén, bèn zinal ree ley, laa reeman naj zi'c bèn nado' loj ley. <sup>26</sup> Per dunuj ree du ladx ree naj Jerusalén ni yu' xanyabaa abi' Jerusalén guin ad najtan zi'c ni nado' loj ley guin zi'c ad gojct Sara loj Abraham. <sup>27</sup> Loj xtiidx Dios rëb:

Babaa béngunaa ni ad zajct chu' xi'n.

Babaa da't guial ad nünbeetil guialrzagdiaj

ni rdëd béngunaa ni rajl xi'n.

Din bèn ad rut xi'n, mazri zien xi'nman chu' guial loj bèn ru xi'n.

<sup>28</sup> Rnin lojdi compniar raliduladx ree Jesucrist, zi'c gol Isaac guial bililadx Abraham xtiidx Dios guial gac zian, ziangajc dunuj ree ma nayajc ree xi'n Dios guial raliduladx ree xtiidxaman. <sup>29</sup> Abi' lën ree dxejzii, xi'n Agar baze'x xi'n quijb xbéngunaa Abraham, ziangajc yan bèn zinal ree ley ruze' reeman dunuj ree nabajnnë' ree xSprijt Dios, guial ma nayajc ree xi'n Dios, <sup>30</sup> Per, ¿xhie rëb loj xtiidx Dios? Rëban: “Balaagdxa xmojsil con guidib xi'nman, din ad rayalt gac tio'p lala' ni rayal tia' xi'n quijb xbéngunaa.” <sup>31</sup> Zeel compniar raliduladx ree Jesucrist, dunuj ree ad nayajct ree zi'c xi'n bèn naj zi'c bèn nado' guin, nayajc ree zi'c xi'n quijb xbéngunaa Abraham guial ad rniabeet ley dunuj ree.

## 5

### *Gol guzujdxi'ch loj ni rliladxidi xtiidx Dios*

<sup>1</sup> Cristo naj bèn babëë dunuj ree loj ni rniabee ley dunuj ree. Zeel gol guzujdxi'ch, ad bal guibandí zatijb zi'c bèn nado' guial güündi zi'c rniabee ley.

<sup>2</sup> Naj Pab rnin lëjt. Bal rudi sen zi'c rniabee ley, achet lasajc guial rliladxidi Jesucrist.

<sup>3</sup> Abi' rnin lëjt zatijb: Chutëez bèn ru sen guin rayal güünman zi'c tal rniabee ley. <sup>4</sup> Lëjt guial rüjndi xgab guial güündi zi'c rniabee ley ma najdi naya delant loj Dios, laan rën guiëb guial ad najtridi xbejn Cristo ad yu'guijc tëëtridi guial rën Dios lëjt. <sup>5</sup> Per dunuj ree por xSprijt Dios në guial raliduladx ree Jesucrist nadxu'guijc ree guial yadxin ree naya delant loj Dios. <sup>6</sup> Din chi ma naj bejn tijbzi con Cristo achet lasajc bal yu'man sen o ad yu'taman sen. Ni mazri lasajc naj guial chililadxaman Cristo. Abi' por guialrliladx guin zajc yabajn ree zagdxé yayën dulasa' ree. <sup>7</sup> Lëjt ma zëdi zagdxé. ¿Chu na lojdi guial ad zidxga'tidi ni naj diidxli? <sup>8</sup> Din xgab guin ad zëedtan por Dios, bèn gule lëjt. <sup>9</sup> Zeel gol gojp cudad “din con ta'nnijt zajc gusquiee reeman gradi.” <sup>10</sup> Per naj ra'pan Cristo confians guial ad zusa'ntidi ni basidan lëjt. Abi' Dios gudëed casti bèn cusquiee ree lëjt, majsi chutëeznin. <sup>11</sup> Bal rën guial rüjn naguiejn chu' ree bejn sen, ad zazunaltri ree bèn Israel naj. Ziangajc bal guiën guial rayal chu' ree bejn sen, rën guiëban guial achet lasajc guial güjt Cristo loj crüjz. <sup>12</sup> Balzianclaa gra ree bèn ruslen lëjt guial rayal chu'di sen, jmejrli gutüüg laagajc reeman tiblayaa!

<sup>13</sup> Din lëjt ma gulaadi loj ley, per ad guial ad rniabeetri ley lëjt din güündi ni rëntzidi, rayal guiëndi güün tëë yudar lasa'di. <sup>14</sup> Din con tijbzi mandamient ma been bejn gra zi'c rniabee xley Dios. Mandamient guin rëb: “Guyën ben ren zi'c rën lüj gajc.” <sup>15</sup> Per bal rdxe'ch lasa'di abi' rdilidi, gol gojp cudad chitëë zianzi la' lasa'di.

### *Guialnaban ni runee xSprijt Dios*

<sup>16</sup> Zeel rnin lojdi: Gol gubajn zi'c rniabee xSprijt Dios guibandi. Ad guibanridi zi'ctzi naj xixgabidi. <sup>17</sup> Din guial rbajn bejn zi'ctzi naj xixgabaman, ad najtan zi'c rniabee xSprijt Dios guiban bejn. Abi' zi'c rniabee xSprijt Dios guiban bejn, ad najtan guial guiban bejn zi'ctzi naj xixgabaman. Ni'qui laan ni'qui zi'c rniabee xSprijt Dios ad najtan tibloj. Zeel ad zajct guiban bejn zi'ctzi rënman. <sup>18</sup> Per bal xSprijt Dios naj Bén rniabee lëjt dxel ad rniabeetri ley lëjt. <sup>19</sup> Yan laa rguien gajc con ree nin zëed con xixgabzi ree bejn: Guialrznë xinguaaw ren o béngunaa ren, guialrÿjn bejn nidxuudx, guialrajp bejn gadxagayaa vijs, <sup>20</sup> guial rën bejn graloj ni naladxaman naj Dios, guial rÿjn bejn guialbidxaa, guialrdxe'ch lasa', guialrdil, guialrzëëbladx ni rajp bejn, guialralenya', guialrlies xvalor gajc, guialrlia' lasa' bejn, guial ru loj tibcwaa bejn o stib cwaaman, <sup>21</sup> guialrdëdloj, guialrugÿjt bejn, guialrzüdx, guialnala në xhietëez ni mal lasa' ree ni guin. Rugojnan lëjt zi'cgajc ma rnin lojdi yaloj, Bén cayÿjn ree lasa' ree ni guin ad zayalt reeman lod rniabee Dios.

<sup>22</sup> Per ni zëed por xSprijt Dios naj, guialrën lasa' bejn, guialrabaa, guialrga'dxe luxdoo, guial yu' pacens, guialnaxanladx, guial rajc naza'c, guial rÿjn cumplid xtiidx, <sup>23</sup> guial rÿjn naya, guialrniabee bejn xixgab mal gajcaman. Abi' ad yu't ley ni rudxoon guial güün bejn ni guin ree. <sup>24</sup> Abi' ree Bén ma naj xbejn Cristo ma basa'n reeman gra dol, në gra ree ni mal ni rën reeman güün reeman din ma güjt Cristo por gra dol. <sup>25</sup> Yan bal ma nabajn ree con xSprijt Dios rayal yabajn ree zi'c rniabee Sprijt guin yabajn ree.

<sup>26</sup> Ad yales dux valor gajc ree, ad yache'ch du lasa' ree, ad yadëdloj du lasa' ree.

## 6

### *Yaguieen du lasa' ree yudar*

<sup>1</sup> Compniar raliduladx ree Jesucrist, rnin lëjt, bal chu xcompniaridi rÿjn dol gan, lëjt guial ma rajquidi mazri xtiidx Dios gol guneenëman con ganax ree diidxza'c, din rayal cu'guijquidi guial nëgajc lëjt zajc güün dol lëjt gan. <sup>2</sup> Gol gognë lasa'di loj xhietëez guialzi ni rdëdidi, zian ma cayÿjndi ni rniabee Cristo güündi.

<sup>3</sup> Bal yu' Bén ni naladx guial rajcaman gra abi' achetzi rajcaman, dxel laagajcaman cusquiee laaman. <sup>4</sup> Tijbgaj bejn rayal güün xgab bal nabancaman xnejz. Abi' bal nabanman xnejz, tijbzi laaman rayal yabaa luar güünman xgab guial nabanman zagdx loj gra ree bejn. <sup>5</sup> Din tijbgaj dunuj ree rayal yaya'p ree xhienaag yabajn ree.

<sup>6</sup> Chutëez Bén cusiid xtiidx Dios, rayal güünman yudar Bén culüü laaman con ni ryaadxaman.

<sup>7</sup> Ad gusquiee lëjt gajc, din achut zajc guze' Dios. Ni rxübin bejn laagajcan yato'paman.

<sup>8</sup> Bal nabanman zi'ctzi naj xixgabaman zadxin dxej yayalaman casti. Per Bén naban zi'c rniabee xSprijt Dios, por Sprijt guin yayalaman guialnaban tiblayaa delant loj Dios. <sup>9</sup> Ad rayalt yadxag ree guial yaguieen ree ni zagdx, din bal id zadxag ree chi guidxin dxej yaca' ree ni yayal ree. <sup>10</sup> Zeel beegaj gunen dunuj ree rayal yaguieen ree yudar bejn ree, abi' mazri con dux compniar ree Bén rliladx ree Jesucrist.

### *Xconsejw Pab*

<sup>11</sup> Gol baguiaa xi narooB ree lejtr ni cucan par lëjt con quijb yan. <sup>12</sup> Bén cayÿjn ree naguiejn chu'di sen, rÿjn reeman zian par yaya'n reeman zagdx loj ree bejn luar sagdiaj reeman guial rliladx reeman Jesucrist. <sup>13</sup> Per ni'qui ree Bén yu' sen guin ad rÿjnt reeman gra zi'c rëb ley guin. Rënzi reeman chu'di sen guin din güün reeman nabë guial ma been reeman gan yu'di sen guin. <sup>14</sup> Per naj achet por ni gÿnan nabë, tijbzi por guialgÿjt Dad Jesucrist. Abi' guial güjtaman loj crÿjz ma basa'nan gra ree ni mal yu' loj guidxliuj guie abi' ma güjtan par ree ni mal guin. <sup>15</sup> Din chi ma naj bejn tijbzi con Cristo, achet lasajc bal yu' bejn sen o ad yu'taman sen. Ni mazri lasajc naj guial ma bachaa zi'c

nabanman. <sup>16</sup>Abi' ree bén ma zinal xnejz Cristo, Dios yaya laa reeman yabe'cdxe tääman luxdoo reeman në gra ree bén diidxli naj xbejn Dios.

<sup>17</sup>Diizd yan ad rēntran chu guche'ch naj. Din dib ni ca ree ladan laa reen rulüü guial najn xiapóstol Jesucrist.

<sup>18</sup>Compniar raliduladx ree Jesucrist, dux Dad ree Jesucrist güünle' gradi. Amén.



## Gui'ch guxhaal San Pabl loj ree bén Éfeso rliladx Jesucrist

### *Rugajpdioz San Pabl bén Éfeso ree*

<sup>1</sup> Naj Pab, najn tijb xi apóstol Jesucrist por xgualrniabee Dios. Cucan gui'ch guie par lëjt guial diidxli zinalidi xtiidx Jesucrist, lëjt guial ma najdi xbejn Dios luguiedx Éfeso. <sup>2</sup> Dux Dad ree Dios në Dad Jesucrist güünle' lëjt yabe'cdxe tëë reeman luxdoodi.

### *Rüjnle' Dios bén rliladx ree Jesucrist*

<sup>3</sup> Quixtëë Dios, xdad Dad Jesucrist, dád benza'c najman, guial yan ma nayajc ree tijbzi con Jesucrist, ma beenle'man dunuj ree diizd xanyabaa con graloj guialnaza'c din gac yunaal ree xtiidxaman. <sup>4</sup> Laaman bacaabee dunuj ree por Dad Jesucrist diizd chi gad guidxliuj gacchaaw din yabajn ree naya sin dol lojman. <sup>5</sup> Abi' guial rënman dunuj ree, diizd guia'xchej beenman guial yayajc ree xi'nman por Jesucrist zi'c beenman xgab gac. <sup>6</sup> Zeel ad racwëëzt raza't ree Dios zagdxe guial dád benza'c najman, ma beenle'man dunuj ree por Xi'nman Jesucrist, bén rënman, <sup>7</sup> bén ma gudijx por dunuj ree chi guxhie' xrejman, abi' ma gojc perdon dux tol ree guial dád rën Dios dunuj ree. <sup>8</sup> Zeel dád zro' guialrajc në guialrignia' ma bazaladxaman duloj ree, <sup>9</sup> abi' ma balüüman duloj ree xhienaag naj xixgabaman diizd gocli, zi'cgajczi ma beenman xgab gac. <sup>10</sup> Guiáad xgab guin gacan cumplid chi guidxin dxej, Dios gusa'n gra loj Jesucrist zi'c ni yu' xanyabaa në loj guidxliuj.

<sup>11</sup> Nëtëë guial nayajc ree tijbzi con Jesucrist, Dios ma bacaabee dunuj ree din yayajc ree par laaman zi'c naj xixgabaman diizd guia'xchej, din laaman rüjn gra zi'c rënman gac. <sup>12</sup> Abi' laaman ma been zian, din dunuj ree nayajc ree bén yaloj bililadx Jesucrist, yayajc ree bén guza't laaman zagdxe por xgualrniabeeman. <sup>13</sup> Nëgajc lëjt chi biguiejndi diidxli xhienaag par gaquidi perdon dxel bililadxidi Cristo gojquidi tijbzi con laaman. Abi' zi'c rëb Dios guial guneman xSprijtaman, dxel yan guial ma nabannëdi laaman, laaman naj zi'c tijb sen ni rulüü guial ma najdi par Dios. <sup>14</sup> Guial ma nabannë xSprijt Dios dunuj ree, yaca' ree ni rëb Dios guneman chi ma bara xbejnman za' xanyabaa, din chitëë yacwëëz yaza't reeman zagdxe por xgualrniabeeman.

### *Rniab Pab quiarguiejn loj Dios*

<sup>15</sup> Abi' guial ragbeen rliladxidi Dad Jesús rën tëëdi los demazri ree bén naj xbejn Dios, <sup>16</sup> zeel ad rucwëëzt rudën quixtëë loj Dios por lëjt, beegaj rbedx rniaaban laaman. <sup>17</sup> Laaman naj Dios rniabee diizd xanyabaa, xDad Dad Jesucrist. Rniaaban lojman yazaladxaman quiarguiejn lojdi din chignia'di ni gulüüman lojdi gusnuu tëë güünbeedi laaman mazri. <sup>18</sup> Rniaaban lojman din guixhialaman xquiarguiejndi din chignia'di xhie rën guiëb ni rbëzidi diizd chi bacaabeeman lëjt, chignia' tëëdi guial ni za'cdxoon narooob tëë naj ni nagu'chaaw Dios par ree bén naj xbejnman. <sup>19</sup> Rniaab tëën lojman guial gagbeedi guial dád narooob naj xgualrniabeeman ni cayagnë dunuj ree raliduladx reeman. Laagajc gualrniabee narooob guin balüü Dios <sup>20</sup> chi basbanman Jesucrist abi' gule'caman laaman xladbeeman xanyabaa <sup>21</sup> lod badëëman gualrniabee lojman ni mazri lasajc guial loj gra ree gualrniabee, në loj gra guialguxtis në loj gra gobiarn. Abi' mazri lasajc gualrniabee guin guial loj gra ree gualrniabee yu', në ni qui chu'ri ree loj guidxliuj guie. <sup>22</sup> Dxel basa'n Dios gran loj Jesucrist, bacaabeeman laaman din nabeeman gra ree bén rliladx laaman. <sup>23</sup> Guiáad ree bén rliladx laaman, guidiblagaa nabannëman laa reeman abi' bantëëz guin za'man din laaman guidiblagaa rniabee.

## 2

### *Nayajc ree perdon guial rën Dios dunuj ree*

<sup>1</sup> Gocli gojquidi zi'c bengüt loj Dios por ree ni mal në por ree dol <sup>2</sup> ni beendi guial binalidi nejz mal been tëedi zi'ctzi rën xindxab güündi, sprijtmal ni nabannë gajc ree bèn ad ruzoobt xtiidx Dios. <sup>3</sup> Du gra ree ziangajc babajn ree guia'xchej. Baguieen ree zi'ctzi bayèn ree, zi'ctzi goc dux xgab ree, abi' zi'cgajc rayal ree bèn ad ruzoobt xtiidx Dios casti, ziangajc nayal ree casti. <sup>4</sup> Per guial raya da't Dios dunuj ree rën tëëman dunuj ree, <sup>5</sup> zeel majsi bayajc ree zi'c bengüt lojman por dux tol ree, per yan ma raya'p ree guialnaban lojman con Jesucrist. Guial tant benza'c naj Dios, zeel nayajc ree perdon. <sup>6</sup> Chi basbanman Jesucrist nëgajc dunuj ree basbanman abi' zi'c rulüü ma nadxu'në' ree Jesucrist xanyabaa. <sup>7</sup> Dios been zian dîn dxej zëed ree guiguieen guial dád rënman dunuj ree, abi' benza'c tëë najman con dunuj ree por Jesucrist. <sup>8</sup> Guial naj Dios benza'c, zeel ma nayajc ree perdon, ad guial nayajct ree benza'c lojman. Por guial rliladx zëed xperdon Dios. <sup>9</sup> Ni'quid por ni zagdxë ni ma baguieent ree zëed perdon guin chitëë chu guilies xvalor gajc. <sup>10</sup> Por Dios nadxu' ree loj guidxliuj guie abi' por Jesucrist bachaaman mod babajn ree yaløj din yaguieen ree ni zagdxë zi'c beenman xgab yaguieen ree diizd gocli.

### *Tijbzi nayajc ree por Jesucrist*

<sup>11</sup> Zeel lëjt bèn ad najt ree bèn Israel, gol basaaladx xhienaag guzajquidi yaloj. Bèn Israel ree gulëälaj lëjt bèn ad yu't ree sen guial yu' reeman sen zi'c rniabee ley. <sup>12</sup> Tiamp zii ad beenbeetidi Jesucrist, ad gojctidi cwent loj ree bèn Israel ad gojc tëëtidi cwent guial rayalidi ni rëb Dios gudëëman loj ree xbejnman. Contzi gubajndi achet gulëjzidi ad gubajnnë tëëtidi Dios. <sup>13</sup> Per yan guial ma rliladxidi Jesucrist, lëjt guial guzujdi zijt loj Dios, por xrejn Jesucrist ma bibiguide lojman. <sup>14</sup> Din Jesucrist babe'cdxe du luxdoo ree. Laaman bisüd guialrdxe'ch ni rudxoon gac ree bèn Israel tijbzi con ree bèn ad najt bèn Israel. <sup>15</sup> Abi' por xguialgüjt Jesucrist gulox gra ree costumbr rniabee xley ree bèn Israel güün ree bejn, laaman been persi gojc ree bèn Israel con ree bèn ad najt bèn Israel zi'c tijbzi guiedx cüb guial ma nayajc ree tijbzi con laaman. Zian babe'cdxëman luxdoo ree bejn. <sup>16</sup> Din por xguialgüjt Jesucrist loj crüz ma gulox guialrdxe'ch lasa' ree bèn Israel con ree bèn ad najt bèn Israel, abi' ma nadxu'në' ree Dios zagdxë guial ma nayajc ree tijbzi por Jesucrist. <sup>17</sup> Abi' laaman bidgagojn dugra ree, zi'c ree bèn Israel zi'c ree bèn ad najt bèn Israel xhienaag yadxu'në' ree Dios zagdxë. <sup>18</sup> Dxel por Jesucrist grop cwaa ree bejn ma rajp nejz par loj Dios guial tijbzi naj xSprijt Dios nabajnnë' ree. <sup>19</sup> Zeel ad najtridi zi'c bèn zëed lod ren, zi'c benzit loj Dios, ma najdi cwent loj ree xbejnman, ma najdi tijbzi con ree xbejnman. <sup>20</sup> Lëjt naj zi'c zze' tijb yu ni cayajc, guiáad ree xi apóstoles Jesús con ree bèn badëë xtiidx Dios loj ree bejn, naj reeman zi'c xcimiant yu guin, guiáad Jesucrist naj zi'c guiaj zøjbloj ni cayajcnë yu guin. <sup>21</sup> Abi' guial yagaj guzuloj cayajs yu guin, dxel cayë'pzi cayë'p ze' guin ni cayguie'ch ree najdi din yayajc ree tijbzi xyadoo Dios con Jesucrist. <sup>22</sup> Në yan guial ma najdi tijbzi con Jesucrist ma naj tëëdi tijbzi con los demazri compniar raliduladx reeman din yayajc ree tijbzi yadoo lod za' Dios por xSprijtaman.

## 3

### *Cwabee Pab din chigneeman xtiidxza'c Jesucrist*

<sup>1</sup> Por zianan yu'n ladxguuib, naj Pab guial cayünan sirv loj Jesucrist din günan yudar lëjt bèn ad najt ree bèn Israel. <sup>2</sup> Lëjt ragbee guial naj Dios benza'c zeel baneeman dxiin guin lon din günan lëjt yudar chignia'di xtiidxaman. <sup>3</sup> Abi' laaman balüü naj xhienaag naj xixgabaman diizd gulal, zi'cgajczi ma rnin lojdi diizd guia'xchej. <sup>4</sup> Chi goolidi laan, gagbeedi guial ma ragbeen xhienaag naj xixgab Dios par Jesucrist. <sup>5</sup> Tiamp gulal achut gojc niagbee xhienaag naj xixgabaman par Jesucrist, gojcan zi'c tijb ni nagueie'ch par ree

bejn. Per yan por xSprijtaman ma balüüman laan loj ree xi apóstoles Jesús në loj ree bén badëë xtiidx Dios loj ree bejn. <sup>6</sup> Abi' ni goc zi'c tijb ni naguie'ch par ree bejn naj guial por xtiidxza'c Jesucrist, në ree bén ad najt bén Israel ma rayal ni gudëë Dios loj ree bén Israel guial ma naj reeman tijbzi, dxel ziangajc ma nayab reeman loj promejs ni been Dios por Jesucrist.

<sup>7</sup> Naj cugojn xtiidxza'c Jesucrist loj ree bejn, ad guial rayalt günan dxiin guin. Guial naj Dios benza'c, zeel bazaladxaman guialrniabee lon par günan laaman sirv. <sup>8</sup> Naj naj Bén bigra Bén lasajc ta'nz loj gra ree xbejn Dios, per guial naj Dios benza'c, bacaabeeman naj din gün diidx loj ree Bén ad najt Bén Israel xcwent xguialnaza'c narooB Jesucrist, <sup>9</sup> në par gugojnan zagdx gra reeman xhienaag naj xixgab Dios Bén been gra, xgab ni ad balüü gajtaman loj ree bejn. <sup>10</sup> Din yan zi'c naj ree Bén rlliladx Jesucrist, gagbee gra ree Bén rajp guialrniabee xanyabaa guial gra lojczy guialrajc rajp Dios. <sup>11</sup> Abi' diizd chi gad guidxliuj gacchaaw mal been Dios xgab guial gac zian. Yan ma gojcan cumplid por Dad Jesucrist. <sup>12</sup> Në guial raliduladx ree Jesucrist ma raya'p ree nejz par loj Dios, abi' con confians ma zajc yubiig ree lojman. <sup>13</sup> Zeel rnin lojdi ad runayadi por ree guialzi ni cadëëdan por lëjt, din zagdxen par lëjt.

### *Dád rën Jesucrist dunuj ree*

<sup>14</sup> Zeel ruzuxiban loj dux Dad ree Dios; <sup>15</sup> laaman naj Dad loj gra ni yu' loj guidxliuj në xanyabaa. <sup>16</sup> Abi' rniaaban lojman por xguialrniabee narooBaman yazaladxaman lëjt gojl në guialrniabee por xSprijtaman din yayu luxdoodi, <sup>17</sup> guibannë tēedi Jesucrist guial rlliladxidi laaman. Din zian zi'c diidxli zinalidi zi'c rën Jesucrist dunuj ree, <sup>18</sup> dxel ma zajc gagbeedi con los demazri ree compniar raliduladx ree laaman guial gudëdlaj abi' xt banczi naaloj zro' rënman dunuj ree. <sup>19</sup> Zeel rniaaban loj Dios gagbeedi plact rënman dunuj ree, guial mazri zro' najn guial loj ni raguieen ree xgab, abi' zian guidiblagaa guibannëdi Dios.

<sup>20</sup> Laaman, guial rajpaman guialrniabee par güünman mazri guial loj ni raguieen ree xgab o mazri guial loj ni ranaab ree lojman por xSprijtaman Bén nabajnnë' ree, <sup>21</sup> abi' rayal yaza't reeman zagdx gra dxej në gra tiamp por Jesucrist, dunuj ree guial raliduladx ree Jesucrist. Amén.

## 4

### *Nayajc ree tijbzi por xSprijt Dios*

<sup>1</sup> Naj, yu'n ladxguiib guial cayünan sirv Jesucrist, rniaaban lojdi zi'c ma najdi xbejn Dios, gol gubajn zi'c rayal guiban ree Bén ma naj ree xbejnman. <sup>2</sup> Gol gojc benza'c në Bén naxanladx, gol gojp pacens gol gudaan tēë lasa'di guial rën lasa'di. <sup>3</sup> Gol been naguiejn gusnuu gaquidi tijbzi con xyudar xSprijt Dios Bén rabe'cdxe du luxdoo ree par yayajc ree tijbzi. <sup>4</sup> Dunuj ree nayajc zi'c tijbzi cuerp, abi' dugra ree nabajnnë' xSprijt Dios, abi' zi'c ma nayajc ree xbejn Dios, ziangajc ralëjz ree ni guneeman. <sup>5</sup> Tijbzi Dad, tijbzi guialrlliladx në tijbzi guialrirobnijs raya'p ree. <sup>6</sup> Din tijbzi Dios yu', Bén naj Dad par dugra ree, rniabeeman dugra ree, nabannëman dugra ree rüjn tēëman ujs dugra ree.

<sup>7</sup> Per tijb gaj dunuj ree ma naj ni yaguieen ree, zi'ctzi ni banee Jesucrist yaguieen ree. <sup>8</sup> Zianan zeel rëb loj xtiidx Dios:

Chi bayë'paman xanyabaa,  
beenman gan loj gra guialrniabee,  
abi' badëëdaman loj ree bejn ni rayal güün reeman.

<sup>9</sup> Abi', çhie rën guiëb lod rëb “bayë'paman”? Rën guiëban bi'taman loj guidxliuj. <sup>10</sup> Guiáad Jesucrist Bén bi't loj guidxliuj, laagajcaman naj Bén bayë'p xanyabaa persi canabeeman guidib guidxliuj në xanyabaa. <sup>11</sup> Abi' ma badëëman loj ree bejn ni rayal güün reeman, yu' reeman bayal gac apóstoles, yu'za reeman bayal gac Bén rudëë xtiidx

Dios loj ree bejn, yu' reeman bayal gutie'ch xtiidxaman, yu' tää reeman bayal gudëe consejw guluü tää reeman bén rliladx ree laaman. <sup>12</sup> Zian bacaabee Jesucrist bejn ree din gusiid los demazri ree bén rliladx laaman, gac tää güün reeman laaman sirv, gusnuu tää güünbee reeman laaman, <sup>13</sup> xt yayaaloy yaliduladx ree yaguieenbee tää ree Xi'n Dios guidiblagaa, din yayaaloy yayignia' ree xhienaag rayal yunaal ree Jesucrist. <sup>14</sup> Dxel ad zayajctri ree zi'c ree xindoo rliladx xhietëëznin, ad zayajctri ree zi'c tijb ni rnë bi niz ni niz guie por graloj ni rü ree bén raguiil mod gusquiee ree bejn, <sup>15</sup> rayal yayën du lasa' ree, yadü ree diidx yunaal tää ree ni diidxli din gusnuu yayignia' ree yaguieen tää ree zi'c rën Jesucrist bén rniabee dunuj ree. <sup>16</sup> Din por Jesucrist nayajc ree tibloj gra ree compniar raliduladx ree laaman. Por laaman nadxajg dulasa' ree nayajc ree tijbzi, abi' tijb gaj dunuj ree con ni rayal yaguieen ree par yaguieen du lasa' ree yudar din gusnuu yayën dulasa' ree por Jesucrist.

### *Guialnaban cüb con Jesucrist*

<sup>17</sup> Yan por Jesucrist rnin lëjt: Ad bal guibanridi zi'c naban ree ben ad nünbeet Dios, din laa reeman naban zi'ctzi naj xixgab reeman, <sup>18</sup> nacay xquiarguejn reeman, ad rajpt reeman guialnaban rën Dios gap reeman, guial ad rignia't reeman ache tää naladx reeman. <sup>19</sup> Ma been luxdoo reeman gojl, ma gulëeladx laagajc reeman abi' cusnuu cayüjn reeman graloj nidxuudx. <sup>20</sup> Per lëjt ad beenbeetidi Jesucrist din guibandi zian, <sup>21</sup> bal walidi ma biguiejndi xcwentaman bal wali täädi ma basiididi diidxli zëed por laaman. <sup>22</sup> Gol basa'n zi'c gubandi yaloy, din ruxhiinzi zi'c gubandi yaloy con xgabmal ni basquiee lëjt guial beendi zi'ctzi guyëndi. <sup>23</sup> Gol been naguiejn guidxaa xixgabidi guidiblagaa <sup>24</sup> din gaquidi zi'c tijb bencüb been Dios zi'c rënman, con tijb guialnaban naya në zi'c rayal por xdiidxliman ni ma biguiejndi. <sup>25</sup> Zeel ad bal rnieeridi diidx rusquiee. Gol gunee diidxli con xcompniaridi din tijbzi nayajc dugra ree con Jesucrist. <sup>26</sup> Bal rdxe'chidi, ad güündi dol. Ad gudxe' guialrdxe'ch guin luxdoodi dëchej, <sup>27</sup> chitëe tiëbidi güün xindxab lëjt gan. <sup>28</sup> Bén rban, rayal gucwëez cwanman abi' güünman dxiin, din con dxiin zagdxe güünman dxel ma rajpaman con xhie güünman yudar bén ryaadx ree xhienin. <sup>29</sup> Ad rniee täädi diidxguijdx, gol gunee ganax diidxzagdxe ni güün yudar chignia' ree ben ren bén gucaagdiajg ree laan din güünan laa reeman sirv. <sup>30</sup> Ad rgu'nayadi xSprijt Dios, bén ma nabannëdi zi'c tijb sen guial ma najdi xbejnman par dxej ni guidxindi lojman. <sup>31</sup> Gol basa'n tiblad gra guialralenya', guialrdxe'ch, guialralen lasa', guialguidxa'në lasa', guialrniee diidxguijdx loj lasa' në graloj ni mal. <sup>32</sup> Gol gojc benza'c, gol baya lasa'di gol been tää lasa'di perdon zi'c been Dios lëjt perdon por Jesucrist.

## 5

### *Zi'c rayal guiban ree Xi'n Dios*

<sup>1</sup> Zi'c ma najdi xi'n Dios bén rënman, gol been naguiejn güündi zi'c laaman. <sup>2</sup> Gol gubajn zagdxe, gol guyën lasa'di zi'c guyën Jesucrist dunuj ree abi' bayü laagajcaman güjtaman por dunuj ree, gojcaman zi'c tijb gon ni rliaa nejxh par Dios.

<sup>3</sup> Yan lëjt guial ma najdi xbejn Dios, ad rayalt guinee loj lasa'di diidx dxuudx, ni'qui graloj ree ni ad rüjnt sirv ad rzëëbladx täädi gra par lëjt. <sup>4</sup> Ad rnieedi diidxguijdx ree, diidxtont ree, diidx ni ad rayalt guineedi din ad ni zagdxet reen. Mazri zagdxe gol badëe quixtëe loj Dios. <sup>5</sup> Din lëjt ma ragbee guial ree bén naban nadxuudx në ree bén rüjn ni ad rüjnt sirv, në ree bén rzëëbladx gap gra (mazri yu'guijc reeman ni guin ree luar guiën reeman Dios), dxel ad zile't chu' reeman lod rniabee Jesucrist con Dios. <sup>6</sup> Gol gojp cudad achu gusquiee lëjt con ree diidx ad rüjnt wen, din por ree ni guin zëed xcasti Dios par ree bén ad ruzoobt diidx. <sup>7</sup> Zeel ad güündi zi'c rüjn reeman.

<sup>8</sup> Gocli gubajndi zi'c tijb bén nayaaw xquiargueijn, per yan guial ma najdi tijbzi con Jesucrist, laaman naj biani par lëjt. Zeel gol gubajn zi'c ree bén ma zinal biani guin, <sup>9</sup> din guial chinal bejn biani guin ma zile' güünman ni zagdxé zi'c rayal, në ni naj diidxli. <sup>10</sup> Gol been naguiejn gol been zi'c ruladx Dios. <sup>11</sup> Ad në lëjt güün ni ad rüjnt ree sirv ni rüjn ree bén nayaaw xquiargueijn, gol guneenë reeman din gagbee reeman ni rüjn reeman. <sup>12</sup> Din xt ratu bejn güman ni rüjn reeman ralan. <sup>13</sup> Per por xtiidx Jesucrist laa gagbee gajc reeman xhienin rüjn reeman. <sup>14</sup> Din zianan zeel rëb loj xtiidx Dios: Batie'ch xbaaalil, lüj guial zinalil nejz mal. Bariica loj dol din gusni Jesucrist xquiargueijnl.

<sup>15</sup> Zeel gol gojp cudad xhienaag nabandi, ad gontzi guibandi, gol gubajn zi'c bén yu' xquiargueijn. <sup>16</sup> Gol been naguiejn guibandi zi'c rayal naga yu' tiamp, din lën ree dxej guie ad xnejztri naban bejn. <sup>17</sup> Zeel ad gontzi nabandi zi'c naj xixgabidi, gol beenli naguiejn chignia'di xhienaag rën Dios guibandi. <sup>18</sup> Ad südxidi, din guialrzüdx guin ruxhiin bejn. Zagdxeli gol cwëjb nabee xSprijt Dios luxdoodi guidiblagaa. <sup>19</sup> Chi rënë lasa'di diidx, gol baza't ni ca loj ree salmos, loj ree himno, në gra loj ree cant ni naj par Dios. Abi' guidib luxdoodi gol biil gol baza't tée Dios zagdxé. <sup>20</sup> Abi' guixie guixie gol badëed quixtëe loj dux Dad ree Dios por Dad Jesucrist por gra ni rüjnman par dunuj ree.

### *Zi'c rayal guibannë lasa' ree bén rliladx Jesucrist*

<sup>21</sup> Gol bazoob xtiidx lasa'di por respejt ni rajpidi Jesucrist. <sup>22</sup> Në lëjt béngunaa nuxhliaa, gol bazoob xtiidx lacheelidi zi'c ruzoobidi xtiidx Jesucrist. <sup>23</sup> Din xinguaaaw ree rniabee lacheel zi'c rniabee Jesucrist bén rliladx ree laaman, bén babëe laa reeman loj dol abi' naj reeman xbejnman. <sup>24</sup> Abi' zi'c ruzoob ree bén rliladx Jesucrist xtiidxaman, ziangajc ree béngunaa rayal guzoob xtiidx lacheel reeman. <sup>25</sup> Négajc lëjt xinguaaaw nuxhliaa ree, gol guyën lacheelidi zi'c rën Jesucrist bén rliladx ree laaman, abi' xt güjtaman por laa reeman <sup>26</sup> persi bisüdaman xtol reeman, basiaman laa reeman por xtiidxaman në por guialrirobnijs, <sup>27</sup> din guidxin reeman lojman nix da't në ni'qui tijb ni mal, sin falt o dol ren ree, guidxin reeman lojman nayadxuj sin dol. <sup>28</sup> Yan ziangajc ree xinguaaaw baxhliaa, rayal guiën lacheel reex zi'c rën laagajc reex. Abi' xin rën lacheel, laa gajquixan rënx. <sup>29</sup> Din ni'qui tijb bejn ad rdxe'cht laagajcaman, ruyaani laagajcaman rniajchi' tée laagajcaman zi'c rüjnnë Jesucrist dunuj ree nayajc ree bén rliladx laaman <sup>30</sup> guial nayajc ree tijbzi con laaman. <sup>31</sup> Zeel zi'c rëb loj xtiidx Dios: “Xinguaaaw gusa'n xdad xniaax din gaquix tijbzi con lacheelix abi' grop reex ma naj tijbzi bejn.” <sup>32</sup> Dád nawëëg naj par chignia' bejn diidx guie ree, per caninan din zian naj Jesucrist con ree xbejnman. <sup>33</sup> Yan, xinguaaaw ree, gol guyën lacheelidi zi'c rën lëjt gajc. Guiáad lëjt béngunaa, gol gojp respejt lacheelidi.

## 6

<sup>1</sup> Në lëjt najdi xi'n, guial zinalidi Jesucrist, gol bazoob xtiidx ree xdadidi, din zian rayal güündi. <sup>2</sup> Abi' mandamient yaloj ni rëb guial yu' ni yaca' ree bal yagueien ree ni rëb: “Gojp respejt xdad xniaal, <sup>3</sup> din guibanl zagdxé guiban téeel xchej loj guidxliuj guie.” <sup>4</sup> Négajc lëjt dad na ad gusagdiaj xi'ndi chitëe guidxe'ch reex por zian. Mejorli gol basni's reex zagdxé, gol guneenë reex gol balüü tée reex zi'c rën Dios. <sup>5</sup> Në lëjt bén rüjn ree xchiin bejn, gol bazoob xtiidx bén naj xpatrondi loj guidxliuj guie. Con guidib luxdoodi gol gojp respejt gol bazoob tée xtiidx reeman, gol gunaladx xchiin Jesucristan cayüjndi. <sup>6</sup> Gol been reeman sirv ad chi ruguiaatzi reeman lëjt par yaya'ndi zagdxé loj reeman, gol gunaladx guial Jesucristan cayüjndi sirv guial diidxli cayüjndi zi'c rën Dios güündi. <sup>7</sup> Gol been dxiin con gan, gol gunaladx xchiin Jesucrist cayüjndi, ad xchiint bénguidxliuj. <sup>8</sup> Din lëjt ma ragbee guial tijbgaj bejn majsi bén rüjn xchiin bejn o bén ad rüjnt xchiin bejn, per gudëe Jesucrist ni rayalaman zi'ctzi naj ni zagdxé beenman. <sup>9</sup> Négajc lëjt bén

naj ree patron, gol gojc benza'c con ree xmojsidi, ma gojczy rusagzidi laa reeman, din lëjt ragbee guial bèn rniabee laa reeman në lëjt yu'man xanyabaa, abi' ad rbetaman loj bejn.

### *Gol guzudxi'ch loj ni rliladxidi*

<sup>10</sup> Rni tëen lojdi compniar raliduladx ree Jesucrist, gol guzudxi'ch loj guial ma najdi tijbzi con laaman por xguialrniabee narooobaman. <sup>11</sup> Gol gojp lëjt gajc con xguialrniabee Dios din sudxi'chidi chitëe güün xindxab lëjt gan con ree ni rusquiee. <sup>12</sup> Din ad cayguieent ree naguiejn yaguieen ree gan loj tijb ni naj bëel në dxijjt, caydijl ree con gra loj sprijtmal zi'c ree ni rajp guialrniabee, guialguxtis në gra loj xsprijt xindxab ni yu' ni canabee tëe loj guidxliuj guie. <sup>13</sup> Zeel gol gojp lëjt gajc con xguialrniabee Dios din chile' taandi xhietëez loj guialzi gui't sudxi'ch tëedi loj xhietëez ni saquidi.

<sup>14</sup> Gol guzudxi'chcliza por ni diidxli ni ma ragbeedi, gol basnuu tëe zi'c rayal guibandi. <sup>15</sup> Gol guzusin par guinieedi xtiidxza'c Jesucrist din por laan yadxu' ree zagdx con Dios. <sup>16</sup> Gol badxe'guijc tëe guial guialrliladx ni rajpidi naj ni ragnë lëjt loj gra ni zëed por xindxab. <sup>17</sup> Në ni been Dios perdon xtolidi, laan naj ni rutëe lëjt, guiáad xtiidxaman naj zi'c tijb espad ni runee xSprijt Dios lojdi. <sup>18</sup> Ad gucwëez cwedx guiniabidi Dios. Gol gudi'n gunab lojman guixie guixie con xyudar xSprijtaman. Gol guzusin par cwedx guiniabidi laaman, ad gucheeladxidi, gol gurejdx tëeman por gra ree xbejnman. <sup>19</sup> Gol gurejdx gunab tëeman por naj din yazaladxaman naj diidx ni rayal ganen din ganen sin guialrdxeb xtiidxza'c Jesucrist ni zidnë perdon. <sup>20</sup> Dios bacaabee naj par ganen xtiidxza'caman, abi' por zian yu'n ladxguiib. Per gol gurejdx gunab Dios chitëe gadxeban güün xtiidxaman zi'c rayal günan.

### *Diidx bigra ca ree loj gui'ch guie*

<sup>21</sup> Tíquico, tijb du lasa' ree bèn rayën da't ree, abi' diidxli cayüjnman dunuj ree yudar cayguieen ree sirv Jesucrist, laaman gugojn lëjt gra xhienaag za'n xhie tëe cayünan, <sup>22</sup> din par zianczi caxhalan laaman din gugojnman lëjt xhienaag nadxu'n niz guie yagu' tëeman luxdoodi. <sup>23</sup> Rniaaban loj Dios guial gra ree bèn rliladx Jesucrist, cwe'cdxeman luxdoo reeman guiën tëe lasa' reeman, chililadx tëe reeman laaman në Dad Jesucrist, <sup>24</sup> güünle' tëeman gra ree bèn wali rën Dad Jesucrist.

## Gui'ch guxhaal San Pabl loj ree bén Filipos rliladx Jesucrist

### *Rugajpdioz Pab bén rliladx ree Jesucrist*

<sup>1</sup> Naj Pab con Timoteo, raguieenan sirv loj Jesucrist. Caycaan gui'ch guie par lëjt najdi bén rliladx Jesucrist luguiedx Filipos, në par ree bén rniabee lojdi rulüü tää reeman xtiidx Dios në ree bén rüjn yudar bén rliladx ree Jesucrist. <sup>2</sup> Dux Dad ree Dios në Dad Jesucrist güünle' lëjt, yabe'cdxe tää reeman lëjt.

### *Rbedx rniab Pab Dios por ree bén rliladx Jesucrist*

<sup>3</sup> Zianczi chi rasaaladxan lëjt, rudën quixtää loj da Dadan Dios. <sup>4</sup> Abi' zianczi chi rbedx rniababan laaman dád nix ru luxdon, rbedx rniababan laaman por gradi. <sup>5</sup> Din diizd dxej ni guzuloj rliladxidi Jesucrist dxel guzuloj raguieen ree tijbzi xgab par guire'ch xtiidxaman xt yan. <sup>6</sup> Ragbeechaawan guial diizd chi guzuloj rliladxidi xtiidx Dios, laaman cusnuu cayagnë lëjt din gaquidi zi'c rayal xt dxej gui't Jesucrist stijb. <sup>7</sup> Najczi guial günan xgab zian por gradi, din rusaaladxan lëjt, zi'c chi yu'n ladxguiib ziangajc chi culün conin naj diidxli xcwent Dios din tibloj cayüjnle'man dunuj ree. <sup>8</sup> Dios ragbee guial dád rusaaladxan lëjt guial rënan lëjt zi'cgajczi rën Jesucrist lëjt. <sup>9</sup> Rniab tää lojman din mazri guiën lasa'di, abi' guixie guixie gusnuu guixhialaman xquiarguejndi din gagbeedi ni rayal güündi, <sup>10</sup> din chile' cwedi ni naj mazri zagdxe. Abi' zian guibandi naya sin dol niz loj Dios, chitää xhie naman contr lëjt dxej ni gui't Dad Jesucrist stijb. <sup>11</sup> Abi' por laaman zajc guibandi zi'c rën Dios zi'c balüü Jesucrist lëjt din gap ree bejn Dios mazri respejt guilies tää reeman xvaloraman.

### *Yabajn ree par Cristo*

<sup>12</sup> Compniar raliduladx ree Jesucrist, rënan gagbeedi guial graczi ni guza'can cayüjn reen yudar persi care'ch xtiidxza'c Jesucrist. <sup>13</sup> Abi' yan, gra ree bén yu' lën palas në gra ree bén zojb niz guie ragbee reeman guial yu'n ladxguiib por guial najn xbejn Jesucrist. <sup>14</sup> Abi' chi baguiaa ree compniar raliladxnë' ree Jesucrist guial yu'n ladxguiib, mazri guzudxi'ch reeman abi' zien da't reeman guyu luxdoo gutie'ch reeman xtiidx Jesucrist sin guialrdxeb.

<sup>15</sup> Per diidxliczi yu' reeman rtie'ch xtiidx Jesucrist guial rdëdloj reeman naj abi' rën reeman gac reeman mazri bén zojbloj. Per yu' reeman rtie'ch xtiidxaman guial naj xixgab reeman zagdxe. <sup>16</sup> Yu'za reeman guial rën reeman Jesucrist, catie'ch reeman xtiidxaman abi' ragbee reeman guial yu'n ladxguiib guial za'dxi'chnë'n xtiidxaman guial najcan diidxli. <sup>17</sup> Per yu' reeman ad walit reeman naj xixgab reeman zagdxe catie'ch reeman xtiidx Dios, naabzi par guilies bejn xvalor reeman abi' xixgab reeman naj guial gusagdiaj reeman naj mazri lën ladxguiib guie. <sup>18</sup> Per achet güünan majsi zagdxe naj xixgab reeman o ad zagdxet ya, contzi ma catie'ch reeman xtiidx Jesucrist, laan naj ni rabaanë'n abi' mazri yabaan. <sup>19</sup> Din ragbeen guial yariin loj ni cadëëdan guial cabejdx canabidi Dios por naj në guial cayagnë xSprijt Jesucrist naj. <sup>20</sup> Naj ragbee guial ad yu't dxej guslaa Dios naj yaya'nxtun, sin guialrdxeb gulün bejn ree xhienaag ra'pan respejt Jesucrist majsi nabanen o majsi guiëtan. <sup>21</sup> Din par naj la'tgaj nabanen cayünan laaman sirv, abi' bal guiëtan mazri zagdxen din ma gazun con laaman. <sup>22</sup> Per bal gabajnran loj guidxliuj guie, gusnuu günan sirv loj Cristo zi'c rayal, per ad ragbeetan conin naj zagdxe par naj. <sup>23</sup> Din loj grop ree ni guin dád nawëëgan par gaben conin günan, tijb rënan yaca' Dios naj din gazun con Cristo, laan naj mazri zagdxe par naj, <sup>24</sup> per por lëjt rüjn naguiejn gabajnran. <sup>25</sup> Abi' naj ragbeen guial gabajnran din günan lëjt yudar

gusnuu chinalidi xnejz Dios, din chu' luxdoodi gusnuu chililadxidi Jesucrist. <sup>26</sup> Abi' chi guidganan læjt stijb, chu' ni yabaanëdi gudëe tëedi quixtëe loj Jesucrist por ni beenman por naj.

<sup>27</sup> Per ganin læjt, gol been naguiejn gol gubajn zi'c rayal, zi'c rëb loj xtiidx Jesucrist. Din bal guidganan læjt o bal id zialan, per rënan guiguiejnan guial za'dxi'chidi nadxag tëe lasa'di abi' tiblojz cayüjndi naguiejn catie'chidi xtiidx Jesucrist. <sup>28</sup> Ad guidxebidi bén rdxe'ch læjt. Zian guiguien guial ma canijt reeman loj Dios, per læjt zian guiguien guial ma rajpidi perdon zëed loj Dios. <sup>29</sup> Din ad cwabeetidi par chililadxzidi Jesucrist, cwabeedi në par sagdiajdi por laaman. <sup>30</sup> Læjt con naj tiblojz caydüüd ree tarbajw par yatie'ch ree xtiidx Jesucrist, ma baguiaadi xhienaag rdëedan tarbajw por xtiidxaman abi' yan caguiejndi guial cusnuu cayünan mazran.

## 2

### *Nadxag yadxu' ree por Jesucrist*

<sup>1</sup> Yan, zi'c ma yu' luxdoodi zagdxë por Cristo, zi'c ma yu' luxdoodi nix guial rusnuu rën lasa'di, në zi'c ma nabannëdi xSprijt Dios në zi'c yu' luxdoodi nix con lasa'di, në zi'c raya lasa'di. <sup>2</sup> Gol basnuu gol gubajn zian din yagu'di luxdoon nix. Gol gubajn, gol guyën tëe lasa'di tibloj, gol gojc tijbzi, gol been tëe tijbzi xgab. <sup>3</sup> Ad sëëbladixidi güündi gan loj ree lasa'di o guilies xvalor læjt gajc, mazri zagdxë gol been naya, gol been tëe xgab guial stijb lasa'di mazri lasajc guial lojdi. <sup>4</sup> Ad bal chu'di xgab por læjtzi, gol guyu xgab por stijb lasa'di.

<sup>5</sup> Gol been xgab zi'c been Jesucrist xgab. <sup>6</sup> Din majsi laaman naj Dios, per ad guzudxi'chtaman guial niëjbaman laaman naj Dios. <sup>7</sup> Basa'n xguialrniabeeman persi bi'taman loj guidxliuj guie zi'c tijb mojs abi' gojlaman zi'c tijb bénguidxliuj. <sup>8</sup> Abi' chi gocaman zi'c tijb bénguidxliuj beenman naya abi' bazoob xtiidx xDadaman, xt güjtaman loj crüzj, majsi ni natu naj guial rëjt loj crüzj. <sup>9</sup> Zeel dád guialrniabee narooob badëe Dios lojman, badëe tëeman lojman laj bejn ni mazri lasajc loj gra laj bejn. <sup>10</sup> Din chi guiguiejn ree bejn laj Jesucrist, guzuxib gra reeman lojman, zi'c ree ni yu' xanyabaa, në gra ree ni yu' loj guidxliuj, nëtëe ree ni yu' lën liuj. <sup>11</sup> Abi' gra bejn guiëb guial Jesucrist naj Dad, zian guilies reeman xvalor dux Dad ree Dios.

### *Xbejn ree Jesucrist naj zi'c tijb guiij ni rulaa bacha'*

<sup>12</sup> Zeel compniar raliduladx ree Jesucrist, zi'c rënan læjt abi' rnin læjt guial zi'c bazoobidi da diidxan chi guzun con læjt, ziangajc gol bazoob da diidxan mazri yan guial za'n zijt. Con guialrdxeb në con respejt gol been zi'c rayal güün ree bén ma naj perdon.

<sup>13</sup> Din por Dios zëed xgabza'c ni rüjndi, abi' laaman ragnë læjt din güündi zi'c rënman.

<sup>14</sup> Gol been gra ni rayal güündi, achet guial ad zayuladxtidi achet tëet guial tildiidxidi, <sup>15</sup> chitëe xhie guinee bejn læjt o chitëe xhie xfaltidi yadxëjl reeman. Læjt najdi xi'n Dios gol gubajn naya niz loj ree bén ad zinalt xnejz Dios, bén rüjn ree ni guiidx. Din gaquidi zi'c tijb guiij loj reeman, zi'c tijb guiij ni rulaa bacha' lod nacay, <sup>16</sup> guial za'dxi'chnëdi xtiidx Dios ni zidnë guialnaban. Abi' zian yabaan por læjt dxej ni gui't Jesucrist stijb guial gagbeen ad bentan dxiin xlia' ad bizaa tëetan xlia'. <sup>17</sup> Din guial rliladxidi Dios laan naj zi'c tijb gon par laaman, abi' nix yu' luxdon majsi guiëtan din yayaaloj gon guin guial rabaanë'n gradi. <sup>18</sup> Yan ziangajc gol babaa, gol babaa zi'c rabaan.

### *Timoteo në Epafrodito*

<sup>19</sup> Dad Jesucrist gagnë naj din diob gaxhalan Timoteo lod zojbidi din xhienladxan chi gagbeen xhienaag riga'di. <sup>20</sup> Din tijbzi Timoteo yu' læjt xgab zi'c yu'n læjt xgab. Achut bén ru læjt xgab zi'c laaman. <sup>21</sup> Graczi reeman ru xgab per por laagajc reeman, ad rut reeman xgab por ni rën Jesucrist güün reeman. <sup>22</sup> Per ma ragbeedi xhienaag naj Timoteo, ma ragbeedi xhienaag cayünman naj yudar persi catiechan xtiidx Jesucrist. Cayünman naj



yudar zi'c rüjn bejn xDadaman yudar. <sup>23</sup> Zeel rënan gaxhalan laaman din guitixlojman lëjt, gagbeezan xhienaag gariican loj cwent guie <sup>24</sup> Dad Jesucrist gagnë naj din diob guidgana quijb naj lëjt.

<sup>25</sup> Abi' rulüü rüjn naguiejn gaxhalan da miwan Epafrodito ladxidi. Lëjt guxhaal laaman din güünman naj yudar loj ree ni ryaadxan. Abi' zian cayünman naj yudar, tiblojzi cayzaagdiajn. <sup>26</sup> Dád rënman guidganajman lëjt abi' dád yu'man xgab guial gogbeedi gogxuuman. <sup>27</sup> Abi' walican gogxuuman zamer niëjtaman. Per baya Dios laaman, abi' ad laatzaman, nëgajc naj bayaman, chitëe chu'naya luxdon mazri zi'c ma guyu nayan. <sup>28</sup> Zeel diob gaxhal gajcan laaman din yabaadi chi guguaadi laaman stijb chitëe chu'naya tëen mazri. <sup>29</sup> Gol babaa, gol baca'man guial najman tijb du lasa' ree bén rliladx Jesucrist. Zian gol guyën gra ree bén naj zi'c laaman. <sup>30</sup> Din zamer niëjtaman guial rüjnman sirv loj Jesucrist, guzujman loj guialgüjt guial beenman naj yudar loj ni ad bile't nüjn quijb lëjt naj yudar.

### 3

#### *Ni mazri lasajc*

<sup>1</sup> Yan, compniar raliduladx ree Jesucrist, gol badxe' luxdoodi zagdxë por Dad Jesucrist. Par naj achetan guial ganin lëjt diidx ni ma rni gajcan tijb, din par lëjt lasajc ree diidx guin chitëe chu' ni gusquiee lëjt. <sup>2</sup> Gol gojp cudad con ree bentont, bén ad nadëdguient, benmal, bén rüjn ree naguiejn din chu' ree bejn xsen bén Israel. <sup>3</sup> Din mazri lasajc sen ni raya'p ree, abi' sen guin naj guial diidxli zunaal ree Dios por xSprijtaman bén nabajnnë' ree, abi' rabaa ree guial ma rayagbee ree nayajc ree xbejn Jesucrist, per ad por guial zunaalt ree costumbr. <sup>4</sup> Majsij zajc gales da valoran guial zinaalan gra ree costumbr, per bal yu' bén rlies xvalor gajc, nëgajc naj zajc gün zian. <sup>5</sup> Din chi goc toxman goolan, badxe' reeman naj sen ni ru ree bén Israel. Abi' bén Israel naj, loj xdiaa Benjamín zialan, rnien diidx Hebreo din xi'n ree bén rniee diidx Hebreo naj. Benan gra ni rniabee ley din bénfarisew gojcan. <sup>6</sup> Benan zi'cgajczi rüjn ree bénfarisew, zeel xt guzunaalan bén rliladx ree Jesucrist din günan laa reeman ni mal, benan gra zi'c tal rniabee ley abi' achut zajc niëjb guial ad cayüntan zi'c rayal. <sup>7</sup> Gra ni benan nadxel, par naj dád lasajcan nadxel, per yan achet lasajcan par naj, din yan Cristo mazri lasajc. <sup>8</sup> Abi' achet ni mazri lasajc guial loj ni nünbeen Dad Jesucrist, por laaman gra ni benan nadxel ma basa'nan tiblax, naj reen zi'c tijb guix par naj din nabee Cristo naj guidiblagaa, <sup>9</sup> abi' gacan tijbzi con laaman. Ad naladxtan por guial rünan zi'c rniabee ley achet dol ra'pan niz loj Dios, naladxtan por guial rliladxan Jesucrist, din por guialrliladx guin ma naya bejn loj Dios. <sup>10</sup> Zeel rënan günbee chaawan Cristo, günbee tëen guialrniabee ni basban laaman, rën tëen gadaan xhietëez loj guialrzagdiaj ni gadëedan zi'c gudaanman, ma guidxin dxej gacan zi'c rayal gacan por xguialgüjtaman. <sup>11</sup> Din yu'guican guial yabanan zi'c baban Jesucrist.

#### *Ni gunee Dios xanyabaa*

<sup>12</sup> Ad canitan lojdi guial ma bayaaloj benan gra o guial najn benza'c, per cayünan naguiejn din gacan zi'c rën Cristo gacan diizd chi guzuloj rniabeeman naj. <sup>13</sup> Compniar raliduladx ree Jesucrist, naj rni lëjt guial ad wayaalojt günan zi'c rayal, per cayünan naguiejn din yayanladxtan gra ni benan gocli din gac gusnuun par delant, <sup>14</sup> din yayaaloj günan zi'c rayal din chile' gaca'n ni gunee Dios xanyabaa zi'c gurejdxaman dunuj ree por Jesucrist.

<sup>15</sup> Abi' dunuj ree guial ma rayagbee ree zagdxë ni rën guiëb xtiidx Dios, rayal yaguieen ree xgab zian. Per bal garen naj xixgabidi guial loj ni canin lojdi, Dios gulüü lëjt conin naj diidxli. <sup>16</sup> Per rüjn naguiejn yabajn ree zi'c ma rayignia' ree.

<sup>17</sup> Compniar raliduladx ree Jesucrist, gol gubajn zi'c naban, gol baguiaa tëe xhien-aag naban ree bén naban zi'c naban. <sup>18</sup> Din zien volt ma rnin lojdi abi' yan caydxi'nan

zatiyb, xt ronan canin l jt guial zien ree bejn naban zi'c ree b n ad rliladxt guial g jt Cristo loj cr jz por dux xtol ree. <sup>19</sup> Abi' ree b n guin castizi naj ni rb z laa reeman din mazri ruladx reeman g n reeman ni dxuudx. Abi' luar yatu reeman por ni r jn reeman aal mazri rlies xvalor reeman guial mazri r jn reeman xgab por ree ni yu' loj guidxliuj guie. <sup>20</sup> Per dunuj ree ma nayab ree xanyabaa abi' cayl jz ree guial diizd xanyabaa gui't Dad Jesucrist b n gudix por dux tol ree. <sup>21</sup> Laaman naj b n guchaa dux cuerp ree ni raya'p ree loj guidxliuj guie din gacan zi'c naj xcuerpaman xanyabaa. Abi' g nman zian con guialrniabee ni rajpaman par nabeeman gra.

## 4

### *Gol badxe' luxdoodi zagdxe por Dad Jesucrist*

<sup>1</sup> Zeel compniar raliduladx ree Jesucrist, r nan l jt r n t en guidganan l jt, l jt rgu' luxdon zagdxe, abi' najdi zi'c tijb prem par naj, gol guzujdxi'ch loj ni rliladxidi Dad Jesucrist.

<sup>2</sup> Yan, rniaaban loj Evodia n  loj S ntique din guidxag cwe reeman guial naj reeman compniar loj ni rliladx reeman Dad Jesucrist. <sup>3</sup> Abi' ziangajc l j compniar ni cayguieen dxiin tijbzi, rniaaban lojl din g n yudar b ngunaa guin ree din laa reeman been naj yudar bire'ch xtiidx Jesucrist n  Clemente con ree ben ren, gra reeman ma yu' laj loj libr ni yu' laj ree b n guiban tiblayaa con Dios.

<sup>4</sup> Zianczi gol badxe' luxdoodi zagdxe por Dad Jesucrist. Naj rni l jt ;Gol badxe' luxdoodi zagdxe! <sup>5</sup> Gol been naguiejn g nbee gra bejn l jt guial najdi benza'c. Gol badxe'guijc guial zamer gui't Dad Jesucrist zatiyb.

<sup>6</sup> Ad rayalt chu'di xgab por xhienin, gol gurejdx gunab Dios por gra ni rzajquidi, gol gurejdxaman gol bad  t  quixt  lojman. <sup>7</sup> Dios yabe'cdxe luxdoodi, zro' rabe'cdxeman luxdoo bejn mazri guial loj ni naladx bejn, abi' laan naj ni gagn  l jt din yayaalyuj luxdoodi yayaalyuj t  xquiarguiejndi guial ma najdi tijbzi con Jesucrist.

### *Gol badxe'guijc ganax ni zagdxe*

<sup>8</sup> Naga gad lox g nan gui'ch guie, compniar raliduladx ree Jesucrist, rnin l jt gol badxe'guijc ganax ni diidxli, ni rayal respejt n  ni naj xnejz. Gol badxe'guijc ganax ni r jn sirv, ni naj zagdxe n  ni rayal g n b n z  xnejz. Gol badxe'guijc gra ni naj zagdxe n  ni guilies bejn xvalor.

<sup>9</sup> Gol been zi'c basidan l jt, zi'c ma bal n l jt, gol been zi'c rnin l jt zi'c ma baguiaadi benan, zian gagn  Dios l jt b n rabe'cdxe luxdoo ree bejn.

### *Ni bad d ree b n filipos loj Pab*

<sup>10</sup> D d rabaan por Dad Jesucrist guial ma basaaladxidi naj. Ad canitan bayanladxidi naj, canin zian guial ad gojctri n jndi naj yudar. <sup>11</sup> Ad canitan zian guial cayaadxan xhienin din ma basidan gad dan con ni ra'ptzan. <sup>12</sup> Ragbeen xhienaagan chi naban bejn loj guialprob ragbee t en xhienaagan chi achet ryaadx bejn, din ma basidan rdaanan ni z edtzi, bal rawan o bal id rawan, bal r jnan naj sobr o bal ryaadxan. <sup>13</sup> Rajc rdaanan ni z edtzi con xyudar Jesucrist. <sup>14</sup> Per zagdxe naj ni beendi guial beendi naj yudar loj ni cazaagdiajn.

<sup>15</sup> Ragbee t edi guial chi briin niz Macedonia din suloj gatie'chan xtiidxza'c Jesucrist, l jtzi bazaladx xhienin lon guial loj gra ree guiedx lod ma rliladx reeman xtiidx Jesucrist, zi'c benan l jt yudar ziangajc beendi naj yudar. <sup>16</sup> Ziangajc chi guzun luguiedx Tesal nica chi biaadxan xhienin, b lczi volt beendi naj yudar. <sup>17</sup> Ad caygultan mod din g ndi naj yudar mazri, ni r nan naj guial mazri yaya'ndi zagdxe loj Dios. <sup>18</sup> Ma baca'n gra ni guxhaalidi con Epafrodito, yan xt sobr r jnan naj, par naj ni guxhaalidi naj zi'c tijb ni nadxoon o tijb gon ni ruree nejxh, ni ruladx Dios. <sup>19</sup> Zeel Dios gunee l jt

gra ni ryaadxidi por ree ni za'c ni rajpaman xanyabaa con Dad Jesucrist. <sup>20</sup> ¡Abi' por guialrniabee ni rajp dux Dad ree Dios, rayalczi yaya'p reeman respejt goctëéz! Amén.

*Rugajpdioz ree bén rliadx Jesucrist bén Tesalónica ree*

<sup>21</sup> Gol bagajpdioz gra ree bén ma naj xbejn Jesucrist, guiáad gra ree bén rliadx Jesucrist bén za'në' reen guie, rugajpdioz reeman lëjt. <sup>22</sup> Gra ree bén zojb ree guie, bén ma naj ree xbejn Jesucrist, në gra ree bén rüjn sirv loj rey, në reeman rugajpdioz lëjt.

<sup>23</sup> Dux Dad ree Jesucrist güünle' gradi. Amén.

## Gui'ch guxhaal San Pabl loj ree b en Colosas rliladx Jesucrist

### *Rxhiaal Pab xtiidx Dios*

<sup>1</sup> Naj Pab, najn tijb xi ap stol Jesucrist, din zian r n Dios. Naj con Timoteo nayajcan compniar raliduladxan Jesucrist, <sup>2</sup> caycaan gui'ch guie par l jt guial diidxli zinalidi xtiidx Jesucrist, l jt guial najdi xbejn Dios luguiedx Colosas. Dux Dad ree Dios g nle' l jt cwe'cdxe t eman luxdoodi.

### *Rbejdx Pab Dios por ree xbejn Jesucrist*

<sup>3</sup> Beegaj chi rarejdxan Dios, xDad Dad Jesucrist, rad edan quixt e lojman por l jt. <sup>4</sup> Din ma baguiejnan xhienaag rliladxidi Jesucrist xhie t e naag r ndi gra ree b en naj ree xbejnman. <sup>5</sup> Guial cab zidi yayalidi guialnaza'c yu'chaaw xanyabaa. Gogbeedi laan chi biguiejndi xtiidxza'c Jesucrist ni naj diidxli. <sup>6</sup> Abi' ree diidxza'c guin ni ma bacaagdiajguidi, gra ladczi ma care'chan. Abi' gra ladczi ma caliladx ree bejn laan zi'cgajc guzaquidi chi biguiejndi guial naza'c Dios abi' diidxli r nman l jt. <sup>7</sup> L jt gogbee diidxli guin ree chi bal u Epafras laa reen l jt. Laaman cay jn dunujn yudar abi' d d ray nan laaman, din laaman diidxli cay jn sirv loj Jesucrist delant lojdi. <sup>8</sup> Abi' t e laaman be diidx du lojn xhienaag r n lasa'di guial yu' xSprijt Dios luxdoodi. <sup>9</sup> Zeel diizd chi baguiejnan xhienaag nabandi, ad racw  zt rarejdxan Dios por l jt din chignia'di zagdxe xhienaag r nman g ndi gunee t eman l jt gra loj guialrajc guixhial t eman xquiarguiejndi por xSprijtaman. <sup>10</sup> Abi' zian guibandi zi'c rayal guiban ree b en rliladx Jesucrist, din g ndi zi'c tal ruladxaman abi' gusnuu g ndi ganax ree ni zagdxe gusnuu t e g nbeedi Dios mazri. <sup>11</sup> Abi' ranaaban lojman din con xguialrniabee za'cdxoonman gagn man l jt din sudxi'chidi, taan t edi xhiet ez loj guialzi t didi sin guial yalenya'di. <sup>12</sup> Abi' xt nix chu' luxdoodi gud edi quixt e loj dux Dad ree Dios guial basiaman l jt din yayalidi ni rayal ree xbejnman, b en zinal ree xnejzaman. <sup>13</sup> Laaman bab e dunuj ree loj xguialrniabee xindxab abi' bagu'man dunuj ree loj xguialrniabee xi'nman Jesucrist b en r nman, <sup>14</sup> abi' gudijxaman por dux tol ree, yan ma raya'p ree perdon loj Dios.

### *Por xguialg jt Jesucrist ma nadxu'n e ree Dios zagdxe*

<sup>15</sup> Achut zajc guguaa Dios, per Jesucrist naj zi'c gajczi naj Dios. Abi' laaman mal rniabeen man Dios diizd chi gad guidxliuj gacchaaw. <sup>16</sup> Por Jesucrist gojc gra ni yu' xanyabaa n  loj guidxliuj, zi'c ni ruguaa bejn zi'c ni ad ruguiaataman. Abi' por laaman yu' graloj guialrniabee n  graloj guialguxtis ni rajp ree ni ad rajct ruguaa ree bejn. Gran gojc por laaman n  par laaman. <sup>17</sup> Mal yu' Jesucrist diizd guia'xchej chi gad guidxliuj gacchaaw, laaman dxiiibguijc gra abi' rniabeeman gra. <sup>18</sup> Abi' laa t eman rniabee gra ree b en rliladx laaman, b en ma naj ree xbejnman. Laaman naj b en yaloj abi' yaloj laaman baban loj ree beng t din guiguien guial tijbzi laaman rajp guialrniabee loj gra. <sup>19</sup> Din bayuladx Dios gac Jesucrist zi'c gajczi naj Dios. <sup>20</sup> Abi' por Jesucrist gra b nguidxliuj ma za' zagdxe con Dios, zi'c ni yu' loj guidxliuj zi'c ni yu' xanyabaa. Za' bejn zagdxe con Dios por xguialg jt Jesucrist loj cr jz. <sup>21</sup> Gocli ad gojctidi tijbzi con Dios, gojquidi zi'c b n bidxe'ch laaman guial beendi ganax ni mal. <sup>22</sup> Per yan ma za'di zagdxe con Dios por ree guialzi ni gud d Jesucrist chi g taman loj cr jz din gac guidxindi lojman naya sin dol chit e xhie naman lojdi. <sup>23</sup> Per par zian rayal sudxi'chidi loj guialrliladx ni rajpidi, ad gucw  z chinalidi xtiidxza'c Jesucrist ni ma biguiejndi. Abi' diidxza'c guin gajc ree ma bire'ch guidib guidxliuj. Abi' naj naj tijb ree b en catie'ch diidxza'c guin ree.

### *Bacaabee Dios Pab din g nman sirv loj ree xbejn Dios*

<sup>24</sup> Abi' yan nix yu' luxdon por guialzi ni cadëedan guial rünan lëjt yudar abi' lasa'gajc guialzi ni gudëd Jesucrist cadëedan din chile' günan yudar bén rüladx ree laaman bén ma naj ree xbejnman. <sup>25</sup> Din Dios bacaabee naj par günan sirv loj ree xbejnman. Abi' laaman banee dxiin guin naj din gulün lëjt xtiidxaman zi'c tal najn. <sup>26</sup> Diisd tiamp gulal ad bignia't ree bejn zagdxe ni rën guiëb xtiidx Dios. Per yan ma balüüman ni rën guiëban loj ree xbejnman. <sup>27</sup> Din gugojn reeman bén ad najt ree bén Israel xhienaag naj xguialnaza'c za'cdxoonman. Abi' ni ad balüüt Dios loj ree bejn tiamp gulal naj guial nabannë Jesucrist lëjt abi' por laaman ragbeedi zagdxe guial yu' dxej yayalidi xanyabaa. <sup>28</sup> Abi' dunujn batie'ch xtiidx Jesucrist, baneenë'n bejn ree, balüü tëen laa reeman con gra quiarguejn ni runee Dios din chi guidxin reeman lojman por Jesucrist ma naj reeman zi'c rënman gac reeman. <sup>29</sup> Abi' naj dád cayünan naguiejn cayünan dxiin guie con guialrniabee ni baneeman naj.

## 2

<sup>1</sup> Rënan gagbeedi guial cayün da'tan naguiejn cayünan lëjt yudar, në ree bén zojb guiedx Laodicea në gra ree bén ad wayünbeet naj. <sup>2</sup> Cayünan naguiejn din yayu luxdoo reeman din gusnuu guiban reeman tijbzi, guiën lasa' reeman chu' tëe xquiarguejn reeman din chile' güünbee reeman ni ad balüüt Dios bejn ree gulal abi' laaman naj Jesucrist, <sup>3</sup> por laaman zëed gra guialrajc në guialrignia'. <sup>4</sup> Canin diidx guie ree lojdi chitëe chu gusquiee lëjt con ree xtiidx zagdxe reeman. <sup>5</sup> Majsı ad za'tan con lëjt, per yu'guican lëjt abi' rabaan guial cayüjndi zi'c rayal, za'dxi'ch tëedi loj guialrliladxidi Jesucrist.

<sup>6</sup> Zeel zi'c ma rüladxidi Dad Jesucrist, ziangajc gol gojc tijbzi con laaman. <sup>7</sup> Gol been naguiejn gol binalaman guidiblagaa, gol guzudxi'ch loj guial rüladxidi laaman zi'c ma basiididi ad gucwëez tëe gudëedi quixtëe loj Dios.

### *Guialnaban ni rudëed Jesucrist*

<sup>8</sup> Gol gojp cudad, ad tiëbidi güün ree bén rën gusquiee lëjt gan con ree ni rulüü reeman o con ree diidx ni ad rüjnt sirv ni zëed por ree costumbr o por ree guialrniabee yu' loj guidxliuj, din ad zëedt reen por Jesucrist.

<sup>9</sup> Din zi'cgajczi naj Dios, ziangajczi naj Jesucrist. <sup>10</sup> Abi' nabannëdi Dios guidiblagaa guial najdi tijbzi con Jesucrist, din laaman rniabee loj gra guialrniabee në loj guialguxtis. <sup>11</sup> Abi' tëe guial ma najdi tijbzi con Jesucrist ma yu'di xsenman, per ad lasa't sen ru ree bén Israel, sen yu'di por laaman najn guial ma basa'ndi dol tıblad. <sup>12</sup> Chi gurobnijsidi, laan rën guiëb guial güjtidi con Jesucrist abi' babandi con laaman stijb guial rüladxidi Dios rajp guialrniabee persi basbanman Jesucrist loj guialgüjt. <sup>13</sup> Gocli gojquidi zi'c bengüt delant loj Dios por xtolidi në por guial ad guyutidi sen ni ru ree bén Israel. Per yan por Jesucrist, ma been Dios dux tol ree perdon abi' ma raya'p ree guialnaban con Jesucrist. <sup>14</sup> Ma badxi'ca Dios dux tol ree ni bayal nadijx ree zi'c rniabee xleyaman, badxi'caman dol guin ree chi güt Jesucrist loj crüjz abi' laaman naj bén gudijx laan por dunuj ree. <sup>15</sup> Abi' zian beenman gan gra loj ree guialguxtis në loj gra guialrniabee zëed loj xindxab. Basa'nxtuman laa reeman loj ree bejn, beenman laa reeman gan guial güjtaman loj crüjz.

### *Gol been xgab ni yu' ree xanyabaa*

<sup>16</sup> Zeel achut rayal gula'ch lëjt por ni rawidi në ni rë'di o por guial ad rüjntidi cwent dxej lanij o dxej ni yu' bëew cüb o dxej raziiladx ree bejn. <sup>17</sup> Din gra ree ni guin naj zi'c tijb xbala Jesucrist abi' yan laaman naj bén ma bi't. <sup>18</sup> Ad tiëbidi gutiaalguiiw Bén rën ree anjl zi'c Dios lëjt, par gusa'ndi xnejz Dios, din laa reeman rulüü naj reeman Bén naxanladx, per ad najt reeman laan rëb tëe reeman guial yu' ni rulüüloj loj reeman. Dxel laagajc reeman rlies xvalor por xixgab gajc reeman. <sup>19</sup> Per laa reeman ad nabannët reeman

Jesucrist, b n rniabee dunuj ree. Abi' por laaman caysnuu cayignia' ree xhienaag yunaal ree xnejzaman din yadxajg du lasa' ree yayajc ree tijbzi con Jesucrist zi'c naj xixgab Dios.

<sup>20</sup> Yan bal walidi ma g jtidi con Jesucrist par ree ni rb eguijc ree b nguidxliuj,  chexquiza zeel ruzoobidi xtiidx ree b n r b: <sup>21</sup> “Ad rayalt gugaalil ni guin, ad gawil ni guin, ad guiniaazil ni guin”? <sup>22</sup> Gra ree mandamient guin yu' dxej nit reen, din b nguidxliuj gul eguijc laa reen. <sup>23</sup> Diidxliczi rul u lasajc da't ree mandamient guin guial tant r jn ree bejn naguiejn g un reeman laa reen cumplid abi' r jn reeman b n naxanladx dxel rusagzi laagajc reeman, per achetczi lasajc ree mandamient guin par gucw ez reen ni mal rz ebladx reeman g un reeman.

### 3

<sup>1</sup> Zeel bal ma rajpidi guialnaban c b con Jesucrist, gol been naguiejn gol been xgab ni yu' ree xanyabaa lod za' Jesucrist xladbee Dios. <sup>2</sup> Ad g undi xgab ganax ree ni yu' loj guidxliuj, gol been xgab mazri ni yu' ree xanyabaa. <sup>3</sup> Gol gunaladx ma g jtidi par ree ni yu' loj guidxliuj abi' ma rajpidi guialnaban delant loj Dios por Jesucrist. <sup>4</sup> Abi' chi gui't Jesucrist stijb, b n runee dunuj ree guialnaban, n  l jt yayal guibann  laaman loj xguialrniabee za'cdxoonman.

#### *Zi'c rayal guiban ree b n rliladx Jesucrist*

<sup>5</sup> Yan, gol basa'n gra ree ni mal riga' loj guidxliuj guie. Ad sun di b n ren b n ad najt lacheelidi. Gol basa'n ni ad r jnt ree sirv, n  ree xgabmal n  ree ni mal yu'di gan g undi. Ad s ebladx t edi gapidi gra loj ni yu' loj guidxliuj din b n r jn zian laan r nman mazri luar Dios. <sup>6</sup> Abi' por ree ni guin z ed xcasti Dios par ree b n ad ruzoobt xtiidxaman. <sup>7</sup> Lasa' ree ni mal guin beendi chi gadidi g unbee Jesucrist. <sup>8</sup> Per yan gol basa'n gra ree ni mal guin zi'c guialrdxe'ch, guialralen lasa', guialr jn ni mal lasa', guialrnieeguijdx n  guial rn ee diidxguijdx. <sup>9</sup> Ad rusquiee loj lasa'di, din ad nabantridi zi'c gubandi gocli chi beendi ni mal ree, <sup>10</sup> din yan ma bidxaa mod nabandi. Ma najdi zi'c benc b guial chigagaj ma cayajquidi zi'c r n Dios gaquidi din g unbeedi Dios mazri zagdxe, b n runee l jt guialnaban. <sup>11</sup> Abi' chi ma rliladx bejn Jesucrist, achet g unan chut ez najman, bal najman b n grieg o b n Israel, bal yu'man sen ru ree b n Israel o ad yu'taman laan ya, bal najman benzit o najman b n zobj dajn, bal najman zi'c b n nado' o ad najtaman zi'c b n nado' Per ni mazri lasajc naj guialrliladxaman Jesucrist, b n rniabee za' t eman con dugra ree.

<sup>12</sup> Abi' Dios r n l jt, zeel gulejman l jt din gaquidi xbejnman. Zeel gol baya bejn ree, gol gojc benza'c, gol gojc b n naxanladx, ad gaquidi bendxal, gol gojp pasens lasa'di. <sup>13</sup> Ad yalenyane' n  lasa'di. Gol been t e perdon lasa'di bal xhie r jnn  reeman l jt. Zi'c been Dad Jesucrist l jt perdon ziangajc gol been perdon bejn ree. <sup>14</sup> Gol badxe'guijc guialr n lasa' naj ni mazri lasajc. Abi' guialr n lasa' guin r jn yudar din guidxaag guiban bejn. <sup>15</sup> Gol cw jb nabee Jesucrist l jt din yabedxe luxdoodi, din par zian gulej Dios l jt par gaquidi tijbzi por Jesucrist gol bad e t e quixt e lojman por zian.

<sup>16</sup> Gol badxe'guijc da't xtiidx Jesucrist, gol bal u gol guneen  t e lasa'di zi'c rayal. Gol bad e quixt e loj Dios con ree cant n  ree salmos n  los demazri ree cant ni naj par Dios. <sup>17</sup> Xhiet ez ni g undi ni guiniee t edi, yaloj xgaj gol basaaladx Dad Jes s abi' por laaman gol bad ed quixt e loj dux Dad ree Dios.

#### *Zi'c rayal guiban tijb famil*

<sup>18</sup> L jt b ngunaa yu' ree lacheel, gol bazoob xtiidx lacheelidi, din zian rayal g un b n rliladx Jesucrist. <sup>19</sup> Abi' ziangajc l jt xinguaaaw yu' ree lacheel, gol guy n lacheelidi ad gusagzi t edi laa reeman.

<sup>20</sup> Nè lèjt xin naj ree xi'n, gol bazoob gra xtiidx ree xDadidi, din zian ruladx Dios. <sup>21</sup> Abi' ziangajc lèjt dad na, ad gusagdiaj xi'ndi chitëe guidxe'ch reex abi' yalenyà' reex.

<sup>22</sup> Lèjt bén rüjn ree xchiin bejn, gol bazoob gra xtiidx xpatrondi loj guidxliuj guie. Ad chi ruguiaatzi reeman lèjt par yaya'ndi zagdx loj reeman, guidib luxdoodi gol been xchiin reeman por respejt ni rajpidi Dad Jesucrist. <sup>23</sup> Xhietëez nin güündi, gol beenan con gan. Gol gunaladx loj Jesucrist cayüjndi sirv, ad lojt bénguidxliuj. <sup>24</sup> Din lèjt ma ragbee guial zian yu' ni tia'di loj Dad Jesucrist guial cayüjndi laaman sirv. <sup>25</sup> Per par ree bén rüjn ni mal, laa reeman yayal casti por ni mal been reeman, din Dios ad rbetaman loj bejn.

## 4

<sup>1</sup> Négajc lèjt bén naj ree patron, gol been zi'c rayal con ree bén rüjn xchiindi, gol gojc tée benza'c con laa reeman, din lèjt ragbee guial xanyabaa yu' bén rniabee lèjt.

<sup>2</sup> Gol guzusin, gol gurejdx Dios ad bal gucheeladxidi, gol badëe quixtëe lojman. <sup>3</sup> Gol gurejdx tée Dios por dunujn din guixhialaman nejz din gac yatie'chan mazri xtiidx Jesucrist ni ad wayünbeet ree bejn. Abi' por ree diidx guin yu'n ladxguuib. <sup>4</sup> Gol gurejdx Dios din gac gatiechan diidx guin ree loj ree bejn zi'c rayal din gac chignia' reeman laan zagdx.

<sup>5</sup> Gol gubajn zagdx delant loj ree bén ad waliladxt Jesucrist gol gunee tée xtiidxaman loj reeman beegaj chi chu' mod. <sup>6</sup> Chi rüdi diidx, gol be diidx xnejz din yayuladx bejn ni rnieedi gagbee tée di xhienaag yadxi'di ni rniabdiidx reeman lojdi.

### *Rxhiaal ree xbejn Jesucrist xtiidx Dios*

<sup>7</sup> Tíquico, tijb du lasa' ree, bén rayën ree, bén diidxli cayüjn naj yudar cayünan sirv loj Jesucrist, laaman gugojn lèjt gra xhienaag za'n niz guie. <sup>8</sup> Par zian caxhalan laaman din gugojnman lèjt xhienaag nadxu'n niz guie din yagu' tée man luxdoodi. <sup>9</sup> Abi' con laagajcaman caxhalan Onésimo, tijb du lasa' ree bén rayën gajc ree, bén naban zi'c rayal, bén naj bén ladxidi. Laa reeman gugojn lèjt gra ni cayajc niz guie.

<sup>10</sup> Aristarco, bén yu'në'n ladxguuib, laaman rxhiaal xtiidx Dios lojdi. Négajc Marcw, bijchwin Bernabé rugajpdioz lèjt. Abi' ma bagojnan lèjt chunin naj Marcw, bal gui'taman guidganajman lèjt, gol baca'man zagdx. <sup>11</sup> Abi' nëgajc Jesús, bén la gajc Justo, rxhiaal xtiidx Dios lojdi. Loj gra ree bén Israel rliladx Jesucrist, laaz reeman cayüjn naj yudar caytie'chan xtiidx Dios abi' laaz reeman naj bén cagu' luxdon. <sup>12</sup> Nè Epafras, bén ladxidi, rxhiaal xtiidx Dios lojdi. Laaman cayüjn sirv loj Jesucrist. Gra dxejci rbejdxaman Dios por lèjt din sudxi'chidi chinalidi xnejz Dios güün tée di gra zi'c rënman. <sup>13</sup> Naj ragbee zagdx guial dád ruman xgab por lèjt, në por ree bén Laodicea, në por ree bén Hierápolis. <sup>14</sup> Lujc, doctor rayën da't ree, në Demas, në reeman rxhiaal xtiidx Dios lojdi.

<sup>15</sup> Gol bagajpdioz ree dux compniar ree bén rliladx ree Jesucrist, bén zojb ree luguiedx Laodicea. Gol bagajpdioz tée Ninfas con los demazri ree xbejn Jesucrist bén rado'p ree lidxaman. <sup>16</sup> Chi ma gulox biilidi gui'ch guie, dxel gol guxhaalan loj ree bén rliladx Jesucrist, bén zojb ree luguiedx Laodicea, din në reeman gool laan. Nè gui'ch ni guxhalan loj reeman rayal yaxhaal reeman lojdi din nëgajc lèjt gool laan. <sup>17</sup> Abi' gol güjdx loj Arquipo din güünman cumplid ni ma bacaabee Dad Jesucrist güünman. <sup>18</sup> Naj Pab, quijb naj cuca lejtr guie ree par gugajpdiozan lèjt. Gol basaaladx guial yu'n ladxguuib. Dios güünle' lejt. Amén.

## Gui'ch yaløj guxhaal San Pabl loj ree bèn Tesalónica rlliladx Jesucrist

<sup>1</sup> Naj, Pab con Silvan nē Timoteo, cayxhaalan gui'ch guie par lējt najdi bèn rlliladx Jesucrist luguiedx Tesalónica, dux Dad ree Dios nē Dad Jesucrist güünle' lējt yabe'cdxe tēē reeman luxdoodi.

### *Rudēē Pab quixtēē loj Dios*

<sup>2</sup> Guixie guixie radēēn quixtēē loj dux Dad ree Dios por gradi, rasaaladx tēēn lējt chi rarejdx ranaaban laaman. <sup>3</sup> Nē zianczi chi rarejdx ranaaban laaman, nadxe'duguijcan ni ma beendi guial rlliladxidi laaman, nē guial rēn lasa'di, nadxe'duguijc tēēn guial cadaandi cabēzidi gui't Dad Jesucrist stijb. <sup>4</sup> Compniar raliduladx ree Jesucrist, dunujn rayagbee guial Dios rēn lējt, gulej tēēman lējt. <sup>5</sup> Din chi baneen xtiidxza'caman lojdi, ad diidxtizi balüün lējt, balüün lējt con xguialrniabee xSprijt Dios abi' rayagbeen guial diidxli naj ni caynan lojdi. Lējt ragbee xhienaag babajnan chi badxu'nē'n lējt, babajnan zian din yaguieenan lējt yudar xhienaag guibandi.

<sup>6</sup> Abi' lējt nabandi zi'c babajnan lojdi nē zi'c balüü Jesucrist, abi' por xSprijt Dios babaadi bililadxidi ni banan lojdi, majsi dád guzagdiajdi. <sup>7</sup> Zian najdi tijb ejempl par gra ree bèn rlliladx Jesucrist niz Macedonia nē niz Acaya. <sup>8</sup> Por lējt bire'ch xtiidxaman ad tijbtizi luarzii ree, gra ladczi ruza't reeman xhienaag rlliladxidi Dios, xt ni'qui chetri ryaadx yaguie'chan. <sup>9</sup> Din laagajc reeman rü diidx xhienaag baca'di dunujn chi budganajn lējt, xhie tēē naag basa'ndi ni naladxidi naj ree dios persi binalidi quijb Dios naban abi' guzuloj cayüjndi laaman sirv. <sup>10</sup> Rü tēē reeman diidx xhienaag cabēzidi gui't Jesucrist Xi'n Dios diidz xanyabaa, bèn basbanman loj ree bengüt, Jesús bèn rabēē dunuj ree loj casti ni zēēd.

## 2

### *Ni been Pab luguiedx Tesalónica*

<sup>1</sup> Lējt ragbee, compniar raliduladx ree Jesucrist, guial ad budganaj xlia'tzan lējt, <sup>2</sup> majsi lējt ragbee guial luguiedx Filipos guna ree bejn diidxguijdx du lojn nē graloj ree guialzi badēēd reeman dunujn. Per Dios baneen dunujn valor persi badün xtiidxza'caman lojdi, majsi xhietēēz raza'can por ree bèn rdxe'ch dunujn. <sup>3</sup> Din ad baneenē'tan lējt diidx rusquiee, o par yaguieennē'n lējt zi'ctzi rayēnan ya, o par yasquieen lējt, <sup>4</sup> per zi'c bacaabee Dios dunujn din yaneen xtiidxza'caman guial baguiaaman zile' yaguieenan ni rayal yaguieenan, laanan naj ni radün ad par yaya'ntan zagdxe loj ree bejn, par yaya'nān zagdxe loj Dios, bèn ragbee gra ni yu' luxdoo bejn. <sup>5</sup> Lējt ragbee guial ad yu't dxej baneenē'n lējt zagdxe naabzi par guiēndi dunujn, ache tēēt guijc badxiiban din yaca'n xmiliadi. Dios ragbee guial laan naj diidxli. <sup>6</sup> Ad radiiltan guza't ree bejn dunujn zagdxe, ad radiil tēētān guza'tidi dunujn zagdxe, o guza't ree ben ren dunujn zagdxe, <sup>7</sup> majsi guial nayajcan xiapó stol Jesucrist, raya'pan derejch yanabeen lējt güündi xhienin par dunujn, per ad raguieentan zian. Lējt ragbee guial benza'c bayajcan chi badxu'nē'n lējt, zi'cgajczi tijb na rusni's rniaj tēē xi'n. <sup>8</sup> Abi' guial tant rayēnan lējt, ad tijbtzi xtiidx Dios baneen lojdi, nē dux guialnabanan bayēnan naneen por lējt, guial tant rayēnan lējt. <sup>9</sup> Abi' lējt ragbee compniar, guial dád baguieenan dxiin. Dxej guiaal baguieenan dxiin, chitēē yalu'n xchiindi guial güündi dunujn yudar yabajnan la'tgaj balüün lējt xtiidxza'c Dios.

<sup>10</sup> Lējt nē Dios ragbee chaaw guial chi badxu'nē'n lējt, babajnan xnejz zi'c rayal, abi' achet chile' gudxiibidi du guijcan, lējt bèn rlliladx ree Jesucrist. <sup>11</sup> Lējt ragbee xhienaag



baneen lëjt consejw, xhie tëë naag balu'n luxdoodi zi'c rüjn tijb dad con ree xi'nman. <sup>12</sup> Ma banan lojdi din guibandi zi'c rayal guiban bën ma naj ree xbejn Dios, bën rbejdx lëjt din yayalidi xanyabaa lod rniabeeman.

<sup>13</sup> Zeel në dunujn ad racwëëzt radëën quixtëë loj Dios, guial chi biguejndi xtiidxaman ni banan lojdi, bidxga'di laan zi'c xtiidx Dios ad zi'ctzi xtiidx bénguidxliuj. Abi' diidx guin ree naj ni rusni xquiarguejndi, lëjt guial rliladxidi Jesucrist. <sup>14</sup> Abi' lëjt compniar raliduladx ree laaman, ma guzajquidi zi'c guzac ree xbejn Dios, bën Israel zojb ree niz Judea, bën rliladx ree Jesucrist. Din zi'cgajc basagdiaj ree bën ladxidi lëjt, ziangajc basagdiaj lasa' bën Israel reeman laa reeman. <sup>15</sup> Abi' tëë ree bën Israel bagüjt reeman Dad Jesús, zi'cgajc bagüjt reeman bën badëëd ree xtiidx Dios loj ree bejn, balaagdxa tëë reeman dunujn, ad rüjnt reeman zi'c rën Dios, abi' contzi gra bejn rdxe'ch reeman. <sup>16</sup> Rudxoon reeman yalüün bën ad najt ree bën Israel xhienaag gac reeman perdon, zian laagajc reeman cutioob guijc xtol reeman, abi' yan ma cadëd reeman xcastiro' Dios.

### *Guyën Pab nejman Tesalónica stijb*

<sup>17</sup> Compniar raliduladx ree Jesucrist, chi basa'nan lëjt tio'p choondxej, majsi ad raguaatan lëjt, per rasaaduladxan lëjt, abi' rayën nejzdoon yaguaan lëjt stijb. <sup>18</sup> Dád bayënan nudganajn lëjt. Naj Pab, zien volt da't guyënan nidganan lëjt, per badxoon xindxab niajc zian. <sup>19</sup> Per yan sta rayënan yudganajn lëjt, din ni ralëjzan naj guial lëjt ragu' du luxdoon zagdxë. Lëjt naj dux chiinan ni rabaanë'n yubiignë'n loj Dad Jesucrist chi gui'taman stijb. <sup>20</sup> Lëjt naj bën rabaanë'n rlies tëëdi dux valoran.

## 3

<sup>1</sup> Zeel chi badxu'n luguiedx Atenas, ad radaantran, ma rayënan yayagbeen xhienaag za'di, dxel baguieenan xgab baya'n du xtijban ni. <sup>2</sup> Abi' baxhaal dux compniaran Timoteo, bën cayguieennë'n xchiin Dios caytie'chan xtiidxza'c Jesucrist, din yagu'man luxdoodi sudxi'chidi loj ni ma rliladxidi, <sup>3</sup> din ni'qui tijbidi ad zalenya't por ree guialzi ni cadëdidi, lëjt ragbee guial zian yaza'c ree. <sup>4</sup> Chi badxu'në'n lëjt, banan guial dád zien loj guialzi yadüüd ree, abi' lëjt ragbee guial laan naj ni ma gojc. <sup>5</sup> Zeel ad gudaantran, abi' guxhalan Timoteo din gagbeen xhienaag zinalidi ni rliladxidi, din rdxeban gusquiee xindxab lëjt, abi' achetri sirv nüjn ni baguieenan por lëjt.

<sup>6</sup> Per yan ni ma baguiaad Timoteo ni bidganajman lëjt, ma bagojnman dunujn guial zinalidi zagdxë ni rliladxidi Jesucrist në zi'c rën lasa'di. Laaman na guial zianci yu' luxdoodi zagdxë rasaaladxidi dunujn, abi' dád ma rëndi guguaadi dunujn, zi'cgajc rayënan yaguaan lëjt. <sup>7</sup> Zeel, compniar raliduladx ree Jesucrist, majsi graloj tarbajw në guialzi caydüüdan, per dád nix yu' du luxdoon raguiejnan guial zagdxë zinalidi ni rliladxidi. <sup>8</sup> Abi' yan mazri nix ma bayu du luxdoon guial ma bayagbeen za'dxi'chquidi loj ni zinalidi xnejz Dad Jesucrist. <sup>9</sup> Dxel xt ni'quid radxejlta xhienaag yadëën quixtëë loj Dios por lëjt, guial dád nix yu' du luxdoon lojman por lëjt. <sup>10</sup> Dxej guiaal radi'n ranaaban lojman din guneeman mod yudganajn lëjt, abi' lox yanan lojdi ni ryaadx gagbeedi xcwent guial rliladxidi Jesucrist.

<sup>11</sup> Dux Dad ree Dios në Dad Jesucrist gagnë dunujn din gac yudganajn lëjt. <sup>12</sup> Abi' Dad Jesucrist gagnë lëjt din gusnuu guiën lasa'di mazri, guiën tëëdi gra lasa' bejndi zi'c rayënan lëjt. <sup>13</sup> Laaman gagnë lëjt sudxi'chidi loj xnejz Dios din sudi naya sin dol lojman, dxej ni gui't Dad Jesucrist stijb con gra ree xbejnman.

## 4

### *Zi'c rën Dios guiban ree xbejnman*

<sup>1</sup> Yan, compniar raliduladx ree Jesucrist, raza'can lëjt liaadx, rana tëen lojdi por laaman, guial zi'c nabandi yan zi'c ma balüün lëjt guibandi, din güüнди zi'c rën Dios, gol been naguiejn gol basnuu mazri guibandi zi'c rënman.

<sup>2</sup> Din lëjt ma ragbee gra ni guxhaal Dad Jesús dunujn yanan ni güüнди. <sup>3</sup> Ni rën Dios naj guial guibandi naya lojman, guial ad güüнди nidxuudx ree con ree bën ad najt lacheelidi. <sup>4</sup> Gol gogbee guial tijbgaj lëjt rayal guibannë lacheelidi zagdxе zi'c rën Dios con respejt, <sup>5</sup> ad chu' lacheelidi naabzi par grii xgustidi zi'c rüjn ree bën ad nünbeet Dios. <sup>6</sup> Ni'qui tijbidi ad rayalt güünnaladx lasa'di, gusquiee lasa'di güüнди xhie nidxuudx con lacheel reeman. Din dux Dad ree Dios zudëedaman casti gra ree bën rüjn zian, zi'c ma banan lojdi zi'c ma bagojnan lëjt. <sup>7</sup> Din Dios ad gurejdxaman dunuj ree yayajc ree xbejnman par yabajn ree nadxuudx, gurejdxaman dunuj ree par yabajn ree naya. <sup>8</sup> Zeel bën ad ridxga't ni ma banan lojdi, ad bénguidxliujtan ad ridxga'taman, Diosan ad ridxga'taman, bën razaladx xSprijt duloj ree.

<sup>9</sup> Yan, xcwent guial guiën lasa'di, ad ryaadxt yanan lëjt xhienin xcwentan, din lëjt gajc ma basiid por Dios xhienaag guiën lasa'di, <sup>10</sup> abi' laan naj ni cayüjndi con gra dux compniar ree bën rliladx ree Jesucrist niz Macedonia. Per raza'can lëjt liaadx din gusnuu guiën lasa'di mazri. <sup>11</sup> Gol been tëe naguiejn guibannë lasa'di zagdxе, gol guyu xgab xchiindi, zi'c ma ranan lojdi güüнди dxiin, <sup>12</sup> din guibandi zagdxе loj ree bën ad rliladxt Jesucrist në chitëe xhie guiyaadxidi.

### *Ni gac chi gui't Dad Jesucrist*

<sup>13</sup> Yan, compniar raliduladx ree Jesucrist, ad rayëntan guibandi sin guial gagbeedi xcwent ree bengüt, chitëe chu'nayadi zi'c ree bën ad rliladxt Jesucrist. <sup>14</sup> Din bal raliduladx ree guial güjtaman abi' babanman stijb, ziangajc raliduladx ree guial ree bën ma güjt, bën bililadx ree laaman, yasban Dios laa reeman por Jesucrist.

<sup>15</sup> Zeel zi'c ma rayignia'n xtiidxaman, dunujn rana lojdi guial gra ree xbejnman, bën sta naban ree chi gui'taman stijb, ad zanedt reeman loj ree xbejnman bën ma güjt ree. <sup>16</sup> Din dxejzii guiguien cha' bën rniabee xhienaag gac, guiguien cha' anjl rniabee ree anjl, guiguien guibejdx xtrompejt Dios. Dxel guiat Dad Jesucrist diizd xanyabaa, abi' yalaj ree xbejnman bën ma güjt ree yaban stijb. <sup>17</sup> Guiáad dux compniar ree bën sta naban ree dxejzii, yadxaag ree con ree bën baban guin, dxel yo' ree ladya loj ree zaj lod yadxaag ree Dad Jesucrist. Zian yo' ree yuchu'në' reeman tiblyaaa. <sup>18</sup> Zeel gol bagu' luxdoo lasa'di con ree diidx guin.

## 5

<sup>1</sup> Yan, compniar raliduladx ree Jesucrist, xhie dxej gac zian o goc gac zian ya, ad rüjnt naguiejn ganinan lëjt. <sup>2</sup> Din lëjt ragbeechaaw guial zi'cgajczi ri't tijb béngubaan guxhin, chi achut rbëz laaman, zian guidxin dxej gui't Dad Jesucrist stijb. <sup>3</sup> Chi guiëb ree bejn: “Zagdxе zio' ree, achet gac”, dxel dxejczy gui't guialzi par laa reeman ni ad zariit reeman loj, zi'c chi rdxin hor ragnaa lën béngunaa chi ma gal xi'nman. <sup>4</sup> Per lëjt compniar, ad zëtridi loj nejzmal din guiniaaz dxej ni gui't Dad Jesucrist lëjt zi'c chi ri't tijb béngubaan. <sup>5</sup> Din gracziidi ma zinal Dios, zinalidi xnejzaman, nejz nayni. Ad zunaalt ree nejz mal, nejz nacay. <sup>6</sup> Zeel ad najt guial yabajn ree zi'c tijb bënnaayëjs, zi'c rüjn los demazri ree bejn, rayal yatie'ch dux bacaal ree, yadxu' ree nadëdguiendxuj. <sup>7</sup> Bën zinal ree nejzmal zi'c tijb bënnaayëjs, zi'c tijb bengu', zian zinal reeman nejz guin. <sup>8</sup> Per dunuj ree, guial ma zunaal ree xnejz Dios, guidib tiamp naj guial yabajn ree nadëdguien. Yadxu'dxi'ch ree loj guialrliladx ni ma raya'p ree në loj ni rën Dios dunuj ree, abi' yadxu'dxi'ch tëe ree në loj ni ma raliduladx ree guial ma raya'p ree perdon. Abi' zi'c tijb xin suldad yu' xcascwix ni rutëe yaya'p tëe reen zi'c tijb ni gutëe dunuj ree loj ni mal <sup>9</sup> Din ad gurejdxaman Dios dunuj ree par yayal ree xcastiman, gurejdxaman dunuj ree din yayal ree perdon por Dad Jesucrist, <sup>10</sup> bën güт por dunuj ree, din majsi nabajn ree o ma bayëjt ree chi

gui'taman stijb, per yo' ree yuchu'në' reeman. <sup>11</sup> Zeel gol bagu' luxdoo lasa'di gol been tëë yudar lasa'di din gagbeedi mazri xtiidx Dios zi'c ma cayüjndi.

*Ni rayal güün ree bën rliladx Jesucrist*

<sup>12</sup> Compniar raliduladx ree Jesucrist, raza'can lëjt liaadx, gol gojp respejt bën rusiid ree lëjt xtiidx Dios, bën rulüü ree lëjt rnieenë tëë reeman lëjt xhienaag chinalidi Jesucrist. <sup>13</sup> Gol gojc benza'c da't con laa reeman, gol guyën da't reeman por dxiin cayüjn reeman. Gol gubajnnë lasa'di zagdx.

<sup>14</sup> Ranaab tëën lojdi compniar, gol guneenë ree bën ad rënt güün dxiin, gol bagu' luxdoo ree bën ralenya'në xnejz Dios, gol been tëë yudar bën ad za'dxi'cht ree loj xnejzaman, gol gojp pacens gra reeman.

<sup>15</sup> Gol been naguiejn ad güündi ni mal bën rüjn ree lëjt ni mal, zagdxeli gol gojc benza'c con lasa'di në con gra ree bejn. <sup>16</sup> Gol badxe' luxdoodi zagdx zianczi. <sup>17</sup> Ad gucwëöz cwedx guiniabidi Dios. <sup>18</sup> Gol badëë quixtëë lojman por gra, din zian rënman güündi, lëjt najdi xbejn Jesucrist.

<sup>19</sup> Ad rbexuudi nabee xSprijt Dios lëjt. <sup>20</sup> Gol bidxga' ni rniee ree bën rudëöd xtiidxaman. <sup>21</sup> Yaloj xgaj gol gogbee zagdx xhietëëznin, dxel gol been ni naj zagdx.

<sup>22</sup> Gol gubi'ca loj gra ree ni mal.

<sup>23</sup> Dios, bën rabe'cdxe luxdoo bejn, laaman gagnë lëjt din gaquidi lojman naya guidi-blagaa. Laaman gagnë xcuerpidi, gagnëman xsprijtidi në guidibлагаadi din gaquidi nayadxuj lojman dxej gui't Dad Jesucrist. <sup>24</sup> Abi' Dios güün zian, din laaman, bën rbejdx dunuj ree par güünman dunuj ree xbejnman, rüjn xtiidxaman cumplid.

*Diidx bigra ca ree loj gui'ch guie*

<sup>25</sup> Compniar raliduladx ree Jesucrist, gol gurejdx gunab Dios por dunujn. <sup>26</sup> Gol badëë xtiidx Dios da cwentan loj gra ree compniar rliladx Jesucrist. <sup>27</sup> Abi' por laaman, naj rni lojdi rniabee tëën lëjt: Gol biil gui'ch guie loj gra ree compniar rliladx laaman. <sup>28</sup> Dux Dad ree Jesucrist güünle' lëjt.

## Gui'ch barojp guxhaal San Pabl loj ree b́en Tesalónica rlliladx Jesucrist

<sup>1</sup> Naj, Pab con Silvan në Timoteo, cayxhaalan gui'ch guie par lějt rlliladxidi Jesucrist luguiedx Tesalónica, lějt najdi xbejn dux Dad ree Dios në xbejn Dad Jesucrist. <sup>2</sup> Dux Dad ree Dios në Dad Jesucrist güünle' lějt yabe'cdxe tēe reeman luxdoodi.

### *Rudēed Pab quixtēe loj Dios*

<sup>3</sup> Guixie guixie radēen quixtēe loj Dios por lějt compniar raliduladx ree Jesucrist, din zian rayal yaguieenan guial mazri cusnuu rlliladxidi laaman, abi' tijb gajdi mazri ma rēn lasa'di. <sup>4</sup> Zeel dád nix yu' du luxdoon raza'tan lějt loj gra ree xbejn Dios, raguie'chan loj reeman pacens ni rajpidi në gualrliladx ni rajpidi, rdaan tēedi gra ree ni rüjnnē ree bejn lějt në gra ree gualzi ni cadēdidi. <sup>5</sup> Zian rguien xnejz naj xguialguxtis Dios, guial gulejman lějt din yayalidi lod rniabeeman, din por laan cadēdidi guialzi.

<sup>6</sup> Abi' guial gra ni rüjn Dios naj xnejz, zeel gudēedaman casti gra ree b́en cudēed lějt casti. <sup>7</sup> Guiáad lějt cadēdidi guialzi yan, guneeaman lějt gualraziiladx con dunujn, dxej ni gulüüloj Dad Jesucrist diizd xanyabaa galay xbianiman ni naj zi'c bajl, con ree xianjlaman b́en ca' ree mazri gualrniabee. <sup>8</sup> Dxel gudēedaman casti b́en ad bayagbeet ree Dios, b́en ad guyēnt ree nuzoob xtiidzxa'c Dad Jesucrist. <sup>9</sup> Gudēedaman laa reeman casti tiblayaa, su reeman zijt par Dios në par xguialrniabee za'cdxoonman. <sup>10</sup> Zian gac dxej ni gui't Dad Jesucrist, din guza't ree bejn laaman zagdxēe por ree xbejnman, yadxa tēe loj gra reeman laaman, abi' në lějt, din ma bililadxidi xtiidxaman ni badün lojdi.

<sup>11</sup> Zeel ad racwēēzt rarejdx ranaaban Dios por lějt din gagnēman lějt guibandi zi'c rayal, zi'c guredxaman lějt guibandi. Ranaab tēen lojman guial con xguialrniabeeman gac cumplid gra xixgabzagdxedi në gra ni rüjndi guial rlliladxidi laaman. <sup>12</sup> Abi' zian guiliesidi xvalor Dad Jesucrist, guiáad laaman guilies xvaloridi guial laaman con dux Dad ree Dios rēn reeman dunuj ree.

## 2

### *Gulüüloj b́en ca' xguialrniabee xinxab*

<sup>1</sup> Yan, compniar raliduladx ree Dad Jesucrist, xcwent guial gui'taman stijb në guial yadxaag ree con laaman, raza'can lějt liaadx, <sup>2</sup> ad bal tiēbidi tibrajtzi gusquiee ree bejn lějt, b́en rēb ree ma bidxin dxej gui't Dad Jesucrist. Ad guidxebidi gucaagdiajguidi zian, o na ree bejn guial tijb sprijt rēb loj reeman zian, o dunujn baxhaal gui'ch loj reeman lod raguie'chan zian. <sup>3</sup> Ad tiēbidi chu gusquiee lějt, din chi gad dxej guin guidxin, yalojxgaj guidxin ree dxej ni ad zuzoobtri bejn xtiidx Dios. Abi' gulüüloj tijb b́en güün ganax ni rēn xinxab, b́en ma naj par gabijl. <sup>4</sup> Laagajc laaman guilies xvalor, abi' yalenman gra ni nünbee bejn zi'c Dios në gra ni rnajchi' bejn zi'c dios, xt cweman lēn xyadoo Dios, abi' guiēbaman guial laaman naj Dios.

<sup>5</sup> Gol basaaladx guial zian rnin lojdi chi guzunē'n lějt. <sup>6</sup> Abi' yan lějt ma ragbee chu cutēe chitēe gulüülojman, la'tgaj guidxin dxej rayal gulüülojman. <sup>7</sup> Ma cayajc ree xgabmal guin, per yu' b́en cutēe gac reen cumplid. Chi ma bisüd b́en cutēe guin, <sup>8</sup> dxel gulüüloj benmal guin, abi' Dad Jesucrist con tijbzi gulüjbaman gugüjtaman laaman, dxel con xbianiman ni guidnēman gunidlojman laaman. <sup>9</sup> Benmal guin por xinxab gui'taman, abi' dád gapaman gualrniabee. Güünman zien ree ni yadxaloj ree bejn, güün tēeman zien ree milagr par gusquieeman. <sup>10</sup> Con graloj ree ni mal gusquieeman b́en canijt ree loj Dios, guial ad guyēnt reeman ad cwējb tēet reeman nililadx reeman ni diidxli zile' nuslaa laa reeman loj dol. <sup>11</sup> Zeel ruslaa Dios gusquiee gra ree ni guin laa reeman, abi'

guililadx reeman ni ad najt ni diidxli, <sup>12</sup> din yayal gra reeman casti, guial ad bililadxt reeman ni diidxli guin, din mazri bayuladx reeman been reeman ni mal.

### *Sudxi'ch reeman loj ni rliladx reeman*

<sup>13</sup> Compniar, rën Dad Jesucrist lëjt. Zianczi rayal yadëen quixtëe loj Dios por lëjt, din diidz guia'xchej ma bacaabeeman lëjt din laadi loj casti, guial ma nayadi por xSprijt Dios në guial ma bililadxidi ni naj diidxli. <sup>14</sup> Par zian gurejdx Dios lëjt gaquidi xbejnman chi badün xtiidzxa'c Dad Jesucrist lojdi, din yayalidi xanyabaa lod za'man.

<sup>15</sup> Zeel, compniar raliduladx ree Jesucrist, gol guzujdx'i'ch gol binal tée ni balüün lëjt chi badxu'në'n lëjt, në ni ma banan lojdi loj gui'ch ren. <sup>16</sup> Abi' Dad Jesucrist gajc në dux Dad ree Dios bën rën dunuj ree, bën ragu' du luxdoo ree zianczi, bën banee tée ni ralëjz ree guial najman benza'c, <sup>17</sup> laaman yagu' luxdoodi gagnë tée man lëjt din sudxi'chidi din gra ni guinieedi güün tée di gac zagdxe.

## 3

### *Rën Pab cwedx guiniab reeman Dios*

<sup>1</sup> Yan, compniar raliduladx ree Jesucrist, gol gurejdx gunab Dios por dunujn din diob guire'ch xtiidx Dad Jesucrist gralad, abi' guza't reeman xtiidxaman zagdxe zi'cgajc beendi. <sup>2</sup> Gol gurejdx gunab tée man din yabëeman dunujn loj ree benmal, loj ree bendxuudx ad nabant xnejz, din ad grat bejn rliladx xtiidx Dad Jesucrist. <sup>3</sup> Per laaman zianczi rüjn xtiidxaman cumplid, abi' laaman gagnë lëjt din sudxi'chidi, guinia tée man lëjt chitëe güündi ni mal. <sup>4</sup> Dunujn rayagbee chaaw guial laaman cayagnë lëjt cayüjndi gusnuu tée güündi ni banan lojdi. <sup>5</sup> Gagnë man lëjt din guiëndi bejn ree zi'c rën Dios laa reeman gap tée di pacens zi'c gojp Dad Jesucrist pacens.

### *Rüjn naguiejn güün bejn dxiin*

<sup>6</sup> Yan, compniar raliduladx ree Jesucrist, por laaman ranabeen lëjt: Gol bariica loj chutëez compniar gaz za' ad rënt güün dxiin, bën ad naban tée t zi'c balüün lëjt. <sup>7</sup> Din lëjt ragbee xhienaag guibandi din guibandi zi'c nabajnan. Dunujn ad badxu'në'tan lëjt sin guial naguieenan dxiin, <sup>8</sup> achi tée t banee xlia' ni badaawan. Lëjt ragbee guial dád baguieenan naguiejn baguieenan dxiin, dxej guiaal baguieenan dxiin chitëe yalu'n xchiindi guial güündi dunujn yudar din gac yabajnan. <sup>9</sup> Majsi zajc nanabeen lëjt nüjndi dunujn yudar, per baguieenan dxiin par yalüün xhienaag rayal guibandi güündi zi'c raguieenan. <sup>10</sup> Chi badxu'në'n lëjt, ranan lojdi: Bën ad rënt güün dxiin, ad zajw gajctaman. <sup>11</sup> Per yan baguiejnan guial yu'di gaz za' ad rëntidi güündi dxiin, abi' rudi loj ni ad rayaltidi. <sup>12</sup> Par bën zii ree dunujn rana ranabee tée n laa reeman por Dad Jesucrist yabedxe reeman, güün reeman dxiin din guiban reeman.

<sup>13</sup> Guiáad lëjt compniar, ad yaleny'a'di güündi ni naj zagdxe. <sup>14</sup> Bal yu' tijbidi ad ruzoobt diidx guial güündi ni ranan loj gui'ch guie, gol baguiaa chu benan, ad guchajg tée di laaman din yatu lojman. <sup>15</sup> Per ad guguaadi laaman zi'c tijb bën rdxe'chidi, gol baguiaaman zi'c tijb bijchidi, gol guneenë man din guibanman zagdxe.

### *Diidx bigra ca ree loj gui'ch guie*

<sup>16</sup> Dad Jesucrist bën rabe'cdxe luxdoo bejn, laaman yabe'cdxe luxdoodi guixie guixie në loj gra. Laaman sunë lëjt.

<sup>17</sup> Naj, Pab, quijb naj cuca ree lejtr guie par gugajpdiozan lëjt. Zian rünan con gra ree da gui'chan, zian naj ree da lejtran. <sup>18</sup> Dad Jesucrist güünle' gradi.

## Gui'ch yaløj guxhaal San Pabl loj Timoteo

### *Rugajpdioz Pab Timoteo*

<sup>1</sup> Naj Pab, najn tijb xiapóstol Jesucrist por xguialrniabee Dios bèn rüjn perdon dux tol ree në por Jesucrist bèn rayagbee ree gui't stijb. <sup>2</sup> Cuccan gui'ch guie par lüj Timoteo, din par naj lüj naj zi'cgajc da xi'nän guial tiblojzi raliduladx Jesucrist. Dux Dad ree Dios në Dad Jesucrist güünle' lüj, yayaman lüj yabe'cdxe tëëman luxdool.

### *Rëb Pab loj Timoteo xcwent ree bèn rusquiee*

<sup>3</sup> Zi'c rnin lojl chi briin za'n niz Macedonia, guial yaya'nl guiedx Éfeso din nabeel tio'p choon ree bejn ni chitëë rulüü reeman bejn ree ni ad najt diidxli. <sup>4</sup> Ad chililadx reeman ni rbëëguijc ree bejn, ad guidxga' tëë reeman ban za reeman, o chu rajc reeman xbengol gulal reeman, din ad ni quint ree gagnë laa reeman par gusnuu chililadx reeman xtiidx Dios.

<sup>5</sup> Canabeen lüj din güün reeman zian din guiguien guial diidxli rën lasa' reeman, achet naladx reeman din guiguien tëë guial guidib luxdoo reeman rliladx reeman xtiidx Dios. <sup>6</sup> Din yu' reeman ad rüjntri zian guial ganax ree ni ren ni ad rüjnt ree sirv rü reeman. <sup>7</sup> Rën reeman gulüü reeman bejn ree xhienaag naj xley Dios, abi' ni'qui laa reeman ad ragbeet xhie rën guiëb ni rniee reeman ni'quid rignia't reeman ni naladx reeman naj zagdx culüü reeman bejn ree.

<sup>8</sup> Dunuj ree rayagbee guial zagdx naj ley guin par bèn rignia' xhie sirv rüjnan. <sup>9</sup> Abi' rayagbee ree guial ad baneet Dios ley guin par ree bèn naban xnejz niz lojman, baneeman ley guin par tëd ree bejn casti, bèn naban ree zi'ctzi naj xixgab reeman, bèn ad ruzoobt ree diidx, bèn ad yu'guijct ree Dios, bèn rüjn ree dol, bèn ad rajpt ree Dios respejt, bèn ad rüjnt ree naguiejn guiën reeman Dios, bèn rugüjt xdad xnäa, në par gra ree bèn rugüjt bejn, <sup>10</sup> rüjn tëën sirv par xcasti ree bèn za'në xinguaaaw o bëngunaa ren, par ree xin ruladx lasa' xinguaaaw gajc o bëngunaa ruladx lasa' bëngunaa gajc, në par ree bèn rban bejn ree par guto' reeman laa reeman zi'c mojs, nëtëë par ree bèn rusquiee në ree bèn ruza't Dios par sudxi'chnë xguialrusquiee reeman në par gra ree bèn rüjn xcontr ni naj diidxli. <sup>11</sup> Diidxli guie ree naj ni zëed ree loj xtiidxza'cdxoon Jesucrist. Dux Dad ree Dios, bèn rayal respejt, laaman naj bèn basa'nnë naj diidx guin ree din gatiechan laa reen.

### *Xhienaag baya Dios Pab*

<sup>12</sup> Quixtëë Dad Jesucrist laaman cayagnë naj, rajp tëëman naj confianz abi' ba-caabeeman naj par gatiechan xtiidxaman, <sup>13</sup> majsi yaløj gunen laaman diidxguijdx abi' guzunaalan bèn rliladx ree laaman din günan laa reeman ni mal abi' dád naya bennë'n laa reeman. Per Dios bayaman naj guial ad bignia'tan ni cayünan din gad naj chililadx Jesucrist. <sup>14</sup> Abi' dád benza'c gojcaman con naj, balüüman naj xhienaag chililadxan balüü tëëman xhienaag guiënan Dad Jesucrist.

<sup>15</sup> Diidxli ni ganin lëjt, rayal chililadx bejn: guial Jesucrist bi't loj guidxliuj par güünman xtol bejn perdon, abi' loj gra ree bejn naj naj mazri bëndol. <sup>16</sup> Per majsi najn mazri bëndol, baya Dios naj abi' gojp Jesucrist naj pacens din gagbee ree bèn chililadx xhienaag rajp Jesucrist pacens par chililadx bejn xtiidxaman, abi' zian gap reeman guialnaban tiblayaa con Dios. <sup>17</sup> Zeel zianczi rayal yaya'p reeman respejt yaza't tëë reeman zagdx guial najman rey bèn ad yu't dxej guiët, abi' rajpaman guialrniabee par tiblayaa guial tijbzi laaman naj Dios abi' achut rajc ruguiaa laaman. Amén.

<sup>18</sup> Timoteo, par naj lüj naj zi'c da xi'nän zeel rnin lüj been zi'c gunee reeman xcwentil diidz yaløj, abi' zi'c tijb suldad ni rej loj wadijl ad guidxebil niz loj ree bèn za' ree contr

xtiidx Dios. <sup>19</sup> Guzudxi'ch loj ni rliladxil Jesucrist, been tëë ganaxzi ree xgab zagdx par güünl zi'c rayal. Din yu' ree bejn guial ad rüjnt reeman zian, yan ma baniyt reeman ni rliladx reeman Dios. <sup>20</sup> Zian ma guzajc ree Himeneo con Lejandr, zeel ma bayün laa reeman loj satanás din gusiid reeman guial ad rayalt guinee reeman Dios diidguijdx.

## 2

### *Xhienaag cwedx guiniab bejn Dios*

<sup>1</sup> Yalojdoo ni rnin lojdi naj guial cwedx guiniabidi Dios, cwedx guiniabidi laaman por gra ree bénguidxliuj, gudëed tëëdi quixtëë lojman. <sup>2</sup> Rayal yarejdx yanaab ree Dios por ree rey në por gra ree guxtis loj guidxliuj din chile' yabajn ree zagdx gusnuu tëë yabajn ree zi'c rën Dios. <sup>3</sup> Din laan naj ni zagdx ni rayuladx tëë dux Dad ree Dios, bën rüjn perdon dux tol ree, <sup>4</sup> bën rën guial gra bejn gac perdon guidxin tëë dxej gagbee bejn xhie rën guiëb xtiidxliiman. <sup>5</sup> Din tijbzi laaman naj Dios, abi' por tijbzi Jesucrist zile' yaya'p ree nejz par loj Dios guial bi'taman loj guidxliuj zi'cgajc tijb bénguidxliuj. <sup>6</sup> Güjtaman loj crüjz persi gudixxaman por xtol gra ree bénguidxliuj, zian naj ni balüü Dios bejn chi bidxin dxej bacaabeeman gac zian. <sup>7</sup> Zeel bacaabeeman naj gacan xi apóstol Jesucrist din gatiechan xtiidxaman, në par gusidan bën ad najt ree bën Israel conin naj diidxli, xhie tëë naag chililadx reeman Jesucrist, walin ad rusquieetan.

<sup>8</sup> Yan rënan guial guidibczi cwedx guiniab ree xinguaaaw Dios, guilies yaa reex con guidib luxdoo reex sin dol, sin gualrdxe'ch në sin wadijl. <sup>9</sup> Rën tëën guial ree béngunaa su reeman zi'c rayal, ad tëdlaj suchaaw reeman con or, në ree perl në ree vistid zagdx o guial tëdlaj güünchaaw guidxguijc reeman. <sup>10</sup> Din mazri zagdx güün reeman ni naj zagdx, zi'c rayal güün ree béngunaa ni ma zinal xnejz Dios. <sup>11</sup> Abi' rayal gucaagdiajzgi reeman ache guinee reeman chi rulüü ree xinguaaaw xtiidx Dios. <sup>12</sup> Din ad zatiëëbtan guial gulüü tijb béngunaa bejn ree chi radxaag lasa' reeman par gucaagdiajg reeman xtiidx Dios, ad rayalt nabee béngunaa xinguaaaw, rayal gucaagdiajgzaman. <sup>13</sup> Din Dios, yaloj Adán beenchaawaman, dxelri Eva. <sup>14</sup> Din ad Adánt basquiee reeman, yaloj Eva basquiee reeman, abi' por gualrusquiee guin beenman dol. <sup>15</sup> Per zajc gac béngunaa perdon, bal güün xchiinman zagdx guial najman na, bal gusnuu chililadxaman Dios, guiënman bejn ree guiban tëëman xnejz.

## 3

### *Xhienaag guiban ree bën rniabee*

<sup>1</sup> Gol badxe'guijc da diidxan: Bal chu bën rën gap gualrniabee loj gra ree bën rliladx Jesucrist par gulüüman laa reeman xnejz Dios, zagdxequi naj ni rënman güünman. <sup>2</sup> Per bën rajp gualrniabee guin rayal güünman zi'c rayal chitëë chu guinieeguijdx laaman. Rayal chu' tijbzi lacheelaman, guibanman zagdx chu' tëë xquiargueijnman din gap ree bejn laaman respejt. Gacaman benza'c con ree bën rdxin lidxaman, gac tëëman tijb bën rignia' par gulüüman bejn ree. <sup>3</sup> Ad rayalt gacaman bengui', ni'qui bën rguuil wadijl ad rayal tëët yaguuilaman mod par tia'man xmilia ree bejn, rayal gacaman benza'c con chutëëz, gac tëëman bën naxanladx ad zazëëbladx tëëtaman milia. <sup>4</sup> Rayal nabee lidxaman zi'c rayal din gulüü ree xi'nman xhienaag gap reex respejt guzoob tëë reex diidx. <sup>5</sup> Din bal id rajc rniabee lidxaman, ¿xhieza naag nabeeman bën rliladx ree Jesucrist? <sup>6</sup> Zeel tijb bën qui guzulojri rliladx Jesucrist, ad rayalt nabeeman loj ree bën ma rliladx chitëë guilies xvalor gajcaman abi' yayalaman lasa' casti ni bayal xindxab. <sup>7</sup> Bën rajp gualrniabee guin xt ree bën ad rliladxt Jesucrist rayal güünbee laaman guial najcaman benza'c chitëë yaya'nxtuman abi' güün xindxab laaman gan.

*Ni güün ree bën rüjn yudar bën rniabee ree*

<sup>8</sup> Yan ziangajc ree bën ma cwabee par güün reeman yudar bën rniabee ree, rayal güün reeman zi'c rayal din gap ree bejn laa reeman respejt, güün cumplid xtiidx reeman, ad guië' tää reeman, ad yaguil tää reeman mod par tia' reeman xmilia ree bejn. <sup>9</sup> Con xgabza'c chinal reeman ni ma balüü Dios dunuj ree. <sup>10</sup> Zeel yalojxgaj rayal gac reeman prueb abi' bal id xhie xfalt reeman, dxel ma zile' guzuj bejn laa reeman din güün reeman yudar bën rniabee ree. <sup>11</sup> Ziangajc ree béngunaa ni ma cwabee par güün reeman yudar, rayal güün reeman zi'c rayal din gap bejn laa reeman respejt ad zaneeguidxt reeman bejn, rayal guiban reeman zagdxe abi' güün cumplid xtiidx reeman. <sup>12</sup> Abi' ree xinguaaw cwabee guin par güün reex yudar bën rniabee loj ree xbejn Cristo, tijbzi lacheel reex rayal chu', nabee tää lidx reex con xi'n reex zi'c rayal. <sup>13</sup> Din bën rüjn ree sirv zi'c rayal ad respejtzi rajp bejn laa reeman, sin guialrdxeb ma zile' guiëb reeman xhienaag rliladx reeman Jesucrist.

### *Naroob naj bën raliduladx ree*

<sup>14</sup> Gagnë Dios chile' guialan guidganan lüj. Per cucan gui'ch guie, <sup>15</sup> din bal gaglaan ma ragbeel xhienaag guiban bejn delant loj los demasri ree xbejn Dios, bën ma naj ree xbejn Dios naban, abi' za'dxi'ch reeman rulüü tää reeman xtiidxliman. <sup>16</sup> Dunuj ree rayagbee guial dád bën narooob najman, bën raliduladx ree:

Bi'taman loj guidxliuj zi'c tijb bénguidxliuj,  
rëb xSprijt Dios guial laaman naj bën naya  
abi' baguiaa ree anjl laaman bi'taman loj guidxliuj.  
Bre'ch xtiidxaman loj ree bën ad najt bën Israel,  
guidibczi bililadx bejn laaman abi'  
baca' Dios laaman xanyabaa.

## 4

### *Bën rusa'n ree guialrliladx reeman Jesucrist*

<sup>1</sup> Ma bagojnchaaw xSprijt Dios guial zëed ree dxej ni yu' ree bejn gusa'n guialrliladx reeman Jesucrist, mazri guidxga' reeman xtiidx ree bën rusquiee në gra ree ni zëed por xindxab. <sup>2</sup> Mazri guidxga' reeman bën rusquiee ree, bën wed rüjnz ree, bën achetri ree rzajc guial rüjn reeman dol din ma naya' reeman zian. <sup>3</sup> Guiëb reeman guial ad najt guial guxhliaa ree bejn ad zajw tää reeman graloj. Per Dios badxe' graloj guialraw par gaw ree bën rliladx laaman, bën ma ragbee ree conin naj diidxli abi' gudëed reeman quixtëe lojman. <sup>4</sup> Din gra ni badxe' Dios naj zagdxe, achet ni rayal cwexuu bejn tia'man bal gudëeman quixtëe chi cayawaman laan. <sup>5</sup> Din chi rarejdx ranaab ree Dios con xtiidxaman rüjnle'man guijc ni yadaaw ree.

### *Bën rüjn sirv zagdxe loj Jesucrist*

<sup>6</sup> Zeel bal rulüül bën rliladx ree Jesucrist zi'c ma rnin, dxel cayüjnquil sirv Jesucrist zi'c rayal, abi' zian gusnuu gusiidil mazri guial loj ni ma rajquil xcwent guialrliladx guin në ree diidxza'c ni zinalil. <sup>7</sup> Per ad guidxga'l ni rbëeguij ree bejn, ni ad najt ree diidxli por Dios, mejorli basnuu basiid sudxi'chil guibanl zi'c rën Dios. <sup>8</sup> Zagdxe naj par güün bejn graloj ejercijs par gacaman gojl, per loj gra xhietëznin mazri lasajc guiban bejn zi'c rën Dios. Din ad lojtzi guidxliuj guie güün sirv guial naban bejn zi'c rën Dios, nëgajc xanyabaa lod gap bejn guialnaban tiblayaa. <sup>9</sup> Dunuj ree rayagbee guial ni diidxli naj ree diidx guie, abi' rayal chililadx gra bejn laan. <sup>10</sup> Zeel majsij cayza'can ni cayza'can, per cayguieenan ni cayguieenan guial raliduladxan Dios naban, bën naban par güünman yudar gra ree bejn, per mazri bën rliladx ree laaman.

<sup>11</sup> Zian rayal gusiidil bejn ree güjdx tää loj reeman din güün reeman zian. <sup>12</sup> Gojp cudad chitëe guiëb ree bejn guial achet sirv lüj guial ad wayajctil bengol. Mejorli been naguiejn din gaquil tijb ejempl par ree bën rliladx Jesucrist, zi'c xhienaag rül diidx, zi'c nabanl,



zi'c rēnl ben ren ree, zi'c rliadxl Dios nētēē por ree xixgabza'quil. <sup>13</sup> La'tgaj guialan, basnuu biil xtiidx Dios loj ree bejn, guneenē reeman balüü tēē reeman xhie rēn guiēb xtiidx Dios. <sup>14</sup> Ad yayanladxl güünl zi'c rayal güünl por quiarguejn ni banee Dios lojl chi badxiib yaa ree bengol guijquil chi gogbee reeman guial lüj naj bēn gule Dios.

<sup>15</sup> Badxe'guijc diidx guie ree din gagbee gra ree bejn guial cusnuu zēl delant. <sup>16</sup> Gojp lüj con ni rusiidil bejn ree. Guzujdxi'ch loj ni ma ragbeel, zian yabēē lüj gajc loj casti yabēē tēēl bēn cucaagdiajg ree xtiidxil.

## 5

### *Xhienaag güün Timoteo con ree bēn rliadxl Jesucrist*

<sup>1</sup> Ad tilnēl tijb bengol, badēēman consejw zi'cgajc xdadil, abi' xin naj ree xinguiag, badēē reex consejw zi'cgajc bijchil. <sup>2</sup> Ziangajc bēngunaa bengol ree badēē reeman consejw zi'cgajc xniaal, abi' biinguiag ree, badēē reem consejw zi'cgajc bizanl con xgabza'c.

<sup>3</sup> Bidxga' ree bēngunaa bizējb ni diidxli achut rajp. <sup>4</sup> Per bal tijb bēngunaa bizējb guin yu' ree xi'n o xiajg, dxel yalaj laa reex gusiid guidxga' xfamil, güün reex yudar din yaguijx reex ni baslaa xdad xniaa reex laa reex. Din zian naj zagdxē, zian tēē ruladx Dios.

<sup>5</sup> Bēngunaa naj diidxli bēn bizējb, bēn ad rajptri chunin loj guidxliuj guie, tijbzi Dios naj bēn yu'guijcaman güün laaman yudar dxel ad rucwēēt rbejdx rniabaman laaman dxej guiaal. <sup>6</sup> Per tijb bēngunaa bizējb ni rüjn ni rēntzi, laaman naj zi'c tijb bengüt guial ad yu'guijctaman Dios. <sup>7</sup> Bagojn gra ree diidx guie bēn ma rliadxl ree Jesucrist chitēē chu guinieeguijdx laa reeman. <sup>8</sup> Din bēn ad rüjnt yudar xcompniar, abi' ni'qui xfamilaman bēn zojb ree lidxaman ad rüjntaman yudar, laaman ma basa'n ni rliadxlaman abi' piorli najman guial loj ree bēn ad rliadxl Jesucrist.

<sup>9</sup> Ad tia'l laj chutēēz bēngunaa bizējb par gac reeman yudar, naabzi ree bēngunaa bizējb bēn ma nadēd ree gayojn ijz abi' ad guzunētaman ben ren la'tgaj naban lacheelaman.

<sup>10</sup> Bal nünbee tēē ree bejn laaman guial beenman ganax ree ni rüjn sirv, bal baslaa ree xi'nman zi'c rayal, bal badēē lidxaman baya'n ree bejn bal gojcaman benza'c con ree bēn rliadxl Jesucrist bēn bidxin ree lidxaman, bal beenman yudar bēn rzagdiaj ree, bal been tēēman naguejēn beenman ganax ni zagdxē.

<sup>11</sup> Per ad tia'l laj ree bēngunaa bizējb benguiag ree, din despuejs rēn reeman guxhliaa reeman abi' ad rüjntri reeman ni rayal güün reeman por Cristo guial rēn reeman guxhliaa reeman stijb. <sup>12</sup> Dxel rüjn reeman dol guial ad rüjntri reeman ni ma been reeman compromis con Cristo. <sup>13</sup> Abi' tēē ree benguiag guin zē reeman yu yu, zianz rajc reeman costumbr achetzi rüjn reeman. Abi' ad laatzan, rzuloj ruza't reeman bejn, ru reeman loj xhietēēznin abi' rniee reeman ni ad rayalt guiniee reeman. <sup>14</sup> Zeel rēnan guial bēn naj ree bēngunaa bizējb benguiag, mejorli guxhliaa reeman stijb, chu' xi'n reeman nabee tēē lidx reeman zi'c rayal, chitēē gudēēd reeman mod guinieeguijdx ree bēn ralen ree dunuj ree laa reeman. <sup>15</sup> Din yu' ree bēngunaa bizējb ma guro'nladxl reeman xnejz Dios abi' ma zinal reeman xnejz xindxab.

<sup>16</sup> Abi' bal tijb bēn rliadxl Jesucrist naj xfamilaman tijb bēn baya'n bizējb, dxel laaman rayal güün yudar bēngunaa bizējb guin chitēē gacan mazri carg par ree dux compniar ree bēn rliadxl ree Jesucrist. Zian güün reeman yudar bēngunaa bizējb diidxli achutri rajp loj guidxliuj guie.

<sup>17</sup> Bēn rliadxl ree Jesucrist rayal gap reeman respejt bēn rniabee laa reeman nē ree bēn rniee rulüü tēē xtiidx Dios zi'c rayal, gudēē tēēdi loj reeman gra ni ryaadx reeman.

<sup>18</sup> Din loj xtiidx Dios rēb: “Ad gudxe'di guijxh ro' ree begui'xh la'tgaj cayüjn reeb dxiin”, rēb tēē loj xtiidx Dios: “Rayal gax bēn rüjn dxiin”.

<sup>19</sup> Ad guidxga'di ni rudxiib ree bejn guijc tijb ree bēn rniabee ree bēn rliadxl Jesucrist, bal id yu' tio'p choon ree bejn rēb guial diidxli naj ni rniee reeman por laaman. <sup>20</sup> Per

bal tijb bén ma ca' guialrniabee rusnuu rüjnman dol, rayal guinieenël laaman delant loj gra reeman din guidxeb los demazri reeman.

<sup>21</sup> Yan por Dios, por Jesucrist në por ree anjl ni ma gulejman, naj rni badxe'guijc been tëë zi'c ma rnin ad cwel loj ree bejn, tiblojzi been con gra reeman. <sup>22</sup> Gojp cudad cwel tijb bén ni nabee din ad ragbeetil bal yu' ni mal cayünman, dxel güün ree bejn xgab guial nëgajc lüj ruladx ni cayünman. Gojp cudad graløj ree dol.

<sup>23</sup> Në guial guië't guië't ragxuu lënl guial ad nadaant lënl, ad rë'l nijs lagajzi mejorli gu' tibda'n vin.

<sup>24</sup> Yu' reeman laa rguien gajc xhie dol cayün reeman diidz chi gad reeman gudëed cwent loj Dios, per yu' reeman ad rguient xhie dol cayün reeman xt chi yadëed reeman cwent loj Dios. <sup>25</sup> Ziangajc yu' ree bén ni laa rguien gajc ni zagdx ni cayün reeman, abi' yu' reeman ni'quid rguient ni zagdx ni cayün reeman, per yu' dxej gagbee ree bejn laan.

## 6

<sup>1</sup> Gra ree mojs rayal gap reeman respejt xpatron reeman chitëe chu guiniee diidxguijdx contr Dios o contr xtiidxaman ni caylün. <sup>2</sup> Abi' bal rliladx patron guin Jesucrist dxel rayal gap reeman laaman mazri respejt guial nëman rliladx Jesucrist zi'cgajc laa reeman. Abi' tëë rayal güün xchiin reeman zi'c rayal guial cayün reeman sirv tijb xcompniar reeman bén rliladx Jesucrist compniar ni rën reeman. Zian balüü ree bejn güjdx tëë loj reeman din güün reeman zian.

### *Guialnaza'c ni naj diidxli*

<sup>3</sup> Bal yu' bén rulüü diidx ni ad najt zi'c xtiidxza'c Dad Jesucrist ni'qui zi'c raliduladx ree Jesucrist ad rulütaman bejn ree, <sup>4</sup> najzaman bendxal. Din ruladxaman tildiidxaman abi' ni'quid xnejzt rnieeman, dxel ni zëed guialnadëdloj, guial rdxe'ch, guial rniee diidxguijdx abi' ad rliladxtri lasa' reeman, <sup>5</sup> ad rucwëëzt rdil reeman por ree ni ad rüjnt sirv ni yu' guijc reeman guial ad ragbeet reeman ni naj diidxli, dxel naladx reeman guial chililadx reeman Jesucrist ma gac reeman ben rijcw. Bén naj ree zian, biquied loj reeman. <sup>6</sup> Dad ben rijcw naj bejn chi ma rliladxaman Jesucrist, per bén za' conform con ni rajptzaman. <sup>7</sup> Din achet budnë' ree loj guidxliuj ache tëët zajc yunë' ree chi yayëjt ree. <sup>8</sup> Bal raya'p ree ni yadaaw ree në lajd ni yadojt ree con laan rayal yaya'n ree conform. <sup>9</sup> Per ree bén rzëëbladx gac reeman rijcw loj guidxliuj guie ad rile't sudxi'ch reeman, laa rüjn gajc xindxab laa reeman gan. Mazri rüjn reeman xgab ni ad rüjnt sirv abi' rüjn reeman ni ad rayalt güün reeman ni rüjn persi rnijt reeman. <sup>10</sup> Din guial rzëëbladx milia laan naj xliuj gra ni mal. Abi' yu' reeman por guialrzëëbladx guin ma basa'n reeman ni rliladx reeman Dios abi' laagajc reeman cusagdiaj laa reeman.

### *Ni rayal güün Timoteo*

<sup>11</sup> Per lüj Timoteo, xbejn Dios, briica loj ree ni mal guin. Been naguiejn guibanl zagdx, guibanl zi'c rën Dios, bililadxaman, gojc bén naxanladx, gojp pacens guyën tëë ree ben ren. <sup>12</sup> Been da't naguiejn guzudxi'ch loj ni rliladxil xtiidx Jesucrist. Ad gusëebil guialnaban ni naj guialnaban tiblayaa, din par zian gulejman lüj abi' rëbil delant loj zien ree bejn xhienaag rliladxil Jesucrist. <sup>13</sup> Yan, por Dios bén razaladx guialnaban loj gra ni yu' loj guidxliuj në por Jesucrist bén ni gunee sin guialrdxeb loj Poncio Pilato, naj rniabee lüj <sup>14</sup> din guzoobil diidx güünl ni rnin lojl, sin guial guchaal xhienin chitëe guiëb ree bejn guial ad cayünntil xnejz. Zian been xt dxej ni gui't Dad Jesucrist stijb. <sup>15</sup> Gui'taman dxej ni nabee Dios gui'taman, Dios bén rayal respejt bén naj tijbzi Dios rajp tëëman gra guialrniabee, bén naj xrey ree rey naj tëëman xDad ree dad. <sup>16</sup> Bén ni ad yu't dxej guiët, Bén ni za' lod mazri nayni lod achut zajc chibig. Ni'qui tijb bënguidxliuj ad waguiaat laaman ad zajc tëët guguaa bejn laaman. ¡Par laaman naj respejt në guialrniabee par tiblayaa! Amén.

<sup>17</sup> Bén naj ree benrijcw loj guidxliuj guie, güjdx loj reeman ad güün reeman benro' ad cu'guijc tää reeman guial ni rajp reeman najn par tiblayaa, din guialnaza'c ni rajp bejn yu' dxej yaran. Mejorli cu'guijc reeman Dios bén naban din laaman razaladx da't dunuj ree graløj din chu' du luxdoo ree nix. <sup>18</sup> Güjdx loj reeman din güün reeman ni zagdxe, güün reeman zien ree ni rüjn sirv, cu' tää luxdoo reeman zagdxe güün reeman yudar bénprob ree. <sup>19</sup> Abi' zian guto'p reeman guialnaza'c ni güün laa reeman yudar loj ree dxej ni zääd din yayal reeman guialnaban tiblayaa xanyabaa.

### *Xconsejw Pab*

<sup>20</sup> Timoteo, badxe'guijc ni rayal güünl, Ad guidxga'l diidxdxuudx ree xcwent ree ni ad rüjnt ree sirv, ni'qui ree diidx rusquiee, ni'qui ree diidx ni rü ree bén ni naladx guial rajc da't reeman abi'za ad walit ni rajc reeman. <sup>21</sup> Din yu' ree bén rüjn zian yan, abi' ma basa'n reeman guialrliladx reeman Dios.

Dios güünle' lüj Timoteo. Amén.

## Gui'ch barojp guxhaal San Pabl loj Timoteo

### *Rugajpdioz Pab Timoteo*

<sup>1</sup> Naj Pab, najn tijb xi apóstol Jesucrist, Dios gule naj din gatiechan diidx por promejs ni beenman guial gudëédaman guialnaban tiblayaa loj ree bén rliladx Jesucrist. <sup>2</sup> Naj caxhal gui'ch guie par lüj Timoteo bén rënan zi'c da xi'nan. Dux Dad ree Dios con Dad Jesucrist güünle' lüj, yayaman lüj, yabe'cdxe tëëman luxdool.

### *Guialrulüü xcwent Jesucrist*

<sup>3</sup> Dxej guiaal chi rbedx rniaaban Dios, rusaaladxan lüj, abi' rudën quixtëë loj Dios, bén rünan sirv con guidib luxdon zi'c been ree da bengol gulalan been reeman laaman sirv. <sup>4</sup> Chi rusaaladxan ni biinl, ma rën nejzdoon guguiian lüj din yayu luxdon zagdxe. <sup>5</sup> Yu'guican guial lüj diidxli rliladxil Jesucrist, yaloj xnaxüjsil Loida con xniaal Eunice bililadx laaman zian, zeel ragbeechaawan guial ziangajc rliladxil laaman.

<sup>6</sup> Zeel rnin lojl, been naguiejn din guiguien quiarguiejn ni banee Dios lojl chi badxib yan guijquil. <sup>7</sup> Din ad baneet Dios xSprijtaman duloj ree par yadxeb ree, banee xSprijtaman par yadxu'dxi'ch ree, par yayën du lasa' ree, në par yaya'p ree tijb quiarguiejn zagdxe. <sup>8</sup> Zeel ad yatul guinieel xtiidx Dad Jesucrist, ad yatu nëtëël naj yu'n ladxguiib por laaman, con xyudar Dios gudaan guialzi ni rayal tëdil guial guitie'chil xtiidxza'c Jesucrist. <sup>9</sup> Din Dios ma beenman perdon dux tol ree abi' ma gulejman dunuj ree din yabajn ree zi'c rënman, ad por ni baguient ree, diizd chi gad guidxliuj gacchaaw beenman xgab guial por Jesucrist gulüüman dunuj ree xhienaag rënman dunuj ree. <sup>10</sup> Yan bi't Jesucrist bén güt por dux tol ree, rayagbee ree guial diidxli rën Dios dunuj ree. Abi' Jesucrist naj bén biquied guialrniabee loj guialgüjt abi' zian biguien guial yu' guialnaban, guialnaban tiblayaa par ree bén rliladx xtiidxaman.

<sup>11</sup> Zeel gulej Dios naj din gacan xi apóstol Jesucrist, din ganen xtiidxaman gulü tëën laan bén ad najt ree bén Israel, <sup>12</sup> abi' por zian cadëëdan guialzi ni cadëëdan. Per ad ratutan por zian, din naj ragbee chu rliladxan, abi' ragbeen guial laaman rajp guialrniabee par cu'chaawaman ni basa'nan lojman xt dxej ni gui'taman stijb.

<sup>13</sup> Badxe'guijc binal tëë ree diidxza'c ni ma balün lüj, tant zi'c rliladxil Dios në zi'c rën ree lasa'l guial ma nayajc ree tijbzi con Jesucrist. <sup>14</sup> Abi' con xyudar xSprijt Dios bén naban con dunuj ree, gojp ni banee Dios güünl.

<sup>15</sup> Lüj ragbee guial gra ree bén zojb niz Asia ma gulëëladx reeman naj, loj reeman no'ch Figelo con Hermógenes. <sup>16</sup> Dios gagnë ree xfamil Onesiforo, din laaman dád zien volt bagu'man luxdon. Abi' ad batunëtaman naj yu'n ladxguiib, <sup>17</sup> naabzi bi'taman Rom baguuilaman naj xt lodzi badxejlaman naj. <sup>18</sup> Abi' lüj ragbee guial dád beenman dunuj ree yudar chi badxu' ree Éfeso. Xi nix chi gui't Dad Jesucrist stijb, yaya da'taman laaman.

## 2

### *Zi'c tijb xsuldad Jesucrist*

<sup>1</sup> Guiáad lüj xi'ngaan, guzujdxi'ch loj yudar ni raya'p ree por Jesucrist. <sup>2</sup> Abi' ni biguiejn rën delant loj zien ree bejn, balüün loj ree bén diidxli rliladx, bén ni zajc gulüü ree ben ren.

<sup>3</sup> Zi'c tijb suldadza'c, zian gudaan ree guialzi, zi'c najl xbejn Jesucrist. <sup>4</sup> Ni'qui tijb bén naj suldad ad rut loj ni ad najt xcwent ree suldad par chile' yaya'nman zagdxe loj bén rniabee laaman. <sup>5</sup> Ziangajc bén ni rguijt xhie tijb nin, rayal quitaman xnejz din chile' tia'man prem. <sup>6</sup> Abi' bén rüjn dxiin dajn, yaloj xgaj rüjn da'taman dxiin din gac yaca'man guialnaza'c. <sup>7</sup> Been xgab ni canin lojl, abi' Dad Jesucrist gagnë lüj din chignia'l

gra. <sup>8</sup> Basaaladx Jesucrist, bén güt abi' babanman, bén zëed loj xdiaa rey Davi, zian naj xtiidxza'caman ni catiechan. <sup>9</sup> Abi' por zian cadëedan guialzi, xt naxiin lën ladxguiib zi'c tijb benmal, per xtiidx Dios ad naxiitan. <sup>10</sup> Zianan zeel rdaanan gra par gūnan yudar bén ni ma naj ree par Dios, din gap reeman perdon por Jesucrist yayal tēē reeman guialnaban za'cdxoon ni naj par tiblyaa.

<sup>11</sup> Waliqiu ree diidx ni rēb:

Bal ma bayējt ree con laaman,  
ziangajc yabajn ree con laaman.

<sup>12</sup> Bal radaan ree xhietēēz ni raza'c ree,  
ziangajc yanabee ree con laaman.

Bal raguie'ch ree guial ad naguieenbeet reeman,  
ziangajc guiëbaman guial ad nūnbeetaman dunuj ree.

<sup>13</sup> Bal id raguieen ree cumplid dux tiidx ree,  
per laaman rūjn cumplid xtiidxaman  
din ad zajct guidxaa zi'c najman.

### *Tijb bén raya'n zagdx con xchiin*

<sup>14</sup> Gūjdx loj ree bejn din gusaaladx reeman ni guie ree, abi' por Dios gūjdx loj reeman guial ad rdildiidx reeman por ree ni ad rūjnt yudar, ruxhiinzan bén ni riguiējn ree laan.

<sup>15</sup> Been xt lod chile' gūūnl din yaya'nl zagdx loj Dios, din chibiguil lojman zi'c tijb bén ni rūjn dxiin abi' achet ni gustu laaman, guial cayūjnl xnejz con xtiidx Dios. <sup>16</sup> Ad gūl diidx ni ad rūjnt sirv, ni ad rūjnt yudar bejn ree. Din bén rūjn ree zian zi'cri zinal reeman nejz mal, <sup>17</sup> abi' xtiidx reeman naj zi'c tijb guialguijdx ni rigaa. Lasa' ree bén guin naj Himeneo con Fileto, <sup>18</sup> din ad zinaltri reeman zi'c naj xtiidx Dios. Rēb reeman guial xcwent guial yaban ree bengüt mal gudēd gojc zian, abi' rūjndxa reeman xguialrliladx tio'p choon ree bejn. <sup>19</sup> Per xtiidx Dios ad zajct guidxaa zi'c tijb guiaj ni zojbdxi'ch. Abi' loj xtiidx Dios rēb: “Dios nūnbee bén naj ree xbejnman”, rēb tēē loj xtiidxaman: “Graczi ree bén rēb guial nūnbee reeman Dios rayal gusa'n reeman gra ni mal.”

<sup>20</sup> Lën tijb yu narooob, ad ganaxt ree ni or yu' o ni plajt, nēgajc ree ni goc con yag nē con bajn yu'. Din yu' reen rūjn sirv guixie guixie, yu' tēē reen ma naj dxej rūjn reen sirv.

<sup>21</sup> Yan ziangajc bén ni rūjn naguiejn guiban naya, laaman naj zi'c ni rūjn sirv chi rajc xhienin, laaman ma naj xbejn Dad Jesucrist nē ni gūūn sirv par laaman, din za'man par gūūnman gra ni naj zagdx.

<sup>22</sup> Zeel basa'n xixgab xinguiag, xgab ni ad rūjnt sirv, gubajn xnejz. Binal guialrliladx, guialrēn lasa' nē guial yabedxe luxdoo con los demasri ree bén ni con guidib luxdoo rbejdx rniab Dad Jesucrist. <sup>23</sup> Ad tildiidxil por tijb ni ad zūjntil gan, o por tijb ni ad lasajct par tildiidxil, din lūj ragbee guial por zian rzuloj wadijl. <sup>24</sup> Abi' tijb bén ni rūjn sirv Dad Jesucrist ad rayalt gacaman bén ruladx wadijl, rayal gacaman benza'c con chutēēz, rayal gacaman tijb bén ni gac gulūū ree bejn, gacaman bén pacens <sup>25</sup> guzuxnejz tēēman con ree diidxzagdx Bén ni rūjn ree xcontr ni naj diidxli. Abi' rupent zian gūūn Dios guial yayūjn reeman xgab din gagbee reeman ni naj diidxli. <sup>26</sup> Par laa reeman loj xtramp xindxab ni rniabee laa reeman gūūn reeman ni rēnman.

## 3

### *Xhienaag gac ree bejn dxej ni bigra ree*

<sup>1</sup> Rayal tēē gagbeel Timoteo guial dxej ni bigra ni zëed ree, dād nawēēg gacan par ree bejn guial guiban reeman. <sup>2</sup> Din bejn ree, par laagajc reeman gūūn reeman xgab, ganaxzi milia gūūn reeman xgab, abi' gūūn reeman benro', ganax ree diidxdxal guiniee reeman, guinieeguijdx reeman Dios con ree bejn. Ad zuzoobtri xtiidx ree xdad reeman o xniaa reeman, achetri yayuladx reeman, ad zidxga'tri reeman ni naj por Dios, <sup>3</sup> ad

zëntri reeman ad zaya tēetri reeman bejn ree. Ganax diidx rusquiee guiniee reeman bejn ree, ad zucwēēt güün reeman ni dxuudx ree, dád bén nayaaladx gac reeman, abi' guidxe'ch reeman ni naj zagdx. <sup>4</sup> Yayü reeman laagajc ree bén ni rajp laa reeman confians, sin guialrdxeb guiniee reeman xhietēēz ni gui't guijc reeman, dád guilies xvalor reeman, mazri ma güün reeman ni rēntzi reeman guial loj zi'c rēn Dios. <sup>5</sup> Gulüü guial dád benyadoo naj reeman, per ni'quid zaliladxt reeman xguialrniabee Dios.

Ad guchajguil bén ni naj ree zian. <sup>6</sup> Din loj reeman no'ch bén ni ru ree lidx ree bejn, abi' rüjn reeman gan béngunaa ni naban ree con gadxagayaa ree dol, con gadxagayaa ree xgab ni ad rüjnt sirv, tibrajtzi rliladx reeman laa reeman <sup>7</sup> béngunaa guin ree zianczi rusiid reeman, per ad ragbeetczi reeman ni diidxli. <sup>8</sup> Gulal bén ni brii ree laj Janes con Jambres been xcontr reeman Moisejs. Yan ziangajc naj ree bén ni za' ree contr ni naj diidxli, laa reeman ma guxin xquiargueijn reeman, ad zinaltri reeman zi'c rayal chililadx reeman. <sup>9</sup> Per ad xchejt güün reeman zian, din gra ree bejn gagbee guial rusquiee reeman zi'c goc con Janes nē Jambres.

### *Rniabee Pab sudxi'ch Timoteo loj ni basiidaman*

<sup>10</sup> Per lüj Timoteo, ragbeel zagdx xhie rulün bejn ree, xhienaag naban, xhienaag naj da xgaban, xhienaag rliladx, xhienaag ra'pan pacens, xhienaag rēnan bejn ree, xhienaag rdaanan, <sup>11</sup> xhie ma been ree bejn naj, xhie tēē ree guialzi ma gudēēdan. Lüj ragbee xhienaag guza'can luguiedx Antioquía, Iconio con Listra. Dád ma guzaagdiajn por gra ni ma been ree bejn naj, per Dios babēē naj loj gra ree guialrzagdiaj guin. <sup>12</sup> Abi' dunuj ree rayagbee guial gra ree bén ni rēn guiban zi'c rēn Dios guialrliladx reeman Jesucrist, naj sagdiaj reeman por ni güün ree bejn laa reeman. <sup>13</sup> Per ree ben mal con ree bén rusquiee, zi'cri zinal reeman nejz mal, rusquiee reeman bejn ree rusquiee tēē laagajc reeman.

<sup>14</sup> Per lüj basnuu guzudxi'ch loj ni ma basiidil, nē loj ni ma rliladxil, din lüj ragbee chu ree nin basiid lüj. <sup>15</sup> Abi' lüj diizd xindool nünbeel xtiidx Dios, diidx ni zile' güün lüj yudar gagbeel xhienaag naj perdon ni zēēd por guialrliladx Jesucrist. <sup>16</sup> Gra ni zēēd loj xtiidx Dios, por Dios zēēdan. Abi' rüjnan sirv par gusiid bejn bejn ree, par gudēē bejn consejw, par guzuxnejz bejn bejn ree, nē par gagbee bejn xhienaag rayal guibanman, <sup>17</sup> din gagbee xbejn Dios guidiblagaa din güünman graloj ni naj ni zagdx.

## 4

<sup>1</sup> Delant loj Dios nē delant loj Jesucrist, bén gui't zi'c tijb rey par güünman guialguxtis loj ree bén naban nē loj ree bén ma güjt, naj rni lojl, <sup>2</sup> gutie'ch xtiidx Dios. Been naguiejn gunee xtiidxaman ad chi yu'tzi mod. Been naguiejn chililadx ree bejn ni rnieel, gudilē ree bén ad ruzoobt diidx, badēē tēē consejw loj ree bejn, balüü reeman sin guial yalenyal. <sup>3</sup> Din zadxin dxej ad zatiējbt ree bejn gucaagdiajg reeman ni naj diidxli, ma güün reeman zi'ctzi rēn reeman, zaguiil reeman zien ree bén gulüü laa reeman ganax ni ruladx reeman gucaagdiajg reeman. <sup>4</sup> Ad zidxga'tri reeman ni naj diidxli, mazri ma guidxga' reeman ni rbēēguijc ree bejn. <sup>5</sup> Per lüj Timoteo, gubajn nadēdguien, gudaan xhietēēz guialrzagdiaj tēdil, gutie'ch xtiidxza'c Jesucrist, been mandad ni banee Dios lojl güünl.

<sup>6</sup> Din naj zamer gugüjt reeman naj, ma zidbig guialgüjt par naj. <sup>7</sup> Ma guzudxi'chan loj xtiidx Dios majsi guza'can ni guza'ctzan, ma gulox benan ni rayal günan abi' ad basa'ntan ni rliladxan. <sup>8</sup> Yan prem ni rayalan ma cabēzan naj, prem ni gunee Dad Jesucrist lon chi guidxin dxej, bén rüjn guialguxtis zi'c rayal. Abi' ad lotzan gunee man prem guin, nē loj gra ree bén yu' luxdoo nix cabēz reeman laaman.

### *Ni rayal güün Timoteo*

<sup>9</sup> Been naguiejn diob guidganajl naj, <sup>10</sup> din Demas ma guro'nladxaman naj guial mazri ruladxaman ni yu' ree loj guidxliuj, zeel zëman niz Tesalónica. Abi' Crescente ma zëman niz Galacia guiáad Tito zëman niz Dalmacia. <sup>11</sup> Tijbzi Lujc za' con naj. Chi gui'til tanë Marcw din zile' güünx yudar gutie'chix xtiidx Dios. <sup>12</sup> Tíquico ma guxhalan laaman luguiedx Éfeso. <sup>13</sup> Chi gui'til tanë da cajpan ni basa'nan luguiedx Troas lidx Carpo, në ree da libran tanë ad yayanladx tēel guidnël da gui'ch reen.

<sup>14</sup> Lejandr bën naj herrer, dád zien ree ni mal ma beenman naj, per con Dios yaguijxaman gra ni beenman. <sup>15</sup> Gojp cudad con laaman, din laaman dád rüjn xcontraman ni ranee ree.

<sup>16</sup> Yaløj chi guzun loj ree guxtis achutczi been naj yudar, graczi reeman guro'nladx naj. Gagnë Dios ad zidxga'taman ni been reeman. <sup>17</sup> Per Dad Jesucrist been naj yudar banee tēëman naj gojl persi baloox gutiechan xtiidxaman, persi biguiejn ree gra ree bën ad najt bën Israel laan. Zian baslaa Dios naj, zi'c rliaa tijb bejn loj beedx. <sup>18</sup> Abi' Dad Jesucrist, laaman yabëë naj loj gra ni mal, laaman guinia naj xt chi guidxin dxej guidxinan lod canabeeman xanyabaa. ¡Par laaman naj respejt gra tiamp në zianczi! Amén.

### *Diidx bigra ca loj gui'ch guie*

<sup>19</sup> Bagajpdioz Prisca në Aquila në ree xfamil Onesíforo. <sup>20</sup> Erasto baya'nman Corinto, guiáad Trófimo ragxuuman basa'nan laaman luguiedx Mileto. <sup>21</sup> Been naguiejn guda chi gad tiamp nayaag gui't. Eubulo, Pudente, Lino, Claudia në los demasri ree bën rliladx Jesucrist rugajpdioz reeman lüj.

<sup>22</sup> Dad Jesucrist gagnë lüj, abi' Dios güünle' gradi. Amén.

## Gui'ch guxhaal San Pabl loj Tito

### *Rxhiaal Pab xtiidx Dios*

<sup>1</sup> Naj Pab cayünan Dios sirv, naj najn xiapóstol Jesucrist par günan yudar bën ma naj ree par Dios xhienaag chililadx reeman laaman din gagbee tää reeman diidxli xhienaag guiban reeman delant loj Dios, <sup>2</sup> din yu'guijc ree guial zian yaya'p ree guialnaban tiblayaa delant loj Dios. Diizd chi gad guidxliuj gacchaaw, rëbaman guial yazaladxaman guialnaban guin, abi' dunuj ree rayagbee ree zagdxe guial ad rnieet Dios diidx rusquiee. <sup>3</sup> Abi' chi bidxin dxej ni gule Dios guial gogbee ree bejn xtiidxaman laaman balüü xtiidx, abi' naj bayal catiechan xtiidxza'caman laan naj ni guxhaalaman naj günan, bën ni rüjn dux tol ree perdon. <sup>4</sup> Cucan gui'ch guie par lüj, Tito, guial najl zi'c da xi'nan guial tiblojzi raliduladx Jesucrist. Dux Dad ree Dios con Jesucrist bën güt por dux tol ree, yaya reeman lüj, güünle' reeman lüj yabe'cdxe tää reeman luxdool.

### *Dxiin ni been Tito guiedx Creta*

<sup>5</sup> Naj basa'n lüj niz Creta din güünl ni ryaadx günan ni. Abi' tijbgaj luguiedx gucaabeel bën ni nabee ree loj ree xbejn Cristo zi'c ma rnin. <sup>6</sup> Chi gucaabeel laa reeman rayal gucaabeel bën ni naban ree zi'c rayal chitää chu guinieeguijdx laaman, bën ni yu' tijbzi lacheel, rliladx tää ree xi'nman Jesucrist, bën ni nünbee ree bejn guial ad nabant ree xi'nman zi'ctzi rën reex ad najt tää reex xin rusagloj. <sup>7</sup> Din bën rajp guialrniabee loj ree xbejn Cristo, lojman riga' gra ni naj por Dios, zeel rüjn naguiejn guibanman zi'c rayal. Ad rayalt güünman xgab guial tijbzi ni guiëbaman güün sirv, ad rayalt gacaman bënralenya', ad rayalt gacaman bengü', ni'qui ben ruladx wadijl, ad zaguiil täätan mod xhienaag tia'man xmilia ree bejn. <sup>8</sup> Rayal gacaman bën ni gudää lidx yaya'n ree bejn chi rüjnan naguiejn, bën ruladx güün ganax ni zagdxe, gac tää nabee laagajcaman. Rayal gacaman benza'c, guibanman zi'c rayal delant loj Dios nää delant loj ree bejn, ad rayalt guibanman zi'ctzi rënman. <sup>9</sup> Rayal chinalaman diidxli ni ma basiidaman, din chile' gusiidaman bejn ree diidxza'c guin ree din guzuxnejz tääman bën ni rnieeguijdx ree xtiidxli Dios.

<sup>10</sup> Din dád zien ree bën ad ruzoobt diidx yu'. Ganax diidx rusquiee rniee reeman abi' rusquiee reeman bejn ree, abi' loj ree bën Israel ni rulüü ley loj reeman no'ch mazri lasa' ree ben guin. <sup>11</sup> Lasa' ree bën guin ad rayaltri yatiääb ree gulüü reeman bejn ree, din dád zien ree yu ma beendxa reeman gra tijb famil guial rulüü reeman laa reeman ni ad rayalt naabzi par güün reeman gan milia.

<sup>12</sup> Tijb gajc bën ladx reeman bën rëb reeman naj bën badää xtiidx Dios loj ree bejn, laaman rëb guial ree bën Creta ganax diidx rusquiee rniee reeman, dád nadoxh reeman, dád bën nala naj reeman abi' achetczi rën reeman güün reeman. <sup>13</sup> Abi' waliman, zeel gudilä reeman con diidxdoxh din chile' chinal reeman xtiidx Cristo zi'c rayal, <sup>14</sup> ad guidxga'ri reeman ni rbääguijc ree bën Israel, ad güün teä reeman ni rniabee ree bën ni ma guro'nladx ree ni naj diidxli.

<sup>15</sup> Bën naya ree xquiarguejn, achet xgab mal rüjn reeman. Per ree bën rüjn ganax xgabdxuudx, bën ad rliladxt, achetczi xgab zagdxe rüjn reeman guial ad nayat xquiarguejn reeman, ganax ree xgab mal yu' guijc reeman. <sup>16</sup> Laa reeman rëb guial nünbee reeman Dios, per rëbzi reeman din ad rüjnt reeman ni rën Dios. Dád bendxuudx naj reeman rusagloj tää reeman, ni'qui tijb ni rüjn sirv ad rajct rüjn reeman.

## 2

### *Ni rayal gulüü Tito*



<sup>1</sup> Per lüj Tito, balüü ree bejn gra zi'c tal naj xtiidxza'c Dios. <sup>2</sup> Balüü ree bengol din guiban reeman zagdxe, gustëdguien reeman din gap bejn laa reeman respejt, guidib luxdoo reeman chililadx reeman, guiën reeman bejn ree, taan tëë reeman xhietëëz ni sac reeman. <sup>3</sup> Ziangajc ree béngunaa bengol rayal guiban reeman zi'c rayal guiban ree xbejn Cristo. Ad rayalt gü reeman xtiidx bejn, ad gac reeman bengu'. Rayal gulüü reeman bejn ree xhienaag naj ni zagdxe, <sup>4</sup> rayal gulüü reeman béngunaa guiag ree din guiën lacheel reeman con xi'n reeman, <sup>5</sup> din guiban tëë reeman naya delant loj Dios, nadëdguien, guinia lidx reeman, gac reeman benza'c guzoob tëë reeman xtiidx lacheel reeman chitëë chu guinieeguijdx xtiidx Dios.

<sup>6</sup> Ziangajc lüj Tito, badëë consejw loj ree xinguaaaw guiag din guiban reex nadëdguien. <sup>7</sup> Been naguiejn din güünl gra xnejz din guguaa reex xhienaag güün reex ni naj zagdxe. Chi rulüül laa reex, balüü reex zagdxe zi'c rayal, <sup>8</sup> con ganax ree diidx zagdxe chitëë xhie gudxiib ree bejn guijquil, din yaya'nxtu ree bén ni rdxe'ch dunuj ree guial achet yadxelj gudxiib reeman duguij ree.

<sup>9</sup> Badëë tëë consejw loj ree bén naj ree mojs din guzoob gra xtiidx xpatron reeman, gac reeman benza'c ad yadxi'ro' reeman. <sup>10</sup> Ad cwan reeman xhie xieen xpatron reeman, gac reeman bén confians din guguaa gra ree bejn xhienaag naban reeman guial niza'cdxoon naj xtiidx dux Dad ree Dios bén rüjn dux tol ree perdon.

<sup>11</sup> Abi' Dios ma balüüman plact rënman dunuj ree, abi' guial rënman dunuj ree zile' gac gra ree bejn perdon. <sup>12</sup> Guial rënman dunuj ree rayagbee ree guial rayal yasa'n ree ni mal con ree ni ad rünjt sirv ni rayën ree yaguieen ree loj guidxliuj guie, din yabajn ree nadëdguien, zi'c rayal, zi'c rën Dios yabajn ree loj guidxliuj guie <sup>13</sup> la'tgaj caylëjz ree dxej za'cdxoon ni gac cumplid xtiidxza'caman zi'c ma naman duloj ree guial gui't dux Dios ree Dad Jesucrist con xguialrniabeeman, bén been perdon dux tol ree. <sup>14</sup> Laaman gü't por dunuj ree din yabëëman dunuj ree loj gra dol abi' basiaman dunuj ree din yayajc ree xbejnzaman abi' yaguieen ree naguiejn yaguieen ree ganax ni zagdxe.

<sup>15</sup> Gra ni ma rnin lojl balüün laa reeman sin guialrdxeb badëëd reeman consejw, bazuxnejz reeman con guialrniabee ni ca'l. Ad tiëbil gusagloj reeman lüj.

### 3

#### *Ni rayal güün ree bén rliladx Jesucrist*

<sup>1</sup> Basaaladx reeman din güün reeman ni rëb ree bén rniabee laa reeman në ni rëb ree guxtis, gac reeman bén nacaagdiajg susin tëë reeman par güün reeman ni naj zagdxe.

<sup>2</sup> Ad guinieeguijdx reeman bejn ree, ad quiil reeman wadijl, gac reeman benza'c në bënchaawladx con chutëëz bënan.

<sup>3</sup> Gocli nëgajc dunujn baguieenan zi'ctzi bayënan, ad bazoobtan diidx, badxu'n loj nejz mal, baguieenan ni bayëntzan në zi'ctzi naj dux xgaban. Baguieenan ganax ni ad najt zagdxe, bayajcan bén nadëdloj, bidxe'ch ree bejn dunujn abi' badxe'ch gajcan laa reeman. <sup>4</sup> Per chi bidxin dxej dux Dad ree Dios bén baguijx por dux tol ree, balüüman loj ree bejn guial najman benza'c rën tëëman bejn. <sup>5</sup> Laaman been dux tol ree perdon, per ad guial baguieent ree xhie ni rüjn sirv, guial bayaman dunuj ree. Laaman basia dunuj ree yan ma nayajc ree naya delant lojman, abi' por xSprijtaman ma raya'p ree guialnaban cüb. <sup>6</sup> Por Dad Jesucrist bén baguijx por dux tol ree, Dios bazaladx dunuj ree zro' da't xSprijtaman. <sup>7</sup> Dxel zi'cgajc laaman ma nulabaman dunuj ree sin dol guial najman benza'c, yayal ree guialnaban tiblayaa ni ralëjz ree.

<sup>8</sup> Laan naj diidxli. Zeel rënan gusnuu gugojnl diidx guie ree bén ni rliladx ree Dios din güün reeman naguiejn güün reeman ni naj zagdxe. Abi' nine ree naj ni zobjloj në ni güün sirv par gra ree bejn. <sup>9</sup> Per ad guidxga'l diidx ni ad rüjnt ree sirv ni rniece ree bejn, ad guidxga'l xtiidx ree bén ni ru ree xgab mazri chunin naj diidxli xdiaa gulal ree bejn.

Ad guidxga' téeł bén ni rdildiidx ree por xley Moisejs, din ad najtan ni zobjloj achet téeł lasajc ni rníee reeman, achetczi sirv rüjn ree ni guin.

<sup>10</sup> Bal por tijb lëjt rzuloj rlia' lasa' ree xbejn Cristo, guneenëman tib volt o tio'p volt, abi' bal id ruzoobaman xtiidxil mejorli babëëman lojdi. <sup>11</sup> Din lüj ragbee guial lasa' ree bén guie ma guro'nladx reeman ni naj diidxli abi' laagajc reeman cunijt laa reeman por xtol reeman.

### *Ni rayal güün Tito*

<sup>12</sup> Chi gaxhalan Artemas o Tíquico lod zobjbil, been da't naguiejn tagnaj naj luguiedx Nicópolis, din ni ma benan xgab gadëëdan tiamp nayaag. <sup>13</sup> Been tée yudar Apolos në licenciad Zena zi'ctzi gaquil. Badëë gra ni ryaadx reeman din chinal xnejz reeman chitëë xhie guiyaadx reeman. <sup>14</sup> Në ree dux compniar ree rayal gusiid güün ni naj ni zagdx, güün reeman yudar chi rüjn naguiejn güün reeman yudar chitëë guiban xlia'zi reeman.

### *Diidx bigra ca ree loj gui'ch guie*

<sup>15</sup> Gra ree bén za' con naj rugajpdioz reeman lüj. Bagajpdioz sii gra ree bén rën dunujn por guialrliladx ni raya'pan. Dux Dad ree Dios güünle' gradi. Amén.

## Gui'ch guxhaal San Pabl loj Filemón

<sup>1</sup> Naj Pab, yu'n ladxguiib guial rtiechan xtiidx Jesucrist. Naj, në Timoteo raxhaalan gui'ch guie par lüj Filemón, nayajc ree compniar ratie'ch ree xtiidxaman, lüj ragbee rayën da'tan lüj. <sup>2</sup> Raxhaal tëen gui'ch guie par gra ree bën rliladx Jesucrist bën rado'p ree lidxil, në par Apia nètëe par Arquipo, bën naj dux compniar ree caytie'ch ree xtiidx Jesucrist. <sup>3</sup> Dux Dad ree Dios në Dad Jesucrist güünle' lëjt yabe'cdxe tëe reeman luxdoodi.

### *Rudëe Pab quixtëe loj Dios por Filemón*

<sup>4</sup> Beegaj chi rbedx rniaaban Dios rudën quixtëe lojman por lüj, <sup>5</sup> din ma cwa'n ruson guial dád rënrl rililadx tëel Dad Jesús dád rën tëel gra ree bën ma naj xbejn Dios. <sup>6</sup> Rniaab tëen lojman guial lüj cayüjnl dunujn yudar par yatie'ch ree mazri xtiidx Jesucrist, gusnuu gagbeel gra ni zagdx ni raya'p ree guial ma nayajc ree tijbzi con Jesucrist. <sup>7</sup> Dád nix yu' luxdon rabaa tëen guial rënrl dux compniar ree bën rililadx ree Jesucrist, din por lüj bijch ma bayu luxdoo reeman zagdx.

### *Rniee Pab por Onésimo*

<sup>8</sup> Zeel majsi ra'pan guialrniabee par ganin conin rayal güünl guial najn tijb xi apóstol Jesucrist, <sup>9</sup> per guial rayën du lasa', zagdxeli rniaaban lojl, naj Pab, ma najn tijb bengol abi' yan yu'n ladxguiib guial rtiechan xtiidx Jesucrist, <sup>10</sup> rniaaban lojl por Onésimo, bën naj zi'c da xi'nan guial ma bililadxaman xtiidx Jesucrist ni ben lojman lën ladxguiib guie.

<sup>11</sup> Gocli achet sirv been Onésimo lüj, per yan zi'c rünman naj sirv ziangajc güünman lüj sirv. <sup>12</sup> Yan caydxi'n laaman lidxil, gunajchi'man zi'c rniajchi'l naj. <sup>13</sup> Guyënan nizujman con naj din nünman naj yudar luar lüj, la'tgaj yu'n ladxguiib guial rtiechan xtiidx Jesucrist. <sup>14</sup> Per ad guyëntan nünan xhienin sin xtiidxbeel din xhietëez favor güünl por naj ad züjntilan naguiejn, güünlan guial guiënl. <sup>15</sup> Bal brii Onésimo lidxil tiblädëd, per gojc zian din chile' sunëman lüj tiblayaa, <sup>16</sup> per ad zi'ctri tijb mojs, mazri zagdx guial loj tijb mojs, zi'c tijb bijchil bën rënrl. Dád rënan laaman, per lüj rayal guiënl laaman mazri ad zi'ctzi tijb bejn, rayal guiënl laaman zi'c tijb bijchil por Jesucrist.

<sup>17</sup> Yan bal walil nayajc ree compniar por Jesucrist, baca' Onésimo gunaladx naj gajcan. <sup>18</sup> Bal yu' xhie beenman lüj, o bal yu' xhie ralaman lojl, naj yaguix laan. <sup>19</sup> Abi' naj Pab, quijb naj cuca diidx guie ree: Naj yaguixan, majsi rulüü ad rüjnt naguiejn ganin lojl din gusaaladxil guial xt xguialnabanl ralil lon. <sup>20</sup> Yan been naj favor guin guial rënrl Jesucrist, zian bagu' luxdon guial nayajc xbejn Jesucrist.

<sup>21</sup> Naj caxhal gui'ch guie lojl abi' ragbeechaawan guial guzoobil da diidxan, ragbee tëen guial mazri naj ni güünl guial loj ni canin lojl. <sup>22</sup> Been tëe porvinid lënu lidxil lod yaya'nan, din zi'c cabejdx canabidi Dios, ragbeen tiëbaman guidganan lëjt.

### *Diidx bigra ca ree loj gui'ch guie*

<sup>23</sup> Epafra, bën yu'në'n ladxguiib guial ratie'chan xtiidx Jesucrist, rugajpdiozaman lüj. <sup>24</sup> Nëgajc Marcw, Aristarco, Demas në Lujc, bën cayüjn gajc ree naj yudar caytie'chan xtiidx Jesucrist në reeman rugajpdioz lüj. <sup>25</sup> Dad Jesucrist güünle' lëjt.

## Gui'ch par ree b n Hebreos

### *Ma gunee Xi'n Dios xtiidx xDadaman*

<sup>1</sup> Tiamp gulal, Dios guneen  ree dux b ngulal ree zien volt n  gadxagayaa mod por ree b n bad e xtiidx Dios loj ree bejn, <sup>2</sup> per yan ma guneen man dunuj ree por Xi'nman. Dios been gra ni yu' xanyabaa n  loj guidxliuj por Xi'nman. Abi' gra basa'n loj Xi'nman. <sup>3</sup> Laaman naj xbacha' za'cdxoon Dios, laaman naj zi'cgajczi naj Dios. Abi' laaman naaz gra ni yu' por guialrniabee ni rajpaman.

### *Xi'n Dios naj mazri b n zobjloj guial loj ree anjl*

<sup>4</sup> Zianan zeel laaman naj mazri b n zobjloj loj ree xianjl Dios din laaman naj quijb Xi'n Dios. Chi gulox guzajcaman ni guzacaman par yayajc ree naya por dux tol ree, dxel gurejman xanyabaa xladbee xDadaman Dios b n rajp gra guialrniabee <sup>5</sup> Din ad yu't dxej r b Dios loj ree anjl:

L j naj da xi'nan,  
abi' diizd yan gul n guial l j naj da xi'nan.

Achut t et loj anjl r baman:

Naj gac Xdadil, abi' l j gac da xi'nan.

<sup>6</sup> Per chi guxhaal Dios Xi'nman loj guidxliuj, Xi'nman b n rajp guialrniabee zi'cgajc laaman, dxel r baman:

Gra ree da anjlan,  
gol guy n da Xi'nan, gol gojp t eman respejt.

<sup>7</sup> Abi' chi gunee Dios por ree anjl, r baman:

Naj r n ree da anjlan zi'c bi, r n t en laa reeman zi'c bajl.

<sup>8</sup> Per por Xi'nman r baman:

Dad Dios, xguialrniabeel naj par tiblayaa,  
abi' guidib tiamp nabeel zi'c rayal.

<sup>9</sup> L j ruladxil ni naj zagdxe

abi' rdxe'chil ni mal.

Zeel Dios b n naj xDiosil

baneeman l j mazri guial rabaa guial loj gra ree b n za'n l.

<sup>10</sup> R b t eman:

Dad, diizd yaloy l j been guidxliuj n  xanyabaa  
con gra ni yu' loj reen.

<sup>11</sup> Gra reen yu' dxej nit reen,

per l j ma nabanl tiblayaa.

Gra reen yayox zi'c tijb lajd,

<sup>12</sup> gusie'til laa reen zi'c rusie't bejn xabaman,

abi' zuchaal laa reen zi'c ruchaa bejn xabaman,

per l j ad yu't dxej guidxaa zi'c najl

abi' zianczi gapil guialnaban.

<sup>13</sup> Ad yu't dxej r b Dios loj tijb ree xianjlaman:

Gurej da ladbeen xt g nan gan nabeel b n rdxe'ch ree l j.

<sup>14</sup> Din gra ree anjl naj sprijt cay jn ree sirv loj Dios, abi' rxhiaalaman laa reeman din g n reeman yudar b n ni gap ree guialnaban tiblayaa delant loj Dios.

## 2

*Ad yasa'n ree diidx ni yab e dunuj ree loj dol*

<sup>1</sup> Zeel rüjn naguiejn yayidxga' ree xtiidx Dios ni ma bacaagdiajg ree chitëe yasa'n ree xnejzaman ni ma zunaal ree. <sup>2</sup> Din zi'c goc cumplid gra xtiidx Dios ni gunee ree anjl diizd gocli, bén ad bazoobt diidx, bén been ree dol, laa reeman bayal casti ni rayal reeman. <sup>3</sup> ¿Xhieza naag laa ree loj casti bal në dunuj ree ad zayidxga't xtiidx Dios ni rugojn dunuj ree par yayajc ree perdon? Awa laagajc Dad Jesucrist bagojn xcwent perdon guin diizd yaloj, abi' ree bén biguiejn laan, laa reeman bagojn dunuj ree. <sup>4</sup> Yan zi'c ma cwa' bejn guialrignia' rent guialrignia' ren por xSprijt Dios zi'c naj xixgabaman, abi' por ree sen në ree milagr con los demazri ree ni radxaloj bejn, zian ma balüü Dios guial ni diidxli naj ree diidx guin.

### *Jesucrist rabëë bejn loj dol*

<sup>5</sup> Dios ad badëëtaman guialrniabee loj ree xianjlaman par nabee reeman lod yaya'p ree guialnaban cüb ni cayza't ree, <sup>6</sup> din yu' tiblajt loj xtiidx Dios lod rëb bejn:

Dios, ¿chu naj bénguidxliuj zeel rusaaladxil laaman?

¿Chu naj xi'n bénguidxliuj zeel rüjnl xgab por laaman?

<sup>7</sup> Guyu tijb tiamp ni baetil xi valoraman guial loj ree anjl.

Per despuejs ma beenl laaman bén zojbloj,

badëël guialrniabee lojman din nabeeman gra ree ni beenchaawil,

<sup>8</sup> abi' gra basa'nl lojman.

Chi badëë Dios guialrniabee lojman par nabeeman gra, achetczi ni baya'n ni ad zanabeetaman majsi dunuj ree sta ad cayguiaat ree guial nabeeman gra. <sup>9</sup> Per dunuj ree rayagbee guial guyu tiamp ni balet Dios xvalor Jesús guial loj ree anjl. Yan ma ca'man guialrniabee abi' rajp bejn laaman respejt por guialzi ni gudëdaman chi gütaman por gra bejn, abi' zian gojc guial rën Dios dunuj ree.

<sup>10</sup> Por Dios yu' gra, abi' laaman rniabee gra ni yu', abi' rënman chu' zien ree xi'nman xanyabaa. Zeel por guialzi ni gudëd Jesucrist bayaaloj bazoobaman xtiidx Dios, abi' tijbzi por laaman ma zajc yaya'p ree perdon. <sup>11</sup> Bén ma naya ree delant loj Dios, por Jesucrist naya reeman. Abi' tant Jesucrist tant ree bén ma naya por laaman, tijbzi Dios naj xdad reeman. Zeel ad ratut Jesucrist rëbaman loj reeman: Da bichan. <sup>12</sup> Zi'c ca tib lajt loj xtiidx Dios lod rëb:

Gün diidx loj ree da bichan xcwentil,

abi' chi yadxaag lasa' reeman golan

cant ree ni guza't lüj zagdxe.

<sup>13</sup> Rëb tëëman:

Tijbzi Dios yu'guican gagnë naj;

abi' rëbaman:

Laa naj guie con ree da xi'nan xin bazaladx Dios naj.

<sup>14</sup> Abi' zi'c bénguidxliuj tibloj najman rejn con bëël, ziangajc gojc Jesucrist chi bi'taman loj guidxliuj persi gojc güjtaman, abi' por xguialgüjtaman beenman gan loj guialrniabee ni gop xindxab loj guialgüjt. <sup>15</sup> Zian beenman persi babëëman bejn ree loj guialnadxeb xieen guialgüjt, bén ni guidib tiamp ni naban reeman rdxeb reeman guialgüjt zi'c rdxeb bejn xpatronman. <sup>16</sup> Din laaman ad bi'ttaman loj guidxliuj par gagnëman anjl ree, bi'taman par gagnëman bén naj ree xdiaa Abraham. <sup>17</sup> Zeel gojcaman zi'cgajczi bénguidxliuj, persi bidxin dxej gojcaman tijb bixhioz zojbloj delant loj Dios, bixhioz ni raya bejn, bén rüjn tëë cumplid xtiidx Dios persi gojc gudijxaman por xtol ree bejn. <sup>18</sup> Abi' guial laagajcaman guzagdiaj been tëë xindxab guial ad zuzoobtaman xtiidx Dios, zeel laaman zajc gagnë ree bén ni cayüjn xindxab naguiejn güün reeman dol.

## 3

*Jesús naj mazri bén zojbloj guial loj Moisejs*

<sup>1</sup> Zeel compniar, l jt guial ma najdi xbejn Dios, l jt guial ma bacaabeeman l jt par gaquidi xi'nman, gol badxe'guijc Jesucrist guial laaman naj bixhioz zobjloj, b n raliduladx ree, b n guxhaal Dios loj guidxliuj. <sup>2</sup> Din Jesucrist bazoobaman xtiidx Dios b n bacaabee laaman zi'c bazoob Moisejs xtiidx Dios delant loj ree b n Israel. <sup>3</sup> Per mazri rayal Jesucrist respejt guial loj Moisejs guial mazri zobjlojman, zi'c tijb b n ni r jn yu mazri ruza't reeman laaman zagdx guial loj yu guin. <sup>4</sup> Gra yu yu'czi tijb b n r jn laan, per Dios laaman been gra ni yu'. <sup>5</sup> Abi' Moisejs bazoobaman xtiidx Dios, beenman sirv lojman chi bad edaman xtiidxaman loj ree b n Israel persi bagojnman laa reeman ni r b Dios. <sup>6</sup> Per Jesucrist guial najman Xi'n Dios, laaman rniabee loj gra ree xbejn Dios. Abi' dunuj ree nayajc ree xbejn Dios bal yasnuu yadxu'dxi'ch ree loj ni raliduladx ree laaman sin guial yalenyaa' ree abi' yal ez ree xt dxej bigra.

### *Gol guzujdxi'ch loj xnejz Dios*

<sup>7</sup> Zeel, zi'c r b xSprijt Dios:

Bal rucaagdiajguidi xtiidx Dios yan dxej,

<sup>8</sup> ad cwexuudi zi'c been ree b n ad bacaagdiajgt xtiidxaman chi been reeman laaman prueb chi guzu reeman loj yujbidx.

<sup>9</sup> Abi' yagaj naj lod ad bacaagdiajgt ree xb ngulalidi xtiidx Dios majsi baguiaa reeman milagr ni beenman delant loj reeman loj tiuu ijz niz loj yujbidx.

<sup>10</sup> Zeel bidxe'ch Dios b n guin ree, abi' r baman:

“Xgab ren r jn reeman, ni'quid r jnt reeman naguiejn din gagbee reeman xhienaag r nan g un reeman.”

<sup>11</sup> Zianan zeel bidxe'ch Dios abi' r baman guial ad yu't dxej gap reeman xguialraziiladx Dios.

<sup>12</sup> Zeel gol gojpt cudad compniar raliduladx ree Jesucrist, chit e chu' tijbidi guial por xixgab malidi ni rudxoon chililadxidi, guibi'cadi loj xnejz Dios b n naban. <sup>13</sup> Mejrli guixie guixie gol guneen  gol badxe' t e luxdoo ree lasa'di naga yu' tiamp, chit e ad zuzoobtridi xtiidx Dios guial ma been dol l jt gan. <sup>14</sup> Din bal ma nayajc ree xbejn Cristo, zianczi rayal yadxu'dxi'ch ree loj ni raliduladx ree laaman zi'c baliduladx ree laaman diizd guia'xchej.

<sup>15</sup> Abi' zi'c ma rnin lojdi, loj xtiidx Dios r b:

Bal rucaagdiajguidi xtiidx Dios yan,

ad bal gaquidi nad zi'c goc ree b n ad bazoobt xtiidx Dios gocli.

<sup>16</sup> Abi',  chuza ree nin ad bazoobt xtiidx Dios majsi biguiejn reeman ni guneeaman?  Nid b n Israel ni bab e gajc ree Moisejs Egipton ya? <sup>17</sup> Abi',  nid laagajc reeman bidxe'ch Dios loj tiuu ijz ya por dol ni been reeman abi' zien reeman g jt loj yujbidx? <sup>18</sup> Abi',  nid b n guin gajc reen r b Dios loj ya guial ma beenchaawaman xgab guial ad zut reeman lod gap reeman xguialraziiladxaman, guial ad bazoobt reeman xtiidxaman? <sup>19</sup> Zian rayagbee ree guial ad gojpt reeman guialraziiladx guin guial ad bililadxt reeman ni r b Dios loj reeman.

## 4

<sup>1</sup> Zeel yan guial sta raya'p ree promejs ni been Dios guial yaya'p ree xguialraziiladxa-man, rayal yaya'p ree cudad chit e awa raya'p ree promejs guin yaya'n tijb dunuj ree guial ad zaya'pt ree guialraziiladx guin. <sup>2</sup> Din dunuj ree ma bacaagdiajg ree xtiidxza'c Jesucrist zi'cgajc laa reeman, per laa reeman achet sirv been guial bacaagdiajg reeman diidx guin ree, guial ad bililadxt reeman laan. <sup>3</sup> Per dunuj ree guial ma baliduladx ree xtiidx Dios, ma raya'p ree guialraziiladx guin, sa'n por ree b n ad bililadxt r b Dios: Guial bache'ch reeman naj zeel ma benan xgab guial ad zajpt reeman da guialraziiladxan.

Diizd chi gule'cchaaw Dios guidxliuj baloox xchiinman, <sup>4</sup>zi'c rëb loj xtiidxaman por dxej ni raziiladx bejn:

Chi gulox been Dios gra xchiinman  
dxel ni goc gajdx dxej baziiladxaman.

<sup>5</sup>Per par ree bén ad bazoobt xtiidxaman rëbaman:

Ad yu't dxej gap reeman da guialraziiladxan.

<sup>6</sup>Bén bigueijn ree xtiidx Dios yaloj, ad gojpt reeman guialraziiladx guin guial ad bazoobt reeman xtiidxaman, per sta yu' ree bén ryaadx gap guialraziiladx guin. <sup>7</sup>Zeel chi gudëd zien ijz, Dios gulëëca zatijb dxej ni naj yandxej. Abi' zi'c ma rnin guial rëb rey Davi tib lajt loj xtiidx Dios:

Bal riguejndi xtiidx Dios yandxej,  
gol bazoob xtiidxaman.

<sup>8</sup>Din bal por Josué ni ajp ree bén Israel guialraziiladx, ad nuza'tt Dios zatijb dxej. <sup>9</sup>Zeel xt yandxej yu' guialraziiladx guin par ree xbejn Dios. <sup>10</sup>Din bén rajp xguialraziiladx Dios, raziiladxaman xieen gra xchiinman zi'c baziiladx Dios chi gulox been xchiinman. <sup>11</sup>Zeel rayal yaguieen ree naguiejn yaya'p ree guialraziiladx guin, chitëe chu güün zi'c been ree bén ad bazoobt xtiidx Dios.

<sup>12</sup>Din xtiidx Dios nabanen rajp tëen guialrniabee. Mazri rëëzan guial loj tijb espad ni nadoxh grop lad, rëëzan lën luxdoo bejn në lën xsprijtaman. Xt lën dxijt në lën yob rëëzan, abi' por laan ragbee bejn bal ni mal o ni zagdxe naj ni rënman güünman. <sup>13</sup>Achetzi ni been Dios zajc guiguie'ch lojman, din gradooczan ruguiaaman, abi' lojman naj yadëed ree cwent.

### *Jesús naj bixhioz mazri zojbloj*

<sup>14</sup>Zeel guial ma raya'p ree bixhioz ni mazri zojbloj, abi' laaman naj Jesucrist Xi'n Dios, bén ma zojb xanyabaa, rayal yasnuu yadxu'dxi'ch ree loj ni raliladx ree laaman. <sup>15</sup>Din Jesucrist bén naj dux bixhioz zojbloj ree laaman zajc gagnë dunuj ree chitëe güün dol dunuj ree gan. Din në laaman guzajc graloj zi'cgajc cayza'c ree, per laaman ad yu't dxej beenman dol. <sup>16</sup>Zeel con confianz ma zajc yabiig ree loj Dios yarejdx yanaab reeman, bén rën dunuj ree par yayaman dunuj ree. Abi' guial rënman dunuj ree, laaman gagnë dunuj ree loj hor ni yayën ree chu güün dunuj ree yudar.

## 5

<sup>1</sup>Gra bén rajc bixhioz mazri zojbloj, Dios gulej laaman loj ree bejn persi rbejdx rniabaman Dios por ree bejn. Abi' lojman rudëe bejn gon par Dios në ree be ni guiët por ree xtol ree bejn. <sup>2</sup>Abi' guial bénguidxliuj gajc naj bixhioz guin, zeel ragbeeman xhienaag rzajc bejn. Zeel rile' rajpaman pacens bén ni ad ragbeet xhienin rüjn, në ree bén ad zinalt xnejz Dios. <sup>3</sup>Abi' guial yu' chi rüjn bixhioz guin dol zeel nëman rugüjt tijb be zi'c gon par Dios por xtolaman, zi'cgajc rüjnman por ree bejn.

<sup>4</sup>Abi' achut zajc guiëb guial gacaman bixhioz zojbloj, Dios naj bén rbe laaman zi'c guleman Aarón. <sup>5</sup>Ziangajc gojc con Jesucrist, ad laataman rëb guial gacaman bixhioz zojbloj par dunuj ree, Dios bacaabee laaman, chi rëbaman:

Lüj naj da Xi'n'an, abi' diizd yan  
gulün guial lüj naj da Xi'n'an.

<sup>6</sup>Ziangajc rëb zatib lajt loj xtiidx Dios por Jesucrist:

Lüj naj bixhioz par tiblayaa zi'c goc Melquisedec bixhioz.

<sup>7</sup>Chi guban Jesucrist loj guidxliuj guie dád biinman gurejdx gunabaman Dios bén zajc yabëe laaman loj guialgüjt ni gudëdaman. Dxel bidxga' Dios Jesús badëeman laaman valor guial bazoobaman gra xtiidxaman. <sup>8</sup>Majsi Xi'n Dios najman, per basiidaman bazoobaman diidx majsi guzagdiajman. <sup>9</sup>Abi' guial guidiblagaa beenman gra ni rën Dios güünman, zeel por laaman tiblayaa ma yu' perdon par gra ree bén guzoob

xtiidxaman. <sup>10</sup> Abi' Dios naj bén gule laaman par gacaman bixhioz zojbloj zi'c goc Melquisedec bixhioz.

### *Royal yasnuu yaguieenbee ree xtiidx Dios*

<sup>11</sup> Dád zien ni yu' ganin lèjt por ree ni guin, per nawëëg najn par ganinan zi'c rënan guial dád nen rignia'di. <sup>12</sup> Ma gojc xchej da't nünbeedi xtiidx Dios, yan bal zajcan, lèjt ma rayal gulüü ben ren ree, per lèjt sta ryaadx chu' bén gulüü lèjt xtiidx Dios stijb ni basiididi guia'xchej. Lèjt naj zi'c tijb xindoo ni rë' ganax lejch luar gawix graloj. <sup>13</sup> Abi' gra ree bén naj zi'c xindoo ad wayajct gaw graloj, ad zile't gagbee reeman conin naj xnejz. <sup>14</sup> Per ree bén ni cusnuu cayignia' xtiidx Dios, laa reeman naj zi'c bén ma raw graloj guial ma rignia' reeman conin naj zagdxe con tēēnin naj ni mal.

## 6

<sup>1</sup> Zeel rayal yaguieen ree naguiejn mazri yayignia' ree xtiidx Jesucrist, luar yaye'c ree yasiid ree xtiidxaman ni ma basiid ree guia'xchej. Zagdxeli naj zian luar yasiid ree naabzi xhienaag yasa'n ree ni mal ni baguieen ree yaloj, o xhienaag yaliduladx ree Dios, <sup>2</sup> o xhienaag tiobnijs bejn, o xhienaag yadxiib du yaa ree guiyc bejn, o xhienaag yasban Dios bengüt ree, o xhienaag güün Dios xguialguxtisaman chi guidxin dxej yadëed ree cwent lojman, <sup>3</sup> zagdxeli naj guial yasnuu ree yasiid ree xtiidxaman. Abi' Dios gagnë dunuj ree din chile' yaguieen ree zian.

<sup>4</sup> Din bén ma ragbee ree xcwent Dios, bén ma nünbee ree xcwent ree ni yu' xanyabaa, bén ma gubajn ree con xSprijt Dios, <sup>5</sup> abi' bayuladx reeman xtiidxza'c Dios, ma ragbee tēē reeman xhienaag nabee Dios, <sup>6</sup> dxel rusa'n reeman guial chinal reeman xtiidxza'c Jesucrist, par laa reeman dád nawëëg naj chu' reeman loj xnejz Dios, din zi'c rulüü cucaa reeman Jesucrist Xi'n Dios loj crüzj zatijb din guze' ree bejn laaman. <sup>7</sup> Bénguidxliuj ree naj reeman zi'c tiblia' guidxliuj ni rë' guibidx guia ni ryajb, abi' bal rajc da't guiniaa guin par bén rüjn dxiin lojn dxel rüjnle' Dios laan. <sup>8</sup> Per bal ganax guiëjch nē ree gui'xh mal rliejn lojn, dxel ad rüjntan sirv, abi' mazri zëed gajxh casti par guidxliuj guin abi' casti guin naj guial che'can.

### *Ni nuzujdxi'ch dunuj ree loj xnejz Dios*

<sup>9</sup> Ad caynatan zian por lèjt, din dunujn rayagbee guial zagdxen cayüjndi, guial zinalquidi ni rayal güündi din laadi loj xcasti Dios. <sup>10</sup> Abi' laaman rüjn xguialguxtisaman zi'c rayal, abi' ad zayanladxtaman ni zagdxe ni beendi nē guial ma balüüdi guial rëndi laaman, abi' beendi yudar cusnuu tēē cayüjndi yudar dux compniar ree bén raliduladx ree Jesucrist. <sup>11</sup> Per dunujn rayënan guial gusnuu güündi zian xt dxej chigra, sin guial yaleny'a'di din yayalidi ni cabëzidi tia'di. <sup>12</sup> Ad gaquidi bén ploj, gol been zi'c been ree bén bililadx Dios sin guialraleny'a' tia' reeman ni rëb Dios tia' reeman.

<sup>13</sup> Chi been Dios promejs loj Abraham, baza't laagajcaman din achut bén mazri lasajc guial lojman, <sup>14</sup> abi' rëbaman loj Abraham: “Naj diidxli günle' lüj abi' dád zien ree xdiaal chu'.” <sup>15</sup> Abi' Abraham guyuman pacens ad baleny'a'taman persi cwa'man ni rëb Dios gudëēman lojman. <sup>16</sup> Chi rüjn bejn jurar, rüjnman jurar por stijb bén mazri lasajc guial lojman din guiguien guial diidxliqui güünman ni rëbaman. <sup>17</sup> Ziangajc yan, guial rën Dios gulüüman loj ree bén ni tia' ni rëbaman guial ad yu't dxej guchaa xixgabaman por promejs ni beenman, zeel beenman jurar. <sup>18</sup> Tio'p ni ad zaze'nt been Dios, beenman promejs been tēēman jurar abi' rayagbee ree guial ad rnieetaman diidx rusquiee. Zianan zeel nadxu' ree valor zubiig ree loj Dios din güünman dunuj ree yudar guial ma raya'p ree confianz guial gac zi'c ma rëbaman. <sup>19</sup> Abi' guial rayagbee ree guial gac zi'c ma rëb Dios, zeel nadxu'dxi'ch ree loj xtiidxaman zi'c nuzujdxi'ch tijb ganch guiib tijb barcw. Abi' guial nadxu'dxi'ch ree diizd xanyabaa zëedan, <sup>20</sup> lod ma guyu Jesús par guixhialaman nejz par dunuj ree, bén ma naj bixhioz zojbloj tiblayaa zi'c goc Melquisedec.



## 7

*Jesús naj bixhioz zi'cgajc gojc Melquisedec*

<sup>1</sup> Melquisedec gojc rey Salem gojc tēēman xbixhioz Dios bén yu' xanyabaa. Chi baza Abraham loj wadijl lod beenman gan rey gudilnē ree laaman, dxel bigchaagloj Melquisedec laaman, abi' beenle'man Abraham. <sup>2</sup> Dxel loj gra ree ni been Abraham gan, beenman laan chii lala' abi' badēēman tijban loj Melquisedec. Melquisedec rēn guiēban “rey ni rŭjn xguialguxtis zi'c rayal”, Abi' guial gojcaman xrey Salem rēn guiēban “rey rabe'cdxe luxdoo ree bejn”, din Salem rēn guiēb “ni rabe'cdxe luxdoo ree bejn”. <sup>3</sup> Melquisedec guin achut ragbee chu naj xDadaman, o xniaaman o chu ree nin naj xdiaaman. Achut ragbee goc gojlaman goc tēē gŭjtaman. Laaman goc bixhioz zi'cgajc Jesús Xi'n Dios bén ma naj bixhioz par tiblayaa.

<sup>4</sup> Gol been xgab xi bén lasajc gojc Melquisedec nadxel. Zeel xt dux bēngulal ree Abraham badēē tib part loj chii ni beenman gan loj ree rey ni gudilnēman. <sup>5</sup> Loj ley rēb guial ree bixhioz Israel ni zēēd loj xdiaa Leví rajp reeman derejch tia' reeman tib part loj chii ni rajp ree bén Israel, majsi tijbzi loj xdiaa Abraham zēēd gra reeman. <sup>6</sup> Melquisedec majsi ad zēēdtaman loj xdiaa Leví, per cwa'man tib part loj chii ni been Abraham gan. Dxel beenle'man Abraham bén cwa' xpromejs Dios. <sup>7</sup> Abi' dunuj ree rayagbee guial bén rŭjnle' stijb bejn, mazri lasajcaman guial loj bén rŭjnle'man. <sup>8</sup> Per gra ree bixhioz ni rtia' tib part loj chii la' ni rajp ree bejn, rējt gajc reeman zi'cgajc dunuj ree. Sa'n Melquisedec bén cwa' tib lia' ni been Abraham gan, loj xtiidx Dios ruza't laaman zi'c rulüü sta nabanman. <sup>9</sup> Yan zi'c rulüü yaguie'ch ree guial Leví con ree bixhioz ni zēēd loj xdiaaman bén ni rtia' ree tib part loj chii ni rajp ree bejn nē reeman badēē tib part guin loj Melquisedec loj hor ni bigchaagloj Melquisedec dux bēngulal ree Abraham. <sup>10</sup> Din chi bigchaagloj Melquisedec dux bēngulal ree Abraham, ad wayut Leví, per loj xdiaa Abraham zēēd Leví.

<sup>11</sup> Bal por ree bixhioz Levitas nile' niajc bejn naya delant loj Dios por ley ni guyu par ree bén Israel, dxel ad rŭjntri naguiejn ni't stijb bixhioz bén naj zi'c Melquisedec ad zi'ct Aarón. <sup>12</sup> Din chi bidxaa bixhioz nēgajc ley bidxaa, <sup>13</sup> din dux Dad ree Jesucrist laaman naj bixhioz guin. Per ad lojt xdiaa ree bixhioz zēēdaman, loj diaa ren zēēdaman abi' ni'qui tijb ree xdiaaman ad gojct bixhioz. <sup>14</sup> Dunuj ree rayagbee guial loj xdiaa Judá zēēd dux Dad ree Jesucrist abi' Moisejs ad baza'ttaman diaa guin chi rēbaman chu reenin gac bixhioz.

<sup>15</sup> Per laa rguien gajc guial Jesucrist naj bixhioz zi'cgajc Melquisedec, <sup>16</sup> guial ad lojt xdiaa Leví zēēdaman zi'c rēb loj ley par gac bejn bixhioz, najman bixhioz guial rajpaman guialrniabee guibanman tiblayaa. <sup>17</sup> Din ze rēb loj xtiidx Dios por laaman:

Lŭj naj bixhioz par tiblayaa,

lasa' bixhioz ni goc Melquisedec.

<sup>18</sup> Zianan zeel gojc ley guin tiblad guial ad beentan sirv guial nŭjn bejn zi'c rniabee ley guin. <sup>19</sup> Ad bile't nŭjn ley guin gan nibajn bejn zagdxe delant loj Dios. Per luar ley guin zagdxe naj guialrliladx ni raya'p ree din por guialrliladx guin ma raya'p ree nejz par yadxin ree loj Dios. <sup>20-21</sup> Gulal chi ru bejn rajcaman bixhioz, achet promejs been Dios, per chi bacaabee Dios Jesús gacaman bixhioz, Dios been promejs zi'c ca tiblajt loj xtiidxaman lod rēb:

Dux Dad ree Dios ma been promejs abi' ad zuchaat xixgabaman:

“Lŭj naj bixhioz par tiblayaa, lasa' bixhioz ni goc Melquisedec.”

<sup>22</sup> Zeel zian zagdxe naj nejz cŭb ni guxhal Jesús par yadxin ree loj Dios. <sup>23</sup> Gulal zien gojc ree bixhioz per guial rdxin dxej rējt reeman ad bile't niajc reeman bixhioz par tiblayaa. <sup>24</sup> Per Jesús ad yu't dxej guiētaman ad yu' tēēt dxej lox guial najman bixhioz.

<sup>25</sup> Zianan zeel rile' rabēēman bejn ree loj xcasti Dios, bén rēn ree gap nejz par guidxin reeman loj Dios por laaman, din laaman rajpaman guialnaban par tiblayaa par cwedx

guiniabaman Dios por laa reeman. <sup>26</sup> Zeel laaman naj bixhioz zobjloj bén rayaadx ree gagnë dunuj ree. Din laaman naj bén naya nali, achet ni mal rüjnman, nayaman loj Dios, garen najman guial loj béndol, abi' zobjbaman xanyabaa cwë' Dios. <sup>27</sup> Laaman ad ryadxt güünman zi'c rüjn ree bixhioz zobjloj guial guixie guixie rugüjt reeman be gui'xh zi'c gon par Dios. Yaloy por xtol gajc reeman dxel por xtol ree ben ren. Per Jesús con tib volt güjtaman por dux tol ree, ad ryaadxtri guiëtaman stijb. <sup>28</sup> Por ley bile' gojc ree bejn bixhioz zobjloj majsi ad nayaalojt naya reeman niz loj Dios. Per despuejs rëb Dios guial diidxiczi xi'nman gac bixhioz zobjloj, laaman nayaaloj nayaman niz loj Dios zianczi.

## 8

### *Jesús naj dux bixhioz zobjloj ree*

<sup>1</sup> Loj gra diidx ni caydü ree ni mazri lasajc naj guial Jesucrist naj dux bixhioz zobjloj ree, bén ni ma zobj xanyabaa xladbee Dios bén rniabee. <sup>2</sup> Ni ma rüjnman sirv guialbixhioz, lën yadoo ni bazoob Dios, ad bénguidxliujt. <sup>3</sup> Gra ree bixhioz zobjloj loj guidxliuj guie xchiin reeman naj guial rinë reeman gon rugüjt tëe reeman be ree zi'c gon par Dios. Ziangajc Jesucrist bén naj dux bixhioz zobjloj ree yu' ni badëëman loj Dios. <sup>4</sup> Abi' bal sta za' Jesucrist loj guidxliuj guie ad niajctaman bixhioz, guial ma yu' ree bixhioz ni rinë ree gon loj Dios zi'c rniabee ley ni basa'nnë Dios Moisejs. <sup>5</sup> Per gra ni rüjn ree bixhioz loj guidxliuj guie, najzi reen zi'c tijb bala, zi'c tijb sen xhienaag naj ree ni yu' xanyabaa. Dunuj ree rayagbee guial najzi reen zi'c tijb sen din chi ma cadxin gajxh güün Moisejs yadoo, dxel rëb Dios lojman: “Baguiaa zagdxe din güünl zi'cgajczi balün lüj ruguia' Sinaí.” <sup>6</sup> Per mazri zagdxe naj ni rüjn Jesucrist, bén bayal naj dux bixhioz zobjloj ree, din mazri zagdxe naj nejz cüb ni guxhalaman din chile' yadxin ree loj Dios. Abi' por nejz cüb guin mazri zagdxe naj ree xpromejs Dios par bejn.

<sup>7</sup> Bal por ley nile' nibajn bejn zagdxe delant loj Dios, dxel ad rüjnt naguiejn niu nejz cüb. <sup>8</sup> Per baguiaa Dios guial ad cayüjnt ree bejn zi'c rayal zeel rëbaman:

Naj rni guial guidxin dxej gaxhalan nejz cüb  
par ree bén Israel në ree bén Judá.

<sup>9</sup> Per nejz cüb guin ad najtan zi'c ley ni basa'nan  
loj xbéngulalidi chi babën laa reeman Egipto.  
Abi' guial ad bazoobt reeman da diidxan  
zeel gulëladxan laa reeman, zian rëb Dios.

<sup>10</sup> Rëb tëëman:

Zian ma baya'n diidx gac con ree bejn chi guidxin dxej  
guijc reeman yasa'nan da leyan  
abi' lën luxdoo reeman gucanan.

Dxel naj gac xDios reeman, abi' laa reeman gac da bejnan.

<sup>11</sup> Dxejzii ree ad rüjntri naguiejn gusiid ree bejn lasa' reeman.

Ni'qui bijch reeman par güünbee reeman naj,  
din gra reeman güünbee naj,  
diizd xindobëz xt bengol.

<sup>12</sup> Abi' naj gün perdon gra ree ni mal ni ma been reeman,  
abi' ad yu't dxej gusaaladxan xtol reeman.

<sup>13</sup> Chi rëb Dios guial guixal nejz cüb guin rën guiëban guial achetri sirv rüjn nejz gulal  
guin ni gop ree bejn par guidxin reeman lojman, abi' ni ad rüjntri sirv nayob nitan.

## 9

### *Yadoo ni yu' loj guidxliuj në yadoo ni yu' xanyabaa*

<sup>1</sup> Dunuj ree rayagbee guial chi binal bejn ley ni cayguie'ch ree naj nejz gulal, loj ley  
guin zëed xhienaag guiën bejn Dios, xhie tëe naag rayal güün reeman tijb yadoo loj

guidxliuj guie. <sup>2</sup> Lën yadoo guin guzëeb tijb lajd persi gojcan tio'p lën. Tijb lënan ni naj niz ro' port, lod brii laj lod nada abi' lën guin guzojb ni ru gandel në tijb mex ni gudxib ree guidxtil ma gogle'. <sup>3</sup> Dxel stijb lën guin xijch lajd guin brii laj lod mazczi nada. <sup>4</sup> Lën guin guyu tijb altar ni or lod rgu' reeman goxyl në tijb caj ni brii laj xcaj xpromejs ree Dios. Abi' caj guin nadüüban or zi'c lënan zi'c xijchan. Lën caj guin yu'chaaw guiaj ni ca ree guidxii xmandamient Dios në xvar Aarón ni baga' con stijb re or ni guyuchaaw mana. <sup>5</sup> Dxel guijc caj guin guzojb tio'p xfigur ree anjl bén la ree querubines abi' con xhiil reeman rusiaaw reeman guijc lod ruroob bixhioz zojbloj xrejn ree be por xtol ree bejn. Per por yan ad rüjnt naguiejn guzatan mazri ree ni guin lojdi.

<sup>6</sup> Chi gulox been reeman gra zi'c rayal gac lën tijb yadoo loj guidxliuj guie, dxel guixie guixie guyu ree bixhioz lën yadoo guin per naabzi lod brii laj lod nada, lod rguieen reeman ni rayal güün reeman par Dios. <sup>7</sup> Per stijb lën guin lod la mazcsi nada, tijbzi bixhioz zojbloj ru ni tib volt lën tib ijz. Abi' ad zajct chu'man bal id zinëman xrejn ree be din güün Dios perdon xtolaman në xtol ree bejn. <sup>8</sup> Por ree ni guin rulüü xSprijt Dios dunuj ree guial la'tgaj rüjn sirv lod brii laj lod nada ad yu't mod chu' bejn lod la mazcsi nada. <sup>9</sup> Gra ree ni guin najzi reen tijb ejempl par dunuj ree yan, din gon në ree be ni binë ree bejn par Dios, ad beent reen sirv par nayaaloz ninialadx reeman guial ma naya reeman loj Dios. <sup>10</sup> Gra ree costumbr ni gop reeman zi'c ree con ni gudaw reeman, në ree ni gu' reeman në gra ree ni rayal güün reeman din naladx reeman guial ma naj reeman naya, laan naj ni gunabee ley güün ree bejn xt dxej ni bachaa Dios gra.

<sup>11</sup> Din yan ma bi't Jesucrist, bén naj bixhioz zojbloj par dunuj ree, abi' por laaman ma raya'p ree yaya'p tée ree ni ma rëb Dios yaya'p ree. Abi' mazri zagdxe naj lën yadoo lod ma guyuman mazri lasajc yadoo guin guial ad zojbtan loj guidxliuj guie ad gojc tēetan por ree bénguidxliuj guie. <sup>12</sup> Jesucrist ma guyuman lën yadoo lod nada da't, per ad con xrejnt ree go'n dobëz o xrejn ree dxib, guyuman con quijb xrejnman. Laaman con tib volt guyuman, ad rüjnt naguiejn güünman zian stijb abi' por laaman raya'p ree perdon par tiblayaa. <sup>13</sup> Tiamp gulal xrejn ree dxib o xrejn ree go'n o cobdëj ni we'c ree vagdobëz ruroob bixhioz guijc ree bejn persi naladx reeman ma naya reeman. Yan bal zian naladx reeman guial raya'n reeman naya, <sup>14</sup> diidxgui con xrejn Jesucrist nid zanaduladx ree ya guial ma naya ree niz loj Dios xcwent dux tol ree, din chile' yaguieen ree ni rën Dios bén naban. Din por xguialrniabee xSprijt Dios, Jesucrist bén ad beentczi dol, badëe laagajcaman zi'c tijb gon par Dios.

<sup>15</sup> Zeel por Jesucrist ma raya'p ree tijb nejz cüb par yadxin ree loj Dios. Din por xguialgüjt Jesucrist ma yu' perdon par dux tol ree në xtol ree bén ni binal ley, gra ree bén naj xbejn Dios zian yaca' ree ni rëb Dios yaya'p ree par tiblayaa. <sup>16</sup> Din zi'cgajc tijb bén rlies tijb gui'ch guial chu yaya'nnë ree ni rajpaman, ad züjnt gui'ch guin dxiin xt chi ma güjtaman. <sup>17</sup> La'tgaj naban bén guin achet sirv rüjn gui'ch guin, rüjnan sirv xt chi ma güjtaman. <sup>18</sup> Zeel diizd tiamp gulal par guzuloj been sirv ley ni basa'n Dios loj Moisejs, bagüjt reeman tio'p choon ree be gui'xh persi gulëe reeb rejn. <sup>19</sup> Din chi gulox bagojn Moisejs gra ree bejn gra ni zëed loj xley Dios dxel cwa'man guidxlad xiil ni nayë' culor xnia bacaaman laan guijc tib xidx yag ni la hisopo, dxel badxe'man laan loj nijs ni no'ch xrejn ree go'n dobëz con xrejn ree dxib dxel bacojpaman laan loj libr ley në guijc ree bejn <sup>20</sup> rëbgajman: "Rejn guie naj tijb sen guial ma banee Dios xleyaman lojdi par güündi laan cumplid." <sup>21</sup> Bacojp tēëman rejn guin lën yadoo në guijc gra ree ni rüjnnë ree bixhioz dxiin lën yadoo. <sup>22</sup> Ley guin gra gunabeen gagle' con rejn din guiguien guial ma naya reen delant loj Dios, din sin rejn achet perdon par dol yu'.

### *Xrejn Jesucrist rquied dol*

<sup>23</sup> Zeel par guiguien guial ma naya ree ni beennë ree bixhioz dxiin lën yadoo guin, gojc naguiejn bagüjt reeman be ree persi beenle' reeman ni guin ree. Per ni guin ree

najzi reen zi'c tijb xsen ni yu' ree xanyabaa, din par ree ni yu' xanyabaa ryaadx rejn mazri lasajc guial loj xrejn ree be. <sup>24</sup> Abi' Jesucrist ad lënt yadoo ni been bénguidxliujn guyuman, yadoo ni najzi tijb sen guial xhienaag naj xanyabaa, ma guyuman xanyabaa lod caneeman por dunuj ree loj Dios. <sup>25</sup> Jesucrist ad biaadxt niëjtaman zien volt por dol ree, ad beentaman zi'c been ree bixhioz zobjloj guial gazobijz binë reeman xrejn ree be lën yadoo lod brii laj lod nada da't. <sup>26</sup> Din bal id zian, zien volt niëjtaman diizd chi gocchaaw guidxliuj. Per chi bidxin dxej bi'taman, con tib voltzi badëë laagajcaman par guiëtaman din chiquied dux tol ree. <sup>27</sup> Zi'cgajc gra bejn tib voltzi rëjt reeman, dxel zëed ni yadëed reeman cwent loj Dios. <sup>28</sup> Ziangajc Jesucrist tib voltzi badëë laagajcaman par guiëtaman din quixaman por xtol ree bejn. Abi' chi gui'taman stijb ad zi'ttaman por dol, gui'taman din chignëman bén cabëz ree laaman.

## 10

### *Ad leyt riquied dol*

<sup>1</sup> Ley ni basa'nnë Dios Moisejs najzan tijb sen xcwent ree ni gac, per ad por ziant gojc ni rayal gac. Din majsi gazobijz güjt ree be par Dios zi'c gunabee ley güün bejn, per ad guyut dxej ni naladx reeman guial ma bayaaloj naya reeman loj Dios. <sup>2</sup> Din bal ninialadx reeman guial ma naya reeman con tib volt ni bagüjt reeman be ree par Dios, dxel ad ryaadxtri nüjn reeman zian guial ma ragbee reeman achetri xtol reeman. <sup>3</sup> Per ad gunaladxt reeman zian, gazobijz rusaaladx xtol reeman chi rugüjt reeman be ree par Dios, <sup>4</sup> din xrejn ree go'n në xrejn ree dxib ad zajct chiquiedan xtol ree bejn.

<sup>5</sup> Zeel chi bi't Jesucrist loj guidxliuj, rëbaman loj Dios:

Ad rëntil xrejn ree be

ni'qui los demazri ree ni ridnë bejn par lüj,  
zeel baneel naj cuerp ni ra'pan loj guidxliuj guie.

<sup>6</sup> Ad rëntril guial ruze'c reeman be ree par lüj  
ni'qui xrejn ree be ni ridnë reeman por xtol reeman.

<sup>7</sup> Zianan zeel rën:

“Laa naj guie, Dad Dios,  
zialan par günan zi'c rën,  
zi'c ca loj libr por naj.”

<sup>8</sup> Jesucrist yaloj rëbaman guial ad rënt Dios xrejn ree be, ni'qui los demazri ree ni rinë bejn par laaman, ni'qui guial ruze'c reeman be ree por xtol reeman zi'c rniabee ley güün reeman. <sup>9</sup> Chi gulox rëb Jesús zian, dxel rëb tëëman: “Laa naj guie, Dad Dios, zialan par günan zi'c rën.” Zianan baloox Jesucrist guial rinal ree costumbr ni rëb loj ley abi' guxhalaman tijb nejj cüb par yadxin ree loj Dios. <sup>10</sup> Yan ma nayajc ree naya delant loj Dios guial ma been Jesucrist zi'c rën Dios, badëed laagajcaman güjtaman por xtol ree bejn, con tib volt par tiblayaa, ad ryaadxt güünman zian stijb.

<sup>11</sup> Gra ree bixhioz Israel guixie guixie za' reeman cayüjn reeman gra ni rniabee ley güün reeman, abi' guixie guixie rugüjt reeman be ree par Dios. Abi' majsi zien volt rüjn reeman zian per ad rquiedt guialrugüjt be guin ree xtol ree bejn. <sup>12</sup> Per Jesucrist con tib volt badëed laagajcaman güjtaman por xtol ree bejn, ad ryaadxt güünman zian stijb. Dxel gurejman xladbee Dios, <sup>13</sup> lod cabëzaman guidxin dxej nabeeman loj gra ree bén rdxe'ch laaman. <sup>14</sup> Din laaman con tib volt badëë laagajcaman güjtaman por xtol ree bejn dxel tiblayaa ma naya ree bén rililadx laaman. <sup>15</sup> Abi' dunuj ree rayagbee ree guial walin din por xSprijt Dios zëed ree diidx ni ca loj xtiidx Dios guial rëb Dios:

<sup>16</sup> Zianan ma baya'n diidx gac  
con ree bejn chi guidxin dxej:  
Guijc reeman gusa'n da leyan  
abi' lën luxdoo reeman gucanan

<sup>17</sup> Abi' rëb tëëman:  
Ad yu't dxej gusaaladxan xtol reeman  
në graloj ree ni mal ni ma been reeman.

<sup>18</sup> Abi' zi'c ma yu' perdon par dol, ad rüjntri naguiejn guiët ree be por dol.

### *Royal yubiig ree loj Dios*

<sup>19</sup> Zeel compniar raliduladx ree Jesucrist sin guialrdxeb ma zajc yadxin ree lod zojb Dios por xrejn Jesucrist, <sup>20</sup> din chi badëed xcuerpaman persi güjtaman, guxhalaman tijb nejz cüb ni zidnë guialnaban par dunuj ree. <sup>21</sup> Yan zi'c ma rniabee Jesucrist dunuj ree, bén naj bixhioz zojbloj xanyabaa, <sup>22</sup> con guidib du luxdoo ree ma zajc yubiig ree loj Dios con tijb guialrliladx ni wali ree raliduladx ree laaman, con tijb quiarguejn naya sin xgab mal, con tijb cuerp ni ma baya loj dol, zi'c chi qui badiibri dux cuerp ree con nijs naya. <sup>23</sup> Zeel royal yadxu'dxi'ch ree loj ni raliduladx ree Dios, din laaman züjn cumplid xtiidxaman zi'c ma rëbaman. <sup>24</sup> Royal yagueien ree xgab xhienaag yalu' ree luxdoo ree dux compniar ree yayën tëë du lasa' ree yagueien tëë ree ni naj zagdxe. <sup>25</sup> Ad rayalt yagueien ree zi'c rüjn ree bén ad rejtri ree lod radxaag lasa' ree dux compniar ree par chignia' reeman mazri xtiidx Dios, royal yalu' ree luxdoo du lasa' ree, abi' mazri yan guial ma rayagbee ree guial ma zidyob dxej gui't Jesucrist stijb.

<sup>26</sup> Din bal ma rayagbee ree xtiidxli Jesucrist abi' baguieen ree xgab yagueien ree mazri dol, dxel ad yu'tri por chu zajc yayajc ree perdon. <sup>27</sup> Ni cabësi dunuj ree naj xguialguxtis doxh Dios, tijb bajl lod yayal ree bén ad ruzoobt xtiidxaman. <sup>28</sup> Chi bal id been tijb bejn zi'c rniabee ley ni basa'nnë Dios Moisejs, abi' yu' tio'p choon testiw guial ad beent bén guin zi'c rniabee ley guin, dxel ad yu'tri mod laaman loj guialgüjt ni rayalaman. <sup>29</sup> Yan gol been xgab, jixixi mazri castiro' yayal bén rnieeguijdx xSprijt Dios bén ragnë dunuj ree! Bén ni naladx guial achet lasajc Xi'n Dios, abi' rüjnman desprejs xrejnman, rejn ni rulüü guial gac zi'c rëb Dios, rejn ni rusia xtol bejn. <sup>30</sup> Dunuj ree rayagbee guial rëb Dios: "Naj royal gün guialguxtis, naj gudë ni royal bejn." Rëb tëëman: "Dios naj bén ni yaca' cwent por ni cayüjn bejn." <sup>31</sup> jAbi' nadxeb yayal bejn xcasti Dios bén naban!

<sup>32</sup> Per lëjt gol basaaladx xhienaag guzajquidi chi qui beenbeeridi xtiidxli Jesucrist. Gudaandi gra guialzi ni gudëdidi. <sup>33</sup> Yu'di zien loj da't guialzi badëed ree bejn lëjt, abi' baze' reeman lëjt delant loj ree bejn, yu' tëëdi ad gulëeladxtidi bén guzac ree zian. <sup>34</sup> Ad gulëeladxtidi bén ni guyu ree ladxguiib, abi' chi baca' ree bejn gra ni rajpidi, babaagajquidi guial ma ragbeedi mazri lasajc ni rajpidi xanyabaa, në ree ni rajpidi ni, taan reen tiblayaa. <sup>35</sup> Zeel ad gusa'ndi guialrliladxidi Jesucrist, din por guialrliladx guin dád zagdxe naj ni tia'di. <sup>36</sup> Rüjn naguiejn gapidi pacens din chile' güündi zi'c rën Dios, zian tia'di ni ma rëbaman guneman lojdi. <sup>37</sup> Din loj xtiidx Dios rëb:  
Nayob, dád nayob gui't bén naj gui't,  
ad zaglaataman.

<sup>38</sup> Abi' bén naban zi'c rënan,  
guidib tiamp ni nabanman rliladxaman naj.  
Per bal gusa'nman ni rliladxaman naj,  
ad zabaanë'tan laaman.

<sup>39</sup> Per dunuj ree ad nayajct ree zi'c ree bén rusa'n ni rliladx reeman Jesucrist abi' royal reeman casti, dunuj ree nayajc ree bén rliladx Jesucrist diidxli par chitëë yayal ree casti.

## 11

### *Guialrliladx Dios*

<sup>1</sup> Yan, çxhienin naj guialrliladx? Guialrliladx naj guial guidiblagaa yaliduladx ree gac zi'c caylëjz ree gac, në guial waliqui ni raliduladx ree ni ad raguaat ree. <sup>2</sup> Dux béngulal ree baya'n reeman zagdxe delant loj Dios guial bililadx reeman laaman.

<sup>3</sup> Zi'c raliduladx ree Dios, dunuj ree rayagbee guial con xtiidxaman beenman xanyabaa në guidxliuj në gra ni raguiaa ree, achetczi ni beenman con ree ni raguiaa ree yan.

<sup>4</sup> Guial bililadx Abel Dios, zeel zagdxe naj gon ni badëëman guial loj Caín, abi' baya'nman zagdxe delant loj Dios abi' cwa' Dios gon ni bazaladx Abel lojman. Zian majsi ma güjt Abel, per sta rguiajt xhienaag bililadxaman Dios.

<sup>5</sup> Guial bililadx Enoc Dios zeel ad güjttaman, guidib nabanman ziaman xanyabaa abi' ad badxejlt ree bejn laaman guial ma zignë Dios laaman. Per chi gadaman chignë laaman, loj xtiidx Dios rëb guial bayuladx Dios zi'c gubanman. <sup>6</sup> Abi' achut zajc güün zi'c rën Dios bal id rliladxaman laaman. Chutëëz bén rën gap nejk par guidxinman loj Dios rayal chililadxaman guial yu' Dios chililadx tëëman guial laaman rudëë ni rëbaman gudëëman loj ree bén raguiil laaman.

<sup>7</sup> Guial bililadx Noé Dios dxel chi rëb Dios lojman guial gac ree ni gadaman guguiaa gac bazoobaman xtiidxaman, beenchaawaman tijb barcw din laaman con ree xfamilaman loj ni rëb Dios gac. Dxel por guialrliladx guin biguien guial gra bénguidxliuj rayal casti ni rëb Dios, abi' baya'n Noé zagdxe delant loj Dios guial bililadxaman xtiidxaman.

<sup>8</sup> Ziangajc Abraham guial bililadxaman Dios, bazoobaman xtiidxaman chi rëbaman lojman din grii ladxaman cheman lod tia'man guidxliuj ni gudëëd Dios lojman. Abi' brii ladxaman ni'quid ragbeetaman banguin cheman. <sup>9</sup> Guial bililadxaman Dios, gubajnman zi'c benzit loj guidxliuj ni rëb Dios gudëëdaman lojman. Gurejman lën ree carp ni naj në guid, ziangajc Isaac në Jacob në laa reeman rayal guidxliuj guin. <sup>10</sup> Gubajn Abraham zian guial ragbeeman chisobaman luguiedx ni beenchaaw Dios, guiedx ni ad yu't dxej nit.

<sup>11</sup> Ziangajc Sara, por xguialrliladxaman, majsi ma najman bengol par chu' xi'nman, per guyuman gojl par gacaman na abi' guyu tijb xi'nman guial bililadxaman guial rüjn Dios cumplid xtiidxaman. <sup>12</sup> Zian gojc majsi bengol da't ma naj Abraham per gojcaman famil. Dád zien ree xdiaaman guyu zi'c ree bajl xanyabaa, zi'c ree üx ni riga' ro' nijsdoo ni ad zile't guiyab.

<sup>13</sup> Gra ree bén ma bazatan xt bidxin dxej güjt reeman bililadx reeman Dios, majsi ad baguiaat reeman gojc cumplid gra ree promejs ni been Dios loj reeman, per guial rliladx reeman ragbee reeman guial zajc zi'c rëb Dios abi' rabaa reeman. Laa reeman ragbee guial tio'p choon dxejzi zëëd reeman loj guidxliuj guie ad tiblayaat. <sup>14</sup> Abi' ree bén rniee zian, zian rguienchaaw guial sta rguuil reeman lod diidxli gac ladx reeman. <sup>15</sup> Din bal por guidxliuj lod guza reeman cayüjn reeman xgab, dxel zile' nayejc reeman ni stijb. <sup>16</sup> Per laa reeman mazri rüjn reeman xgab por tijb luar lod naj mazri zagdxe, mazri rüjn reeman xgab por xanyabaa. Zeel Dios ad ratutaman najman xDios reeman abi' ma beenchaawaman luar lod guiban reeman xanyabaa.

<sup>17</sup> Guial bililadx Abraham Dios, dxel chi been Dios laaman prueb din gugüjt xi'nman Isaac din gudëëdaman laaman zi'c gon par Dios, cwëjb Abraham majsi tijbzi Isaac guin naj xi'nman, majsi ragbee tëëman guial rëb Dios lojman: <sup>18</sup> "Por xi'nl Isaac gacxhiejk da't xdiaal." <sup>19</sup> Per Abraham yu'guijcaman guial rajp Dios guialrniabee xt par yasbanman bengüt ree, abi' zi'c rulüü baban xi'nman stijb chi gudëëdaman prueb guin.

<sup>20</sup> Ziangajc Isaac por guialrliladxaman Dios dxel chi beenle' ree xi'nman Jacob con Esaú, rëbaman xhienaag gac con tijbgaj reeman. <sup>21</sup> Abi' ziangajc Jacob guial bililadxaman Dios ziangajc beenle'man grop ree xi'n Xiëb chi ma guidxin hor guiëtaman. Dxel cwa' yagriiadxaman abi' gurejdx gunabaman Dios. <sup>22</sup> Ziangajc Xiëb guial bililadxaman Dios, chi ma guidxin hor guiëtaman, rëbaman guial grii ree bén Israel Egipto, abi' rëbaman loj reeman xhienaag güünnë reeman xdxijtaman.

<sup>23</sup> Por guial bililadx ree xdad xniaa Moisejs Dios chi gol Moisejs guin, baquie'ch reeman laax choon bëëw guial baguiaa reeman najx xindoza'cdxoon, abi' ad bidxebt

reeman guial rëb bén naj rey guial guiët gra ree xindobëz. <sup>24</sup> Abi' chi goc Moisejs guin bengol, guial bililadxaman Dios, gojc xixgabaman cwexuuman niajcaman xi'n xi'ndxa'p rey Egipto. <sup>25</sup> Par laaman zagdxeli naj sagdiajman con ree xbén Israelaman, luar nünman dol niro'nladxaman laa reeman din niajpaman ni rënman, ni ad rdaant ree par tiblayaa. <sup>26</sup> Par laaman mazri lasajc sagdiajman zi'c Cristo luar niajpaman gra ree guialnaza'c ni yu' Egipto, din mazri yu'guijcaman guialnaza'c ni yayalaman delant loj Dios. <sup>27</sup> Guial bililadx Moisejs Dios, briiman Egipto, ad bidxebtaman majsi balen rey Egipto. Guzudxi'chaman zi'c rulüü ruguiaaman Dios bén ad zajct guguaa ree bejn.

<sup>28</sup> Në guial bililadx Moisejs Dios, beenman lanij pascw, abi' gunabeeman baroob ree bén Israel rejn ro' xport lidx reeman, din chi téd xianjl guialgüjt, ad zugüjttaman xi'n yaløj ree bén Israel. <sup>29</sup> Guial bililadx ree bén Israel Dios, gudëd reeman zi'c loj yujbidx lod bixal loj nijsdoo la nijsdoo xnia. Per chi guyën ree bén Egipto nidëd reeman, loj hor guin bayaaw nijs guin dxel gu' reeman nijs abi' güjt reeman.

<sup>30</sup> Guial bililadx ree bén Israel Dios, chi baza' gajdx dxej ni biaw reeman guiedx Jericó, dxel bazaj ze' ni nayaw guiedx guin. <sup>31</sup> Abi' Rahab bén goc béngunaa dxuudx luguiedx Jericó, guial bililadxaman ad güjttaman chi güt ree los demazri ree bén ladxaman bén ad bazoobt ree diidx, guial baca'man bén Israel ni we ree bigla'ch luguiedx guin.

<sup>32</sup> Yan, ¿xhie mazri ganin lojdi? Ad zadaant tiamp guin ganin lojdi xcwent Gedeón, Barac, Sansón, Jefté, Davi, Samuel në xcwent ree bén badëë xtiidx Dios loj ree bejn.

<sup>33</sup> Gra reeman bililadx Dios abi' been reeman gan loj zien ree nacion, been xguialguxtis reeman zi'c rayal, baguaa reeman gojc cumplid ni rëb Dios loj reeman abi' basiaaw reeman ro' ree beedx. <sup>34</sup> Guzuj reeman loj bajl ro' abi' achet goc reeman, gulaa reeman loj guialgüjt con espad, guyu reeman gojl chi rulüücüzi ad yu't reeman gojl, guzudxi'ch reeman loj wadijl abi' balaagdxa reeman benzit ni gudilë reeman. <sup>35</sup> Në ree béngunaa ni güt ree xfamil, por guial bililadx reeman Dios baban ree xfamil reeman stijb.

Per yu' ree bejn majsi güjt reeman, per par laa reeman mazri zagdxë guzagdiaj reeman loj ree bén bagüjt laa reeman, luar nusa'n reeman guialrliladx reeman Dios par gap reeman stijb guialnaban cüb ni mazri lasajc. <sup>36</sup> Yu' tée reeman guzagdiaj baze' ree bejn laa reeman, gudijn ree bejn laa reeman, xt guxhii ree bejn laa reeman con caden abi' guyu reeman ladxguiib. <sup>37</sup> Yu' reeman bagüjt ree bejn con guiaj, yu' tée reeman bagüjt reeman gulëëxhün reeman laa reeman con sierr, güjt tée reeman con espad. Yu' tée reeman biza gra lad najcw reeman guid xab xiil në guid xab dxib, probza laa reeman naya biza reeman, graløj beennë ree bejn laa reeman. <sup>38</sup> Biza reeman niz loj yujbidx, niz ruguia' ree, në graløj lën ree guiajbiliaa. Bén guin ree ad rayal nibajn reeman loj guidxliuj guial dád benza'c gojc reeman. <sup>39</sup> Abi' majsi biguien guial gra reeman diidxli bililadx reeman Dios, per ad cwa't reeman ni rëbaman loj reeman. <sup>40</sup> Din laaman beenman xgab tijb ni mazri zagdxë par dunuj ree, abi' ad gojc gajt ni rëbaman loj reeman din tijbzi yaca' ree ni rëbaman con laa reeman.

## 12

### *yunaal ree Jesús*

<sup>1</sup> Zeel, zi'c ma bacaagdiajg ree por zien ree bejn xhienaag bililadx reeman Dios, rayal yasa'n ree tiblad gra dol në gra ree ni rudxoon yaguieen ree zi'c rayal, ad zalenya' téeet ree yunaal ree nejz ni ma balüü Dios dunuj ree. <sup>2</sup> Rayal yadxë'guijc ree Jesucrist din por laaman zëed guialrliladx ni raya'p ree abi' por tijbzi laaman rayaaløj guialrliladx ni raya'p ree. Gudaanman guialzi ni gudëdaman loj crüjz, ad batutaman güjtaman zian din ragbeeman guial chi ma gulox guzagdiajman, dxel gui't guialrabaa. Abi' yan ma zojbaman xladbee Dios xanyabaa.

<sup>3</sup> Gol been xgab xhienaag guzagdiaj Jesucrist chi basagdiaj ree bëndol laaman, chitëe yadxaguidi, ad yalenya'di por ni cazajquidi. <sup>4</sup> Din majsi cusagdiaj ree bejn lëjt guial

cayüjndi naguiejn ad cayüjntidi dol, per ad wazujtidi loj guialgüjt por zian. <sup>5</sup> ¿Wen ma bayanladxidi ya xhienaag banee Dios lëjt consejw najdi xi'nman? Loj xtiidxaman rëb: Xi'n, bidxga' zi'c runee dux Dad ree Dios lüj consejw, ad bal yalenyal chi guzuxnejzaman lüj.

<sup>6</sup> Din rüjnnaaman bén ni naj ree xi'nman, ruzuxnejzaman laa reeman guial rënman laa reeman.

<sup>7</sup> Zeel gol gudaan guialzi, din zagdxe najn par lëjt. Rüjnnë Dios lëjt zi'c rüjnnë bejn xi'nman, ¿wen yu' dad ad ruzuxnejzt xi'n ya? <sup>8</sup> Yan bal id ruzuxnejz Dios lëjt zi'c rüjnnë gra ree xi'nman, rën guiëban guial ad najtidi xi'nman diidxli, ad najtaman xDadidi. <sup>9</sup> Lëjt ragbee guial chi bayajc ree xindoo, gudijn dux dad ree dunuj ree din yacaagdiajg ree xtiidxaman abi' raya'p reeman respejt. Yan, ¿chexc di ad ree yazoob xtiidx dux Dad ree Dios bén yu' xanyabaa, din yaya'p ree guialnaban con laaman? <sup>10</sup> Dux dad ree ruzuxnejzaman dunuj ree por tio'p choon dxej ni zio'p ree loj guidxliuj din yaguieen ree zi'c ni naladxaman naj zagdxe. Per Dios ruzuxnejzaman dunuj ree par tijb ni mazri zagdxe par dunuj ree, ruzuxnejzaman dunuj ree din yabajn ree naya zi'c laaman. <sup>11</sup> Diidxliczi achet guialnaa naj nix loj hor ni cadëdilan, ragnaalil. Per ree bén ni rusiid ruzoob diidx zian, laa reeman naban zagdxe, naalyuj delant loj Dios.

### *Ad cwëëladxidi xtiidx Dios*

<sup>12</sup> Zeel gol bagu' luxdoodi, gol badëëd valor lëjt gajc zi'c tijb bén raca'ladx chi ma badxag da'taman. <sup>13</sup> Gol been naguiejn gol gubajn xnejz, din ree bén ragdxa xhie güün reeman, ad gusa'n reeman xnejz Dios, chu' luxdoo reeman zagdxe chinal reeman laan.

<sup>14</sup> Gol been naguiejn guibandi zagdxe con gra ree bejn, gol gubajn naya delant loj Dios din bén ad nabant naya ad zile't guguaaaman dux Dad ree Dios. <sup>15</sup> Gol gojp cudad chitëë chu' tijbidi gusa'n tiblax zi'c rën Dios gagnëman lëjt chitëë chu' tijbidi gac zi'c gui'xh nala ni rüjn guialquia abi' guxhiinan gra xcompniaridi. <sup>16</sup> Ni'qui tijbidi ad rayalt sunëdi bén ad najt lacheelidi, ad cwe'quidi tiblax ni zagdxe ni zëed ree por Dios chitëë saquidi zi'c guzac Esaú, por tijb guialraw bato'man guialrniabee ni rayalaman guial najman bén yalaj loj bijchaman. <sup>17</sup> Abi' lëjt ragbee guial chi guyën Esaú nünle' xdadaman laaman ad beenle'taman laaman zi'c rayalaman. Majsí dád biinman gunabaman laan, per ad bile't nuchaaman ni beenman.

<sup>18</sup> Lëjt gadidi chibig lod ad najt par gugaalidi zi'c gubig ree bén Israel gulal guiic guia' Sinaí lod baguiaa reeman cayajc bajl guiic guia' guin, baguiaa reeman go'xh ya's ni basiaaw guiic guia' guin abi' rbi' gaj tijb bidoxh yagaj zi'c bidojn. <sup>19</sup> Dxel biguiejn reeman bibejdx tijb trompejt abi' biguiejn reeman cha' Dios guneenëman laa reeman. Per guial tant bidxeb reeman biguiejn reeman cha'man dád guzajc reeman laaman liaadx ad rnieenëman laa reeman. <sup>20</sup> Din ragbee reeman guial nawëëg naj ni gunabee Dios güün reeman chi rëbaman: “Chutëëz bejn o be gui'xh ni gugaal guiic guia' guie rayal guiëtaman o guiëtib con guiaj o con lans.” <sup>21</sup> Nadxeb naj ni baguiaa reeman xt Moisejs rëb: “Rnijn guial tant rdxeban.”

<sup>22</sup> Per lëjt ma bibiguidi loj Dios, ad guzajctidi zian. Ma yu' nejz par guidxindi ruguia' Sión, xanyabaa lod naj Jerusalén ladx Dios bén naban, lod nadxag lasa' ree zien da't ree anjl, <sup>23</sup> dád nix yu' luxdoo reeman rën reeman laaman lod yadxajg lasa' ree xbejn Dios bén ni ma ca ree laj loj libr xanyabaa. Ni zobj Dios, bén yanab cwent loj gra bejn, ni tëë za' xSprijt ree bén guban zi'c rayal laa reeman ma naya reeman por Dios. <sup>24</sup> Ni gajc zobj Jesucrist, bén guxhal nejz cüb ni raya'p ree par yadxin ree loj Dios. Chi güt Abel xrejnman gunab gac guialguxtis, per con Jesucrist ad gojct zian, güjtlaman, guxhie' tëë xrejnman par yayajc ree perdon.

<sup>25</sup> Zeel gol gojp cudad gol bidxga' Dios, laaman najman bén rnieenë dunuj ree. Din bal bén ni ad bidxga't ree xtiidx Moisejs bén badëëd xtiidx Dios loj guidxliuj guie ad gulaat reeman loj casti ni rayal reeman, diidxgui dunuj ree nid zayal ree xcasti Dios ya bal



id zayidxga' ree xtiidx Jesucrist, bén guza diizd xanyabaa din guinieenëman dunuj ree. <sup>26</sup> Chi gunee Dios béngulal ree ruguia' Sinaí, binij guidxliuj. Per yan ma rëbaman: “Gunin guidxliuj zatijb, per ad guidxliujtzi, në xanyabaa.” <sup>27</sup> Chi rëb Dios guial güünman zian zatijb, rën guiëban guial gunijman gra ni beenman, din chiquied ni rayal chiquied din yaya'n ni ad rayalt chiquied. <sup>28</sup> Zeel rayal yadëed ree quixtëe loj Dios guial ma rayal ree lod canabeeman, lod ad yu't dxej nit, abi' con respejt në guialrdxeb yaguieen ree ni ruladxaman. <sup>29</sup> Din dux Dios ree naj zi'c tijb bajl ni ruze'c gra.

## 13

### *Xhienaag güün bejn ni yayuladx Dios*

<sup>1</sup> Ad cwëz guiëndi xcompniaridi bén riladx ree Jesucrist. <sup>2</sup> Ad yayanladxidi gudëe lidxidi yaya'n ree bén ri't, din zian yu' ree bén baca' ree xianjl Dios sin guial gagbee reeman chunin.

<sup>3</sup> Gol basaaladx bén yu' ree ladxguiib, gol gunaladx guial në lëjt yu' ladxguiib con laa reeman. Gol been tëe xgab por ree bén ni cazagdiaj, gol gunaladx guial në lëjt cazagdiaj.

<sup>4</sup> Gol gojp respejt guialruxhliaa, ad gusquiee lacheelidi. Din Dios zudëedaman casti bén za'në xinguaaw o béngunaa ren, në gra ree bén ni rüjn ree ni dxuudx con ree bén ad najt lacheel reeman.

<sup>5</sup> Ad sëëbladxidi milia, gol baya'n conform con ni rajpidi din Dios ma rëb: “Gra dxej za'n con lüj, abi' ad yu't dxej gabëladxan lüj.” <sup>6</sup> Abi' con confianz zajc yaguie'ch ree:

Da Dadan Dios naj Bén ragnë naj

ad rdxebtan majsi xhietëez güünnë ree bejn naj.

<sup>7</sup> Gol basaaladx ree bén ni gunabee ree lojdi, bén ni balüü ree lëjt xtiidx Dios. Gol been xgab xhienaag gubajn reeman gol binal tëe zi'c bililadx reeman Jesucrist.

<sup>8</sup> Abi' Jesucrist laagajcaman nieey, laagajcaman yan në zianczi. <sup>9</sup> Ad tiëbidi gusquiee graloz ni rulüü ree bejn lëjt, din ad najt reen zi'c rayal chinalidi Cristo. Mazri zagdxe gol gojp confianz xyudar Dios din guibandi xnejz luar chinalidi costumbr xcwent guial xhie zajc gawidi o xhie ad zajct gawidi, din costumbr guin ree achet yudar rüjn ree delant loj Dios.

<sup>10</sup> Dunuj ree raya'p ree tijb Bén güt por dunuj ree, laaman naj zi'c tijb xgon bejn por xtolaman, gon ni ad zajct gaw ree bixhioz rüjn ree sirv lën yadoo guin. <sup>11</sup> Bixhioz zobjloj guin, laaman rinë xrejn ree be ni rudëed ree bejn zi'c gon por xtol reeman, rinëman rejn guin lën yadoo lod rayal chinëman laan. Dxel ree begüt guin re'c reeb ro' guiedx lod achut zobj. <sup>12</sup> Ziangajc gojc con Jesucrist, ro' guiedx Jerusalén güjtaman par gusiaman bejn xtol reeman por xrejnman. <sup>13</sup> Zeel yunaal ree Jesucrist majsi gulëe reeman laaman luguiedx Jerusalén, në majsi xhietëez guialxtu o guialrzagdiaj yadüüd ree zi'c laaman. <sup>14</sup> Din loj guidxliuj guie ad raya'pt ree tijb guiedx lod ma nabajn ree tiblayaa, dunuj ree caylëjz ree lod yabajn ree tiblayaa. <sup>15</sup> Zeel con xyudar Jesucrist ad yacwëez ree yadëed ree quixtëe loj Dios, laan naj gon yadëed ree lojman, abi' zian raxhoobdol ree guial nayajc ree xbejnman. <sup>16</sup> Ad yayanladxidi güündi ni zagdxe güün tëe lasa'di yudar con ni gactzidi, din laa reen naj ni ruladx Dios.

<sup>17</sup> Gol bazoob xtiidx ree Bén rniabee lojdi, Bén rulüü ree lëjt xtiidx Dios. Gol gojp reeman respejt din laa reeman ruguiaa lëjt din chinalidi xtiidx Dios, guial ragbee reeman yadëed reeman cwent loj Dios. Gol been ni yabaanë reeman ad ni cu'nayat laa reeman, din guial ad ruzoobt diidx achet sirv güünan lëjt.

<sup>18</sup> Gol gurejdx gunab Dios por dunujn. Dunujn rayagbee guial achet ni mal cayguieenan, abi' rayënan guial gra ni yaguieenan, yaguieenan laan xnejz. <sup>19</sup> Rniaaban lojdi din cwedx guiniabidi Dios por naj, din guneeeman permis diob guialan din gazun con lëjt zatijb.

### *Diidx bigra ni bacan loj gui'ch guie*

<sup>20</sup> Dios bèn rabe'cdxe luxdoo ree bejn, bèn basban Jesucrist, rajpaman dunuj ree zi'c rajp tijb bejn xiil, por xguialgüjtaman zianczi ma raya'p ree nejz par yadxin ree loj Dios, <sup>21</sup> laaman gagnë lëjt par gra ni naj zagdxe din chile' güündi zi'c rënman. Laaman gagnë dunuj ree din yayajc ree zi'c rënman guial ma nayajc ree tijbzi con Jesucrist. ¡Laaman rayal yaya'p ree respejt zianczi! Amén.

<sup>22</sup> Compniar raliduladx ree Jesucrist, ad narooft gui'ch guie, per rniaaban lojdi ad yaleny'a'di por ree diidx ni canin lëjt cunen lëjt consejw. <sup>23</sup> Rugojn tēen lëjt guial ma barii dux compniar ree Timoteo ladxguiib abi' bal nayob gui'taman niz guie, dxel du gropan yo'p yudganajn lëjt.

<sup>24</sup> Gol bagajpdioz gra ree bèn rniabee lojdi bèn ni rulüü ree lëjt, në gra ree dux compniar ree bèn rliladx ree Jesucrist. Abi' ree bèn Italia rugajpdioz reeman lëjt.

<sup>25</sup> Dios güünle' gradi. Amén

## Gui'ch bacaa Santiaaw

### *Rxhiaal Santiaaw xtiidx Dios*

<sup>1</sup> Naj naj Santiaaw, cayünan xchiin Dios në xchiin Dad Jesucrist, rugajpdiozan gra ree bën naj xdiaa Israel, nare'chidi guidib guidxliuj.

### *Quiarguejn zëed loj Dios*

<sup>2</sup> Gradi compniar raliduladx ree Jesucrist, rnin lëjt, gol babaa majsi xhietëez loj guialrzagdiaj tédidi. <sup>3</sup> Lëjt ragbee, chi rdëdidi gralojn guial rliladxidi Dad Jesucrist, zian rusiididi gapidi pasens. <sup>4</sup> Per gol been naguiejn güün pasens guin lëjt yudar din gaquidi zi'c rën Dios, gusnuudi loj xnejzaman, chitëë guiyaadxidi xhienin.

<sup>5</sup> Bal chu lëjt riaadx chu' mazri xquiarguejn, gol gunab xquiarguejndi loj Dios. Laaman gunee gra ni riaadxidi, ad zabexuutaman guneeman laan. <sup>6</sup> Per rayal chililadxidi guial guneeman laan, ad rayalt chu' nawëëguidi, din bën ru nawëëg luxdoo naj zi'c xtüjp nijsdoo ni rinë bi ni guiezi. <sup>7</sup> Bën naj zian ad cwëzidi gunee Dios ni guiniabidi, <sup>8</sup> din bën ru nawëëg, ad rüjntaman tijbzi xgab, ad rinal tëëtaman tijbzi nejz.

<sup>9</sup> Lëjt guial najdi bënprob gol babaa, din loj Dios najdi bën zobjloj. <sup>10</sup> Guiáad lëjt benrijcw, gol babaa guial ma ragbeedi achet lasajc guialrijcw loj Dios, din guialrijcw guin najn ni téd zi'c rdëd guiaa rial dajn. <sup>11</sup> Lëjt ragbee chi rbëe loj gubijdx gojl, dxel rucwiidxan gui'xh, rba'y ree xguiaan, dxel ad nixtri rguienan. Ziangajc benrijcw yu' dxej guiëtaman majsi galay gra ree ni rajpaman.

### *Bën rdaan ree rdëd loj guialrzagdiaj*

<sup>12</sup> Chabaa bën rzudxi'ch loj xnejz Dios rdaan tëëman xhietëez rzajcaman guial rliladxaman Jesucrist. Chi ma gudaanman loj guialrzagdiaj, tia'man coron rayalaman, laan naj guialnaban tiblayaa ni cwëb Dios yazaladxaman loj ree bën rën laaman.

<sup>13</sup> Bal chu rüjn xgab güün ni mal, ad najtan ni naladxaman guial Dios rudxe' xgab guin guijcaman. Din ad yu't dxej guiën Dios güünman ni mal, ni'quid rgu' tëëtaman xgab guijc bejn güünman ni mal. <sup>14</sup> Xixgabmal gajc bejn rudëe laaman gan güünman ni mal. <sup>15</sup> Zeel por xgabmal guin rüjn bejn dol, dxel chi ma rniabee dol guin laaman, stijbzi xcasti Dios rayalaman.

<sup>16</sup> Gradi compniar raliduladx ree Jesucrist, diidxli rënan lëjt, ad gusquiee lëjt gajc. <sup>17</sup> Graczi xgab zagdxe në gra ni za'c zëed loj Dios, bën been gra ree bajl yu' xanyabaa. Ad yu't dxej guidxaaman, zianczi rüjnman ni zagdxe.

<sup>18</sup> Guial guyënman, zeel baneeman guialnaban tiblayaa duloj ree, guial ma raliduladx ree xtiidxaman, din yayajc ree zi'c ree bin yaloj yaca'man loj gra ree ni beenman. <sup>19</sup> Zeel yan ma ragbeedi nine ree.

### *Rayal yasa'n ree gra ni mal riga' loj guidxliuj*

Rënan lëjt, zeel rnin lojdi gradi compniar raliduladx ree Jesucrist: Gol guzujsin din gucaagdiajguidi, ad yoobladxidi guial guinieedi ni'qui guial yalendi, <sup>20</sup> din bën ralen ad zajct güünman ni rën Dios. <sup>21</sup> Zeel gol gulëeladx gra ni ad najt zagdxe në gra ni mal riga' loj guidxliuj guie, gol gojc bënchaawladx, gol bazoob xtiidx Dios ni ma bacaagdiajguidi, din laan yabëe lëjt loj dol. <sup>22</sup> Per gol been zi'c rëb xtiidxaman, ad aal rucaagdiajgzidan, chitëë gusquiee lëjt gajc. <sup>23</sup> Din bën rucaagdiajgzidi laan abi' ad rüjntaman zi'c ma bacaagdiajgaman, najman zi'c tijb bën ruguiaa loj guiaawajn, <sup>24</sup> per chi ma ziaman, rayanladxaman xhienaag naj lojman. <sup>25</sup> Per bën ad rayanladxt ni bacaagdiajgaman rüjnman naguiejn chignia'man xtiidx Dios mazri, din laan nayaaloj rabëe tëën dunuj ree loj dol. Rzudxi'chaman loj nejz guin, rüjn tëëman ni rën Dios. Bën güün zian chu' luxdooan zagdxe por ni cayünman.

<sup>26</sup> Bal chudi naladx zinalidi xnejz Dios zagdx per ad rajptidi cudad xhienin guinieedi, cusquiee lëjt gajc, dxel achet lasajc guial naladxidi zinalidi xnejz Dios. <sup>27</sup> Din par dux Dad ree Dios bën zinal xnejzaman zagdx naj bën rüjn yudar xindo bizëjb ree në ree béngunaa bizëjb chi rzagdiaj reeman, rajp tëëman cudad chitëë yabaman loj ni mal riga' loj guidxliuj.

## 2

### *Ad rayalt yalej ree loj ree bejn*

<sup>1</sup> Gradi compniar raliduladx ree Jesucrist bën rniabee, ad rayalt cwedi loj ree bejn. <sup>2</sup> Yaguie'ch ree, chu' tijb bejn lod rado'pidi, najcwaman lajd zagdx yu' tëë guiibnil or yaaman, chu' tëë tijb bënprob najcwaman lajd senci, <sup>3</sup> abi' mazri güüncwentidi bën najcw lajd zagdx guin, guiëbidi lojman: “Gurej guie, laan naj luar zagdx”, guiáad loj bënprob guin guiëbidi: “Yagaj guzuli o gurej luyuj zii ya.” <sup>4</sup> Chi rüjndi zian, ¿nid cabedi bejn loj gajquidi ya?, ¿nid rula'chidi ya chi rüjndi gra ree xgabmal guin? <sup>5</sup> Gradi compniar raliduladx ree Jesucrist, rënan lëjt, gol bacaagdiajg nine: Dios gule bën naj ree bënprob loj guidxliuj din chililadx da't reeman laaman, din yayal reeman lod rniabeeman zi'c cwëbaman loj ree bën rën laaman. <sup>6</sup> Guiáad lëjt rusa'n xtudi bënprob ree. Wen, ¿id benrijcw guin ree rusagzi lëjt ya rudxig tëë reeman lëjt loj guxtis? <sup>7</sup> ¿Id laagajc reeman rnieeguijdx Jesucrist ya, bën naj bënlasajc? Zi'c najman Xi'n Dios, ziangajc najdi xi'n Dios, guial nuchajguidi laaman.

<sup>8</sup> Bal walidi rüjndi ni ca loj xley Dios, zi'c ca loj xtiidxaman ni rëb: “Guyën bejn ree zi'c rën lüj gajc”, dxel zagdxequi cayüjndi. <sup>9</sup> Per bal mazri rüjncwentidi tijb bejn guial loj stijbaman, dxel ma cayüjndi dol, ma rajpidi dol guial ad rüjntidi cumplid xley Dios. <sup>10</sup> Din bal chutëëz zinal gra ni ca loj ley guin per ad rüjntaman tijb ni rayal güünman, ma cusaglojman guidib ley guin. <sup>11</sup> Dios gajc rëb: “Ad sunël xinguaaaw ren o béngunaa ren”, rëb tëëman: “Ad gugüjtil bejn.” Per bal id za'nël xinguaaaw o béngunaa ren ya per rugüjtil, dxel ma cusaglojl xley Dios. <sup>12</sup> Zeel gol gunee gol been tëë zi'c ree bën yadëed cwent diidxli loj Dios por xtiidxaman ni rabëë dunuj ree loj dol. <sup>13</sup> Din bën ad rayat ree lasa', ad zayat Dios laa reeman dxej güün xguialguxtisaman. Per bën raya ree lasa' ad najtan ni guidxeb reeman dxej guin.

### *Royal yaguieen ree ni rën Dios*

<sup>14</sup> Zeel rnin lëjt, ¿xhie sirv güün bal chu guiëb, rliladxan Dios, abi' ad rüjntaman ni rënman? ¿Wen, guialzi rliladxaman ya gacaman perdon? <sup>15</sup> Yaguie'ch ree, tijb dux compniar ree, bën rliladx Jesucrist, najman xinguaaaw o béngunaa ya, guiyaadx xabaman con ni gawaman, <sup>16</sup> abi' guiëb tijb lëjt loj reeman: “Yaguiajdi zagdx, gawidi zagdx ad gagnajl tëëdi.” Per bal id rudëedi ni riaadx reeman, ¿xhieci gan guiëbidi zian? <sup>17</sup> Ziangajc rzajc bën rëb rliladx Dios abi' ad rüjntaman ni rënman, achet lasajc guial rëbaman rliladxaman laaman.

<sup>18</sup> Xt zajc chu na lojl: “Lüj na rliladxil Dios, guiáad naj rünan ni rënman.” Yan balüü naj guial rliladxil laaman guial ad rüjntil ni rënman, guiáad naj gulün guial rliladxan guial rünan zi'c rënman. <sup>19</sup> Zagdx rüjnl bal rliladxil yu' tijbzi Dios, per në ree xindxab rliladx zian, abi' xt rnij reex guial rdxeb reex. <sup>20</sup> Zeel ad bal natontil, bignia' achet lasajc guial chililadx bejn Dios bal id rüjnman ni rënman. <sup>21</sup> Basaaladx, dux béngulal ree Abraham, bayagbee Dios laaman zi'c bën ad beent dol, guial beenman ni guyën Dios, chi rëbaman lojman din nugüjt xi'nman Isaac nudëë tëëman laax zi'c gon lojman. <sup>22</sup> Ma qui ruguiaal, guial bililadxaman, zeel beenman ni guyën Dios. Guial beenman zian, zeel biguien guial diidxli bililadxaman laaman. <sup>23</sup> Zian gojc cumplid ni ca loj xtiidx Dios, lod rëb: “Bililadx Abraham Dios, zeel bayagbeeman laaman zi'c bën ad beent dol”, bayagbee tëë ree bejn laaman zi'c tijb xmiw Dios.

<sup>24</sup> ¿Ma bignia'di yan ya? Rayagbee Dios bejn zi'c tijb bèn ad wayüjnt dol guial rüjnman ni rënman, ad guialzi rëbtaman rliladxaman laaman. <sup>25</sup> Ziangajc gojc con tijb bèn brii laj Rahab, bèn goc béngunaa dxuudx, bayagbee Dios laaman zi'c bèn ad beent dol guial beenman ni rën Dios, chi badëed lidxaman baquie'chloj tio'p ree bèn Israel we ladxaman biquiaa reeman xhienaag chu' ree xsuldaad reeman, been tēeman laa reeman yudar persi zia reeman nejz ren. <sup>26</sup> Din bèn achet xsprijt ad zajct guibanman. Ziangajc rzajc tijb bèn rliladx Dios: bal id züjnman zi'c rënman, achet lasajc guial rëbaman rliladxaman laaman.

### 3

#### *Du lüdx ree naj zi'c tijb luar lod guidxa ni mal*

<sup>1</sup> Gradi compniar raliduladx ree Jesucrist, rnin lëjt: Ad bal ziendi guiën gac mextr gulüü xtiidx Dios, din ma ragbeedi, dunujn guial ralüün xtiidxaman, mazri zro' naj guialguxtis ni güün Dios con dunujn bal id zaguieenan zi'c rayal. <sup>2</sup> Du graczi ree rüjn xhietëez dolan gan yu' dxej, per bal chu lëjt ad rüjnt dol ni'qui tijb diidxguijdx ad ririi tēet ro'di, najdi bèn naya delant loj Dios, rajc tēe rniabee lëjt gajc. <sup>3</sup> Lëjt ragbee, chi ralu' ree fren ro' ree way din che reeb lod rayën ree, zian raguieen ree gan ranabee reeb. <sup>4</sup> Ziangajc ree barcw, majsi narooob reen, majsi por mazt rucadxaa bidoxh laa reen, per con tijb guiibdobëz ni la timón, con laan ma zajc chinë bejn laan lod rëntzaman. <sup>5</sup> Ziangajc naj du lüdx ree, najn ni dobëz, per narooob guialquia rüjnman. Najn zi'c tijb guij dobëz, per majsi najn ni dobëz, rüjnman guialquia narooob ruze'can dajn narooob. <sup>6</sup> Du lüdx ree naj zi'c tijb guij, zajc yanee nē' reen ganax ni mal yu' loj guidxliuj. Bal id zaya'p ree cudad, du lüdx gajc ree guxhiin dunuj ree, dxel zianczi grii diidx zēed loj xindxab du ro' ree. <sup>7</sup> Rayagbee ree guial graloz ree bedoxh zajc gagnadoo, xt nē ree be rzuj nē ree bëel nētēe ree be yu' loj nijs, yan ma gognadoo reeb por ree bénguidxliuj. <sup>8</sup> Per lüdx bejn achut wayüjn gan nabee laan, najn zi'c tijb ni ad zajct gagnadoo, zi'c tijb ni guidxa venen rugüjt. <sup>9</sup> Con du lüdx ree ranee ree diidx zagdxe par dux Dad ree Dios, abi' con laagajcan raneeguijdx ree bejn, bèn been gajc Dios zi'c najman. <sup>10</sup> Gradi compniar raliduladx ree Jesucrist, du ro' ree ririi diidx zagdxe nē diidxguijdx, per ad rayalt gacan zian. <sup>11</sup> Lëjt ragbee, lod rajch nijs zagdxe ad zajct grii nijs naxij, <sup>12</sup> ad zajc tēet tia aceitunas loj yag higo, ad za zajct tia higo loj yag uv, ad zajc tēet grii nijs zagdxe lod ririi nijs naxij.

#### *Ni rüjn bèn ca' quiarguiejn rudëe Dios*

<sup>13</sup> Bal chu lëjt naladx rajc rignia' tēe gra xtiidx Dios, rayal gacaman bënchaawladx guiban tēeman zi'c rayal, zian guiguien guial yu' xquiarguiejnman. <sup>14</sup> Per bal guidxa guialnadëdloj luxdoodi rën tēedi gra par lëjt gajc din gaquidi mazri bèn zobjloj, ad güündi benro' guial rajquidi xtiidx Dios, cusquieezidi guial rüjndi zian. <sup>15</sup> Lasa' quiarguiejn guin ad Diost rudëe laan, xquiarguiejn gajc bèn riga' loj guidxliuj guien, zēed tēen loj xindxab. <sup>16</sup> Din lod yu' guialnadëdloj lod yu' tēe bèn rën gra par laagajcaman, ni yu' wadijl nē gra loj ni mal. <sup>17</sup> Per bèn rajp quiarguiejn runeë Dios, yaloz rüjnman naguiejn guibanman zagdxe lojman, gac tēeman bèn ad rüjnt nabë, nē benza'c, gap tēeman bejn ree pasens, yayaman bejn ree, gacaman benza'c con ree bejn, ad zabejtaman loj ree bejn güün tēeman cumplid ni guinieeman. <sup>18</sup> Bèn rüjn ree naguiejn ribajn sin wadijl, raguuil reeman mod guinieenë reeman bejn zagdxe, zian rbajn reeman zi'c rën Dios.

### 4

<sup>1</sup> ¿Ban zēed guial ralen lasa'di nē guial rdilidi? ¿Id zēedan por xgabmal ni rüjndi ya? <sup>2</sup> Rzëëbladxidi gapidi ni ad rajptidi, zeel xt rugüjt lasa'di din tia'di ni rëndi, rdëdloj tēedi bejn ree, abi' bal id zajc gapidi ni rajp reeman, dxel ralen lasa'di abi' rdilidi. Per diidxliczi ad rajptidi ni rëndi, din ad rniabtidan loj Dios. <sup>3</sup> Abi' bal rniabidan, ad runeetaman laan, din ad rniabtidan par güündi ni zagdxe, rënzidan din guibandi zi'ctzi

rëndi. <sup>4</sup> ¡Bén rusquiee! ¿Id ragbeedi ya guial chu rinal ni mal yu' loj guidxliuj ad zajct gaquidi xmiw Dios? Zeel bal chu rën chinal ni mal guin, laagajcaman za' contr Dios. <sup>5</sup> Ad ca xlia'tzi loj xtiidxaman lod rëb: “Badxe' xSprijt Dios du luxdoo ree, rënman Sprijt guin, xt neelojman laaman.” <sup>6</sup> Dád zro' naj yudar rüjn Dios dunuj ree, zi'c ca loj xtiidxaman lod rëb: “Dád naza'c Dios con ree bén rüjn naya lojman, per ad rüjn cwenttaman bén rüjn ree benro'.” <sup>7</sup> Zeel gol bazoob xtiidx Dios, ad gudëedi mod güün xindxab lëjt gan, zian chiquiedix loj xnejzidi. <sup>8</sup> Gol gubig loj dux Dad ree Dios din güün cwentaman lëjt, guiáad lëjt béndol, gol bariica loj dol, guiáad ree bén yu' nawëeg luxdoo guial chinalidi xnejz Dios, con guidib luxdoodi gol binalaman. <sup>9</sup> Gol guyu xgab, gol guyu naya gol biin tée por xtolidi, luar guxijdxidi gol biin, luar chu' luxdoodi nix gol guyu naya, <sup>10</sup> gol been naya loj Dios, din guiliesaman xvaloridi.

### *Ad rayalt yala'ch du lasa' ree*

<sup>11</sup> Gradi compniar raliduladx ree Jesucrist, ad bal rnieeguijdx lasa'di, din bén rnieeguijdx o bén rula'ch lasa', ma caneeguijdxaman cula'ch téeëman xley Dios. Bal rula'chidan, ad cayüntridi zi'c rniabeen, lëjtl ma canabee laan. <sup>12</sup> Per tijbzi Dios basa'n ley guin rüjn téeëman guialguxtis, laaman ca' guialrniabee guial yabëëman në guial gunijtaman. Per lüj, ¿chu najl zeel rula'chil bejn?

### *Dux guialnaban ree naj ni tibrajtzi*

<sup>13</sup> Yan gol bacaagdiajg nine lëjt bén rëb ree: “Yan o guixie ya yo'n loj tijb ciuda, ni yadxu'n tib ijz, yaguieenan negojs lod yaguieenan gan zro' da't milia.” <sup>14</sup> Ni'quid ragbeetidi xhie gac guixie, din dux guialnaban ree naj zi'c tijb bëj rguien tibrajt, stibrajt ma gunidlojn. <sup>15</sup> Zagdxeli naj guiëbidi: “Bal gunee Dios dunujn guialnaban, yaguieenan nine o ni ni ya.” <sup>16</sup> Per lëjt mazri zinalidi xtiidx dxalidi, abi' laa reen naj ni mal. <sup>17</sup> Zeel bén ragbee xhienaag güünman ni zagdxabi' ad rüjntaman laan, ma cayünman dol.

## 5

### *Ni rüjn ree benrijcw*

<sup>1</sup> ¡Lëjt, najdi benrijcw! Gol bacaagdiajg nine, gol biin gol gurixdiaj tée, din ma zëed lod sagdiajdi, <sup>2</sup> tant zien ni rajpidi xt rxin reen, guiáad xabidi xt raw be laa reen. <sup>3</sup> Gra or në plajt ni rajpidi xt rzobëj reen, laagajc reen rulüü ni mal rüjndi, laagajc reen gac zi'c tijb bajl gustib lëjt. Ma zidyob güün Dios xguialguxtisaman, guiáad lëjt gule'cchaaw ni lasajc ree loj guidxliuj guie. <sup>4</sup> Gol baguiaa, laa ree bén been xchiindi canab din quixidi laa reeman, xt Dios bén ca' gra guialrniabee ma biguejn guial caygu' reeman guialquia. <sup>5</sup> Nabandi zi'ct rëndi, per cusni'szidi ni ad züjnt lëjt sirv chi guidxin dxej güün xguialguxtis Dios. <sup>6</sup> Din xt baguillidi mod persi bagüjtidi bén ad beent ree xhienin, abi' achet gojc nüjn reeman chitëë niëjt reeman.

### *Rayal yarejdx ree Dios yaya'p tée ree pasens*

<sup>7</sup> Gradi compniar raliduladx ree Jesucrist, gol gojp pasens xt dxej gui't dux Dad ree Jesucrist stijb, zi'c rdaan tijb bén rüjn dxiin dajn, rbëzaman guia yaloj xt guia bigra din yalesaman ni guxübinman. <sup>8</sup> Ziangajc lëjt gol gojp pasens, ad yalenyadi, din ma zidyob dxej gui't dux Dad ree Jesucrist.

<sup>9</sup> Rni téeën lëjt, ad yalenyadi në lasa'di, chitëë xhie casti yayalidi, din ma zidyob dxej güün xguialguxtis Dios. <sup>10</sup> Gol binal zi'c been ree bén badëë xtiidx Dios loj ree bejn, gojp reeman pasens gudaan tée reeman graloj guialrzagdiaj gudëd reeman. <sup>11</sup> Rayagbee ree guial xiquilbaa ree bén rdaan loj guialrzagdiaj. Ma biguejndi xcwent bén brii laj Job, xhienaag gudaanman chi guzagdiajman, ragbee téeëdi xhienaag beennë Dios laaman, chi gulox gudëdaman loj gra guialrzagdiaj guin, din Dios dád naza'caman raya téeëman bejn ree.

<sup>12</sup> Gol gojp cudad chi rüjndi xhie compromisan loj bejn, ad guza'tidi Dios o xhie stijbnin ya, chitëe gudëed Dios lëjt casti, zagdxeli naj guinieedi diidxli güün tée xtiidxidi cumplid.

<sup>13</sup> Bal chu lëjt cazagdiaj, gol gurejdx Dios, o bal yu' luxdoodi zagdxe, gol biil par laaman. <sup>14</sup> Guiáad bal ragxuu tijb lëjt, rayal guinieedi bën rniabee ree lëjt guial najdi bën rliladx Jesucrist, din cwedx reeman Dios por laaman quiëeb tée reeman laaman sejt por laj Jesucrist. <sup>15</sup> Bal cwedx reeman Dios con guidib luxdoo reeman, zayajc bënragxuu guin, yales Dios laaman, abi' bal xhie dolan ma beenman, güünman laan perdon. <sup>16</sup> Zeel gol baxhoobdol loj lasa'di gol gurejdx tée Dios por lasa'di din yayajquidi, din tijb bën zinal xnejz Dios, chi rbejdxaman laaman, rüjn cwentaman laaman. <sup>17</sup> Zi'c bën brii laj Elías bën badëe xtiidx Dios loj ree bejn, gojcaman bénguidxliuj zi'cgajc dunuj ree, abi' chí gudi'n gunabaman loj Dios guial ad zalt guia, dxel ad golt guia choon ijz garol. <sup>18</sup> Chi guredxaman Dios zatijb, zianz bazuloj gol guia, dxel bayu guialnaza'c loj guidxliuj.

<sup>19</sup> Gradi compniar raliduladx ree Jesucrist, bal chu lëjt rarii loj xnejz Dios abi' por stijb bejn yayejquidi, <sup>20</sup> gol gogbee guial chutëez bën rasiejc tijb bëndol loj nejz zagdxe chitëe chinalaman ni mal, laaman rabëe bëndol guin loj casti, abi' majsi ma beenman zien dol, gran gac perdon.

## Gui'ch yaløj bacaa San Pedr

### *Rxhiaal Bëd xtiidx Dios loj ree bejn*

<sup>1</sup> Naj Bëd, najn tijb xi apóstol Jesucrist, laaman guxhaal naj, cucan gui'ch guie par lëjt najdi bën bire'ch gra lad abi' zøjbidi guiedx riga' ree niz Ponto, Galacia, Capadocia, Asia Menor në Bitinia. <sup>2</sup> Ma gulej dux Dad ree Dios lëjt diizd gocli, zi'c goc xixgabaman. xSprijtaman gulëëca lëjt din guzobidi diidx gac tõe luxdoodi naya delant lojman por xrejñ Jesucrist. Zro' güünle' Dios lëjt yabe'cdxe tõeñman luxdoodi.

### *Ni ralëjz ree gunee Dios*

<sup>3</sup> Quixtõe Dios xdad Dad Jesucrist, guial rayaman dunuj ree. Laaman bachaa mod nabajn ree guial baban Jesucrist loj ree bengüt, zeel zro' naj ni ralëjz ree gunee Dios. <sup>4</sup> Abi' yaca' ree ni nagu'chaawaman xanyabaa par dunuj ree, laan naj ni naya gra tiamp, ad rxintan, ad yu' tõeet dxej nitan. <sup>5</sup> Guial rliladxidi Dios, laaman rniaj lëjt con xguialrniabeeman, din chi guidxin dxej nit guidxliuj, dxel gagbee gra bejn guial ma beenman lëjt perdon.

<sup>6</sup> Zeel rabaa da'tidi majsi tødidi graloj guialrzagdiaj tiblädëd, <sup>7</sup> din por guialrzagdiaj guin guiguien chu diidxli rliladx Dios, zi'c rüjñnë reeman or, rudëed reeman laan loj bajl din gagbee reeman bal najn ganax or. Or guin najn ni rñidloj, zeel mazri lasajc guialrliladx laaman, bal chu taan xhietõeet loj guialrzagdiajn, din ad yu't dxej nit xguialrliladxidi. Abi' dxej gui't Jesucrist stijb, lasa' guialrliladx guin naj ni ruladx Dios, guiáad ree bejn në ree anjl guza't reeman laaman zagdxë gap tõe reeman laaman respejt guial rusnuu rliladxidi laaman.

<sup>8</sup> Ad waguiaatidi Jesucrist per rëndi laaman, abi' yan rliladxidi laaman majsi ad waguiaatidi laaman, dád nix yu' luxdoodi abi' tant nix yu' luxdoodi, xt ad radxejlt xhienaag guiëbidi, <sup>9</sup> din lëjt ragbee, guial rliladxidi, ma nüjn Dios lëjt cwent zi'c ree bën achet xtol.

<sup>10</sup> Diizd gocli, bën badëe ree xtiidx Dios loj ree bejn basiid reeman been tõe reeman naguiejn niagbee reeman xhienaag güün Dios bejn ree perdon, abi' rëb reeman xhienin güün Dios par lëjt guial najman benza'c. <sup>11</sup> Por xSprijt Jesucrist gogbee reeman diizd gocli guial sagdiajman zianz qui gapraman guialrniabee, dxel been reeman naguiejn niagbee reeman chu benan sac zian goc tõe gac zian. <sup>12</sup> Per balüü Dios laa reeman guial ni gunee reeman ad najtan par laagajc reeman, najn par lëjt, abi' yan lëjt ma rignia'di ni guin ree por ree bën catie'ch xtiidxza'c Jesucrist por xguialrniabee Sprijt zëed xanyabaa. Në ree anjl ma rën nejzdoog gagbee nine ree.

### *Ze rayal guiban ree xi'n Dios*

<sup>13</sup> Zeel gol guzusin gol bastëdguien tõe, con guidib luxdoodi gol gulëjz ni gunee Dios guial najman benza'c, dxej gui't Jesucrist stijb. <sup>14</sup> Zi'c ree xi'n Dios nazobdiidx reeman, ad bal guibanridi zi'c gubandi gocli chi gadidi güünbee laaman. <sup>15</sup> Laaman gule lëjt, zeel gol been naguiejn guibandi naya delant lojman, din laaman naj bën naya nali. <sup>16</sup> Zi'c rëb loj xtiidxaman: “Gol gubajn naya delant lon, din naj naj bën naya nali.” <sup>17</sup> Yan bal rnieedi Dios “Dad”, bën rüjn xguialguxtis tibloj, bal conin rüjn tijb gaj bejn, rayal gapidi laaman respejt guidib tiamp guibandi loj guidxliuj guie. <sup>18</sup> Din lëjt ragbee guial babëeman lëjt loj costumbr ni basa'nnë ree xbëngulalidi lëjt, costumbr ni ad rüjnt ree sirv, abi' lëjt ragbee guial gojx din yariidi loj reen, per ad gojxt con ree ni rñijt, zi'c or o plajt ya, <sup>19</sup> gojx con xrejñ za'cdxoon Jesucrist ni guxhie'man loj crüz chi gütaman zi'c tijb xiil zagdxë be ad naxint, be rugüjt reeman par Dios por xtol ree bejn. <sup>20</sup> Diizd chi gad guidxliuj gacchaaw, mal gulej Dios laaman din sacaman zian, yan ma guzajcaman



zian guial rënman lëjt. <sup>21</sup> Zeel por laaman rliladxidi Dios bën basban laaman badëe tëëman guialrniabee lojman, yan con guidib luxdoodi ma rliladxidi Dios rbëz tëedi ni guneeman.

<sup>22</sup> Yan, guial ma ruzoobidi xtiidxaman ni naj diidxli, ma naya luxdoodi delant lojman din guiën lasa'di zi'c rayal, zeel gol guyën lasa'di con guidib luxdoodi. <sup>23</sup> Din ma bidxaa mod nabandi, zi'c rulüü gojlidi stijb, abi' guialnaban zinalidi ad zëëdtan por tijb bën nit, zëëdan por xtiidx Dios, diidx naban, diidx ni ad zanijt, <sup>24</sup> din loj xtiidxaman rëb:

Gra bénguidxliuj naj zi'c gui'xh dajn,  
guiáad ni rajp reeman naj zi'c xguiaa gui'xh guin.

Rbidx gui'xh guin, abi' riajb xguiaan,

<sup>25</sup> per xtiidx Dios ad yu't dxej nitan.

Abi' laan naj xtiidxza'c Jesucrist ni ma biguiejndi.

## 2

<sup>1</sup> Zeel gol basa'n gra ni mal, gra ni rusquiee, ad bal rüjnzidi, gol basa'n guialnadëdloj në guial rnieeguijdx lasa'di. <sup>2</sup> Zi'c re'c ree xindo quigojlnejzri dud, zian gol been naguiejn chignia'di xtiidx Dios, din gusnuu gagbeedi mazri xhienaag rayal guibandi din yabandi loj ree bengüt con gra ree bën nuchajg Jesucrist chi gui'taman stijb, <sup>3</sup> bal walidi ma ragbeedi guial naj Dios benza'c.

### *Jesucrist naj zi'c guiaj naban*

<sup>4</sup> Gol bibig loj Jesucrist, laaman naj zi'c guiaj naban. Been ree bénguidxliuj laaman tibläd, per par Dios najman bën lasajc, laaman gule laaman. <sup>5</sup> Ziangajc lëjt, guial ma rliladxidi Jesucrist, najdi zi'c ree guiaj naban ni cayajcnë xyadoo Dios. Najdi bixhioz naya luxdoo rüjn sirv lojman, din nabandi zi'c ruladx Dios, laan naj ni rudëedi lojman zi'c gon por Jesucrist. <sup>6</sup> Rëb loj xtiidx Dios:

Gol baguiaa, guzoban tijb guiaj zagdxe luguiedx Jerusalén.

Laan naj guiaj nabee, guiaj zøjbloj, nilasajc tëe.

Bal chu chililadx laan,

ad yu't dxej yaya'nxtuman.

<sup>7</sup> Par lëjt, guial rliladxidi Jesucrist, laaman naj zi'c guiaj lasajc da't. Per par ree bën ad rliladxt rajc cumplid ni rëb loj xtiidx Dios, lod rëb:

Guiaj ni gulëëgo'n ree bën rüjn yu,

yan laan naj guiaj zøjbloj.

<sup>8</sup> Rajc tëe cumplid ni rëb stib lajt loj xtiidxaman, rëban:

Laaman naj guiaj rirejl guia' ree bejn,

abi' rureeyujn laa reeman.

Rzajc reeman zian, guial ad ruzoobt reeman xtiidx Dios, zian rajc ni rëbaman xcwent reeman.

<sup>9</sup> Per lëjt naj bën guleman, najdi bixhioz rüjn ree sirv lojman, guial najman dux rey ree. Lëjt ma naya luxdoo delant lojman, abi' gulejman lëjt din chigtie'chidi diidx xcwent ree ni zagdxe rüjnman. Laaman babëe lëjt loj nejz mal, persi bagu'man lëjt loj xnejz za'cdxoonman. <sup>10</sup> Gocli achutczí najdi, per yan ma najdi xbejn Dios. Gocli ad ragbeetidi guial raya Dios lëjt, per yan ma ragbeedi.

### *Zi'c rayal guiban ben rliladx Dios*

<sup>11</sup> Gradi compniar raliduladx ree Jesucrist, rniaaban favor lojdi, zi'c zio'p ree loj guidxliuj guie tibrajtzi, ad bal tiëbidi güün ree xgab mal lëjt gan, din xgab mal guin ree rüjn naguiejn zianczi din gusa'n ree bejn xnejz Dios. <sup>12</sup> Gol gubajn zagdxe loj ree bën ad nünbeet laaman, zian majsi rnieeguijdx reeman lëjt yan, rëb reeman najdi benmal, per chi guguiaa reeman guial zagdxe naj ni cayüjndi, dxel guza't reeman laaman zagdxe, dxej ni yadëed reeman cwent lojman.

<sup>13</sup> Guial rliladxidi Dad Jesucrist, gol bazoob xtiidx gra ree bén rniabee loj guidxliuj guie. Gol bazoob xtiidx pristent rniabee xnaciondi <sup>14</sup> nē xtiidx gobernador bén rxhiaalaman din gudēedaman casti bén rüjn ree ni mal guilies tēēman xvalor ree bén rüjn ni zagdxe. <sup>15</sup> Din rēn Dios güündi ni zagdxe ree din gucwēēzidi ro' ree bentont ad rignia't abi' rnieeguijdx reeman lējt.

<sup>16</sup> Zajc güündi zi'c rēndi, per ad por ziantzi güündi ni naj ni mal, gol been zi'c rayal güün ree xbejn Dios. <sup>17</sup> Gol gojp respejt gra bejn zi'c rayal, gol guyēn ree bén rliladx Jesucrist, gol bidxeb Dios, gol gojp tēē respejt pristent rniabee xnaciondi.

### *Gol gudaan loj guialrzagdiaj*

<sup>18</sup> Lējt bén naj ree mojs, gol bazoob xtiidx ree xpatrondi, gol gojp tēē reeman respejt, ad bén najtzi ree benza'c raya tēē reeman lējt, nē ree bén naj bendxuudx. <sup>19</sup> Din zagdxe naj guial chu rdaan loj guialrzagdiaj, majsi ad rayaltaman laan, rdaanman laan guial rēnman güünman ni ruladx Dios. <sup>20</sup> Bal chu lējt rzagdiaj por ni mal rüjnndi, achet lasajcan, per bal rzagdiajdi por ni zagdxe rüjnndi abi' rdaandi loj guialrzagdiaj guin, laan lasajc delant loj Dios, <sup>21</sup> din par zian gulejman lējt. Guzagdiaj Jesucrist por lējt, zian balüūman lējt xhienaag guibandi din chinalidi xnejzaman. <sup>22</sup> Ad yu'tczi dxej beenman dol abi' ni'qui tijb diidx rusquiee ad briit ro'man. <sup>23</sup> Chi rēb reeman diidxguijdx lojman, ad badxi'taman laan con diidxguijdx, chi basagzi reeman laaman, ad rēbtaman loj reeman guial yaguijx reeman ni cayüjnnē reeman laaman, graczan basa'nman loj Dios bén rüjn xguialguxtis zi'c rayal. <sup>24</sup> Guzagdiaj Jesucrist loj crüz por dux tol ree persi babēēman dunuj ree lojn din yabajn ree zi'c rēn Dios, abi' por lod bidxeelguijdxaman ma bayünman du luxdoo ree naya. <sup>25</sup> Gocli gubajndi zi'c xiil rzēēb, per yan ma najdi xbejn Jesucrist bén rēn lējt rajp tēēman lējt zi'c tijb bén rajp xiil.

## 3

### *Zi'c rayal guiban ree bén ca' lasa'*

<sup>1</sup> Nē lējt bēngunaa ma yu' ree lacheel, gol bazoob xtiidx lacheelidi, din bal chu lacheelidi ad rliladxt xtiidx Dios, per chi guguaa reex zi'c nabandi, dxel guililadx reex. Ad rüjnt naguiejn xhie guiēbidi loj reex, <sup>2</sup> chililadx reex guial guguaa reex nabandi zi'c rayal rajp tēēdi laa reex respejt. <sup>3</sup> Chi rzujchaawidi, ad bal rdēdlaj rüjnchaaw guidxguijquidi ni'qui guial güündi ujs ganax ni or o gacwidi ganax lajd lasajc. <sup>4</sup> Mazri zagdxe naj guial güündi naguiejn gac luxdoodi naya delant loj Dios, gol gojc benza'c nē bén chaawladx, din laan ad yu't dxej nitan, abi' laan mazri lasajc delant lojman. <sup>5</sup> Din zian gubajn ree bēngunaa binal ree xnejzaman goc da't, bililadx reeman laaman bazoob tēē reeman xtiidx lacheel reeman. <sup>6</sup> Zian been Sara, bazoob xtiidx lacheelaman Abraham, abi' guneeman laaman “Dad”. Gaquidi zi'c xi'n Sara, bal rüjnndi ni zagdxe sin guialrdxeb.

<sup>7</sup> Ziangajc lējt xinguaaw, gol gubajnnē lacheelidi zagdxe, gol gojp reeman respejt ad guialzi najt reeman bén nada, rayal güündi zian guial nē reeman rayal guialnaban tiblayaa razaladx Dios, guial najman benza'c. Zian gol gubajn, chitēē xhie gudxe' nawēēg lējt chi cwedx guiniabidi laaman.

### *Xhie rayal güündi chi xhie güün nē reeman lējt*

<sup>8</sup> Zeel rnin loj gradi: Gol gubajnnē lasa'di zagdxe, gol bachajg lasa'di, gol been xgab tijbzi, gol guyēn lasa'di zi'c rayal, gol gojc benza'c nē bén chaawladx. <sup>9</sup> Ad yadxi'di ni mal rüjn ree bejn lējt, ad yadxi'di diidxguijdx ni na reeman lojdi, gol gurejdx Dios din gagnēman laa reeman, din Dios gulej lējt par gagnēman lējt. <sup>10</sup> Din rēb loj xtiidxaman: Bén rēn guiban zagdxe chu' tēē luxdooan zagdxe, rayal gapaman cudad ad guinieeman diidxguijdx ad guinee tēēman diidx rusquiee.

11 Cwëëladxaman ni mal, güünman ni zagdxë güün tääman naguiejn guibannë ree lasa'man zagdxë, zian rayal guibanman zianczi.

12 Din dux Dad ree Dios rniaj bën rüjn ree ni rënman rüjncwent tääman xtiidx reeman chi rbejdx reeman laaman, per ralenman bën rüjn ree ni mal.

13 Achut güün lëjt ni mal, bal cayüjndi naguiejn güündi ni zagdxë. 14 Per xiquilbaadi bal cusagdiaj bejn lëjt guial cayüjndi ni zagdxë. Ad chu'di xgab ad guidxeb täädi por zian, 15 gol gojp respejt gol badxe'guijc tää dux Dad ree Jesucrist. Gol guzujsin din yadxi'di xtiidx ree bën guiniabdiidx lojdi xcwent ni rliladxidi, per gol badxi' xtiidx reeman zagdxë con diidx zagdxë ree. 16 Gol gubajn zagdxë din guiguien guial achet ni mal yu'guijquidi din yaya'nxtu ree bën rnieeguijdx lëjt, guial rüjndi ni zagdxë rliladx täädi Jesucrist. 17 Mazri zagdxë naj sagdiaj bejn guial güünman ni zagdxë, bal zian rën Dios, luar sagdiajman guial güünman ni mal.

18 Din xt Jesucrist guzagdiaj, güjtaman tib voltzi por dux tol ree majsi ad beentaman dol, per güjtaman duxcwent ree nayajc ree bëndol, zian guxhalaman nejz din gac yadxin ree loj Dios, güjtaman zi'c bénguidxliuj per babanman por xSprijtaman. 19 Chi gadaman yaban, wej xSprijtaman bigneenëman xsprijt ree bengüt lod nayaaw reeman. 20 Sprijt guin ree naj xsprijt ree bën ad bazoobt diidx tiamp gulal, chi guban Noé loj guidxliuj guie, chi gop Dios laa reeman pasens la'tgaj cayüjn Noé barcw, abi' xhujnzi bejn gulaa loj nijs banijt guidxliuj tiamp zii. 21 Nijs guin naj zi'c guialrirobnijs ni rulüü guial ma nayajc ree perdon. Guialrirobnijs guin ad rënt guiëban guial najn par gusian dux cuerp ree, rulüün guial caynaab ree loj Dios din yaya dux quiarguiejn ree, guial ma raya'p ree guialnaban cüb guial baban Jesucrist loj ree bengüt, 22 bën bayë'p xanyabaa abi' za'man xladbee Dios lod canabeeman anjl ree në ree sprijt ca' guialrniabee.

## 4

### *Gol beennë quiarguiejn ni banee Dios dxiin*

1 Zeel zi'c gudëd Jesucrist loj guialrzagdiaj, në lëjt rayal taan lojn. Din por guialrzagdiaj guin rüjn bejn dol tibläd, 2 din güünman zi'c rën Dios guidib xguialnabanman luar güünman zi'c naj xixgabaman. 3 Xchej da't gubajndi zi'c naban ree bën ad nünbeet Dios, gubajndi zi'ctzi guyëndi, beendi zi'ctzi gojc xixgab dxuudxidi, gu'di, badxajg lasa'di persi beendi nidxuux ree, guzüdx da'tidi, guyën täädi ni ad najt ree Dios, laan naj ni rbijxhlädx Dios. 4 Per yan guial ad zinaltridi zi'c naban ree bën naban zian, zeel radxa loj reeman, rnieeguijdx tää reeman lëjt. 5 Per rayal yadëed reeman cwent loj Dios bën za' par güün xguialguxtisaman con ree bën naban në ree bën ma güjt. 6 Din në ree bën ma güjt biguiejn xtiidx Dios chi guban reeman loj guidxliuj guie, din guiban reeman loj Dios majsi par ree bénguidxliuj ma güjt reeman.

7 Ma zidyob dxej nit guidxliuj, zeel gol bastëdguien gol guzujsin tää din cwedx guiniabidi Dios con guidib luxdoodi. 8 Ad yayanladxidi guial guiën lasa'di zi'c rayal, din bën rën lasa' rüjnman perdon majsi xhietëöz rüjnnë reeman laaman. 9 Bal yu' tijb xcompniaridi rniab luar lidxidi din yaya'nman, gol badëedsii lidxidi con guidib luxdoodi ad yalenyadi. 10 Loj tijb gajdi ma banee Dios quiarguiejn din güündi ni rayal güündi. Zeel gol been lasa'di yudar con ni rajc rüjndi, din guiguien guial cayüjndi zi'c rayal con quiarguiejn ni bazaladxaman lojdi. 11 Bal chu lëjt ca' quiarguiejn par gulüü xcompniaridi, rayal guinieedi ni naj diidxli zi'c tal rëb loj xtiidx Dios, ziangajc bën ca' quiarguiejn par güünman yudar dux compniar ree, rayal güünman laan con gojl razaladx Dios lojman. Gra ni cayüjndi, gol beenan din guza't ree bejn Dios zagdxë por Jesucrist, bën rayal respejt në guialrniabee zianczi. Amén.

### *Gol gudaan gra guialrzagdiaj*

<sup>12</sup> Gradi compniar raliduladx ree Jesucrist, rēnan lējt, zeel rnin lojdi, ad ru nawēēguidi guial zro' naj loj guialrzagdiaj cadēdidi, din laan naj zi'c prueb par lējt. Ad rudi xgab chexc zeel cazajquidi zian. <sup>13</sup> Gol babaali chi cazagdiajdi zi'c guzagdiaj Jesucrist, din ziangajc yabaadi chi guguaiaadi xbianiman dxej gui'taman stijb. <sup>14</sup> Xiquilbaadi bal chu na diidxguijdx lojdi guial zinalidi Jesucrist, din gra dxejczy za'nē xSprijt Dios lējt, bēn ca' guialrniabee. <sup>15</sup> Achet lasajc bal cazagdiajdi guial bagūjtidi bejn, o por guialgubaan, o por guial rūjndi ni mal o guial rudi lod ad rayaltidi. <sup>16</sup> Per bal chu cazagdiaj guial zinalaman xnejz Jesucrist, ad rayalt yatuman, rayal gudēēman quixtēē loj Dios guial ma najman xbejn Jesucrist.

<sup>17</sup> Gol gogbee, guial rtiējb Dios rzagdiaj ree xbejnman din guzoob reeman diidx, abi' bal dunuj ree nayajc ree xbejnman cayza'c ree zian, xhieczi naag sac ree bēn ad rēnt guzoob xtiidxza'caman. <sup>18</sup> Nacli ree bēn zinal xnejz Dios nawēēg naj guial yaguij reeman xanyabaa, piorli ree bēndol bēn ad nūnbeet ree Dios, xhieczi naag naj luar lod yayal reeman. <sup>19</sup> Zeel bēn cazagdiaj ree zi'c naj xixgab Dios, rayal gusnuu gūūn reeman ni zagdxe gusa'n tēē reeman gran loj Dios, laaman gagnē laa reeman. Laaman bazaladx guialnaban rūjn tēēman zi'c rayal.

## 5

### *Consejw par ree bēn rliladx Jesucrist*

<sup>1</sup> Yan rēnan gudēdan consejw loj ree bēn rniabee ree lojdi, naj guial ca'n guialrniabee zi'cgajc laa reeman, naj tēēn testiw xcwent ni guzagdiaj Jesucrist, zi'cgajc laa reeman guguijan xbianiman dxej gui'taman stijb, zeel rēnan guiēn nine ree loj reeman. <sup>2</sup> Rnin lojdi, gol gunaj ree xbejn Jesucrist, bēn rayal ree gulūūdi din gusnuu chinal reeman xnejz Dios. Ad gūūndi dxiin guin guialzi ragbeedi rayal gūūndi laan, gol beenan guial yu'di gan gūūndi laan, con guidib luxdoodi gol beenan, ad bal gūūndi laan guialzi rzēēbladxidi milia. <sup>3</sup> Ad guial ca'tidi guialrniabee din nabeedi zi'c tal rēndi, rayal guibandi zagdxe din guguaiaa ree bēn rliladx Jesucrist din guiban reeman zian, <sup>4</sup> din chi gui't bēn rniabee dunuj ree stijb, dxel guneeman tijb niza'cdxoon ni ad yu't dxej nit.

<sup>5</sup> Ziangajc lējt xinguiag, gol bazoob xtiidx ree bengol. Gradi zi'c xinguiag ree zi'c ree bengol, gol been naya gol bazoob tēē xtiidx ree xcompniaridi, din:

Ralen da't Dios bēn rūjn ree benro',

per dād benza'can con ree bēn rūjn naya.

<sup>6</sup> Zeel gol been naya loj Dios, bēn ca' gra guialrniabee, din guiliesaman xvaloridi chi guidxin dxej. <sup>7</sup> Gol basa'n gra xgab yu'di loj Dios, din laaman rniaj lējt.

<sup>8</sup> Gol guzujsin, gol gojp cudad, din xindxab xin ralen da't lējt, za'x zi'c tijb beedx rliaan, rguuilix chu gūūnx gan. <sup>9</sup> Zeel ad tiēbidi gūūnx lējt gan, gol guzujdxi'ch loj ni rliladxidi, din ragbeedi guial zi'c cazagdiajdi, ziangajc cazagdiaj ree bēn rliladx Jesucrist guidib guidxliuj. <sup>10</sup> Per chi ma gudēdidi ta'n loj guialrzagdiaj, dxel gagnē Dios din gusnuu gūūndi naguiejn guibandi zi'c rēnman, su tēēdi rejs, sudxi'chidi, gap tēēdi segur guial zinalidi xnejzaman. Laagajcaman naj Dios cayūjn dunuj ree yudar loj gra ni cayza'c ree, abi' ma gulejman dunuj ree din yayal ree tiblayaa lod rniabeeman guial nachajg ree Jesucrist.

<sup>11</sup> Laaman rayal respejt, din tijbzi laaman ca' guialrniabee zianczi. Amén.

### *Diidx bigra ca ree loj gui'ch guie*

<sup>12</sup> Silvan, tijb dux compniar ree, bēn ragbeen naban zi'c rēn Dios, laaman been gui'ch guie din ganin lojdi tio'p choon diidx, par gunen lējt consejw nētēē par gugojnan lējt guial diidxli rēn Dios lējt, zeel gol basnuu gol guyēnman gol guyēn tēē lasa'di. <sup>13</sup> Bēn rliladx ree Jesucrist, bēn ma gulej Dios zi'cgajc lējt, bēn zojb ree Babilonia, rugajpdioz reeman lējt. Nē Marcw xin nūnan zi'c da xi'nan rugajpdioz lējt. <sup>14</sup> Guial rēn lasa'di,

gol bagajpdioz lasa'di xhietëez horan radxaaglojdi. Yabe'cdxe Dios luxdoodi guial ma nuchajguidi Jesucrist.

## Gui'ch barojp bacaa San Pedr

### *Rxhiaal Bëd xtiidx Dios loj ree bejn*

<sup>1</sup> Naj, Simón Bëd, najn tijb xi apóstol Jesucrist rün tëen sirv lojman, cucan gui'ch guie par lëjt guial rajpidi lasa'gajc guialrliladx za'cdxoon ni raya'pan, yan guial ma naya du luxdoo ree por ni been Jesucrist, Dios raliduladx ree, bën rabëë bejn ree loj dol. <sup>2</sup> Güünle' Dios lëjt mazri, yabe'cdxe tëëman luxdoodi guial ma nünbeedi laaman nê dux Dad ree Jesucrist.

### *Zi'c rayal gac ree xbejn Jesucrist*

<sup>3</sup> Por xguialrniabee Dios ma baneeman gra ni rayaadx ree, din yaya'p ree guialnaban tiblayaa, yabajn tëë ree naya delant lojman, din ma naguieenbee ree Dios bën gule dunuj ree guial ca'man guialrniabee naj tëëman benza'c. <sup>4</sup> Zeel ma beenman promejs du loj ree, promejs narooob ree ni lasajc ree, abi' por laa reen ma yu' xSprijt Dios luxdoodi, ma been tëëdi tiblax gra ree ni ad rüjnt sirv nê ree ni mal riga' loj guidxliuj guie. <sup>5</sup> Zeel gol been naguiejn por guialrliladx ni rajpidi gol gubajn zagdxe, din guial guibandi zagdxe, dxel mazri ma gagbeedi xhienaag guibandi. <sup>6</sup> Abi' guial gagbeedi xhienaag guibandi, ma zajc gucweëz xixgabmalidi, abi' guial gucweëzidi xgabmal guin ree, ma zajc gapidi pasens, abi' guial gapidi pasens, ma zajc guibandi naya delant loj Dios, <sup>7</sup> dxel guial guibandi naya delant lojman, ma zajc guiën lasa'di, abi' guial guiën lasa'di, ma zajc guiëndi gra ree bejn.

<sup>8</sup> Bal yu'guijquidi nine ree cusnuu tëë cayüjndi naguiejn guibandi zian, dxel ad naban xlia'tzidi, ad beenbee xlia' tëëtidi dux Dad ree Jesucrist. <sup>9</sup> Per bën ad rüjnt naguiejn guiban zian, laaman naj zi'c tijb bën lutia'p o zi'c tijb bën ad ruguiaat zijt, ma bayanladxaman guial biquied Dios xtolaman ni beenman guia'xchej. <sup>10</sup> Zeel rnin lojdi, compniar raliduladx ree Jesucrist, zi'c ma bacaabee Dios lëjt ma gulej tëëman lëjt, gol been naguiejn gol guzudxi'ch loj xnejzaman, din bal sudxi'chidi, ad zayajbtridi loj dol. <sup>11</sup> Zian gapidi nejz nali din chu'di lod rniabee dux Dad ree Jesucrist tiblayaa, bën babëë dunuj ree loj dol.

<sup>12</sup> Zeel zianczi ganin nine ree lojdi din gusaaladxidi laa reen, majsi ma ragbeedan, majsi ma zinal tëëdi ni diidxli ni ma bacaagdiaguidi. <sup>13</sup> La'tgaj naban loj guidxliuj guie, naladxan rayal gunen consejw lojdi con ree diidx guin. <sup>14</sup> Din por dux Dad ree Jesucrist ma gogbeen guial ma zidyob dxej yazaan loj guidxliuj guie.

<sup>15</sup> Zeel cayün da'tan naguiejn rnienë'n lëjt, din gusaaladxidi da diidxan majsi ma güjtan.

### *Bën baguiaa ree xguialrniabee Jesucrist*

<sup>16</sup> Chi ranan lojdi xhienaag naj xguialrniabee Jesucrist xhie tëë naag gui'taman stijb, ad balëëguijctan ni banan lojdi. Din con quijb du lojn baguiaa xbianiman <sup>17</sup> chi biguien cha' Dios diidz xanyabaa, gulesaman xvaloraman baza't tëëman laaman zagdxe, rëbaman: “Xin guie naj da xi'nan, rënan laax rabaanë' tëëman laax.” <sup>18</sup> Abi' dunujn nayajc bën biguien cha' Dios diidz xanyabaa chi nadxu'në'n Jesús ruguia' zii, lod biguien xbianiman.

<sup>19</sup> Zianan zeel mazri raliduladxan ni rëb ree bën badëëd xtiidx Dios loj ree bejn, zeel zagdxe naj bal yu'guijquidi ni rëb reeman, din xtiidx reeman naj zi'c tijb guij rusni lod nacay la'tgaj rareguiaa. Yan ziangajc lëjt chaawladx cusnuu cayagbeedi xcwent Dios xt chi gui't Jesucrist stijb, bën naj bajl rusni par dunuj ree, dxel ma gagbeedi graczan zi'c tal naj. <sup>20</sup> Per gol gogbee guial ni'qui tijb xtiidx Dios ad zajc chignia' bejn por xixgabzaman. <sup>21</sup> Din bën badëëd ree xtiidx Dios loj ree bejn, ad guneeet reeman xtiidxaman zi'c goczi xixgab reeman, gunee reeman ni basajb xSprijt Dios guijc reeman.

## 2

*Bén ruliüü ree diidx rusquiee  
(Judas 4-13)*

<sup>1</sup> Zian zi'c guyu ree bén rusquiee loj ree bén Israel tiamp gulal rëb reeman rudëed reeman xtiidx Dios loj ree bejn, ziangajc chu' ree bén rusquiee gulüü lëjt ni rusquiee ree, yaguiil reeman mod din gulüü reeman lëjt ni ad najt diidxli par gagdxadi. Ad zatiëjbt reeman nabee Jesucrist laa reeman, majsi baguijxaman xtol reeman, zeel ad zaglaat gunijt Dios laa reeman. <sup>2</sup> Per zien ree bejn chinal guiban nadxuudx zi'c naban reeman, abi' por laa reeman guinieeguijdx ree bejn xtiidxza'c Dios. <sup>3</sup> Abi' guial rzëëbladx reeman milia, yaguiil reeman xhie ni rusquiee gulüü reeman lëjt din tia' reeman xmiliadi, per ziangajc ad zalaat reeman loj xcasti Dios ni cabëz laa reeman, din diizd gocli mal yu' casti ni yayal ree bén rüjn zian.

<sup>4</sup> Ad beent Dios perdon anjl ad bazoobt ree xtiidxaman, guxhaalaman laa reeman gabijl, abi' nada'cw reeman lod nacay da't, cabëz reeman dxej güün xguialguxtisaman. <sup>5</sup> Ad been tëëtaman perdon benmal guyu ree tiamp gulal, banijtaman laa reeman con nijs. Tijbzi Noé bén balüü xhienaag chinal ree bejn xnejz Dios, laazaman naj bén gulaa con zagajdx ree bejn. <sup>6</sup> Ziangajc chi been xguialguxtis Dios con ree guiedx Sodoma në Gomorra, baze'caman laa reen xt bayajc reen cobdëj, abi' laan naj ejempl par ree bén guiban nadxuudx zi'c ree bén guiedx zii ree. <sup>7</sup> Per baslaa Dios bén brii laj Lot, bén guban zi'c rën Dios guyu tëëman xgab guial baguiaaman zi'c guban ree benmal guin. <sup>8</sup> Abi' guial gubajnman zagdx, zeel guixie guixie guyunaya da'taman por ree nidxuudx biguiejnman baguiaa tëëman been ree bén guin. <sup>9</sup> Rajc rüjn Dios yudar bén ruzoob ree xtiidxaman xhietëez loj prueb cadëd reeman, abi' ma naj xhie güünnëman benmal ree dxej güün xguialguxtisaman.

<sup>10</sup> Laan naj ni yayal ree bén naban zi'ctzi rën reeman, ad rënt reeman nabee Jesucrist laa reeman, dád nad reeman, ad ratut reeman, ad rdxeb tëët reeman rnieeguijdx reeman bén naj ree xianjl Dios. <sup>11</sup> Abi' ni'qui ree xianjl Dios, majsi rajp reeman mazri gojl në guialrniabee, per achet diidxguijdx rëb reeman lojman contr laa reeman.

<sup>12</sup> Lasa' ree bén guin naban reeman zi'c ree be, ad yu't xquiarguiejn reeman abi' rnieeguijdx reeman ni ad rignia't reeman, guidiblagaa rüjn reeman ni rëntzi reeman sin xgab. Zi'c ree be zëëdzi reeb loj guidxliuj guie par guiniaaz reeb din guiët reeb, ziangajc laa reeman por nidxuudx rüjn reeman ma cusëeb laagajc reeman, <sup>13</sup> abi' yaguijx reeman gra ni rüjnnë reeman bejn ree.

Rabaa da't reeman guial rüjn reeman ni dxuudx ree, ni natu ree.

Naj reeman zi'c tijb manch, ruxhiin reeman lanij rüjndi chi rawidi tijbzi, abi' rabaa da't reeman guial rusquiee reeman lëjt.

<sup>14</sup> Ad zajct guguaa reeman tijb béngunaa sin guial ad züjnt reeman xgabdxuudx, ad rucwëzt rüjn reeman dol rusquiee tëë reeman bén ad rignia'za'ct ree xtiidx Dios din güün reeman dol, abi' dád nasin reeman par güün reeman gan ni rzëëbladx reeman, laa reeman ma naj par yayal reeman xcasti Dios. <sup>15</sup> Ad zinaltri reeman xnejzaman, ma bidxaa zi'c naban reeman, ma zinal reeman ni been Balaam bén badëed xtiidx Dios loj ree bejn, xi'n bén brii laj Beor, chi guyënman nünjman gan milia por ni mal nünjman. <sup>16</sup> Per chi zëman ziguieenman ni mal guin, bacwëez Dios laaman, basneeman xburaman zi'c tijb bejn, zian bacwëez Dios xixgabtontaman.

<sup>17</sup> Yan bén rusquiee cuzat reen lojdi naj reeman zi'c bizë ni ad yu't nijs, zi'c zaj ni ad nët guia, zeel rayal reeman lod nacay da't lod ad yu' tëët dxej yarii reeman. <sup>18</sup> Ganax ree diidx nabë rü reeman, diidx ad rüjnt ree sirv, rëb reeman guial achet güünan guiban bejn zi'ctzi rënman, abi' zian rusquiee reeman bén qui cusa'nri ree nejzmal. <sup>19</sup> Rëb reeman guial achut rayal nabee bejn, per ad rignia't reeman guial nidxuudx rüjn reeman rniabee laa reeman, din graczi ni ad rajct rucwëez rüjn ree bejn, laan naj ni

rniabee laa reeman. <sup>20</sup> Chi ma beenbee ree bejn dux Dad ree Jesucrist guial laaman naj bèn babëë dunuj ree loj dol ma basa'n tää reeman nidxuudx yu' ree loj guidxliuj guie, abi' rtiëjb reeman rniabeen laa reeman stijb, dxel piorli guiban reeman guial chi gad reeman güünbee laaman. <sup>21</sup> Zagdxeli naj ad nüjnbeet reeman xnejzaman, guial beenbee reeman laan abi' basa'n reeman xtiidxa'caman ni ma biguiejn reeman. <sup>22</sup> Con laa reeman rajc cumplid diidx ni rëb: “Rayaw bë'cw ni bayëbib, guiáad cüch qui gojzri con nijs naya rayub loj nizbajn.”

### 3

#### *Ni gac chi gui't Jesucrist stijb*

<sup>1</sup> Gradi compniar raliduladx ree Jesucrist, rën da'tan lëjt, nine naj gui'ch rarojp rxhialan par lëjt. Loj grop gui'ch guie cayünan naguiejn ganenë'n lëjt din güündi xgab zi'c rayal. <sup>2</sup> Gol basaaladx ni rëb ree bèn badëed xtiidx Dios loj ree bejn tiamp gulal, gol basaaladx tää xtiidx dux Dad ree Jesucrist, bèn babëë dunuj ree loj dol, xtiidxaman ni balüü ree apóstoles lëjt.

<sup>3</sup> Gol badxe'guijc, chi ma zidyob nit guidxliuj, chu' ree bèn guze' lëjt abi' guiban reeman zi'ctzi rën reeman. <sup>4</sup> Abi' na reeman lojdi: “¿Gon promejs been Jesucrist guial gui'taman stijb? Ma güjt gra ree dux bégulal ree, abi' graczi ni yu' loj guidxliuj guie sta naj gajc diidz chi gocchaaw guidxliuj.” <sup>5</sup> Na reeman zian, guial ad rënt reeman yayagbee reeman guial diidz tiamp gulal mal yu' xanyabaa në guidxliuj abi' por xguialrniabee Dios brii guidxliuj guin loj nijs. <sup>6</sup> Gojc xchej, dxel con nijs gajc banijt Dios bèn gocli ree. <sup>7</sup> Per xanyabaa në guidxliuj raguiaa ree yan, ma naj guial gunijt Dios laa reen con bajl por xguialrniabeeman dxej ni güün xguialguxtisaman con ree bèn ad ruzoobt xtiidxaman.

<sup>8</sup> Zeel rnin lojdi, compniar raliduladx ree Jesucrist, ad bal yayanladxidi, guial par dux Dad ree Dios tib dxej naj zi'c timil ijz, guiáad timil ijz naj zi'c tib dxej.

<sup>9</sup> Ad cayaglaataman par güün cumplid xpromejsaman, zi'c naladx garol ree bejn, rajpaman pasens, din ad rëntaman guial nit bejn delant lojman, rënman guial gra bejn yayagbee laaman.

<sup>10</sup> Zi'c tal ri't tijb bégubaan achut ragbee gui'taman, zian guidxin dxej gui't dux Dad ree Jesucrist stijb, nadxeb da't gac naquie' chi nidloj xanyabaa, guiáad gra ree ni yu' xanyabaa guin, gunijt Dios laa reen con bajl, në guidxliuj con gra ree ni yu' lojn, con bajl gunijt Dios laa reen.

<sup>11</sup> Yan, guial ma ragbeedi xhienaag nit guidxliuj, rüjn naguiejn guibandi naya sin dol zi'c rën Dios. <sup>12</sup> Con gan gol gulëjz dxej ni ma gulejman, dxej ni guze'caman xanyabaa në gra ni yu' xanyabaa, zi'cgajc guidxliuj con gra ni yu' lojn, con bajl gajc nit reen dxej zii. <sup>13</sup> Per dunuj ree caylëjz ree xanyabaa cüb në guidxliuj cüb zi'c ma been Dios promejs, ni gac zi'c tal rënman.

<sup>14</sup> Zeel rnin lojdi compniar raliduladx ree Jesucrist, la'tgaj cabëzidi gac ree ni guin, gol been da't naguiejn din guidxaagloj Dios lëjt naya sin dol, riga'dxenë tää lasa'di. <sup>15</sup> Gol badxe'guijc, guial dux Dad ree Dios cayajpaman dunuj ree pasens, din yaya'p ree tiamp yasa'n dux tol ree din yaye'c ree lojman. Abi' dux compniar ree Pab, bèn rayën da't ree, ziangajc naman lojdi loj ree xtiidxaman, zi'ctzi naj quiarguiejn ni bazaladx Dios lojman. <sup>16</sup> Gra loj ree xtiidxaman naman lojdi ni canin lojdi. Per yu' lajt loj ree gui'ch guin lod naj nawëëg guial chignia' bejn, dxel bèn ad rajctczi ree në ree bèn ad zinalt xtiidx Dios con guidib luxdoo, ruchaa reeman ni rën guiëb xtiidx Pab, zi'cgajc rüjnnë reeman ni zëed ree loj xtiidx Dios, zeel laagajc reeman cusëëb laa reeman.

<sup>17</sup> Compniar raliduladx ree Jesucrist, rënan lëjt, zeel yan guial ma ragbeedi nine ree, gol gojp cudad chitëë güün ree bèn rën ree gusquiee lëjt gan, chitëë gucwëëz sudxi'chidi loj xnejz Dios. <sup>18</sup> Zagdxeli gol been naguiejn güünbeedi mazri dux Dad ree Jesucrist, bèn



baguijx dux tol ree, gol been tëë naguiejn gagbeedi mazri guial rën da'taman dunuj ree.  
Laaman rayal respejt gra tiampczi.

## Gui'ch yaløj bacaa San Juan

### *Jesucrist runee guialnaban tiblayaa*

<sup>1</sup> Gui'ch guie naj par gugojnan lëjt xcwent Jesucrist, bén mal yu' gocli diizd chi gad guidxliuj gacchaaw. Ma bacaagdiajgan, ma baguiaan ni beenman, baguiaan laaman zagdxé, ma baqui' tēen laaman con quijb du yaan. Laaman naj bén runee guialnaban, <sup>2</sup> ma bi'taman loj guidxliuj, ma baguiaan laaman, dunujn nayajc testiw ragojn tēen lëjt xcwentaman. Laaman naj bén runee guialnaban tiblayaa, najman bén guzunē Dios diizd gocli bi't tēeman loj guidxliuj. <sup>3</sup> Zeel ragojnan lëjt ni ma baguiaan ni ma baguiejn tēen din gaquidi tijbzi con dunujn zi'c nayajcan tijbzi con dux Dad ree Dios con xi'nman Jesucrist. <sup>4</sup> Ragojnan lëjt nine ree loj gui'ch guie din chu' luxdoodi zagdxé, zi'c yu' du luxdoon zagdxé.

### *Royal yanaab ree loj Dios din güünman dux tol ree perdon*

<sup>5</sup> Ni ne naj ni balüü Jesucrist dunujn, yan ragojnan lëjt guial naj Dios biani, achetzi dol nabannēman. <sup>6</sup> Bal yaguie'ch ree nadxu'nē' reeman abi' zunaal gajc ree nejz mal rasquiee ree ad zunaalt ree diidxli.

<sup>7</sup> Per bal yunaal ree xbiani Dios zi'c za'man, guial achet xtolaman, dxel ma nayajc ree tijbzi con du lasa' ree. Abi' xrejn xi'nman Jesucrist chiquied gra dux tol ree.

<sup>8</sup> Bal yaguie'ch ree achet dux tol ree yu', rasquiee dunuj gajc ree, ad cayguie'ch tēt ree diidxli. <sup>9</sup> Per bal yaxhoobdol ree loj Dios, rayagbee ree zagdxé guial güünman ni naman, güünman perdon dux tol ree, chiquied tēeman gra ni mal yu' du luxdoo ree. <sup>10</sup> Per bal yaguie'ch ree ad waguieent ree dol, raguieen reeman zi'c bénrusquiee, ad raliduladx tēt ree xtiidxaman.

## 2

### *Bén rēn Dios royal guzoobaman xtiidxaman*

<sup>1</sup> Xi'n, rucan nine ree par lëjt chitēē güündi dol. Per bal chu lëjt rüjn dol, raya'p ree bén guiniee por dunuj ree loj Dios, laaman naj Jesucrist bén ad wayüjntczi dol. <sup>2</sup> Por xguialgüjtaman naj dux tol ree perdon, abi' ad dux toltzi ree, nē gra xtol ree bénguidxliuj.

<sup>3</sup> Bal razoob ree xtiidx Dios, zian raya'p ree segur guial ma naguieenbee reeman zagdxé. <sup>4</sup> Per bal chu rēb: "Nünbeen Dios", abi' ad ruzoobtaman xtiidxaman, rusquieeman, din ad walit ni rēbaman. <sup>5</sup> Per bénruzoob xtiidxaman, diidxli rēnman laaman con guidib luxdooman, zian rayagbee ree guial ma nabajnnē' reeman. <sup>6</sup> Bén rēb nabannēman Dios, royal guibanman zi'c guban Jesucrist.

### *Bén zinal ree xnejz Dios rēn lasa' reeman*

<sup>7</sup> Gradi compniar raliduladx ree Jesucrist, diidx canin lojdi yan ad diidx cübt reen, xtiidx gajc Jesucristan ni ma biguiejndi diizd yaløj, laagajcanan canin lojdi yan. <sup>8</sup> Per canin laa reen zi'c rulüü diidx cüb reen, din por Jesucrist nē por lëjt ma rguien guial ma cusa'ndi ni mal abi' zinalidi ni zagdxé.

<sup>9</sup> Bal chu rēb zinal xnejz Dios abi' ralen lasa'man, sta zinalaman nejz mal. <sup>10</sup> Bén rēn lasa' zinalaman xnejz Dios, abi' ma naj nawēēg guial güün dol laaman gan. <sup>11</sup> Per bén ralen lasa', nabanman loj nejz mal, ad ragbeetaman ban cheman, din nejz mal guin basa'n laaman zi'c tijb bénlutia'p.

<sup>12</sup> Xi'n, rucan gui'ch guie par lëjt, din ma gojc xtolidi perdon por xguialrniabee Jesucrist. <sup>13</sup> Cucan nine ree par lëjt guial najdi bén ma rignia' mazri chunin naj Jesucrist. Bén ma yu' gocli diizd chi gad guidxliuj gacchaaw, cucan ni ne ree par lëjt bén ma rignia' ta'n chunin naj Jesucrist din ma beendi gan ad züjntidi ni zēed loj xindxab, cuca tēen nine

ree par lëjt bén qui guzulojri ree cayignia' chunin naj Jesucrist din ma nünbeedi dux Dad ree Dios.

<sup>14</sup> Bacan nine ree par lëjt guial ma rignia'di mazri chunin naj Jesucrist bén ma yu' gocli diizd chi gad guidxliuj gacchaaw, baca tēen nine ree par lëjt guial ma rignia'di ta'n chunin naj Jesucrist, din za'dxi'chidi zinal tēedi diidxli xnejz Dios con guidib luxdoodi, ma been tēedi gan ad zūjntidi ni zēed loj xinxab.

<sup>15</sup> Ad sēēbladixidi ni ad najt zagdxē ni rūjn ree bejn loj guidxliuj, bal chu rēn mazri ni riga' loj guidxliuj guie, ad rēntaman dux Dad ree Dios, <sup>16</sup> din achetdzi ni mal yu' loj guidxliuj guie zēed loj Dios, ni rajc gajc loj guidxliuj guien, rūjn reeman zi'c naj xixgab dxuudx reeman, rzēēbladix reeman gap reeman gra ni ruguiaa reeman, rūjn tēē reeman benro' por gra ni rajp reeman. <sup>17</sup> Per guidxliuj guie yu' dxej nitan con guidib ni mal yu' lojn, per bén naban zi'c rēn Dios rajpaman guialnaban tiblyayaa con laaman.

### *Yunaal ree ni naj diidxli*

<sup>18</sup> Xi'n, rnin lojdi ma zidyob dxej nit guidxliuj, din ma biguiejndi guial rayal gui't tijb bén su contr Jesucrist guiēb tēeman laaman naj Jesucrist. Yan zien ree bén ralen laaman ma balūüloj, zeel rayagbee ree guial ma zidyob dxej nit guidxliuj. <sup>19</sup> Bén ralen ree Jesucrist, duloj gajc ree brii reeman nayajc ree bén rliladx Jesucrist, per diidxliczi ad najt reeman dux bejn ree, din bal niajc reeman dux bejn ree, naya'n reeman duloj ree guial raliladx ree Jesucrist, per gojc nine din guiguien guial ad grat reeman naj dux bejn ree. <sup>20</sup> Jesucrist banee xSprijt Dios lojdi, abi' por laaman gradi ma ragbee ni naj diidxli. <sup>21</sup> Cucan nine par lëjt, ad guial ad ragbeetidi conin naj ni diidxli, cucanan guial ma ragbeedan, abi' lëjt ragbee guial ni'qui tijb ni rusquiee ad zajct gui't loj ni diidxli guin. <sup>22</sup> Yan, ¿chu naj bén rusquiee? Bén rusquiee naj bén rēb guial ad Jesúst naj bén guxhaal Dios loj guidxliuj. Bén rēb zian naj zi'cgajc naj bén za' contr Jesucrist guial ad rliladxtaman Dios ni'qui xi'nman Jesucrist. <sup>23</sup> Din chutēēz bén rēb guial ad najt Jesucrist Xi'n Dios, laaman ad nünbeet dux Dad ree Dios, per bén rēb Jesucrist naj Xi'n Dios nē dux Dad ree Dios nünbeeman.

<sup>24</sup> Zeel gol binal diidx ma biguiejndi diizd guia'xchej chi bililadxidi Jesucrist. Bal chinalidi diidx guin ree, dxel ziz nabannēquidi dux Dad ree Dios con xi'nman Jesucrist.

<sup>25</sup> Abi' ni ma rēb Jesucrist gunee man naj guialnaban tiblyayaa.

<sup>26</sup> Cucan diidx guie ree par lëjt por ree bén rēn gusquiee lëjt. <sup>27</sup> Per nabannēdi xSprijt Dios, bén banee Jesucrist, ad riaadxtidi bén gulūü lëjt, din Sprijt guin gajc rulūü lëjt gra, abi' ganax diidxli ad ni rusquieet, zeel gol gubajn zi'c rniabeeman din gusnuu gaquidi tijbzi con Jesucrist.

<sup>28</sup> Yan rnin lojdi xi'n, gol binal xnejz Jesucrist, chitēē yadxeb ree chi gulūülojman, ad zaya'nxtu tēēt ree lojman chi gui'taman. <sup>29</sup> Lëjt ragbee guial rūjn Dios zi'c rayal, ragbee tēedi guial graczi ree bén rūjn zi'c rayal, laa reeman naj xi'n Dios.

## 3

### *Bén naj ree xi'n Dios*

<sup>1</sup> Gol been xgab, plact rēn dux Dad ree Dios dunuj ree, zeel balēē dulaj ree xi'n Dios, abi' waliczan nayajc ree xi'nman. Per bén ad zinalt ree xnejz Dios ad nünbeet reeman dunuj ree zi'c xi'nman, din ad nünbeet reeman laaman. <sup>2</sup> Gradi compniar raliduladx ree Jesucrist, rēnan lëjt, rnin lojdi: Ma nayajc ree xi'n Dios, majsi ad rayagbeet ree xhienaag yayajc ree chi gui't Jesucrist stijb, per raya'p ree segur guial yayajc ree zi'c najman, din xt nadxel yaguaa ree diidxliczi xhienaag najman. <sup>3</sup> Graczi ree bén rliladx guial gac zian, rūjn reeman nagueijn guiban reeman naya delant loj Dios zi'c laaman, guial achet xtolaman.

<sup>4</sup> Per graczi ree bén ad zinalt ni rniabee Dios, cayūjn reeman dol, din dol naj guial ad rūjnt reeman ni rniabeeman. <sup>5</sup> Lëjt ragbee guial bi't Jesucrist loj guidxliuj din

chiquiedaman xtol ree bejn, abi' laaman ad guyutczi dxej ad yu' tēēt dxej nūjnman dol. <sup>6</sup> Zeel bēn naj ree tijbzi con laaman rūjn reeman naguiejn ad rūjnt reeman dol, per graczi bēn rūjn dol zianczi ad wayignia't reeman chu najman, ad wayünbee tēēt reeman laaman. <sup>7</sup> Xi'n, ganin lējt, ad bal tiēbidi chu gusquiee lējt, din bēn cayūjn ni rēn Dios, laaman naya delant lojman zi'c naya Jesucrist delant lojman. <sup>8</sup> Per bēn yu' loj dol xbejn xindxaban, din xindxab rūjn dol diizd yaløj, abi' Jesús Xi'n Dios bi'taman loj guidxliuj par zianczi din gūnman gan loj xguialrniabee xindxab.

<sup>9</sup> Zeel ni'qui tijb ree bēn ma zinal xnejz Dios ad rusnuutri rūjn dol, din ma nabannēman Dios, ad rayal tēetri gūnman dol din ma najman xi'nman. <sup>10</sup> Laa rguien gajc chu reenin naj xi'n Dios chutēē reenin naj xi'n xindxab, din chutēēz ad rūjnt ni rēn Dios ad rēn tēēt lasa'man, dxel ad najtaman xi'n Dios.

### *Rayal yayēn du lasa' ree*

<sup>11</sup> Abi' lējt ma biguiejndi xtiidx Dios diizd guia'xchej guial rayal yayēn dulasa' ree. <sup>12</sup> Ad rayalt yaguieen ree zi'c been Caín, cwējbaman gunabee xindxab laaman, zeel bagūjt bijchaman. Caín been zian, din beenman ganax ni mal, guiáad bijchaman been ni zagdxe.

<sup>13</sup> Zeel gradi compniar raliduladx ree Jesucrist, ad gagdxadi bal yalen ree bénguidxliuj lējt guial ma zinalidi xnejz Dios. <sup>14</sup> Dunuj ree rayagbee guial ad nayajct ree zi'c bengüt par laaman, ma raya'p ree guialnaban delant lojman, guial rayēn du lasa' ree. Per bēn ad rēnt lasa', sta najman zi'c bengüt par Dios. <sup>15</sup> Graczi bēn ralen lasa' najman zi'c bēn rugūjt bejn, abi' lējt ragbee, tijb bēn rugūjt bejn ad rajptaman guialnaban tiblayaa delant loj Dios. <sup>16</sup> Ma rayagbee ree conin naj guial rēn lasa', guial gūjt Jesucrist por dunuj ree, yan ziangajc dunuj ree rayal yayēn dulasa' ree xt yayējt ree por laa reeman. <sup>17</sup> Per bal chu tijb dunuj ree ad riaadxt xhienin loj guidxliuj guie abi' ruguiaaman tijb bēn cayaadx laan abi' ad rūjntaman laaman yudar, dxel, ¿xhienaag guiēbaman guial rēnman Dios? <sup>18</sup> Xi'n, ganin lējt, ad con diidxtizi yaguie'ch ree guial rayēn dulasa' ree, rayal guiguien guial rayēn dulasa' ree por ni raguieen ree.

### *Raya'p ree segur guial za' nē Dios dunuj ree*

<sup>19</sup> Zian rayagbee ree cayzoob ree xtiidx Dios, abi' raya'p ree segur guial cayguieen ree ni rayal yaguieen ree delant lojman. <sup>20</sup> Per bal cayguieen ree zian abi' sta ragbee du luxdoo ree guial ad cayguieent ree zi'c rayal, rayal yayagbee ree guial Dios naj mazri benro' guial duloj ree, abi' laaman ragbee gra. <sup>21</sup> Zeel zi'c rēnan lējt rnin lojdi, bal ragbee du luxdoo ree guial cayguieen ree ni zagdxe, dxel raya'p ree segur guial cayguieen ree ni zagdxe delant loj Dios. <sup>22</sup> Laaman gunee graczi ni yanaab ree lojman guial razoob ree xtiidxaman ni rniabeeman, abi' raguieen ree naguiejn raguieen ree ni ruladxaman. <sup>23</sup> Ni ne naj ni rniabeeman yaguieen ree guial yaliduladx ree Jesucrist naj xi'nman yayēn tēē dulasa' ree zi'c gunabeeman dunuj ree. <sup>24</sup> Bēn rūjn ree ni rniabee Dios, laa reeman nabannē Dios abi' Dios nabannē laa reeman, rayagbee tēē ree guial za'man con dunuj ree por xSprijtaman bēn baneeman duloj ree.

## 4

### *Bēn ad rliladxt Jesucrist ad yu't xSprijt Dios luxdoo man*

<sup>1</sup> Gradi compniar raliduladx ree Jesucrist, rēnan lējt, rni tēēn lojdi: ad rliladxidi chutēēz bēn rēb rnieeman xtiidx Dios. Yaløj xgaj gol gogbee zagdxe bal wali reeman xtiidx Diosan rniee reeman o ad laatanan ya, din loj guidxliuj guie ziza zien ree bēn rusquiee, rēb reeman rniee reeman xtiidxaman. <sup>2</sup> Yan din gagbeedi chu reenin rniee xtiidx Dios: Laa reeman naj bēn rliladx guial Jesucrist bi't zi'c bénguidxliuj. Bēn rliladx ree zian yu' xSprijt Dios luxdoo reeman. <sup>3</sup> Per bēn ad rliladxt ree zian ad yu't xSprijtaman luxdoo reeman, laa reeman naj bēn ralen Jesucrist. Ma biguiejndi guial

rayal gui't tijb bèn su contr laaman. Abi' diizd yan ma za' sprijt guin guidxliuj, zeel zien ree bèn ralen Jesucrist ma yu' loj guidxliuj guie.

<sup>4</sup> Per lèjt xi'n ma najdi xi'n Dios, guiáad ree bèn ralen Jesucrist ad zajct güün reeman lèjt gan, din mazri narooob guialrniabee ca' bèn nabannè lèjt guial loj bèn nabannè bèn zinal ree nejz mal loj guidxliuj guie. <sup>5</sup> Bèn za' ree contr Jesucrist rüjn reeman xgab tijbzi ni riga' loj guidxliuj guie rniee reeman, guiáad ree bèn ad rliladxt Jesucrist rüjncwent reeman ni rëb reeman. <sup>6</sup> Per dunuj ree ma nayajc ree xbejn Dios, abi' bèn ma nünbee ree Dios rucaagdiajg reeman ni ranee ree, guiáad ree bèn ad nünbeet Dios ni'quid rüjncwentt reeman ni ranee ree, zian rayagbee ree chu nabannè xSprijt Dios bèn rulüü dunuj ree diidxli chutëenin nabannè sprijt ni rulüü ganax ni rusquiee.

### *Rën Dios dunuj ree*

<sup>7</sup> Rënan lèjt, rnin lojdi rayal yayën dulasa' ree, din guialrën lasa' zëed loj Dios. Gra bèn rën lasa' naj xi'n Dios nünbee tëe reeman laaman. <sup>8</sup> Abi' bèn ad rënt lasa' ad wayünbeetaman Dios, din guialrën lasa' zëed loj Dios. <sup>9</sup> Balüü Dios guial rënman dunuj ree, din majsi tijbzi xi'nman Jesucrist, guxhaalaman laaman guidxliuj din yaya'p ree guialnaban delant loj Dios por laaman. <sup>10</sup> Rën Dios dunuj ree. Ad dunujt ree bayën laaman, yaløj laaman guyën dunuj ree, zeel guxhaal xi'nman Jesucrist persi güjtaman por dux tol ree, zeel ma yu' perdon par dunuj ree. <sup>11</sup> Rënan lèjt, zeel rnin lojdi, zi'c rën Dios dunuj ree, ziangajc rayal yayën dulasa' ree. <sup>12</sup> Majsi achut waguiaa laaman, per bal rayën dulasa' ree, nabannè'qui ree Dios, abi' diidxli rayën reeman.

<sup>13</sup> Dunuj ree rayagbee guial nabannè' reeman abi' laaman za' con dunuj ree, din ma banee xSprijtaman duloj ree. <sup>14</sup> Abi' dunuj gajcan baguiaa ragojn tëen guial guxhaal Xi'n Dios loj guidxliuj guie persi güjtaman por xtol gra ree bejn. <sup>15</sup> Chutëez rëb guial Jesucrist naj Xi'n Dios nabannëman Dios, abi' Dios nabannè laaman. <sup>16</sup> Dunuj ree rayagbee raliladx tëe ree guial rën Dios dunuj ree. Por laaman zëed guial rayën dulasa' ree. Abi' bèn rën lasa' nabannëman Dios, guiáad Dios nabannè laaman.

<sup>17</sup> Bal wali rayën ree Dios zi'c rënman, ad najtan ni yadxeb ree dxej güün xguial-guxtisaman, din ma nayajc ree tijbzi con laaman, zi'c naj Jesucrist tijbzi con laaman. Din guidib dux guialnaban ree nabannè' reeman loj guidxliuj guie. <sup>18</sup> Bèn rën Dios, ad rdxebtaman, din bèn rën laaman diidxli, ad rdxebtraman, per bèn ad rënt laaman rdxebaman, din rüjnman xgab casti ni yayalaman, zeel bal chu rdxeb, ad walitaman rënman laaman. <sup>19</sup> Dunuj ree rayën Dios, din yaløj laaman guyën dunuj ree. <sup>20</sup> Bal yu' bèn rëb: "Rënan Dios", abi' ralen lasa'man, rusquieeman. Din bal id rën lasa'man bèn ruguiaaman, ¿xhienaag guiënman Dios bèn ad waguiaataman? <sup>21</sup> Laagajcaman na: Bèn rën Dios rayal guiën lasa'man.

## 5

### *Guial raliduladx ree Jesucrist zeel raguieen ree gan loj ni mal*

<sup>1</sup> Gra ree bèn rliladx guial Jesús naj bèn guxhaal Dios, laa reeman naj xi'nman. Bal chu rën dux Dad ree Dios, nè gra ree xi'nman rënman. <sup>2</sup> Chi rayën ree Dios raguieen tëe ree ni rniabeeman, dxel rayagbee ree guial rayën ree gra ree xi'nman. <sup>3</sup> Guial guiën bejn Dios naj guial güünman ni rniabeeman. Abi' ad nawëegt naj guial güünman ni rniabeeman, <sup>4</sup> din gra bèn naj xi'nman ma rüjn gan loj ree ni mal yu' loj guidxliuj guie. Abi' guial raliduladx ree, zeel ma raguieen ree gan loj ree ni mal guin. <sup>5</sup> Bèn rliladx guial Jesús naj Xi'n Dios, tijbzi laaman zajc güün gan loj ree ni mal yu' loj guidxliuj.

### *Ni ruliüü Dios dunuj ree xcwent Jesucrist*

<sup>6</sup> Jesucrist bi't loj guidxliuj, gurobnijsaman guxhie' tëe xrejnman loj crüjz. Ad gurobnijszaman, nè guxhie' xrejnman. XSprijt Dios naj testiw, laaman rü diidxli xcwent ree nine.

<sup>7</sup> Choon testiw yu' xanyabaa: xDadaman Dios, Jesucrist në xSprijt Dios, guiyon reeman naj tijbzi Dios.

<sup>8</sup> Yu' tää choon testiw loj guidxliuj: XSprijt Dios, në guial gurobnijs Jesucrist con ni guxhie' xrejman loj crüz, guiyon reen rü diidx tijbzi.

<sup>9</sup> Bal raliduladx ree ni na ree bejn, mazri rayal yaliduladx ree ni na Dios xcwent xi'nman Jesucrist, din xtiidxaman mazri lasajcan. <sup>10</sup> Bén rliladx Xi'n Dios, laaman rliladx ni rëb Dios xcwentaman. Per bén ad rliladxt laaman, rüjnman Dios zi'c bén rusquiee, din ad rliladxtaman ni rëbaman xcwent Xi'nman. <sup>11</sup> Abi' ni rëbaman naj guial ma baneeman guialnaban tiblayaa duloj ree, guialnaban guin zëed por xi'nman. <sup>12</sup> Bén za'në Xi'n Dios tijbzi, laaman naban tiblayaa delant loj Dios, per bén ad za'nët laaman tijbzi, laaman ad ca't guialnaban guin.

### *Ni bigra ca loj gui'ch guie*

<sup>13</sup> Cucan nine ree par lëjt najdi bén rliladx Jesucrist Xi'n Dios din gagbeedi guial ma ca'di guialnaban tiblayaa delant loj Dios.

<sup>14</sup> Rayagbee ree zagdx: chi yanaab ree xhienin lojman, rüjncwentaman dunuj ree, bal yanaab ree zi'c rënman. <sup>15</sup> Bal rayagbee ree rüjncwentaman dunuj ree chi ranaab ree xhienin, ziangajc rayagbee ree zagdx guial guneman ni ranaab ree.

<sup>16</sup> Bal chu dunuj ree rayagbee guial tijb dunuj ree cayguieen dol ni zajc gac perdon, rayal cwedxaman Dios por laaman zian gudëe Dios guialnaban tiblayaa lojman, bal zajc gac dol guin perdon. Yu' dol ni ad zajct gac perdon, abi' ad canitan guial cwedxidi Dios por bén rüjn dol guin. <sup>17</sup> Graczi ni mal naj dol, per yu' dol ni zajc gac perdon.

<sup>18</sup> Rayagbee ree guial bén ma naj ree xi'n Dios ad rusnuutri rüjn reeman dol, din Jesucrist Xi'n Dios naj bén rniaj laa reeman, abi' xindxab ad zajctri nabeex laa reeman.

<sup>19</sup> Rayagbee ree guial nayajc ree xbejn Dios, per ree bénguidxliuj, bén ad najt ree xbejn Dios, xindxab rniabee laa reeman. <sup>20</sup> Rayagbee tää ree guial Jesucrist Xi'n Dios ma bi'taman loj guidxliuj guie, guxhalaman dux quiarguejn ree, persi baguieenbee ree bén naj quijb Dios. Yan nadxu'në' reeman tijbzi por Xi'nman Jesucrist. Tijbzi laaman naj Dios, por laa tääman yu' guialnaban tiblayaa. <sup>21</sup> Xi'n, gol gojp cudad chitëe chinalidi ni naladx ree bejn naj Dios.

## Gui'ch barojp bacaa San Juan

### *Rxhial Waj xtiidx Dios loj ree bejn*

<sup>1</sup> Naj, bén rniabee loj ree bén rliadx Jesucrist, rxhialan gui'ch guie lojdi najdi bén gulej Dios rliadx tëedi Jesucrist, diidxli rënan lëjt, abi' ad tijbtizi naj, nè gra ree bén zinal xtiidx Dios. <sup>2</sup> Rënan lëjt guial ma nabannë' ree xtiidx Dios abi' laan nabannë dunuj ree zianci. <sup>3</sup> Dux Dad ree Dios con Xi'nman Jesucrist günle' lëjt, yaya reeman lëjt, yabe'cdxe tëe reeman luxdoodi guial zinalidi xtiidxaman rën tëe lasa'di.

### *Rniabee Dios yayën du lasa' ree*

<sup>4</sup> Dád nix guyu luxdon chi gogbeen yu' ree xcompniaridi, diidxli zinal xtiidx Dios naban tëe reeman zi'c rniabee dux Dad ree Dios. <sup>5</sup> Yan, zi'c rënan lëjt najdi dux compniar ree, gol been wen gol guyën lasa'di. Ni canin lojdi ad nicübtan, diidx ni bacaagdiajg gajquidi diizd guia'xchejn. <sup>6</sup> Guial rën Dios naj guial guiban bejn zi'c rniabee Dios, abi' ni rniabeeman ni bacaagdiajguidi diizd guia'xchej naj guial rayal guiban bejn, guiën lasa'man.

### *Bén rusquiee ree bejn*

<sup>7</sup> Rnin zian, din gra ladczi guidxliuj ziza zien ree bén rusquiee ree bejn, guial ad rliadx reeman bi't Jesucrist loj guidxliuj zi'c bejn, bén rüjn zian rusquieeman abi' za'man contr Jesucrist. <sup>8</sup> Gol gojp cudad chitëe gusëebidi ni rayalidi por ni cayüjndi, din tia'di gra ni rayalidi delant loj Dios.

<sup>9</sup> Chutëez bén racaa guijc zi'c balüü Jesucrist bejn ree ad nabannëtaman Dios, per bén zinal xtiidx Jesucrist zi'c balüüman bejn ree, laaman nabannë Dios con Xi'nman. <sup>10</sup> Bal chu gui't lidxidi abi' ad rulüütaman xtiidx Dios zi'c balüü Jesucrist, ad cu'di laaman lënü, ad güüncwent tëedi ni rnieeman. <sup>11</sup> Din bén rüjncwent xtiidxaman, rën guiëban guial ma za'man conform con ni rusquiee bén guin.

### *Diidx bigra ca ree loj gui'ch guie*

<sup>12</sup> Zien ree ni rënan ganin lëjt, per ad rëntan gucanan loj gui'ch, din wed ad zaglaat guialan guidganan lëjt din ganenë' quijb naj lëjt din chu' du luxdoo ree zagdxe tijbzi. <sup>13</sup> Bén naj ree bén ma gulej Dios, dux compniar raliduladx ree Jesucrist bén zojb ree niz guie, rugajpdioz reeman lëjt.

## Gui'ch bayon bacaa San Juan

### *Rugajpdioz Waj Gayo*

<sup>1</sup> Naj, b n rniabee loj ree b n rliadx Jesucrist, rxhialan gui'ch guie par l j Gayo najl da miwan diidxli r nan l j.

<sup>2</sup> Zi'c r nan l j rniaaban loj Dios zi'c z l zagdx loj xnejzaman ziangajc grii zagdx gra ni cay jnl gunee t eman l j guialnadaan. <sup>3</sup> D d nix guyu luxdon chi guna garol dux compniar ree guial diidxli nabanl zi'c r b loj xtiidx Dios. <sup>4</sup> Achet mazri ni rgu' luxdon zagdx zi'c chi riguejnan guial diidxli naban ree da compniaran zi'c r b loj xtiidx Dios.

<sup>5</sup> Zi'c r nan l j Gayo, rnin lojl guial zagdx da't naj ni cay jnl con dux compniar ree b n rliadx Jesucrist abi' mazczi zagdx naj ni r jnl con ree b n z ed lood ren. <sup>6</sup> Din laa reeman na delant loj gra ree b n rliadx Jesucrist, b n rado'pn ' reen guie, guial gunajchi'l laa reeman, zeel zagdx g  nl guial g  nl laa reeman yudar con ni ryaadx reeman guial cay jn reeman sirv loj Dios din gusnuu xnejz reeman. <sup>7</sup> Din brii reeman zigtie'ch reeman xtiidx Jesucrist abi' ad rti jbt reeman tia' reeman ni rud e ree b n ad rliadx laaman. <sup>8</sup> Zeel dunuj ree b n rali uladx ree Jesucrist, rayal yaguieen ree yudar b n catie'ch ree xtiidxaman, zian yaguieen ree yudar guire'ch ni naj diidxli.

### *Ad ruzoobt Di trefes diidx*

<sup>9</sup> Ma guxhalan tijb gui'ch loj ree dux compniar ree b n rliadx ree Jesucrist, per Di trefes guial ruladxaman nabeeman ad r jncwenttaman dux tiidxan. <sup>10</sup> Zeel bal guidganan l jt dxel ganen 'n laaman xcwent guial rnieeguijdxaman rniee t eman diidx rusquiee contr dunujn abi' ad tijbtzi laan r jnman n  ad rud et lidxaman yaya'n dux bejn ree b n z ed ree lood ren, ad rti jbt t etaman gud ed lidx ree ben ren yaya'n reeman, abi' ree b n rud ed lidx ad rti jbtaman chu' reeman l n yadoo.

<sup>11</sup> Zi'c r nan l j Gayo rnin lojl ad chinalil neiz mal, been ni naj ni zagdx din b n r jn ni zagdx laaman naj xbejn Dios per b n zinal ni mal ad n nbeetaman Dios.

<sup>12</sup> Graczi reeman ruza't Demetrio zagdx guial binalaman zi'c rayal, laa nen gajc xhienaag nabanman xt dunujn raza't laaman zagdx abi' l j ragbee guial diidxli naj ni raguie'chan.

### *Diidx bigra ca ree loj gui'ch guie*

<sup>13</sup> Zien ni r nan ganin lojl per ad r ntan gucanan loj gui'ch, <sup>14</sup> din wed ad zaglaat guialan guidganan l j, dxel ganen ' quijb naj l j.

<sup>15</sup> Yabe'cdxe Dios luxdool, dux miw ree b n riga' ree guie rugajpdioz l j, bagajpdioz t e gra dux miw ree.



## Gui'ch bacaa San Judas

### *Rugajpdioz Judas bén naj ree bén gule Dios*

<sup>1</sup> Naj, Judas bijch Santiaaw, cayünan sirv Jesucrist, cucan gui'ch guie par lëjt najdi bén ma gulej dux Dad ree Dios guial rënman lëjt, abi' dux Dad ree Jesucrist canaj lëjt. <sup>2</sup> Gusnuu yaya Dios lëjt, yabe'cdxeman luxdoodi guiën täädi laaman.

### *Bén ad rnieet ree diidxli (2Pe. 2:1-17)*

<sup>3</sup> Gradi compniar raliduladx ree Jesucrist, rënan lëjt, diidz gocli guyënan nixhialan gui'ch lojdi, din gagbeedi xcwent xhienaag naj perdon ni raya'p ree delant loj Dios, per yan ma bidxin dxej rüjn naguiejn gaxhalan gui'ch guie lojdi din ganin lojdi din guiniadi guialrliladx ni ma raya'p ree, ni nayaaloj, guial nayajc ree xbejn Jesucrist. <sup>4</sup> Din yu' ree bén rüjn bén rliladx naabzi par go'ch reeman lojdi. Bén guin ree diidz gocli ma ragbee Dios guial rayal reeman casti, din ad rdxebt reeman laaman, rudxiib reeman guijc naj Dios benza'c, abi' naban reeman zi'ctzi rën reeman. Ad rtiëjbt reeman nabee Jesucrist laa reeman, laaman naj tijbzi dux Dad ree bén rniabee dunuj ree.

<sup>5</sup> Majs ma ragbeedi ni ganin lëjt, per ganinan din gusaaladxidi guial majs babëë Dios bén Israel ree Egipto, per despuejs banijtaman bén ad bililadxt ree laaman. <sup>6</sup> Në ree anjl ad bazoobt xtiidx Dios niniabee reeman lod badëëman loj reeman, basiaawaman laa reeman lod nacay da't xt dxej güün xguialguxtisaman. <sup>7</sup> Nëtëë ree bén Sodoma con ree bén Gomorra con ree guiedx gure gajxh, ad laat gubajn reeman, been reeman gra loj nidxuudx zi'ctzi guyën reeman, zeel basagzi Dios laa reeman, banijtaman baze'c tääman laa reeman, laan naj ni rayal yaguaa ree chitëë yaguieen ree zian.

<sup>8</sup> Per ni'czi zian, yan ziangajc rüjn ree bén raguiil mod par go'chzi reeman lojdi, rüjn reeman xgab guial zajc güün reeman zi'ctzi rën reeman, ruxhiin laagajc reeman, ad rtiëjb tää reeman nabee Jesucrist laa reeman, rnieeguijdx tää reeman bén naj ree xianjl Dios. <sup>9</sup> Per chi gudildiidx ree arcangel Miguel con xindxab guijc xcuerp Moisejs, ni'quid bayaxt anjl guin niëjbaman diidxguijdx loj xindxab guin, tijbzi ni rëbaman naj: "Ladxa Dios gusa'nän lüj." <sup>10</sup> Abi' yan bén raguiil gajc ree mod go'ch reeman lojdi, rnieeguijdx reeman ni ad rignia't reeman, per nidxuudx rüjn reeman, ad rüjnt reeman laan xgab, contzi rüjn reeman laan zi'c ree be guial ad rüjnt reeb xgab. Zian cusëëb laagajc reeman delant loj Dios.

<sup>11</sup> ¡Prob laa reeman!, guial zinal reeman ni mal zi'c been Caín, mazri zinal reeman milia zi'c been Balaam, guiët tää reeman zi'c güt Coré chi guyënman niniabeeman luar Moisejs. <sup>12</sup> Laagajc reeman ruxhiin lanij rüjndi chi rado'pιδi din gawidi tijbzi, guidiblagaa ad ratut reeman raw reeman ad rüjn tää reeman xgab por ree bejn, rüjnz reeman xgab par cha lën reeman. Naj reeman zi'c zaj ni ad nët guia ni rinë bi, zi'c ree yag rbidx abi' ria'xh reen guial ad rtiat reen. <sup>13</sup> Naj reeman zi'c xtüjp nijsdoo chi rajsan zro' da't, din zi'c ririi bichijn loj nijs guin, ziangajc sin guialxtu rüjn reeman nidxuudx ree, naj tää reeman zi'c ree bajl xanyabaa ni basëëb xnejz, dxel tiblyyaa ma rayal reeman lod nacay da't.

<sup>14</sup> Abi' bén brii laj Enoc, laaman gojc gajdx loj ree xdiaa Adán, guneeman xcwent ree bén guin chi rëbaman: "Naj baguiaa dux Dad Dios zidnë zien da't ree xianjlaman <sup>15</sup> zidgaguieen xguialguxtisaman con gra ree bejn, din guiëbaman xhie casti rayal ree benmal por gra ni mal been reeman në por diidxguijdx ni gune reeman laaman guial naj reeman bëndol." <sup>16</sup> Lasa' ree bén guin achetzi ruladx reeman, abi' graczi rnieeguijdx reeman. Zianczi rüjn reeman zi'ctzi rën reeman, abi' zianczi ruza't laagajc reeman zagdx ruza't tää reeman bejn ree zagdx din cwentzi güün ree bén guin ni rën reeman.

*Mod rayal guiban ree xbejn Dios*

<sup>17</sup> Per lëjt compniar raliduladx ree Jesucrist, rën da'tan lëjt, gol basaaladx guial bén goc ree xi apóstoles Dad Jesucrist <sup>18</sup> rëb reeman: “Chi ma zidyob nit guidxliuj, chu' ree bén guze' gra ni zëed loj Dios güün tää reeman zi'ctzi naj xixgabdxuudx reeman.” <sup>19</sup> Lasa' ree bén guin naj bén rlia' lasa' ree bén ma zinal xnejz Dios, abi' naban reeman zi'ctzi rën reeman, ad yu't xSprijt Dios luxdoo reeman.

<sup>20</sup> Per lëjt compniar raliduladx ree Jesucrist, gol guzudxi'ch loj ni rliladxidi, din guialrliladx guin zëed loj Dios. Gol gurejdx gunab Dios con xyudar xSprijtaman. <sup>21</sup> Gol basnuu gol binal guial rën Dios la'tgaj cabëzidi guidxin dxej gunee Jesucrist guialnaban tiblayaa duloj ree guial rayaman dunuj ree.

<sup>22</sup> Gol been yudar bén sta yu' nawëëg ree luxdoo. <sup>23</sup> Gol been yudar bén zë ree loj nejzmal, zi'c rüjn tijb bén rüjn yudar bén cayajb loj bajl, gol guyën reeman per ad chu'ladxidi zi'c rüjn reeman, gol gojp cudad chitëë yabidi loj xtol reeman.

*Diidx bigra ca ree loj gui'ch guie*

<sup>24</sup> Yu' tijbzi Dios ca' guialrniabee par guiniaman lëjt, chitëë yabidi loj dol, din chu' luxdoodi zagdxë sin dol chi guidxindi xanyabaa lod za'man. <sup>25</sup> Laaman naj tijbzi Dios bén babëë dunuj ree loj dol por dux Dad ree Jesucrist, rayalaman respejt din gra naj xieenman, tijbzi laaman ca' guialrniabee con guialguxtis diizd gocli, yan con gra tiampczi. Amén.

## Ni balüü Jesucrist loj San Juan

<sup>1</sup> Ni ne ree naj ni ma balüü Dios loj Jesucrist din në laaman gulüü laan loj ree xbejnman, din gagbee reeman conin ma zidyob gac. Abi' Jesucrist guxhaal xianjlaman din gulüüman ni guin ree lon, naj Waj xbejn Jesucrist, bën cayüjn laaman sirv. <sup>2</sup> Abi' canin ni diidxli xcwent xtiidx Dios, xcwent Jesucrist në xcwent gra ree ni baguian.

<sup>3</sup> Xiquilbaa ree bën ni rool, në ree bën rucaagdiajg në ree bën ridxga' ni ca loj gui'ch guie ni rugojn xcwent ree ni gac, din ma zidyob gac reen.

### *Rxhial San Juan gui'ch loj guigajdx ree yadoo*

<sup>4</sup> Naj Waj cucan gui'ch guie par lëjt najdi xbejn Cristo, lëjt bën naban ree loj guigajdx ree xguiedx Asia. Dux Dad ree Dios, bën gui't bën naj Dios diizd gocli në yan, në guigajdx ree sprijt za' lod canabeeman, në Jesucrist, laa reeman güünle' lëjt yabe'cdxe tēe reeman luxdoodi. <sup>5</sup> Jesucrist been gra ni naj güünman, laa tēeman goc bën yaloy baban loj ree bengüt abi' laaman rniabee gra ree bën rniabee loj guidxliuj. Laaman rēn dunuj ree abi' con xrejnman basiaman dux tol ree <sup>6</sup> abi' beenman dunuj ree zi'c bën rniabee, been tēeman dunuj ree bixhioz rüjn sirv xDadaman Dios. Zeel Jesucrist rayalaman respejt në guialrniabee zianczi. Amén.

<sup>7</sup> ¡Gol gogbee guial gui'taman loj zaj! Gra ree bejn guguaa laaman xt ree bën ni guliiz lans cwē'lēnman, abi' gra ree bēnguidxliuj goon da't chi guguaa reeman laaman. Laan naj diidxli. Zian gac.

<sup>8</sup> Dux Dad ree Dios bën rajp gra guialrniabee. Laaman gui't, laaman naj Dios diizd guia'xchej, në yan, laaman rēb por laagajcaman: “Naj naj zi'c lejtr A con Z, lejtr ni rzuloj në ni rlioxnē alfabeto, naj ca' gra guialrniabee.”

### *Baguaa San Juan xguialrniabee Cristo*

<sup>9</sup> Naj Waj tijb ree lasa'di bën rliladx Jesucrist. Tijbzi nadxu' ree loj xguialrniabeeman, tijbzi cayzaagdiaj ree abi' caydaan ree por laaman. Naj guyu'n ladxguiib loj yuj riga' loj nijsdoo lod la Patmos guial rtiechan xtiidx Dios në gra ree ni ragbeen xcwent Jesucrist. <sup>10</sup> Chi yu'n ladxguiib loj yuj riga' loj nijsdoo guin, guyu tijb dumingw chi guza'can zi'c bën rnie'xhchaal por xguialrniabee xSprijt Dios, abi' xichan biguiejnan zi'c cha' trompejt abi' biguien rejs da't cha' tijb <sup>11</sup> bën ni rēb:

—Naj naj zi'c lejtr A con Z, lejtr ni rzuloj në ni rlioxnē alfabeto, din tijbzi naj naj bën rniabee. Bacaa loj gui'ch gra ni cuguaal dxel guixhiaalil gui'ch guin loj guigajdx cwaa ree da bejnan bën zojb ree niz Asia, luguiedx Éfeso, Esmirna, Pérgamo, Tiatira, Sardis, Filadelfia në Laodicea.

<sup>12</sup> Dxel chi badxi' lon par guguan chunin rnieenē naj dxel baguian gajdx ree candeler or. <sup>13</sup> Abi' galay ree candeler guin baguian tijb ni naj zi'c tijb bejn, najcwaman tijb lajd yool xt guia'man, abi' naxii tijb cinch or luxdooan. <sup>14</sup> Naquichbēj guiycaman zi'c naj guidxlad xiil, zi'c naj guiajnayaag naquich naj guidxguiycaman abi' zi'c bajl re'criani guiaaloyman. <sup>15</sup> Abi' guia'man rdiinan bacha' zi'c guiib ni la bronce chi yu'n loj guij, abi' cha'man naj rejs zi'c rüjn nijs naquie' chi rguiajtan. <sup>16</sup> Guiáad yaaman ladbee ca'man gajdx bajl xanyabaa. Abi' ro'man ririi tijb Espad ni nadoxh da't grop lad, guiáad lojman rulaa bacha' zi'c chi rusni gubijdx gojl da't.

<sup>17</sup> Dxel chi baguian laaman biajban guia'man zi'c bengüt. Per laaman guxhoob yaa ladbeeman guican, naman:

—Ad rdxe bil, naj naj bën rniabee diizd guia'xchej abi' par tiblayaa. <sup>18</sup> Ma güjtan, per yan ma babanan, abi' ma naban an tiblayaa, abi' naj rniabee guialgüjt në gabijl. <sup>19</sup> Yan baca ni ma baguaal në ni cuguaal në ni qui gacri. <sup>20</sup> Ni në rēn guiēb guigajdx ree

bajl xanyabaa ni baguiaal yan ladbee, në guigajdx ree candeler or. Guigajdx ree bajl xanyabaa guin rën guiëban gajdx ree bën rniabee guigajdx cwaa ree da bejnan niz Asia, abi' guigajdx candeler or guin rën guiëban guigajdx cwaa ree da bejnan.

## 2

### *Diidx par ree bën Éfeso*

<sup>1</sup> Yan bacaa ni guixhiaalil loj bën rniabee ree da bejnan luguiedx Éfeso. Bacaa: “Bën ni ziza galay ree candeler or, bën ni ca' gajdx ree bajl xanyabaa con yaa ladbeeman, laaman na lojdi: <sup>2</sup> Naj ragbee xhie cayüjndi. Naj ragbee xhie tarbajw cadëdidi, ragbee tëen guial ad ralenya'tidi. Naj ragbee guial ad rdaantidi bën mal ree, abi' ma beendi prueb bën na ree naj xi apóstoles Jesucrist majsi achut naj reeman abi' ma gogbeedi guial ganax diidx rusquiee rniee reeman. <sup>3</sup> Naj ragbee guial rajpidi pacens abi' ma guzagdiajdi guial rëndi naj sin guial yalenya'di. <sup>4</sup> Per yu' ni ad ruladxtan rüjndi: guial ad rëntridi naj zi'c guia'xchej. <sup>5</sup> Gol basaaladx xhienaag guyëndi naj guia'xchej guial zi'c cayüjndi yan. Gol bayüjn xgab, gol been zi'c beendi guia'xchej, bal id züjndi zian, nayob gaxhalan casti par lëjt abi' ad zajctridi biani par los demazri ree bejn, bal id zayüjndi xgab. <sup>6</sup> Per yu' ni cayüjndi zi'c rayal, guial rdxe'chidi ni rüjn ree ben nicolaítas, zi'cgajc rdxe'chan por ni rüjn reeman. <sup>7</sup> Bën rën ree gucaagdiajg, gol bacaagdiajg ni rniee xSprijt Dios par ree da bejnan: Bën ni güün gan loj dol, naj gudë ni gawaman ni rtia loj yag ni runee guialnaban ni zojb xanyabaa lod zojb Dios.”

### *Diidx par ree bën Esmirna*

<sup>8</sup> Yan bacaa ni guixhiaalil loj bën ni rniabee ree da bejnan luguiedx Esmirna. Bacaa: “Bën rniabee diizd guia'xchej në par tiblayaa, bën ni güt abi' babanman stijb, laaman na lojdi: <sup>9</sup> Naj ragbee xhienaag cadëdidi tarbajw por ni rüjn bejn lëjt, ragbee tëen loj guialprob ni nabandi majsi diidxli najdi benrijcw guial ma zinalidi xtiidx Dios, abi' ragbeen xhienaag rnieeguijdx bejn lëjt, bën ni na ree naj reeman bën Israel xbejn Dios majsi laa reeman naj xbejn xindxab. <sup>10</sup> Ad rdxebtidi guialzi ni tëdidi din xindxab güünx gan din cu' ree bejn tio'p choondi ladxguiib par guiguien guial diidxli zinalidi xnejz Dios. Chii dxej tëdidi guialzi guin ree, per gol guzujdxi'ch xt dxej guiëtidi, abi' naj yazaladx lëjt guialnaban tiblayaa. <sup>11</sup> Bën rën ree gucaagdiajg gol bacaagdiajg ni na xSprijt Dios par ree da bejnan: Bën güün gan loj dol, achetri güün guialgüjt ni rarojp laaman.”

### *Diidx par ree bën Pérgamo*

<sup>12</sup> Yan bacaa ni guixhiaalil loj bën rniabee ree da bejnan luguiedx Pérgamo. Bacaa: “Bën ca' espad ni nadoxh grop lad ro', laaman na lojdi: <sup>13</sup> Naj ragbee guial luguiedx zojbidi xindxab rniabee ni. Per majsi zian lëjt za'dxi'chidi con naj ad rucwëëzt rliladxidi naj ni'qui lën ree dxej ni bagüjt reeman Antipas, tijb ree xcompniaridi bën ad bacwëëzt bililadx naj, bën bagüjt reeman ladxidi lod rniabee xindxab. <sup>14</sup> Per yu' ree ni ad ruladxtan rüjndi. Tijb ni ad ruladxtan rüjndi naj guial lojdi no'ch ree bën ad rusa'nt ni basiid Balaam bejn ree, bën rëb loj Balac xhienaag guzaalguiiwaman bën Israel ree din gaw reeman guialraw ni ma gurej loj ree xdios Balac guin, në par been reeman graloj ree nidxuudx con ree bën ad najt lacheel reeman. <sup>15</sup> Stijb ni ad ruladxtan naj guial lojdi no'ch ree bën ad rucwëëzt rüjn zi'c rüjn ree bën nicolaítas. <sup>16</sup> Zeel gol bayüjn xgab por ni rüjndi, bal id züjndi zian nayob gaxhalan casti din günan guialguxtis con laa reeman con espad ni ririi ro'n. <sup>17</sup> Bën rën ree gucaagdiajg, gol bacaagdiajg ni na xSprijt Dios par ree da bejnan: Bën rüjn gan loj dol, naj gudë mana gawaman, guialraw xanyabaa ni ad nünbeet ree bejn. Gudë tëen tijb guiaj naquichdoo lod ca laj cübaman ni achutczi ragbee, tijbzi bën tia' guiaj guin gagbee.”

### *Diidx par ree bën Tiatira*

<sup>18</sup> Yan bacaa ni guixhiaalil loj bén rniabee ree da bejnan luguiedx Tiatira. Bacaa: “Xi'n Dios, bén re'criani guiaaloz zi'c bajl, bén rdiin bacha' guia' zi'c guiib ni la bronze, laaman na lojdi: <sup>19</sup> Naj ragbee ni cayüjndi, ragbeen xhienaag rëndi naj, xhienaag rliadixidi naj, xhie cayüjndi por naj abi' ad ralenya'tidi. Naj ragbee guial mazri zagdx cayüjndi yan guial loj guia'xchej, <sup>20</sup> Per yu' ni ad ruladxtan cayüjndi: Rdaandi Jezabel, béngunaa ni na rudëed xtiidx Dios. Abi' rtiëjbidi rulüüman da bejn reen dxel ruzaalguiiwaman laa reeman rüjn reeman ni dxuudx ree con ree bén ad najt lacheel reeman, abi' raw reeman guialraw ni ma gurej loj ree xdios ree bénguidxliuj. <sup>21</sup> Ma badën tiamp din yayünman xgab, din gusa'n xguialdxuudxaman, per ad rëntaman. <sup>22</sup> Zeel yan gaxhalan guialguijdx par laaman, gaaman gagxuuman. Abi' bén rüjn ree zi'c rüjnman, bal id reeman guchaa mod ni naban reeman ziangajc zro' naj guialzi ni téd reeman, <sup>23</sup> gugüjtan gra ree bén ma been xgab guiban zi'c naban béngunaa guin. Zian gagbee ree da bejnan guial naj ragbee xhie yu' guiic bejn xhie tëë yu' luxdooman, xhie xgab rüjnman. Naj gune lëjt ni rayalidi bal gonin rüjndi. <sup>24</sup> Par gra ree da bejnan bén zojb ree luguiedx Tiatira, lëjt bén ad zinalt ree zi'c rusiid Jezabel guin bejn ree, lëjt guial na reeman ad ragbeetidi xt ni bigra xcwent xindxab guial ad ridxga'tidi laa reeman, achetri ni ganin lojdi, <sup>25</sup> tijbzi ni rnin lojdi: Gol guzujdx'i'ch loj ni ma ragbeedi xt chi guialan stijb. <sup>26</sup> Bén güün gan loj dol, abi' gusnuu güünman zi'c rënan guidib tiamp ni guibanman, naj gudë guialrniabee lojman din nabeeman loj ree nacion. <sup>27</sup> Nabeeman loj ree nacion guin zi'c tijb bén ni ca' tijb var guiib, zi'czi rlia' bejn tijb guiajs zian güünëmnan bén ni ad rënt ree guzooob diidx. Gudën guialrniabee guin lojman zi'c banee da Dadanan lon, <sup>28</sup> gudë tëën lojman bajl xanyabaa ni rliejn rsildoo. <sup>29</sup> Bén rën ree gucaagdiajg, gol bacaagdiajg ni rëb xSprijt Dios par ree da bejnan.”

### 3

#### *Diidx par ree bén Sardis*

<sup>1</sup> Yan bacaa ni guixhiaalil loj bén rniabee ree da bejnan luguiedx Sardis. Bacaa: “Bén naban con guigajdx ree xSprijt Dios abi' ca'man gajdx bajl xanyabaa, laaman na lojdi: Naj ragbee gra ni cayüjndi ragbee tëën guial ma güjtidi, majsi par ree bejn nabandi. <sup>2</sup> Zeel gol batie'ch xbaaalidi, gol been naguiejn chitëë nit ni sta cayüjndi, din naj ruguian guial ad cayüjntidi xnejz delant loj da Dadan Dios. <sup>3</sup> Gol basaaladx ni ma biguiejndi në ni ma basiididi, abi' gol been zian, gol bayün xgab zi'c ni cayüjndi. Din bal id zatie'ch xbaaalidi zi'c cayüjndi, dxel zi'c ri't tijb béngubaan ziangajc chi gagbeedi ma bi't casti par lëjt. <sup>4</sup> Per luguiedx Sardis, yu' tio'p choon ree bejn sta naya, laa reeman naj bén gacw lajd naquich abi' sa reeman con naj, din rayal reeman laan. <sup>5</sup> Bén güün gan loj dol, chi guidxin hor, zian gacwaman lajd naquich abi' ad zuse'n tëëtan lajman loj xlibr guialnaban. Abi' delant loj Dios në loj ree anjl guien guial laaman naj da bejnan. <sup>6</sup> Bén rën ree gucaagdiajg, gol bacaadiajg ni rëb xSprijt Dios par ree da bejnan.”

#### *Diidx par ree bén Filadelfia*

<sup>7</sup> Yan bacaa ni guixhiaalil loj bén rniabee ree da bejnan luguiedx Filadelfia. Bacaa: “Bén naya nali, bén naj diidxli, bén rajp guialrniabee loj gra zi'c gojp rey Davi guialrniabee, tijbzi laaman rajp guialrniabee par guixhialaman tijb nejz ni achut zajc gusiaaw o gusiaawaman tijb nejz ni achut zajc guixhial, laaman na lojdi: <sup>8</sup> Naj ragbee gra ni cayüjndi. Gol gogbee guial majsi ad rajptidi guialrniabee, per naj ma guxhal tijb nejz din guitie'chidi da diidxan sin guial chu gutëë lojdi, din zinalquidi da diidxan abi' ad goct rëbidi guial ad najtidi da bejnan. <sup>9</sup> Lëjt guguaa ni günan con ree xbejn xindxab bén rëb ree naj reeman bén Israel xbejn Dios, abi' rusquieezi reeman. Guguaadi ni günan laa reeman, guidgazuxib reeman lojdi, gagbee tëë reeman xhienaag rënan lëjt. <sup>10</sup> Abi' zi'c ma bazoobidi diidx gapidi pacens guial chinalidi da diidxan, ziangajc ganan lëjt

chi guidxin dxej gui't guialzi loj guidib guidxliuj, zi'c tijb prueb par gra ree bénguidxliuj. <sup>11</sup> Nayob guialan loj guidxliuj stijb. Gol guzujdxi'ch loj ni ma ragbeedi chitëë tia' ben ren ni rayalidi. <sup>12</sup> Bén güün gan loj dol, naj gudë lojman tijb luar zojbloj lën yadoo zojb xanyabaa lod naban da Dadan Dios, ni guibanman tiblayaa. Dxel tiblajtaman guca laj da Dadan Dios con lan nicüb, con laj ladx da Dadan Dios ni la Jerusalén cüb ni naj xanyabaa lod zojbaman. <sup>13</sup> Bén rën ree gucaagdiajg, gol bacaagdiajg ni rëb xSprijt Dios par ree da bejnan.”

### *Diidx par ree bén Laodicea*

<sup>14</sup> Yan bacaa ni guixhiaalil loj bén rniabee ree da bejnan luguiedx Laodicea. Bacaa: “Bén ni rüjn cumplid xtiidx, bén ni been gra ni rayal güünman, bén naj diidxli, bén rniabeenë Dios diizd gocli chi gad guidxliuj gacchaaw, laaman na lojdi: <sup>15</sup> Naj ragbee gra ni cayüjndi. Ad najtidi zi'c nijs nayaag o zi'c nijs laa. ¡Balzianclaa tiblayaa niajquidi zi'c nijs nayaag o zi'c nijs laa! <sup>16</sup> Per lëjt najdi zi'c nijs nayool, ni'qui nadxa' ni'quidza nayaagt, dxel zi'c laa rabëë gajc ro' bejn nijs nayool guin, zian ma rënan gabëladxan lëjt. <sup>17</sup> Lëjt rëb guial najdi benrijcw, rajpidi gra abi' achet ryaadxidi. Per ad ragbeetidi guial achet rajpidi, najdi bénprob, bén zibëël, achet sirv lëjt, najdi bénlutia'p niz lon guial ad nabantidi xnejz. <sup>18</sup> Zeel rnin lojdi, zi'c rzii bejn ganax or, zian gol been naguiejn gapidi gra da yudaran, din gaquidi rijcw delant lon. Abi' zi'c chi rzii bejn lajd naquich din guiguienman naya, zian gol bayüjn xgab din guiguie'ch xguialxtudi abi' guiguiendi naya delant lon. Në chi rzii bejn tijb rumed par guiaaloz bejn din guguaaman zagdx, zian gol been naguiejn din gapidi da guial rignia'n din guguaadi zagdx. <sup>19</sup> Rdilnë'n abi' ruzuxnejzan gra ree bén rënan. Zeel gol bagu' luxdoodi gol bayüjn tëë xgab xhienaag nabandi. <sup>20</sup> Gol gogbee guial naj cabedx lëjt, zi'c chi rniee tijb bejn rulidx stijb bejn. Cabëësan chu guidxga' naj, zi'c chi rgu' bejn stijb bejn din gaw reeman tijbzi. Abi' bén guidxga' naj ma nabannë'n laaman abi' laaman nabannëman naj. <sup>21</sup> Bén güün gan loj dol naj gudë cwë'n cweman lod canabeen, zi'cgajc naj chi gulox benan gan loj dol, gure cwë' da Dadan Dios lod canabeeman. <sup>22</sup> Bén rën ree gucaagdiajg, gol bacaagdiajg ni na xSprijt Dios par ree da bejnan.”

## 4

### *Rlies reeman xvalor Dios xanyabaa*

<sup>1</sup> Chi gulox bacan diidx guie ree, baguian niz ladia dxel baguian tijb port naxal xanyabaa. Abi' bén guneenë gajc naj diizd guia'xchej bén naj cha' zi'c trompejt, laaman na lon:

—Wë'p guie din gulün lüj ni gac ree chi ma gojc ree ni rnin lojl.

<sup>2</sup> Loj hor zii gajc por xguialrniabee xSprijt Dios, chi gogbeen ma za'n xanyabaa yagaj baguian tijb yagxhil zagdx zi'c xi yagxhil tijb rey, lojn zojb tijb bejn. <sup>3</sup> Abi' bén zojb loj yagxhil guin rulaaman bacha' zi'c ree guiaj zagdx ni lasajc wayëjx, ni la jaspe në cornalina. Abi' guijc yagxhil guin ca tijb guidgij ni rulaa bacha' zi'c guiaj zagdx ni la esmeralda. <sup>4</sup> Abi' gadëd ro' yagxhil guin baguian zagajlbitap ree yagxhil zagdx abi' loj ree yagxhil guin zojb ree gajlbitap ree bengol najcw reeman lajd naquich yu' coron or guijc reeman. <sup>5</sup> Abi' lod za' yagxhil ni za' galay los demasri ree yagxhil guin, yagaj ririi ree bacha' zi'c chi rë'p nijs në ree naquie' zi'c chi rbidxa' guziaaw. Abi' delant loj yagxhil guin re'c gajdx ree guij ni naj ree guigajdx xSprijt Dios. <sup>6</sup> Baguia tëen delant loj yagxhil guin zi'c nijsdoo, per nayadxujn zi'c tijb guiaawajn.

Abi' cwë' yagxhil guin za' tajp ree be, tijb gaj reeb za' tib xquin gaj yagxhil guin abi' guidib niz xijch reeb në niz loj reeb yu' guiaaloz reeb. <sup>7</sup> Tijb reeb naj zi'c beedx, be barojp guin naj zi'c go'n, be bayon guin naj lojb zi'c loj bejn, be badajp guin naj zi'c bisia ni cazuj.

<sup>8</sup> Tjib gaj ree be guin yu' xho'p xhiil reeb, abi' xijch xhiil reeb në lën xhiil reeb yu' zien da't guialoj reeb. Abi' dxej guiaal ad rucwëëzt rëb reeb:

Naya nalil, naya nalil naya nalil najl dux Dadan Dios,  
lütj guial ca'l gra guialrniabee,  
lütj guial najl Dios diidz guial'xchej në yan abi' gui'til.

<sup>9</sup> Beegaj chi rlies ree be guin xvalor bën ni zojb loj yagxhil guin, bën naban tiblayaa, beegaj ruza't reeb laaman zagdxe rudëed reeb quixtëe lojman, <sup>10</sup> guigajlbitap ree bengol zojb yagaj, bazuxib reeman lojman, bën ni zojb loj yagxhil abi' nabanman tiblayaa, abi' ruzuxib reeman lojman rudxiib xcoron reeman niz lojman, rëbgaj reeman:

<sup>11</sup> Dux Dad ree Dios, lütj rayal guiya'p respejt,  
diidzxa'c në guialrniabee.

Din lütj beenchaaw gra ni yu'  
abi' lütj rëb guial chu' gra ni yu',  
abi' yu' reen.

## 5

### *Tjib gui'ch ni nadüüb con bën naj zi'c xi xil Dios*

<sup>1</sup> Dxel baguian guial bën zojb loj yagxhil zagdxe ni naj zi'c xyagxhil tijb rey, ca'man tijb gui'ch yaaman ladbee. Gui'ch guin zi'c lojn zi'c xijchan ca lejtr abi' nadüüban, abi' naguiidan con gajdx se chitëe chu guixhial laan. <sup>2</sup> Loj hor guin baguian tijb anjl bën gojl da't, rbidxa'man rejs rëbaman:

—¿Chu rayal chiquied ree se guie abi' guixhial loj gui'ch guie?

<sup>3</sup> Per ni'qui xanyabaa, ni'qui loj guidxliuj, ni'qui lën liuj ad bidxejlt bën ni rayal guixhial gui'ch guin, ni'qui par guguaaman ni ca loj gui'ch guin. <sup>4</sup> Abi' naj dád binan chi baguian guial achut rdxejl guixhial loj gui'ch guin në par guguaaman ni ca loj gui'ch guin. <sup>5</sup> Dxel na tijb ree bengol guin lon:

—Ad roonl, baguiaa nial ma yu' tijb bën ni rayal guixhial loj gui'ch guin abi' chiquiedaman guigajdx se guin din ma beenman gan loj gra, laaman bën naj zi'c tijb beedx loj xdiaa Judá por guialrniabee ni rajpaman, laaman za loj xdiaa rey Davi.

<sup>6</sup> Abi' chi baguian, dxel baguian guial galay lod za' yagxhil zagdxe ni naj zi'c xyagxhil tijb rey, lod za' guidap ree be guin galay ree bengol ni riga' yagaj, za' tijb bën naj zi'c xi xil Dios rguien xsen lod bidxeelguidxaman chi gütaman. Abi' yu' gajdx xcajchaman con gajdx guialojman, guigajdx guialojman naj guigajdx xSprijt Dios bën rxhiaalaman guidib guidxliuj. <sup>7</sup> Bibig bën naj zi'c xiil guin cwa'man gui'ch guin ladxaa bën zojb loj yagxhil guin. <sup>8</sup> Chi cwa'man gui'ch guin, guidap ree be za' gajxh cwë' yagxhil guin në gra guigajlbitap ree bengol guin bazuxib reeman lojman. Tjib gaj ree bengol guin ca' reeman tijb gaj arp ca' tëe reeman cojp or ni guidxa goxyaal, go'xh guin naj xtiidx ree xbejn Cristo chi rbejdx rniab reeman Dios. <sup>9</sup> Bengol guin ree rool reeman tijb cant cüb ni rëb:

Lütj rayal tia' gui'ch guin  
abi' guixhialil se ni naguiidnën.

Din lütj güjtil

abi' con xrejnl ni guxhie'l gudijxil  
por graloy bejn din gac reeman xbejn Dios,  
achet güünan xhietëez diidz rniee reeman,  
o xhie loj diaa, o xhie guiedx o xhie nacion zëed reeman.

<sup>10</sup> Beenl laa reeman rey

been tëel laa reeman bixhioz par dux Dad ree Dios,  
abi' laa reeman nabee loj guidxliuj.

<sup>11</sup> Baguia tëen biguiejn tëen cha' zien ree anjl gadëd ro' yagxhil zagdxë guin con guidap ree be guin në ree bengol guin. Abi' bénguixiujczi naj reeman por mil naj reeman. <sup>12</sup> Abi' dád rejs rniee reeman rëb reeman:

Bén naj zi'c xi xiil Dios, bén güt,  
laaman rayal tia' guialrniabee,  
laaman rayal gap guialnaza'c,  
quiarguiejn, në gojl,  
respejt, guza't reeman laaman zagdxë,  
guilies tëë reeman xvaloraman.

<sup>13</sup> Dxel biguiejnan cha' gra ree ni been Dios, zi'c ni yu' ree xanyabaa, loj guidxliuj në ni yu' ree lën liuj në ree ni yu' loj nijsdoo, rëb reen:

Bén zobj loj xyagxhil guialrniabee në bén naj zi'c xi xiilaman,  
par laa reeman naj  
respejt, diidxza'c, guialrniabee,  
abi' guilies reeman xvalor reeman  
zianczi në par tiblyaa.

<sup>14</sup> Chi gulox rëb reen zian, dxel guidap ree be za' yagaj rëb reeb:

—Amén.

Abi' guigajlbitap ree bengol za' yagaj bazuxib par gap reeman laaman respejt, bén ni naban zianczi në par tiblyaa.

## 6

### *Guigajdx ree se*

<sup>1</sup> Dxel baguian biquied bén naj zi'c xi xiil Dios se yaloj guin, abi' zi'c chi rbidxa' guziaaw zian biguiejnan gunee tijb ree be guin, rëbib:

—jGuda!

<sup>2</sup> Dxel baguian gulentie tijb way naquich, abi' bén dxiib laab ca'man tijb xi arcw flejch. Abi' cwa'man tijb coron guial ma beenman gan, dxel briiman persi ziguieenman gan mazri.

<sup>3</sup> Chi biquied bén naj zi'c xi xiil Dios se barojp guin biguiejnan rëb be barojp guin:

—jGuda!

<sup>4</sup> Dxel gulentie tijb way xnia, abi' bén dxiib laab ca'man tijb espad narooob në guialrniabee par gustijlaman bejn ree loj guidxliuj din gugüjt lasa' reeman.

<sup>5</sup> Chi biquied bén naj zi'c xi xiil Dios se bayon, biguiejnan rëb be bayon guin:

—jGuda!

Dxel baguian gulentie tijb way ya's, abi' bén dxiib laab ca'man tijb xijglibr. <sup>6</sup> Abi' galay guidap ree be guin biguiejnan cha' tijb bén rëb:

—Tib quil trigo lasajcan tib dxëj dxiin abi' choon quil cebada lasajcan tibdxëj dxiin, per ache güünl sejt në vin.

<sup>7</sup> Chi biquied bén naj zi'c xi xiil Dios se badajp guin, biguiejnan rëb be badajp guin:

—jGuda!

<sup>8</sup> Dxel baguian gulentie tijb way naguiëch, abi' bén dxiib laab laman guialgüjt, abi' zinal gabijl laaman. Cwa' reeman guialrniabee par gugüjt reeman tib part loj tajp lala' ree bénguidxliuj. Yu' reeman guiët por wadijl, o por guialrliaan, o por guialguijdx, o por ree be doxh yu' loj guidxliuj.

<sup>9</sup> Chi biquied bén naj zi'c xi xiil Dios se bagaay guin, baguian xan altar za' ree xsprijt ree bén bagüjt reeman guial bililadx reeman guzujdxi'ch tëë reeman loj xtiidx Dios.

<sup>10</sup> Abi' rbidxa' reeman rejs rëb reeman:

—Dios, Dad bén rniabee, lüj naj bén naya nali abi' rüjnl zi'c rayal, ¿za plact gaglaal par güün xguialguxtisil con ree bén ni bagüjt dunujn loj guidxliuj din yaguijx reeman ni been reeman?



<sup>11</sup> Dxel tijb gaj reeman cwa' tijb lajd naquich, abi' bagojn reeman laa reeman din cwëz reeman stibda'n yaza' lasa' reeman, din ryaadxri guiët ree xcompniar reeman zi'c güt reeman, bén ni cayüjn gajc ree sirv Dios.

<sup>12</sup> Chi baguian biquied bén naj zi'c xi xiil Dios se baxo'p guin, dxel guxu rejs da't abi' gubijdx gojcan nagas zi'c tijb lajd ya's. Guiáad bëew gojcan naxnia zi'c rejn, <sup>13</sup> abi' ree bajl xanyabaa biajb reen loj guidxliuj zi'c ryajb ree higo ni ya' loj yag higo chi rbi' bidoxh. <sup>14</sup> Dxel gunidloj xanyabaa zi'c tijb gui'ch ni rdüüb, abi' gra ree guia' në ree yuj riga' ree loj nijs bachaa xliajt reen. <sup>15</sup> Abi' ree rey në gra ree bén rniabee loj guidxliuj, në ree bén rniabee ree suldad në ree bén rijcw, në ree bén yu' gojl par gra, në ree bén naj zi'c bén nado', në ree bén ad najt zi'c bén nado', gra reeman baquie'chloj lën guiajbiliaa në lën ree yalaj. <sup>16</sup> Abi' rëb reeman loj ree guia' në loj ree yalaj:

—Gol biajb du guijcan, gol baquie'ch tëë dunujn loj bén zojb loj xyagxhil guialrniabee në loj xcasti bén naj zi'c xi xiil Dios, <sup>17</sup> din ma bidxin dxej doxh ni gudëed reeman casti, abi', ¿chu zajc taan casti guin?

## 7

### *Tibgayuu tiuubitap mil ree bén Israel*

<sup>1</sup> Chi gulox baguian ni guin ree, baguian tajp ree anjl za' reeman guidap xquin guidxliuj par gucwëez reeman bi ni zëed guidap xquin, chitëë guibi' bi loj guidxliuj, ni'qui loj nijsdoo, ni'qui ree loj yag. <sup>2</sup> Dxel baguian stijb anjl zëedaman niz lod rliejn gubijdx, ca'man xse Dios naban. Abi' dád rejs guneenëman guidap ree anjl guin, bén ni ca' ree guialrniabee par güün reeman ni güün reeman con guidxliuj në con nijsdoo, <sup>3</sup> rëbaman loj reeman:

—Ad xhie güüdi guidxliuj, ni'qui nijsdoo, ni'qui ree yag, xt chi ma gulox bacaa ree xse dux Dios ree lucwaj ree xbejnman.

<sup>4</sup> Dxel biguiejnan bël reeman cwa se guin lucwaj. Por gra ree bén Israel, tibgayuutiubitap mil reeman cwa se guin lucwaj. <sup>5</sup> Din chiptio'p mil ree bén zëed loj xdiaa Judá cwa se guin, në chiptio'p mil ree bén zëed loj xdiaa Rubén në chiptio'p mil ree bén zëed loj xdiaa Gad. <sup>6</sup> Në chiptio'p mil ree bén zëed loj xdiaa Aser, në chiptio'p mil ree bén zëed loj xdiaa Neftalí, në chiptio'p mil ree bén zëed loj xdiaa Manasés, <sup>7</sup> con chiptio'p mil ree bén zëed loj xdiaa Simeón, chiptio'p mil ree bén zëed loj xdiaa Leví, në chiptio'p mil ree bén zëed loj xdiaa Isacar, <sup>8</sup> chiptio'p mil ree bén zëed loj xdiaa Zabulón, chiptio'p mil ree bén zëed loj xdiaa José, chiptio'p mil ree bén zëed loj xdiaa Benjamín cwa se guin lucwaj reeman.

### *bénguixiuj najcw lajd naquich*

<sup>9</sup> Dxel baguian bénguixiuj ree, per bénguixiuj ree ni'qui chut zajc gulab laa reeman, bén ni za ree gadxagayaa guiedx, gadxagayaa diaa, bén rniee ree gadxagayaa diidx bén za ree gra lad në gadxagayaa nacion. Za' reeman delant loj xyagxhil bénrniabee në delant loj bén naj zi'c xi xiilaman. Najcw reeman lajd naquich ca' tëë reeman zijn. <sup>10</sup> Abi' rëb reeman rejs da't:

Dunujn raya'pan perdon por dux Dadan Dios  
bén zojb loj xyagxhil guialrniabee  
në por bén naj zi'c xi xiilaman.

<sup>11</sup> Abi' gadëd ro' yagxhil guin con guidap ree be ni za' yagaj con guigajlbitap ree bengol, gadëd yagaj za' gra ree anjl abi' bazuxib reeman delant loj xyagxhil Dios xt basajb guijc reeman liuj par gap reeman laaman respejt, <sup>12</sup> rëb reeman:

¡Amén! guialrniabee, gojl,  
guialrajc, respejt, diidxza'c,  
guialrlies xvaloraman në quixtëë,  
naj reen par dux Dad ree Dios zianczi në par tiblayaa. Amén.

<sup>13</sup> Loj hor zii tijb ree bengol guin gunabdiidx lon:

—¿Chu ree bén ni najcw lajd naquich guin, ban tää ree bénan?

<sup>14</sup> Badxi'nan rën:

—Ad ragbeetan Dad, lüj ragbee.

Dxel naman lon:

—Laa reeman naj bén guzagdiaj da't abi' naquich xab reeman guial ma naya reeman ma biquied xtol reeman con xrejn bén naj zi'c xi xiil Dios. <sup>15</sup> Zeel za' reeman delant xi yagxhil Dios, abi' dxej guiaal cayün reeman sirv lod zojbaman. Abi' bén zojb loj yagxhil guin ma za'man con laa reeman, abi' laaman gap laa reeman. <sup>16</sup> Ad yu'tri dxej guiliaan reeman, ad ze'c tää reeman nijs, ad zudxüü tää gubijdx laa reeman, ad zagnalaa tää reeman. <sup>17</sup> Din bén naj zi'c xi xiil Dios bén za' galay lod za' xi yagxhil Dios, laaman gap laa reeman zi'c tijb bén rajp ree xiil abi' chinëman laa reeman lod rajch nijs ni runee guialnaban. Dxel Dios laaman gutiaa loj reeman gra ree nijs bii loj reeman chi biin reeman.

## 8

### *Guigajdx se*

<sup>1</sup> Chi biquied bén naj zi'c xi xiil Dios se ni goc gajdx guin, bayajcdxe xanyabaa cost garol hor. <sup>2</sup> Dxel baguian gajdx ree anjl za' reeman delant loj Dios, cwa' reeman gajdx trompejt. <sup>3</sup> Dxel bi't stijb anjl con tijb chaabacwi ni or, guzuliman delant lo altar guin abi' yu' bén badëed zien yaal din cu'man goxyaal guin loj altar or ni za' delant loj yagxhil zagdxe ni naj zi'c xyagxhil tijb rey, din tijbzi chë'pnë goxyaal guin xtiidx gra ree xbejn Dios, diidx ni rniece reeman chi rbejdx rniab reeman laaman. <sup>4</sup> Dxel diidz ladxaa anjl guin bii goxyaal guin con ree xtiidx ree xbejn Dios, diidx ni rniece reeman chi cabejdx canab reeman laaman, abi' wë'p reen niz loj Dios. <sup>5</sup> Dxel bacha anjl guin chaabacwi guin guij ni yu' loj altar guin abi' bazurlojman laan loj guidxliuj. Abi' dád rejs guridxa' guziaaw, gojc naquie', wë'p nijs, abi' bi't xudoxh.

### *Trompejt ree*

<sup>6</sup> Dxel guigajdx ree anjl ni ca' ree trompejt guin, guzujchaaw reeman par gucwejdx reeman laan.

<sup>7</sup> Chi bacwejdx anjl yaloy guin trompejt ni ca'man, biajb guiajyabaa loj guidxliuj no'chan bajl në rejn. Dxel cost gurol guidxliuj we'c con ree yag në ree gui'xh naga' yu' lojn.

<sup>8</sup> Chi bacwejdx anjl barojp guin trompejt ni ca'man, dxel zi'c naj guia'ro' ni cacaguij naj ni biajb loj nijsdoo, abi' cost garol nijsdoo bayajcan rejn loj hor guin. <sup>9</sup> Abi' cost garol ree be ni naban loj nijsdoo güjt reeb abi' cost garol ree barcw ni yu' loj nijsdoo gunidloj.

<sup>10</sup> Chi bacwejdx anjl bayon guin trompejt ni ca'man, dxel biajb bajl xanyabaa ni narob ni cacaguij zi'c chi rtiaguij guied, loj cost garol guiw ni yu' në cost garol ree lod rajch nijs biajban. <sup>11</sup> Bajl xanyabaa ni biajb lan Ajenjo, abi' cost garol nijs guin ree gojc nala abi' dád zien ree bejn güjt guial bayajc ree nijs guin nala.

<sup>12</sup> Chi bacwejdx anjl badajp guin trompejt ni ca'man, abi' cost garol gubijdx bicajy, cost garol bëew në cost garol ree bajl xanyabaa bicajy. Abi' guial bicajy reen, dxel cost garol dxej në guiaal ad basnit.

<sup>13</sup> La'tgaj cuguian ni guin ree, biguiejnan zi'c chi rzuj tijb bisia xanyabaa. Dxel biguiejnan cha' tijb anjl rbixdiajman rëbaman:

—¡Prob, per prob, per probza ree bén ni yu' loj guidxliuj por zachoon trompejt ni ryaadx gucwejdx za choon ree anjl!

## 9

<sup>1</sup> Chi bacwejdx anjl bagaay guin trompejt ni ca'man, dxel baguian zi'c tijb bajl xanyabaa ni biajb loj guidxliuj, abi' bajl xanyabaa guin cwa'n guibliaw par guixhialan

ro' bizë ni ad yu't lod rliox. <sup>2</sup> Chi guxhalan ro' bizë guin tijb go'xh yo'xhchab brii lën bizë guin zi'c chi ririi go'xh lën tijb horn narooob, xt bascajy go'xh guin gubijdx në bi. <sup>3</sup> Abi' lën go'xh guin brii ree bi'tsu abi' bire'ch reeb loj guidxliuj, abi' cwa' reeb guialrniabee par gac reeb bedoxh zi'cgajc nixüb. <sup>4</sup> Per gunabee reeman laa reeb chitëë xhie güün reeb guixya' ree, ni'qui ree yag, ni'qui ree gui'xh naga'. Naabzi ree bën ni ad yu't ree xse Dios lucwaj. <sup>5</sup> Per ad par gugüjtt reeb bejn, naabzi par sagdiaj reeman gaay bëëw. Abi' lod rudidxa' reeb riyajnan zi'c ryajn lod rudidxa' nixüb. <sup>6</sup> Lën ree dxejzii quiil ree bejn guialgüjt, per ad zadxejlt reeman laan. Guiën reeman guiët reeman per ad zëjtt reeman.

<sup>7</sup> Bi'tsu guin ree naj reeb zi'c naj ree way ni ma za' par che reeb loj wadijl, guiyc reeb yu' zi'c coron or, abi' loj reeb naj zi'c loj bejn. <sup>8</sup> Abi' guidxguiyc reeb naj zi'c guidxguiyc béngunaa, guiáad dxidlay reeb naj zi'c dxidlay beedx. <sup>9</sup> Guidib luxdoo reeb nada'cwan zi'c guiib, abi' xhiil reeb rüjnan naquie' zi'c rajc naquie' chi ruxüünnë ree way carrejt loj wadijl. <sup>10</sup> Abi' xbaan reeb naj zi'c xbaan ree nixüb, abi' con lupuntan rudidxa' reeb. Con xbaan reeb yu' reeb gojl par gusagdiaj reeb bejn ree loj gaay bëëw. <sup>11</sup> Anjl ni rniabee bizë ni ad yu't lod rliox laaman rniabee ree bi'tsu guin. Anjl guin con diidx Hebreo laaman Abadón, abi' con diidx grieg laaman Apolión, diidx guin ree rën guiëb reen bën ruloox.

<sup>12</sup> Zian rliox guialzi yaloj, dxel gui't zatio'p guialzi.

<sup>13</sup> Chi bacwejdx anjl baxo'p trompejt ni ca'man, dxel biguejnan tijb cha' bejn briin galay ree cajch ni za' guidap xquin altar or ni za' delant loj Dios. <sup>14</sup> Cha' bën biguejnan rëbaman loj anjl baxo'p bën ca' trompejt guin:

—Baslaa guidap ree anjl ni naxii ro' guiiw ro' ni la Eufrates.

<sup>15</sup> Zian bidxin or, bidxin dxej, bidxin bëëw në ijz ni naj par laa guidap ree anjl guin din gugüjt reeman garol ree bénguidxliuj. <sup>16</sup> Abi' biguejnan bël naj xsuldad reeman bën dxiib ree way. Naj reeman tio'pgayuu millon. <sup>17</sup> Ze baguian way guin ree con ree bën dxiib laa reeb: Bén dxiib ree way guin, guidib luxdoo reeman nada'cw guiib culor xnia, ni sul në ni naguiëch. Abi' guiyc ree way guin naj reen zi'c guiyc ree beedx, abi' ro' reeb ririi bajl, go'xh në azufre. <sup>18</sup> Abi' garol ree bénguidxliuj güjt por bajl guin, go'xh guin në azufre guin ni ririi ro' reeb. <sup>19</sup> Con ro' ree way guin rugüjt reeb bejn ree, abi' con xbaan reeb rucheelguijdx reeb din lupunt xbaan reeb najn zi'c guiyc bëël.

<sup>20</sup> Per los demasri ree bën ni ad güjtt por ree guialzi guin, ad basa'nt reeman ni mal rüjn reeman. Ad bacwëëzt rën reeman xindxab ree con ree Dios ni naj or, plajt, bronce në ree dios guiaj con ree dios yag, dios ni ad rajct ruguiaa, ad rajct riguejcn ad rajc tëët rza reeman. <sup>21</sup> Ad bacwëëzt tëët rugüjt reeman bejn ree, ad basa'n tëët reeman guialbidxaa, ad basa'n tëët reeman ni dxuudx ni rüjn reeman con bën ad najt lacheel reeman, ad basa'n tëët reeman guialgubaan.

## 10

### *Tijb anjl ca' gui'ch*

<sup>1</sup> Dxel baguian stijb anjl bën gojl da't, zidguiajtaman xanyabaa lën tijb zaj abi' guiycaman dxiib tijb guidgaj. Lojman naj zi'c gubijdx, abi' guia'man naj zi'c tio'p bajl ziool. <sup>2</sup> Dxel ca'man tijb librdoo naxal lojn. Abi' bazuj guia' ladbeeman loj nijsdoo, abi' guia'man lad ruvejs bazujman laan loj guidxliuj. <sup>3</sup> Dxel guridxa'man rejs da't zi'c rbidxa' beedx, chi guridxa'man guridxa' gajdx ree guziaaw. <sup>4</sup> Chi gulox guridxa' gajdx ree guziaaw guin, ma nucan ni rëb guigajdx ree guziaaw guin chi biguejnan cha' tijb bën na lon diizd xanyabaa:

—Ad gucaal ni gunee guigajdx ree guziaaw guin, din ad rayalt gagbee ree bejn laan.

<sup>5</sup> Abi' anjl ni baguian za'li loj nijsdoo në loj guidxliuj gules yaa ladbeeman xanyabaa, <sup>6</sup> abi' badëë xtiidxaman por bën naban tiblayaa, bën been xanyabaa, guidxliuj në nijsdoo, në gra ni yu' xanyabaa, loj guidxliuj në loj nijsdoo guial ad zaglaatri gac ni rayal gac. <sup>7</sup> Din chi gucwejdx anjl ni goc gajdx trompejt ni ca'man dxel ma bidxin dxej gac zi'c

naj xixgab Dios, zi'c bagojnman loj ree bén badëë xtiidx Dios loj ree bejn bén ni rüjn ree sirv lojman.

<sup>8</sup> Dxel zatiĵb gaj gunee bén ni guneenë naj diidz xanyabaa, naman:

—Wej bica' librdo ni zojbyal loj ladxaa anĵl ni za' loj nijsdoo në loj guidxliuj.

<sup>9</sup> Dxel wan lod za' anĵl guin, rën lojman din gunee man librdo guin lon, dxel naman lon:

—Cwa'n gudawan. Ro'l guiatan nejxh zi'c dxijn, per lënl nala yaban.

<sup>10</sup> Dxel cwa'n librdo guin ladxaa anĵl guin, abi' gudawanan. Ro'n biguiaĵtan nejxh zi'c dxijn, per chi gulox gudawanan nala biguiaĵtan lënan. <sup>11</sup> Dxel bagojn reeman naj gual gusnuu gugojnan bejn ree ni na Dios gac con zien ree nacion, rey ree në ree guiedx, xhietëëz diidz rniee reeman.

## 11

### *Tio'p ree testiw*

<sup>1</sup> Abi' baneeman tiĵb var ni rtia'beenë bejn, naman lon:

—Bisu bica'bee xyadoo Dios në altar, dxel gulabil bén cayajp ree Dios respejt lën yadoo guin. <sup>2</sup> Per ad tia'beel lule' yadoo guin din lule' guin ma badëë Diosan loj ree bén ad najt ree bén Israel, laa reeman naj Bén Gusagdiaj ree Bén Jerusalén loj choon iĵz garol. <sup>3</sup> Abi' naj gaxhalan tio'p ree da bejnan din guza't reeman naj. Grop reeman gacw lajd ya's, abi' laa reeman guiniee da diidxan choon iĵz garol.

<sup>4</sup> Grop ree Bén guin naj grop ree yag olivo në grop ree candeler ni za' loj dux Dad ree Dios Bén rniabee loj guidxliuj. <sup>5</sup> Bal chu Bén rën güünnë laa reeman xhienin, ro' reeman grii bajl din gugĵjt reeman Bén rdxe'ch ree laa reeman. Zian guiët ree Bén rën güün laa reeman xhienin. <sup>6</sup> Grop ree Bén guin rajp reeman gualrniabee par gusiaaw reeman xanyabaa chitëë gal guia loj choon iĵz garol guin chi guiniee reeman da diidxan. Rajp tëë reeman gualrniabee par guchaa reeman nijs gacan rejn, abi' zajc guiniab reeman din gui't graloj gualzi loj guidxliuj bëltëëz volt rën reeman. <sup>7</sup> Per chi ma bayaaloj tiamp ni guiniee reeman da diidxan, dxel tiĵb monstuo, tiĵb be doxh grii lën bizë ni ad rliox, be guin ca'pnë laa reeman abi' güünb laa reeman gan abi' gugĵjtib laa reeman. <sup>8</sup> Dxel gaa xcuerp reeman lunejz luguiedx Jerusalén lod güt xdad reeman Jesucrist loj crĵjz, luguiedx ni naj yan zi'cgajc Sodoma në Egipto. <sup>9</sup> Dxel graloj ree bejn Bén rniee ree gadxagayaa diidz, Bén gralad ree, Bén za graloj ree nacion zuguaa reeman gaa xcuerp ree Bén guin lunejz choon dxej garol, per ad zatiĵbt reeman guiguie'ch ree Bén guin. <sup>10</sup> Abi' ree Bén naban loj guidxliuj dád yabaa reeman gual ma güjt ree Bén guin, abi' gual tant yabaa reeman xt yazaladx reeman xhie renin loj lasa' reeman, din par laa reeman dád basagdiaj ree Bén guin laa reeman. <sup>11</sup> Per chi ma bayaaloj choon dxej garol guin, yasban Dios Bén guin ree dxel chixche reeman abi' gra ree Bén guguaa dád guidxeb reeman. <sup>12</sup> Dxel dád rejs biguien cha' tiĵb Bén ni gunee xanyabaa, rëbaman loj grop ree Bén guin:

—Gol wë'p guie.

Abi' wë'p reeman xanyabaa lën tiĵb zaj delant loj gra ree Bén rdxe'ch laa reeman. <sup>13</sup> Hor ni bayë'p reeman xanyabaa bi't tiĵb xudoxh abi' zien ree ni bize'n luguiedx guin abi' gajdx mil bejn güjt. Guiáad gra ree Bén ad güjtt dád bidxeb reeman abi' gules reeman xvalor Dios Bén yu' xanyabaa. <sup>14</sup> Zian rliox gualzi rarojp, dxel laa zëëd gajc gualzi ni rayon.

### *Trompejt ni goc gajdx*

<sup>15</sup> Chi bacwejdx anĵl ni goc gajdx guin trompejt ni ca'man, dxel rejs da't biguien cha' ree bejn xanyabaa rëb reeman:

Ma bidxin dxej yaya'n gra xgualrniabee guidxliuj loj dux Dad ree Dios

në loj Jesucrist abi' nabee reeman zianczi në tiblayaa.

<sup>16</sup> Guigajlbitap ree bengol zojb loj xyagxhil reeman delant loj Dios, bazuxib reeman xt basajb loj reeman liuj gojp reeman laaman respejt, <sup>17</sup> rëb reeman:

Dux Dadan Dios, lüj rajp gra gualrniabee  
abi' najl Dios yan në diizd gocli abi' gui'til.

Quixtëë lüj guial ma culüü xgualrniabee naroo bil ni rajpil  
abi' ma guzulojl canabeel.

<sup>18</sup> Bénguidxliuj ree bidxe'ch reeman,  
per ma bidxin dxej gulüü xgualrdxe'chil.

Ma bidxin dxej güün xgualguxtisil con ree bengüt  
par gudëel ni rayal tia' ree xbejnl

bén badëed ree xtiidxil, në ree Bén bililadx lüj.

Në ree Bén rajp lüj respejt.

Ma bidxin dxej zi'c ree benzojbloj në ree Bén ad zojblojt tia' reeman ni rayal reeman,  
dxel guidlojl Bén ruxhiin ree loj guidxliuj.

<sup>19</sup> Chi gulox rëb reeman zian, bixal xyadoo Dios xanyabaa dxel biguien xcaj promejs  
ni been Dios diizd gocli. Dxel guzuloj rë'p nijs, rajc naquie', rëez guziaaw, bi't xudo'xh  
abi' dád zro' biajb guiajyabaa.

## 12

### *Tijb béngunaa në tijb dragon*

<sup>1</sup> Dxel gojc tijb sen ro' xanyabaa. Balüüloj tijb béngunaa nadüübaman gubijdx, abi'  
nuzuj guia'man loj bëw abi' guijcaman yu' coron ni gocchaaw con chiptio'p bajl  
xanyabaa. <sup>2</sup> Yu' xi'n béngunaa guin abi' rbixdiajman ragnaa lënman guial ma gal xi'nman.

<sup>3</sup> Per gojc stijb sen xanyabaa. Balüüloj tijb dragon ro', tijb bedoxh najb culor xnia.  
Yu' gajdx guijquib, chii xcajchib yu' tëë tijb coron tijb gaj guijquib. <sup>4</sup> Abi' con xbaanb  
bazaalib cost garol bajl xanyabaa loj guidxliuj. Dxel guzujb loj béngunaa guin din gawib  
xi'nman naabzi galix. <sup>5</sup> Gojl xi'n béngunaa guin tijb xindo niguiaaw, abi' laax nabee loj  
guidxliuj con tijb var guiib. Dxel biquied reeman laax loj xniaax, bidxinx lod zojb Dios  
lod canabeeman. <sup>6</sup> Abi' béngunaa guin baxüünman par niz lod naj ganax yujbidx, lod ma  
beenchaaw Dios par laaman, lod gudëed reeman ni gawaman choon ijz garol.

<sup>7</sup> Dxel guyu wadijl xanyabaa, anjl ni la Miguel con ree xi anjlaman gudijlnë reeman  
dragon guin con ree xi anjlib. <sup>8</sup> Per ad beent be guin gan con ree xi anjlib loj anjl Miguel  
con ree xi anjlaman, dxel ad gojctri nibajn be guin xanyabaa con ree xi anjlib. <sup>9</sup> Zianan  
zeel bazaal reeman dragon guin loj guidxliuj con ree xi anjlib. Dragon guin naj bëel  
gulal ni la xindxab në satanás xin rusquiee gra ree bénguidxliuj.

<sup>10</sup> Dxel biguien cha' tijb bejn rejs da't diizd xanyabaa rëbaman:

—Ma bidxin dxej baslaa Dios dunuj ree, ma bidxin xgualrniabeeman chi  
nabeenëman Jesucrist, din ma biquied Bén rbe'c xgualquia ree dux compniar ree,  
Bén rdxinnë ree gualquia guin loj dux Dad ree Dios dxej guiaal. <sup>11</sup> Abi' dux compniar  
ree been reeman gan por rejn ni guxhie' Bén naj zi'c xi xiil Dios në por ni rëb reeman  
xhienaag rliladx reeman xtiidx Dios, ad bidxebt reeman majsi niëjt reeman. <sup>12</sup> Zeel  
gol badxe' luxdoodi nix gra ree Bén zojb xanyabaa per, jprobza lëjt Bén zojb ree loj  
guidxliuj në ree be yu' loj nijsdoo! Din ma biguiajt xindxab lod zojbidi, dád rdxe'chix  
guial ragbeex sta'nz dxej raya'n par laax.

<sup>13</sup> Chi baguiaa dragon guin guial ma biajbib guidxliuj, dxel briinalib béngunaa naj  
xniaa xindo guin. <sup>14</sup> Dxel badëe reeman tio'p xiil béngunaa guin zi'c xiil bisiaro' din gac  
suman loj bëel guin xt lod naj ganax yujbidx, lod gudëed reeman ni gawaman choon ijz  
garol. <sup>15</sup> Abi' gulëe ro' dragon guin tijb guiw nijs din chinën béngunaa guin. <sup>16</sup> Per bixal  
loj guidxliuj persi gu'n guibidx nijs gulëe ro' dragon guin. Zian been guidxliuj béngunaa

guin yudar. <sup>17</sup> Dxel dád bidxe'ch dragon guin béngunaa guin, abi' zitiñeb sta'n ree bèn ni za loj xdiaaman, bèn ruzoob ree xtiidx Dios zinal tée reeman xtiidx Jesucrist.

## 13

### *Tio'p ree bedoxh*

<sup>1</sup> Wej dragon guin bisub ro' nijsdoo. Abi' naj baguia guial brii tijb monstruo loj nijsdoo, tijb bedoxh be yu' gajdx guiyc, chii xcajchib abi' loj tijb gaj cajch guin yu' tijb gaj coron, abi' loj guigajdx guiiquib ca tijb diidx ni rnieeguijdx Dios. <sup>2</sup> Bedoxh ni baguian naj zi'c tijb tigr, per guia'b najn zi'c naj guia' ojs, abi' ro'b najn zi'c ro' beedx. Dxel dragon ni guzu ro' nijsdoo badëëdib loj monstruo guin xluarib lod rniabeeb abi' guialrniabeero' ca'b par nabeeb. <sup>3</sup> Tijb guiyc monstruo guin baguian tijb lod nadxeelguijdx ni rulüü ad zusbajnt laab, per bayajc lod nadxeelguijdx guin abi' gra ree bénguidxliuj badxaloj abi' binal reeman monstruo guin. <sup>4</sup> Dxel gojp da't reeman respejt dragon guin guial badëëdib guialrniabee loj monstruo guin gojp da't tée reeman respejt monstruo guin, rëb reeman: —¿Chu naj zi'c monstruo guin abi' chu zajc til con laab?

<sup>5</sup> Monstruo guin gojchaaw ro'b par guilies xvalor gajquib, abi' guinieeguijdxib Dios, gojpib guialrniabee par güünb zian loj choon ijz garol. <sup>6</sup> Abi' guneeguijdxib Dios, guneeb diidxmal ree por laaman, por xyadooman në por gra ree bèn zojb xanyabaa. <sup>7</sup> Gojp monstruo guin permis par sub contr ree xbejn Dios abi' güünb laa reeman gan. Abi' gojpib guialrniabee par nabeeb graloj ree bejn, bèn ni rniee ree gadxagayaa diidx, bèn gra lad ree, gra ree nacion. <sup>8</sup> Gra ree bèn ad cat laj loj xlibr guialnaban diizd chi gad guidxliuj gacchaaw, loj xlibr bèn naj zi'c xi xiil Dios bèn güt por ree bejn, gra reeman gap da't respejt monstruo guin. <sup>9</sup> Bén rën ree gucaagdiajg, gol bacaagdiajg. <sup>10</sup> Bén naj che ladxguiib, cheman ladxguiib. Bén naj guiët con espad, con espad guiëtaman. Zeel bèn naj ree xbejn Dios ad yadxaguidi ad gucwëez tée chililadxidi Dios.

<sup>11</sup> Dxel baguian stijb monstruo ren briib loj guidxliuj, yu' tio'p xcajchib zi'c xcajch xiil, per cha'b naj zi'c cha' dragon. <sup>12</sup> Abi' lasa'gajc guialrniabee ca' monstruo ni brii loj nijsdoo lasa'gajcan ca'b abi' por laab gojp da't ree bejn respejt monstruo ni brii loj nijsdoo, monstruo ni bayajc lod nadxeelguijdx ni rulüücüzi gugüjt laab. <sup>13</sup> Abi' monstruo ni brii loj guidxliuj në gajquib rüjn milagr narooob ree, xt rajc rniabeeb rguiajt bajl diizd xanyabaa xt loj guidxliuj delant loj ree bejn. <sup>14</sup> Zian rusquieeb bénguidxliuj ree por ree milagr ni rüjnb delant loj monstruo ni brii loj nijsdoo, abi' rniabeeb rüjn ree bénguidxliuj tijb xfigur monstruo ni brii loj nijsdoo, monstruo ni bidxeelguijdx con espad abi' gubajnb. <sup>15</sup> Abi' monstruo ni brii loj guidxliuj xt gojpib guialrniabee par gudëëdib guialnaban loj xfigur monstruo ni brii loj nijsdoo, par guiniee figur guin në par gugüjtib gra ree bèn ni ad rajpt respejt figur guin. <sup>16</sup> Gunabee tée monstruo ni brii loj guidxliuj gra ree bejn, zi'c ree bengol zi'c ree xindoo, benrijcw ree në ree bènprob, bèn naj ree zi'c bèn nado' në ree bèn ad najt zi'c bèn nado', din chu' sen yaa reeman ladbee o lucwaj reeman. <sup>17</sup> Abi' achut zajc sii o guto' ya bal id ca reeman sen guin, abi' sen guin naj laj monstruo guin o xinumrib.

<sup>18</sup> Guie ryaadx guialrignia'. Bén rajp guialrignia' cwëë xcwentaman con xnumbr monstruo guin, abi' numbr guin naj xho'pgayuu gayojnbixho'p. Con numbr guin ririi laj tijb bénguidxliuj.

## 14

### *Cant ni biil tibgayuu tiuubitap mil ree bejn*

<sup>1</sup> Baguia téen guial za' bèn naj zi'c xi xiil Dios guiyc dajn ni la Sión. Bén naj zi'c xi xiil Dios za'man con tibgayuu tiuubitap mil ree bejn, graczi reeman ca lucwaj reeman laj bèn naj zi'c xi xiil Dios në laj xDadaman. <sup>2</sup> Abi' biguiejnan tijb naquie' xanyabaa zi'c naquie' rüjn zil da't nijs, o zi'c rguien rbidxa' guziaaw rejs da't, o zi'c chi rusijdx zien ree bejn arp.

<sup>3</sup> Dxel rool reeman tijb cant cüb delant loj yagxhil lod zojb bén rniabee në loj guidap ree be za' yagaj në loj ree bengol guin. Ad zile't chu gusiid cant guin, naabzi ree bén tibgayuu tiuubitap mil guin, laa reeman naj Bén gulaa loj ree bénguidxliuj. <sup>4</sup> Abi' laa reeman naj ree xinguaaw ni ad bagaalt béngunaa, gojc reeman naya abi' zinal reeman Bén naj zi'c xi xiil Dios bantëez guin rejman. Laa reeman naj ree Bén gulaa loj ree bénguidxliuj abi' zi'c guialnaza'c yaløj ni rinë bejn loj Dios zian naj reeman delant loj Dios në delant loj Bén naj zi'c xi xiil Dios. <sup>5</sup> Ad goct basquiee reeman, nayadxuj reeman delant loj Dios.

### *Ruson ni badëë guiyon ree anjl*

<sup>6</sup> Dxel baguian tijb anjl rzujman xanyabaa con tijb ruson ni naj par tiblayaa par gugojnman gra ree Bén naban loj guidxliuj, xhietëez diidx rniee reeman, o xhietëez loj diaa zëed reeman, o xhietëez ciuda o nacion zëed reeman. <sup>7</sup> Dxel dád rejs gunee anjl guin rëbaman:

—Gol bidxeb Dios, gol gules xvaloraman, din ma bidxin hor yadëed ree bejn cwent lojman. Gol gojp da't respejt Bén been xanyabaa, guidxliuj në nijsdoo në lod rajch nijs.

<sup>8</sup> Dxel rëb stijb anjl:

—Ma biajb, ma biajb Babilonia din zi'c chi rusüdx tijb bejn stijb bejn, zian ma basquiee ciuda narooB guin gra ree bénguidxliuj guial güün reeman graloj ree nidxuudx, graloj ree dol ro'.

<sup>9</sup> Dxel rejs da't gunee anjl bayon guin rëbaman:

—Bal chu gap da't monsturo guin respejt con xfigurib abi' tiëbaman tia xsenb lucwajman o yaaman, <sup>10</sup> Bén zii yayal xcasti narooB Dios, zro' da't gudëedaman laaman casti. Abi' sagdiajman loj bajl ni caye'c azufre delant loj ree xianjl Dios në delant loj Bén naj zi'c xi xiil Dios. <sup>11</sup> Ad yu' tëet dxej yayü' bajl guin. Ni'qui radxe ni'qui guiaal achet guialraziiladx par ree Bén rajp da't respejt monsturo guin con xfigurib, o Bén ca ree xsenb. <sup>12</sup> Zeel Bén naj ree xbejn Dios Bén ruzoob ree xtiidxaman abi' rliladx reeman Jesucrist, ad rayalt yalenya' reeman.

<sup>13</sup> Biguiejn tëen cha' Bén ni na lon diizd xanyabaa:

—Bacaa ni ganin lojl: “Diizd yan xiquilbaa ree Bén rëjt con guialrliladx Jesucrist.”

Dxel rëb xSprijt Dios: “Walican din ma yaziiladx reeman xcwent ree guialzi ni gudëd reeman abi' chinë reeman guialbenza'c reeman.”

### *Guialnaza'c ni runee guidxliuj*

<sup>14</sup> Dxel baguian tijb zaj naquich abi' loj zaj guin zojb zi'c tijb bejn. Yu' tijb coron or guijcaman abi' yaaman ca'man tijb hoz ni nadoxh ro'. <sup>15</sup> Dxel brii stijb anjl lën yadoo abi' rejs da't gunee man Bén ni zojb loj zaj guin rëbaman:

—Badxe' xi hosil, batüüg ree guialnaza'c loj guidxliuj din ma gojl reen ma bidxin tiamp ni yado'p reen.

<sup>16</sup> Abi' Bén zojb loj zaj guin badëed xi hosaman loj guidxliuj abi' bato'paman guialnaza'c loj guidxliuj.

<sup>17</sup> Dxel brii stijb anjl lën yadoo ni naj xanyabaa, ca' gajcaman tijb hoz ni nadoxh ro'.

<sup>18</sup> Dxel niz loj altar brii stijb anjl Bén rajp guialrniabee par bajl, abi' dád rejs gunee nëman Bén ca' hoz ni nadoxh ro' guin, rëbaman lojman:

—Badxe' xi hosil ni nadoxh ro', batü' ree uv ni yu' loj guidxliuj din ma gojl reen ma gojl tiamp ni yado'p reen.

<sup>19</sup> Dxel badëed anjl guin xi hosaman loj guidxliuj guin, abi' bato'paman uv guin ree loj guidxliuj. Abi' badxe'man uv guin ree lod guixii reen, laan rën guiëb lod yu' xcasti Dios.

<sup>20</sup> Dxel xijch ciuda guin bixii ree uv guin abi' lën lod bixii ree uv guin birii rejn. Rejn guin bixie'n loj guidxliuj zi'ct choon gayuu kilometro abi' wë'pan zi'ct xt niz ro' ree way.

## 15

### *Bén naj ree xi anjl Dios con guigajdx ree guialzi*

<sup>1</sup> Dxel baguian stijb senro' xanyabaa, tijb sen ni diidxli badxaloj bejn: Baguian gajdx ree anjl con gajdx guialzi. Guialzi guin ree naj gajdx ni chigra gac din con guialzi guin ree gusiaaloj Dios xcastiman.

<sup>2</sup> Baguia tëën zi'c nijsdoo, per najn zi'c tijb vidr xcolor bajl. Dxel lojn za' ree bén been ree gan loj monstroo, loj figur con loj xnumbrib, ca' reeman arp ni badëed Dios loj reeman. <sup>3</sup> Abi' cayool reeman xcant Moisejs xbejn Dios në xcant bén ni naj zi'c xi xiil Dios, rëb cant guin:

Naroob në ni diidxli radxaloj bejn

naj ree ni rüjnl, dux Dadan Dios Bén rajp gra guialrniabee.

Xnejz da't në zi'c rayal rüjnl,

lүj guial rniabeel gra ree bénguidxliuj.

<sup>4</sup> ¿Chu ad zadxebt lүj?

¿Chu ad zuza'tt lүj zagdx, dux Dadan Dios?

Tijbzi lүj naj bén naya nali

abi' bénguidxliuj gui't gap da't reeman lүj respejt

guial ma balüül bejn ree guial xnejz rüjnl.

<sup>5</sup> Chi gulox baguian ni guin ree, dxel baguian bixal luar lod mazri nagle' lën xyadoo Dios xanyabaa. <sup>6</sup> Abi' lën yadoo guin brii gajdx ree anjl bén ca' ree gajdx ree guialzi, najcw reeman lajd naquich ni rdiin bacha', abi' naxii tijb cinch or luxdoo reeman. <sup>7</sup> Abi' tijb guidap ree be ni za' lod za' Dios, badëeb loj tijbgaj ree anjl guin tijb cojp or ni guidxa xcasti Dios bén naban guidib tiamp në par tiblyaa. <sup>8</sup> Abi' lën yadoo guin gudxan xgo'xh xbacha' Dios në xguialrniabeeman. Achut gojc niu lën yadoo guin xt chi ma gulox guigajdx ree guialzi ni zidnë ree anjl guin.

## 16

### *Cojp ni guidxa ree xcasti Dios*

<sup>1</sup> Dxel biguiejnan cha' bejn rejs da't guneeman diizd lën yadoo guin, rëbaman loj guigajdx ree anjl guin:

—Gol chej, gol bigla't xcasti Dios ni yu' loj guigajdx ree cojp guin loj guidxliuj.

<sup>2</sup> Dxel wej anjl yaloj guin, bala'taman ni yu' loj xcojpaman loj guidxliuj. Abi' gra ree bén ni yu' xsen monstroo guin bén gop da't ree respejt xfigurib, brii guidaxyoodx lad reeman, ni rdoob da't.

<sup>3</sup> Abi' anjl barojp guin bala'taman ni yu' loj xcojpaman loj nijsdoo. Abi' nijs guin bayajcan rejn zi'c xrejn tijb bengüt abi' gra ree be naban loj nijs guin güjt.

<sup>4</sup> Anjl bayon guin bala'taman ni yu' loj xcojpaman loj ree guiw në lod rajch ree nijs abi' nijs guin ree bayajc reen rejn. <sup>5</sup> Abi' biguiejnan rëb anjl ni rniabee ree nijs guin:

—Xnejz naj ni cayüjnl në zi'c cayüjn xguialguxtisil, Dad Dios, lүj naj bén naya nali, najl Dios yan në diizd gocli. <sup>6</sup> Din bénguidxliuj ree guxhie' reeman rejn bagüjt reeman xbejn reel në ree bén badëed ree xtiidxil. Zeel ma badëedil rejn guië' reeman, abi' zian rayal reeman.

<sup>7</sup> Abi' niz loj altar biguiejnan cha' stijb bén rëb:

—Walican, Dad Dios Bén rajp gra guialrniabee. Xnejz në zi'c rayal cayüjn xguialguxtisil.

<sup>8</sup> Abi' anjl badajp guin bala't ni yu' loj xcojpaman loj gubijdx din guze'can bejn ree zi'c bajl. <sup>9</sup> Gra reeman we'c por xguialnalaa da't gubijdx guin. Per ni'qui zian ad bayüjnt reeman xgab por xtol reeman, ad baza'tt reeman Dios zagdx guneeguijdxli reeman laaman, laaman guial najman bén rniabee ree guialzi guin.



<sup>10</sup> Anjl bagaay guin bala'taman ni yu' loj xcojpmaman lod rbej monstuo ni rniabee guin, abi' bicajy loj guidxliuj, abi' xt rawya' lüdx ree bejn por guialzi ni cadëd reeman. <sup>11</sup> Per ni'czi zian ad basa'nt reeman ni mal ni rüjn reeman, al mazri been reeman por guialzi ni gudëd reeman në por guida ni gudxib lad reeman, guneeguidx reeman Dios bën zojb xanyabaa.

<sup>12</sup> Anjl baxo'p guin bala't ni yu' loj xcojpmaman loj guiwro' la Eufates abi' gubidx nijs loj guiw guin. Zian bixal nejz din täd ree rey bën zëed ree lad lod rliejn gubijdx. <sup>13</sup> Dxel baguian ro' dragon guin, con ro' monstuo guin në ro' bën rusquiee rëb rudëe xtiidx Dios loj ree bejn brii choon ree sprijt mal ni naj zi'c bidx. <sup>14</sup> Guiyon ree sprijt guin naj xsprijt xindxab, abi' rüjn reen milagr abi' rej reen lod za' gra ree rey loj guidxliuj persi rado'p reeman din til reeman con Dios bën rajp gra guialrniabee, dxej ni gui'taman guidguieenman gan loj gra reeman.

<sup>15</sup> Rëb Jesucrist:

—Gol badxe'guijc guial dxejczy guialan zi'c chi ri't tijb xingubaan tijbzi golp. Xiquilbaa ree bën rbëz naj, bën za'sin ree chi guialan din chitëe yaya'nxtu reeman zi'c chi rniaaz bën za' zibëel.

<sup>16</sup> Sprijt mal guin ree bato'p gra ree rey ni yu' loj guidxliuj tijb luar lod la Armagedón con diidx hebreo.

<sup>17</sup> Abi' anjl bagajdx guin bala't ni yu' loj xcojpmaman loj bi, abi' diizd lën yadoo ni yu' xanyabaa niz lod za' xyagxhil bën rniabee, biguien rejs da't cha' bën rëb:

—Ma bayaaloj gojc ni rayal gac.

<sup>18</sup> Abi' guzuloj rë'p nijs, rajc naquie', rbidxa' guziaaw dxel bi't xudoxh, tijb xudoxh ni ad goct wayi't diizd guzuloj yu' bejn loj guidxliuj, din xu guin naj ni mazczi ni doxh.

<sup>19</sup> Abi' gula' ciuda narooob guin gojcan choon lala', dxel guidib guidxliuj bize'n ree ciuda në ree guiedx. Abi' Dios ad bayanladxtaman Babilonia par gudëe xcasti ro'man loj ciuda narooob guin. <sup>20</sup> Abi' gunijt ree gra yuj riga' loj nijsdoo në ree guia'. <sup>21</sup> Biajb tëe guiajyabaa guiyc ree gra ree bénguidxliuj, dxel tijbgaj ree guiaj yabaa guin na' reen cost tiuu quil. Abi' ree bejn guneeguidx reeman Dios, por ree guialzi guin, guial dád ni doxh gojc chi biajb ree guiajyabaa guin.

## 17

### *Guialguxtis ni güün Dios con béngunaa dxuudx*

<sup>1</sup> Abi' tijb guigajdx ree anjl guin bi'taman naman lon:

—Guda din gulün lüj casti ni rayal béngunaa dxuudx ni zojb loj nijsro', <sup>2</sup> laaman goc xtuu ree rey ni yu' loj guidxliuj, abi' zi'c rusüdx tijb bejn stijb bejn, zian bazaalguiiwan bejn ree loj guidxliuj con ree ni ad rüjnt sirv ni rüjnman.

<sup>3</sup> Abi' por xsprijt Dios binë anjl guin naj lod naj ganax yujbidx. Ni baguian tijb béngunaa dxiibaman tijb monstuo xnia, abi' guidib ladib ca diidxguijdx par Dios, yu' gajdx guijquib con chii xcajchib. <sup>4</sup> Abi' béngunaa guin najcwaman lajd murad në ni xnia, najcchaawnën ganax or në ree guiaj zagdxë në ree perl. Abi' ca'man tijb cojp or guida ree ni nabixhladx lojn në ree ni dxuudx ni rüjnman. <sup>5</sup> Abi' lucwajman ca tijb letrer ni achutczi rignia' ni rën guiëban, rëb loj letrer guin: “Babilonia, ciuda narooob ni naj xniaa ree béngunaa dxuudx në xniaa ree ni dxuudx ni rajc loj guidxliuj,” <sup>6</sup> Dxel gogbeen guial rzüdx béngunaa guin con xrejn ree xbejn Dios, con xrejn ree bën ni güt guial guneë reeman xtiidx Jesús. Abi' dád badxalon chi baguian zian. <sup>7</sup> Dxel na anjl guin lon:

—¿Chexc zeel dád radxalojl? Naj gusignia' lüj ni rën guiëb béngunaa ni baguiaal në monstuo ni dxiibaman, be ni yu' gajdx guiyc con chii xcajch. <sup>8</sup> Monstuo ni baguiaal, laab naj be guban gocli, per yan ad nabantrib. Per gulüülojb lën bizë ni ad yu't lod rliox dxelri nidlojb tiblayaa. Abi' ree bën naban loj guidxliuj, bën ni ad cat ree laj loj xlibr

guialnaban diizd gocli chi gad guidxliuj gacchaaw, laa reeman yadxaløj chi guguaa reeman monstroo ni guban gocli, be ad nabant yan per gui'tib.

<sup>9</sup> 'Guie ryaadx quiarguejn. Guigajdx guiç monstroo guin rën guiëban gajdx guia' lod zojb béngunaa guin <sup>10</sup> rën tëë guiëban gajdx ree rey. Gaay ree rey guin ma gudëëd xguialrniabee, abi' bën baxo'p guin naj bën canabee yan. Dxelri nabee bën bagajdx guin, per ad xchejt nabeeman. <sup>11</sup> Abi' monstroo ni guban gocli, abi' yan ad nabantrib, laab gac rey baxujn, per loj gajc gajdx ree rey guin grii rey gac xhujn dxel yayalib lod rayalib casti par tiblayaa.

<sup>12</sup> 'Guidxii cajch ni baguiaa rën guiëb chii ree rey ni ad wazulojt nabee. Per chi tia' reeman guialrniabee, ad xchejt nabee reeman con monstroo guin. <sup>13</sup> Abi' guidxii ree rey guin yaya'n reeman diidx abi' yayü xguialguxtis reeman con xguialrniabee reeman loj monstroo guin, <sup>14</sup> abi' til reeman con bën naj zi'c xi xiil Dios. Per güün bën naj zi'c xiil guin laa reeman gan din laaman naj Dad loj gra ree dad, naj tëëman rey loj gra ree rey. Abi' bën za' ree con bën naj zi'c xi xiil Dios, laa reeman naj bën bazoob xtiidx Dios, bën ma naj ree par laaman abi' diidxli zinal reeman xnejz Dios.

<sup>15</sup> Na tëë anjl guin lon:

—Nijs ni baguiaa lod zojb béngunaa dxuudx guin laan rën guiëb graløj ree bën rniee graløj ree diidx, bën gra lad ree, bën zëëd ree gra loj ree nacion. <sup>16</sup> Abi' monstroo guin con guidxii xcajchib ni baguiaa, guidxe'ch reeman béngunaa dxuudx guin, tio'nladx reeman laaman, gusa'n reeman zibëëlamán, gaw reeman xbëëlamán abi' guze'c reeman laaman. <sup>17</sup> Dios yazaladx loj guidxii ree rey guin quiarguejn din güün reeman zi'c rënman. Yaya'n reeman diidx din yayü xguialrniabee reeman loj monstroo guin, xt gac cumplid ni rëb Dios gac. <sup>18</sup> Abi' béngunaa ni baguiaa, laaman naj ciuda naroo ni rniabee ree rey yu' loj guidxliuj.

## 18

### *Biajb guiedx Babilonia*

<sup>1</sup> Chi gulox baguian ni guin ree, dxel baguian stijb anjl zidguiajtaman xanyabaa. Rajpaman zro' guialrniabee, abi' xbacha'man basni guidib guidxliuj, <sup>2</sup> abi' rnieeman rejs da't rëbaman:

—Ma biajb, ma biajb Babilonia ma naj ciuda naroo guin zi'c lidx ree xindxab, zi'c lidx ree graløj ree sprijt mal, zi'c lidx ree graløj ree be ni rzuj, bedxuudx ree be rbijxhladx ree bejn. <sup>3</sup> Din zi'c chi rusüdx bejn stijb bejn, zian ma batiaalguiiw ciudaro' guin gra ree bénguidxliuj par güün reeman graløj ree ni dxuudx. Abi' ree rey yu' ree loj guidxliuj ma been reeman ni dxuudx guin ree con ciuda guin, abi' ree bën rüjn negojs loj guidxliuj ma naj reeman rijcw por graczi ree ni dxuudx rajc ni.

<sup>4</sup> Dxel biguejnan cha' stijb bën gunee diizd xanyabaa rëbaman:

—Gol brii loj ciuda guin, da bejn reen, chitëë go'chidi loj ree dol ni rajc ni chitëë tëdidi gualzi ni gac ree loj ciuda guin. <sup>5</sup> Din dád zien xtol reeman zeel ma bidxinan xt xanyabaa, abi' Dios ad zayanladxtaman ni mal guin ree. <sup>6</sup> Gol beennë ciuda guin zi'cgajc beennën ben ren ree, gol been din yaguijxan xcastin tio'p volt mazri guial loj ni beennën bejn ree abi' gol basagdiajn tio'p volt mazri guial loj ni basagdiajn ben ren ree. <sup>7</sup> Gol basagdiaj ciuda guin naya zi'c babaan chi beenan ni dxuudx ree, abi' zi'c beenan xgab rëban: “Zooban guie zi'c tijb bën rniabee, ad najtan bën bizëjb ad yu' tëët dxej chu'nayan.” <sup>8</sup> Zeel tijbzi dxej guidxajg lasa' ree gualzi par ciuda guin, zi'c gualgüjt, gualrunaya, gualrliaan, dxel che'can con bajl. Din naroo xguialrniabee dux Dad ree Dios bën gudëëd casti ciuda guin.

<sup>9</sup> Abi' ree rey ni yu' loj guidxliuj, bën babaa ree guial been reeman ni dxuudx con ciuda guin, zoon reeman, naya sagdiaj reeman chi guguaa reeman go'xh ni caye'can. <sup>10</sup> Abi' zijt su reeman chi guguaa reeman casti ni cadëdan, dxel guiëb reeman:

—¡Probza lüj, probza lüj Babilonia, ciuda narooob ni guyu gojl par gra! Din tibrajtzi bi't casti par lüj.

<sup>11</sup> Abi' ree bén rüjn negojs loj guidxliuj zoon reeman zu tää luxdoo reeman naya por ciuda guin, din achutri sii ni ruto' reeman, <sup>12</sup> zi'c or, plajt, guiaj zagdxee ree, perl, lajd zagdxee ree, lajd sed ree culor murad con ni xnia, në graloj ree tabl ruree nejxh në graloj ree ni been reeman con ree tabl zagdxee, bronce, guiib con marmol në marfil. <sup>13</sup> Ad zajc täätri guto' reeman canel në graloj ree ni ruree nejxh, ad zajctri guto' reeman goxyaal, mirra, perfum, vin, sejt oliv, harin zagdxee, trigo, go'n, xiil, way, carrejt, ad zajc täätri ree guto' reeman bejn ree. <sup>14</sup> Abi' guiëb reeman loj ciuda guin:

—¡Ad rajptril guialnaza'c ni bayuladx da'til, tiblayaa ma banijtil zi'c gubanl con gra ree ni za'c ni gopil!

<sup>15</sup> Gra ree bén been negojs, bén gojc ree rijcw por ciuda guin, zijt su reeman guialrdxeb reeman casti ni cadëd ciuda guin. Zoon reeman, zazagdiaj reeman, zunaya reeman.

<sup>16</sup> Abi' guiëb reeman:

—¡Probza, probza ciuda narooob guin! Laan guial guzujchaawan con ree lajd zagdxee, lajd culor murad con ni xnia, laan guial guzujchaawan con or, con perl në con guiaj zagdxee <sup>17</sup> din, ¡tibrajtzi gunidloj gra ree guialnaza'c guin!

Gra ree bén zë lën barcw, zi'cgajc xcapitan ree barcw, gra ree mariner në los demazri ree bén rüjn dxiin lën barcw, guzudxe reeman zijt <sup>18</sup> chi baguiaa reeman go'xh ni cayë'c ciuda guin, abi' gurixdiaj reeman rëb reeman:

—¿Goc guyu tijb ciuda lasa' ciuda ro' guie?

<sup>19</sup> Abi' barooob yuj guijc reeman, roon reeman abi' gyunaya luxdoo reeman rëb reeman:

—¡Probza!, probza ciuda narooob guin por xguialnaza'can gra ree bén been negojs bén rajp ree barcw gojc reeman rijcw, din tibrajtzi gunidlojn.

<sup>20</sup> Dxel biguien cha' Bén na:

—Per lëjt Bén zojb ree xanyabaa, lëjt najdi xi apóstoles Jesucrist, lëjt Bén rudëed ree xtiidx Dios në los demazri ree Bén naj xbejn Dios, gol babaa por ni cazajc ciuda guin din zian cayüjn Dios xguialguxtisaman por ni beennë ciuda guin lëjt.

<sup>21</sup> Abi' tijb anjl gojl da't, gulesaman tijb guiaj narooob, zi'c tijb guiaj mulin abi' bazaalaman laan loj nijsdoo rëbaman:

—Zi'c bazalbin guiaj guie con guidib da gojlan zian nidoxh sac ciuda narooob Babilonia, abi' achutri guguaa Babilonia guin stijb. <sup>22</sup> Ad zaguietri ree cha' arp, ni'qui ree xinrucwejdx, ni'qui ree bidxa, ni'qui ree cha' trompejt ad zaguietri loj ciuda guin. Achutri bejn güün dxiin ni, ni'qui xnaquie' mulin ad zaguietri ni. <sup>23</sup> Achetri guij che'c loj ciuda guin, achutri guxhliaa. Gra ree Bén been negojs loj ciuda guin ganax Bén zojb loj gojc reeman loj guidxliuj, abi' ciuda guin basquieen gra ree nacion con ree ni dxuudx ni beenan.

<sup>24</sup> Abi' loj ciuda guin bagüjt reeman Bén badëed ree xtiidx Dios, në ree Bén riladx Dios, abi' por ciuda guin bagüjt reeman los demasri ree Bén ma güjt loj guidxliuj.

## 19

<sup>1</sup> Chi gulox baguian biguiejn tään zian, dxel dád rejs biguiejnan cha' zien da't ree Bén canee xanyabaa rëb reeman:

¡Quixtää Dios! Por dux Dad ree Dios zëed perdon, respejt në guialrniabee,

<sup>2</sup> din laaman waliman abi' xnejz rüjn xguialguxtisaman, ma badëedaman casti béngunaa dxuudx ni bazaalguiiw

bénguidxliuj ree con ree xni malaman,

ma been Dios guialguxtis con laaman persi baguijxaman ni bagüjtaman xbejnman.

<sup>3</sup> Abi' biguiejnan rëb reeman stijb:

—¡Quixtëe Dios! Ad yu't dxej yayü' go'xh ni caye'c ciuda guin.

<sup>4</sup> Abi' guigajlbitap ree bengol con guidap ree be naban guin bazuxib reeman delant loj xyagxhil Dios par gap da't reeman laaman respejt, rëb reeman:

—¡Quixtëe Dios! ¡Diidxza'c guin ree naj par laaman!

<sup>5</sup> Abi' niz lod za' yagxhil guin biguejnan cha' bën rëb:  
Gradi zi'c bengol zi'c xindoo  
gol gules xvalor dux Dad ree Dios,  
lëjt rüjndi laaman sirv abi' rajpidi laaman respejt.

### *Xgualruxhliaa bën naj zi'c xi xiil Dios*

<sup>6</sup> Biguejnan tëen zi'c chi rguien cha' zien da't bejn, o zi'c xnaquie' najsro', o zi'c chi rbidxa' da't guziaaw, rebaman:

¡Quixtëe Dios! Din ma canabee dux Dad ree Dios,  
bën ca' gra gualrniabee.

<sup>7</sup> Yan yadxë' du luxdoo ree zagdxë, yabaa ree yales tëe ree xvaloraman.  
Din ma bidxin dxej guxhliaa bën naj zi'c xi xiilaman  
abi' bën gac lacheelaman ma za'chaawaman.

<sup>8</sup> Najcwaman lajd zagdxë, ni naquich, naya rulaa tëen bacha'.  
Din lajd naquich guin rën guiëban ni zagdxë ni been ree xbejn Dios.

<sup>9</sup> Abi' na anjl guin lon:

—Bacaa: “Xiquilbaa ree bën naj gui't loj xgualruxhliaa bën naj zi'c xi xiil Dios.”

Na tëe anjl guin:

—Ni guie ree naj xtiidxli Dios.

<sup>10</sup> Dxel bazuxiban loj anjl guin par ga'p da'tan laaman respejt, per naman lon:

—Ad güünl zian. Din zi'cgajc lüj xmandadzi Dios cayguieen, zi'cgajc gra ree lasa'l bën wali ree rüjncwent xtiidx Jesucrist. Gojp da't respejt Dios.

Din por Jesús zëed ni rniee ree bën rudëed xtiidx Dios.

### *Bën dxiib tijb way naquich*

<sup>11</sup> Dxel baguian zobjyal xanyabaa baguia tëen tijb way naquich. Bën dxiib laab laman:  
Bën ruzoob xtiidxaman në bën wali, din xnejz rüjn xgualguxtisaman në xwadijlaman,

<sup>12</sup> guaialojman rulaan bacha' zi'c bajl abi' zien ree coron yu' guijcaman, tib lajtaman  
ca laj tijb bejn ni achut rignia', tijbzi laaman ragbee xhie rën guiëban, <sup>13</sup> guidib rejnzi  
xabaman, abi' laman Xtiidx Dios.

<sup>14</sup> Abi' ree xsuldadaman bën yu' xanyabaa zinal reeman laaman dxiib reeman way  
naquich, najcw reeman lajd zagdxë ni naquich ni naya tëe. <sup>15</sup> Ro'man ririi tijb espad ni  
nadoxh ro', con espad guin gudëedaman casti bënguidxliuj, në con var guiib nabeeman  
laa reeman. Zi'c rë'p bejn guijc uv par guixiin, zian gudëedaman loj reeman casti narooob  
ni zëed por Dios bën rajp gra gualrniabee. <sup>16</sup> Loj xcajpaman con cüdaman ca ree diidx ni  
rëb: “Rey bën rniabee loj ree rey në Dad bën rniabee loj ree dad.”

<sup>17</sup> Dxel baguian tijb anjl za'liman loj gubijdx, dád rejs rbidxa'man, rbejdxaman gra  
ree be ni rzuj xanyabaa, rëbaman:

—Gol guda, gol bachajg lasa'di lod gunee Dios ni gawidi zro' da't, <sup>18</sup> zi'c xbëel ree rey,  
xbëel ree capitan, xbëel ree bën achut rüjn gan, zi'c xbëel ree way, xbëel ree bën rbib laa  
reeb, xbëel gra ree bejn, zi'c xbëel ree bën naj zi'c bën nado' në xbëel ree bën ad najt zi'c  
bën nado', zi'c xi bëel ree bengol në ree xindoo.

<sup>19</sup> Dxel baguian monstroo con ree rey yu' loj guidxliuj në ree xsuldad reeman, nadxag  
lasa' reeman par til reeman con bën dxiib way naquich guin con ree xsuldadaman.

<sup>20</sup> Per laa reeman gunaaz reeman monstroo guin con bën rusquiee rëb rudëe xtiidx  
Dios loj ree bejn, bën rüjn milagr niz loj monstroo guin. Abi' por ree milagr guin  
basquieeman bën guyu ree xsen monstroo guin gojp tëe reeman respejt xfigurib. Abi'

monstruo guin con bén rusquiee ni rëb rudëe xtiidx Dios loj ree bejn, grop reeman guidib naban reeman bazaal reeman laa reeman loj bajl lod caye'c azufre. <sup>21</sup> Abi' los demazri ree xbejn monstruo guin güjt reeman con espad ni ririi ro' bén dxiib way naquich guin, abi' gudaw ree be ni rzuj xanyabaa laa reeman, xt gudxa lën reeb gudaw ree xbëel reeman.

## 20

### *Ti mil ijz*

<sup>1</sup> Dxel baguian zidguiajt tijb anjl xanyabaa, ca'man xguiibliaw bizë ni ad yu't lod rliox, ca' tēeman tijb caden narooob. <sup>2</sup> Abi' gunaazaman dragon, bëel gulal ni la xindxab në satanás, guxhiiman laab con caden guin por timil ijz. <sup>3</sup> Dxel bazaalaman laab lën bizë ni ad yu't lod rliox abi' basiaawdxi'chaman bizë guin chitëe gusquieeri reeb bejn ree loj guidxliuj xt chi ma bayaaloj timil ijz dxel yariib lën bizë guin tiblädëd.

<sup>4</sup> Dxel baguian yagxhil zagdxë ree lasa' xyagxhil ree rey, lojn zojb ree bén ni ma cwa' guialrniabee par güün reeman guialguxtis. Baguia tēen xsprijt ree bén ni biru' yëjn guial gutie'ch reeman xtiidx Dios në gra ni ragbee reeman por Jesús. Laa reeman ad gojpt respejt monstruo guin ni'qui xfigurib abi' ad cwëjbt reeman niu xsenb lucwaj reeman o yaa reeman. Abi' baguian baban reeman stijb, dxel gunabee reeman con Cristo timil ijz. <sup>5</sup> Laan naj ni yaloj ni yaban ree bengüt, per stijb ree bengüt ad zabant reeman xt yaza' timil ijz. <sup>6</sup> ¡Xiquilbaa ree bén yaban yaloj! Laa reeman ma naya niz loj Dios abi' ad zayaltri reeman guialgüjt rarojp, laa reeman gac xbixhioz Dios con xbixhioz Cristo abi' nabeenë reeman laaman timil ijz guin.

<sup>7</sup> Chi ma bayaaloj timil ijz guin, dxel yarii xindxab guin lod nayaawix <sup>8</sup> Par gusquieex bejn ree guidib guidxliuj. Gusquieex Gog në Magog din guchajg lasa' ree xbejn reeman din güün reeman wadijl. Abi' guido'p zien da't reeman zi'c üx ni riga' ro' nijsdoo. <sup>9</sup> Gra lad gui't reeman, guido'p reeman gadëd lod za' ree xbejn Dios në gadëd ro' guiedx lod rënman. Per laaman diizd xanyabaa guixhiaalaman bajl ni guze'c bén guin ree xt yadëj reeman. <sup>10</sup> Abi' xindxab ni basquiee laa reeman laax chu' loj bajl lod caye'c azufre, lod ma za' monstruo con bén rusquiee rëb rudëe xtiidx Dios loj ree bejn, lod ad yu't dxej yarii reeman lod sagdiaj tēe reeman dxej guiaal.

### *Yadëed ree bejn cwent loj Dios*

<sup>11</sup> Dxel baguian tijb yagxhil zi'c xi yagxhil rey, tijb yagxhil narooob ni naquich. Lojn zojb tijb bejn abi' delant lojman biquied guidxliuj në xanyabaa, gunidloj reen tiblyaa. <sup>12</sup> Dxel baguian guial delant loj yagxhil guin lod zojb Dios, ni za' ree bengüt, zi'c ree bengol zi'c ree xindobëz. Abi' bixal loj ree libr, dxel bixal loj stijb libr ni la xlibr guialnaban. Dxel been Dios xguialguxtisaman con ree bengüt guin zi'c ca loj ree libr guin xcwent ree ni been reeman. <sup>13</sup> Nijsdoo bayü xbengütan, abi' guialgüjt bayü xbengütan, abi' ree bengüt ni za' lod cabëz reeman guidxin dxej ni yadëed reeman cwent loj Dios, bibig reeman yagaj din güün xguialguxtis Dios con laa reeman bal conin been reeman. <sup>14</sup> Dxel guialgüjt con lod guzu ree bengüt gulëjz reeman guidxin dxej yadëed reeman cwent loj Dios, grop reen bazaal reeman loj bajl, bajl guin naj guialgüjt barojp. <sup>15</sup> Abi' loj gajc bajl guin bayal ree bén ad cat laj loj xlibr guialnaban.

## 21

### *Xanyabaa cüb con guidxliuj cüb*

<sup>1</sup> Chi gulox baguian ni guin ree, dxel baguian tijb xanyabaa cüb con tijb guidxliuj cüb, din xanyabaa con guidxliuj ni guyu diizd yaloj ma gunijt reen, ziangajc nijsdoo. <sup>2</sup> Dxel baguian Jerusalén cüb, xguiedx narooob Dios zidguiajtan xi xanyabaa Dios. Dád

za'chaawan zi'c rzujchaaw tijb biingunaa chi ma guxhliaam con xin gac lacheelim.

<sup>3</sup> Abi' dád rejs biguejnan cha' b́en gunee lod za' xyagxhil Dios, ŕebaman:

—Ma za' Dios con ree bejn, guibanńeman laa reeman abi' laa reeman gac xbejnman, guiáad laaman suman con laa reeman abi' gacaman xDios reeman. <sup>4</sup> Laaman gutiaa loj reeman nijs biin reeman, dxel achetri guialgüjt chu', guialroon, guialrunaya ńe guialzi, din gra ree ni guyu gocli ma gudéd reen.

<sup>5</sup> Abi' b́en zojb loj yagxhil guin, naman:

—Gra cayünan nicüb.

Na t́eëman:

—Bacaa ree diidx guie, din laa reen naj diidxli ni rayal chililadx bejn.

<sup>6</sup> Dxel naman:

—Ma gojc ni rayal gac. Naj naj zi'c A con Z, din tijbzi naj rniabee diizd guia'xchej ńe par tiblayaa. B́en re'c nijs, naj yazaladx nijs lojman nijs ni ririi lod rajch nijs ni runee guialnaban.

<sup>7</sup> B́en ni güün gan loj dol, laaman yayal gra ree ni guin. Abi' naj gac xDiosaman guiáad laaman gac da xi'nán. <sup>8</sup> Per ree b́en rdxeb sudxi'ch loj ni rliladx reeman naj, b́en ad rliladxt ree naj, b́en ruladx ree güün ganax ni mal, b́en rugüjt ree bejn, b́en rüjn ree nidxuudx con ree b́en ad najt lacheel reeman, b́en rüjn ree guialbidxaa, b́en rën ree ni naladx reeman naj ree Dios, ńe gra ree b́en rusquiee, laa reeman rayal loj bajl lod caye'c azufre, bajl guin naj guialgüjt raroj.

### *Jerusalén cüb*

<sup>9</sup> Dxel tijb guigajdx ree anjl b́en ca' ree guigajdx ree cojp ni guidxa guigajdx ree guialzi bigra guin, bi'taman lod za'n, naman lon:

—Guda, din gulün lüj biinxdüb ni gac lacheel b́en naj zi'c xi xiil Dios.

<sup>10</sup> Abi' por Sprijt biné anjl guin naj guijc tijb guia' naroo, guijc tijb guia' ya. Ni balüüman naj Jerusalén, xciuda naroo Dios zidguiajtan xi xanyabaa Dios. <sup>11</sup> Rulaan bacha' por xbacha' Dios. Abi' bacha' guin naj zi'c xbacha' tijb guiaj lasajc, guiaj zagdx ni la Jaspe, nayni zi'c tijb vidr. <sup>12</sup> Gadéd ro' ciuda guin naj tijb ze' naroo, tijb ze' ya con chiptio'p ree port, abi' tijb gaj ro' ree port guin za' tijb gaj ree anjl. Lad ree port guin ca zi'c la guidxiptio'p cwaa ree b́en Israel, tijb gaj lad port guin ca zi'c la tibcwaa gaj reeman. <sup>13</sup> Choon ree port guin naj niz lod rliejn gubijdx, abi' choon reen naj niz lod ŕeëz gubijdx, za choon ree port guin naj niz lad norte, za choonan naj niz lad sur. <sup>14</sup> Abi' con chiptio'p guiaj naj xcimiant ze' guin, dxel loj ree guiaj guin ca laj ree guidxiptio'p ree xi apóstoles b́en naj zi'c xi xiil Dios.

<sup>15</sup> Anjl ni guneené naj ca'man tijb var or din tia'beenéman ciuda guin con ree port guin con ze' guin.

<sup>16</sup> Ciuda guin najn ni cuadrad, zi'cgajc zioolan ziangajc gulajgan. Cwa'bee anjl guin laan con var or ni ca'man, xi mididan naj tio'p mil tio'p gayuu kilometro, zi'c guyoolan ziangajc yan, ziangajc gulajgan. <sup>17</sup> Dxel cwa'man midid ze' guin, abi' ze' guin najn gayojnbitap mejtr zi'c naj xmidid bénguidxliuj zi'c bare'xh anjl guinan.

<sup>18</sup> Ze' guin gojcnén guiaj ni la Jaspe, abi' ciuda guin najnén ganax or, zi'cgajczi naj vidr nayni. <sup>19</sup> Xguiaj cimiant ze' guin najcchaawnén gadxagayaa ree guiaj zagdx. Guiaj yaloj guin najcchaawnén con guiaj ni la Jaspe, guiaj barojp guin najcchaawnén guiaj ni la zafiro, guiaj bayon guin najcchaawnén guiaj ni la ágata, guiaj badajp guin najcchaawnén guiaj ni la esmeralda, <sup>20</sup> guiaj ni bagaay guin najcchaawnén guiaj ni la ónice, guiaj ni baxo'p guin najcchaawnén guiaj ni la cornalina, guiaj bagajdx guin najcchaawnén guiaj ni la crisólito, guiaj goc xhujn najcchaawnén con guiaj ni la berilo, guiaj goc gaa najcchaawnén guiaj ni la topacio, guiaj ni goc chii najcchaawnén guiaj ni la crisoprasa, guiaj ni goc chiptib najcchaawnén guiaj ni la jacinto, guiaj ni goc chiptio'p najcchaawnén guiaj ni la amatista. <sup>21</sup> Gra guidxiptio'p ree xport ciuda guin gojcné reen

con chiptio'p ree perl, tijb gaj perl guin najnë tijbgaj port. Abi' nejj narooob ni naa galay ciuda guin najn ganax or, zi'c tal naj tijb vidr ni rdëd biani grop xijch.

<sup>22</sup> Ni'qui tijb yadoo ad baguiatan loj ciuda guin din dux Dad ree Dios bën ca' gra guialrniabee con bën naj zi'c xi xiilaman, laa reeman naj xyadoo ciuda guin. <sup>23</sup> Abi' loj ciuda guin ad rüjnt naguiejn gusni gubijdx ni'qui bëëw, din xbacha' Dios rusni ni abi' bën naj zi'c xi xiilaman laaman naj bajl ni. <sup>24</sup> Bën zëed ree lod rent lod ren sa reeman loj bacha' guin, bën ma naj ree perdon. Abi' ree rey loj guidxliuj guie guidnë xguialza'cdxoon reeman loj ciuda guin. <sup>25</sup> Xport ciuda guin ad yu't dxej yaaw reen radxe, abi' ni ad zut guiaal. <sup>26</sup> Gra xguialza'cdxoon con gra xguialzagdx ree bën zëed lood rent lood ren, guidxin reen loj ciuda guin. <sup>27</sup> Per ad yu't dxej chu' ni dxuudx loj ciuda guin, ni'qui ree bën rüjn ni dxuudx ni'qui ree bën rusquiee, bën cazi ree laj loj xlibr guialnaban ni ca' bën naj zi'c xi xiil Dios, laaz reeman chu' loj ciuda guin.

## 22

<sup>1</sup> Balüü tëë anjl guin lon tijb guiw naya ni razaladx guialnaban, naynidxuj zi'c tijb guiaawajn. Ririi nijs guin lod za' xyagxhil Dios con bën naj zi'c xi xiilaman, <sup>2</sup> abi' zën galay loj nejj narooob ni naa galay ciuda guin. Galay nejj guin naa guiw guin, abi' grop lad guiw guin zojb yag ni runee guialnaban ni rtia chiptio'p loj ninejxh, gazobëëw ridxaa ninejxh ni rtia lojn. Abi' ree xbalag yag guin rüjn reen sirv par gac bejn nadaan. <sup>3</sup> Achetri ni mal chu' ni, abi' Dios con bën naj zi'c xi xiilaman cwe loj xi yagxhil reeman guiáad ree xbejn reeman gap da't laa reeman respejt. <sup>4</sup> Abi' ni guguaaloj reeman Dios, bën ni ca ree lajman lucwaj. <sup>5</sup> Achetri guiaal chu' ni, ad ryaadxt bajl ni'qui gubijdx din dux Dad ree Dios gusni ni, abi' ma nabee reeman tiblayaa con laaman.

### *Ma zidyob gui't Jesucrist*

<sup>6</sup> Dxel na anjl guin lon:

—Diidx guie ree naj ni diidxli ni rayal chililadx ree bejn. Abi' Dios bën razaladx diidx loj ree bën rudëed xtiidxaman loj ree bejn, laaman guxhaal xi anjl din gulüüman bejn ree ni ma zidyob gac. <sup>7</sup> Dad Jesucrist rëb guial nayob gui'taman.

¡Xiquilbaa ree bën ridxga' ni ca loj libr guie ni rugojn ni gac!

<sup>8</sup> Naj Waj, baguian biguiejn tëën ni guin ree. Abi' chi gulox baguian biguiejn tëën ni guin ree, dxel bazuxiban par ga'p da'tan respejt anjl ni balüü ree ni guin lon. <sup>9</sup> Per naman lon:

—Ad güünl zian. Din naj zi'cgajc lüj, xmandadzi Dios cayguieen, zi'cgajc ree xcompniaril bën rudëed ree xtiidx Dios, në ree bën ridxga' ree ni ca loj libr guie. Zeel Dios gojp da't respejt.

<sup>10</sup> Na tëëman lon:

—Ad guquie'chil diidx ni zëed ree loj libr guie, diidx ni rugojn ree ni gac, din ma zidyob gac reen. <sup>11</sup> Gol basa'n ree ben mal con xni mal reeman, abi' ree bën naban nadxuudx zu naban reeman nadxuudx bal zian ruladx reeman. Per bën rüjn ree zi'c rayal gusnuu güün reeman zi'c rayal abi' ree bën naban zi'c rën Dios gusnuu guiban reeman zi'c rën Dios.

<sup>12</sup> Rëb Jesucrist:

—Gol badxe'guijc guial nayob guialan, abi' guidne'n ni rayal tijbgaj bejn bal gonin been tijbgajman. <sup>13</sup> Naj naj zi'c lejtr A con lejtr Z, lejtr ni rzulojnë ni rlioxnë tëë alfabeto, din tijbzi naj rniabee diizd guia'xchej në par tiblayaa.

<sup>14</sup> Xiquilbaa ree bën ni naj zi'c ree bën ma gudiib xab guial ridxga' reeman xtiidx Dios, din gac chu' reeman niz ro' xport ciuda guin din gap tëë reeman derejch gaw reeman ni nejxh ni rtia loj yag runee guialnaban. <sup>15</sup> Abi' xijch ciuda guin yaya'n ree benguijdx, bën rüjn ree guialbidxaa, bën rüjn ree ni dxuudx con ree bën ad najt lacheel reeman, bën rugüjt ree bejn, bën ni rajp ree respejt ni naladx reeman naj dios, në ree bën ruladx

cwëëguijc ni rusquiee rniee tëë reeman diidx rusquiee ree. <sup>16</sup>—Naj Jesús ma guxhal da anjlan ðin gugojnman lëjt gra ree ni guie ðin guiëbidi laan loj gra ree bën rliladx naj. Naj naj quijb xdiaa rey Davi, loj xdiaaman zialan. Naj naj zi'c bajl nayni ni rliejn rsildoo.

<sup>17</sup> XSprijt Dios con biinxdüb ni gac lacheel bën naj zi'c xi xiil Dios rëb reeman:

—Guda.

Abi' bën rigueijn rniee reeman zian, rëb gajcaman:

—Guda.

Chutëëz bën re'c nijs, gol guda, abi' bën rën zajc guië'man nijs runee guialnaban lagajzi.

<sup>18</sup> Gra ree bën rigueijn ree diidx ni zëed loj libr guie ni gac, naj rni lojdi bal chu bën gucaa guijc ni zëed loj libr guie, ziangajc zusro' Dios guialzi ni zëed loj libr guie par laaman. <sup>19</sup> Ziangajc bal chu chiquied xhie diidx guijc ree diidx ni zëed loj libr guie ni gac ziangajc chiquied Dios guijc ni rayalaman loj yag runee guialnaban ni ruza't libr guie ad zayu tëëtaman loj xciuda Dios ni ruza't libr guie.

<sup>20</sup> Bën ragbee guial diidxli naj gra ree ni guie, rëbaman:

—Walin, nayob guialan.

Zian gacan Dad Jesús, ¡Guda!

<sup>21</sup> Dad Jesús güünle' gradi. Amén.